


Nuevo Testamento

Guaraní Pe



New Testament in Guaraní, Western Bolivian (BL:gnw:Guaraní,
Western Bolivian)

Nuevo Testamento Guaraní Pe

New Testament in Guaraní, Western Bolivian (BL:gnw:Guaraní, Western Bolivian)
copyright © 2012 Wycliffe Bible Translators, Inc.

Language: Guaraní, Western Bolivian

Translation by: Wycliffe Bible Translators, Inc.

Guaraní, Western Bolivian [gnw], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guaraní, Western Bolivian

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 29 Jan 2022 from source files dated 29 Jan 2022

09a8356f-416c-5877-91cf-40f681db481e

Contents

SAN MATEO	1
SAN MARCOS	42
SAN LUCAS	68
SAN JUAN	111
HECHOS	141
ROMANOS	176
1 CORINTIOS	192
2 CORINTIOS	207
GÁLATAS	217
EFESIOS	222
FILIPENSES	227
COLOSENSES	231
1 TESALONICENSES	235
2 TESALONICENSES	238
1 TIMOTEO	240
2 TIMOTEO	245
TITO	248
FILEMÓN	250
HEBREOS	251
SANTIAGO	264
1 PEDRO	268
2 PEDRO	273
1 JUAN	276
2 JUAN	280
3 JUAN	281
JUDAS	282
APOCALIPSIS	284

EL SANTO EVANGELIO SEGUN SAN MATEO

*Jesucristo itenondegua reta
(Lc 3.23-38)*

¹ Tamimbeu cua tupapire pe Jesucristo itenondegua reta. Jesucristo co jae David iñemoñaa reta pegua. Jae ramiño vi jae co Abraham iñemoñaa reta pegua.

² Abraham iñemoñaa Isaac, jare Isaac iñemoñaa Jacob, jare Jacob iñemoñaa reta Judá jare tiquei reta jare tivi reta. ³ Jare Judá umiñemoña Tamar güi Fares jare Zara. Jare Fares iñemoñaa Esrom, jare Esrom iñemoñaa Aram. ⁴ Jare Aram iñemoñaa Aminadab, jare Aminadab iñemoñaa Naasón, jare Naasón iñemoñaa Salmón. ⁵ Jare Salmón umiñemoña Rahab güi Booz. Jare Booz umiñemoña Rut güi Obed. Jare Obed iñemoñaa Isaí. ⁶ Jare Isaí iñemoñaa David. Jae co Israel pegua reta juvicha guasu.

Jare mburuvicha guasu David umiñemoña Urías jembircocue güi Salomón. ⁷ Jare Salomón iñemoñaa Roboam, jare Roboam iñemoñaa Abías, jare Abías iñemoñaa Asa. ⁸ Jare Asa iñemoñaa Josafat, jare Josafat iñemoñaa Joram, jare Joram iñemoñaa Uzías. ⁹ Jare Uzías iñemoñaa Jotam, jare Jotam iñemoñaa Acaz, jare Acaz iñemoñaa Ezequías. ¹⁰ Jare Ezequías iñemoñaa Manasés, jare Manasés iñemoñaa Amón, jare Amón iñemoñaa Josías. ¹¹ Jare Josías iñemoñaa reta Jeconías jare tivi reta. Jare Jeconías ico yave, ivi Babilonia pegua reta umiamiri Israel pegua reta jare güüraa jeta Israel pegua reta Babilonia pe.

¹² Jare yugüiraa ma Babilonia pe yave, Jeconías iñemoñaa Salatiel, jare Salatiel iñemoñaa Zorobabel. ¹³ Jare Zorobabel iñemoñaa Abiud, jare Abiud iñemoñaa Eliaquim, jare Eliaquim iñemoñaa Azor. ¹⁴ Jare Azor iñemoñaa Sadoc, jare Sadoc iñemoñaa Aquim, jare Aquim iñemoñaa Eliud. ¹⁵ Jare Eliud iñemoñaa Eleazar, jare Eleazar iñemoñaa Matán, jare Matán iñemoñaa Jacob. ¹⁶ Jare Jacob iñemoñaa José - jae co María ime. Jare María imembí Jesús - jae co Cristo jee vae.

¹⁷ Jáeramo yaipapa catorce ñemoñaa Abraham güi David pe. Jae ramiño vi yaipapa catorce ñemoñaa David güi Jeconías pe. Echa'á Jeconías ico yave, Israel pegua reta uyereraaca Babilonia pe. Jae ramiño vi yaipapa catorce ñemoñaa Jeconías güi Cristo pe.

*Jesucristo oa vae regua
(Lc 2.1-7)*

¹⁸ Añave tamimbeu quirái Jesucristo oa ichi güi vae regua. María José ndive umendata yave, ndei José güüreco mbove, uyecuua ipurúa oí. Ipurúa co Espíritu Santo imbaepuere pe. ¹⁹ Jayave José ipía pe uyemingueta jei vaerá chupe ndarau umenda jae ndive, érei uiporta'á uyapo opaete vae reta jovaque. Echa'á José penti cuimbae jipi vae co jare uiporta'á umímaraca María opaete vae reta jovaque. ²⁰ Érei cua re ipía pe uyemingueta oí rambueve, penti ángel yandeYa pe uyeyocui vae uyecuua chupe ipau pe jare jei chupe:

—José. Nde co jae David iñemoñaa reta pegua. Ndepuere nemenda María ndive ndequiye mbae reve. Echa'á ipurúa oí Espíritu Santo imbaepuere pe —jei—. ²¹ Jare imembita penti cuimbae jare nembjeeta Jesús. Echa'á jae umbiasata ivi pegua reta. Echa'á umbaita imbaeyoa reta —jei.

²² Jare opaete cua uyeyapo, Tumpa iñee aracae umimbeu vae rupi yandeYa jei vae uyeyapo vaerá.
²³ Echa'á jei cuarái:

“Mase, penti cuñatai cuimbae güüreco'á etei vae ipuruata jare imembita penti cuimbae. Jare umbijeeta reta Emanuel.”

Jucuarái jei. (Cua tee uiporta jei: “Tumpa ime yande ndive oí”.)

²⁴ Jayave José usareco yave, umenda María ndive ángel yandeYa pe uyeyocui vae jei chupe ramí.

²⁵ Érei José opoco'á María re ndei imembirípi oa mbove. Jare María imembí oa ma yave, José umbijee Jesús.

Cuimbae yasitata re uyemboe vae reta

¹ Jesús oa ma yave tenta guasu Belén ivi Judea pegua pe, Herodes ico mburuvicha guasurá. Jare jocua ara rupi yugüeru cuimbae reta yasitata re uyemboe vae reta guarasi oé vae cotí güi uväe tenta guasu Jerusalén pe. ² Jare jei reta:

—¿Quiape pa ime oí sambiai judío reta juvicha guasurá icota vae? Echa'á nduecha yasitata uicuaaca oreve vae guarasi oé vae cotí. Jáeramo ndoyu ma nuvâe numbiadora vaerá —jei reta.

³ Mburuvicha guasu Herodes cuá uyandu yave, uyemipia'ã. Opaete Jerusalén pegua reta uyemipia'ã vi. ⁴ Jayave Herodes umbatíca opaete sacerdote reta itenondegua reta jare mboroyocu re oporomboe vae reta, jare upirandu chupe reta quiape ra oata Cristo, Tumpa ombou vae. ⁵ Jare jae reta jei chupe:

—Oata Belén Judea pegua pe. Echa'ã Tumpa iñee aracae umimbeu vae jei cuarái:

⁶ ‘Belén Judea pegua penti tenta guasu Judea pegua icavi vae.

Echa'ã joco pe oata penti mburuvicharã.

Jae oyocuita Israel pegua reta.

Israel pegua reta chembæ co.’

Jucuarái jei —jei reta chupe.

⁷ Jayave Herodes uenica viari jocua yasitata re uyemboe vae reta, jare upirandu chupe reta quirái yave ra uyecuaa jocua yasitata. ⁸ Jayave Herodes jei chupe reta:

—Pecua Belén pe peeca cavi jocua sambiai. Jare pevæ ma chupe yave, peyu ye cuá pe pemimbeu cheve, che vi aa vaerã ambiadora —jei.

⁹ Uyandu reta ma yave mburuvicha guasu jei vae, cuimbae reta yugüiraa Jerusalén güi. Jare uecha reta ye jocua yasitata guarasi oë vae coti ñugüinoi yave uecha vae. Jare yasitata oo jae reta jenonde uyemboi sambiai oï vae íarambo. ¹⁰ Jocua yasitata uecha reta yave, cuimbae reta tuicha rupi uyerovia.

¹¹ Jare uique reta yave sambiai oï vae pe, uecha reta sambiai ichi ndive - jae co María jee vae. Jayave jae reta uyeatíca jare umbiadora sambiai. Jayave uipea jívita reta jare umee sambiai pe güeru reta chupe vae - oro jare mbae ipiche cavi vae reta incienso jare mirra jee vae.

¹² Jare Tumpa umimbeu cuimbae reta pe ipau pe agüiye vaerã yugüiraa ye Herodes jenta rupi. Jáeramo yugüiraa ye iivi pe íru tape rupi.

Herodes uyucaca sambiai reta

¹³ Jare cuimbae reta yugüiraa ma yave, penti ángel yandeYa pe uyeyocui vae uyecuaa José pe ipau pe jare jei chupe:

—Epúa. Eraa sambiai jare ichi pecua Egípto pe. Pepita joco pe amimbeu ye ndeve regua. Echa'ã Herodes uecacata sambiai uyucaca vaerã —jei.

¹⁴ Jayave José upúa, jare pítu oï reve güiraa sambiai jare ichi iivi Egípto coti. ¹⁵ Jare jae reta upíta Egípto pe Herodes umano regua. Jucuarái uyapo José, uyeyapo vaerã Tumpa iñee aracae umimbeu vae rupi yandeYa jei vae. Echa'ã jei cuarái: “Egípto güi aeni cheRai.”

¹⁶ Jayave Herodes uicuua jocua yasitata re uyemboe vae reta uyapo'ã co jae jei vae. Jáeramo tanta rupi pochi jare omundo sundaro reta uyuca vaerã opaete sambiai cuimbae mi retaño Belén pe jare Belén iyipí rupi ñugüinoi vae reta ndei mocui año güinoini vae. Echa'ã yasitata re uyemboe vae reta opou Herodes pe yave, Herodes upirandu cavi chupe reta quirái yave ra uecha yasitata.

¹⁷ Jare jucuarái uyeyapo Tumpa iñee aracae umimbeu vae Jeremías jei vae. ¹⁸ Echa'ã jei cuarái: “Ramá pe uyendu née.

Uyendu uyao ñugüinoi tuicha ipiatiti vae reta.

Raquel uyao oï imembí reta re.

Ipuere'á etei quía umbipiácatu imembí reta umano ma ramo.”

Jucuarái jei.

¹⁹ Ërei Herodes umano ma yave, José Egípto pe oï rambueve, penti ángel yandeYa pe uyeyocui vae uyecuaa José pe ipau pe. ²⁰ Jare jei chupe:

—Epúa. Eraa ye sambiai jare ichi Israel pegua reta iivi pe. Echa'ã uipota têi uyucaca sambiai vae reta umano ma —jei.

²¹ Jayave José upúa jare güiraa sambiai jare ichi Israel pegua reta iivi pe. ²² Ërei uyandu quirái Arquelao ico mburuvicha guasurã Judea pe. Echa'ã Arquelao Herodes tai co. Jayave José uquiyé oo vaerã Judea pe. ²³ Jayave Tumpa umimbeu José pe ipau pe oo vaerã iivi Galilea pe. Jáeramo jocotí oo. ²⁴ Jare José oo uvæ penti tenta guasu Nazaret jee vae pe jare joco pe ico, uyeyapo vaerã Tumpa iñee aracae umimbeu vae reta jei vae. Echa'ã jei reta cuarái: “Íru vae reta umbijeeta penti Nazaret pegua.”

Juan upurumbibautiza vae umimbeu Tumpa iñee

(Mr 1.1-8; Lc 3.1-20; Jn 1.19-28)

¹ Jocua ara reta rupi ou Juan ñana Judea pe oï vae pe upurumbibautiza jare umimbeu Tumpa iñee.

² Jae jei:

—Peeya piyemingueta icavi mbae vae pepia pe oï vae. Echa'ã outa ma uvæ mboroyocuia ara pegua —jei.

³ Tumpa iñee aracae umimbeu vae Isaías jee vae imiari Juan re. Echa'ã Isaías jei cuarái:

“Jae iñeeäta reve jeita ñana pe:

'Piyapicatu yandeYa japerā.
Pemísimi tape.' ”
Jucuarāi jei.

⁴ Jare Juan jemimonde maemimba camello jee vae jaagüe pegua co, jare jumbicuua guacapi pegua co. Jare jembiu co jae tucu jare ei ñana rupigua. ⁵ Jare jeta Jerusalén pegua reta jare Judea pegua reta jare jeta tenta iäca Jordán iyipi rupi ñugüinoi vae pegua reta yugüiraa Juan oí vae pe. ⁶ Jare Juan umbibautiza reta iäca Jordán pe imbaeyoa reta opa umimbeu yave. ⁷ Jare jeta fariseo reta jare saduceo reta yugüeru Juan oí vae pe, jae umbibautiza vaerā. Jare Juan uecha reta yave, jei chupe reta:

—Pe reta co jae mboi reta rami. ¿Quía pa umimbeu peve piyerova vaerā Tumpa coti agüiye vaerā Tumpa uiporaraca peve? ⁸ Piyapo icavi vae, jucuarāi picuaaca vaerā añetete peeya co piyeminguela icavi mbae vae pepia pe oí vae. ⁹ Agüiye pere piyupe pepia pe: 'Yandetenondegua co jae Abraham.' Echa'á che jae peve cuá: Tumpa ipuere uyapo cuá ita reta güi Abraham iñemoñaa retardá—jei Juan chupe reta—. ¹⁰ Yamijaanga penti temiti. Temiti ía icavi'á yave, iya uyasta japo reve jare uaipi. Jae ramíni vi piyapo'á yave icavi vae, Tumpa uiporaracata peve—jei—, ¹¹ Che pumbibautiza i pe piyeminguela icavi mbae vae pepia pe oí vae peeya yave. Ërei cheraiue rupi outa ipuere ete chegüi vae. Jupi'á co che amboi araa vaerā ipipasa. Jae pembibautizata Espíritu Santo pe jare tata pe—jei—, ¹² Jae co trigo uipoo vae rami. Echa'á trigo uipoo vae umbibeve trigo uequi vaerā íti. Jayave uñuvatu trigo jiru pe. Ërei uaipi iti tata pe. Tata Cristo uiporuta vae opa mbae vae co—jei.

*Juan umbibautiza Jesús
(Mr 1.9-11; Lc 3.21-22)*

¹³ Jare Jesús ou Galilea güi uvae Jordán pe Juan oí vae pe, Juan pe uyembibautizaca vaerā. ¹⁴ Ërei Juan nñatéi umbibautiza Jesús. Jáeramo jei chupe:

—¿Maera pa ndipota che numbibautiza vaerā? Echa'á icavi co nde chembibautiza vaerā—jei.

¹⁵ Jayave Jesús jei chupe:

—Icavi co nde chembibautiza vaerā añaave. Echa'á jucuarāi icavi co yayapo vaerā opaete jupi vae—jei.

Jayave Juan umbibautiza Jesús. ¹⁶ Jare Juan umbibautiza ma yave, Jesús oé i güi. Jare jupivoi uecha ara uyepea oí, jare uecha vi Tumpa iEspíritu ugüeyi jese picasu rami. ¹⁷ Jare jupivoi uyendu ñee ara güi jei:

—Cua co jae cheRaí aau ete vae. Chembiyerovia ete—jei.

4

*Aña guasu umingueta Jesús uyavica vaerā tēi chupe
(Mr 1.12-13; Lc 4.1-13)*

¹ Jayave Espíritu Santo güiraa Jesús ñnaa pe. Jare joco pe aña guasu umingueta uyavica vaerā tēi chupe. ² Jare Jesús jou'á mbae ave cuarenta ara. Jáeramo cuarenta ara uasa ma yave, iyembai. ³ Jayave aña guasu umingueta uyavica vaerā tēi chupe.

—Nde co jae Tumpa Taí yave, ere cua ita reta pe uyeyapo vaerā mbiyaperá—jei.

⁴ Ërei Jesús jei chupe:

—Tumpa iñee pe uyecuatía oí cuarái:

'Icavi co ivi pegua reta jou vaerā mbiyape güinoi vaerā tecove.

Ërei icavi ete co uyapisaca vaerā Tumpa iñee re jare uyapo vaerā jei vae güinoi vaerā tecove opa mbae vae.'

Jucuarāi uyecuatía oí—jei.

⁵ Jayave aña guasu güiraa Jesús Jerusalén pe jare umbuyupi Tumpa jo iyapite re. ⁶ Jayave jei chupe:

—Nde co jae Tumpa Taí yave, ea cua güi. Echa'á Tumpa iñee pe uyecuatía oí cuarái:

'Tumpa oyocuita ángel reta uyandareco vaerā nderé.

Ipo pe ndepisi ndeocota reta,
agüiye vaerā ndepi uyererocua ita re.'

Jucuarāi uyecuatía oí—jei.

⁷ Jayave Jesús jei chupe:

—Tumpa iñee pe uyecuatía oí cuarái: 'Che co jae ndeYa Tumpa. Agüiye mbae iyapo ndicuua vaerā tuicha ra chepiaguasu.' Jucuarāi uyecuatía oí—jei.

⁸ Jayave aña guasu güiraa Jesús penti ivitu guasu ivate vae re jare uechaca chupe opaete mburuvicha guasu reta iporoyocuia ivi pe ñugüinoi vae reta opaete ipóra vae reve. ⁹ Jayave aña guasu jei chupe:

—Tamee ndeve opaete cua, ndiyeaticha yave chembiadora vaerā.

¹⁰ Jayave Jesús jei chupe:

—Esiri chegüi, Satanás. Echa'á Tumpa iñee pe uyecuatía oí cuarái: 'Che co jae ndeYa Tumpa. Chembiadora. Jaeño cheve iyeyocui.' Jucuarāi uyecuatía oí—jei.

¹¹ Jayave aña guasu usiri Jesús güi, jare jupivoi yugüeru ángel reta ombori Jesús.

*Jesús umbipi iparaviquí
(Mr 1.14-15; Lc 4.14-15)*

¹² Jare Jesús uicuua ma yave Juan uyemingueca ma co peresoriru pe, oo Galilea pe.¹³ Oo Nazaret güi uvae tenta guasu Capernaum pe jare joco pe ico, (Capernaum oí i guasu jembeí pe Zabulón jare Neftalí iivi pe)¹⁴ uyeyapo vaerā Tumpa iñee aracae umimbeu vae Isaías jei vae. Echa'á jae jei cuarai:

¹⁵ "Zabulón iivi jare Neftalí iivi, i guasu jembeí pe, Jordán jovaicho pe, Galilea judío mbae vae reta pegua.

¹⁶ Pítumimbi pe yugüireco vae reta uecha ma tembipe tuicha vae.

Mano iguarašia pe yugüireco vae reta pe uyecuua tembipe." Jucuarai jei.

¹⁷ Jayave Jesús umbipi umimbeu Tumpa iñee. Jae jei:

—Peeya piyemingueta icavi mbae vae pepia pe oí vae. Echa'á outa ma uvae mboroyocuia ara pegua —jei.

*Jesús ueni irundi cuimbæ pira uipisi vae reta
(Mr 1.16-20; Lc 5.1-11)*

¹⁸ Jare uguata rambueve Galilea pe i guasu jembeí rupi, Jesús uecha Simón - jae co Pedro jee vae - jare Simón tivi Andrés jee vae. Jae reta omombo ñugüinoi pisa i guasu pe, pira uipisi vaerā. Echa'á jae reta pira uipisi vae reta co.¹⁹ Jare Jesús jae chupe reta:

—Peyu cherupé, jare che chembapuere pe pembroeta íru vae reta güürovía vaerā cheré.

²⁰ Jayave jae reta ueya voi ipisa, jare yugüiraa jae jupié.

²¹ Jesús oo catu ye joco güi, jare uecha Zebedeo tai reta. Penti jee Jacobo jare tivi jee Juan. Uyapicatu ñugüinoi pisa reta chalana pe tu ndive. Jayave Jesús ueni.²² Jayave jae reta ueya voi chalana jare tu, jare yugüiraa jae jupié.

*Jesús omboe jeta vae
(Lc 6.17-19)*

²³ Jare Jesús oo opaete Galilea rupi, jare oporomboe judío reta itupaopao rupi. Umimbeu ñee icavi vae Tumpa iporoyocuia pegua, jare umbigüera imbaerasi vae reta ipotave mbaerasi güii.²⁴ Jare opaete iivi Siria pegua reta uyandu Jesús uyapo vae regua. Jare íru vae reta güeru jae oí vae pe imbaerasi vae reta. Amocue vae uiporara ete jasi vae, jare aña oya amocue vae re, jare amocue vae imbiqere, jare amocue vae ipuere mbae omi vae. Jayave Jesús umbigüera reta.²⁵ Jare yugüiraa Jesús jaícue jeta vae Galilea güi, jare iivi Decápolis jee vae güi, jare Jerusalén güi, jare Judea güi, jare iáca Jordán jovaicho güi.

5

*Ivitu guasu re Jesús jei vae
(Lc 6.20-23)*

¹ Jare Jesús jeta vae reta uecha yave, uyupi penti ivitu guasu re. Joco pe uguapi oí, jare jemimboe reta yugüeru jae oí vae pe.² Jayave Jesús umbipi omboe reta.³ Jei chupe reta:

—Tuyerovia icoi Tumpa ueca vae reta. Echa'á Tumpa umeeta chupe reta yugüireco vaerā mboroyocuia ara pegua pe —jei—.⁴ Tuyerovia ipiatiti vae reta. Echa'á Tumpa umbipiácatuta reta —jei—.

⁵ Tuyerovia uñemimichi vae reta. Echa'á Tumpa umeeta chupe reta iivi imbaerá —jei—.⁶ Tuyerovia iquiréi jupi vae uyapo vae reta. Echa'á Tumpa umbujupita reta —jei—.⁷ Tuyerovia íru vae reta uiparareco vae reta. Echa'á Tumpa uipararecota reta —jei—.⁸ Tuyerovia ipia iquia mbae vae reta. Echa'á uechata reta Tumpa —jei—.⁹ Tuyerovia íru vae reta umbipiácatu vae reta. Echa'á Tumpa jeita chupe reta: 'Pe co jae cherai reta' —jeita, jei—.¹⁰ Tuyerovia jupi vae uyapo ramo íru vae reta icavi mbae vae uyapo chupe vae reta. Echa'á Tumpa umeeta chupe reta yugüireco vaerā mboroyocuia ara pegua pe —jei—.

¹¹ Íru vae reta jeita icavi mbae vae peve jare uyapota icavi mbae vae peve. Ipotave icavi mbae vae jeita pecoti iyapu reve, pe reta cherau ramo. Ërei piyerovalo pei —jei—.¹² Piyerovalo ete. Echa'á Tumpa güünoi ara pe mbae icavi ete vae pembærä. Echa'á jae reta itenondegua reta uyapo cua nunga icavi mbae vae Tumpa iñee aracae umimbeu vae reta pe —jei—.

*Yuqui rami vae
(Mr 9.50; Lc 14.34-35)*

¹³ Pe reta co jae yuqui rami cua iivi pe. Ërei yuqui jembochi'á ma yave, ¿quiráita ra jembochi ye? Icavi'á ma mbaerä. Icavi co yamombo vaerā jare ñapíro jese vaerā —jei—.

Mechero rami vae

¹⁴ Pe reta co jae penti mechero ïvi pegua reta pe tembipe umee vae rami. Yayapo yave tenta guasus penti ivitù re, yandepuere'ã etei ñañomi. Opaete vae ipuere uecha —jei—. ¹⁵ Jae ramíño vi mechero yamiendi yave, ndarau ñañono yapepo uyembovapo oĩ vae igüi pe. Ñañono co mechero jenda pe, opaete o pe ñugüinoi vae reta güinoi vaerã tembipe —jei—. ¹⁶ Mechero umee yandeve tembipe. Jae ramíño vi pe reta pico cavi ïru vae reta jovaque, jae reta uicuua vaerã pe reta piyapo co icavi vae. Echa'ã jucuarãi yave, umbiadatorata reta peRu ara pe oĩ vae —jei—.

Jesús jare mboroyocui

¹⁷ Aramoí pe reta pepia pe piyemingueta che ayu co ambai vaerã Moisés iporoyocui jare Tumpa iñee aracae umimbeu vae reta jei vae. Ërei jucuarãi'ã co. Che ayu ayapo vaerã, ayu'ã co ambai vaerã —jei—. ¹⁸ Añete che jae peve, ara jare ïvi uasa regua ndarau uyembai penti cuatía michi ete vae yepe Moisés iporoyocui güi ndei opaete uyeyapo mbove —jei—. ¹⁹ Ime yave quía penti mboroyocui michi vae uyapo'ã jare umimbeu ïru vae reta pe agüiye vaerã uyapo vae, ïru vae reta jeita jae co taicueguia vae mboroyocuia ara pegua pe. Ërei ime yave quía uyapo jare umimbeu ïru vae reta pe uyapo vaerã vae, ïru vae reta jeita jae co tenondegua vae mboroyocuia ara pegua pe —jei—. ²⁰ Echa'ã che jae peve cua: Jupi vae pe reta piyapo vae jupi ete'ã yave jupi vae mboroyocui re oporomboe vae reta jare fariseo reta uyapo vae güi, ndarau etei pico mboroyocuia ara pegua pe —jei—.

Jesús iporomboe mbochí regua

(Lc 12.57-59)

²¹ Piyandu ma quirãi Moisés jei yandetenondegua reta pe cuarãi: ‘Agüiye epuruyuca. Echa'ã upuruyuca vae uñeäacata co.’ Jucuarãi jei —jei—. ²² Ërei che jae peve, ime yave quía pochi tivi pe vae, uñeäacata co. Jare ime yave quía tivi güiríro vae, judío reta itenondegua reta uäata. Jare ime yave quía tivi pe: ‘Nembiquere’, jei vae, tata guasu pe uiporarata —jei—. ²³ Jáeramo nderu yave penti ofrenda uñemeearenda pe, jare joco pe nemandúa yave quirãi nderiví pochi ndeve mbae re, ²⁴ eeyá joco pe jocua ofrenda uñemeearenda jovai. Ecua rani iyeyapicatu nderiví ndive. Jayave taicue rupi ndepuerter nemee jocua ofrenda Tumpa pe —jei—.

²⁵ Iyeyapicatu imambae uipota uñeapo nderé mbae re vae ndive jae ndive ndeo rambueve tape rupi mburuvicha oĩ vae coti. Echa'ã ndiyeyapicatu'ã yave, uñeapota nderé mburuvicha pe, jare mburuvicha nemondota peresoriru iyandarecoa pe jare peresoriru iyandarecoa neñonota peresoriru pe —jei—. ²⁶ Añete che jae ndeve, ndarau etei neë peresoriru güi ndei opaete ndepia nembiepi mbove —jei—.

Jesús iporomboe menda re uyuvanga vae regua

²⁷ Piyandu ma quirãi Moisés jei yandetenondegua reta pe cuarãi: ‘Agüiye iyuvanga menda re.’ Jucuarãi jei —jei—. ²⁸ Ërei che jae peve, ime yave quía umae cuña re uipota reve vae, uyuvanga ma menda re ipia pe —jei—. ²⁹ Jare nderesa ndeacata cotigua uyapoca yave mbaeyoa ndeve, enoë emombo ndiyugüi. Icavi co penti nderesa ucañi vaerã ndegüi, tata guasu pe opaete nderete reve Tumpa nemondo vaerã tẽi güi —jei—. ³⁰ Jae ramíño vi ndepo ndeacata cotigua uyapoca yave mbaeyoa ndeve, iyasia emombo ndiyugüi. Icavi co penti ndepo ucañi vaerã ndegüi, tata guasu pe opaete nderete reve Tumpa nemondo vaerã tẽi güi —jei—.

Jesús iporomboe omombo jembireco vae regua

(Mt 19.1-10; Mr 10.1-12; Lc 16.18)

³¹ Aracae Moisés jei vi cuarãi: ‘Jembireco omombo vae tumee chupe tupapire umimbeu vaerã pipe omombo ma vae co.’ Jucuarãi jei —jei—. ³² Ërei che jae peve, penti cuimbae ipuere omombo jembireco, cuña aguasa uyapo yave. Ërei cuña uyapo'ã yave aguasa jare cuimbae omombo yave jembireco, jocua cuña uyuvanga co menda re umenda yave ïru cuimbae ndive. Jae ramíño vi jocua cuimbae cuña ndive umenda vae uyuvanga co menda re —jei—.

Jesús iporomboe Tumpa jee re jei vae

³³ Piyandu ma quirãi Moisés jei yandetenondegua reta pe cuarãi: ‘Agüiye ere: YandeYa jee re ayapota, ndepurumbitavi vaerã. Echa'ã ndere yave: YandeYa jee re ayapota, iyapo.’ Jucuarãi jei —jei—. ³⁴ Ërei che jae peve, agüiye ere jucuarãi. Agüiye ere: ‘Ara jee re ayapota.’ Echa'ã ara Tumpa iguapia co. ³⁵ Agüiye vi ere: ‘Ivi jee re ayapota.’ Echa'ã ivi Tumpa ipi jenda co. Agüiye vi ere: ‘Jerusalén jee re ayapota.’ Echa'ã Jerusalén Mburuvicha Guasu mbaepuere güinoi vae jenta guasu co. ³⁶ Agüiye vi ere: ‘Cheäca jee re ayapota.’ Echa'ã ndepuere'ã ndiyapo ndea tĩ ani jü —jei—. ³⁷ Ërei ndipota yave ndere: ‘Ayapota’, ere: ‘Ayapota.’ Jae ramíño vi ndipota yave ndere: ‘Ndarau ayapo’, ere: ‘Ndarau ayapo.’ Echa'ã jeta cuña güi ndere yave, ndiyapota icavi mbae vae —jei—.

Jesús iporomboe uyeepi vae regua

(Lc 6.27-31)

³⁸ Piyandu ma quirāi Moisés aracei jei cuarāi: ‘Ime yave quía īru vae jesa urucumegua vae, īru vae reta turucumegua vi jae jesa. Jae ramiño vi ime yave quía īru vae jāi omopē vae, īru vae reta tomopē vi jae jāi.’ Jucuarāi jei —jei—. ³⁹ Ërei che jae peve, emaeño īru vae re uyapo vaerā ndeve icavi mbae vae. Ime yave quía ocua nderovaique re vae, erova ipureva vaerā ocua ye jovaicho re. ⁴⁰ Jae ramiño vi ime yave quía uñepapo nderé ndecamisa upíro vaerā ndegüii vae, emaeño jese upíro vaerā ndegüii ndeasoya vi —jei—. ⁴¹ Jae ramiño vi ime yave quía ndeocui nderaa vaerā jívita penti kilómetro, eraa chupe mocui kilómetro rupi —jei—. ⁴² Jae ramiño vi ime yave quía uyerure ndeve mbae re vae, emee chupe, jare ime yave quía mbae uíporu ndeve vae, iporuca chupe —jei—.

Peau perovaicho reta

(Lc 6.27-36)

⁴³ Piyandu ma quirāi Moisés aracei jei cuarāi: ‘Eau neīru jare emitarēi nderovaicho.’ Jucuarāi jei —jei—. ⁴⁴ Ërei che jae peve, peau perovaicho reta. Piyerure Tumpa pe umivendise vaerā uyepipeyu peré vae reta. Piyapo icavi vae pemitarēi vae reta pe. Piyerure Tumpa pe icavi mbae vae uyapo peve vae reta re —jei—. ⁴⁵ Jucuarāi piyapo yave, picota peRu ara pe oī vae tai retardā. Echa'ā peRu umee guarasi icavi mbae vae uyapo vae reta jare icavi vae uyapo vae reta pe, opaete vae güinoi vaerā tembipe. Jae ramiño vi umee ama jupi vae reta jare jupi mbae vae reta pe, opaete vae güinoi vaerā i —jei—. ⁴⁶ Echa'ā peau yave perau vae retaño, jocua mbaeti etei co mbae icavi vae. Jáeramo Tumpa ndarau umee peve mbae jocua jeco pegua. Echa'ā mburuvicha peguarrā ocovara vae reta vi uyapo jucuarāi —jei—. ⁴⁷ Jae ramiño vi pembisaluda picuāva reve yave periví retaño, jocua mbaeti etei co mbae icavi vae. Echa'ā upurugüirovia mbae vae reta vi uyapo jucuarāi —jei—. ⁴⁸ Jáeramo jecuaeño piyapo icavi vae. Echa'ā peRu ara pe oī vae jecuaeño uyapo icavi vae —jei—.

6

Quirāi nemee vaerā mbae iparavete vae reta pe

¹ Jupi vae piyapo yave, agüiye piyapo opaete vae jovaque jae reta uecha vaeraño. Echa'ā piyapo yave opaete vae jovaque, peRu ara pe oī vae ndarau umee peve mbae jocua jupi vae piyapo vae jeco pegua —jei—.

² Jáeramo nemee mbae iparavete vae reta pe yave, agüiye iyapo upurumbitavi vae reta uyapo rami. Echa'ā jae reta omondo jenonde judío reta itupao reta pe jare calle rupi uyemimbí vae, īru vae reta icavi uyeminguela jese vaerā umee mbae iparavete vae reta pe yave. Añete che jae peve, jocua upurumbitavi vae reta güinoita'ā imbaerā jucuarāi uyapo ramo —jei—. ³ Ërei nde nemee mbae iparavete vae reta pe yave, agüiye tuicuua ndepo ndeaso cotigua ndepo ndeacata uyapo vae, ⁴ agüiye vaerā quía ye uicuua nde ndiyapo vae regua. Ërei ndeRu uicuata nde ndiyapo viari vae jare umeeta ndeve mbae opaete vae jovaque —jei—.

Jesús oporomboe yerure re

(Lc 11.1-4)

⁵ Jare ndiyerure Tumpa pe yave, agüiye iyapo upurumbitavi vae reta uyapo rami. Echa'ā jae reta uyerure Tumpa pe yave, uipota quía reta uecha vaerā. Jáeramo uyemboi judío reta itupao reta pe jare calle uyerea pe uyerure Tumpa pe yave. Añete che jae peve, jocua upurumbitavi vae reta güinoita'ā imbaerā jucuarāi uyapo ramo —jei—. ⁶ Ërei nde ndiyerure Tumpa pe yave, ique ndero pe jare iyuquenda onque. Jayave iyerure ndeRu pe quía reta uicuua mbae reve. Jare ndeRu uicuata nde ndiyapo viari vae jare umeeta ndeve mbae opaete vae jovaque —jei—.

⁷ Ërei piyerure Tumpa pe yave, agüiye iyapo upurugüirovia mbae vae reta uyapo rami. Echa'ā jae reta jecuaeño umbiaicuerucuere jei penti vaeño. Echa'ā ipia pe uyeminguela tēi Tumpa uyapisacata jese reta jucuarāi uyapo yave —jei—. ⁸ Jáeramo agüiye piyapo jae reta uyapo rami. Echa'ā peRu uicuua mbae uata peve vae ndei piyerure chupe jese mbove —jei—. ⁹ Jáeramo piyerure Tumpa pe cuarāi: ‘OreRu ara pe neí vae, tuyembíadoraca nderee.

¹⁰ Tou ndeporoyocuia.

Tuyeyapo nde ndere vae cuia ivi pe ara pe uyerure oī rami.

¹¹ Emee oreve opa ara orerembiurā.

¹² Embiasa oreve orembaeyoa reta, ore numbiasa ipotave iyoa orecoti vae pe rami.

¹³ Jare agüiye emaeño aña guasu re uyapoca vaerā oreve mbaeyoa.

Orerepi aña guasu güi.

Echa'ā nembae co mboroyocuia.

Nde nenoii opaete mbaepuere.

Opaete vae nembiadorata jaeño mai pegua.

Amén.’

Jucuarāi piyerure —jei—.

¹⁴ Echa'ã pe reta pembiasa yave iyoa pecotí vae reta, peRu ara pe oĩ vae umbiasata vi peve pembaeyoa reta —jei—. ¹⁵ Êrei pembiasa'ã yave iyoa pecotí vae reta, peRu ndarau vi umbiasa peve pembaeyoa reta —jei—.

Tembíu güii uyecuacu vae reta

¹⁶ Piycuacu tembíu güii yave, agüiye piyapo upurumbítavi vae reta uyapo rami. Echa'ã jae reta uyecuacu tembíu güii yave, uyecuua ipiatiti, íru vae reta uicuaa vaerã uyecuacu co ñugüinoi tembíu güii. Añete che jae peve, jae reta güinoita'ã imbaerã jucuarã uyapo ramo —jei—. ¹⁷ Êrei nde tembíu güii ndiyecuacu yave, iyapicatu ndea jare iyovae, ¹⁸ agüiye vaerã íru vae reta uicuaa ndiyecuacu co neí tembíu güii. Jaeño ndeRu uicuaata ndiyecuacu co neí tembíu güii vae. NdeRu uicuaata nde ndiyapo viari vae jare umeeta ndeve mbae opaete vae jovaque —jei—.

Piñuvatu mbaembæ icavi vae piyupeguarã ara pe

(Lc 12.32-34)

¹⁹ Agüiye piñuvatu cua ivi pejeta mbaembæ icavi vae piyupeguarã. Echa'ã cua ivi pe cupii reta urucumegua mbaembæ jare íru mbaembæ iyuquíri urucumegua, jare imonda vae reta uique viari mbaembæ oñomi vaerã —jei—. ²⁰ Piñuvatu mbaembæ icavi vae piyupeguarã ara pe. Echa'ã joco pe ndarau cupii reta urucumegua vaerã mbaembæ jare ndarau mbae iyuquíri, jare ndarau imonda vae reta uique viari mbaembæ oñomi vaerã —jei—. ²¹ Echa'ã piñuvatu yave mbaembæ icavi vae piyupeguarã ivi pe, jecuaeño pepia pe piyeminguetata ivi pegua re. Êrei piñuvatu yave mbaembæ icavi vae piyupeguarã ara pe, jecuaeño pepia pe piyeminguetata ara pegua re —jei—.

Tembipe yanderet pegua

(Lc 11.34-36)

²² Tembipe uique yanderete pe yanderesa rupi. Icavi yave nderesa, nderete tineeta tembipe pe. ²³ Êrei icaví'ã yave nderesa, nderete tineeta pítumimbi pe. Nderete tineeta tẽi tembipe pe. Êrei tineet yave pítumimbi pe, pítumimbi ete co —jei—.

Mocui patrón

(Lc 16.13)

²⁴ Penti uyeyocui vae uipota yave uyeyocui mocui patrón pe, umitarëita penti patrón jare uauta íru vae, ani uparavíqui cavita penti patrón pe jare güirírota íru vae. Pepuere'ã piyeyocui Tumpa pe corepoti peau reve —jei—.

Agüiye piyemipia'ã mbaembæ re

(Lc 12.22-31)

²⁵ Jáeramo che jae peve, agüiye piyemipia'ã mbae re. Agüiye piyemipia'ã peremburã vae re. Jae ramíño vi agüiye piyemipia'ã peremimonderã vae re. Ndaraupepuere pico cavi jecuaeño piyemipia'ã yave peremburã vae re jare peremimonderã vae re —jei—. ²⁶ Pemae güira reta re. Jae reta umaeti'ã jare umbaeviro'ã. Uñuvatu'ã vi avati avatio pe. Êrei peRu ara pe oĩ vae umingaru reta. Jare Tumpa perau ete güira reta güi —jei—. ²⁷ Aramoi piyemipia'ã pipota tẽi pepucu ramo. Êrei ndarau etei pepuere piyemibucuacuaa pepucu ete vaerã —jei—.

²⁸ ¿Maera pa piyemipia'ã peremimonderã vae re? Pemae mbaepoti reta re, quirã ucuacuua reta. Uparavíqui'ã reta. Umaepova'ã reta vi. ²⁹ Êrei che jae peve, mbaepoti reta ipõra ete Salomón jemimonde ipõra vae güi. ³⁰ Tumpa omopõra ñana, yepe tẽi penti ara ñana oĩ co pe jare piareve pe ocaí. Jáeramo Tumpa umeeta co peve peremimonderã. Michi ete co pepurugüirovia —jei—. ³¹ Agüiye piyemipia'ã mbae re. Agüiye piyemipia'ã peremburã vae re. Jae ramíño vi agüiye piyemipia'ã peremimonderã vae re —jei—. ³² Echa'ã opaete ivi pegua reta uyemipia'ã cua mbaembæ re. Jare peRu ara pe oĩ vae uicuaa icavi co penoi vaerã opaete cua mbaembæ —jei—. ³³ Êrei icavi co pipota ete vaerã Tumpa iporoyocuia jare pipota vaerã piyapo jupi vae Tumpa jupi vae uyapo rami. Jucuarã yave, Tumpa umeeta peve opaete cua mbaembæ —jei—. ³⁴ Jáeramo agüiye piyemipia'ã piareve peguarã vae re. Echa'ã piareve pe uyeyapo yeta mbae pemipia'ã vaerã. Opa ara uyeyapo mbaembæ pemipia'ã vaerã —jei—.

Agüiye piñera íru vae re

(Lc 6.37-38, 41-42)

¹ Agüiye piñera íru vae re, agüiye vaerã íru vae iñera peré. ² Echa'ã piñera yave íru vae re, íru vae iñerata vi peré. Jae ramíño vi icavi vae piyapo yave íru vae pe, íru vae uyapota vi icavi vae peve. Jae ramíño vi icavi mbae vae piyapo yave íru vae pe, íru vae uyapota vi icavi mbae vae peve —jei—. ³ Agüiye

emae iti michi vae neīru jesa pe oī vae re, ime yave nenoit i tuicha vae nderesa pe —jei—. ⁴ Ndaraudnepuere ndere neīru pe: ‘Cherivi, taequi nderesa güi jocua iti michi vae.’ Echa’ā nde nenoit i tuicha vae nderesa pe —jei—. ⁵ Nde co jae upurumbitavi vae. Eequi rani iti tuicha vae nderesa güi. Jayave nemae cavita dnepuere vaerā ndeequi iti michi vae neīru jesa güi —jei—.

⁶ Agüiye pemee mbae uñenono tee Tumpa peguarā vae yimbā reta pe. Jae ramíño vi agüiye piñono ita ipōra vae reta cuchi reta ñugüinoi vae rupi. Echa’ā jucuarā piyapo yave, upírota jese reta jare aramoi uyerovata pesuu vaerā —jei—.

Yerure regua

(Lc 11.9-13; 6.31)

⁷ Piyerure Tumpa pe mbae re, jare Tumpa umeeta peve. Peeca, jare pevāeta. Pembopu onque, jare onque uyepeata peve —jei—. ⁸ Echa’ā piyerure yave Tumpa pe mbae re, Tumpa umeeta peve. Jare peeca yave mbae, pevāeta. Jare pembopu yave onque, uyepeata peve —jei—. ⁹ Nde nenoit yave penti nderai, nderai uyerure yave ndeve mbiyape re, ndaraudnemee chupe penti ita mbiyape ipepica pe —jei—. ¹⁰ Jae ramíño vi nderai uyerure yave ndeve pira re, ndaraudnemee chupe penti imboi pira ipepica pe —jei—. ¹¹ Yepe tēi pe reta jecuaenio piyapo icavi mbae vae, ērei pemee co mbaembiae icavi vae pesambiai reta pe. Jáeramo peRu ara pe oī vae iquiréi umee mbaembiae icavi vae uyerure chupe jese vae reta pe —jei—.

¹² Jáeramo piyapo íru vae reta pe pipota íru vae reta uyapo vaerā peve vae rami. Echa’ā cua co jae mboroyociui jei vae jare Tumpa iñee aracae umimbeu vae reta jei vae —jei—.

Onque ipi-rai vae

(Lc 13.24)

¹³ Pique onque ipi-rai vae rupi. Echa’ā onque ipiguasu vae rupi uique vae reta uguata tape ipiguasu vae rupi, ērei yugüiraa cañitei pe. Jare jeta vae uique jocua onque ipiguasu vae rupi —jei—. ¹⁴ Echa’ā onque ipi-rai vae rupi uique vae reta uguata tape ipi-rai vae rupi, ērei yugüiraa tecove opa mbae vae güinoi vae reta ñugüinoi vae pe. Jare mboviño uvāe jocua onque ipi-rai vae —jei—.

Ía icavi vae jare ía icavi mbae vae

(Lc 6.43-45)

¹⁵ Amocue upurumbitavi vae reta jeita: ‘Che co jae Tumpa iñee umimbeu vae.’ Agüiye perovia. Jae reta jei peve uipota co umimbeu peve Tumpa iñee, ērei uipota uyapo icavi mbae vae peve —jei—. ¹⁶ Picuauata jae reta upurumbitavi vae reta co icavi mbae vae uyapo ramo. Yaequí’ā uva penti yai játi vae güi. Jae ramíño vi yaequí’ā íva penti yai játi vae güi —jei—. ¹⁷ Pentí temiti icavi vae umee ía icavi vae. Jae ramíño vi penti temiti icavi mbae vae umee ía icavi mbae vae —jei—. ¹⁸ Pentí temiti icavi vae umee’ā ía icavi mbae vae. Jae ramíño vi penti temiti icavi mbae vae umee’ā ía icavi vae —jei—. ¹⁹ Temiti ía icavi’ā yave, iya uyasia jare uapi —jei—. ²⁰ Jáeramo picuauata jae reta upurumbitavi vae reta co icavi mbae vae uyapo ramo —jei—.

Pucuad’ā etei

(Lc 13.25-27)

²¹ Jeta vae jeita cheve: ‘CheYa, cheYa.’ Ērei amocue jucuarāi jei vae ndaraudnemee yugüireco mboroyociua ar apegua pe. Echa’ā jaeño cheRu ara pe oī vae jei vae uyapo vae reta yugüirecota joco pe —jei—. ²² Jeta vae jeita cheve jocua ara: ‘CheYa, cheYa, ore numimbeu Tumpa iñee nderee pe. Jae ramíño vi nderee pe numbisiri aña reta oya jese vae reta güi. Jae ramíño vi nderee pe nduyapo jeta miacañi reta.’ Jucuarāi jeita —jei—. ²³ Ērei che jaeta chupe reta: ‘Che pucuad’ā etei. Pesiri chegüi. Echa’ā pe reta piyapo icavi mbae vae.’ Jucuarāi jaeta —jei—.

Tenta iguapica

(Lc 6.46-49)

²⁴ Jáeramo ime yave quía uyapisaca cheré vae, jae uyapo yave che jae chupe uyapo vaerā vae, jae co penti cuimbae iyaracuaa vae jentará uyapo vae rami. Echa’ā cuimbae iyaracuaa vae oñono jenta iguapicarā itape re —jei—. ²⁵ Jayave tuicha oquí jare jeta i usiri tenta coti. Tanta vi ivitu tenta re. I jare ivitu umbiyaparata tēi tenta. Ērei uyapara’ā. Echa’ā iguapica oī penti itape re —jei—.

²⁶ Ērei ime yave quía uyapisaca cheré vae, uyapo’ā yave che jae chupe uyapo vaerā vae, jae co penti cuimbae iyaracuaa mbae vae jentará uyapo vae rami. Echa’ā cuimbae iyaracuaa mbae vae uyapo jentará ivicuīt re —jei—. ²⁷ Jayave tuicha oquí jare jeta i usiri tenta coti. Tanta vi ivitu tenta re. I jare ivitu umbiyapara. Opa uyembai jocua tenta —jei—.

²⁸ Jare Jesús opaete cua jei ma yave, opaete uyapisaca jese vae reta ipiacañi iporomboe re. ²⁹ Echa’ā omboe reta mbaepuere güinoi vae rami. Jucuarāi’ā oporomboe mboroyociui re oporomboe vae reta.

8

Jesús umbigüera cuimbae ipire ocui vae

(*Mr 1.40-45; Lc 5.12-16*)

¹ Jare Jesús ugüeyí ma ivitu guasu güi yave, jeta yugüiraa jaicue. ² Jayave ou Jesús oī vae pe penti cuimbae ipire ocui vae. Uyeatica Jesús jova.

—CheYa, ndipota yave, ndepuere chembigüera —jei chupe.

³ Jayave Jesús oñono ipo jese.

—Aipota. Ecuera —jei chupe.

Jare jupivoíno cuimbae ucuera imbaerasi güi. Ocui'ã ma ipire. ⁴ Jayave Jesús jei chupe:

—Agüiye emimbéu quía pe. Ecua iyeechaca sacerdote pe, jare emee ofrenda Moisés peocui rami, tenta guasu pegua reta uicuua vaerä ndecuera ma co —jei.

Jesús umbigüera sundaro reta juvicha jembiocui

(*Lc 7.1-10*)

⁵ Jare Jesús oo uväe yave Capernaum pe, ou jae oī vae pe penti sundaro reta juvicha uyerure vaerä chupe mbae re. ⁶ Jae jei Jesús pe:

—CheYa, cherembiocui imbaerasi oī cherenta pe. Ipuere'ã omi. Jasí ete oī chupe —jei.

⁷ Jayave Jesús jei chupe:

—Taa tambigüera.

⁸ Ërei sundaro reta juvicha jei chupe:

—CheYa, agüiye ecua cherenta pe. Echa'ã mbae'ã co che. Ndepuere ndere cua güiño cherembiocui ucuera vaerä jare ucuerata co —jei—. ⁹ Echa'ã ime mburuvicha mbaepuere güinoi cheré vae reta. Jae ramiño vi che anoi mbaepuere sundaro reta re. Che jae penti sundaro pe: ‘Ecua’, jare jae oo. Jae ramiño vi che jae íru sundaro pe: ‘Eyu’, jare jae ou. Jae ramiño vi che jae cherembiocui pe: ‘Iyapo cua’, jare jae uyapo —jei.

¹⁰ Jare Jesús cua uyandu yave, ipiacáñi sundaro reta juvicha re, jare jei yugüiraa jaicue vae reta pe:

—Añete che jae peve, aväe'ã cua nunga mburugiørovia tuicha vae Israel pegua reta ipite pe. ¹¹ Jare che jae peve, jeta vae yugüeruta guarasi oë vae coti güi jare guarasi uique vae coti güi jare uguapita reta Abraham jare Isaac jare Jacob ndive mboroyocuia ara pegua pe —jei—. ¹² Ërei mboroyocuia pe yugüirécota tēi vae reta uyemombocata oca pe pítumimbi oī vae pe. Joco pe uyaota reta jare jää umbiquiriríuta —jei.

¹³ Jayave Jesús jei sundaro reta juvicha pe:

—Ndepuere ndeo. Ayapo ma ndipota ayapo vaerä vae nderovia cheré ramo —jei.

Jare jocua ora pe etei sundaro reta juvicha jembiocui ucuera.

Jesús umbigüera Pedro jaicho

(*Mr 1.29-31; Lc 4.38-39*)

¹⁴ Jare Jesús uique Pedro jenta pe yave, uecha Pedro jaicho jacu oī jupa pe. ¹⁵ Jayave Jesús uipisi ipo pe jare jacu upita voi chugüi. Jayave cuña upúa jare umee mbae jou reta vaerä.

Jesús umbigüera jeta imbaerasi vae reta

(*Mr 1.32-34; Lc 4.40-41*)

¹⁶ Jare guarasi uique ma yave, tenta guasu pegua reta güeru Jesús pe jeta aña oya jese vae reta. Jayave Jesús oyocui aña reta usiri vaerä opaete oya jese vae reta güi, jare umbigüera opaete imbaerasi vae reta.

¹⁷ Jucuaräi uyapo Jesús uyeyapo vaerä Tumpa iñee aracae umimbéu vae Isaías jei vae. Echa'ã jae jei cuaräi: “Jae etei güiraa yandegüi yanembaerasi reta.”

Jesús jupié uipota yugüiraa vae reta

(*Lc 9.57-62*)

¹⁸ Jare jeta yugüeru Jesús oī vae pe. Jare Jesús uecha yave, jei jemimboe reta pe yugüiraa vaerä i guasu jovaicho pe. ¹⁹ Jare penti mboroyocu re oporomboe vae ou Jesús oī vae pe jare jei chupe:

—Oporamboe vae, taa nderupié opaete que rupi ndeo vae rupi.

²⁰ Jayave Jesús jei chupe:

—Aguara reta güinoi icua reta, jare güira reta güinoi jaiti reta. Ërei che cuimbaerä ayeyapo vae mbaeti cherenta —jei.

²¹ Jare íru jemimboe jei Jesús pe:

—CheYa, emaeño rani cheré aa vaerä aico cheru re umano regua.

²² Ërei Jesús jei chupe:

—Eyu cherupié. Tecove opa mbae vae güinoi mbae vae reta toñotí umano vae reta —jei.

*Jesús umíquii ivitu jare i guasu
(Mr 4.35-41; Lc 8.22-25)*

²³ Jayave Jesús uyupi chalana pe jare jemimboe reta vi uyupi pipe. ²⁴ Jare ou ivitu tanta uyepeyu, jare i uyembiaparoaroa uique chalana pe, jare umitinee seri ma. Êrei Jesús oque oī. ²⁵ Jayave Jesús jemimboe reta yugüiraa omomba. Jei reta chupe:

—OreYa, orerepi. Ñamanota ma.

²⁶ Jayave Jesús jei chupe reta:

—¿Maera pa pequiye? Michi ete co pepurugüirovia —jei.

Jayave upúa jare uñéengata ivitu jare i guasu pe. Jare opaete voi quii ngatu upita. ²⁷ Jare Jesús jemimboe reta ipiacaní jare jei:

—¿Mbae nunga cuimbae pa cua? Ivitu jare i guasu uyapo jae oyocui vae.

*Mocui cuimbae aña oya jese vae reta
(Mr 5.1-20; Lc 8.26-39)*

²⁸ Jayave yugüiraa uväe i guasu jovaicho pe, gadareno reta iiví pe. Jare yugüeru teögüerirurenda güi ooväti Jesús mocui cuimbae aña oya jese vae reta. Pochi reta. Jáeramo mbaeti quia ipuere uguata jocua tape rupi. ²⁹ Jare jae reta iñeeäta reve jei:

—¿Maera pa ndeyu oremamboco, Jesús? Nde co jae Tumpa Tai. ¿Ndeyu pa ndiporaraca oreve añave? Taicue rupi ramo co ndiporaracata tēi oreve —jei reta.

³⁰ Jare mbiri catu jeta cuchi reta ucharu ñugüinoi. ³¹ Jare aña reta uyerure Jesús pe:

—Cua cuimbae reta güi orembisiri yave, emaeño oreré ndoo vaerä ndoya cuchi reta re.

³² Jayave Jesús jei chupe reta:

—Pecua.

Jare yugüiraa ma yave cuimbae reta güi, aña reta yugüiraa oya cuchi reta re. Jayave opaete cuchi reta tanta osi iñiva rupi oa i guasu pe, jare joco pe opa ipitupa reta.

³³ Jayave cuchi iyandarecoa reta opa osi, jare yugüiraa tenta guasu pe, jare umimbeu joco pegua reta pe opaete uyeyapo vae regua. Umirabe vi chupe reta mbae aña oyase jese vae reta pe uyeyapo vae.

³⁴ Jayave opaete joco pegua reta yugüeru ooväti Jesús. Jare uecha yave, umiñera oo ye vaerä jae reta iiví güi.

9

*Jesús umbigüera cuimbae ipuere mbae omi vae
(Mr 2.1-12; Lc 5.17-26)*

¹ Jare Jesús uyupi ye penti chalana pe jare oo ye i guasu jovaicho pe. Jayave oo uväe jenta guasu pe.

² Jayave amocue vae güeru penti cuimbae imbaerasi vae. Cua cuimbae ipuere mbae omi vae. Jupa pe oī. Jesús cua uecha yave, uicuua jae reta güirovia co jese, jare jei cuimbae ipuere mbae omi vae pe:

—Iyerovia, cherivi. Nembaeyoa reta uyembai ma —jei.

³ Jayave amocue mboroyocui re oporomboe vae reta ipia pe uyeminguela: “Cua cuimbae jei icavi mbae vae Tumpa coti.”

⁴ Êrei Jesús uicuua jae reta ipiyeminguela, jare jei chupe reta:

—¿Maera pa penoi pepia pe yeminguela icavi mbae vae reta? ⁵ Chepuere jae cua cuimbae pe: ‘Nembaeyoa reta uyembai ma.’ Jae ramíño vi chepuere jae chupe: ‘Epüa eguata.’ ⁶ Mbae nunga pa yavai jae vaerä? —jei—. ⁶ Êrei aipota picuua vaerä cua: Che cuimbaerä ayeyapo vae chepuere ambiasa quia pe imbaeyoa reta cua iñi pe aï rambueve —jei.

Jayave jei cuimbae ipuere mbae omi vae pe:

—Epüa evoi nderupa, jare ecua nerenta pe.

⁷ Jayave cuimbae upúa, jare oë oo jenta coti. ⁸ Êrei jeta joco pe ñugüinoi vae reta uecha yave, uquiyé jare umbiadura reta Tumpa, mbaepuere tuicha vae umee Jesús pe ramo.

*Jesús ueni Mateo
(Mr 2.13-17; Lc 5.27-32)*

⁹ Jare Jesús joco güi oo yave, uecha penti cuimbae Mateo jee vae uguapi oī mburuvicha peguarä ocovara ñugüinoi vae pe, jare jei chupe:

—Eyu cherupié.

Jayave Mateo upúa, jare oo jae jupíe.

¹⁰ Jare Jesús ucharu oī rambueve Mateo jenta pe, jeta mburuvicha peguarä ocovara vae reta jare teco icavi mbae vae uyapo vae reta yugüeru ucharu vaerä Jesús jare jemimboe reta ndive. ¹¹ Jare fariseo reta cua uecha yave, jei Jesús jemimboe reta pe:

—¿Maera pa ucharu pemboe vae ocovara vae reta jare teco icavi mbae vae uyapo vae reta ndive?

¹² Ërei Jesús cua uyandu yave, jei chupe reta:

—Icove catu vae reta ueca'ã upurupiáno vae. Imbaerasi vae retaño ueca —jei—. ¹³ Pecua piyemboe mbae uiporta jei cua: 'Aipota pepuruparareco vaerã, aipota'ã maemimba uyeyucacue reta pemee cheve vaerãño.' Echa'ã che ayu aeca vaerã iyoa vae reta. Ayu'ã aeca vaerã jupi vae reta —jei.

*Maera Jesús jemimboe reta uyecuacu'ã tembí güi
(Mr 2.18-22; Lc 5.33-39)*

¹⁴ Jayave yugüeru Juan jemimboe reta Jesús oĩ vae pe jare upirandu chupe:

—¿Maera pa ore jare fariseo reta nduyecuacu tembí güi, ërei nderemimboe reta uyecuacu'ã tembí güi?

¹⁵ Jayave Jesús jei chupe reta:

—Umendata vae pe ñugüinói vae reta ndarau etei uyecuacu tembí güi, umendata vae jae reta ndive oĩ rambueve. Ërei outa uvãe ara umendata vae uyereraaca vaerã chugüi reta. Jayave ramo uyecuacuta tembí güi —jei—.

¹⁶ Icavi'ã yamboya vaerã temimonde indechi vae maembaya ipiau vae pe. Echa'ã jucuarãi yayapo yave, maembaya ipiau vae umiäta temimonde indechi vae, jare temimonde jeite osoro —jei—. ¹⁷ Jae ramiño vi icavi'ã yambiru vaerã vino ipiau vae vino jíru guacapi indechi vae pe. Echa'ã jucuarãi yayapo yave, vino omondoro jíru, jare vino uyepiyere, jare jíru icavi'ã ma. Jáeramo yambiru vino ipiau vae jíru ipiau vae pe. Echa'ã jucuarãi yayapo yave, jíru osoro'ã jare vino uyepiyere'ã —jei.

*Jairo tayi jare cuña Jesús jemimonde uyavíquí vae
(Mr 5.21-43; Lc 8.40-56)*

¹⁸ Jare Jesús cua jei chupe reta rambueve, ou Jesús oĩ vae pe uvãe penti mburuvicha. Jae uyeatica Jesús jovai jare jei:

—Cherayi umanota ma oĩ. Ërei yaa iñono ndepo jese embigüiera, agüiye vaerã umano —jei.

¹⁹ Jayave Jesús jare jemimboe reta yugüiraa mburuvicha jupi.

²⁰ Jare penti cuña doce año ma uiporara tugüiguas vae oya Jesús re icupe coti jare uyavíquí jemimonde jembei. ²¹ Echa'ã jae jei ma iyupe ipiau pe: "Yepe tẽi jemimondeño tayavíquí, acuerata co."

²² Ërei Jesús uyerova, jare uecha yave, jei chupe:

—Cherindi, ndepiacatu. Ndecuera ma nderovia cheré ramo.

Jare jupivoiño cuña ucuera.

²³ Jare Jesús uique mburuvicha jo pe yave, uecha uyemimbí vae reta umiñee ma jemimbi reta teögüe güiraa oñoti vaerã jare jeta joco pe yati ñugüinói vae reta umbiapu ñugüinói. ²⁴ Jayave jei chupe reta:

—Pecua oca pe. Cua cuñatai umano'ã co. Oqueño co oĩ —jei.

Ërei joco pe ñugüinói vae reta oyoyai Jesús. ²⁵ Jayave Jesús omoë opaete vae oca pe. Jayave uique ye o pe jare uipisi cuñatai ipo pe, jare cuñatai upúa voi. ²⁶ Jare opaete jocua ívi pegua reta pe jeracua quirãi Jesús uyapo cua miacañi.

Mocui cuimbae jesa mbae vae reta

²⁷ Jare Jesús joco güi oo yave, mocui cuimbae jesa mbae vae reta yugüiraa jaicue, jare iñeeäta reve jei chupe:

—Nde co jae David iñemoñaa reta pegua. Oreparesareco.

²⁸ Jare Jesús uique ma yave o pe, cuimbae jesa mbae vae reta vi uique jaicue. Jayave Jesús upirandu chupe reta:

—¿Perovia pa chepuere co ayapo cua peve?

—Ndugüirovia, oreYa —jei reta.

²⁹ Jayave Jesús uyavíquí jae reta jesa, jare jei chupe reta:

—Perovia ramo, pema.

³⁰ Jare mocui reve ipuere umae. Jayave Jesús jei chupe reta:

—Agiüye pemimbeu quía pe ave.

³¹ Ërei jae reta yugüiraa ma yave, umimbeu jeta jocua ívi pegua reta pe Jesús uyapo chupe reta vae.

Iupa vae umbipi uyemingueta

³² Jare jae reta yugüiraa ma yave, íru vae reta güeru Jesús oĩ vae pe penti cuimbae iupa vae, aña oya jese vae. ³³ Jayave Jesús umbisiri aña chugüi jare iupa vae umbipi uyemingueta. Jare jeta vae reta ipiacañi jare jei reta:

—Yaecha'ãi cua nunga miacañi Israel pe.

³⁴ Ërei fariseo reta jei:

—Aña guasu imbaepuere pe umbisiri aña reta oya jese vae reta güi.

Jeta co yaavíro vaerã

³⁵ Jare Jesús oo opaete tenta guasu reta jare tenta guasu-raí reta rupi, jare oporomboe judío reta itupaopeo pe. Ummibeu ñiee icavi vae Tumpa iporoyocua pegua, jare umbigüera imbaerasi vae reta ipotave mbaerasi güi. ³⁶ Ërei uecha yave jeta vae, uiparareco umae jese reta. Echa'ã jae reta uyemipia'ã jare ipiatiti. Ovecha mbaeti iyandarecoa güinoi vae reta rami co. ³⁷ Jayave Jesús jei jemimboe reta pe:

—Jeta ete co yaaviro vaerä. Ërei mboví ete co umbaeviro vae reta. ³⁸ Jáeramo pe reta piyerure yandeYa pe omondo vaerä uparavíqui vae reta umbaeviro reta vaerä —jei.

10

Jesús jemimondo reta jee

(Mr 3.13-19; Lc 6.12-16)

¹ Penti ara Jesús umbati jocua doce jemimboe reta, jare umee chupe reta mbaepuere umbisiri vaerä aña reta oya jese vae reta güi jare umbigüera vaerä imbaerasi vae reta ipotave mbaerasi güi. ² Cua co jaé jocua doce Jesús jemimondo retajee: Simón (Pedro jee vae), jare Simón tivi Andrés jee vae, jare Zebedeo tai reta Jacobo jare Juan jee vae, ³ Felipe, Bartolomé, Tomás, Mateo ocovara vae, Alfeo tai Jacobo jee vae, Tadeo, ⁴ Simón (jae co Zelote pe ueni vae), jare Judas Iscariote (cua cuimbae umee Jesús jobaicho reta pe).

Jesús omondo jocua doce jemimboe reta

(Mr 6.7-13; Lc 9.1-6)

⁵ Jare ndei omundo reta mbove, Jesús oyocui cua doce reve.

—Agüiye pecua judío mbae vae reta ñugüinoi vae pe. Agüiye pecua Samaritano jenta guasu reta pe —jei—. ⁶ Pecua Israel pegua reta ñugüinoi vae pe. Echa'ã jae reta ovecha ucañi vae reta rami co —jei—. ⁷ Jare peguata rambueve, pemímbue ñru vae reta pe cuaräi: ‘Mboroyocua ara pegua outa ma uväe’ —jei—. ⁸ Pembigüera imbaerasi vae reta. Pembigüera ipire ocui vae reta. Pembijecove ye umanocue vae reta. Pembisiri aña reta oya jese vae reta güi. Che amee ma peve cua mbaepuere jepi mbae reve. Jáeramo agüiye pecovara mbae quía pe piyapota chupe vae re —jei—. ⁹ Agüiye peraa oro jare corepoti. ¹⁰ Agüiye vi peraa peurupucu, jare agüiye peraa mocui camisa. Peraa jaeno penti pepopoca jare pepipasa pemonde vae. Echa'ã icavi co ñru vae reta umbiepi vaerä uparavíqui vae pe —jei—.

¹¹ Jare peo yave penti tenta guasu pe ani penti tenta guasu-raí pe, pepirandu quía ra pepuere perovia catu joco pe. Jayave pico joco pe peo ye regua —jei—. ¹² Jare peváe yave penti tenta pe, pere: ‘Tumpa tumee peve mbiacatu.’ ¹³ Jare pepuere yave perovia catu joco pe yugüireco vae reta, Tumpa umeeta chupe reta mbiacatu. ¹⁴ Ërei pepuere'ã yave perovia catu, pe retaño penoita mbiacatu —jei—. ¹⁵ Jare ime yave tenta pegua reta ani tenta guasu pegua reta uipota'ã pepita vaerä joco pe jare uipota'ã uyapisaca peré vae, pecuaño joco güi, jare pemítimo ívicui pepi güi —jei—. ¹⁶ Añete co jae peve, Tumpa uää yave ívi pegua reta, jocua tenta guasu pegua reta tanta uiporarata Sodoma jare Gomorra pegua reta güi —jei—.

Uiporarata co

¹⁶ Mase, pomondo icavi mbae vae uyapo vae reta ipite rupi. Pe reta ovecha reta rami co. Jae reta co yaguapita reta rami. Jáeramo pearacuua catu mboi iyaracuua catu rami. Jae ramíño vi agüiye piyapo icavi mbae vae pícasu uyapo'ã icavi mbae vae rami —jei—. ¹⁷ Piñemoa ngatu. Echa'ã ñru vae reta pereraata mburuvicha reta yati vae pe, uñeapo vaerä peré. Jare penupata judío reta itupao reta pe —jei—. ¹⁸ Jare piyereraacata mburuvicha reta jare mburuvicha guasu reta jovai chereco pegua, pepuere vaerä chemibeu chupe reta jare judío mbae vae reta pe —jei—. ¹⁹ Ërei jae reta pemee yave, agüiye piyemipia'ã mbae pereta mburuvicha reta pe vae re. Echa'ã Espíritu Santo uicuaacata peve jocua ora pe etei mbae pere vaerä —jei—. ²⁰ Echa'ã peRu iEspíritu pemborita piyeminguela vaerä, pe retaño'ã co piyeminguetat —jei—.

²¹ Jare penti cuimbae umeeta tivi uyeyucaca vaerä. Jae ramíño vi penti cuimbae umeeta tai uyeyucaca vaerä. Jare sambiai reta oyovaichota tu jare ichi ndive, jare uyucacata —jei—. ²² Jare piñemitarëicata opaete vae pe chereco pegua. Ërei jósata oo uväe iyapi pe vae uyembiasacata co —jei—. ²³ Ërei penti tenta guasu pe uyapo reta icavi mbae vae peve yave, pesi ñru tenta guasu pe. Añete che jae peve, ndarau peo opaete Israel pegua reta jenta guasu pe ndei che cuimbaerä ayeyapo vae ayu ye mbove —jei—.

²⁴ Penti uyemboe oí vae uicuaa ete'ã oporomboe vae uicuaa vae rami. Jae ramíño vi penti uyeyocui vae imbaepuere tuicha'ã ete ipatrón imbaepuere rami —jei—. ²⁵ Icavi co penti uyemboe oí vae uyemboe cavi vaerä oporomboe vae uicuaa vae re. Jae ramíño vi icavi co penti uyeyocui vae uiporu cavi vaerä imbaepuere ipatrón umee chupe vae. Che co jae peYa, jare ñru vae reta chembijee Beelzebú. Jáeramo pembijeeta Beelzebú tai reta. Echa'ã pe reta piyeyocui cheve —jei—.

*Pequiye Tumpa güi
(Lc 12.2-7)*

²⁶ Ërei agüiye pequiye chugüi reta. Ime yave mbae uyeyasoí vae, uyechacañotai co. Jare ime yave mbae uñenomí vae, uye cuuañotai co —jei—. ²⁷ Pítumimbi pe che jae peve vae re piyemingueta tembipe pe. Jare che jae viari peve vae pemimbeu opaete vae pe —jei—. ²⁸ Agüiye pequiye upuruyuca vae reta güi. Echa'ã pereteño ipuere uyuca. Ipuere'ã uyuca perecove. Pequiye Tumpa güi. Echa'ã jae ipuere omondo quía jete jare jecove tata guasu pe —jei—. ²⁹ Picuua co quirái umaemee vae reta umee mocui güira-raí mboví ete corepoti re. Ërei mbaeti penti yepe umano oa ívi pe peRu uicuaa'ã reve —jei—. ³⁰ Tumpa uicuaa mboví pea penoi peáca re vae —jei—. ³¹ Jáeramo agüiye pequiye. Echa'ã Tumpa perau ete jeta güira-raí reta güi —jei—.

*Íru vae reta jovaque uye cuuaaca vae
(Lc 12.8-9)*

³² Ime yave quía íru vae reta jovaque jei yave: ‘Che co jae Jesús jemimboe’, che jaeta cheRu ara pe oí vae jovaque: ‘Cua co jae cheremimboe’ —jaeta, jei Jesús—. ³³ Ërei ime yave quía íru vae reta jovaque checuacu vae, che vi aicuacuta cheRu ara pe oí vae jovaque —jei—.

*Ayu uyembiyao vaerä uyugüi ívi pegua reta
(Lc 12.51-53; 14.26-27)*

³⁴ Aramoi pepia pe piyemingueta che ayu co amee vaerä mbiacatu ívi pegua reta pe. Ërei jucuaräi'ã co. Che ayu uyembiyao vaerä uyugüi ívi pegua reta, mbaeti güinoi vaerä mbiacatu —jei—. ³⁵ Ayu penti cuimbæ oyovaicho vaerä tu ndive, jare cuñatai oyovaicho vaerä ichi ndive, jare cuña oyovaicho vaerä imesi ndive —jei—. ³⁶ Jare cuimbæ jenta pegua reta oyovaichota jae ndive —jei—. ³⁷ Ime yave quía uau ete tu jare ichi chegüi vae, ndarau ipuere ico cheremimboerä. Jae ramiño vi ime yave quía uau ete isambiai reta chegüi vae, ndarau ipuere ico cheremimboerä —jei—. ³⁸ Jare ime yave quía ovoi'ã icurusu oo vaerä cherupíe vae, ndarau ipuere ico cheremimboerä —jei—. ³⁹ Uipota uñuvatu jecove vae ndarau ipuere. Ërei umeeta jecove chereco pegua vae uñuvatuta co —jei—.

*Ambijecoviata co chupe
(Mr 9.41)*

⁴⁰ Ime yave quía uyapo icavi vae peve, cheve uyapo icavi vae. Jare jocua cheve uyapo icavi vae, uyapo vi icavi vae chembou vae pe —jei—. ⁴¹ Ime yave quía icavi vae uyapo penti Tumpa iñee umimbeu vae pe Tumpa iñee umimbeu ramo, Tumpa umeeta chupe iñee umimbeu vae pe umeeta vae. Jae ramiño vi ime yave quía icavi vae uyapo penti jupi vae uyapo vae pe jupi vae uyapo ramo, Tumpa umeeta chupe jupi vae uyapo vae pe umeeta vae —jei—. ⁴² Añete che jae peve, ime yave quía umee penti vaso i roïsa vae yepe penti sambiai jou vaerä vae, uyapo yave jucuaräi jae co cheremimboe ramo, ambijecoviata co chupe —jei—.

11

*Juan ombou vae reta
(Lc 7.18-35)*

¹ Jare Jesús opa ma oyocui yave jocua doce jemimboe reta, jae etei oo joco güi oporomboe vaerä jare umimbeu vaerä Tumpa iñee Israel pegua tenta guasu reta pe.

² Jare Juan peresoríru pe oí rambueve, uicuaa Cristo uyapo oí vae regua. Jayave ombou mocui jemimboe reta Jesús oí vae pe ³ jei vaerä chupe:

—¿Nde pa co jae Cristo outa vae? ani ¿nuárota pa íru vae ou vaerä?

⁴ Jayave Jesús jei chupe reta:

—Pecua ye pemimbeu Juan pe piyandu jare peeche vae regua. ⁵ Jesa mbae vae reta umae ma. Ipuere mbae uguata vae reta uguata ma. Ipire ocui vae reta ucuera ma. Iyapisa mbae vae reta uyandu ma. Umanocue vae reta icove ye ma. Iparavete vae reta uyapisaca níee icavi vae re —jei—. ⁶ Jare Tumpa umividiseta jecuae güirovia cheré vae reta —jei—.

⁷ Jare Yugüiraa ye yave Juan ombou vae reta, Jesús umbipi umingueta joco pe ñugüinoi vae reta Juan re. Jei chupe reta:

—¿Quía re pa co peo ñuu pe pema? Jae ipirata mbae vae'ã co tacuaräi omi ívitu uipeyu yave vae rami —jei—. ⁸ ¿Quía re pa co peo pema? Jae omonde'ã temimonde ipóra vae. Mase, temimonde ipóra vae omonde vae reta yugüireco mburuvicha guasu reta jenta pe —jei—. ⁹ ¿Quía re pa co peo pema? ¿Peo ra pema vaerä penti Tumpa iñee umimbeu vae re? Añete che jae peve, Tumpa umee chupe uyapo vaerä jeta ete íru Tumpa iñee umimbeu vae reta uyapo vae güi —jei—. ¹⁰ Tumpa iñee uye cuatía oí jese cuaräi:

‘Mase’ —jei Tumpa—, ‘che amondota chiñee güiraata vae nderenonde,

uyapicatu vaerā nderaperā.'

Jucuarāi uyecuatía oī —jei—.¹¹ Añete che jae peve, Tumpa umee Juan upurumbibautizase vae pe uyapo vaerā jeta ete íru Tumpa iñee umimbeu vae reta uyapo vae güi. Ërei taicuegua vae ara pegua mboroyocuia pegua uyembutuichaca eteta Juan güi —jei—.¹² Juan upurumbibautizase vae umbipi Tumpa iporoyocuia regua umimbeu güiive, opaete vae uipota uique jocua mboroyocuia ara pegua pe —jei—.¹³ Echa'á opaete Tumpa iñee aracae umimbeu vae reta uicuatía vae jare mboroyocuvi vi uicuaaca Tumpa iporoyocuia regua ndei Juan ou mbove —jei—.¹⁴ Jare pipota yave perovia, jae co Elfás. Echa'á Tumpa iñee aracae umimbeu vae jei outa co Elías —jei—.¹⁵ Uipota uyandu vae tuyapisaca cua re —jei—.

¹⁶ Tamimbeu peve mbae ndive amboyovaque añaive yugüireco vae reta. Jae reta co sambiai plaza pe uguapi ñugüinoi vae reta rami. Jae reta jei uyupe cuarāi:¹⁷ 'Nduyemimbi ma peve, Ërei pe reta pepirae'á. Orepitati perovaque, Ërei pe reta piyao'á.' Jucuarāi jei —jei—.¹⁸ Echa'á Juan ou, jare jae uyecuacu tembíu jare vino güi. Jáeramo uicuaaca vae reta jei aña oya co Juan re —jei—.¹⁹ Che cuimbaerā ayeyapo vae ayu, jare che ayecuacu'á tembíu jare vino güi. Jáeramo checuua vae reta jei cuarāi: 'Mase, jae jou jeta tembíu jare vino. Jae co mburuvicha peguarā ocovara vae reta jare teco icavi mbae vae uyapo vae reta iamigo.' Jucuarāi jei —jei—. Ërei opaete iyaracuua vae reta uicuaaca aracuua icavi co —jei.

Tenta guasu pegua uiporarata vae reta

(Lc 10.13-15)

²⁰ Jayave Jesús umbipi uñengata jocua tenta guasu jeta miacañi uyapo pipe vae reta pe. Echa'á jocua tenta guasu pegua reta ueya'á iyemingueta icavi mbae vae ipia pe oī vae. Jae jei:

²¹ —Corazín pegua reta uiporarata co. Betsaida pegua reta uiporarata co. Echa'á jeta miacañi reta ayapo ipite pe chembaepuere pe. Jucuarāi ayapo yave mona Tiro jare Sidón pe, joco pegua reta ueyata tēi aracae ma iyemingueta icavi mbae vae ipia pe oī vae. Omondeta tēi temimonde jaimbe vae jare oñonota tēi tanimbu iñáca re uicuaaca vaerā ipiatiti co —jei—.²² Ërei che jae peve, Tumpa uáa yave iñi pegua reta, Corazín jare Betsaida pegua reta tanta uiporarata Tiro jare Sidón pegua reta güi —jei—.²³ Jare Capernaum pegua reta ipia pe uyemingueta tēi icavi co yugüireco vaerā Tumpa ndive. Ërei Tumpa omondota reta yugüireco vaerā cañitei pe. Echa'á jeta miacañi reta ayapo ipite pe chembaepuere pe. Jucuarāi ayapo yave mona Sodoma pe, Sodoma ndarau tēi uyembai —jei—.²⁴ Ërei che jae peve, Tumpa uáa yave iñi pegua reta, Capernaum pegua reta tanta uiporarata Sodoma pegua reta güi —jei—.

Peyu checoti peputuu vaerā

(Lc 10.21-22)

²⁵ Jayave Jesús jei:

—CheRu, nde co jae ara pegua reta jare iñi pegua reta iYa. Amee yasurupai ndeve quirāi nde nemaeño'á cua iñi pegua iyaracuua vae reta re uicuaaca vaerā cua mbaembae, Ërei ndicuaaca sambiai ramí vae reta pe.²⁶ Icavi co, cheRu. Echa'á icavi co ndeve ndiyapo vaerā jucuarāi —jei—.

²⁷ Jayave jei vi:

—CheRu umee ma cheve opaete. Mbaeti quía uicuaa cavi chereguia, jaeño cheRu. Jae ramíño vi mbaeti quía uicuaa cavi cheRu regua, jaeño che jare che aicuaaca chupe vae reta —jei—.

²⁸ Opaete piyemipa'á jare pepiatiti pico vae reta peyu checoti. Che tambuputuu perecove —jei—.

²⁹ Piñemíru che ndive jare piyemboe che aipota pomboe jese vae re. Echa'á che añemimichi. Ayembutuicha'á etei. Jucuarāi piyapo yave, perecove uputuuta —jei—.³⁰ Echa'á piñemíru yave che ndive, ndarau piyemipa'á jare ndarau pepiatiti —jei—.

12

Jesús jemimboe reta uipoo trigo mbutuu ara pe

(Mr 2.23-28; Lc 6.1-5)

¹ Mbutuu ara pe Jesús oo co rupi jemimboe reta ndive. Jesús jemimboe reta iyembai jare umbipi uipoo trigo jare jou.² Ërei fariseo reta uecha yave, jae Jesús pe:

—Mase, nderemimboe reta uyapo ñugüinoi aguiyeta tēi uyapo mbutuu ara pe vae.

³ Jayave Jesús jei chupe reta:

—¿Pemingueta'á pa David uyapocue vae regua, jae jare jae ndive ñugüinoi vae reta iyembai yave?

⁴ David uique Tumpa jo pe jare jou mbiyape Tumpa jo pe uñenono tee vae reta. Aguiyeta tēi co David jare jae ndive ñugüinoi vae reta jou jocua mbiyape. Jaeño sacerdote reta ipuere jou —jei—.⁵ Jare ¿pemingueta'á etei pa mboroyocuvi pe quirāi mbutuu ara pe sacerdote Tumpa jo pe ñugüinoi vae reta uyapo aguiyeta tēi quía uyapo mbutuu ara pe vae? Ërei Tumpa umbijeco'á reta —jei—.⁶ Ërei che jae peve, che cua pe aí vae ayembutuichaca ete Tumpa jo güi —jei—.⁷ Ërei picuua'á mbae uipota jei cua

Tumpa iñee pe uyecuatía oĩ vae: ‘Aipota pepuruparareco vaerā’ —jei Tumpa—, ‘aipota’ã maemimba uyeyucacue reta pemee cheve vaerāño.’ Jucuarāi uyecuatía oĩ. Echa’ã picuua yave mona, ndarau tēi pembijeco mbaeti teco güïnoi vae reta —jei—.⁸ Echa’ã che cuimbaerā ayeyapo vae chepuere jae mbae icavi uyeyapo vaerā mbutuu ara pe —jei.

Cuimbae ipo joavaicho tipa vae

(*Mr 3.1-6; Lc 6.6-11*)

⁹ Jare Jesús oo joco güü uique judío reta itupao pe.¹⁰ Jare joco pe oĩ penti cuimbae ipo joavaicho tipa vae. Jare joco pe ñugüïnoi vae reta upirandu Jesús pe:

—¿Icavi pa yambigüera vaerā quía mbutuu ara pe? ¿Mbae pa jei mboroyocui cua re? —jei reta.

Echa’ã jae reta uipota tēi umbijeco Jesús.

¹¹ Jayave Jesús jei chupe reta:

—Penti cuimbae güïnoi yave penti ovecha, jare ovecha oa yave ivicua pe mbutuu ara pe, cuimbae uiñisi voita güïnoë ivicua güü.¹² Èrei penti cuimbae jepi ete penti ovecha güü. Jáeramo jupi co yayapo vaerā icavi vae mbutuu ara pe —jei.

¹³ Jayave jei cuimbae pe:

—Eupi indepo.

Jayave cuimbae ipo uupi, jare ucuera voi. Oyovaque ma ipo joavaicho ipo icavi vae ndive.¹⁴ Jayave fariseo reta oẽ judío reta itupao güü, jare uyemboemboe quirāi ra uyucacata Jesús.

Cherembiocui aiparavo vae

¹⁵ Èrei Jesús cua uicuua yave, oo joco güü. Jare jeta vae reta yugüüraa jaicue, jare Jesús umbigüera opaete imbaerasi vae reta.¹⁶ Jare Jesús oyocui reta agüüye vaerā umimbeu quía co jae vae.¹⁷ Cua uyapo, uyeyapo vaerā Tumpa iñee aracae umimbeu vae Isaías jei vae. Echa’ã jae jei cuarāi:

¹⁸ “Mase, jae co cherembiocui aiparavo vae” —jei Tumpa—.

“Aau ete. Ayerovia tuicha jese.

Ameeta chupe cheEspíritu, jare jae uaata judío mbae vae reta.

¹⁹ Ndarau ueyaca quía ndive. Ndarau vi quía uyandu iñee calle rupi.

²⁰ Ndarau uaquio tacuarāsi uyeca vae.

Ndarau vi ombove mechero michi ete jendí oĩ vae, ndei upurumiamiri upuruña vaerā mbove.

²¹ Jare jae jee re judío mbae vae reta güïroviata.”

Jucuarāi jei.

Jei reta icavi mbae vae Espíritu Santo cotí

(*Mr 3.20-30; Lc 11.14-23; 12.10*)

²² Jayave amocue vae güeru Jesús oĩ vae pe penti cuimbae aña oya jese vae. Cuimbae jesa mbae vae jare iupa vi. Jare Jesús umbigüera. Cuimbae umae ma jare uyeminguela ma.²³ Jare opaete joco pe ñugüïnoi vae reta ipiácañi jare jei:

—¿Cua ra co jae David iñemoñaa reta pegua?

²⁴ Èrei fariseo reta cua uyandu yave, jei reta:

—Aña guasu Beelzebú imbaepuere pe umbisíri aña reta oya jese vae reta güü.

²⁵ Jesús uicuua fariseo reta ipiayemingueta jare jei chupe reta:

—Penti tenta guasu pegua reta oyovaicho uyupii yave, opata co jocua tenta guasu. Jae ramíño vi penti tenta pegua reta oyovaicho uyupii yave, opata co jocua tenta —jei—.²⁶ Jare Satanás umbisíri yave Satanás oya jese vae reta güü, imbaepuere uyembiyao ma co. Jáeramo ndarau etei ma oĩ iporoyocuia —jei—.²⁷ Èrei che ambisíri yave aña reta oya jese vae reta güü Beelzebú imbaepuere pe, ¿quía imbaepuere pe ra umbisíri aña reta oya jese vae reta güü perentará reta? Pepuere pepirandu chupe reta jese —jei—.²⁸ Èrei che ambisíri aña reta oya jese vae reta güü Tumpa iEspíritu imbaepuere pe. Jáeramo pepuere picuua ou ma co uväe peve Tumpa iporoyocuia —jei—.

²⁹ Ime yave quía uipota uique cuimbae ipiräta vae jenta pe upíro vaerā imbaembae chugüi vae, uipecuata rani cuimbae ipiräta vae. Jayave ramo ipuereta upíro imbaembae chugüi —jei—.

³⁰ Ime yave quía uipota’ã ico cheírurä vae, oyovaicho co che ndive. Jae ramíño vi ime yave quía chembori’ã vae, uyapo co icavi mbae vae checoti —jei—.³¹ Jáeramo che jae peve, opaete ivi pegua reta imbaeyoa reta jare opaete iñee icavi mbae Tumpa cotí vae Tumpa ipuere umbai. Èrei Tumpa ndarau etei umbiasa jei icavi mbae vae Espíritu Santo cotí vae pe —jei—.³² Jare ime yave quía jei icavi mbae vae che cuimbaerā ayeyapo vae cotí vae, Tumpa umbiasata chupe. Èrei ime yave quía jei icavi mbae vae Espíritu Santo cotí vae, Tumpa ndarau etei umbiasa chupe, añave jare ara reta outa vae pe —jei—.

Ía icavi vae jare ía icavi mbae vae

(*Lc 6.43-45*)

³³ Penoi yave temiti icavi vae, penoita vi ía icavi vae. Jae ramiño vi penoi yave temiti icavi mbae vae, penoita vi ía icavi mbae vae. Echa'ã peechea yave temiti ía, picuaua icavi ra temiti —jei—. ³⁴ Pe reta co jae mboi pochi vae reta rami. Echa'ã pe reta piyapo icavi mbae vae. Jáeramo pepuere'ã etei pere icavi vae. Echa'ã penti penti uyemingueta ipia pe güinói vae rupi —jei—. ³⁵ Quía nunga jecocavi vae güinói icavi vae ipia pe. Jáeramo jei icavi vae. Jae ramiño vi quía nunga jecopochi vae güinói icavi mbae vae ipia pe. Jáeramo jei icavi mbae vae. ³⁶ Êrei che jae peve, jocua ara Tumpa upuruña yave, jae umbijecota ívi pegua reta opaete ñee icavi mbae vae regua re —jei—. ³⁷ Echa'ã Tumpa jeita icavi vae co piyapo, icavi vae pere yave. Jae ramiño vi Tumpa jeita icavi mbae vae co piyapo, icavi mbae vae pere yave —jei—.

Uipota reta uecha miacañi

(Mr 8.12; Lc 11.29-32)

³⁸ Jayave amocue mboroyocui re oporomboe vae reta jare fariseo reta jei Jesús pe:

—Opromboe vae, nduipota ndiyapo vaerā mbae ndicuaaca vaerā oreve quía co nde.

³⁹ Jayave Jesús jei chupe reta:

—Añave yugüireco vae reta icavi mbae vae uyapo vae reta co. Upurugüirovia'ã. Jáeramo uipota ayapo vaerā miacañi chupe reta. Êrei jaeño uyeyapota mbae Tumpa iñee aracae umimbeu vae Jonás pe uyeyapo vae rami, jae reta uicuua vaerā quía co che —jei—. ⁴⁰ Echa'ã Jonás upita mbapi ara jare mbapi piare jocua pira guasu jie pe. Jae ramiño vi che cuimbäerä ayeyapo vae apitata mbapi ara jare mbapi piare ivigüi pe —jei—. ⁴¹ Tumpa upuruña yave, Nínive pegua reta upüata umbijeco vaerā añave yugüireco vae reta. Echa'ã jae reta ueya iyemingueta icavi mbae vae ipia pe oí vae, Jonás umimbeu chupe reta yave Tumpa iñee. Êrei chembäepuere tuicha ete co Jonás imbaepuere güi —jei—. ⁴² Tumpa upuruña yave, jocua cuña mburuvicha guasu ico sur coti vae upüata umbijeco vaerā añave yugüireco vae reta. Echa'ã jae ou mbiri ete güi uyapisaca vaerā Salomón iyaracuaa catu vae re. Êrei che chearacuaa catu ete Salomón güi —jei—.

Aña usirí jare ou ye vae

(Lc 11.24-26)

⁴³ Penti aña usirí ma yave oya jese vae güi, uguata ñana rupi ueca quiape ico vaerā. Êrei ipuere'ã yave uväe quiape ico vaerā, ⁴⁴ jei iyupe: Taa ye jocua chero ayu chugüi vae pe —jei, jei—. Echa'ã yandepuere yamijaanga penti o jocua cuimbäe aña usirí ma chugüi vae re. Aña ou ye uväe yave jocua o pe, uecha ipo'ã. O iya utupeí ma jare uyapicatu —jei—. ⁴⁵ Jayave oo ye aña güeru siete aña icavi mbae ete chugüi vae reta jocua o pe. Jayave ocho reve uique o pe, joco pe yugüireco vaerā. Tenonde yave, penti aña oya jese yave, jocua cuimbäe uiporara. Êrei taicue rupi ocho aña reta oya jese. Jáeramo tanta uiporara. Jae ramiño vi uyeyapota añave yugüireco vae icavi mbae vae uyapo vae reta pe —jei—.

Jesús ichí jare tiví reta

(Mr 3.31-35; Lc 8.19-21)

⁴⁶ Jare Jesús uyemingueta rambueve joco pe ñugüinói vae reta pe, Jesús ichí jare tiví reta yugüeru uväe jae oí vae pe, jare oca pe ñugüinói. Jae reta uipota uyemingueta Jesús ndive. ⁴⁷ Jayave penti joco pe oí vae jei Jesús pe:

—¡Aipo! Ndesi jare nderivi reta oca pe ñugüinói. Uipota uyemingueta nde ndive —jei—.

⁴⁸ Êrei Jesús jei chupe:

—¿Quía nunga pa co jae chesi jare cherivi reta?

⁴⁹ Jayave uupi ipo jemimboe reta coti, jare jei:

—Cua nunga reta co jae chesi jare cherivi reta. ⁵⁰ Echa'ã opaete cheRu ara pe oí vae jei vae uyapo vae reta co jae cherivi jare cherindi jare chesi —jei—.

13

Jesús umijaanga umaeti vae

(Mr 4.1-9; Lc 8.4-8)

¹ Jocua ara Jesús oë tenta güi oo uguapi i guasu jembei pe. ² Jare jeta vae uyembati Jesús oí vae pe. Jáeramo Jesús uyupi penti chalana i guasu pe oí vae pe, jare uguapi pípe. Jare yati vae reta uyemboi ñugüinói i guasu jembei pe. ³ Jare Jesús omboe reta jeta mbaembae re umijaanga reve. Jei chupe reta:

—Penti cuimbäe oo umaeti vaerā. ⁴ Umaeti yave, umiai temiti, jare amocue oa tape rupi. Jayave yugüeru güira reta opa jou —jei—. ⁵ Íru temiti oa mboviño ívi itape íárambo oí vae pe. Cua ímambae oë, jeta'ã ívi chupe ramo —jei—. ⁶ Êrei guarasi jasi yave, ipiru. Jare japo quipel'ã oí ramo, utini —jei—. ⁷ Íru temiti oa ñanapite pe. Ñana ucuacuaa yave, opa uyuca temiti. ⁸ Jare íru temiti oa ívicavi pe. Cua reta ucuacuaa cavi jare ía. Amocue jeta ete jää, jare íru jeta catu jää, jare íru mboviño jää —jei—. ⁹ Uipota uyandu vae tuyapisaca cua re —jei—.

*Maera Jesús oporomboe umijaanga reve
(Mr 4.10-12; Lc 8.9-10)*

¹⁰ Jayave Jesús jemimboe reta yugüero upirandu chupe:

—¿Maera pa nemingueta reta nemijaanga reve?

¹¹ Jayave Jesús jei chupe reta:

—Amimbeu ma peve mboroyocuia ara pegua regua. Cua uyeucua'ā ūru vae reta pe —jei—. ¹² Echa'ā güiñoi vae pe uñemíñruta, jeta güiñoi vaerā. Ërei mbaeti güiñoi vae güiñ mboví ete güiñoi vae uyeequita —jei—. ¹³ Jáeramo amingueta reta amijaanga reve, agüiye vaerā uicuua cavi, yepe tēi uecha, jare agüiye vaerā uicuua, yepe tēi uyandu —jei—. ¹⁴ Jare uyeyapo chupe reta Tumpa iñee aracae umimbeu vae Isaias jei vae. Echa'ā jae jei cuarái:

‘Piyandu tēita, Ërei ndarau picuua.

Peecha tēita, Ërei ndarau picuua cavi.

¹⁵ Echa'ā cua reta ipiatanta,

jare iyapisa pe uyandu tēi,

jare usapímiño,

agüiye vaerā uecha jesa pe,

jare agüiye vaerā uyandu iyapisa pe,

jare agüiye vaerā uicuua ipia pe,

jare agüiye vaerā uyerova checoti.

Echa'ā uyerova checoti yave, ambaita tēi imbaeyoa reta’ —jei Tumpa.

Jucuarái jei Isaías —jei—.

¹⁶ Ërei Tumpa pemivendise ma. Echa'ā pe reta peeche peresa pe, jare piyapisaca peapisa pe —jei—.

¹⁷ Añete che jae peve, jeta Tumpa iñee aracae umimbeu vae reta jare jipi vae reta uipota tēi uecha pe reta peeche ma vae, Ërei uecha'ā. Jae ramiño vi jae reta uipota tēi uyandu pe reta piyandu ma vae, Ërei uyandu'ā —jei—.

Umaeti vae uyemijaanga jese vae

(Mr 4.13-20; Lc 8.11-15)

¹⁸ Amimbeu ma peve amijaanga reve cuimbae umaeti vae. Jáeramo piyapisaca ye jese —jei—. ¹⁹ Ime yave quía uyapisaca Tumpa iporoyocuia re vae, uicuua cavi'ā yave uyandu vae, ou voi jocua icavi mbae vae jare umiacañi Tumpa iñee güi. Amijaanga cua nunga re temiti tape rupi oa vae —jei—. ²⁰ Jae ramiño vi jocua temiti uñeñotí mboviño ivi itape iárambo oí vae pe vae uyemijaanga ūru vae reta Tumpa iñee uyandu vae re. Jupivoiño uyerovia reta, jare uipota cua ñee —jei—. ²¹ Ërei cua reta jocua temiti japo quipe'ā oí vae rami co. Jáeramo imambae icueri reta. Mbaesusere uyeyapo chupe reta ani ūru vae reta uyapo icavi mbae vae chupe reta Tumpa iñee uicuua ramo. Jare jupivoiño uipota'ā ma uyapisaca reta Tumpa iñee re —jei—. ²² Jae ramiño vi jocua temiti uñeñotí ñanapite pe vae uyemijaanga ūru vae reta Tumpa iñee uyandu vae re. Ërei jae reta umbipi uyemipa'ā ivi pe mbaembae uyeyapo vae re, jare uyembítavi, uipota icocatu ramo. Jare opaete cua umiacañi reta Tumpa iñee güi. Jáeramo jae reta jocua temiti ia'ā vae rami co —jei—. ²³ Ërei jocua temiti uñeñotí ñavicavi pe vae uyemijaanga ūru vae reta Tumpa iñee uyandu vae re. Cua reta uicuua cavi Tumpa iñee. Amocue vae jocua temiti jeta ete jää vae rami co. ūru vae reta jocua temiti jeta catu jää vae rami co. Jare ūru vae reta jocua temiti mboviño jää vae rami co —jei—.

Trigo jare trigo-raanga

²⁴ Jesús imiari ye yati vae reta pe umijaanga reve. Jei chupe reta:

—Mboroyocuia ara pegua penti cuimbae temiti icavi vae ico pe oñoti vae rami co. ²⁵ Ërei opaete vae que rambueve, cuimbae jovaicho ou oñoti trigo-raanga trigo ipite rupi, jare oo ye —jei—. ²⁶ Trigo ucuacuua jare fa. Ërei ucuacuua vi trigo-raanga trigo ipite rupi —jei—. ²⁷ Jáeramo co iya jembiocui reta yugüero ipatrón pe jei chupe: ‘Patrón, ¿niñotí'ā pa trigo icavi vae ndeco pe? ¿Maera pa ucuacuua trigo-raanga?’ —jei reta, jei—. ²⁸ Jayave ipatrón jei chupe reta: ‘Penti cherovaicho oñoti.’ Jayave jembiocui reta jei chupe: ‘¿Ndipota pa ndoo vaerā nduequi trigo-raanga?’ ²⁹ Ërei ipatrón jei: ‘Agüiye peeque. Echa'ā peeque yave trigo-raanga, aramoi peequita vi trigo trigo-raanga ndive’ —jei, jei—. ³⁰ ‘Tucuacuua pâve mocuì reve trigo yaipo regua. Jare yaipo yave, jaeta uiopo vae reta pe: Pembati rani trigo-raanga piyocua peapi vaerā. Ërei pembati trigo jiru pe’ —jei, jei.

Mostaza jääcue

(Mr 4.30-32; Lc 13.18-19)

³¹ Jesús imiari ye yati vae reta pe umijaanga reve. Jei chupe reta:

—Mboroyocuia ara pegua penti mostaza jääcue cuimbae güíraa oñoti ico pe vae rami co. ³² Cua jääcue michi-rai ete opaete ūru temiti reta jääcue güi. Ërei ucuacuua ma yave, tuchá ete opaete ūru temiti penti

año peguaño ucuacuaa vae reta güi. Uyeyapo penti ivira. Jáeramo güira reta ipuere uyapo jaitirä jaca reta re —jei.

*Levadura
(Lc 13:20-21)*

³³ Jesús imiari ye yati vae reta pe umijaanga reve. Jei chupe reta:

—Mboroyocuia ara pegua levadura rami co. Cuña umbiyea levadura jeta catu harina ndive, levadura uñemai vaerä opaete masa rupi —jei.

*Maera Jesús oporomboe umijaanga reve
(Mr 4:33-34)*

³⁴ Opaete cua jei Jesús yati vae reta pe umijaanga reve. Jare jecuaeño imiari chupe reta umijaanga reve, ³⁵ uyeyapo vaerä Tumpa iñee araceae umimbeu vae jei vae. Echa'ã jei cuarai:

“Chemiarita amijaanga reve.

Amimbeuta ivi uyeyapo güiive uyecuaa mbae vae.”

Jucuaräi jei.

Mbae trigo jare trigo-raanga uyemijaanga jese vae

³⁶ Jayave Jesús omondo ye yati vae reta, jare uique o pe. Jare Jesús jemimboe reta yugüeru jei chupe:

—Nemimbeu ma oreve nemijaanga reve jocua co trigo-raanga ucuacuaa pipe vae. Emimbeu oreve mbae uipota jei vae.

³⁷ Jayave Jesús jei chupe reta:

—Temiticavave oñoti vae uyemijaanga che cuimbaerä ayeyapo vae re. ³⁸ Jocua co uyemijaanga opaete ivi re. Trigo icavi vae uyemijaanga Tumpa iporoyocuia pegua reta re. Ërei trigo-raanga uyemijaanga icavi mbae vae uyapo vae reta re —jei—. ³⁹ Jocua co iya joaicho trigo-raanga oñoti vae uyemijaanga aña guasu re. Mbaepoo uyemijaanga cua ara reta iyapi re. Umbaepoo vae reta uyemijaanga ángel reta re —jei—. ⁴⁰ Jocua trigo-raanga uyembatica jare ocaí tata pe. Jae ramíño vi jucuaräita uyeyapo cua ara reta iyapi pe —jei—. ⁴¹ Che cuimbaerä ayeyapo vae ambouta ángel cheve uyeyocuia vae reta, jare jae reta umbatita opaete iyoa vae reta jare icavi mbae vae uyapo vae reta, omombo reta vaerä cheporoyocuia güi —jei—. ⁴² Jare omombota reta tata guasu pe. Joco pe uyaota reta jare jai umbiquiririuta —jei—. ⁴³ Jayave jipi vae reta uyecuata Tu iporoyocuia pe guarasi jembipe rami. Uipota uyandu vae tuyapisaca cua re —jei—.

Corepoti uñeñoti vae

⁴⁴ Mboroyocuia ara pegua corepoti uñeñoti vae rami co. Echa'ã penti cuimbae uväe yave jocua corepoti uñeñoti vae, oñomi ye, jare uyerovia reve oo umee corepoti re opaete imbaembae ogua vaerä jocua co —jei—.

Ita ipôra vae

⁴⁵ Mboroyocuia ara pegua penti umaemee vae ita ipôra vae reta ueca vae rami co —jei—. ⁴⁶ Uvâe yave penti ita ipôra vae jepi ete vae, oo umee corepoti re opaete imbaembae ogua vaerä jocua ita ipôra vae —jei—.

Pisa jare jevae i rupigua reta

⁴⁷ Mboroyocuia ara pegua penti pisa rami co. Echa'ã cuimbae reta omombo pisa i guasu pe omboa vaerä ipotave jevae i rupigua reta —jei—. ⁴⁸ Jare pisa tinee ma yave, cuimbae reta güeru i guasu jembei pe. Jayave uguapi joco pe jare umbatita umbiru jevae i rupigua icavi vae reta jiru pe, ërei omombo jevae i rupigua icavi mbae vae reta —jei—. ⁴⁹ Jae ramíño vi jucuaräita uyeyapo cua ara reta iyapi pe. Ángel reta yugüeruta jare umbatita icavi mbae vae uyapo vae reta omombo vaerä jipi vae reta ipite güi —jei—. ⁵⁰ Jare omombota reta tata guasu pe. Joco pe uyaota reta jare jai umbiquiririuta —jei—.

Mbaembae ipiau vae jare indechi vae

⁵¹ Jayave Jesús upirandu chupe reta:

—¿Picuuaa cavi ma pa opaete cua?

—Nduicuuaa cavi ma, oreYa —jei reta chupe.

⁵² Jayave Jesús jei chupe reta:

—Penti mboroyocuia re oporomboe vae mboroyocuia ara pegua re uyemboe vae, penti tenta iya rami co. Echa'ã tenta iya umee jenta pegua reta pe mbaembae ipiau vae jare mbaembae indechi vae jo pe uñuvatu vae güi —jei—.

Jesús Nazaret pe

(Mr 6:1-6; Lc 4:16-30)

⁵³ Jare Jesús opa ma yave cua jei umijaanga reve, oo ye joco güi. ⁵⁴ Jare oo uväe yave iivi pe, oporomboe judío reta itupao pe, jare uyapisaça jese vae reta ipiacañi jare jei.

—¿Quíape ra uyemboe cua cuimbae iyaracuua catu vaerā? ¿Quíá ra umee chupe mbaepuere cua miacañi reta uyapo vaerā? ⁵⁵ Jae co carpintero tai. Jae co María imembí. Jae co Jacobo, José, Simón jare Judas tiquei —jei reta—. ⁵⁶ Jare opaete jindi reta yugüireco yandepite pe. Jáeramo ¿quirai ra ipuere uyapo opaete cua? —jei reta.

⁵⁷ Jáeramo jae reta pochi Jesús pe. Jayave Jesús jei chupe reta:

—Opaete vae uipiu penti Tumpa iñee umimbeu vae. Jaeño jentaigua reta jare jenta pegua reta uipiu'á reta —jei.

⁵⁸ Jare joco pe ipuere'á uyapo jeta miacañi reta jae reta güirovia'á jese ramo.

14

Juan imano

(Mr 6.14-29; Lc 9.7-9)

¹ Jare jocua ara reta pe mburuvicha guasu Herodes uyandu Jesús regua. ² Jare jei jembiocui reta pe:

—Jae co Juan upurumbibautizase vae. Icove ye ma ou umanocue vae reta ipite güii. Jáeramo uyapo cua miacañi reta —jei.

³ Echa'á ndei Juan umano mbove, Herodes uipísica Juan, jare oñonoca peresoriru pe, Herodías jei ramo. Herodías co jae Herodes tivi Felipe jee vae jembireco. ⁴ Echa'á tenonde yave Juan jei Herodes pe: “Icavi'á nemenda vaerā nderivi jembireco ndive.” ⁵ Jáeramo Herodes uipota tēi uyucaca Juan. Ërei uquye tenta guasu pegua reta güii. Echa'á jae reta güirovia Juan co jae penti Tumpa iñee umimbeu vae.

⁶ Ërei Herodes uyembíara yave oa vae regua, Herodías imembí cuña ou upirae ipite pe jare umbiyerovia Herodes. ⁷ Jayave Herodes jei Tumpa jee re umeeta co cuñatai pe ipotave mbae ueca chupe vae. ⁸ Jayave cuñatai jei Herodes pe:

—Emee cheve cua pe Juan upurumbibautizase vae iñaca penti plato pe.

Echa'á cuñatai ichi umimbeu ma chupe jucuarai jei vaerā.

⁹ Jayave mburuvicha guasu ipiatiti. Ërei Tumpa jee re jei chupe ramo, jare iru vae reta uyandu ramo, omondo sundaro Juan iñaca güeru vaerā umee chupe. ¹⁰ Jayave oo sundaro peresoriru pe uñacasía Juan. ¹¹ Jayave güeru iñacacue penti plato pe, jare umee cuñatai pe. Jayave cuñatai güiraa umee ichi pe. ¹² Jare Juan jemimboe reta yugüeru güiraa jetecue jare oñoti. Jayave yugüiraa umimbeu Jesús pe.

Jesús umingaru cinco mil cuimbae reta

(Mr 6.30-44; Lc 9.10-17; Jn 6.1-14)

¹³ Jare Jesús cua uyandu yave, oo penti chalana pe quii ngatu vae pe. Ërei jeta vae uicuua yave, yugüiraa ivi rupiño tenta guasu reta güii Jesús oo vae pe. ¹⁴ Jesús ugüeyi yave chalana güi, uecha jeta vae, jare uiparareco reta. Jayave umbigüera imbaerasi vae joco pe ñugüinoi vae reta.

¹⁵ Caaru ma yave, Jesús jemimboe reta yugüeru jei chupe:

—Mbaeti quiave ico cua rupi, jare caaru ma oñi. Emondo cua jeta vae, ogua vaerā jembiurā tenta tenta rupi —jei reta.

¹⁶ Ërei Jesús jei chupe reta:

—Agiüye tuyugüiraa. Pe reta pemee tucaru —jei.

¹⁷ —Jaeño ime cua pe nonoi pandepo mbiyape jare mocui pira —jei reta chupe.

¹⁸ —Peru cheve cua pe —jei.

¹⁹ Jayave Jesús oyocui jocua jeta vae reta uguapi vaerā capiichape re. Jayave uipisi jocua pandepo mbiyape jare mocui pira, jare umae ara coti, jare umee yasurupai Tumpa pe. Jayave upisaa mbiyape, jare umee jemimboe reta pe, jae reta umee vaerā yati vae reta pe. ²⁰ Opareve ucaru, jare iyangapii reta. Jayave Jesús jemimboe reta umbati tembfu uñepisaaue jembire vae, jare umitinee doce canasta. ²¹ Jare ucaru vae reta güi cuimbae retaño uyepapa cinco mil rupi. Uyepapa'á cuña reta jare sambiai reta.

Jesús uguata i iárambo

(Mr 6.45-52; Jn 6.16-21)

²² Jare jupivoiño Jesús oyocui jemimboe reta uyipi vaerā chalana pe, jare yugüiraa vaerā jenonde i guasu jovaicho pe, jae omondo rambueve uyembati vae reta. ²³ Jare opa omondo yave, Jesús uyipi ivitu guasu re uyerure vaerā Tumpa pe. Jare pítu ma yave, jaeño Jesús joco pe oñi. ²⁴ Ërei chalana oo ma uvae i guasu mbite pe. Yavai Jesús jemimboe reta uruguata vaerā. Echa'á tuicha i uyembiaparoaroa jare ivitu tanta ooväiti. ²⁵ Jare cöeta ma yave, Jesús uguata oo i iárambo güiraa uepití. ²⁶ Jare Jesús jemimboe reta uecha yave uguata ou i iárambo rupi, uquye. Jei reta:

—Penti mbae iácue co.

Usapicai reta uquye güii.

²⁷ Ërei jupivoiño Jesús ombou iñee chupe reta.

—Piñemiatangåtu. Che co. Agüye pequiye —jei.

²⁸Jayave Pedro jei chupe:

—CheYa, jae co nde yave, cheocui aguata vaerā aa i iárambo rupi ndecoti.

²⁹—Eyu —jei Jesús chupe.

Jayave Pedro ugüeyí chalana güi, jare umbipi uguata i iárambo oo vaerā Jesús coti. ³⁰Ērei uecha yave quirá ivitu tanta chupe, Pedro uquiyé. Jayave umbipi uique i pe, jare iñeeata reve jei:

—CheYa, cherepi.

³¹Jupivoiño Jesús uupi ipo jare uipisi Pedro. Jayave jei chupe:

—Michi ete ndepurugüirovia. ¿Maera pa nderovia'á chere? —jei.

³²Jare uyupi reta yave chalana pe, upita ivitu. ³³Jare chalana pe ñugüinoi vae reta umbiadora Jesús.

Jei reta:

—Añete co, nde co jae Tumpa Tai.

*Jesús umbigüera Genesaret pegua imbaerasi vae reta
(Mr 6.53-56)*

³⁴Jare i guasu uasa reta yave, yugüiraa uvāe ivi Genesaret pe. ³⁵Jare joco pegua reta uicuua jae co Jesús. Jáeramo jae reta yugüiraa opaete jocua ivi rupi, jare güeru Jesús oī vae pe imbaerasi vae reta.

³⁶Jare güeru vae reta uyerure Jesús pe umaeño imbaerasi vae reta uyavíqui vaerā jemimonde jembeí yepe. Jare opaete jemimonde uyavíqui vae reta ucuera.

15

Yandepia uminguia vae

(Mr 7.1-23)

¹Jayave fariseo reta jare mboroyocui re oporomboe vae reta yugüeru Jerusalén güi Jesús oī vae pe jare jei chupe:

²—¿Maera pa nderemimboe reta uyapo'á yandetenondegua reta iporomboe? ¿Maera pa ucaru reta uyepoe mbae reve? —jei reta.

³Jayave Jesús jei chupe reta:

—¿Maera pa pe reta piyavi Tumpa iporoyocui piyapo vaerā yandetenondegua reta iporoyocui?

⁴Tumpa oporoyocui cuarái: 'Ipiu nderu jare ndesi.' Jare oporoyocui vi cuarái: 'Jei icavi mbae vae tu ani ichi coti vae uyeyucata co.' Jucuarái oporoyocui Tumpa —jei—. ⁵Ērei pe reta pere cuarái: 'Penti vae ipuere jei tu jare ichi pe umeeta tēi chupe reta ombori vaerā vae umee ma Tumpa pe.' Jucuarái pere —jei—. ⁶Jare jucuarái ombori'á tu jare ichi. Jucuarái pe reta pemombo Tumpa iporoyocui piyugüi piyapo vaerā yandetenondegua reta iporoyocui —jei—. ⁷Pe reta co jae upurumbitaví vae reta. Añete yepe Isaías imiari peré. Echa'á jae jei cuarái:

⁸'Cua reta chepiú iyuru peño' —jei Tumpa—.

—Ērei ipia pe chepiú'a etei.

⁹Chembiadora-raangaiño.

Oporomboe cuimbæ iporoyocui re.

Che jucuarái'á aporoyocui' —jei Tumpa.

Jucuarái jei Isaías —jei.

¹⁰Jare Jesús ueni opaete joco pe ñugüinoi vae reta.

—Piyapisaca cua re, picuua cavi vaerā —jei—. ¹¹Ipotave mbae peu vae ipuere'á uminguia pepia. Jupi mbae vae pere vae, jocua uminguia pepia —jei.

¹²Jayave Jesús jemimboe reta yugüeru jei chupe:

—¿Ndicuua pa fariseo reta pochi co ndeve jocua ndere chupe reta vae re?

¹³Jayave Jesús jei chupe reta:

—Opaete temiti reta cheRu ara pe oī vae oñotí'á vae uyeequita co. ¹⁴Pemaeño jese reta. Echa'á jae reta jesa mbae vae reta uechaca ñugüinoi tape ūru jesa mbae vae reta pe vae rami co. Jare jesa mbae vae uechaca yave tape ūru jesa mbae vae pe, mocui reve uasavita ivicua pe —jei.

¹⁵Jayave Pedro jei Jesús pe:

—Erñimbeu oreve mbae uipota jei cua nemijaanga reve ndere vae.

¹⁶Jayave Jesús jei chupe reta:

—¿Pe retave pa picuua cavi'á? ¹⁷Picuua cavi cua: Ipotave mbae peu vae oo perie pe, jare pemombo —jei—. ¹⁸Ērei jupi mbae vae pere vae, jocua uminguia pepia. Echa'á pere vae ou pepia güi —jei—.

¹⁹Echa'á pepia güi oë opaete icavi mbae vae: pepia pe piyemingueta icavi mbae vae, pepuruyuca, piyuvwanga menda re, piyapo aguasa, pemonda, peapu ūru vae reta re, icavi mbae vae pere ūru vae reta coti —jei—. ²⁰Cua reta uminguia pepia. Ērei pecaru yave piyepoe mbae reve, jocua uminguia'á pepia —jei.

*Cuña Canaán pegua ipurugüirovia
(Mr 7.24-30)*

²¹ Jayave Jesús oo ye joco güi Tiro jare Sidón iyipí rupi. ²² Jare penti cuña ivi Canaán pegua joco pe ico. Jae ou Jesús oī vae pe jare iñeeäta reve jei chupe:

—CheYa, cheparareco. Nde co jae David iñemoñaa reta pegua. Chemembí cuña uiporara oī. Echa'ā penti aña oya ma jese —jei.

²³ Ërei Jesús jei'ā mbae chupe. Jayave Jesús jemimboe reta yugüeru jei chupe:

—Emondo ye jocua cuña. Echa'ā iñeeäta ou yanderaicue.

²⁴ Jayave Jesús jei:

—Tumpa chembou Israel pegua reta peño. Jae reta ovecha ucañí vae reta rami co —jei.

²⁵ Jayave cuña ou uyeatíca Jesús jovai, jare jei chupe:

—Carai, chembori.

²⁶ Ërei Jesús jei chupe:

—Icavi'ā yaequi vaerā tembú sambiai reta güi, ñamee vaerā yimba-rai reta pe —jei.

²⁷ —Añete tēi co, carai —jei cuña Jesús pe—. Ërei yimba-rai reta jou tembú usururucue iya imesa güi oa vae —jei.

²⁸ Jayave Jesús jei chupe:

—Cuña, tuicha co ndepurugüirovia. Tuyeyapo ndeve nde ndipota rupi —jei.

Jare jupivoíno cuña imembí ucuera.

Jesús umbigüera jeta vae

²⁹ Jayave Jesús oo joco güi uvae i guasu Galilea pe oī vae pe. Jayave uyupi penti ivitu guasu re, jare uguapi joco pe. ³⁰ Jare jeta vae yugüeru jae oī vae pe. Jae reta güeru icócho vae reta, jare ipo jovalcho mbae vae reta, jare jesa mbae vae reta, jare iupa vae reta, jare jeta íru imbaerasi vae reta oñono Jesús jovai. Jayave Jesús umbigüera reta. ³¹ Jáeramo joco pe yati vae reta ipiacañi. Echa'ā uyandu iupa vae reta uyemingüeta, jare uecha ipo jovalcho mbae vae reta ucuera, jare icócho vae reta uguata cavi, jare jesa mbae vae reta umae. Jare opaete vae umbiadora Israel pegua reta iTumpa.

Jesús umíngaru cuatro mil cuimbae reta

(Mr 8.1-10)

³² Jayave Jesús ueni jemimboe reta jare jei chupe reta:

—Aiparareco cua yati vae reta. Echa'ā mbapí ara ma ñugüinoi che ndive, jare mbaeti mbae güinoi jou vaerā. Ndaraun amondo ye reta ucaru mbae reve, agüiye vaerā ipitu tape rupi —jei.

³³ Jayave Jesús jemimboe reta upirandu chupe:

—¿Quiráita pa yandepuere ñamee mbiyape cua jeta vae reta pe cua mbaeti quiave ico vae pe, jae reta ucaru cavi vaerā?

³⁴ Jayave Jesús upirandu chupe reta:

—¿Mboví pa mbiyape penoi?

—Ime nonoi siete, jare mboví pira —jei reta.

³⁵ Jayave Jesús oyocui yati vae reta uguapi vaerā ivi pe. ³⁶ Jayave uipisi jocua siete mbiyape jare mboví pira, jare umee yasurupai Tumpa pe. Jayave upisaa mbiyape jare pira, jare umee jemimboe reta pe, jae reta umee vaerā yati vae reta pe. ³⁷ Opareve ucaru, jare iyangapíi reta. Jayave Jesús jemimboe reta umbati tembú uñepisääcue jembire vae, jare umitinee siete canasta. ³⁸ Jare ucaru vae reta güi cuimbae retaño uyepapa cuatro mil rupi. Uyepapa'ā cuña reta jare sambiai reta.

³⁹ Jayave Jesús omundo ye yati vae reta. Jayave uyupi chalana pe, jare oo uvae ivi Magdala pe.

16

Uipota reta uecha miacañi

(Mr 8.11-13; Lc 12.54-56)

¹ Jare fariseo reta jare saduceo reta yugüeru Jesús oī vae pe, jare jei chupe uechaca vaerā chupe reta miacañi ara güi. Echa'ā jae reta uipota uicuua uyapota ra miacañi chupe reta. ² Ërei Jesús jei chupe reta:

—Amo pe pítuta ma yave pe reta pere: ‘Ara cavita co curiye. Echa'ā pítá co amapítu reta.’ ³ Jae ramíño vi amo pe neimbove yave pere: ‘Ara pochita co cua ara. Echa'ā pítá co amapítu reta jare ara uyasoi oī’ — pere, jei—. Pe reta co jae upurumbitavi vae reta. Echa'ā ara re pemae yave, picuua mbae uyeyapota vae. Ërei picuua'ā etei mbae añaave uyeyapo oī vae —jei—. ⁴ Añave yugüireco vae reta icavi mbae vae uyapo vae reta co. Upurugüirovia'ā. Jáeramo uipota ayapo vaerā miacañi chupe reta. Ërei jaeño uyeyapota mbae Tumpa iñee aracae umimbeu vae Jonás pe uyeyapo vae ramí, jae reta uicuua vaerā quía co che —jei.

Jayave Jesús oo ye chugüi reta.

*Fariseo reta ilevadura
(Mr 8.14-21)*

⁵ Jesúz jare jemimboe reta uyupi chalana pe yugüíraa i guasu jovaicho cotí. Jare i guasu jovaicho pe yugüíraa ma uváe yave ramo, Jesúz jemimboe reta uicuaa ñacañi co güeru vaerá mbiyape. ⁶ Jare Jesúz jei chupe reta:

—Piñemoa ngatu fariseo reta jare saduceo reta ilevadura güi.

⁷ Jayave jemimboe reta jei uyupe:

—Cua jei, yaru'ã mbiyape ramo.

⁸ Jesúz uicuaa chugüi mbae jei reta vae, jare jei chupe reta:

—Michi ete co pepurugiørovia. ¿Maera pa piyeminguela mbiyape Peru mbae vae re? —jei—.

⁹ ¿Ndeño pa picuaa cavi? ¿Pemandua'ã pa? Cue yave apisâa pandepo mbiyape ucaru vaerá cinco mil vae reta. Tembfu jembirecye pembati yave, ¿mboví canasta pa pemítinee? —jei—. ¹⁰ Jare siete mbiyape apisâa vi, ucaru vaerá cuatro mil vae reta? Tembfu jembirecye pembati yave, ¿mboví canasta pa pemítinee? —jei—. ¹¹ ¿Maera pa picuaa'ã che jae peve vae? Che jae peve piñemoa ngatu vaerá fariseo reta jare saduceo reta ilevadura güi. Jae'ã peve mbiyape re —jei.

¹² Jayave ramo jemimboe reta uicuaa Jesúz jei'ã co chupe reta uñemoa ngatu vaerá mbiyape ilevadura güi. Jaeño uiptota jei chupe reta uñemoa ngatu vaerá fariseo reta jare saduceo reta iporomboe güi.

Pedro jei Jesúz co jae Cristo, Tumpa ombou vae

(Mr 8.27-30; Lc 9.18-21)

¹³ Jare Jesúz coño ma oo uvæ tenta guasu Cesarea Filipo güi. Jayave upirandu jemimboe reta pe:

—¿Quía pa co che cuimbaerá ayeyapo vae íru vae reta pe?

¹⁴ Jayave jae reta jei chupe:

—Amocue vae jei nde co jae Juan upurumbibautizase vae, jare íru vae reta jei nde co jae Elías, jare íru vae reta jei nde co jae Jeremías aní íru Tumpa iñee aracae umimbeu vae —jei reta.

¹⁵ Jayave Jesúz upirandu chupe reta:

—Êrei ¿quía pa co che peve?

¹⁶ Jayave Simón Pedro jei chupe:

—Nde co jae Cristo, Tumpa ombou vae. Nde co jae Tumpa jecuæño ico vae Tai —jei.

¹⁷ Jayave Jesúz jei Pedro pe:

—Simón, nde co jae Jonás tai. Tumpa nemivendise ma. Echa'ã cheRu ara pe oï vae uicuaaca ndeve cua. Mbaeti quía ye uicuaaca ndeve —jei—. ¹⁸ Jare che jae ndeve, nde co jae Pedro. (Pedro uiptota jei: “ita.”) Jare che etei amimírataa aiparavo vae reta, ipirataa vaerá penti tenta ita tuicha vae iárambo oï vae ipirataa rami. Jáeramo cañitei ndarau ipuere jese reta —jei—. ¹⁹ Jare ameeta ndeve mboroyocuia ara pegua illave reta. Jare ime yave mbae ívi pe niñapítita vae, Tumpa vi uñapítita ara pe. Jae ramíño vi ime yave mbae ívi pe ndiyorata vae, Tumpa vi oyorata ara pe —jei.

²⁰ Jayave Jesúz oyocui jemimboe reta agüiye vaerá umimbeu quía pe jae co Cristo, Tumpa ombou vae.

Jesúz umimbeu umanota co

(Mr 8.31-9.1; Lc 9.22-27)

²¹ Jare jocua ara reta güíve Jesúz umimbeu jemimboe reta pe quirái jae oota co Jerusalén pe, jare quirái tenta guasu pegua reta itenondegua reta jare sacerdote reta itenondegua reta jare mboroyocu re oporomboe vae reta uiportaracata co chupe, jare quirái jae uyeyucacata, jare quirái mbapi ara rupi icove yeta ou umanocue vae reta ipite güi.

²² Jayave Pedro güíraa Jesúz íru reta ipite güi, jare umbipi umbieta chupe. Jei:

—Tumpa tanembori, cheYa. Agüiye etei tuyeyapo ndeve cua —jei.

²³ Êrei Jesúz uyerova jare jei Pedro pe:

—Esíri chegüi, Satanás. Ndipota chembiavai. Echa'ã nde ndiyemingueta neí ívi pegua reta uyemingueta rami, ndiyemingueta'ã Tumpa uyemingueta rami —jei.

²⁴ Jayave Jesúz jei jemimboe reta pe:

—Ime yave quía uiptota oo cherupíe vae, tiñacañi iyugüi, tovoi icurusu, jare too cherupíe —jei—.

²⁵ Uiptota uñuvatuc jecove vae ndarau ipuere. Êrei umeeta jecove chereco pegua vae uñuvatuc co —jei—. ²⁶ ¿Mbae ra uminganata quía, umingana yave opaete ívi pegua, êrei ipuere'ã yave uñuvatuc jecove? ¿Mboví ra umbiepita quía ogua ye vaerá jecove? —jei—. ²⁷ Echa'ã che cuimbaerá ayeyapo vae ayu yeta cheRu imbaepuere reve ángel cheve uyeyocu vae reta ndive. Jare jayave ameeta opaete vae pe penti penti uyapo vae rupi —jei—. ²⁸ Añete che jae peve, ndei amocue cua pe ñugüínoi vae reta humano mbove, cherechata che cuimbaerá ayeyapo vae cheporoyocuia pe —jei.

*Jesús uyembíambie
(Mr 9.2-13; Lc 9.28-36)*

¹ Seis ara ma uasa yave, Jesús güíraa Pedro, Jacobo jare Juan - jae co Jacobo tíví - íru reta ipíte güí penti ívitú guasu ivate vae re. ² Jare joco pe uyembíambie jae reta jovai. Jova jembipe guarasi jembipe rami, jare jemimonde tñ así jare uvera. ³ Jare uyecuaa chupe reta Moisés jare Elías uyeminguela ñugüínoi Jesús ndive. ⁴ Jayave Pedro jei Jesús pe:

—OreYa, icavi co ñáí vaerá cua pe. Nde ndipota yave, turuyapo cua pe mbapí guarasía ñanaroqui pegua, penti nembaerá, penti Moisés peguará jare penti Elías peguará —jei.

⁵ Pedro uyeminguela oí rambueve, amapítu jembipe vae umiguarasía reta, jare amapítu güí uyendu ñee.

—Cua co jae cheRai aau ete vae. Chembiyerovia ete. Piyapisaca jese —jei.

⁶ Jare Jesús jemimboe reta cua uyandu yave, oa ívi re. Echa'á uquiyete reta. ⁷ Jayave Jesús ou oñono ipo jese reta jare jei:

—Pepúa. Agüíye pequiye.

⁸ Jare umae reta ye yave, uecha'á ma quía jae reta ndive, jaeño Jesús.

⁹ Jare ívitú guasu güí ugüeyi yugüero rambueve, Jesús oyocui reta:

—Agiüye pemimbeu quía pe cua peeche vae, ndei che cuimbaerá ayeyapo vae aicove ye ayu umanocue vae reta ipíte güí mbove.

¹⁰ Jayave jemimboe reta upírandu chupe:

—¿Maera pa jei imboroyocui re oporomboe vae reta Elías rani co outa?

¹¹ —Añete Elías rani co outa —jei Jesús—, jare opaete uyapicatuta. ¹² Ërei che jae peve, Elías ou ma co, jare Israel pegua reta uicua'a. Jáeramo uyapo reta chupe jae reta uipota vae. Jae ramíño vi jae reta uiporaracata cheve —jei.

¹³ Jayave Jesús jemimboe reta uicuaa jae imiari oí chupe reta Juan upurumbibautizase vae re.

Jesús umbígüera cunumi aña oya jese vae

(Mr 9.14-29; Lc 9.37-43)

¹⁴ Jare yugüero uväe yave jeta ñugüínoi vae pe, penti cuimbae ou ooväiti Jesús. Uyeatica jae jovai, jare jei chupe:

¹⁵ —CheYa, iparareco cheraí. Echa'á imbaerasi iñáca pe jare uiporara oí. Jeta vese ma oa tata pe. Oa vi i pe —jei—. ¹⁶ Aru nderemimboe reta pe umbígüera vaerá tēi, ërei jae reta ipuere'á —jei.

—Jayave Jesús jei joco pe ñugüínoi vae reta pe:

—Yavai pe reta cua ívi pe pico vae pepurugüirovia vaerá. ¿Quirái regua ra apitata pe reta ndive? ¿Quirái regua ra arupiata peve? Peru cheve cua pe jocua cunumi —jei.

¹⁸ Jayave Jesús uñeengata aña pe, jare aña usíri cunumi güí. Jare jupivoiño cunumi ucuera.

¹⁹ Jayave Jesús jemimboe reta yugüero Jesús oí vae pe upírandu chupe, jae retaño jae ndive ñugüínoi yave:

—¿Maera pa ore orepuere'á nimbísiri aña?

²⁰ —Pepurugüirovia'á ramo —jei Jesús chupe reta—. Añete che jae peve, aramoi pepurugüirovia michi ete penti mostaza jääcue michi-rai vae ramí. Ërei jocua nunga mburugüirovia penoi yave, pepuereta pere cua ívitú guasu pe: ‘Ecua cua güí epita joco pe’, jare oota co. Ndaraus mbae yavai peve —jei—. ²¹ Ërei ndaraus pepuere pembísiri cua nunga aña, jaeño piyerure yave Tumpa pe piyecuacu reve tembíu güí —jei.

Jesús umímbeu ye umanota co

(Mr 9.30-32; Lc 9.44-45)

²² Jare Galilea pe ñugüínoi rambueve, Jesús jei jemimboe reta pe:

—Che cuimbaerá ayeyapo vae penti vae chemeeta íru vae reta pe. ²³ Jae reta cheyucata. Ërei amano ma yave, mbapí ara rupi aicove yeta ayu umanocue vae reta ipíte güí —jei.

Jayave jemimboe reta ipíatiti tuicha.

Mburuvicha ocovara vae

²⁴ Jare Capernaum pe yugüíraa uväe yave, mburuvicha peguará ocovara vae reta yugüero upírandu Pedro pe:

—¿Umbiepi pa pemboe vae mburuvicha ocovara vae?

²⁵ —Umbiepi —jei Pedro chupe reta.

Jare uique yave tenta pe, Jesús jei Simón Pedro pe:

—Simón, mburuvicha ívi pegua reta ocovara íru vae reta pe. ¿Ocovara reta vi pa tai reta pe ani íru vae reta peño? ¿Mbae pa ndepia pe ndiyeminguela cua re? —jei.

²⁶ —Íru vae reta peño —jei Pedro.

Jayave Jesús jei chupe:

—Jáeramo tai reta umbiepi'ã chupe reta. ²⁷ Ërei agüiye vaerã yayapo icavi mbae vae echa chupe reta, ecua epindapo i guasu pe. Ipea jocua pira tenonde ndipisi vae iyuru. Joco pe nevæta penti corepoti. Eraa emee mburuvicha peguarã ocovara vae reta pe cheve peguarã jare ndeve peguarã —jei.

18

Tenondegua vae

(*Mr 9.33-37; Lc 9.46-48*)

¹ Jayave jemimboe reta yugüeru jei Jesús pe —¿Quía pa co jae tenondegua vae mboroyocuia ara pegua pe?

² Jayave Jesús ueni penti sambiai, jare oñono jae reta ipite pe.

³ —Añete che jae peve, piyerovala yave Tumpa coti jare piyeyapo'ã yave sambiai reta rami, ndarau pique mboroyocuia ara pegua pe —jei—. ⁴ Ime yave quía uñemimichi cua sambiai rami vae, jae icota tenondeguarã mboroyocuia ara pegua pe —jei—. ⁵ Jare ime yave quía uyapo icavi vae cua nunga sambiai pe cheree pe vae, cheve co uyapo icavi vae —jei—.

Mbaeyoa uyapoca vae

(*Mr 9.42-48; Lc 17.1-2*)

⁶ Ime cheré güirovia vae reta. Ime yave quía penti cua nunga pe mbaeyoa uyapoca vae, icavita tẽi co íru vae reta uñapíti vaerã iyayu re penti ita tuicha vae umbaeso pipe vae, omombo vaerã i tipi pe i guasu pe jae ipitupa vaerã —jei—. ⁷ Amocue ivi pegua reta uiporara íru vae reta uyapoca chupe reta mbaeyoa ramo. Jecuaeño amocue vae reta uyapoca mbaeyoa íru vae reta pe. Ërei jocua mbaeyoa uyapoca vae reta uiporarata vi co —jei—.

⁸ Jáeramo ndepo jovaicho ani ndepi jovaicho uyapoca yave mbaeyoa ndeve, iyasia emombo ndiyugüi. Icavi co tecove opa mbae vae nenoí vaerã ndepo jovaicho mbae reve ani ndepi jovaicho mbae reve, tata guasu opa mbae vae pe mocui ndepo reve ani mocui ndepi reve Tumpa nemondo vaerã tẽi güi —jei—. ⁹ Jae ramíño vi nderesa jovaicho uyapoca yave mbaeyoa ndeve, eequi emombo ndiyugüi. Icavi co tecove opa mbae vae nenoí vaerã nderesa jovaicho mbae reve, tata guasu pe mocui nderesa reve Tumpa nemondo vaerã tẽi güi —jei—.

Ovecha ucañi vae
(*Lc 15.3-7*)

¹⁰ Agüiye períro penti upurugüirovia vae. Che jae peve, ara pe ángel uyandareco cua nunga sambiai reta re vae reta jecuaeño ñugüinoi cheRu ara pe oí vae jovai —jei—. ¹¹ Echa'ã che cuimbaerã ayeyapo vae ayu ambiasa vaerã ucañi Tumpa güi vae reta —jei—.

¹² Pepia pe piyeminguela cua re. Ime yave penti cuimbae cien ovecha güinoi vae, penti ovecha ucañi yave, cuimbae ueya jocua noventa y nueve ovecha reta oo ívitu guasu rupi ueca ucañi vae —jei—. ¹³ Jare uvae chupe yave, añete che jae peve, uyerovia tuicha jocua ovecha re noventa y nueve ovecha ucañi mbae vae reta re güi. ¹⁴ Jae ramíño vi peRu ara pe oí vae uipota'ã cua upurugüirovia vae reta güi penti ave ucañitei vaerã —jei—.

Nderivi iyoa yave ndecoti
(*Lc 17.3-4*)

¹⁵ Jare nderivi iyoa yave ndecoti, ecua emimbeu chupe uyapo vae regua quía uicuua mbae reve. Jare nderivi uyapisaca nderé yave, ndiyeyapicatuta jae ndive —jei—. ¹⁶ Ërei uipota'ã yave uyapisaca nderé, eraa nderupié penti ani mocui neírurã, íru vae reta uicuua vaerã mocui ani mbapi vae rupi mbae pere vae —jei—. ¹⁷ Jare uipota'ã yave uyapisaca jese reta, emimbeu upurugüirovia vae reta pe. Ërei nderivi uipota'ã yave uyapisaca upurugüirovia vae reta re, emae jese penti upurugüirovia mbae vae rami ani mburuvicha peguarã ocovara vae rami —jei—. ¹⁸ Añete che jae peve, ime yave mbae ivi pe piñapítita vae, Tumpa vi uñapítita ara pe. Jae ramíño vi ime yave mbae ivi pe piyorata vae, Tumpa vi oyorata ara pe —jei—.

¹⁹ Jare che jae ye peve, mocui vae ivi pegua omboyovaque iyeminguela jei yave: ‘Yayerure Tumpa pe jocua re’, cheRu ara pe oí vae uyapota chupe reta uyerure chupe jese vae —jei—. ²⁰ Echa'ã mocui ani mbapi vae uyembatí yave cheree re, jae reta ipite pe che aita —jei—.

²¹ Jayave Pedro ou jei Jesús pe:

—CheYa, cheríví iyoa yave checoti jeta vese, ¿mboví vese pa ambiasata chupe? ¿Siete vese pa? —jei—.

²² Jayave Jesús jei Pedro pe:

—Che jae ndeve, embiasa chupe setenta vese siete, mbaeti siete veseño.

Mocui cuimbae ipía vae reta

²³ Echa'ã mboroyocuia ara pegua penti mburuvicha guasu jembiocui reta pe ipía uipota ocovara vae rami co —jei—. ²⁴ Mburuvicha guasu umbipi ocovara chupe reta yave, ou uyemboi jae jovai penti jembiocui jeta ete corepoti re ipía chupe vae —jei—. ²⁵ Jocua jembiocui ipuere'ã umbiepi. Jáeramo mburuvicha guasu oyocui uñemee vaerã corepoti re jembiocui jare jembireco jare isambiai reta, jare opaete imbaembae, jembiocui ipuere vaerã umbiepi chupe —jei—. ²⁶ Jayave jembiocui uyeatica mburuvicha guasu jovai, jare jei chupe: 'Agüiye ndepochi cheve. Ndepiaguasu cheve yave, ambiepita ndeve opaete' —jei, jei—. ²⁷ Jayave mburuvicha guasu uiparareco jocua jembiocui jare oyora. Umbai chupe ipía —jei—.

²⁸ Ërei jocua uyeyocui vae oẽ mburuvicha guasu oĩ vae güi jare uvãe ūru uyeyocui vae mbovi corepoti re ipía chupe vae. Jayave uipisi uyasombiri jare jei chupe: 'Embipei cheve ndepia.' ²⁹ Jayave jocua ūru uyeyocui vae uyeatica jae jovai, jare uyerure chupe: 'Agüiye ndepochi cheve. Ndepiaguasu cheve yave, ambiepita ndeve opaete' —jei, jei—. ³⁰ Ërei uipota'ã ipiaguasu chupe. Umiingueca peresoriru pe opaete ipía umbiepi regua —jei—. ³¹ Jare ūru uyeyocui vae reta uicuua yave uyeyapo vae, ipiatiti, jare yugüüraa umiimbeu mburuvicha guasu pe opaete uyeyapo vae regua —jei—. ³² Jayave mburuvicha guasu ueni jocua jembiocui, jare jei chupe: 'Nde co jae cherembiocui icavi mbae vae. Che ambai ndeve opaete ndepia, nde ndiyerure cheve jese ramo' —jei, jei—. ³³ '¿Maera pa ndiparareco'ã nderapicha, che nduparareco rami?' —jei, jei—. ³⁴ Jayave mburuvicha guasu pochi jembiocui pe, jare oyocui peresoriru iyandarecoa reta uiporaraca vaerã chupe opaete ipía umbiepi regua —jei—.

³⁵ Jae ramiño vi cheRu ara pe oĩ vae uyapota jucuarãi peve, pembiasa'ã yave opaete pepia reve perivi iyoa pecotí vae pe —jei.

19

Jupi pa cuimbae omombo vaerã jembireco?

(Mr 10.1-12; Lc 16.18)

¹ Jare Jesús opaete cua jei ma yave, oo Galilea güi Judea pe Jordán jovaicho pe. ² Jare jeta vae yugüüraa jaicue. Jayave Jesús umbigüera imbaerasi vae joco pe ñugüünoi vae reta. ³ Yugüero vi fariseo reta Jesús oĩ vae pe. Jae reta uipota tẽi uyavica chupe. Jáeramo upirandu reta chupe:

—Jupi pa cuimbae omombo vaerã jembireco ipotave mbae jeco pegua?

⁴ Jayave Jesús jei chupe reta:

—¿Peminguetá'a pa Tumpa iñee pe quirãi Tumpa uyapo ramo yave, uyapo cuimbae jare cuña? —jei—. ⁵ Jare Tumpa jei cuarãi: 'Jáeramo cuimbae usirita tu jare ichi güi, jare oota ico vaerã jembireco ndive. Jare mocui vae uyeyapota penti ramiño.' Jucuarãi jei Tumpa —jei—. ⁶ Jáeramo mbaeti ma mocui rami. Yugiüreco penti ramiño. Jáeramo agüiye quía tumbisiri Tumpa umiíru vae reta —jei.

⁷ Jayave fariseo reta jei chupe:

—¿Maera pa Moisés oyocui cuimbae uicuatía vaerã tupapire jembireco omombo vaerã?

⁸ —Moisés umaeño peré pemombo vaerã pembireco pepiatanta ramo —jei Jesús—. Ërei Tumpa uyapo ramo yave, jucuarãi'ã —jei—. ⁹ Jare che jae peve, penti cuimbae ipuere omombo jembireco, cuña aguasa uyapo yave. Ërei cuña uyapo'ã yave aguasa, jare cuimbae omombo yave jembireco, jocua cuimbae uyuvanga co menda re umenda yave ūru cuña ndive. Jae ramiño vi ūru cuimbae umenda yave jocua cuña uyemomboca vae ndive, jae vi uyuvanga menda re —jei.

¹⁰ Jayave Jesús jemimboe reta jei chupe:

—Jucuarãi yaveño cuimbae ipuere omombo jembireco, icavi'ã cuimbae umenda vaerã.

¹¹ Ërei Jesús jei chupe reta:

—Amocue vaeño ipuere uicuua cua che jae peve vae. Jocua Tumpa umee uicuua vaerã vae reta peño ipuere uicuua —jei—. ¹² Echa'ã amocue vae ichi güi oa güiye yugüüreco eunucorã reta. Jare amocue vae yugüüreco eunucorã reta ūru vae reta uapiavo reta ramo. Jare amocue vae yugüüreco eunucorã reta rami mboroyocuia ara pegua jeco pegua. Ime yave quía ipuere uicuua cua, tuicuua —jei.

Jesús uyerure Tumpa pe sambiai reta re

(Mr 10.13-16; Lc 18.15-17)

¹³ Jare amocue vae güero Jesús oĩ vae pe sambiai reta, Jesús oñono vaerã ipo jese reta jare uyerure vaerã Tumpa pe jese reta. Ërei jemimboe reta uñengata güero vae reta pe. ¹⁴ Ërei Jesús jei:

—Pemaeño sambiai reta re Yugüero vaerã checoti. Echa'ã cua nunga uyeyocu Tumpa pe mboroyocuia ara pegua pe —jei.

¹⁵ Jayave oñono ipo jese reta. Jayave oo joco güi.

Cuimbae icocatu vae

(Mr 10.17-31; Lc 18.18-30)

¹⁶ Jare penti cuimbae ou jei Jesús pe:

—Oporomboe vae, nde ndepiacavi co. ¿Mbae nunga mbae icavi vae pa ayapota anoi vaerā tecove opa mbae vae? —jei.

¹⁷ Jayave Jesús jei chupe:

—¿Maera pa ndere cheve chepiacavi vae co? Mbaeti quía ipiacavi, jaeño co Tumpa. Êrei ndipota yave neno tecove opa mbae vae, iyapo mboroyocui reta —jei.

¹⁸ —¿Mbae nunga reta pa? —jei Jesús pe.

Jayave Jesús jei chupe:

—Agüiye epuruyuca. Agüiye iyuvanga menda re. Agüiye nemonda. Agüiye ndapu íru vae reta re.

¹⁹ Ipiu nderu jare ndesi. Jare eau nderapicha nde ndiyerau rami' —jei.

²⁰ Jayave cuimbae jei Jesús pe:

—Ayavi'á penti ave cu a mboroyocui reta chemichi güive. ¿Mbae ye pa uata cheve ayapo vaerā? —jei.

²¹ Jayave Jesús jei chupe:

—Ndipota yave ndiyapo opaete icavi ndiyapo vaerā vae, ecua emee opaete mbaembæ nenoí vae corepoti re, jare emee ndecorepoti iparavete vae reta pe, jare ndicocatuta ara pe. Jayave eyu cherupíe —jei.

²² Êrei cua uyandu yave, cuimbae oo ipiatiti reve. Echa'á jeta mbaembæ güinoi.

²³ Jayave Jesús jei jemimboe reta pe:

—Añete che jae peve, yavai ete co icocatu vae uique vaerā mboroyocuia ara pegua pe. ²⁴ Che jae ye peve, yavai ete icocatu vae uique vaerā Tumpa iporoyocuia pe, maemimba camello jee vae yuu jesacula rupi uasa vaerā güi —jei.

²⁵ Jesús jemimboe reta cua uyandu yave, ipiacañi jare jei:

—Jucuarái yave, ¿quía pa ipuere uyembiasaca?

²⁶ Jayave Jesús umae jese reta jare jei:

—Ívi pegua reta ipuere'á uyembiasa. Êrei Tumpa ipuere umbiasa reta. Echa'á Tumpa ipuere uyapo opaete mbaembæ —jei.

²⁷ Jayave Pedro jei chupe:

—Mase, ore opaete mbaembæ ndueya, ndoyu vaerā nde ndive. ¿Mbae pa nonoita ore?

²⁸ Jayave Jesús jei jemimboe reta pe:

—Añete che jae peve, che cuimbaerā ayeyapo vae aguapita cheguapita pe ayembiadoraca vaerā, opaete uyeyapicatu yave. Jae ramíño vi pe reta che ndive peyu vae peguapita doce guapita pe, jare peñata doce ati Israel pegua reta —jei. ²⁹ Jare ime yave quía ueya jenta, ani tiqueí reta, ani tiví reta, ani jindi reta, ani tu, ani ichi, ani jembireco, ani isambiai reta, ani iivi reta chereco pegua vae, cien rupi jecovita co chupe, jare güinoita imbaerā tecove opa mbae vae —jei. ³⁰ Êrei Tumpa umbitaicueta uyembutuicha vae reta, jare umitenondeta uñemimichi vae reta —jei.

20

Co pe uparavíqui vae reta

¹ Echa'á mboroyocuia ara pegua penti co iya rami co. Co iya oë neimbove así ueca quía ipuere uparavíqui vaerā ico pe —jei. ² Upirandu amocue vae pe uparavíquita ra chupe umbiepi yave chupe reta penti denario ara rupi. (Penti denario co penti ara mbaravíqui jepi pegua.) Jare jae reta jei uparavíquita co chupe. Jayave co iya omondo reta ico pe —jei. ³ Jayave co iya oë ye guarasi ivate catu mi yave, jare uecha íru vae reta uyemboi ñugüinoi plaza pe. Mbaeti co jae reta iparavíqui. ⁴ Jayave co iya jei chupe reta: ‘Pe reta vi pecua peparavíqui checo pe. Tambiepi peve jupi co ambiepi peve vaerā vae’ —jei, jei. Jayave jae reta yugüira co pe —jei. ⁵ Jayave co iya oë ye guarasi ara mbite ma oï yave, jare omundo íru vae reta ico pe uparavíqui vaerā. Jae ramíño vi oë ye mbapi ora ma caaru yave, jare omundo ye íru vae reta ico pe uparavíqui vaerā —jei. ⁶ Jare co iya oë ye caaru ete yave, jare uecha íru vae reta uyemboi ñugüinoi mbaeti iparavíqui ramo. Jayave jei chupe reta: ‘¿Maera pa peí cua pe opaete ara peparavíqui mbae reve?’ —jei, jei. ⁷ ‘Mbaeti quía oremimbaravíquica ramo’ —jei reta, jei —. Jayave co iya jei chupe reta: ‘Pe reta vi pecua peparavíqui checo pe. Tambiepi peve jupi ambiepi peve vaerā vae’ —jei, jei.

⁸ Guarasi uique ma yave, co iya jei jembiocui pe: ‘Eeni uparavíqui vae reta embiepi chupe reta. Embiepi rani taicue rupi umbipi uparavíqui vae reta pe, jare taicue rupi embiepi tenonde yave umbipi uparavíqui vae reta pe’ —jei, jei. ⁹ Jare co güi yugüero ye yave caaru ete umbipi uparavíqui vae reta, co iya jembiocui umee penti penti pe penti denario —jei. ¹⁰ Jare neimbove así umbipi uparavíqui vae reta co güi yugüero yave, ipia pe uyeminguela tēi co iya jembiocui umbiepi co chupe reta jeta caaru ete umbipi uparavíqui vae reta pe umbiepi vae güi. Êrei co iya jembiocui umbiepi vi chupe reta penti

denario ūru reta pe rami —jei—.¹¹ Jayave penti denarioño güinoi yave, iñeenguru co iya pe —jei—.¹² Jae reta jei chupe: ‘Cua taicue rupi umbipi uparavíqui vae reta penti oraño uparavíqui. Êrei nde nembiepi chupe reta penti denario oreve nembiepi rami, yepe tēi ore nduparavíqui tanta guarasi jasi reve’ —jei reta, jei—.¹³ Êrei co iya jei penti vae pe: ‘Cheamigo, ayapo’ā etei icavi mbae vae ndeve. Echa’ā nde ndere cheve ndeparavíquita checo pe che ambiepi ndeve yave penti denario’ —jei, jei—.¹⁴ ‘Ecua eraa cua neminganacue. Aipota ambiepi taicue rupi umbipi uparavíqui vae pe penti denario ndeve ambiepi rami’ —jei, jei—.¹⁵ ‘Echa’ā jupi co che ayapo vaerā aipota vae chembabae ndive. Agüiye neacatāa cua ūru vae re che ayapo icavi vae chupe ramo’ —jei, jei—.

¹⁶ Jae ramiño vi Tumpa umbitaicueta uyembantuicha vae reta, jare umitenondeta uñemimichi vae reta —jei.

Jesús umimbeu ye umanota co

(*Mr 10.32-34; Lc 18.31-34*)

¹⁷ Jare Jesús Jerusalén coti oo rambueve, ueni jocua doce jemimboe reta ūru reta ipite güi, jare jei chupe reta:

¹⁸ —Mase, yaa co ñaï Jerusalén pe. Jare che cuimbaerā ayeyapo vae penti vae chemeeta sacerdote reta itenondegua reta jare mboroyocui re oporomboe vae reta pe. Jae reta jeita amano vaerā,¹⁹ jare chemeeta judío mbae vae reta pe. Jae reta cheyoyaita, chenupata chicote pe, jare checututa curusu re. Êrei mbapi ara rupi aicove yeta ayu umanocue vae reta ipite güi —jei.

Jacobo jare Juan uipota vae

(*Mr 10.35-45*)

²⁰ Cua jaicue rupi ou Jesús oī vae pe Zebedeo jembireco imembí reta Jacobo jare Juan ndive. Cuña ueyatica Jesús jovai jare jei chupe uipota uyapo vaerā mbae chupe.²¹ Jayave Jesús upirandu cuña pe:

—¿Mbae pa ndipota?

—Emaeño cua mocui chemembí re uguapí vaerā ndeyipí pe ndeporoyocuia pe, penti ndeacata coti jare ūru ndeaso coti —jei cuña chupe.

²² Êrei Jesús jei Jacobo jare Juan pe:

—Picuua’ā mbae re piyerure vae. ¿Pepuereta pa piporara che aiporarata vae rami? ¿Pepuereta pa piyembibautizaca che ayembibautizacata vae rami? —jei.

—Orepuereta co —jei reta.

²³ —Añete pe reta piporarata che aiporarata vae rami, jare pe reta piyembibautizacata che ayembibautizacata vae rami —jei Jesús chupe reta—. Êrei chepuere’ā jae peve peguapi vaerā cheyipí pe, penti cheacata coti jare ūru cheaso coti. Echa’ā cheRu umicuatíro ma joco pe uguapita vae reta peguará —jei.

²⁴ Jare ūru diez Jesús jemimboe reta cua uyandu yave, pochi reta Jacobo jare Juan pe.²⁵ Jayave Jesús ueni reta.

—Picuua cavi co cua —jei chupe reta—. Mburuvicha ívi pegua reta oporoyocui, jare mbaepuere güinoi vae reta jei ūru reta pe mbae uyapo vaerā —jei—.²⁶ Êrei pe reta agüiye piyapo jucuarái —jei—. Ime yave penti pepite pe oī vae uipota mbaepuere güinoi vae, tuyeyocui ūru reta pe —jei—.²⁷ Jare ime yave penti pepite pe oī vae uipota tenondeguará ico vae, tuyeyocui ūru reta pe —jei—.²⁸ Echa’ā che cuimbaerā ayeyapo vae ayu aveyocui vaerā ūru vae reta pe. Ayu’ā ūru vae reta uyeyocui cheve vaerā. Ayu amano vaerā, jeta vae aeipi vaerā —jei.

Mocui cuimbae jesa mbae vae

(*Mr 10.46-52; Lc 18.35-43*)

²⁹ Jare yugüiraa yave tenta guasu Jericó güi, jeta vae yugüiraa Jesús jaicue.³⁰ Jare mocui cuimbae jesa mbae vae uguapi ñugüinoi joco pe tape jembei pe. Jare uicuua reta Jesús uasa oo oī yave, iñeeäta reve jei reta:

—OreYa, oreparareco. Nde co jae David iñemoñaa reta pegua.

³¹ Jeta joco pe ñugüinoi vae reta uñengata chupe reta. Uipota tēi umiquíi. Êrei jae reta jeite iñeeäta reve jei:

—OreYa, oreparareco. Nde co jae David iñemoñaa reta pegua.

³² Jayave Jesús uyemboi, jare uenica cuimbae jesa mbae vae reta.

—¿Mbae pa pipota ayapo vaerā peve? —jei chupe reta.

³³ —Nduipota numae, oreYa —jei reta chupe.

³⁴ Jayave Jesús uiparareco reta jare uyavíqui jesa chugüi. Jare jupivoiño mocui reve ipuere umae, jare yugüiraa Jesús jaicue.

21

Jesús oo Jerusalén pe

(*Mr 11.1-11; Lc 19.28-40; Jn 12.12-19*)

¹ Jare coño ma Jerusalén güi ñugüinói yave, yugüiraa uvāe tenta guasu-raí Betfagé iyípi pe, ívitu guasu Olivos jovai. Jayave Jesús oyocui mocui jemimboe reta:

² —Pecua pea tenta guasu-raí yanderovai oí vae pe —jei—. Peo pevæ yave, pevæta penti mburica uñenapíti oí, jare pevæta vi mburica tairusu vae jae ndive. Piyora peru —jei—. ³ Jare ime yave quía mbae jei peve, pere chupe: ‘YandeYa uipota uiporu, ērei imambae güeruruca yeta cua pe’ —pere, jei.

⁴ Opaete cua uyeyapo, Tumpa iñee aracae umímbeu vae jei vae uyeyapo vaerä. Echa'á jae jei cuaräi: ⁵ ‘Pemimbeu Jerusalén pegua reta pe:

‘Mase, peRuvicha Guasu ou peve.

Uñemimichi oí.

Echa'á opo ou mburica tairusu vae re.’ ”

Jucuaräi jei.

⁶ Jayave Jesús jemimboe reta yugüiraa, jare uyapo Jesús jei chupe reta uyapo vaerä vae. ⁷ Jare güeru mburica jare mburica tairusu vae Jesús oí vae pe. Jayave Jesús jemimboe reta oñono iyasoya maemimba reta icupe re, jare Jesús opo mburica tairusu vae re. ⁸ Jare jeta vae uipiso iyasoya tape rupi mburica tairusu vae jenonde, jare íru vae reta uyasia ñanaroquí jare oñono tape rupi. ⁹ Jare Jesús jenonde yugüiraa vae reta jare jaicue rupi yugüiraa vae reta iñeeäta reve jei:

—Jlcvavi co! Cua co jae David iñemoñaa reta pegua. Tuyembadoraca yandeYa jee re ou vae. Tei reta ‘icavi co’ ara pe —jei reta.

¹⁰ Jare Jesús oo ma uvāe yave Jerusalén pe, opaete Jerusalén pegua reta ipiacañi reve jei:

—¿Quía pa co jae?

¹¹ Jare jeta vae reta jei:

—Cua co jae Jesús. Jae co penti Tumpa iñee umímbeu vae Nazaret pegua. Nazaret Galilea pegua co —jei reta.

Jesús Tumpajo pe uyapo vae

(*Mr 11.15-19; Lc 19.45-48; Jn 2.13-22*)

¹² Jayave Jesús uique Tumpa jo pe, jare omoë joco güi opaete umaemee vae reta jare mbae ogua vae reta, jare umbiyapara corepoti uipecipa vae reta imesa reta jare picasu reta umee vae reta jenda reta.

¹³ Jare jei chupe reta:

—Tumpa iñee pe uyecuatía oí cuaräi: ‘Chero uyembijeeta o yerure pegua pe.’ Jucuaräi uyecuatía oí. Ērei pe reta piyapo ma imonda vae reta iñemia rami —jei.

¹⁴ Jare yugüeru Jesús oí vae pe Tumpa jo pe jesa mbae vae reta jare icôcho vae reta, jare Jesús umbigüera reta. ¹⁵ Jare sacerdote reta itenondegua reta jare mboroyoci re oporomboe vae reta uecha miacañi Jesús uyapo vae reta, jare uyandu vi sambiai Tumpa jo pe ñugüinói vae reta iñeeäta reve jei:

—Jlcvavi co! Cua co jae David iñemoñaa reta pegua.

Jáeramo jae reta pochi. ¹⁶ Jayave jei reta Jesús pe:

—¿Ndiyandu pa cua reta jei vae?

Jayave Jesús jei chupe reta:

—Ayandu. ¿Peminguela'á pa cua Tumpa iñee pe uyecuatía oí vae?

‘Nde nemee sambiai reta jare imeño ucambu vae reta pe nembiadora vaerä.’

Jucuaräi uyecuatía oí —jei.

¹⁷ Jayave Jesús ueya reta. Oo Jerusalén güi Betania pe, jare joco pe ico.

Iva ía mbae vae

(*Mr 11.12-14, 20-26*)

¹⁸ Piareve pe neimbove yave Jesús oo ye Jerusalén coti, jare iyembai. ¹⁹ Jare uecha penti íva coño tape güi. Jayave oo umae jese, ērei uvāe'á ía, jaeño joqui. Jayave jei íva pe:

—Ndarau etei ma ndeía.

Jare imambae íva yipi.

²⁰ Jare Jesús jemimboe reta uecha yave íva yipi vae, ipiacañi jese jare jei:

—Imambae yipi jocua íva.

²¹ Jayave Jesús jei chupe reta:

—Añete che jae peve, pepurugiørovia yave, pe reta vi pepuereta piyapo che ayapo íva pe vae rami. Ērei pepurugiørovia yave, pepuereta vi pere cua ívitu guasu pe: ‘Pecua cua güi piyemombo i guasu pe’, jare jucuaräita uyeyapo. Pere'á yave pepia pe: ‘Ndarau ndipo uyeyapo’, uyeyapota co peve —jei—.

²² Jare ime yave mbae pipota vae, piyerure Tumpa pe jese. Jare perovia yave Tumpa umeeta co peve, penoita co —jei.

Jesús imbaepuere

(Mr 11.27-33; Lc 20.1-8)

²³ Jare Jesús uique ye yave Tumpa jo pe, sacerdote reta itenondegua reta jare tenta guasu pegua reta itenondegua reta yugüeru jae oī vae pe oporomboe rambueve, jare upírandu chupe:

—¿Mbae nunga mbaepuere pa nenoí cua mbaembæ ndiyapo vaerā? ¿Quía pa umee ndeve mbaepuere cua ndiyapo vaerā? —jei reta.

²⁴ Jayave Jesús jei chupe reta:

—Che vi tapírandu peve mbae re. Pemimbeu yave cheve, che vi amimbeuta peve mbae nunga mbaepuere anoi cua mbaembæ ayapo vaerā —jei. ²⁵ ¿Quía pa ombou Juan upurumbibautiza vaerā? ¿Tumpa pa ombou? ani ¿ivi pegua reta pa ombou? —jei.

Jayave jae reta jei uyupe:

—Yae yave: ‘Tumpa co ombou’, jae jeita yandeve: ‘Jucuarāi yave, lmaera pa perovia’ā?’ —jei reta uyupe. ²⁶ Èrei yandepuere’ā yae: ‘Iví pegua reta co ombou.’ Echa’ā yaquiye tenta guasu pegua reta güi. Echa’ā opaete vae güirovia Juan co jae penti Tumpa iñee umimbeu vae —jei reta uyupe.

²⁷ Jayave jei reta Jesús pe:

—Nduicua’ā.

—Che vi ndarau amimbeu peve mbae nunga mbaepuere anoi cua mbaembæ ayapo vaerā —jei Jesús chupe reta—.

Mocui tai reta

²⁸ ¿Quirāi pa pepia pe piyemingueta cua re? Penti cuimbæ güinoi mocui tai reta. Ou jei penti tai pe: ‘Cheraí, cua ara ecua eparavíqui checo pe.’ ²⁹ Tai jei chupe: ‘Aata’ā aparavíqui.’ Èrei taicue rupi iquiréi oo. Jáeramo oo uparavíqui tu ico pe —jei. ³⁰ Jare cuimbæ jei íru tai pe: ‘Cheraí, cua ara ecua eparavíqui checo pe.’ Tai jei chupe: ‘Aata aparavíqui, cheru.’ Èrei oo’ā —jei. ³¹ ¿Quía nunga pa cua mocui vae güi uyapo tu jei vae? —jei.

Jayave jae reta jei chupe:

—Jocua tenonde tu oyocui vae.

Jayave Jesús jei chupe reta:

—Añete che jae peve, mburuvicha peguarā ocovara vae reta jare cuña aguasa rupi yugüireco vae reta uiqueta perenonde Tumpa iporoyocuia pe. ³² Echa’ā Juan ou uicuaca peve jupi vae, èrei pe reta perovia’ā. Èrei mburuvicha peguarā ocovara vae reta jare cuña aguasa rupi yugüireco vae reta güirovia. Jare yepe tēi cua picuua, èrei peeya’ā piyemingueta icavi mbae vae pepia pe oī vae. Jecuae peatēi perovia Juan —jei.

Co iporúa icavi mbae vae reta

(Mr 12.1-12; Lc 20.9-19)

³³ Tamimbeu ye peve amijaanga reve cua: Ico penti cuimbæ icorā uiquese vae. Jayave oñotí pipe jeta uva. Jayave oyoo ivi, jare uyapo uva uitami pipe vaerā. Uyapo vi penti chapapa, umae vaerā ivate güi opaete co re. Jayave uiporuca ico íru vae reta pe, jae reta uyandareco vaerā jese. Jayave co iya oo mbiri ambié ivi pe —jei. ³⁴ Jare uva yagüiye ma yave, co iya ombou amocue jembiocui reta co iporúa reta pe, jae reta umbiyao vaerā tēi uva reta, iya güinoi vaerā imbaerā —jei. ³⁵ Èrei co iporúa reta uipisi co iya jembiocui reta, jare uinupa penti vae, jare uyuka íru vae, jare uyapi ita pe íru vae —jei. ³⁶ Jayave co iya ombou ye jeta catu ete jembiocui reta tenonde ombou vae güi. Èrei co iporúa reta jecuae jucuarāi uyapo ye chupe reta —jei. ³⁷ Jayave taicue rupi co iya ombou tai. Jei tēi iyupe: ‘Aramoi uipiuta cherai’ —jei, jei —. ³⁸ Èrei co iporúa reta uecha yave co iya tai, jei reta uyupe: ‘Cua co jae iyarā vae. Yaa yayuca, jare yande yaicotá co iyarā’ —jei reta, jei —. ³⁹ Jayave jae reta uipisi co iya tai omombo co güi jare uyuka —jei.

⁴⁰ Jáeramo co iya ou ye yave, lmbae ra uyapota jocua co iporúa reta pe? —jei.

⁴¹ Jayave jae reta jei Jesús pe:

—Opata uyuka jocua cuimbæ icavi mbae vae reta, jare uiporucata ico ambié vae reta pe. Jae reta umeeta co iya pe imbaerā uva yagüiye ma yave —jei reta.

⁴² Jayave Jesús jei chupe reta:

—¿Peminguetá pa cua Tumpa iñee pe uyecuatía oī vae?

‘Ita tenta iyapoa reta omombo vae uyeyapo ma ita tenondegua vae.

YandeYa uyapo cua.

Yaecha ma, jare yandepiacañi jese.’

Jucuarāi uyecuatía oī —jei.

⁴³ Jáeramo che jae peve, pe reta ndarau pico Tumpa iporoyocuia pe. Tumpa umeeta íru reta pe yugüireco vaerā joco pe. Jae reta uyapota jupi vae —jei. ⁴⁴ Ime yave quía jocua ita re uyepiaca vae, uñemopéta co. Jare ime yave quía jocua ita oa jese vae, opata umbíperasoraso —jei.

⁴⁵ Jare sacerdote reta itenondegua reta jare fariseo reta cuá uyandu yave, uicuáa cua Jesús umijaanga reve jei vae uicuáaca quirái jae reta teco güínoi. ⁴⁶ Jare jae reta uipota téis uipisi Jesús. Êrei ipuere'á. Echa'á uquiyé jeta vae reta güíi. Echa'á jocua jeta vae reta güírovia Jesús co jae penti Tumpa iñee umimbeu vae.

22

Parea menda pegua

(Lc 14.15-24)

¹ Jare Jesús imiari ye joco pe ñugüinoi vae reta pe umijaanga reve. Jei chupe reta:

² —Mboroyocuia ara pegua penti mburuvicha guasu rami co. Jocua mburuvicha guasu tai umendata. Jáeramo mburuvicha guasu uyapo parea —jei—. ³ Uparea ma amocue vae pe yugüero vaerá menda pe. Jayave omondo jembiocui reta ueni reta vaerá. Êrei jae reta ñatéi yugüero —jei—. ⁴ Jayave mburuvicha guasu oyocui ye íru jembiocui reta. Jei chupe reta: ‘Pecua pemimbeu aparea chupe vae reta pe: Mase, jáema oí peu vaerá. Ayucaca ma chegüeyé reta jare íru cherimba iquira vae reta. Ayapicatu ma opaete. Pecua menda pe’ —pere, jei, jei—. ⁵ Êrei jae reta uipota'á yugüíraa. Penti vae oo ico pe. Íru vae oo umaemee. ⁶ Jare íru reta uipisi mburuvicha guasu jembiocui reta, uyapo icavi mbae vae chupe reta jare uyuca reta —jei—. ⁷ Êrei mburuvicha guasu uicuáa yave cua regua, pochi ete co. Jáeramo omondo isundaro reta opa vaerá uyuca jocua upuruyuca vae reta jare uapi vaerá jenta guasu —jei—. ⁸ Jayave mburuvicha guasu jei jembiocui reta pe: ‘Opaete uyeyapicatu ma oí yayapo vaerá menda. Êrei aparea chupe vae reta uyapo'á jupi vae’ —jei, jei—. ⁹ ‘Jáeramo pecua calle rupi jare pere opaete pevæe chupe vae reta pe yugüero vaerá menda pe’ —jei, jei—. ¹⁰ Jayave mburuvicha guasu jembiocui reta yugüíraa calle rupi jare umbati opaete uvæe chupe vae reta - icavi vae uyapo vae reta jare icavi mbae vae uyapo vae reta. Jare mburuvicha guasu jo tinee ma —jei—.

¹¹ Jare mburuvicha guasu ou uvæe yave umae vaerá yugüero vae reta re, uecha joco pe penti cuimbæ temimonde menda pegua mbaeti güínoi vae —jei—. ¹² Jayave jei chupe: ‘Cheamigo, ¿quirái pa ndique cua pe temimonde menda pegua mbae reve?’ Êrei cuimbæ jei'á mbae ave —jei—. ¹³ Jayave mburuvicha guasu jei jembiocui reta pe: ‘Piñapíti ipo rupi jare ipi rupi, jare peraa cua güíi pemombo oca pe pítumimbi oí vae pe. Joco pe uyaota jare jaij umbiquiríriuta’ —jei—. ¹⁴ Echa'á Tumpa ueni jeta vae reta ñrei mboviño uiparavo —jei—.

Jupi pa yambiepi vaerá César pe?

(Mr 12.13-17; Lc 20.20-26)

¹⁵ Jayave fariseo reta uyembati, jare uyemboemboe quirái ipuere uyavica Jesús pe jae uyeminguela yave. ¹⁶ Jayave jae reta omondo jemimboe reta Jesús oí vae pe herodiano reta ndive. Jae reta jei Jesús pe:

—Opromboe vae, nduicuáa nde ndere vae añete co. Nde ndepromboe cavi quirái Tumpa uipota yaico vaerá vae re. Nde nemae oyovaque opaete pâve re. Nembutuicha'á penti ave íru vae güíi —jei reta —. ¹⁷ Jáeramo emimbeu oreve, ¿quirái pa ndepia pe ndiyeminguela cua re? César yandeocui yambiepi vaerá chupe corepoti pe. ¿Jupi pa yambiepi vaerá chupe? ani ¿jupi'á pa? —jei reta.

¹⁸ Ñrei Jesús uicuáa jae reta uipota téis co uyapo icavi mbae vae chupe, jare jei chupe reta:

—¿Maera pa pipota piyavica cheve? Pe reta co jae upurumbitavi vae reta —jei—. ¹⁹ Peechaca cheve corepoti mburuvicha guasu ocovara pevæe —jei—.

Jayave güero reta chupe penti corepoti. ²⁰ Jayave Jesús upirandu chupe reta:

—¿Quía jova fá pa cua? ¿Quía jee pa cua uyecuatía oí vae? —jei.

²¹ —Jocua César imbae co —jei reta.

Jayave Jesús jei chupe reta:

—Pemee César pe Cesar pegua, jare pemee Tumpa pe Tumpa pegua.

²² Cua uyandu reta yave, ipiacañi reta jese. Jayave jae reta yugüíraa Jesús güíi.

Icoveteta pa umanocue vae reta?

(Mr 12.18-27; Lc 20.27-40)

²³ Jare jocua ara etei amocue saduceo reta yugüero Jesús oí vae pe. Opaete saduceo reta jei umanocue vae reta icove ye'á co. Saduceo yugüero vae reta jei Jesús pe:

²⁴ —Opromboe vae, Moisés jei ueya yandeve cuarái: ‘Penti tiquei vae umano yave, jembirecocue mbaeti imembí chupe yave, cuimbæ amiri tiví tumenda jocua cuña ndive. Jayave cuña imembí yave, cuimbæ tumbijee sambiaí tiquei amiri jee pe.’ Jucuarái jei Moisés —jei reta chupe—. ²⁵ Ico orepite pe penti cuimbæ seis tiví reta güínoi vae. Cua cuimbæ umenda, jare umano umimembí mbae reve. Cuimbæ amiri jaicue rupigua umenda jembirecocue ndive —jei reta—. ²⁶ Ñrei jae vi umano umimembí mbae reve. Jae ramíño vi uyeyapo jaicue rupigua ye pe. Opaete siete reve umenda jocua cuña ndive,

jare opaete siete reve umano umimembí mbae reve —jei reta—. ²⁷ Taicue rupi cuña umano vi. ²⁸ Jayave umanocue vae reta icove ye yave, ¿quía nunga vae jembirecorá pa icota jocua cuña? Echa'ã opaete siete reve umenda jae ndive —jei reta.

²⁹ Ërei Jesús jei chupe reta:

—Pe reta piyaví co. Echa'ã picuua'ã Tumpa iñee uyecuatía oí vae jare Tumpa imbaepuere —jei—. ³⁰ Umanocue vae reta icove ye yave, cuimbae reta jare cuña reta ndarau umenda. Yugüirecota ángel ara pe ñugüinói vae reta yugüireco rami —jei—. ³¹ Tamimbeu peve umanocue vae reta regua. Icove yetá co. ¿Pemingueta'ã pa Tumpa iñee pe uyecuatía oí vae? ³² Echa'ã uyecuatía oí cuarái: ‘Che co jae Abraham, Isaac jare Jacob iTumpa’ —jei Tumpa. Jucuarái uyecuatía oí —jei—. Tumpa mbaeti co umanocue vae reta iTumpa. Jae co tecove güinoi vae reta iTumpa —jei—.

³³ Jare yati vae reta cua uyandu yave, ipiacañí Jesús iporomboe re.

Mboroyocui tenondegua vae

(Mr 12.28-34)

³⁴ Ërei fariseo reta uicuaa yave saduceo reta ipuere'ã ma co mbae jei Jesús pe, amocue jae reta uyembati Jesús oí vae pe. ³⁵ Jayave penti fariseo - jae co penti mboroyocui re oporomboe vae vi - upirandu Jesús pe mbae re. Uipota tẽi uyavica chupe. ³⁶ Jei chupe:

—Opromboe vae, ¿mbae nunga mboroyocui pa co jae tenondegua vae?

³⁷ Jayave Jesús jei chupe:

—Mboroyocui tenondegua vae co cua: ‘Eau ndeYa Tumpa opaete ndepia reve, opaete nderecove reve, jare opaete ndepiyamingueta reve’ —jei—. ³⁸ Cua co jae mboroyocui tenondegua vae —jei—.

³⁹ Jare jaíue rupigua vae co cua: ‘Eau nderapicha nde ndiyerau rami’ —jei—. ⁴⁰ Cua mocui mboroyocui ndiyapo yave, ndiyapo ma co opaete Moisés iporoyocui jei vae jare Tumpa iñee aracae umimbeu vae reta jei vae —jei—.

¿Quía iñemoñaa reta pegua pa co Cristo?

(Mr 12.35-37; Lc 20.41-44)

⁴¹ Jare fariseo reta Jesús oí vae pe uyembati yave, Jesús upirandu chupe reta:

⁴² —¿Mbae pa pepia pe piyeminguela Cristo re? ¿Quía iñemoñaa reta pegua pa co jae?

—Jae co David iñemoñaa reta pegua —jei reta chupe.

⁴³ —Jucuarái yave, ¿maera pa David etei jei chupe: ‘CheYa?’ Echa'ã Espíritu Santo uicuaaca David pe jucuarái jei vaerá —jei chupe reta—. ⁴⁴ Echa'ã David jei cuarái:

‘YandeYa jei cheYa pe:

Eguapi cheyípi pe cheacata coti,

nderovaicho reta opa amiamiri regua’ —jei yandeYa.

Jucuarái jei David aracae —jei—. ⁴⁵ ¿Quirái pa ipuere ico David iñemoñaa reta peguará? Echa'ã David etei jei chupe: ‘CheYa’ —jei Jesús chupe reta.

⁴⁶ Jare mbaeti quía ipuere umimbeu chupe. Jare jocua ara güive mbaeti ye quía uipota upirandu Jesús pe mbae re.

23

Jesús umbijeco mboroyocui re oporomboe vae reta jare fariseo reta

(Mr 12.38-40; Lc 11.37-54; 20.45-47)

¹ Jayave Jesús jei jeta vae pe jare jemimboe reta pe:

² —Mboroyocui re oporomboe vae reta jare fariseo reta umimbeu peve Moisés iporoyocui reta.

³ Jáeramo jecuaño piyapo jei reta peve piyapo vaerá vae. Ërei agüiye piyapo jae reta uyapo rami. Echa'ã jae reta etei uyapo'ã jei peve piyapo vaerá vae —jei—. ⁴ Jae reta jei íru vae reta pe uyapo vaerá yavai uyapo vaerá vae. Yamiyaanga penti tívita. Jae reta jei íru vae reta pe ovoi vaerá penti tívita poi vae. Ërei jae reta ombori'ã etei ovoi vaerá. Uyavíqui'ã etei reta jivita —jei—. ⁵ Mboroyocui re oporomboe vae reta jare fariseo reta mbae uyapo yave, uipota íru vae reta uecha vaerá. Echa'ã jae reta oñono iyee Tumpa iñee jiru tuicha vae jare uyapo jemimonde pucu —jei—. ⁶ Yugüiraa yave tupao pe jare parea pe, jecuaño uipota uguapi tenda tenondegua vae reta pe —jei—. ⁷ Jare uipota íru vae reta pe uyembisaludaca vaerá calle reta rupi jare jei vaerá chupe reta: ‘Oporomboe vae’ —jei—. ⁸ Ërei agüiye pipota íru vae reta jei vaerá peve: ‘Oporomboe vae.’ Echa'ã che co jae pomboe vae, jare opaete pe reta cherivi reta co —jei—.

⁹ Jare agüiye pere: ‘Cheru’, penti cuimbae ívi pegua pe. Echa'ã pentiño co jae peRu, jare jae ico ara pe —jei—. ¹⁰ Jare agüiye pipota íru vae reta jei vaerá peve: ‘Cheya.’ Echa'ã pentiño co jae peYa. Jae co che. Echa'ã che co jae Cristo, Tumpa ombou vae —jei—. ¹¹ Ime yave quía uipota tenondeguará ico vae, tuyeyocui opaete íru reta pe —jei—. ¹² Echa'ã uyembutuicha vae uñemimichicata co. Jae ramíño vi uñemimichi vae uyembutuichacata co —jei—.

¹³ Jayave Jesús jei mboroyocui re oporomboe vae reta jare fariseo reta pe:

—Pe reta co jae mboroyocui re oporomboe vae reta jare fariseo reta. Piporarata co. Pe reta co jae upurumbitavi vae reta. Echa'ā pe reta piyopia īru vae reta agüiye vaerā uique mboroyocuia ara pegua pe. Pe reta etei pique'ā. īru vae reta uipota tēi uique, ērei pe reta piyopia reta agüiye vaerā uique —jei—. ¹⁴ Pe reta co jae mboroyocui re oporomboe vae reta jare fariseo reta. Piporarata co. Pe reta co jae upurumbitavi vae reta. Echa'ā pepíro cuña ime umano vae reta güii opaete imbaembæ, jare pacu piyerure Tumpa pe pepurumbitavi vaerā. Jáeramo piporata eteta co —jei—. ¹⁵ Pe reta co jae mboroyocui re oporomboe vae reta jare fariseo reta. Piporarata co. Pe reta co jae upurumbitavi vae reta. Echa'ā peo peeca opaete i guasu rupi jare ivi rupi pevāe vaerā penti pepuere pemiquirēi peporomboe güirovia vaerā vae. Jare güirovia yave peporomboe, jecuae pemboe mbaembære. Jocua jeco pegua jae uyeyapo icavi mbae vaerā. Pe reta peota tata guasu pe. Jare jae peporomboe re güirovia ramo, oota vi tata guasu pe —jei—. ¹⁶ Pe reta co jae jesa mbae vae uechaca ñugüinnoi tape īru vae reta pe vae reta rami. Piporarata co. Echa'ā pe reta pere: 'Ime yave quía: Tumpa jo jee re ayapota, jei vae, jocua mbae'ā co. Ērei ime yave quía: Oro Tumpa jo pegua jee re ayapota, jei vae, uyapota co jocua jei uyapota vae' —pere, jei—. ¹⁷ Pe reta co jae jesa mbae vae reta rami. Pe reta pearacuaal'ā. Echa'ā jocua oro uñemónono tee Tumpa peguarā, Tumpa jo pegua co ramoño. Jáeramo Tumpa jo uyembujupica ete jocua oro Tumpa jo pegua güii —jei—. ¹⁸ Jae ramíño vi pe reta pere: 'Ime yave quía: Uñemeearenda jee re ayapota, jei vae, jocua mbae'ā co. Ērei ime yave quía: Ofrenda jee re uñemeearenda pe oī vae ayapota, jei vae, uyapota co jei uyapota vae' —pere, jei—. ¹⁹ Pe reta co jae jesa mbae vae reta rami. Pe reta pearacuaal'ā. Echa'ā jocua ofrenda uñemónono tee Tumpa peguarā, uñemeearenda pe oī ramoño. Jáeramo uñemeearenda uyembujupica ete ofrenda uñemee vae güii —jei—. ²⁰ Jáeramo ime yave quía: Uñemeearenda jee re ayapota, jei vae, opaete ofrenda uñemeearenda pe oī vae uñemíru uñemeearenda ndive —jei—. ²¹ Jae ramíño vi ime yave: Tumpa jo jee re ayapota, jei vae, Tumpa jo pe ico vae uñemíru Tumpa jo ndive —jei—. ²² Jae ramíño vi ime yave quía: Ara jee re ayapota, jei vae, Tumpa uñemíru ara ndive. Echa'ā ara Tumpa iguapia co —jei—. ²³ Pe reta co jae mboroyocui re oporomboe vae reta jare fariseo reta. Piporarata co. Pe reta co jae upurumbitavi vae reta. Echa'ā pemee Tumpa pe diezmo temiti reta penoi vae güii. Ērei cua michi ete. Mboroyocui jei peve piyapo vaerā jeta ete cua güii. Echa'ā jei peve piyapo vaerā jupi vae jare pepuruparareco vaerā jare pepurugiøvia vaerā. Piyapo'ā opaete cua. Icavi co pemee vaerā Tumpa pe jocua nunga diezmo. Ērei piyapota tēi jupi vae jare pepurupararecota tēi jare pepurugiøviata tēi —jei—. ²⁴ Pe reta co jae jesa mbae vae uechaca ñugüinnoi tape īru vae reta pe vae reta rami. Pe reta peatēi pemocui penti ñeti, ērei pemocui penti camello —jei—. ²⁵ Pe reta co jae mboroyocui re oporomboe vae reta jare fariseo reta. Piporarata co. Pe reta co jae upurumbitavi vae reta. Pe reta co jae taza jare plato icupe rupiño uyeyoe vae rami. Ērei pepia iquia co. Echa'ā pipota īru vae reta imbaembæ jare piyapo icavi mbae vae —jei—. ²⁶ Pe reta co jae fariseo reta. Pe reta co jae jesa mbae vae reta rami. Piyoe rani pepia, taza jare plato japipe rupi piyoe rami. Jayave icupe rupi vi uyeyoeta —jei—. ²⁷ Pe reta co jae mboroyocui re oporomboe vae reta jare fariseo reta. Piporarata co. Pe reta co jae upurumbitavi vae reta. Echa'ā pe reta co jae teōgüriru uñemotí cavi vae reta rami. Jocua nunga teōgüriru ipōra echa, ērei japipe pe tinee umanocue vae reta icāgüecue reta pe jare iquia —jei—. ²⁸ Jae ramíño vi īru vae reta ipia pe uyeminguela tēi pe reta co jae jupi vae reta, ērei pepia tinee taví jare icavi mbae vae pe —jei—.

²⁹ Pe reta co jae mboroyocui re oporomboe vae reta jare fariseo reta. Piporarata co. Pe reta co jae upurumbitavi vae reta. Echa'ā pe reta piyapo Tumpa iñee aracae umimbeu vae reta iteōgüriru reta, jare pemopóra jupi vae reta iteōgüriru reta —jei—. ³⁰ Jare pere: 'Yande yaico yave mona yandetenondegua reta yugiøreco yave, yande yamborita'ā tēi jae reta uyuca yave Tumpa iñee aracae umimbeu vae reta' —pere, jei—. ³¹ Jucuarai pere ramo, picuaaca quirái pe reta co jae Tumpa iñee aracae umimbeu vae reta uyuca vae reta iñemoñaia reta pegua —jei—. ³² Agüiyeta tēi ma piyapo petenondegua reta uyapo rami —jei—. ³³ Pe reta mboi reta rami co. Añete co, pe reta mboi reta iñemoñaia reta rami co. Ndarau etei piyerepi Tumpa peraa yave peo vaerā tata guasu pe —jei—. ³⁴ Amondota peve chiñee umimbeu vae reta jare iyaracua catu vae reta jare cheporoyocui re oporomboe vae reta. Picututa curusu re amocue vae piyuca, jare pinupata chicote pe amocue vae petupao reta pe jare peaícuemoñata reta penti tenta guasu güii īru tenta guasu pe —jei—. ³⁵ Jare pe reta penoita tecu opaete jupi vae reta imano re. Tenonde voi Abel uyeyucaca - jae co jupi vae - jare taicue rupi Berequías tai Zacarías jee vae uyeyucaca. Echa'ā Zacarías umano maemimba uyeyucacue uñemeearenda jare Tumpa jo ipāu pe —jei—. ³⁶ Añete che jae peve, cua reta jare opaete īru vae reta imano re pe reta añave pico vae piyembijecota —jei—.

³⁷ Jerusalén pegua reta, pe reta piyuka Tumpa iñee aracae umimbeu vae reta. Pe reta piyapi ita pe piyuka Tumpa ombou peve vae reta. Jeta vese ma chequiréi tēi pumbati, uru umbati imembí reta ipepo igüi pe rami, érei pe reta pipota'á —jei—. ³⁸ Mase, Tumpa usirita ma pegüi. ³⁹ Che jae peve, ndarau ma cherecha pere regua: 'Tuyembidoraca yandeYa jee re ou vae' —jei.

24

Tumpajo uyeitita

(Mr 13.1-2; Lc 21.5-6)

¹ Jayave Jesús oë Tumpa jo güi. Jare jemimboe reta yugüero uechaca Jesús pe opaete o Tumpa jo pe ñugüinoi vae reta. ² Jare Jesús jei chupe reta:

—¿Pemaе pa peí opaete cua o reta re? Añete che jae peve, ndarau upita penti ave ita íru ita iárambo. Opaete uyeitita co —jei.

Mbaesusere reta uyeyapota vae

(Mr 13.3-23; Lc 21.7-24; 17.22-24)

³ Jare Jesús uguapi oí rambueve ívitu guasu Olivos re, jemimboe reta yugüero jae oí vae pe jare jei chupe, jae retaño jae ndive ñugüinoi yave:

—Emimbeu oreve, ¿quirái yave pa cua uyeyapota? Jare ndeyu yeta ma yave, ¿quiráita pa nduicuaa? Jare cua ara reta opata ma yave, ¿quiráita pa nduicuaa? —jei reta.

⁴ Jayave Jesús jei chupe reta:

—Piñemoa ngatu agüiye vaerá petavi. ⁵ Echa'á yugüeruta jeta cheree pe uyembijeeta vae reta. Jae reta jeita: 'Che co jae Cristo.' Jare umbitavita jeta vae reta —jei—. ⁶ Imeta co ñeráro reta coiño pegüi. Imeta vi ñeráro reta mbiri pegüi. Piyandu yave cua reta regua, agüiye pequye. Cua susere reta uyeyapoñotai co. ⁷ Érei cua susere reta ndei ave co opa vaerá —jei—. ⁸ Penti ivi pegua reta uñerárota ambie ivi pegua reta ndive, jare mburuvicha reta uñerárota íru mburuvicha reta ndive. Jare imeta caruai reta jare ivicáta jeta que rupi —jei—. ⁹ Érei cua susere reta uyembipi ramo co oí —jei—.

⁹ Jayave íru vae reta pemeeta uiporaracata peve vae reta pe, jare piyeyucacata. Jare piñemitaréicata opaete vae pe chereco pegua —jei—. ¹⁰ Jare jeta vae uñatima yeta Tumpa güi jare uñemeeta reta jare uñemitaréita —jei—. ¹¹ Jare jeta upurumbitavi vae reta jeita: 'Che co jae penti Tumpa iñee umimbeu vae.' Jáeramo jae reta umbitavita jeta vae —jei—. ¹² Jare jeta vae uyapota icavi mbae vae. Jáeramo jeta tenonde yave upuruau vae reta ndarau ma upuruau —jei—. ¹³ Érei jósata oo uvae iyapi pe vae uyembiasacata co —jei—. ¹⁴ Jare cua ñee icavi vae Tumpa iporoyocuia pegua jerácuata opaete ivi rupi opaete ivi pegua reta uyandu vaerá. Jayave cua ara reta opata co —jei—.

¹⁵ Jare peecharata icavi mbae vae opaete urucumegua vae uyemboi oí o uñeñono tee Tumpa peguará vae pe. Tumpa iñee aracae umimbeu vae Daniel jei uyecuata co. (Umingueta vae tuicuaa) —jei—.

¹⁶ Jayave Judea pe ñugüinoi vae reta tosi ívitu guasu coti. ¹⁷ Jare o cupe re oí vae agüiye tuique jo pe güüraa vaerá imbaembae —jei—. ¹⁸ Jare ico pe oí vae agüiye tou ye jenta pe güüraa vaerá iyasoya —jei—.

¹⁹ Jare ipurúa vae reta jare umicambu vae reta uiporara eteta jocua ara reta pe —jei—. ²⁰ Jare piyerure Tumpa pe agüiye vaerá pesi roi ma yave ani mbutuu ara pe —jei—. ²¹ Echa'á jocua ara reta pe ivi pegua reta uiporara eteta. Jucuarái'á uiporara reta ivi uyeyapo güüve, jare ndarau ye jucuarái uiporara reta —jei—. ²² Jare yandeYa uipota'á yave opa vaerá jocua ara reta, mbaetita tēi quía ipuere ico. ²³ Érei Tumpa uiparavo vae reta jeco pegua opata jocua ara reta —jei—.

²³ Aramoi jocua ara reta pe quía jeita peve: 'Mase, co oí Cristo', ani jeita: 'Mase, pee oí Cristo.' Jucuarái jei yave, agüiye perovia —jei—. ²⁴ Amocue upurumbitavi vae reta jeita: 'Che co jae Cristo', jare íru upurumbitavi vae reta jeita: 'Che co jae Tumpa iñee umimbeu vae.' Jare jae reta uyapota miacaní reta, umbitavi vaerá tēi Tumpa uiparavo vae reta —jei—. ²⁵ Mase, amimbeu ma peve cua, ndei uyeyapo mbove —jei—.

²⁶ Jayave íru vae reta jei yave peve: 'Mase, ime co ñana pe oí', agüiye pecua. Jare íru vae reta jei yave peve: 'Mase, ime co cua o pe oí', agüiye perovia —jei—. ²⁷ Tamijaanga ama uvera vae. Echa'á ama uvera vae uyecuata opaete ara re guarasi oé vae coti güi guarasi uique vae coti pe. Jae ramíño vi che cuimbaerá ayeyapo vae yeta co. Jayave opaete atí Israel pegua reta ipiatítita jare cherechata ayu amapitu reve ara güi.

²⁸ Umano vae jetecue oí vae pe uyembatita uruví reta —jei—.

Cuimbaerá uyeyapo vae ou yeta

(Mr 13.24-37; Lc 21.25-36; 17.26-36)

²⁹ Jayave opa uiporara reta jocua ara reta pe yave, guarasi uñemipítumimbita, jare yasi ndarau ma jembipe, jare yasitata reta oata ara güi, jare opaete ara re mbaepuere güinoi vae reta ucátata —jei—.

³⁰ Jayave mbae uyecuata ara re. Jocua uicuaacata ivi pegua reta pe che cuimbaerá ayeyapo vae yeta co. Jayave opaete atí Israel pegua reta ipiatítita jare cherechata ayu amapitu reve ara güi.

Che cuimbaerā ayeyapo vae anoita mbaepuere tuicha vae, jare ayembiadoracata opaete vae pe —jei—.
³¹ Jare amondota ángel cheve uyeyocui vae reta trompeta uñee reve, jae reta güeru vaerā aiparavo vae reta opaete ivi rupi güi —jei—.

³² Yandepuere yamijaanga iva. Piyemboe jese —jei—. Joqui yave, picuaa uyaro ma co ama oquí vaerā —jei—. ³³ Jae ramiño vi pe reta pеechа yave opaete cua mbaembae uyeyapo ñugüiñoi vae, picuaata che coiño ma co aí —jei—. ³⁴ Añete che jae peve, cua ivi pe añave yugüireco vae reta ndarau opa umano ndei opaete cua mbaembae uyeyapo mbove —jei—. ³⁵ Ara jare ivi opata, ērei chiñee ndarau opa —jei—.

³⁶ Ērei mbaeti quíaa uicuaa mbae ara pe ani mbae ora pe yepe cua uyeyapota, jaeño cheRu. Ángel ara pe ñugüiñoi vae reta uicuaa'ā. Che co jae Tumpa Tai. Ērei che ave aicuaa'ā —jei—. ³⁷ Noé ico rambueve, ivi pegua reta uyapo icavi mbae vae. Jae ramiño vi che cuimbaerā ayeyapo vae ayu ye yave, ivi pegua reta uyapota icavi mbae vae —jei—. ³⁸ Ndei iporu guasu ou mbove, ivi pegua reta ucaruñoi jare ucauñoi yugüireco, jare jecuaeño cuimbae reta umenda cuñatai reta ndive jare tu reta umee tayi reta cuimbae reta pe umenda jae ndive vaerā. Ērei penti ara Noé uique jocua chalana guasu pe —jei—. ³⁹ Jare uyepocoua reta, iporu guasu ou yave. Jáeramo iporu guasu opa uyuca reta. Jucuaráita vi uyeyapo che cuimbaerā ayeyapo vae ayu ye yave —jei—. ⁴⁰ Jocua ara mocui cuimbae imeta co pe ñugüiñoi. Penti vae uyereraacata jare íru vae upitata co pe —jei—. ⁴¹ Jae ramiño vi mocui cuña umbaesota ñugüiñoi penti angúa pe. Penti vae uyereraacata jare íru vae upitata —jei—. ⁴² Jáeramo jecuaeño peáro. Echa'ā picuaa'ā mbae ara pe ayu yeta. Che co jae peYa —jei—. ⁴³ Aipota picuaa vaerā cua: Penti tenta iya uicuaa yave mbae ora pe outa uvāe imonda vae oñomi vaerā imbaembae jenta güi, uñemicuáfrota tēi jare ndarau tēi umaeño imonda vae re güiräa vaerā imbaembae chugüi —jei—. ⁴⁴ Jae ramiño vi pe reta peáro, agüiye vaerā che cuimbaerā ayeyapo vae ayu ye avāe piyandareco'ā pēi yave —jei—.

Uyeyocui vae uyapo'a ipatrón jei vae

(Lc 12.41-48)

⁴⁵ Penti uyeyocui vae iyaracuaa vae uyapo ipatrón jei chupe uyapo vaerā vae. Jare ipatrón umee chupe ico vaerā íru jembiocui reta juvicharā, jare umee vaerā chupe reta jembiurā opa ara —jei—. ⁴⁶ Ipatrón ou ye uvāe yave jenta pe, uecha yave jocua jembiocui uyapo oī iparavíquí, jocua jembiocui uyeroviata co —jei—. ⁴⁷ Añete che jae peve, ipatrón umeeta chupe uyandareco vaerā opaete imbaembae re —jei—. ⁴⁸ Ērei aramoi uyeyocui vae uyapo icavi mbae vae jare jei iyupe ipia pe: 'Chepatrón ndarau ou ye imambae.' ⁴⁹ Jare umbipi uinupa íru uyeyocui vae reta, jare ucaru jare ucau usavípo vae reta ndive —jei—. ⁵⁰ Jayave penti ara ipatrón ou yeta uvāe jembiocui uyandareco'ā oī yave. Jocua ora pe etei ipatrón uipocouta —jei—. ⁵¹ Jayave ipatrón uiporaracata chupe jare omondota ico vaerā opaete íru upurumbítavi vae reta ndive. Joco pe uyaota jare jái umbiquíriuta —jei—.

25

Diez cuñatai cuimbae güireco'ā etei vae reta

¹ Mboroyocuia ara pegua diez cuñatai cuimbae güireco'ā etei vae reta rami co. Penti penti cuñatai güiräa ilámpara oē oo uñeväiti vaerā cuimbae umendata vae ndive —jei—. ² Jare pandepo jocua cuñatai reta iyaracuaa, jare íru pandepo vae reta iyaracuaa mbae vae —jei—. ³ Jocua iyaracuaa mbae vae reta güiräa ilámpara, ērei güiräa'ā aceite lámpara peguarä —jei—. ⁴ Ērei iyaracuaa vae reta güiräa vi aceite lámpara peguarä aceite jiru pe —jei—. ⁵ Jare ndeíno ou uvāe cuimbae umendata vae. Jáeramo opaete cuñatai reta jopei jare oque —jei—.

⁶ Jare piare mbite yave uyendu ñee. 'Mase, outa ma uvāe cuimbae umendata vae. Pecua peoväiti' —jei, jei—. ⁷ Jayave opaete jocua cuñatai reta upiña jare uyapicatu ilámpara —jei—. ⁸ Jare cuñatai iyaracuaa mbae vae reta jei cuñatai iyaracuaa vae reta pe: 'Pemee mi oreve michi peaceite. Echa'ā orelámpara ove ma' —jei reta, jei—. ⁹ Ērei cuñatai iyaracuaa vae reta jei: 'Numee yave peve, ndarau ndipo uepití oreve. Icavi ndipo pe reta peo vaerā aceite umee vae reta pe pegua vaerā piyupe' —jei reta, jei—. ¹⁰ Jare cuñatai iyaracuaa mbae vae reta yugüiräa aceite ueca rambueve, ou uvāe cuimbae umendata vae. Jare cuñatai iyaracuaa vae reta uique jae ndive menda uyeyapo oī vae pe. Jayave onque uyeyuienda —jei—.

¹¹ Jare taicue rupi yugüeru uvāe jocua íru cuñatai reta jare jei: 'Oreya, oreya, ipea oreve onque.' ¹² Ērei cuimbae jei chupe reta: 'Añete che jae peve, pucuaa'ā.'

¹³ Jáeramo jecuaeño peáro. Echa'ā picuaa'ā mbae ara pe jare mbae ora pe che cuimbaerā ayeyapo vae ayu yeta —jei—.

Talento reta

(Lc 19.11-27)

¹⁴ Tamijaanga penti cuimbae iivi güi ambie ivi mbiri oī vae pe oota vae. Ndei oo mbove, ueni jembiocui reta jare jei chupe reta uyandareco vaerā imbaembae re —jei—. ¹⁵ Jayave umee penti jembiocui pe pandepo corepoti talento jee vae. Jare umee íru jembiocui pe mocui talento. Jare

umee ūru jembiocui pe penti talento. Echa'ā umee chupe reta penti ipuereta uyapo vae rupi. Jayave cuimbae oo ambie ūvi coti —jei—.¹⁶ Jayave pandepo talento güinoi vae umbipi umimbaravíqui icorepoti, jare jucuarāi umiřru jocua pandepo talento ndive pandepo ye —jei—.¹⁷ Jae ramíño vi mocui talento güinoi vae umbipi umimbaravíqui icorepoti, jare jucuarāi umiřru jocua mocui talento ndive mocui ye —jei—.¹⁸ Ěrei penti talento güinoi vae oo oyoo ūvi jare oñomi ivigüi pe corepoti ipatrón umee chupe vae —jei—.

¹⁹ Jare ima ma yave jocua uyeyocui vae reta ipatrón ou ye uvae ūvi pe jare upirandu chupe reta mbae ra uyapo icorepoti umee chupe reta vae pe —jei—.²⁰ Jare tenonde yave pandepo talento güinoi vae güeru jocua pandepo talento ūru pandepo talento umiřru vae reve, jare jei ipatrón pe: 'Patrón, nde nemee cheve pandepo talento. Mase, amiřru jae reta ndive pandepo talento ye' —jei, jei—.²¹ Jayave ipatrón jei chupe: 'Icavi ndiyapo. Nde co jae cherembiocui icavi vae. Ndiyeyocui cavi cheve cua mboví vae re. Jáeramo tamee ndeve jeta mbaembæ ndiyandareco jese vaerā. Iyerovia che ndive' —jei, jei—.²² Jae ramíño vi tenonde yave mocui talento güinoi vae ou jei ipatrón pe: 'Patrón, nde nemee cheve mocui talento. Mase, amiřru jae reta ndive mocui talento ye' —jei, jei—.²³ Jayave ipatrón jei chupe: 'Icavi ndiyapo. Nde co jae cherembiocui icavi vae. Ndiyeyocui cavi cheve cua mboví vae re. Jáeramo tamee ndeve jeta mbaembæ ndiyandareco jese vaerā. Iyerovia che ndive' —jei, jei—.²⁴ Jayave tenonde yave penti talento güinoi vae ou jei ipatrón pe: 'Patrón, che nducua co. Aicuua nde co jae penti cuimbae jecopochi vae. Nde nepíro mbaembæ ūru vae reta güi, jare ndeavíro ūru vae reta oñoti vae' —jei, jei—.²⁵ 'Jáeramo aquíye ndegüi ramo, aa añomi ndecorepoti ivigüi pe. Mase, co oñi nembæ' —jei, jei—.²⁶ Jayave ipatrón jei chupe: 'Nde co jae cherembiocui icavi mbae vae. Ndeaquí co. Nde ndicuaa quirái apíro mbaembæ ūru vae reta güi jare quirái aavíro ūru vae reta oñoti vae' —jei, jei—.²⁷ 'Jáeramo nderaata tēi checorepoti banco pe. Echa'ā jucuarāi ndiyapo yave, ayu ye yave nemeeta tēi co cheve corepoti amee ndeve vae jare mboví ye banco pega reta umiřuta tēi jae ndive vae' —jei, jei—.²⁸ Jayave ipatrón jei jembiocui reta pe: 'Pepíro chugüi jocua penti talento emee diez talento güinoi vae pe' —jei, jei—.²⁹ 'Echa'ā güinoi vae pe uñemírruta. Jeta eteta güinoi. Ěrei mbaeti güinoi vae güi mboví ete güinoi vae uyeequita' —jei, jei—.³⁰ 'Ěrei pemombo cua cherembiocui uyeyocui cavi'ā cheve vae oca pe pítumimbi oñi vae pe. Joco pe uyaota jare jāi umbiquiríriuta' —jei, jei—.

Opaete ūvi pega reta uñeaācata

³¹ Che cuimbaerā ayeyapo vae ayu ye yave ayembassadoraca vaerā, opaete ángel uñeñono tee Tumpa peguarā vae reta yugueruta che ndive. Jayave aguapita cheguapia yembadora pega reta —jei—.³² Jare uyembatita cherovai opaete ūvi pega reta. Jare ambiyaota amocue vae ūru vae reta güi, penti cuimbae umbiyao iovecha reta icapura reta güi rami —jei—.³³ Jare añonocata ovecha reta cheacata coti jare capura reta cheaso coti —jei—.³⁴ Che co jae Mburuvicha Guasu. Jaeta cheacata coti ñugüinoi vae reta pe: 'Peyu pico mboroyocuia ūvi uyeyapo güive uñemicuatíro peve vae pe. CheRu pemivendise ma' —jaeta, jei—.³⁵ 'Echa'ā chiyembai yave, pemee acaru. Cheúe aico yave, pemee jau i. Yepe tēi che co jae ambie ūvi pega, ērei pemaeño vite cheré aico vaerā perenta pe' —jaeta, jei—.³⁶ 'Chenani yave, pemee cheve cheremimonderā. Chembäerasi yave, pepou chepi. Peresoriru pe añi yave, peyu pepou chepi' —jaeta, jei—.³⁷ Jayave jupi vae reta jeita cheve: 'OreYa, ¿quirái yave pa nduecha ndiyembai yave jare numee ndecar? ¿Quirái yave pa nduecha ndetíe yave jare numee ndeu i?' —jeita, jei—.³⁸ '¿Quirái yave pa nduecha penti ambie ūvi peguarā ndico yave, jare numaeño nderé ndico vaerā orerenta pe? ¿Quirái yave pa nduecha nenani jare numee ndeve nderemimonderā?' —jeita, jei—.³⁹ '¿Quirái yave pa nduecha nembäerasi ani peresoriru pe jare ndopou ndepi?' —jeita, jei—.⁴⁰ Jayave che jaeta chupe reta: 'Añete che jae peve, jucuarāi piyapo cherivi reta pe, yepe tēi uñereríroca. Jare jucuarāi piyapo yave, piyapo co cheve vi' —jaeta, jei—.

⁴¹ Jayave jaeta cheaso coti ñugüinoi vae reta pe: 'Pesiri chegüi pecua tata opa mbae vae pe. Jocua tata uñemicuatíro ma oñi aña guasu jare opaete ángel chupe uyeyocui vae reta pe. Tumpa uiporaracata peve' —jaeta, jei—.⁴² 'Echa'ā chiyembai yave, pemee'ā acaru. Cheúe yave, pemee'ā i jau' —jaeta, jei—.⁴³ 'Che co jae ambie ūvi pega jare pemaeño'ā cheré aico vaerā perenta pe. Chenani yave, pemee'ā cheve cheremimonderā. Chembäerasi yave jare peresoriru pe añi yave, pepou'ā chepi' —jaeta, jei—.⁴⁴ Jayave jae reta vi jeita cheve: 'OreYa, ¿quirái yave pa nduecha ndiyembai yave, ani ndeúe yave, ani ambie ūvi peguarā ndico yave, ani nenani yave, ani nembäerasi yave, ani peresoriru pe neñ yave, jare nombori'ā?' —jeita, jei—.⁴⁵ Jayave che jaeta chupe reta: 'Añete che jae peve, pembori'ā cherivi uñereríroca vae reta. Jare jucuarāi co chembori'ā' —jaeta, jei—.⁴⁶ Jare cua reta yugüiraata tata guasu pe. Joco pe uiporarata reta jaeño mai pegua. Ěrei jupi vae reta güinota tecove opa mbae vae —jei—.

26

Uipota reta uyuacaca Jesús

(*Mr 14.1-2; Lc 22.1-2; Jn 11.45-53*)

¹ Jare opaete cua jei ma yave, Jesús jei jemimboe reta pe:

² —Picuua mocui añaño ma co uata pascua iara uvāe vaerā, jare che cuimbaerā ayeyapo vae añemeecata co ayecutuca vaerā —jei.

³ Jare sacerdote reta itenondegua reta jare tenta guasu pegua reta itenondegua reta uyembati sacerdote tenondegua joca pe. Sacerdote tenondegua jee co Caifás. ⁴ Jare uyemboemboe reta quirāi ipuere uipisi viari Jesús uyuacaca vaerā. ⁵ Êrei jei reta:

—Agüiye yaipisi pascua ara rupi, agüiye vaerā tenta guasu pegua reta uyapo tecorai.

Cuña upiyere mbae ipiche cavi vae Jesús re

(*Mr 14.3-9; Jn 12.1-8*)

⁶ Jare Jesús oī rambueve tenta guasu-rai Betania pe Simón ipire ocuisse vae jenta pe, ⁷ uique penti cuña. Jae güeru iru-rai ita alabastro jee vae pegua. Cua iru-rai tinee mbae ipiche cavi vae jepi vae pe. Jare cuña upiyere mbae ipiche cavi vae Jesús iñáca re, Jesús mesa pe uguapi oī rambueve. ⁸ Jare Jesús jemimboe reta cua uecha yave, pochi cuña pe. Jei reta:

—¿Maera pa umicañitei? ⁹ Echa'ā umee yave corepoti re, guinoita tēi jeta corepoti umee vaerā iparavete vae reta pe —jei reta.

¹⁰ Êrei Jesús uicuua jei reta vae, jare jei chupe reta:

—¿Maera pa pemambeco cuña? Icavi vae co uyapo cheve —jei—. ¹¹ Echa'ā yugüirecoñotai co iparavete vae reta pe reta ndive, êrei che ndarau alcoño pe reta ndive —jei—. ¹² Cua mbae ipiche cavi vae upiyere cheré vae pe chembiopiche cavi ma, ndei añeñotica mbove —jei—. ¹³ Añete che jae peve, opaete ivi rupi níee icavi vae jerācua vae rupi, cua uyapo vae vi jerācuata, iru vae reta imandúa vaerā jese —jei.

Judas umeeta Jesús

(*Mr 14.10-11; Lc 22.3-6*)

¹⁴ Jayave jocua doce jemimboe reta güi penti Judas Iscariote jee vae oo sacerdote reta itenondegua reta ñugüinoi vae pe, ¹⁵ jare jei chupe reta:

—Mbae pa pemeeta cheve, amee yave Jesús peve?

Jayave jae reta jei umeeta co chupe treinta corepoti. ¹⁶ Jayave jocua güive Judas ueca quirāi ipuere umee Jesús chupe reta.

Jesús ucaru jemimboe reta ndive

(*Mr 14.12-25; Lc 22.7-23; Jn 13.21-30; 1 Cor 11.23-26*)

¹⁷ Jare jocua ara judío reta umbipi jou mbiyape ovu mbae vae yave, Jesús jemimboe reta yugüeru jei chupe:

—¿Quiápe pa ndipota nduyapicatu vaerā, tembíu pascua pegua ndeu vaerā?

¹⁸ Jayave Jesús jei chupe reta:

—Pecua tenta guasu pe pere cuimbae amimbeu peve vae pe: ‘Oporomboe vae jei: Ora uvāe ma. Jauta tembíu pascua pegua nerenta pe cheremimboe reta ndive’ —jei, pere chupe, jei.

¹⁹ Jayave jemimboe reta uyapo Jesús jei chupe reta uyapo vaerā vae. Jare uyapo reta tembíu pascua pegua jou reta vaerā.

²⁰ Jare pítu ma yave Jesús uguapi ucaru vaerā jocua doce jemimboe reta ndive. ²¹ Jare ucaru ñugüinoi rambueve, Jesús jei chupe reta:

—Añete che jae peve, penti pepite pe oī vae chemeeta cherovaicho reta pe.

²² Jayave jae reta ipiatiti, jare jei Jesús pe penti penti rupi:

—CheYa, ¿che pa co jae?

²³ Jayave Jesús jei chupe reta:

—Mbiyape umäqui oī che ndive plato pe vae co jae. ²⁴ Che cuimbaerā ayeyapo vae aañotai amano vaerā, uyequatía oī cheregua rami. Êrei jocua cuimbae chemeeta vae uiporarata co. Icavi tēi mona jocua cuimbae mbaeti ico yave —jei.

²⁵ Jayave Judas (Jesús umee vae) jei chupe:

—Oporomboe vae, ¿che pa co jae?

—Ndere ma co —jei Jesús chupe.

²⁶ Jare ucaru ñugüinoi rambueve, Jesús uipisi mbiyape, jare umee yasurupai Tumpa pe. Jayave upisāa mbiyape jare umee jemimboe reta pe.

—Peu —jei chupe reta—. Cua co jae cherete —jei.

²⁷ Jayave Jesús uipisi vi penti copa, jare yasurupai umee ye yave Tumpa pe, umee jemimboe reta pe.

—Peu opaete pe reta —jei—.²⁸ Cua co jae cherugüi. Cherugüi uyepiyereta, Tumpa jei piāu ye vae uyeyapo vaerā, jare Tumpa umbiasa vaerā jeta vae pe imbaeyoa reta —jei—.²⁹ Ërei che jae peve, ndarau ma jau uva ticuecue, cheRu iporoyocuia pe uva ticuecue ipiāu vae pe reta ndive jau regua —jei.

Pedro uicuacuta Jesús

(Mr 14.26-31; Lc 22.31-34; Jn 13.36-38)

³⁰ Jare opa yave ucanta reta Tumpa pe, oē reta yugüíraa ivitu guasu Olivos coti.³¹ Jayave Jesús jei chupe reta:

—Opaepe pe reta chereyata cua pítu. Echa'á Tumpa iñee pe uyecuatía oí cuarai: ‘Ayucata ovecha reta iyandarecoa, jare ovecha reta opata uñemíai.’ Jucuarai uyecuatía oí —jei—.³² Ërei aicove ye ayu yave umanocue vae reta ipite güi, aata perenonde Galilea pe —jei.

³³ Jayave Pedro jei Jesús pe:

—Yepe tēi opaete íru reta tandereya, ërei che ndarau ndueya.

³⁴ —Añete che jae ndeve —jei Jesús chupe—, cua pítu etei, ndei uru cuimbae uñee mbove, mbapí vese ma checuacuta —jei.

³⁵ Ërei Pedro jei chupe:

—Yepe tēi tamano nde ndive, ërei ndarau nducuacu.

Jare jucuarai ví jei opaete Jesús jemimboe reta.

Jesús uyerure Getsemaní pe

(Mr 14.32-42; Lc 22.39-46)

³⁶ Jayave Jesús oo jae reta jupié uväe Getsemaní pe. Jare Jesús jei jemimboe reta pe:

—Peguapi cua pe, che aa pea pe ayerure Tumpa pe rambueve.

³⁷ Jayave giúraa Pedro jare jocua mocui Zebedeo taí reta, jare umbipi ipiatiti jare uiporara.³⁸ Jayave jei jocua mbapí jemimboe reta pe:

—Tuicha chepiatiti, jare amano pota echo. Pepita cua pe, jare agüiye peque —jei.

³⁹ Jayave Jesús usiri catu chugüi reta, jare uyeatica ivi re jare uyerure Tumpa pe.

—CheRu, nde ndipota yave, embiasa chegüi cua aiporarata vae. Ërei tuyeyapo cheve nde ndere vae. Agüiye tuyeyapo che jae vae —jei.

⁴⁰ Jayave Jesús ou ye jemimboe reta ñugüínoi vae pe, jare uecha oque ñugüínoi. Jayave jei Pedro pe:

—¿Pepuera'á pa penti ora yepe peque mbae peñ chembori vaerā?⁴¹ Agüiye peque. Piyerure Tumpa pe, agüiye vaerā peyoa. Pepia pe peratangátu co, ërei perete iyaqui co —jei.

⁴² Jayave Jesús usiri ye uyerure Tumpa pe.

—CheRu, nde ndipota yave aiporara vaerā, tuyeyapo cheve nde ndere vae —jei.

⁴³ Jayave ou ye jemimboe reta ñugüínoi vae pe, jare uecha oque ye ñugüínoi. Echa'á jae reta jopei ete ma.

⁴⁴ Jayave Jesús usiri ye chugüi reta uyerure Tumpa pe. Uyerure ye tenonde yave uyerure rami.

⁴⁵ Jayave ou ye jemimboe reta ñugüínoi vae pe jare jei chupe reta:

—Peque jare peputuuño ma. Mase, ora uväe ma. Che cuimbaerá ayeyapo vae penti vae chemeeta cuimbae jeco pochi vae reta pe —jei—.⁴⁶ Pepúa. Yaaño ma. Mase, chemeeta vae coiño ma ou —jei.

Uipisi reta Jesús

(Mr 14.43-50; Lc 22.47-53; Jn 18.2-11)

⁴⁷ Jare uyemingueta oí rambueve, ou Judas - jae co jocua doce vae güi penti. Jeta vae yugüeru jae ndive iquisepecu reve jare iivira reve reve. Sacerdote reta itenondeguia reta jare tenta guasu pegua reta itenondeguia reta ombou Jesús pe cua reta.⁴⁸ Jare umeeta vae umimbeu ma íru reta pe mbae uyapota vae. Jei ma chupe reta:

—Jocua ayurupiteta vae co jae. Pipisi curi —jei.

⁴⁹ Judas ou voi Jesús oí vae pe.

—Pítu ma, oporomboe vae —jei chupe.

Jayave uyurupite.

⁵⁰ Jayave Jesús jei chupe:

—Cheamigo, ¿maera pa ndiyapo jucuarai?

Jayave íru reta yugüeru uipisi Jesús.⁵¹ Jare penti Jesús ndive oí vae uipisi iquisepecu jare uequi jíru güi, jare uiporu sacerdote tenondeguia jembiocui inambi re, jare uyasía inambi chugüi.⁵² Jayave Jesús jei chupe:

—Inono ye quisepecu jíru pe. Echa'á opaete quisepecu uiporu vae reta uyeyacata quisepecu pe —jei—.⁵³ Aipota yave, chepuere ayerure cheRu pe ombou voi vaerā jeta ángel reta cherepi vaerā. ¿Ndicuña'á pa cua? —jei—.⁵⁴ Ërei jucuarai yave, ¿quiráita pa uyeyapo Tumpa iñee pe uyecuatía oí vae? Echa'á jei jucuarita co uyeyapo cheve —jei.

⁵⁵ Jayave Jesús jei yugüeru vae reta pe:

—¿Maera pa Peru quisepucu reta jare ivíra reta chepisi vaerã, imonda vae pipisi vae ramí? Opa ara aguapi pe reta ndive Tumpa jo pe. Joco pe aporomboe, jare chepisi'á —jei—. ⁵⁶ Ërei opaete cua uyeyapo oí Tumpa iñee aracae umimbeu vae reta uicuatía vae uyeyapo vaerã —jei.

Jayave opaete jemimboe reta ueya Jesús, jare opa osi.

Jesús uyemboi jovaicho reta jovai

(*Mr 14.53-65; Lc 22.54, 63-71; Jn 18.12-14, 19-24*)

⁵⁷ Jayave Jesús uiipiši vae reta güíraa sacerdote tenondegua Caifás jenta pe. Jare joco pe uyembati ma mboroyocu re oporomboe vae reta jare tenta guasu pegua reta itenondegua reta. ⁵⁸ Jare Pedro oo vi Jesús jaicue. Ërei mbiriño oo chugüi. Jae uique sacerdote tenondegua joca pe, jare uguapi sacerdote tenondegua jembiocui reta ndive, uecha vaerã mbae uyeyapota vae. ⁵⁹ Jare sacerdote reta itenondegua reta jare opaete íru mburuvicha reta ueca quía uñeapo vaerã Jesús re iyapu reve, uyucaca vaerã. ⁶⁰ Ërei uváe'á reta tecó jese, yepe tēi jeta vae iyapu reve uñeapo jese. Taicue rupi mocui vae iyapu reve uñeapo jese. ⁶¹ Jae reta jei:

—Cua cuimbæ jei: ‘Chepue ambusururu Tumpa jo jare ayapo ye mbapí ara pe’ —jei, jei reta.

⁶² Jayave sacerdote tenondegua upúa uyemboi jare upirandu Jesús pe:

—¿Maera pa niñee nemoé'á? ¿Mbae re pa cua reta uñeapo nderé? —jei.

⁶³ Ërei Jesús quíñio. Jayave sacerdote tenondegua upirandu ye chupe:

—¿Nde pa co jae Cristo, Tumpa ombou vae? ¿Nde pa co jae Tumpa Tai? Che ndoyocui Tumpa jecuaeño ico vae jee re nemimbeu vaerã oreve —jei.

⁶⁴ Jayave Jesús jei chupe:

—Nde ndere ramí jae co che. Ërei che jae peve, che cuimbaerã ayeyapo vae cherechata co aguapi aí Tumpa mbaepuere güínoi vae iyipí pe iyacata coti. Cherechata vi ayu amapíti reve ara güi —jei.

⁶⁵ Jayave sacerdote tenondegua cua uyandu yave, pochi ramo omondoro jemimondei, jare jei:

—Jei ma icavi mbae vae Tumpa coti. ¿Maera ma pa yaeca yeta íru vae reta uñeapo vaerã jese? Mase, pe reta piyandu ma icavi mbae vae jei Tumpa coti —jei—. ⁶⁶ ¿Mbae pa pere añave? —jei.

Íru reta jei chupe:

—Icaví'á co. Icaví co yayucaca vaerã —jei reta.

⁶⁷ Jayave amocue vae undiví Jesús jova re, jare uinupa. Jare íru vae reta ocua jese, ⁶⁸ jare jei chupe:

—Nde co jae Cristo, Tumpa ombou vae yave, emimbeu oreve quía ra ocua oí nderé.

Pedro uicuacu Jesús

(*Mr 14.66-72; Lc 22.56-62; Jn 18.15-18, 25-27*)

⁶⁹ Jare Pedro uguapi oí oca pe. Jare penti cuñatai ou jei chupe:

—Nde vi co jae Jesús Galilea pegua ííru.

⁷⁰ —Che jae ííru'á co —jei Pedro opaete vae jovaque—. Aicuaa'á mbae ndere vae —jei.

⁷¹ Jayave Pedro oo onque tuicha vae coti. Jare íru cuñatai uecha jare jei joco pe ñugüínoi vae reta pe:

—Cua cuimbæ co jae penti Jesús Nazaret pegua ííru.

⁷² Ërei Pedro jei ye:

—Che jae ííru'á co. Tumpa jee re aicuaa'á jocua cuimbae —jei.

⁷³ Jare ndei íma mbove joco pe ñugüínoi vae reta yugüeru jei Pedro pe:

—Añete co, nde co jae penti Jesús ííru. Echa'á nde ndiyemingueta Jesús ííru reta uyemingueta vae ramí —jei reta.

⁷⁴ Jayave Pedro jei Tumpa jee re:

—Tumpa tuiporaraca cheve cuia jae vae añetete'á yave. Aicuaa'á jocua cuimbae.

Jare jupivoi uru cuimbae uñee. ⁷⁵ Jare Pedro imandúa Jesús jei chupe vae re: “Ndei uru cuimbae uñee mbove, mbapí vese ma checuacuta.” Jayave Pedro oé joco güi, jare tanta ipiatiti reve uyao.

Jesús uyemboi Pilato jovai

(*Mr 15.1; Lc 23.1-2; Jn 18.28-32*)

¹ Jare cõe ma yave, opaete sacerdote reta itenondegua reta jare tenta guasu pegua reta itenondegua reta uyemboemboe Jesús re, uyucaca vaerã. ² Jayave uiopucia Jesús jare güíraa mburuvicha guasu Poncio Pilato pe umee.

Judas imano

³ Jayave Judas (Jesús umee vae) ipiatiti uyapo vae re. Echa'á uicuacu ma quirái Jesús jovaicho reta umbijeco ma Jesús. Jayave güíraa ye jocua treinta corepoti sacerdote reta itenondegua reta jare tenta guasu pegua reta itenondegua reta ñugüínoi vae pe. ⁴ Jare jei chupe reta:

—Ayapo mbaeyoa. Echa'ã amee peve jocua cuimbae teco güïnoi mbae vae piyucaca vaerä —jei.

Jayave jae reta jei Judas pe:

—Jocua mbae'ã co oreve. Nde co nenoii teco.

⁵ Jayave Judas omombo corepoti Tumpa jo pe. Jayave oë Tumpa jo güii oo uyeyuví. ⁶ Jayave sacerdote reta itenondegua reta omonoo jocua corepoti jare jei:

—Jupi'ã co ñañono ye vaerä cua corepoti jíru Tumpa jo pe oï vae pe. Echa'ã ñamee Judas pe yandepuere vaerä yayucaca Jesús —jei reta.

⁷ Jayave uyemingueta reta uicuaa vaerä mbae ra uyapota corepoti pe. Jayave ogua ñaeu iyapoa iïví, uñéñotica vaerä joco pe ambie iví pegua reta. ⁸ Jáeramo umbijee jocua iví: iví tugüi jepicue.

⁹ Jare jucuaräi uyeyapo Tumpa iñee aracae umimbeu vae Jeremías jei vae. Echa'ã jae jei cuaräi: "Jare jae reta omonoo jocua treinta corepoti. Echa'ã Israel pegua reta umbiepi treinta corepoti jocua cuimbae re. Jepi co treinta corepoti. ¹⁰ Jayave ogua pipe ñaeu iyapoa ico, yandeYa jei cheve rami." Jucuaräi jei.

Pilato uyemingueta Jesús ndive

(Mr 15.2-5; Lc 23.3-5; Jn 18.33-38)

¹¹ Jare Jesús uyemboi mburuvicha guasu jovai. Jayave mburuvicha guasu upirandu chupe:

—¿Nde pa co jae judío reta juvicha guasu? —jei.

—Nde ndere rami jae co che —jei Jesús chupe.

¹² Jare sacerdote reta itenondegua reta jare tenta guasu pegua reta itenondegua reta uñeapo Jesús re yave, Jesús jei'ã mbae ave. ¹³ Jayave Pilato jei chupe:

—¿Ndiyandu'ã pa quiräi jeta mbaembæ re uñeapo reta nderé?

¹⁴ Érei Jesús jei'ã mbae ave chupe. Jáeramo mburuvicha guasu ipiacañi jese.

Pilato jei Jesús umanota co

(Mr 15.6-20; Lc 23.13-25; Jn 18.38-19.16)

¹⁵ Jare pascua ara rupi Pilato oyoracañoi penti pereso tenta guasu pegua reta uipota vae. ¹⁶ Jare peresoriru pe oï penti cuimbae jeräcu vae. Jee co Barrabás. ¹⁷ Jayave Pilato upirandu yati vae reta pe:

—¿Pipota pa ayoraca vaerä peve Barrabás ani Jesús, Cristo jee vae?

¹⁸ Echa'ã jae uicuaa judío reta umee Jesús chupe ñacatäa jese ramo.

¹⁹ Jare Pilato uguapi oï yave uâa vaerä Jesús, jembireco ombou quâa jei vaerä chupe:

—Agiüye iyapo mbae jocua cuimbae jupi vae pe. Echa'ã aiporara ma piare chepau pe jae jeco pegua.

²⁰ Érei sacerdote reta itenondegua reta jare tenta guasu pegua reta itenondegua reta omboemboe yati vae reta uyerure vaerä Pilato pe oyoraca vaerä Barrabás jare uyucaca vaerä Jesús. ²¹ Jayave Pilato upirandu chupe reta:

—¿Quía nunga pa cua mocui cuimbae güii pipota ayoraca vaerä peve?

—Barrabás —jei reta chupe.

²² Jayave Pilato upirandu chupe reta:

—Jucuaräi yave, ¿mbae pa pipota ayapo vaerä Jesús, Cristo jee vae pe?

Jayave opaete vae jei:

—Tuyecutuca curusu re.

²³ Érei Pilato upirandu chupe reta:

—¿Mbae icavi mbae vae pa uyapo?

Érei jae reta iñeeäta reve jei:

—Tuyecutuca curusu re.

²⁴ Jare Pilato uicuaa yave ipuere'ã mbae uyapo oyoraca vaerä Jesús - echa'ã judío reta umbipi uyapo tecorai - jei güeru vaerä chupe i jare uyepoe yati vae reta jovai. Jayave jei chupe reta:

—Che anoi'ã teco cua cuimbae jupi vae imano re. Pe reta penoi teco —jei.

²⁵ Jayave opaete yati vae reta jei:

—Ore jare oriñemoñaia reta turugüinoi teco imano re.

²⁶ Jayave Pilato oyoraca chupe reta Barrabás. Jare uinupaca ma yave Jesús chicote pe, umee sundaro reta pe, uicutu vaerä curusu re.

²⁷ Jayave mburuvicha guasu isundaro reta güüraa Jesús palacio pe, jare umbati opaete iñu sundaro reta joco pe. ²⁸ Jayave sundaro reta omboi Jesús güii jemimonde jare omondeca chupe temimonde pïta vae. ²⁹ Jayave oñope reta yuräti catuui vae jare umbapúa oñono Jesús iñäca re. Umee reta vi chupe penti tacuaräsi uipisi vaerä ipo iyacata pe. Jayave ueyatifica reta jae jovai jare oyoyai.

—¡Viva, judío reta juvicha guasu! —jei reta.

³⁰ Jare undiví reta jese. Jayave uipisi reta tacuaräsi uiporu iñäca re. ³¹ Jare opa oyoyai reta yave, sundaro reta omboi chugüi temimonde pïta vae, jare omondeca ye chupe jemimondei. Jayave güüraa reta mburuvicha guasu joca güii, uicutu vaerä curusu re.

Jesús uyecutuca curusu re

(Mr 15.21-32; Lc 23.26-43; Jn 19.17-27)

³² Jare yugüüraa reta rambuvee, uecha penti cuimbae Simón jee vae. (Cua Simón tenta guasu Cirene pegua co.) Jayave sundaro reta güüraaca Simón pe Jesús icurusu. ³³ Jare sundaro reta güüraa Jesús Gólgata jee vae pe. (Cua uiptoi jei: "Acacuerenda".) ³⁴ Jayave umee reta Jesús pe vino uyea mbae iro vae ndive vae. Ërei Jesús uicuua yave mbae jocua, jou'ā.

³⁵ Jayave sundaro reta uicutu curusu re. Jayave uyuguari reta Jesús jemimonde re, uicuua vaerā mbae nunga penti penti güüraa iyupe vaerā. Jucuarāi uyapo reta uyeyapo vaerā Tumpa iñee aracae umimbeu vae jei vae. Echa'ā jei cuarāi: "Uyuguari reta cheremimonde re, uicuua vaerā mbae nunga penti penti güüraa iyupe vaerā." Jucuarāi jei. ³⁶ Jayave sundaro reta uguapi joco pe uyandareco vaerā Jesús re. ³⁷ Jare oñono reta curusu re Jesús iñáca iárambo uyecuatía mbae umbijeco jesegua vae: "Cua co Jesús, judío reta juvicha guasu." ³⁸ Jare sundaro reta uicutu vi mocui imonda vae reta, jare oñono penti Jesús iyacata cotí jare íru iyaso cotí.

³⁹ Jare uasa vae reta uñeäcambívava reve jei icavi mbae vae Jesús pe.

⁴⁰ —Nde ndere nembusururuta co Tumpa jo jare ndiyapo yeta mbapí ara pe —jei reta chupe—. Iyerepi. Nde co jae Tumpa Tai yave, egüeyi curusu güi —jei reta.

⁴¹ Jae ramíño vi sacerdote reta itenondegua reta jare mboroyocui re oporomboe vae reta jare tenta guasu pegua reta itenondegua reta oyoyai.

⁴² —Jae uepi íru vae reta —jei reta—. Ërei ipuere'ā jae uyerepi. Jae co Israel pegua reta juvicha guasu yave, tugüeyi añave curusu güi, yarovia vaerā jese —jei reta—. ⁴³ Gürovía Tumpa re; Tumpa tuépi añave, uiptota yave. Echa'ā jae jei: 'Che co jae Tumpa Tai' —jei, jei reta.

⁴⁴ Jare imonda vae Jesús ndive uyecutuca vae reta jei icavi mbae vae chupe.

Jesús umano

(Mr 15.33-41; Lc 23.44-49; Jn 19.28-30)

⁴⁵ Jare guarasi ara mbite güüve mbapí ora rupí uñemipítumimbi opaete ívi pe. ⁴⁶ Jayave mbapí ora ma caaru yave Jesús iñeeäta reve jei:

—Elí, Elí, ¿lama sabactani? (Cua uiptota jei: "CheTumpa, cheTumpa, ¿maera pa chereya?")

⁴⁷ Amocue joco pe ñugüinói vae reta uyandareco vae jei tēi:

—Mase, Elías ueni.

⁴⁸ Jare jupivoi penti vae osi oo umäqui esponja vinagre pe, jare oñono tacuarásí re, jare omondo Jesús iyuru cotí. ⁴⁹ Ërei íru reta jei:

—Eäro. Yaecha ou Elías umbigüeyi vaerā.

⁵⁰ Jayave Jesús tanta usapíci, jare umano.

⁵¹ Jayave Tumpa jo umbiyao vae osoro mbite rupí ivate güii ívi cotí. Jare ívi ucáta jare itape reta ovo.

⁵² Jare teögüeriru reta uyepea, jare jeta uñeñono tee Tumpa peguarā umanocue vae reta icove ye, ⁵³ jare oë teögüeriru reta güi Jesús icove ye yave ou umanocue vae reta ipite güi. Jae reta yugüüraa Jerusalén pe jare uyecuua jeta vae pe.

⁵⁴ Jare sundaro reta juvicha Jesús re uyandareco oï vae jare jae ndive ñugüinói vae reta uecha yave quirái ívi ucáta jare opaete uyeyapo vae, uquiyé ete jare jei:

—Añeteñoi yepe, cua cuimbae co jae Tumpa Tai.

⁵⁵ Jare jeta cuña reta umae ñugüinói mbiri güi. Cua cuña reta yugüero Jesús ndive Galilea güi uyeyocui vaerā chupe. ⁵⁶ Cua reta ipite pe ñugüinói María Magdalena, jare Jacobo jare José ichí María jee vae, jare Zebedeo tai reta ichí.

José oñono Jesús jetecue teögüeriru pe

(Mr 15.42-47; Lc 23.50-56; Jn 19.38-42)

⁵⁷ Jare guarasi uique ma yave, penti cuimbae icocatu vae tenta guasu Arimatea pegua José jee vae —jae vi co penti Jesús jemimboe —⁵⁸ oo Pilato pe, jare uyerure chupe Jesús jetecue re. Jayave Pilato oyocui uñemeevaerā chupe Jesús jetecue. ⁵⁹ Jayave José umbigüeyi Jesús jetecue, jare oñoma penti nieso iquia mbae vae pe. ⁶⁰ Jayave oñono penti teögüeriru ipiau vae itape uyeyoo vae pe, (José imbae co jocua teögüeriru) jare umbiyapayere ita tuicha vae teögüeriru jonque re. Jayave José oo ye teögüeriru güi. ⁶¹ Jare María Magdalena jare íru cuña María jee vae uguapi ñugüinói teögüeriru jovai.

Sundaro reta uyandareco teögüeriru re

⁶² Jare jocua ara opaete judío reta uyeyapicatu ñugüinói piareve peguarā. Jayave piareve pe sacerdote reta itenondegua reta jare fariseo reta yugüüraa Pilato pe, ⁶³ jare jei chupe:

—Oreruvicha, oremandúa ma quirái jocua cuimbae upurumbitavise vae ndei umano mbove jei mbapí ara rupí icove yeta ou umanocue vae reta ipite güi. ⁶⁴ Iyocui ndesundaro reta uyandareco vaerā teögüeriru re mbapí ara pegua, agüiyé vaerā jemimboe reta yugüüraa joco pe pítu yave oñomi vaerā

jetece. Echa'ã jucuarãi yave, jeita reta opaete vae pe icove ye ma co ou umanocue vae reta ipite güi. Jare jucuarãi yave, jae reta umbitavita jeta Jesús umbitaví vae reta güi —jei reta.

⁶⁵Jayave Pilato jei chupe reta:

—Joco pe penoi chesundaro reta. Pecua pembiyandarecoca cavi jese pepuere rupi —jei.

⁶⁶Jayave jae reta yugüiraa jare uyuquenda cavi teögüreriu jonque. Echa'ã oñono mbae ita tuicha vae re agüiye vaerã quía uipea, jare ueya joco pe sundaro reta uyandareco vaerã teögüreriu re.

28

Jesús icove ye

(*Mr 16.1-8; Lc 24.1-12; Jn 20.1-10*)

¹Mbutuu ara uasa ma yave, neimbove asi domingo ara pe María Magdalena jare ūru cuña María jee vae yugüiraa teögüreriu coti. ²Jare ivi tanta ucata. Echa'ã penti ángel yandeYa pe uyeyocui vae ugüeyi ara güi jare umbisiri ita tuicha vae teögüreriu jonque güi. Jayave ángel uguapi oī ita re. ³Jare jova uyecuua ama uvera vae rami. Jare jemimonde tĩ asi roi tĩ asi vae rami. ⁴Jare teögüreriu re uyandareco ñugüinnoi vae reta uriri uquiyé ramo, jare umano vae echa upita reta.

⁵Jayave ángel jei cuña reta pe:

—Agüiye pequiyé. Echa'ã aicuua peea pe Jesús curusu re uyecutuca vae. ⁶Mbaeti ma cua pe oī. Icove ye ma ou umanocue vae reta ipite güi, jae jei rami. Peyu pemaе jendacue re —jei—. ⁷Jare pecua voi pere jemimboe reta pe: ‘Jae icove ye ma ou umanocue vae reta ipite güi. Jae oota perenonde Galilea pe. Joco pe peechata.’ Amimbeu ma co peve —jei chupe reta.

⁸Jayave cuña reta oē voi teögüreriu güi. Uquiyé reta jare uyerovia tuicha reta. Jare osi yugüiraa umimbeu vaerã Jesús jemimboe reta pe.

⁹Jare Jesús uñieoväiti jae reta ndive jare jei chupe reta:

—Piyerovia catu.

Jayave cuña reta uyeatíca ivi pe uicuáva ipi rupi jare umbiadura. ¹⁰Jayave Jesús jei chupe reta:

—Agüiye pequiyé. Pecua pemimbeu cheriví reta pe yugüiraa vaerã Galilea pe. Joco pe cherechata —jei.

Sundaro reta umimbeu vae

¹¹Jare cuña reta yugüiraa ye rambueve teögüreriu güi, amocue sundaro tenonde yave teögüreriu re uyandareco vae reta yugüiraa vi tenta guasu pe, jare umimbeu sacerdote reta itenondegua reta pe opaete uyeyapo vae re. ¹²Jare sacerdote reta itenondegua reta uyembati tenta guasu pegua reta itenondegua reta ndive. Jare uyemboemboe ma yave, umee jeta corepoti sundaro reta pe. ¹³Jare jei chupe reta:

—Pere: ‘Jesús jemimboe reta yugüiraa teögüreriu pe pítu yave, jare oñomi Jesús jetece ore ndoque noī rambueve’ —pere, jei reta—. ¹⁴Jare mburuvicha guasu cua uicuua yave, numimbeuta chupe pe reta mbaeti co teco penoi —jei reta.

¹⁵Jayave sundaro reta uipisi corepoti jare uyapo sacerdote reta itenondegua reta jare tenta guasu pegua reta itenondegua reta jei chupe reta uyapo vaerã vae. Jare jecuaeño opaete judío reta jei jucuarãi co uyeyapo.

Jesús oyocui jocua once jemimboe reta

(*Mr 16.14-18; Lc 24.36-49; Jn 20.19-23*)

¹⁶Jayave jocua once Jesús jemimboe reta yugüiraa Galilea pe penti ivitu guasu re Jesús umimbeu chupe reta vae rami. ¹⁷Jare jemimboe reta uecha yave Jesús, umbiadura. Èrei amocue vae ipuere'ã güürovia jae co Jesús vae. ¹⁸Jare Jesús ou jei chupe reta:

—Opaete mbaepuere uñemee ma cheve ara pe jare ivi pe. ¹⁹Jáeramo pecua peporomboe opaete que rupi rupi jare pembibautiza cheRu jee re jare cheree re jare Espíritu Santo jee re —jei—. ²⁰Jare pemboe reta opaete che moyocui vae re. Jare che aña pe reta ndive jaeño mai pegua cua ara reta opa regua —jei.

EL SANTO EVANGELIO SEGUN SAN MARCOS

Juan upurumbibautiza vae umimbeu Tumpa iñee

(Mt 3.1-12; Lc 3.1-20; Jn 1.19-28)

¹ Añave aicuatía aí ñee icavi vae Jesucristo regua. Jesucristo co jae Tumpa Tai.

² Isaías co jae penti Tumpa iñee aracae umimbue vae. Jae uicuatía cuarái:

“Mase” —jei Tumpa—, “che amondota chiñee güíraa vae nderenonde, uyapicatu vaerá nderaperá.

³ Jae iñeeäta reve jeita ñana pe:

‘Piyapícatu yande Ya japerá.

Pemísimi tape’ —jeita, jei Tumpa.

Jucuarái uicuatía Isaías. ⁴ Jáeramo Juan ou upurumbibautiza ñana pe, jare umimbue yati ñugüínoi vae reta pe:

—Peeya piyemingueta icavi mbae vae pepia pe oí vae, jare che pumbibautizada, Tumpa umbiasa vaerá peve pombaeyoa reta —jei chupe reta. ⁵ Jare jeta ívi Judea pegua reta jare tenta guasu Jerusalén pegua reta yugüíraa Juan oí vae pe. Jare Juan umbibautiza reta iáca Jordán jee vae pe, imbaeyoa reta opa umimbue yave. ⁶ Jare Juan jemimonde maemimba camello jee vae jaagüe pegua co, jare jumbicuua guacapi pegua co. Jare jembíu co jae tucu jare ei ñana rupigua. ⁷ Jae umimbue yati vae reta pe:

—Cheraicue rupi outa ipuere ete chegúi vae. Jupi'á co che chepe ayora vaerá ipipasa ichá. ⁸ Che pumbibautiza i pe, érei jae pembibautizada Espíritu Santo pe —jei chupe reta.

Juan umbibautiza Jesús

(Mt 3.13-17; Lc 3.21-22)

⁹ Jare mboví ara rupi ou Jesús tenta guasu Nazaret ívi Galilea pegua güi. Jare Juan umbibautiza Jesús iáca Jordán pe. ¹⁰ Jare Jesús oé ye i güi yave, uecha ara uyepea oí, jare uecha vi Espíritu Santo ugüeyí jese pícasu rami. ¹¹ Jayave uyendu ñee ara güi jei:

—Nde co jae cheRaí ndaua ete vae. Chembíyerovia ete —jei.

Satanás umingueta Jesús uyavica vaerá tēi chupe

(Mt 4.1-11; Lc 4.1-13)

¹² Jayave Espíritu Santo omundo Jesús ñana pe. ¹³ Jare upita ñana pe cuarenta ara, jare Satanás umingueta uyavica vaerá tēi chupe. Jare ico Jesús maemimba ñana rupigua reta ñugüínoi vae pe. Jare yugüeru ángel reta ombori vaerá.

Jesús umbipi iparavíquí

(Mt 4.12-17; Lc 4.14-15)

¹⁴ Juan uyemingueca ma peresoríru pe yave, oo Jesús Galilea pe, jare umimbue ñee icavi vae Tumpa iporoyocuia regua. ¹⁵ Jesús jei:

—Ara uvae ma. Outa uvae Tumpa iporoyocuia. Peeya piyemingueta icavi mbae vae pepia pe oí vae, jare perovia Tumpa iñee icavi vae —jei.

Jesús ueni irundi cuimbae pira uipisi vae reta

(Mt 4.18-22; Lc 5.1-11)

¹⁶ Jare uguata rambueve i guasu Galilea jembei rupi, Jesús uecha Simón jare Simón tivi Andrés jee vae. Jae reta omombo ñugüínoi pisa i guasu pe, pira uipisi vaerá. Echa'á jae reta pira uipisi vae reta co.

¹⁷ Jayave Jesús jei chupe reta:

—Peyu cherupíe, jare che chembapuere pe pemboeta íru vae reta güírovia vaerá cheré —jei.

¹⁸ Jayave ueya reta ipisa, jare yugüíraa jae jupíe. ¹⁹ Ndei mbiri oo mbove, Jesús uecha Zebedeo tai reta. Penti jee Jacobo, jare tivi jee Juan. Uyapícatu ñugüínoi pisa reta chalana pe. ²⁰ Jare Jesús ueni voi. Jayave jae reta ueya tu chalana pe uparavíquí chupe vae reta ndive, jare yugüíraa Jesús jupíe.

Cuimbae aña oya jese vae

(Lc 4.31-37)

²¹ Jare yugüíraa uvae tenta guasu Capernaum pe. Jare mbutuu ara pe Jesús uique judío reta itupao pe, jare joco pe oporomboe. ²² Jare uyapisaca jese vae reta ipiacañi iporomboe re. Echa'á omboe reta mbaepuere güínoi vae rami. Jucuarái'á oporomboe mboroyocui re oporomboe vae reta. ²³ Jare uique oo tupao pe cuimbae aña oya jese vae. Jae iñeeäta reve jei:

²⁴ —¿Maera pa ndeyu oremambeco, Jesús Nazaret pegua? ¿Ndeyu pa oremicañitei vaerá? Che nducuua. Nde co jae Tumpa Tai —jei.

²⁵ Jayave Jesús uñeengata aña pe.

—¡Nequí! Esíri chugüi —jei.

²⁶ Jayave aña umbiriri ete jocua cuimbae, jare tanta jāse reve usíri chugüi. ²⁷ Jare opaete uecha vae reta ipiacaní, jare upirando uyupe:

—¿Mbae pa co cua uyapo vae? ¡Moromboe ipiau vae ndipo! Mbaepuere pe oyocui aña reta usíri vaerā oya jese vae reta güi, jare jae reta uyapo oyocui vae —jei reta.

²⁸ Jayave imambaeño jerácuja segua opaete Galilea rupi.

Jesús umbigüera Pedro jaicho

(Mt 8.14-15; Lc 4.38-39)

²⁹ Jare Jesús judío reta itupao güi oē ye yave, oo Simón jare Andrés jenta pe Jacobo jare Juan ndive.

³⁰ Simón jaicho jacu oī jupa pe. Jare íru reta umimbeu Jesús pe jesegua. ³¹ Jayave Jesús oo uipisi ipo pe, jare umupúua. Jare jacu upita voi chugüi. Jayave jocua cuña umee mbae jou reta vaerā.

Jesús umbigüera jeta imbaerasi vae reta

(Mt 8.16-17; Lc 4.40-41)

³² Jare guarasi uique ma yave, tenta guasu pegua reta güeru Jesús pe imbaerasi vae reta jare aña oya jese vae reta. ³³ Jare jeta joco pegua reta uyembati jocua tenta Jonque pe. ³⁴ Jayave Jesús umbigüera jeta imbaerasi vae reta ipotave mbaerasi güi, jare umbisiri jeta aña reta oya jese vae reta güi. Jare umaeño'a aña reta re uyemingueta vaerā. Echa'ā jae reta uicuua quía co jae.

Jesús oo ivi Galilea rupi umimbeu Tumpa iñee

(Lc 4.42-44)

³⁵ Piareve pe Jesús upúa ndei cōe mbove, jare oē oo quíi ngatu vae pe. Joco pe uyerure oī Tumpa pe.

³⁶ Jayave Simón jare jae ndive ñugüinói vae reta yugüira ueca. ³⁷ Jare uvae chupe yave, jei reta Jesús pe:

—Ndereca ñugüinói reta —jei reta.

³⁸ Jayave Jesús jei chupe reta:

—Yaa íru tenta guasu-raí reta coiño ñugüinói vae pe, joco pe vi amimbeu vaerā Tumpa iñee. Echa'ā ayu cua ayapo vaerā —jei.

³⁹ Jare oo opaete ivi Galilea rupi, jare umimbeu Tumpa iñee judío reta itupaopao rupi, jare umbisiri aña reta oya jese vae reta güi.

Jesús umbigüera cuimbae ipire ocui vae

(Mt 8.1-4; Lc 5.12-16)

⁴⁰ Jayave ou Jesús oī vae pe penti cuimbae ipire ocui vae. Uyeatíca Jesús jovai jare uyerure chupe:

—Ndipota yave, ndepuere chembigüera —jei chupe.

⁴¹ Jesús uiparareco umae jese, jare oñono ipo jese.

—Aipota. Ecuera —jei chupe.

⁴² Jare jupivoíño cuimbae ucuera imbaerasi güi. Oci'lā ma ipire. ⁴³ Jare jupivoíño Jesús oyocui ete, ndei omondo mbove:

⁴⁴ —Agüiye emimbeu quía pe. Ecua iyechaca sacerdote pe, jare emee ofrenda Moisés peocui rami, tenta guasu pegua reta uicuua vaerā ndecuera ma co —jei.

⁴⁵ Érei cuimbae oo, jare umbipi umimbeu íru vae reta pe. Jecuae umimbeu jeta vae pe. Jáeramo Jesús ipuere'ā ma oo tenta guasu reta pe joco pegua reta jovaque. Upita ñana rupi, jare yugüeru jae oī vae pe opaete que rupi rupi güi.

2

Jesús umbigüera cuimbae ipuere mbae omi vae

(Mt 9.1-8; Lc 5.17-26)

¹ Mboví ara rupi Jesús oo ye Capernaum pe, jare jerácujae ime oī jenta pe. ² Jayave jeta vae uyembati joco pe, jare tñee ñugüinói o pe jare onque rupi. Jare Jesús umimbeu Tumpa iñee chupe reta. ³ Jayave amocue yugüeru vae reta güeru penti cuimbae imbaerasi vae. Cua cuimbae ipuere mbae omi vae. Uyerevoíca ou irundi cuimbae reta pe. ⁴ Érei güeru vae reta ipuere'ā uruique jocua cuimbae Jesús oī vae pe, uyembiape'ā ye ñugüinói reta ramo. Jáeramo uruyupi o íárambo jare uipea chupe Jesús jese catu. Joco pe umbigüeyi jocua cuimbae ipuere mbae omi vae jupa reve. ⁵ Jesús cua uecha yave, uicuua jae reta güirovia co jese, jare jei cuimbae ipuere mbae omi vae pe:

—Nombaeyoa reta uyembai ma, cherivi.

⁶ Amocue mboroyocui re oporomboe vae reta uguapi ñugüinói joco pe, jare ipia pe uyemingueta reta:

⁷ —¿Maera pa jei cuarái cua cuimbae? Jei icavi mbae vae Tumpa cotí. Tumpaño co ipuere umbiasa quía

pe imbaeyoa reta." Jucuarāi ipia pe uyemingueta reta. ⁸Jare Jesús uicuaa voi jae reta ipiayemingueta, jare jei chupe reta:

—¿Maera pa pepia pe piyemingueta jucuarāi? ⁹Chepuere jae cua cuimbae ipuere mbae omi vae pe: 'Nembaeyoa reta uyembai ma.' Jae ramíño vi chepuere jae chupe: 'Epūa evoi nderupa, jare eguata.' ¿Mbae nunga pa yavai jae vaerā? —jei Jesús chupe reta—. ¹⁰Ērei aipota picuaa vaerā cua: Che cuimbaerā ayeyapo vae chepuere ambiasa quía pe imbaeyoa reta cua iví pe aī rambueve —jei.

Jayave jei cuimbae ipuere mbae omi vae pe:

¹¹—Che jae ndeve: Epūa evoi nderupa, jare ecua nerenta pe.

¹² Jayave cuimbae upūa, jare ovoi jupa, jare oē voi oo opaete joco pe ñugüinoi vae reta jovaque. Opareve ipiacañi, jare umbiadora reta Tumpa.

—Yaecha'āi cua nunga —jei reta.

Jesús ueni Leví'

(Mt 9.9-13; Lc 5.27-32)

¹³ Jayave Jesús oo ye i guasu jembeí pe. Jare jeta vae reta uyembati jae oī vae pe, jare jae omboe reta.

¹⁴ Jare joco güi oo yave, uecha Alfeo taí Leví jee vae uguapi oī mburuvicha peguarā ocovara ñugüinoi vae pe, jare jei chupe:

—Eyu cherupié.

Jayave Leví upūa, jare oo jae jupié.

¹⁵ Jare Jesús ucaru oī rambueve Leví jenta pe, jeta mburuvicha peguarā ocovara vae reta jare teco icavi mbae vae uyapo vae reta ucaru vi ñugüinoi Jesús jare jemimboe reta ndive. Echa'ā jecuaeño jeta jae reta yugüira Jesús ndive. ¹⁶Jayave mboroyocui re oporombroe vae reta jare fariseo reta uecha yave Jesús ucaru oī ocovara vae reta jare teco icavi mbae vae uyapo vae reta ndive, jei jemimboe reta pe:

—¿Maera pa ucaru pemboe vae ocovara vae reta jare teco icavi mbae vae uyapo vae reta ndive?

¹⁷ Jesúis cua uyandu yave, jei chupe reta:

—Icove catu vae reta ueca'ā upurupiano vae. Imbaerasi vae retaño ueca. Che ayu aeca vaerā iyoa vae reta. Ayu'ā aeca vaerā jupi vae reta —jei.

Maera Jesús jemimboe reta uyecuacu'ā tembíu güi

(Mt 9.14-17; Lc 5.33-39)

¹⁸ Jare Juan jemimboe reta jare fariseo jemimboe reta uyecuacu ñugüinoi tembíu güi. Jayave amocue vae yugüeru, jare upirandu Jesús pe:

—¿Maera pa Juan jemimboe reta jare fariseo jemimboe reta uyecuacu tembíu güi, ērei nderemimboe reta uyecuacu'ā chugüi?

¹⁹ Jayave Jesús jei chupe reta:

—Umendata vae pe ñugüinoi vae reta ndarau etei uyecuacu tembíu güi, umendata vae jae reta ndive oī rambueve. Echa'ā umendata vae jae reta ndive oī rambueve, uyecuacu'ā tembíu güi. ²⁰Ērei outa uvāe ara umendata vae uyereraaca vaerā chugüi reta. Jayave ramo uyecuacuta tembíu güi —jei—.

²¹ Icavi'ā yamboya vaerā temimonde indechi vae maemboyaa ipiāu vae pe. Echa'ā jucuarāi yayapo yave, maemboyaa ipiāu vae umiāta temimonde indechi vae, jare temimonde jeite osoro —jei—. ²²Jae ramíño vi icavi'ā yambiru vaerā vino ipiāu vae vino jíru guacapi indechi vae pe. Echa'ā jucuarāi yayapo yave, vino omondoro jíru, jare vino uyepiyere, jare jíru icavi'ā ma. Jáeramo yambiru vino ipiāu vae jíru ipiāu vae pe —jei chupe reta.

Jesús jemimboe reta uipoo trigo mbutuu ara pe

(Mt 12.1-8; Lc 6.1-5)

²³ Mbutuu ara pe Jesús oo co rupi jemimboe reta ndive. Uasa rambueve, jemimboe reta uipoo trigo. ²⁴Jayave fariseo reta jei Jesús pe:

—Mase, ¿maera pa uyapo reta agüiyeta tēi uyapo mbutuu ara pe vae?

²⁵ Jesúis jei chupe reta:

—¿Pemingueta'ā pa David uyapocue vae regua, jae jare jae ndive ñugüinoi vae reta mbaeti ma mbae güinoi yave jare iyembai reta? —jei—. ²⁶David uique Tumpa jo pe, sacerdote tenondegua Abiatar jee vae ico yave, jare jou mbiyape Tumpa jo pe uñeñono tee vae reta. Agüiyeta tēi co quía jou jocua mbiyape, jaeno sacerdote reta. Jare David umee vi jae ndive ñugüinoi vae reta pe —jei chupe reta.

²⁷ Jayave Jesús jei chupe reta:

—Mbutuu ara uyeyapo yanembori vaerā. Yande yayeyapo'ā mbutuu ara peguarā. ²⁸Jáeramo che cuimbaerā ayeyapo vae chepuere jae mbae icavi uyeyapo vaerā mbutuu ara pe —jei.

Cuimbae ipo jovaicho tipa vae

(Mt 12.9-14; Lc 6.6-11)

¹Jesús uique ye judío reta itupao pe, jare joco pe oí penti cuimbae ipo jovaicho típa vae. ²Jare joco pe ñugüinoi vae reta umae ngatu Jesús re, uecha vaerā umbigüerata ra quía mbutuu ara pe. Echa'á jae reta uipota tēi umbijeco Jesús. ³Jayave Jesús jei cuimbae ipo jovaicho típa vae pe:

—Epúa eyu iyemboi cua reta jovai.

⁴Jare Jesús upirandu joco pe ñugüinoi vae reta pe:

—¿Yayapota pa icavi vae ani icavi mbae vae mbutuu ara pe? ¿Icavi pa yapuruepi ani yapuruyuca vaerā mbutuu ara pe? ¿Mbae pa jei mboroyocui cua re? —jei chupe reta.

Érei jae reta jei'á mbae ave. ⁵Pochi reve Jesús umae iyipi rupi ñugüinoi vae reta re, jare tuicha ipiatiti jae reta ipiatanta ramo.

—Eupi ndepo —jei cuimbae pe.

Jayave cuimbae ipo uupi, jare ucuera voi. ⁶Jayave fariseo reta oë judío reta itupao güi, jare uyemboemboe voi herodiano reta ndive Jesús re, quirāita ra uyucaca vaerā.

Jeta uyembati i guasu jembeí pe

⁷⁻⁸Jayave Jesús jare jemimboe reta yugüiraa i guasu pe, jare yugüiraa vi jaicue jeta Galilea güi. Jare yugüero vi jae oí vae pe jeta Judea pegua reta, Jerusalén pegua reta, ivi Idumea pegua reta, Jordán jovaicho pegua reta, jare tenta guasu Tiro jare Sidón iyipi rupigua reta, uyandu yave opaete Jesús uyapo vae regua. ⁹Jare Jesús oyocui jemimboe reta umicuatiro chalana jae oí vaerā pipe, agüiye vaerā oyopi yati vae reta. ¹⁰Echa'á jae umbigüera ma jeta vae, jare opaete íru imbaerasi vae reta uñemiamiaña yugüero icoti. Echa'á uipota oya jese, uyavíquí vaerā. ¹¹Jare aña reta uecha Jesús yave, ueyaticá jae jovai jare iñeeáta reve jei:

—Nde co jae Tumpa Tai.

¹²Jare Jesús oyocui ete:

—Agiüye pemimbeu quía co che.

Jesús uiparavo doce cuimbae reta

(Mt 10.1-4; Lc 6.12-16)

¹³Jayave Jesús oo ivitu guasu re, jare ueni jae uiparavo vae retaño. Jare jae reta yugüero jae oí vae pe. ¹⁴Jare jocua reta güi uiparavo doce cuimbae reta umiíru vaerā. Jae omondota reta umimbeu vaerā Tumpa iñee. ¹⁵Umeeta vi chupe reta mbaepuere umbigüera vaerā imbaerasi vae reta jare umbisiri vaerā aña reta oya jese vae reta güi. ¹⁶Cua co jae uiparavo vae reta jee: Simón (Jesús umbijee Pedro), ¹⁷jare Zebedeo tai reta Jacobo jare Juan jee vae (Jesús umbijee cua mocui reve Boanerges. Cua jee uipota jee: "Ara jiapu vae rami"), ¹⁸jare Andrés, Felipe, Bartolomé, Mateo, Tomás, Alfeo tai Jacobo jee vae, Tadeo, Simón (jae co Zelote pe ueni vae), ¹⁹jare Judas Iscariote (cua cuimbae umee Jesús jovaicho reta pe). Jayave Jesús ou ye jenta pe jae reta ndive.

Jeí reta icavi mbae vae Espíritu Santo cotí

(Mt 12.22-32; Lc 11.14-23; 12.10)

²⁰Jare uyembati ye jeta vae. Jáeramo Jesús jare jemimboe reta iquíi'á ucaru vaerā. ²¹Jesús jentará reta cua uicuáa yave, yugüero güiraa vaerā tēi.

—Iyaracuáa'á ma oí —jei reta.

²²Jare mboroyocui re oporomboe vae yugüero Jerusalén güi vae reta jei:

—Aña guasu Beelzebú jee vae oya ma jese, jare aña guasu imbaepuere pe umbisiri aña reta oya jese vae reta güi —jei reta.

²³Jayave Jesús ueni reta, jare jei chupe reta umijaanga reve:

—Ndaraus Satanás jaei uyembisiri cuimbae güi. ²⁴Penti tenta guasu pegua reta oyovaicho uyupii yave, opata co jocua tenta guasus. ²⁵Jae ramíño vi penti tenta pegua reta oyovaicho uyupii yave, opata co jocua tenta. ²⁶Jare Satanás pochi iyupe yave, jare imbaepuere uyembiyao yave, ndaraus tēi ma ico. Opata tēi co —jei chupe reta—. ²⁷Ime yave quía uipota uique cuimbae ipiráta vae jenta pe upíro vaerā imbaembae chugüi vae, uipocuata rani cuimbae ipiráta vae. Jayave ramo ipuereta upíro imbaembae chugüi —jei—.

²⁸Añete che jae peve, opaete ivi pegua reta imbaeyoa reta jare opaete iñee icavi mbae Tumpa cotí jei reta vae Tumpa ipuere umbai. ²⁹Érei Tumpa ndaraus etei umbiasa jei icavi mbae vae Espíritu Santo cotí vae pe. Uyembijecota jaeño mai pegua —jei chupe reta.

³⁰Echa'á tenonde yave jae reta jei:

—Aña oya ma jese.

Jáeramo Jesús jei jucuarāi chupe reta.

*Jesús ichi jare tiví reta
(Mt 12.46-50; Lc 8.19-21)*

³¹ Jayave Jesús ichi jare tiví reta yugüero uvae Jesús oī vae pe, jare oca güi omondo uenica. ³² Jare uguapi ñugüinói iyipi rupi vae reta jei chupe:

—Aipo! Ndesí jare nderíví reta oca pe ñugüinói, jare ndereca.

³³ —¿Quía nunga pa co jae chesi jare cheríví reta? —jei Jesús chupe reta.

³⁴ Jayave umae iyipi rupi uguapi ñugüinói vae reta re.
—Cua nunga reta co jae chesi jare cheríví reta —jei. ³⁵ Echa'ā Tumpa jei vae uyapo vae reta co jae cheríví jare cherindí jare chesi —jei.

4

Jesús umijaanga umaeti vae

(Mt 13.1-9; Lc 8.4-8)

¹ Jesús umbipi ye oporomboe i guasu jembeí pe. Jayave jeta yugüero uyembati jae oī vae pe. Jáeramo Jesús uyupi penti chalana i guasu pe oī vae pe, jare uguapi pipe. Jare yati vae reta ñugüinói i guasu jembeí pe. ² Jare Jesús omboe reta jeta mbaembae re umijaanga reve. Jei chupe reta:

³ —Piyapisaca cheré. Penti cuimbae oo umaetí vaerā —jei—. ⁴ Umaeti yave, umíai temiti, jare amocue oa tape rupi. Jayave yugüero güira reta opa jou —jei—. ⁵ Iru temiti oa mboviño íví itape íarambo oī vae pe. Cua imambae oē, jeta'ā íví chupe ramo. ⁶ Ërei guarasi jasi yave, ipiru. Jare japo quípe'ā oī ramo, utini —jei—. ⁷ Iru temiti oa ñanapite pe. Ñana ucuacuua yave, opa uyuca temiti. Jáeramo temiti ia'ā —jei—. ⁸ Jare iru temiti oa ívicavi pe. Cua reta oē, jare ucuacuua, jare ía. Amocue mboviño jāt, jare iru jeta catu jāi, jare iru jeta ete jāi —jei chupe reta. ⁹ Jayave Jesús jei chupe reta:

—Uipota uyandu vae tuyapisaca cua ñee re.

Maera Jesús oporomboe umijaanga reve

(Mt 13.10-17; Lc 8.9-10)

¹⁰ Mboviño ma upita jae ndive yave, jocua doce uiparavo vae reta jare iru upita vae reta upírandu Jesús pe umijaanga reve jei vae re. ¹¹ Jayave Jesús jei chupe reta:

—Amimbeu ma peve Tumpa iporoyocuia regua. Cua uyecuua'ā iru vae reta pe. Jáeramo amboe iru vae reta amijaanga reve —jei—. ¹² Cua ayapo agüiye vaerā uicuua cavi, yepe tēi uecha, jare agüiye vaerā uicuua, yepe tēi uyandu, jare agüiye vaerā uyerova Tumpa cotí, imbaeyoa reta uyembai vaerā —jei.

Umaeti vae uyemijaanga jese vae

(Mt 13.18-23; Lc 8.11-15)

¹³ Jayave Jesús jei chupe reta:

—Picuua'ā pa mbae cua amijaanga reve jae peve vae uipota jei vae? Picuua'ā yave, ¿quiráita pa picuua mbae opaete amijaanga reve jaeta peve vae uipota jei vae? —jei—. ¹⁴ Jocua umaeti vae uyemijaanga Tumpa iñee umimbeu vae re —jei—. ¹⁵ Temiti tape rupi oa vae uyemijaanga amocue Tumpa iñee uyandu vae re. Ërei jupivoiño ou Satanás, jare umíacañi Tumpa iñee güi —jei—. ¹⁶ Jae ramiño vi jocua temiti uñefotí mboviño íví itape íarambo oī vae pe vae uyemijaanga iru vae reta Tumpa iñee uyandu vae re. Jupivoiño uyerovia reta, jare uipota ete cua ñee. ¹⁷ Ërei cua reta jocua temiti japo quípe'ā oī vae rami co. Jáeramo imambae icueri reta. Mbaesusere uyeyapo chupe reta ani iru vae reta uyapo icavi mbae vae chupe reta Tumpa iñee uicuua ramo. Jare jupivoiño uipota'ā ma uyapisaca reta Tumpa iñee re —jei—. ¹⁸ Jae ramiño vi jocua temiti uñefotí ñanapite pe vae uyemijaanga iru vae reta Tumpa iñee uyandu vae re. ¹⁹ Ërei jae reta umbipi uyemipa'ā íví pe mbaembae uyeyapo vae re, jare uyembitavi, uipota icocatu ramo. Uipota vi güinoi jeta mbaembae. Jare opaete cua umíacañi reta Tumpa iñee güi. Jáeramo jae reta jocua temiti ia'ā vae rami co —jei—. ²⁰ Ërei jocua temiti uñefotí ívicavi pe vae uyemijaanga iru vae reta Tumpa iñee uyandu vae re. Cua reta güirovia. Amocue vae jocua temiti mboviño jāt vae rami co. Irú vae reta jocua temiti jeta catu jāi vae rami co. Jare iru vae reta jocua temiti jeta ete jāi vae rami co —jei—.

Uñefotí vae uyechacañotai co

(Lc 8.16-18)

²¹ Jayave Jesús jei chupe reta:

—Mechero yaruique yave o pe, ndarau ñañono yapepo uyembovapo oī vae igüi pe, ani güirapembí igüi pe. Ñañono co mechero jenda pe —jei—. ²² Ime yave mbae uñefotí vae, uyechacañotai co. Jae ramiño vi ime yave mbae uyeyasoí vae, uyecuuañotai co —jei—. ²³ Uipota uyandu vae tuyapisaca cua ñee re —jei— Jesús.

²⁴Jare jei chupe reta:

—Pepia pe piyemingueta cavi piyandu vae re. Tumpa umiaangata umee peve pemiaanga pemee ūravae reta pe rami, jare umiiruta vi peve —jei—. ²⁵Echa'ā güinoi vae pe uñemiiruta, jare mbaeti güinoi vae güi mbovi ete güinoi vae uyeequita —jei.

Jesús umijaanga temiti ucuacuaa vae

²⁶Jare Jesús jei chupe reta:

—Tumpa iporoyocuia penti cuimbae oo umaeti vae rami co —jei—. ²⁷Cuimbae oque pītu yave, jare upūa cōe yave. Temiti oē jare ucuacuaa, jare umaeti vae uicuaa'ā quirāi ra ucuacuaa vae. ²⁸Echa'ā temiti ucuacuaa yambori mbae reve, tenonde ii, jayave ataviqui, joco güi avati —jei—. ²⁹Jare yagüiye ma yave, iya uaviro. Echa'ā uvāe ma ara uaviro vaerā —jei chupe reta.

Jesús umijaanga mostaza jāicue

(Mt 13.31-32; Lc 13.18-19)

³⁰Jare Jesús jei:

—¿Mbae ra ipuere uyemijaanga Tumpa iporoyocuia re? ¿Mbae ra yamijaangata jese? —jei—. ³¹Yandepuere yamijaanga jese penti mostaza jāicue —jei—. Uñeñotí yave, cua jāicue michi-rai ete opaete ūru temiti reta jāicue īvi pe oī vae güi. ³²Ērei uñeñotí yave, ucuacuaa, jare tuicha ete opaete ūru temiti penti año peguaño ucuacuaa vae reta güi, jare tuicha jáca uyeyapo. Jáeramo güira reta ipuere uyapo jaitirā jese guarasí pe —jei chupe reta.

Maera Jesús umijaanga mbaembae

(Mt 13.34-35)

³³Jeta cuarāi Jesús umimbeu Tumpa iñee chupe reta umijaanga reve, jae reta ipuere uicuaa rupiño. ³⁴Jare jecuaeño imiari chupe reta umijaanga reve. Ērei jemimboe reta peño uicuaaca cavi mbae uipota jei vae.

Jesús umiquií i guasu

(Mt 8.23-27; Lc 8.22-25)

³⁵Jocua ara guarasi uique ma yave, Jesús jei jemimboe reta pe:

—Yaa i guasu jovaicho pe —jei.

³⁶Jayave jae reta ueya yati vae reta, jare güiraa Jesús jocua chalana oī pipe vae pe. Jare ūru vae reta yugüiraa vi ambie chalana reta pipe. ³⁷Jare ou īvitu tanta uyepeyu, jare i uyembiaparoaraoa uique chalana pe, jare umitinee seri ma. ³⁸Jare Jesús uñemiäcanita chalana iyapi pe, jare oque oī. Jayave jae reta omomba jare jei chupe:

—¡Opromboe vae! ¿Ndepiá'ā pa opata ma ñamano?

³⁹Jayave Jesús upūa, jare uñeengata īvitu pe.

—¡Epital! ¡Nequii! —jei i guasu pe.

Jare īvitu javoi upita, jare opaete quii ngatu. ⁴⁰Jayave Jesús upirandu chupe reta:

—¿Maera pa pequiyé? ¿Ndeiño pa pepurugiørovia? —jei.

⁴¹Jare uquiyé ete reta, jare jei uyupe:

—¿Mbae nunga cuimbae pa cua? īvitu jare i guasu uyapo jae oyocui vae —jei reta.

5

Gadara pegua aña oya jese vae

(Mt 8.28-34; Lc 8.26-39)

¹Jayave yugüiraa uvāe i guasu jovaicho pe, gadareno reta iivi pe. ²Jesús ugüeyi chalana güi rupive, ou ooväiti teögüerirurenda güi penti cuimbae aña oya jese vae. ³Jae ico teögüerirurenda rupi, jare ipuere'ā ma quía uñapiti, yepe tēi uñapiti cadena pe. ⁴Jeta vese ma jae reta uipocua tēi ipo jare ipi cadena pe. Ērei jae opa omondoo cadena reta. Jare ipuere'ā quía jese. ⁵Jare jecuaeño pītu rupi jare ara rupi oī teögüerirurenda rupi jare īvitu guasu rupi, jare jecuaeñusapicai jare uyembipere ita pe. ⁶Cua cuimbae uecha yave Jesús mbirí güi, osi ou icoti jare uyeaticha jovai. ⁷Jare iñeeäta reve jei:

—¿Maera pa ndeyu chemambeco, Jesús? Nde co jae Tumpa ara pe oī vae Tai. Ayerure ndeve Tumpa jee re agüiye iporaraca cheve —jei.

⁸Echa'ā Jesús jei aña pe:

—Esiri cua cuimbae güi, aña.

⁹Jayave Jesús upirandu chupe:

—¿Mbae pa nderee?

—Cheree co jaejeta vae. Echa'ā jeta vae co ore —jei chupe.

¹⁰ Jare aña reta uyerure Jesús pe agüiye vaerā umbisirí reta jocua ívi güi. ¹¹ Jare joco pe jeta cuchi reta ucaru ñugüinoi coño ívitu guasu güi. ¹² Jayave aña reta uyerure Jesús pe:

—Oremundo pea cuchi reta coti. Emaeño oreré ndoya vaerā jese reta —jei reta.

¹³ Jayave Jesús umaeño jese reta. Jare aña reta usirí cuimbae güi, jare oya cuchi reta re. Jayave cuchi reta tanta osi ívía rupi oa i guasu pe, jare joco pe opa ipitupa reta. Cuchi reta uyepapa dos mil rupi.

¹⁴ Jayave cuchi iyandarecoa reta opa osi, jare umimbeu tenta guasu pegua reta pe jare jocoropi ñugüinoi vae reta pe cua uyeyapo vae regua. Jare uyandu vae reta yugüeru, uecha vaerā mbae uyeyapo vae. ¹⁵ Jare yugüeru uväe yave Jesús oí vae pe, uecha cuimbae aña oyase jese vae ugüpí oí joco pe. Uecha uyemonde ma jare iyaracuaño ma oí. Jae co tenonde yave jeta aña reta oyase jese vae. Jare opaete yugüeru vae reta uquiyé. ¹⁶ Jare jocua tenonde yave uecha vae reta umimbeu íru reta pe quirái uyeyapo cuimbae aña oyase jese vae pe jare cuchi reta pe. ¹⁷ Jayave yati vae reta umiñera Jesús oo ye vaerā jae reta iiví güi. ¹⁸ Jare Jesús uyupi ye ma oí yave chalana pe, jocua cuimbae aña reta oyase jese vae uyerure chupe:

—Emaeño cheré aa vaerā nderupié —jei.

¹⁹ Ërei Jesús umaeño'á jese.

—Ecua nerenta pe emimbeu nerentará reta pe mbae icavi vae ndeYa uyapo ndeve vae, jare quirái ndeparareco vae —jei chupe.

²⁰ Jayave cuimbae oo, jare umbípi umimbeu ívi Decápolis jee vae rupi mbae icavi vae Jesús uyapo chupe vae. Jare opaete ipiacaño jese.

Jairo tayí jare cuña Jesús jemimonde uyavíquí vae

(Mt 9,18-26; Lc 8,40-56)

²¹ Jesús oo uväe yave i guasu jovaicho coti chalana pipe, yugüeru jeta vae reta jae oí vae pe. Jare Jesús upita i guasu jembeí pe. ²² Jayave ou penti cuimbae Jairo jee vae. Jae co judío reta itupao re uyandareco vae. Uecha yave Jesús, uyeatíca jovai. ²³ Jare uyerure chupe:

—Cherayí umanota ma oí —jei. Yaa iñono ndepo jese embigüera, agüiye vaerā umano —jei chupe.

²⁴ Jayave Jesús oo voi jupíe. Jare jeta yugüíraa Jesús jupíe, jare oyopí reta. ²⁵ Jare jae reta ipite pe oo penti cuña doce año ma uiporara tugüiguasu vae. ²⁶ Jare uiporara ma jeta upurupiano vae reta uipiano tēi reve, jare opaete ma icorepoti umee iyugüíi upurupiano vae reta pe. Ërei ucuera'á. Jeseve jeiteño ma imbaerasí. ²⁷ Jae uyandu Jesús regua yave, oya Jesús re icupe coti jeta vae reta ipite rupi, jare uyavíquí jemimonde.

²⁸ —Yepe téi jemimondeño tayavíquí, acuerata co —jei.

²⁹ Jare jupivoíño jugüiguasu upita chugüíi, jare uyandu jete ucuera ma imbaerasí güi. ³⁰ Jayave Jesús uicuua umbigüera ma co quíia imbaepuere pe. Jáeramo uyerova umae jeta vae re, jare upírandu:

—¿Quía pa cheremimonde uyavíquí?

³¹ Jayave jemimboe reta jei chupe:

—Ndeecha co cua jeta vae reta ndeopí ñugüinoi. ¿Maera pa ndepirandu: ‘Quía pa cheremimonde uyavíquí?’ —jei reta chupe.

³² Ërei Jesús umae iyipi rupi, uecha vaerā quíia ra jucuarái uyapo. ³³ Cuña uicuua uyeyapo ma chupe vae, jare ou icoti. Uquiyé güi uriri, jare uyeatíca Jesús jovai, jare umimbeu chupe opaete uyeyapo ma vae. ³⁴ Jayave Jesús jei chupe:

—Ndecuera ma, cherindi, nderovia cheré ramo. Ecua ndepiacatu reve. Ndecuera ma co nembaerasí güi —jei.

³⁵ Jare Jesús uyeminguela oí rambueve, yugüeru uväe amocue vae tupao re uyandareco vae jenta güi. Jare jei reta Jairo pe:

—Nderayi umano ma. Agüiye ma emambeco oporomboe vae —jei reta chupe.

³⁶ Ërei Jesús cua uyandu yave, jei tupao re uyandareco vae pe:

—Agüiye ndepiatíti. Epurugiüroviaño —jei.

³⁷ Jare umaeño'á íru reta re yugüíraa vaerā jae ndive, jaeño Pedro, Jacobo jare Juan. Juan co jae Jacobo tivi. ³⁸ Yugüíraa uväe yave tupao re uyandareco vae jenta pe, Jesús uecha jeta vae reta icorai jare uyoño ñugüinoi reta jásse reve. ³⁹ Jesús uique yave o pe, jei chupe reta:

—¿Maera pa picorai jare piyao? Cua cuñatai umano'á co. Oqueño co oí —jei.

⁴⁰ Ërei jae reta oyoyai. Jayave Jesús omoë opaete vae oca pe, jare uruique cuñatai oí vae pe cuñatai tu jare ichi, jare jemimboe jae ndive yugüíraa vae reta. ⁴¹ Jayave Jesús uipisi cuñatai ipo pe.

—Talita cumi —jei chupe. (Cua uipota jei: “Cuñatai, che jae ndeve, epú”.)

⁴² Jayave cuñatai upúa jare umbípi uguata. Cua cuñatai doce año ma güüinoi. Jare Jesús ndive ñugüinoi vae reta ipiacaño ete. ⁴³ Jayave Jesús oyocui ete reta agüiye vaerā umimbeu quíia pe ave, jare oyocui vi umíngaru vaerā cuñatai.

Jesús Nazaret pe

(Mt 13.53-58; Lc 4.16-30)

¹ Jesús oo joco güi iivi pe, jare jemimboe reta yugüiraa jupié. ² Jayave mbutuu ara pe Jesús umbipi oporomboe judío reta itupao pe. Jare jeta vae uyapisaca jese, jare ipiacañi reta. Jei reta uyupe:

—¿Quiape ra uyemboe cua cuimbæe opaete cua re? ¿Mbae nunga aracuua ra uñemee chupe? ¿Mbae nunga miacañi ra cua uyapo ipo pe vae? —jei reta—. ³ Cua co jae carpintero. Jae co María imembí. Jae co Jacobo, José, Judas jare Simón tiquei. Jare jindi reta yugüireco vi yandepite pe —jei reta.

Jáeramo jae reta pochi Jesús pe. ⁴ Jayave Jesús jei chupe reta:

—Opaete vae uiipiù penti Tumpa iñee umimbeu vae. Jaeño jentaigua reta, jentará reta jare jenta pegua reta uiipiú'á reta —jei.

⁵ Jare joco pe ipuere'á uyapo jeta miacañi. Jaeño oñono ipo mbovi imbaerasi vae reta re umbigüera vaerá. ⁶ Jare Jesús ipiacañi jese reta, güirovia'á jese ramo.

Jayave Jesús oo oporomboe īru tenta guasu-rai jocoropi ñugüinoi vae reta rupi.

Jesús omondo jocua doce jemimboe reta

(Mt 10.5-15; Lc 9.1-6)

⁷ Penti ara Jesús umbati jocua doce jemimboe reta, jare omondo mocui mocui rupi, jare umee chupe reta mbaepuere umbisiri vaerá aña reta oya jese vae reta güi. ⁸ Jare oyocui:

—Peo yave, agüiye mbae peraa, jaéño pepopoca. Agüiye peraa peurupucu, perembiurá jare corepoti —jei chupe reta—. ⁹ Pemonde pepipasa, jare agüiye peraa mocui camisa —jei.

¹⁰ Jare jei vi chupe reta:

—Peo pevæe yave penti tenta pe, joco pe pei, jocua tenta guasu güi peo ye regua —jei—. ¹¹ Jare ime yave penti tenta guasu pegua reta uiropa'á pepita vaerá joco pe jare uiropa'á uyapisaca peré vae, pecuaño joco güi, jare pemítimo ivicuui pepi güi, uicuua vaerá jae reta co tecu güinoi —jei—. Añete che jae peve, Tumpa uña yave iivi pegua reta, jocua tenta guasu pegua reta tanta uiporarata Sodoma jare Gomorra pegua reta güi —jei.

¹² Jayave jae reta yugüiraa, jare umimbeu īru vae reta pe:

—Peeya piyemingueta icavi mbae vae pepia pe oí vae.

¹³ Jare jae reta umbisiri jeta aña reta oya jese vae reta güi, jare jeta imbaerasi vae reta re oñono aceite umbigüera vaerá.

Juan imano

(Mt 14.1-12; Lc 9.7-9)

¹⁴ Opaete vae uyandu ma Jesús regua. Mburuvicha guasu Herodes jee vae uyandu vi. Jae jei:

—Juan upurumbibautizase vae icove ye ma ou umanocue vae reta ipite güi. Jáeramo uyapo cua miacañi reta —jei.

¹⁵ īru vae reta jei:

—Jae co Elías.

Jare īru vae reta jei:

—Jae co penti Tumpa iñee umimbeu vae Tumpa iñee araceae umimbeu vae rami.

¹⁶ Ërei Herodes uyandu yave, jei:

—Jae co Juan añacasiaca vae. Icove ye ma ou umanocue vae reta ipite güi —jei.

¹⁷ Echa'á ndei Juan umano mbove, Herodes umenda Felipe jembireco Herodías jee vae ndive. Felipe co jae Herodes tivi. Jayave Herodes omondo uipísica Juan, jare oñonoca peresoriru pe, Herodías jei ramo. ¹⁸ Echa'á tenonde yave Juan jei Herodes pe: “Icaví'á nemenda vaerá nderivi jembireco ndive.”

¹⁹ Jáeramo Herodías pochi Juan pe, jare uiropa'á yucacá, Ërei ipuere'á. ²⁰ Echa'á Herodes uicuua Juan co jae cuimbæe jupi vae. Jáeramo uiipiù, jare umaeño'á quía re uyapo vaerá icavi mbae vae chupe. Jare uyandu yave Juan jei vae, uyemipa'á tuicha. Ërei jecuaeño uiropa'á uyapisaca jese. ²¹ Ërei uväe ara Herodías uyapo vaerá icavi mbae vae Juan pe. Jocua ara Herodes uyembíara oa vae regua, jare umbatíca īru mburuvicha reta, sundaro reta juvicha reta, jare icocatu vae reta Galilea pegua, umingaru vaerá. ²² Jare Herodías imembí cuña uique upirae yave, umbiyerovia Herodes jare jae ndive ucaru ñugüinoi vae reta. Jayave Herodes jei cuñatai pe:

—Eeca cheve mbae ndipota vae, jare che ameeta ndeve —jei.

²³ Jare jei ye chupe Tumpa jee re:

—Ipotave mbae ndeeca cheve vae ameeta co ndeve, cheiví mbite rupi yepe.

²⁴ Jayave cuñatai oé oo upirandu ichí pe:

—¿Mbae pa aecata chupe?

—Eeca chupe Juan upurumbibautizase vae iñaca —jei ichí chupe.

²⁵ Jayave imambaeño cuñatai uique ye mburuvicha guasu oī vae pe.

—Aipota nemee vaerā cheve añaive voi Juan upurumbibautizase vae iñāca penti plato pe —jei chupe.

²⁶ Jayave mburuvicha guasu ipiatiti tuicha. Ërei Tumpa jee re jei chupe ramo, jare ūru vae reta uyandu ramo, uipotalā uicuacu iñee. ²⁷ Jáeramo omundo sundaro Juan iñāca güeru vaerā. ²⁸ Jayave oo sundaro peresoriru pe uñacasia Juan. Jare güeru iñacacie penti plato pe, jare umee cuñatai pe. Jayave jae umee ichi pe. ²⁹ Jare Juan jemimboe reta cua uicuua yave, yugüeru güüraa jetecue oñoti vaerā.

Jesús umíngaru cinco mil cuimbae reta

(Mt 14.13-21; Lc 9.10-17; Jn 6.1-14)

³⁰ Jesúis jemimondo reta uyembati ye yave jae ndive, umímbeu reta chupe opaete uyapo vae jare oporomboe jese vae. ³¹ Jayave Jesúis jei chupe reta:

—Pe retaño peyú yaa quíi ngatu vae pe, peputuu vaerā michi pegua —jei.

Echa'ā jecuaecue jeta vae yugüeru opou ipi. Jáeramo Jesúis jare jemimboe reta iquíi'ā ucaru vaerā.

³² Jayave jae retaño yugüiraa chalana pe quíi ngatu vae pe. ³³ Ërei jeta vae reta uecha yugüiraa, jare uicuua quíi co jae vae. Jare yugüiraa ivi rupiño tenta guasu reta güi Jesúis oo vae pe, jare yugüiraa uvāe ndei Jesúis oo uvāe mbove, jare uyembati joco pe. ³⁴ Jesúis ugüeyi yave chalana güi, uecha jeta vae, jare uiparareco reta. Echa'ā jae reta ovecha mbaeti iyandarecoa güüinoi vae reta rami co. Jare umbipi omboe reta jeta mbaembae re.

³⁵ Caaru ma yave, Jesúis jemimboe reta yugüeru jei chupe:

—Mbaeti quiave ico cua rupi, jare caaru ma oī. ³⁶ Emundo cua reta ogua vaerā jembiurā tenta tenta rupi. Echa'ā mbaeti mbae jou reta vaerā cua pe —jei reta.

³⁷ Ërei Jesúis jei chupe reta:

—Pe reta pemee tucaru.

—¿Ndoota pa ndogua doscientos ara mbaravíqui jepi pegua mbiyape, numee jou reta vaerā? —jei reta chupe.

³⁸ Jesúis jei chupe reta:

—¿Mboví pa mbiyape ime penoi? Pecua peeca —jei.

Jae reta uicuua ma yave, umímbeu Jesúis pe:

—Ime nonoi pandepo mbiyape jare mocui pira —jei reta.

³⁹ Jayave Jesúis oyocui opaete vae uyembatimbati vaerā uguapí capiichape re. ⁴⁰ Jayave uyembatimbati reta uguapí cien rupi jare cincuenta rupi. ⁴¹ Jayave Jesúis uipisi jocua pandepo mbiyape jare mocui pira, jare umae ara coti, jare umee yasurupai Tumpa pe. Jayave upisää mbiyape, jare umee jemimboe reta pe, jae reta umee vaerā yati yati ñugüinoi vae reta pe. Jesúis upisää vi jocua mocui pira, uñemee vaerā opaete vae pe. ⁴² Opareve ucaru, jare iyangapii reta. ⁴³ Jayave Jesúis jemimboe reta umbati tembíu uñepisäacue jembire vae, jare umitinee doce canasta. ⁴⁴ Jare ucaru vae reta güi cuimbae retaño uyepapa cinco mil.

Jesúis uguata i íárambo

(Mt 14.22-27; Jn 6.16-21)

⁴⁵ Jare jupivoíño Jesúis oyocui jemimboe reta uyupi vaerā chalana pe, jare yugüiraa vaerā jenonde i guasu jovalcho pe tenta guasu Betsaida pe, jae omundo rambuve uyembati vae reta. ⁴⁶ Jare opa omundo yave, Jesúis uyupi ivitu guasu re uyerure vaerā Tumpa pe. ⁴⁷ Piñu ma yave, jemimboe reta yugüiraa chalana pe i guasu mbite rupi, jare Jesúis jaéno upita ivi pe. ⁴⁸ Jare Jesúis uecha tanta ma uparavíqui reta, uruguata vaerā chalana. Echa'ā ivitu tanta oováiti. Jare cöeta ma yave, Jesúis uguata oo i íárambo rupi güüraa uepiti. Jare uasata tēi chugüi reta. ⁴⁹ Jae reta uecha yave uguata oo i íárambo rupi, ipia pe uyemingueta tēi uecha mbae iäcue, jare usapicai reta. ⁵⁰ Echa'ā opaete jae reta uecha, jare uquiyé ete reta. Ërei jupivoíño Jesúis ombou iñee chupe reta:

—Piñemiatangátu. Che co. Agüiye pequiye —jei.

⁵¹ Jayave Jesúis ou uyupi chalana pe, jare upita ivitu. Jare jae reta ipiacañi. ⁵² Echa'ā jocua miacañi mbiyape regua uyapo yave, Jesúis uipota tēi jae reta uicuua cavi vaerā. Ërei ndeiño uicuua. Echa'ā jecuaeño ipiatanta.

Jesúis umbigüera Genesaret pegua imbaerasi vae reta

(Mt 14.34-36)

⁵³⁻⁵⁴ I guasu uasa reta yave, yugüiraa uvāe ivi Genesaret pe. Jare ugüeyi reta yave chalana güi i guasu jembei pe, jupivoíño joco pegua reta uicuua jae co Jesúis vae. ⁵⁵ Jare yugüiraa opaete jocua ivi rupi, jare umbipi güeru imbaerasi vae reta jupa reve Jesúis oī vae pe. Íru vae reta umímbeu chupe reta quiape oī vae. ⁵⁶ Jare Jesúis oo tenta guasu-rai reta rupi, jare tenta guasu reta rupi, jare tenta ñana rupi ñugüinoi vae reta pe. Jare oo vae rupi joco pegua reta güeru oñono imbaerasi vae reta tape rupi, jare uyerure

Jesús pe umaeño imbaerasi vae reta uyavíqui vaerā jemimonde jembeí yepe. Jare opaete uyavíqui vae reta ucuera.

7

Yandepia uminguia vae

(Mt 15.1-20)

¹ Fariseo reta jare amocue mboroyocui re oporomboe vae Jerusalén güi yugüeru vae reta uyembati Jesús oí vae pe. ² Jae reta uecha amocue Jesús jemimboe reta ucaru ñugüinoi uyepoe mbae reve. Echa'á jae reta uyapo ve'á ma itenondegua reta iporomboe. Jáeramo umbijeco reta. ³ Echa'á fariseo reta jare opaete judío reta uyepoeñoi ndei ucaru mbove, uyapo vaerā itenondegua reta iporomboe. ⁴ Jare yugüeru ye yave umaemee vae reta ñugüinoi vae güi, jecuaeñó uyepoe ndei ucaru mbove. Jare uyapoñoi reta jeta íru mbaembae itenondegua reta iporomboe. Echa'á oyoe vaso reta, yapepo reta, paila reta jare tupu reta. ⁵ Jayave fariseo reta jare mboroyocui re oporomboe vae reta upirandu Jesús pe:

—¿Maera pa nderemimboe reta uyapo'á yandetenondegua reta iporomboe? ¿Maera pa ucaru reta uyepoe mbae reve? —jei reta.

⁶ Jayave Jesús jei chupe reta:

—Añete yepe Isaías imiari peré. Echa'á jae uicuatía upurumbítavi vae reta re cuarái: ‘Cua reta chepiú iyuru peño’ —jei Tumpa—.

‘Erei ipia pe chepiú'á etei.

⁷ Chembíadora-raangaiño.

Che jucuarái'á aporoyocui’ —jei Tumpa.

Jucuarái uicuatía Isaías —jei Jesús—. ⁸ Echa'á pe reta piyapo'á Tumpa iporoyocui, ērei piyapo cavi yandetenondegua reta iporomboe. Piyoe yapepo reta jare vaso reta, jare jeta cua nunga piyapo —jei.

⁹ Jare Jesús jei chupe reta:

—Tumpa iporoyocui pemombo co, piyapo vaerā yandetenondegua reta iporoyocui. ¹⁰ Moisés jei cuarái: ‘Ipiú nderu jare ndesi.’ Jare jei vi cuarái: ‘Jei icavi mbae vae tu ani ichi coti vae uyeyucata co.’ Jucuarái jei Moisés —jei chupe reta—. ¹¹ Ērei pe reta pere cuarái: ‘Penti cuimbæ ipuere jei tu ani ichi pe umeeta tēi chupe ombori vaerā vae Corbán co.’ Jucuarái pere —jei—. (Corbán uipota jei: “Amee ma Tumpa pe.”) ¹² Jayave pe reta pemaeñó'á ma jese ombori vaerā tu jare ichi —jei—. ¹³ Jare jeta cua nunga piyapo. Jucuarái pe reta pemombo Tumpa iporoyocui piyugüi piyapo vaerā yandetenondegua reta iporoyocui. Jare pemboe vi pesambiai reta uyapo vaerā yandetenondegua reta iporoyocui —jei Jesús chupe reta.

¹⁴ Jare Jesús ueni umbati opaete joco pe ñugüinoi vae reta.

—Piyapisaca cua re opaete pe reta, picuua cavi vaerā —jei chupe reta—. ¹⁵ Ipotave mbae peu vae oo perie pe. Jáeramo uminguia'á pepia. Jocua piyapo vae jare pere vae uminguia'á pepia —jei—. ¹⁶ Uipota uyandu vae tuyapisaca cua ñee re —jei chupe reta.

¹⁷ Jare Jesús ueya yati vae reta yave, uique jo pe. Jayave jemimboe reta upirandu chupe umijaanga reve jei vae re. ¹⁸ Jayave Jesús jei chupe reta:

—¿Pe retave pa picuua cavi'á? Picuua cavi cua: Ipotave mbae peu vae uminguia'á pepia. ¹⁹ Echa'á oo'á pepia pe. Oo perie pe jare pemombo. Jucuarái uyeyapo opaete tembíu pe —jei chupe reta.

²⁰ Jare Jesús jei:

—Jocua piyapo vae jare pere vae uminguia'á pepia. ²¹ Echa'á pepia güi oë opaete icavi mbae vae: pepia pe piyemingueta icavi mbae vae, piyuvanga menda re, piyapo aguasa, pepuruyuca, ²² pemonda, pipota íru vae reta imbaembae, piyapo icavi mbae vae, pepurumbítavi, pembiquere, peacatää, icavi mbae vae pere perapicha coti, piyembicate jare pico iyaracuaa mbae vae reta rami —jei—. ²³ Opaete cua icavi mbae vae oë pepia güi. Jare cua reta uminguia'á pepia —jei chupe reta.

Cuña sirofenicia pegua ipurugüirovia

(Mt 15.21-28)

²⁴ Jayave Jesús oo ye joco güi Tiro jare Sidón iyipi rupi. Jare uique yave penti tenta pe, uipota'á tēi quiave uicuuua vaerā jae joco pe oí vae. Ērei uicuuuañoi joco pegua reta. ²⁵ Jare penti cuña aña oya imembí cuña re vae uyandu Jesús regua, jare ou uyeatica jae jovai. ²⁶ Jae co penti sirofenicia griega pe uyemingueta vae. Jae uyerure Jesús pe umbisiri vaerā aña imembí güi. ²⁷ Ērei Jesús jei chupe:

—Tiangapíi rani sambiai reta. Icavi'á yaequi vaerā tembíu sambiai reta güi, ñamee vaerā yimba-rai reta pe —jei.

²⁸ —Añete tēi co, carai —jei cuña Jesús pe—. Ērei yimba-rai mesa igüi pe ñugüinoi vae reta jou tembíu usururucue sambiai reta uití vae —jei.

²⁹ Jayave Jesús jei chupe:

—Cua ndere vae jeco pegua ndepuere ndeo. Aña usiri ma nemembí güi —jei.

³⁰ Jayave cuña oo uvāe jenta pe yave, uecha imembī jupa pe oī. Aña usiri ma chugüi.

Jesús umbigüera cuimbae iupaupa jare iyapisa mbae vae

³¹ Jayave Jesús ou Tiro iyipí rupigua güi, jare uasa Sidón jare Decápolis rupi, jare ou uvāe i guasu Galilea pe oī vae pe. ³² Jare amocue vae güeru chupe penti cuimbae iupaupa jare iyapisa mbae vae. Güeru vae reta uyerure Jesús pe oñono vaerā ipo jese. ³³ Jayave Jesús güiraa cuimbae yati vae reta ipite güi. Oñono ipoáca cuimbae iyapisa pe. Jayave undív, jare uyavíqu cuimbae icū chugüi. ³⁴ Jayave umae ara cotí, jare iañeequi, jare jei:

—Efatal! (Cua uipota jei: “¡Iyapeal!”)

³⁵ Jayave cuimbae uyandu ma, jare icū omi cavi, jare uyemingueta cavi ma. ³⁶ Jayave Jesús oyocui reta agüiye vaerā umimbeu quía pe. Êrei yepe tēi oyocui ye ye, jeseve jae reta umimbeuñoi íru vae reta pe. ³⁷ Jae reta ipiacañi ete, jare jei:

—Opaete mbaembæ uyapo vae icavi ete co. Umbigüera iyapisa mbae vae reta uyandu vaerā, jare umbigüera vi upa reta uyemingueta vaerā.

8

Cuatro mil ucaru vae reta

(Mt 15.32-39)

¹ Penti ara jeta uyembati yave, mbaeti ma mbae güinoi reta jou vaerā. Jayave Jesús ueni jemimboe reta.

² —Aiparareco cua yati vae reta —jei—. Echa'ā mbapi ara ma ñugüinoi che ndive, jare mbaeti ma mbae güinoi jou vaerā —jei jemimboe reta pe—. ³ Amondo yave jenta cotí ucaru mbae reve, ipituta co reta tape rupi. Echa'ā amocue yuguero mbirí güi —jei chupe reta.

⁴ —¿Quíráita pa yandepuere ñamee mbiyape chupe reta cua mbaeti quiave ico vae pe? —jei jemimboe reta Jesús pe.

⁵ Jayave Jesús upirandu chupe reta:

—¿Mboví pa mbiyape penoi?

—Ime nonoi siete —jei reta chupe.

⁶ Jayave Jesús oyocui yati vae reta uguapi vaerā ívi pe. Jayave uipisi jocua siete mbiyape, jare umee yasurupai Tumpa pe. Jayave upisää mbiyape, jare umee jemimboe reta pe, jae reta umee vaerā yati vae reta pe. Jayave jucuarái uyapo reta. ⁷ Jare güinoi vi mboví pira michi vae reta. Cua re vi Jesús umee yasurupai Tumpa pe, jare jei jemimboe reta pe cua vi umee vaerā yati vae reta pe. ⁸ Opareve ucaru, jare iyangapíi reta. Jayave Jesús jemimboe reta umbatí tembíu uñepísäcue jembire vae, jare umitínee siete canasta. ⁹ Jare joco pe ñugüinoi vae reta uyepapa cuatro mil rupi. Jayave Jesús omondo ye yati vae reta. ¹⁰ Jayave jae jare jemimboe reta uyupi chalana pe, jare yuguíraa ívi Dalmanuta jee vae pe.

Fariseo reta uipota uecha miacañi

(Mt 16.1-4; Lc 11.29; 12.54-56)

¹¹ Jayave yuguero fariseo reta, jare umbipi uyeaca Jesús ndive.

—Eechaca oreve miacañi ara güi —jei reta chupe.

Jae reta uipota uicuaa uyapota ra miacañi chupe reta. ¹² Jayave Jesús iañeequi.

—¿Maera pa añave yuguíreco vae reta uipota aechaca vaerā chupe reta miacañi? —jei—. Añete che jae peve, ndarau uyechaca miacañi cua reta pe —jei chupe reta.

¹³ Jayave Jesús ueya reta, jare uyupi ye chalana pe oo i guasu jovaicho pe.

Fariseo reta ilevadura

(Mt 16.5-12)

¹⁴ Jare Jesús jemimboe reta ñacañi güeru vaerā mbiyape. Pentiño mbiyape güinoi chalana pe. ¹⁵ Jare Jesús jei chupe reta:

—Piñemoa ngatu fariseo reta jare Herodes ilevadura güi.

¹⁶ Jayave jemimboe reta jei uyupe:

—Cua jei, yaru'ā mbiyape ramo.

¹⁷ Jesú uicuaa chugüi mbae jei reta vae, jare jei chupe reta:

—¿Maera pa piyemingueta mbiyape Peru mbae vae re? ¿Ndeíno pa picuaa cavi? ¿Tanta mbate pa co pepia? —jei—. ¹⁸ Peresa jare peapisa penoi. ¿Peecha'ā pa jare piyandu'ā pa? ¿Pemandua'ā pa? —jei—.

¹⁹ Cue yave apisää pandepo mbiyape, ucaru vaerā cinco mil vae reta. Tembíu jembirecue pembati yave, ¿mboví canasta pa pemítinee? —jei—.

—Numítinee doce —jei reta chupe.

²⁰ —Jare siete mbiyape apisää vi, ucaru vaerā cuatro mil vae reta. Tembíu jembirecue pembati yave, ¿mboví canasta pa pemítinee? —jei Jesús.

—Numítinee siete —jei reta chupe.

²¹ Jayave Jesús jei chupe reta:

—¿Ndeíño pa picuua cavi?

Jesús umbigüera jesa mbae vae Betsaida pe

²² Jare yugüiraa uväe Betsaida pe. Jayave amocue vae güeru Jesús pe cuimbae jesa mbae vae, jare jae reta uyerure chupe oñono vaerä ipo jese. ²³ Jayave Jesús ui poco güiraa cuimbae jesa mbae vae tenta guasu güi. Jayave undiví cuimbae jesa re, jare oñono ipo jese.

—¿Ndepuere pa mbae ndeecha? —jei chupe.

²⁴ Cuimbae umae.

—Cuimbae reta aecha —jei Jesús pe—. Ërei ivira reta echa cheve. Ërei aecha uguata ñugüinói —jei.

²⁵ Jayave Jesús oñono ye ipo jesa re, uecha cavi vaerä. Jayave ramo uecha cavi opaete mbaembae. ²⁶ Jayave Jesús oyocui:

—Agiüiye ecua cua tenta guasu rupi. Jare agüiye emimbeu quía pe ave jocoropi —jei chupe.

Jayave omondo jenta pe.

Pedro jei Jesús co jae Cristo, Tumpa ombou vae

(Mt 16.13-20; Lc 9.18-21)

²⁷ Coíño tenta guasu Cesarea Filipo güi ñugüinói amocue tenta guasu-raí reta. Jocotí yugüiraa Jesús jare jemimboe reta. Jare tape rupi Jesús upírandu jemimboe reta pe:

—¿Quía pa co che íru vae reta pe?

²⁸ Jare reta umimbeu chupe:

—Amocue vae jei nde co jae Juan upurumbibautizase vae, jare íru vae reta jei nde co jae Elías, jare íru vae reta jei nde co jae penti Tumpa iñee aracae umimbeu vae —jei reta.

²⁹ Jayave Jesús upírandu chupe reta:

—Jare ¿quía pa co che peve?

Jayave Pedro jei chupe:

—Nde co jae Cristo, Tumpa ombou vae.

³⁰ Jayave Jesús oyocui reta agüiye vaerä umimbeu quía pe.

Jesús umimbeu umanota co

(Mt 16.21-28; Lc 9.22-27)

³¹ Jayave Jesús umimbeu chupe reta:

—Che cuimbaerä ayeyapo vae jetata co aiporara. Jare tenta guasu pegua reta itenondegua reta, sacerdote reta itenondegua reta, jare mboroyocui re oporomboe vae reta chererírota jare cheyucacata. Ërei mbapi ara rupi aicove yeta ayu umanocue vae reta ipite güi —jei chupe reta.

³² Cua umimbeu cavi chupe reta. Jayave Pedro güiraa Jesús íru reta ipite güi, jare umbipi umbieta chupe. ³³ Ërei Jesús uyerova umae íru jemimboe reta cotí, jare uñengata Pedro pe.

—Esíri chegii, Satanás —jei chupe—. Echa'á nde ndiyemingueta neí ivi pegua reta uyemingueta rami, ndiyemingueta'á Tumpa uyemingueta rami —jei.

³⁴ Jare Jesús ue ni jemimboe reta jare íru joco pe ñugüinói vae reta. Jayave jei chupe reta:

—Ime yave quía uipota oo cherupié vae, tiñacañi iyugüi, tovoi icurusu, jare too cherupié —jei—.

³⁵ Uipota uñuvatu jecove vae ndarau ipuere. Ërei jecoa umeeta jecove chereco pegua jare Tumpa iñee icavi vae jeco pegua vae uñuvatuta co —jei—. ³⁶ ¿Mbae ra uminganata quía, umingana yave opaete ivi pegua, Ërei ipuere'á yave uñuvatu jecove? ³⁷ ¿Mbovi ra umbiepita quía ogua ye vaerä jecove? —jei—.

³⁸ Ivi pegua añaive yugüireco vae reta güirovia'á Tumpa jare uyapo icavi mbae vae. Ime yave quía imara cheré jare chiñee re cua reta ipite pe vae, che cuimbaerä ayeyapo vae chemarata vi jese, ayu ye yave cheRu imbaepuere reve ángel uñenono tee Tumpa peguarä vae reta ndive —jei chupe reta.

¹ Jesús jei chupe reta: —Añete che jae peve, ndei amocue cua pe ñugüinói vae umano mbove, uechata reta Tumpa iporoyocuia mbaepuere pegua.

Jesús uyembiambie

(Mt 17.1-13; Lc 9.28-36)

² Seis ara ma uasa yave, Jesús güiraa Pedro, Jacobo jare Juan íru reta ipite güi penti ivitu guasu ivate vae re, jare joco pe uyembiambie jae reta jovai. ³ Jemimonde umbipi uvera jare tñ así. Mbaeti penti ave umbaepuera vae ipuere umití así jucuarái. ⁴ Jare uyecuaa chupe reta Elías jare Moisés uyemingueta ñugüinói Jesús ndive. ⁵ Jayave Pedro jei Jesús pe:

—Oporamboe vae, icavi co ñaï vaerä cua pe. Nduyapota mbapi guarasä ñanaroqui pegua, penti nembærä, penti Moisés peguarä jare penti Elías peguarä —jei.

⁶ Echa'ä Jesús jemimboe reta uquiyete, jare Pedro uicuua'ä mbae jei vaerä. ⁷ Jayave ou amapitü umiguarasä reta, jare amapitü güi uyendu ñee jei:

—Cua co jae cheRaï aau ete vae. Piyapisaca jese —jei.

⁸ Jare aramoíñi umae reta yave, uecha'ä ma quía jae reta ndive, jaéño Jesús.

⁹ Jare ivitu guasu güi ugüeyi yugüeru rambueve, Jesús oyocui reta:

—Agiüye pemimbeu quía pe cua puecha vae, ndei che cuimbaerä ayeyapo vae aicove ye ayu umanocue vae reta ipite güi mbove —jei chupe reta.

¹⁰ Jáeramo umimbeu'ä quía pe, érei upirandu reta uyupe:

—¿Mbae pa uipota jei cua umimbeu yandeve vae? ¿Quiräita pa icove ye ou umanocue vae reta ipite güi? —jei reta.

¹¹ Jayave jae reta upirandu Jesús pe:

—¿Maera pa jei mboroyocui re oporamboe vae reta Elías rani co outa?

¹² —Añete Elías rani co outa —jei Jesús chupe reta —, jare opaete uyapicatuta. Jare ¿mbae ra uyecuatía oí Tumpa iñee pe che cuimbaerä ayeyapo vae re? Uyecuatía oí che jetata aiporara jare íru vae reta chererírota —jei —. ¹³ Érei che jae peve, Elías ou ma co, jare amocue vae uyapo chupe jae reta uipota vae, Tumpa iñee pe uyecuatía oí rami —jei chupe reta.

Jesús umbigüera cunumi aña oya jese vae

(Mt 17.14-21; Lc 9.37-43)

¹⁴ Jare yugüeru uväe yave íru jemimboe reta ñugüinói vae pe, uecha jeta yati ñugüinói iyípi rupi, jare mboroyocui re oporamboe vae reta uyeaca ñugüinói jae reta ndive. ¹⁵ Jayave opaete joco pe ñugüinói vae reta uecha Jesús, jare ipicañi reta. Jayave osi yugüeru reta icoti, jare umbisaluda reta. ¹⁶ Jayave Jesús upirandu chupe reta:

—¿Mbae re pa piyeaca pejä reta ndive?

¹⁷ Jayave penti cuimbae yati vae reta ipite pe oí vae jei chupe:

—Oporamboe vae, aru ndeve cherai. Aña oya jese jare umbuupa —jei —. ¹⁸ Jare que rupi oí vae pe aña oya jese yave, joco pe umbiriri, jare cunumi iyuru tiriayi, jái umbiquiriri jare jete opa uñemitanta —jei —. Ayerure tēi ma nderemimboe reta pe umbisiri vaerä aña chugüi, érei ipuere'ä reta —jei cuimbae Jesús pe.

¹⁹ Jayave Jesús jei chupe reta:

—Pe reta cua ívi pe pico vae pepurugüirovia'ä. ¿Quiräi regua ra apitata pe reta ndive? ¿Quiräi regua ra arupiata peve? Peru cheve cua pe jocua cunumi —jei.

²⁰ Jayave güeru chupe, jare aña uecha yave Jesús, jupivoíño umbiriri tanta jocua cunumi jare oa ívi re. Uyapayere, jare iyuru tiriayi. ²¹ Jayave Jesús upirandu tu pe:

—Quiräi yave ma pa uyeyapo chupe cua?

—Michi güive uyeyapo chupe —jei tu —. ²² Jare jeta vese ma uití tata pe jare i pe, uyuca vaerä tēi. Érei nde ndepure yave mbae ndiyapo chupe, oreparareco jare orembori —jei chupe.

²³ Jayave Jesús jei chupe:

—¿Ndepure pa ndepurugüirovia? Upurugüirovia vae ipuere uyapo opaete mbaembae —jei.

²⁴ Jayave cunumi tu iñeeáta reve jei:

—Ndugüirovia. Apurugüirovia'ä yave, chembori apurugüirovia vaerä —jei.

²⁵ Jare Jesús uecha yave jeta vae uyembati joco pe, uñeengata aña pe.

—Aña upurumbuupa jare upurumbiápisa mbae vae, che ndoyocui ndesiri vaerä cua cunumi güi, jare agüiye etei ma eya ye jese —jei aña pe.

²⁶ Jare aña jäse ma yave, umbiriri tanta cunumi, jare usiri chugüi. Jare cunumi umano echa upita. Jare jeta joco pe ñugüinói vae reta jei tēi:

—Umano ma.

²⁷ Érei Jesús uipisi cunumi ipo pe, jare umupüa. Jare cunumi uyemboi. ²⁸ Jare Jesús uique yave penti o pe, jemimboe reta upirandu chupe, jae retaño jae ndive ñugüinói yave:

—¿Maera pa ore orepuere'ä numbisiri aña?

²⁹ —Ndaraupuere pembisiri cua nunga aña, jaéño piyerure yave Tumpa pe piyecuacu reve tembiú güi —jei Jesús chupe reta.

Jesús umimbeu ye umanota co

(Mt 17.22-23; Lc 9.44-45)

³⁰ Jesúsjare jemimboe reta yugüiraa yave joco güi, uasa Galilea rupi. Jare Jesús uipota'ä quía uicuua vaerä. ³¹ Echa'ä omboe güinói jemimboe reta.

—Che cuimbaerā ayeyapo vae penti vae chemeeta ūru vae reta pe. Jae reta cheyucata —jei chupe reta —. Êrei amano ma yave, mbapí ara rupi aicove yeta ayu umanocue vae reta ipite güii —jei.

³² Êrei jae reta uicuaa cavi'ā mbae re ra Jesús umingueta vae, jare uipiu reta upirandu vaerā chupe jese.

¿Quía ra tenondegua ūru reta güii vae?

(Mt 18.1-5; Lc 9.46-48)

³³ Jayave yugüiraa uvāe Capernaum pe. Jare jenta pe oī yave, Jesús upirandu jemimboe reta pe:

—¿Mbae re pa piyeminguela peyu tape rupi?

³⁴ Êrei jae reta iquiiño. Echa'ā tape rupi jae reta uyemingueta yugüeru quía ra tenondegua ūru reta güii vae. ³⁵ Jayave Jesús uguapi, jare ueni jocua doce jemimboe reta. Jayave jei chupe reta:

—Ime yave quía uipota tenondeguarā ico vae, tuñemimichi opaete vae güii, jare tuyeyocui opaete ūru reta pe —jei.

³⁶ Jayave ueni penti sambiai, jare oñono jae reta ipite pe. Jayave uicuáva sambiai, jare jei chupe reta:

³⁷ —Ime yave quía uyapo icavi vae cuá nunga sambiai pe cheree pe vae, cheve co uyapo icavi vae. Jare jocua cheve uyapo icavi vae, uyapo vi icavi vae chembou vae pe —jei.

Oyovaicho'ā yande ndive vae yanemborí co

(Mt 10.42; Lc 9.49-50)

³⁸ Jayave Juan jei Jesús pe:

—Oporamboe vae, nduecha penti cuimbae nderee pe umbisiri aña reta oya jese vae reta güii, jare ndoe chupe agüiye ma uyapo vaerā. Echa'ā jae ñianeíru'ā co —jei.

³⁹ —Agüiye pere chupe jucuarāi —jei Jesús chupe —. Echa'ā cheree pe miacañi uyapo vae ndarau jupivoiño jei icavi mbae vae checoti —jei—. ⁴⁰ Echa'ā oyovaicho'ā yande ndive vae yanemborí co —jei—. ⁴¹ Aramoi quía umeeta peve penti vaso i cheree pe vae. Jucuarāi uyapo yave cheré perovia ramo, añete che jae peve, ambijecovita co chupe —jei—.

Mbaeyoa uyapoca vae

(Mt 18.6-9; Lc 17.1-2)

⁴² Ime cheré güiroyia vae reta. Ime yave quía penti cuá nunga pe mbaeyoa uyapoca vae, icavita tēi co ūru vae reta uñapiti vaerā iyayu re penti itá tuicha vae umbaesó piye vae, jare omombo vaerā i guasu pe —jei chupe reta—. ⁴³ Ndepo jovaicho uyapoca yave mbaeyoa ndeve, iyasia ndiyugüi. Icavi co tecove opa mbae vae nenoí vaerā ndepo jovaicho mbae reve, tata guasu opa mbae vae pe mocui ndepo reve ndeo vaerā tēi güii —jei—. ⁴⁴ Echa'ā tata guasu pe taso ndarau umano, jare tata ndarau ove —jei—. ⁴⁵ Jae ramíño vi ndepi jovaicho uyapoca yave mbaeyoa ndeve, iyasia ndiyugüi. Icavi co tecove opa mbae vae nenoí vaerā ndepi jovaicho mbae reve, tata guasu opa mbae vae pe mocui ndepi reve Tumpa nemondo vaerā tēi güii —jei—. ⁴⁶ Tata guasu pe taso ndarau umano, jare tata ndarau ove —jei—. ⁴⁷ Jae ramíño vi nderesa jovaicho uyapoca yave mbaeyoa ndeve, eequi ndiyugüi. Icavi co ndico vaerā Tumpa iporoyocuia pe nderesa jovaicho mbae reve, tata guasu pe mocui nderesa reve Tumpa nemondo vaerā tēi güii —jei—. ⁴⁸ Tata guasu pe taso ndarau umano, jare tata ndarau ove —jei— ye chupe reta—.

⁴⁹ Echa'ā tata uñeñonocata opaete re, yuquí uñeñonoca tembiú pe rami. Yuquí uñeñonocata vi opaete maemimba Tumpa pe uyeyuva vae re —jei—. ⁵⁰ Yuquí icavi co yau vaerā. Êrei jembochi'ā ma yave, quiráita ra jembochi' ye? —jei—. Piyapo yuquí uyapo rami, jare pico cavi pâve —jei chupe reta.

10

Umenda vae uyemombo vae reta

(Mt 19.1-10; Lc 16.18)

¹ Jayave Jesús oo joco güii Judea pe Jordán jovaicho pe. Joco pe jeta uyembati ye jae oī vae pe. Jayave Jesús omboe reta, jecōño mai uyapo rami.

² Jayave fariseo reta yugüeru Jesús oī vae pe. Jae reta uipota tēi uyavica chupe. Jáeramo upirandu reta chupe:

—¿Jupi pa cuimbae omombo vaerā jembireco?

³ —¿Mbae pa peocui Moisés? —jei Jesús chupe reta.

⁴ —Moisés umaeño cuimbae re uicuatía vaerā tupapire jembireco omombo vaerā —jei reta chupe.

⁵ —Moisés uicuatía cua mboroyocu pepiatanta ramo —jei Jesús—. ⁶ Êrei Tumpa uyapo ramo yave, uyapo cuimbae jare cuña —jei—. ⁷ Jáeramo cuimbae usirita tu jare ichi güii, jare oota ico vaerā jembireco ndive —jei—. ⁸ Jare mocui vae uyeyapota penti ramíño. Jáeramo mbaeti ma mocui rami. Yugüireco penti ramíño —jei—. ⁹ Jáeramo agüiye quía tumbisirú Tumpa umiíru vae reta —jei chupe reta.

¹⁰ Jare o pe ñugüinói yave, jemimboe reta upirandu ye Jesús pe cua re. ¹¹ Jayave Jesús jei chupe reta:

—Cuimbae omombo jembireco jare umenda ūru cuña ndive yave, uyuvanga menda re jembireco omombo vae coti. ¹² Jare cuña usiri ime güü jare umenda ūru cuimbae ndive yave, uyuvanga vi menda re —jei.

Jesús uyerure Tumpa pe sambiai reta re

(Mt 19.13-15; Lc 18.15-17)

¹³ Jare amocata vae güeru Jesús oī vae pe sambiai reta, Jesús oñono vaerā ipo jese reta. Ërei jemimboe reta uñeenigata güeru vae reta pe. ¹⁴ Jesús cua uecha yave, pochí jemimboe reta pe, jare jei chupe reta:

—Pemaëño sambiai reta re yugüeru vaerā checoti. Agüiye piyopia. Echa'ā cua nunga uyeyocui Tumpa pe iporoyocuia pe —jei—. ¹⁵ Añete che jae peve, pipota'ā yave Tumpa pe piyeyocui vaerā penti sambiai uipota rami, ndarau pico Tumpa iporoyocuia pe —jei.

¹⁶ Jayave Jesús uicuāva sambiai reta, jare oñono ipo jese reta, jare uyerure Tumpa pe jese reta.

Cuimbae icocatu vae

(Mt 19.16-30; Lc 18.18-30)

¹⁷ Jare Jesús joco güü oo yave, penti cuimbae osi ou icoti. Uyeatica Jesús jovai.

—Oporomboe vae, nde ndepiácavi co —jei Jesús pe—. ¿Mbae pa ayapota anoi vaerā tecove opa mbae vae? —jei.

¹⁸ —¿Maera pa ndere cheve chepiacavi vae co? —jei Jesús chupe—. Mbaeti quía ipiácavi, jaeño co Tumpa —jei—. ¹⁹ Nde ndicuua co mboroyocuia reta: ‘Agüiye iyuvanga menda re. Agüiye epuruyuca. Agüiye nemonda. Agüiye ndapu ūru vae re. Agüiye epurumbítaví. Ipiú nderu jare ndesi’ —jei chupe.

²⁰ —Oporomboe vae, ayavi'ā penti ave cua mboroyocuia reta chemichi güive —jei cuimbae chupe.

²¹ Jesús umae jese uau reve.

—Ime mbae uata ndiyapo vaerā —jei chupe—. Ecua emee opaete mbaembae nenoí vae corepoti re, jare emee ndecorepoti iparavete vae reta pe, jare ndicocatuta ara pe. Jayave evoí ndecurusu, jare eyu cherupié —jei.

²² Ërei cua uyandu yave, cuimbae oo ipiatiti reve. Echa'ā jeta mbaembae güïnoi.

²³ Jayave Jesús umae iyípi rupi, jare jei jemimboe reta pe:

—Yavai ete co icocatu vae reta uique vaerā Tumpa iporoyocuia pe.

²⁴ Jemimboe reta ipiacañi Jesús jei vae re. Ërei Jesús jei ye:

—Cheriví reta, yavai ete co icocatu vae reta uique vaerā Tumpa iporoyocuia pe. Echa'ā jei tēi ipia pe: ‘Icavita co cheve. Echa'ā jeta mbaembae anoi’ —jei, jei Jesús—. ²⁵ Yavai ete icocatu vae uique vaerā Tumpa iporoyocuia pe, maemimba camello jee vae yuu jesacua rupi uasa vaerā güü —jei.

²⁶ Jayave jae reta ipiacañi ete, jare upirandu uyupe:

—Jucuarái yave, ¿quía pa ipuere uyembiasaca?

²⁷ Jesús umae jese reta jare jei:

—Ívi pegua reta ipuere'ā uyembiasa. Ërei Tumpa ipuere umbiasa reta. Echa'ā Tumpa ipuere uyapo opaete mbaembae —jei chupe reta.

²⁸ Jayave Pedro jei Jesús pe:

—Mase, ore opaete mbaembae ndueya, ndoyu vaerā nderupié.

²⁹ —Añete che jae peve —jei Jesús—, ime yave quía ueya jenta, ani tiquei reta, ani tivi reta, ani jindi reta, ani tu, ani ichí, ani jembireco, ani isambiai reta, ani iivi reta chereco pegua jare Tumpa iñee icavi vae jeco pegua vae, ³⁰ cien rupi jecoviata co chupe ívi pe ico rambueve. Jecoviata jenta reta, tiquei reta, tivi reta, jindi reta, ichí reta, isambiai reta jare iivi reta —jei—. Ërei ūru vae reta uyapota icavi mbae vae chupe. Ërei taicue rupi Tumpa umeeta chupe tecove opa mbae vae —jei—. ³¹ Ërei Tumpa umbitaícueta uyembutuicha vae reta, jare umitenondeta uñemimichi vae reta —jei chupe reta.

Jesús umimbue ye umanota co

(Mt 20.17-19; Lc 18.31-34)

³² Jesúsjare jae ndive ñugüïnoi vae reta yugüíraa tape Jerusalén coti oo vae rupi, jare Jesús tenonde oo. Jare jaicue rupi yugüíraa vae reta ipiacañi jare uquiyé. Jayave Jesús ueni ye jocua doce jemimboe reta ūru reta ipite güü, jare umbipi umimbue chupe reta mbae uyeyapota oī chupe vae.

³³ —Mase, yaa co ñaí Jerusalén pe —jei chupe reta—. Jare che cuimbaerá ayeyapo vae penti vae chemeeta sacerdote reta itenondegua reta jare mboroyocuia re oporomboe vae reta pe. Jae reta jeita amano vaerā, jare chemeeta judío mbae vae reta pe —jei—. ³⁴ Jae reta cheyoyaita, chenupata chicote pe, undivita cheré, jare cheyucata. Ërei mbapi ara rupi aicove yeta ayu umanocue vae reta ipite güü —jei chupe reta.

Jacobo jare Juan uyerure vae

(Mt 20.20-28)

³⁵ Cua jaicue rupi Zebedeo tai reta Jacobo jare Juan jee vae yugüeru Jesús coti jare jei chupe:

—Oporomboe vae, nduipota ndiyapo vaerā oreve nduyerureta ndeve jese vae.

³⁶ —¿Mbae pa pipota ayapo vaerā peve? —jei Jesús chupe reta.

³⁷ —Ndiyembantuichaca yave, emaeño oreré nduguapi vaerā ndeyipi pe, penti ndeacata coti jare ūru ndeaso coti —jei reta chupe.

³⁸ —Picuaal'ā mbae re piyerure vae —jei Jesús—. ¿Pepuereta pa piporara che aiporarata vae rami? —Pepuereta pa piyembibautizaca che ayembibautizacata vae rami? —jei.

³⁹ —Orepuereta co —jei reta.

—Añete pe reta piporarata che aiporarata vae rami, jare pe reta piyembibautizacata che ayembibautizacata vae rami —jei Jesús—. ⁴⁰ Êrei chepuere'ā jae peve peguapi vaerā cheyipi pe, penti cheacata coti jare ūru cheaso coti. Echa'ā Tumpa umicuatiro ma joco pe uguapita vae reta peguarā —jei reta.

⁴¹ Jare ūru diez Jesús jemimboe reta cua uyandu yave, pochi reta Jacobo jare Juan pe. ⁴² Jayave Jesús ueni reta.

—Picuaa cavi co cua —jei chupe reta—. Mburuvicha ivi pegua reta oporoyocui, jare mbaepuere güüinoi vae reta jei ūru reta pe mbae uyapo vaerā —jei—. ⁴³ Êrei pe reta agüiye piyapo jucuarai —jei—. Ime yave penti pepite pe oī vae uipota mbaepuere güüinoi vae, tuyeyocui ūru reta pe. ⁴⁴ Jare ime yave penti pepite pe oī vae uipota tenondeguarā ico vae, tuyeyocui ūru reta pe —jei—. ⁴⁵ Echa'ā che cuimbaerā ayeyapo vae ayu ayeyocui vaerā ūru vae reta pe. Ayu'ā ūru vae reta uyeyocui cheve vaerā. Ayu amano vaerā, jeta vae aepi vaerā —jei chupe reta.

Bartimeo jesa mbae vae ucuera

(Mt 20.29-34; Lc 18.35-43)

⁴⁶ Jayave yugüiraa uvāe tenta guasu Jericó pe. Jare Jesús oo ye Jericó güü jemimboe reta jare jeta vae reta ndive. Jare Timeo tai Bartimeo jee vae uguapi uyerure oī mbae re tape jembeí pe. Bartimeo co jae jesa mbae vae. ⁴⁷ Jare uicuaa Jesús Nazaret pegua uasa oo oī yave, iñeeäta reve jei:

—Cheparareco, Jesús. Nde co jae David iñemoñaia reta pegua —jei.

⁴⁸ Jeta joco pe ñugüinoi vae reta uñengata chupe. Uipota tēi umiqui. Êrei jae jeiete iñeeäta reve jei:

—David iñemoñaia reta pegua, cheparareco.

⁴⁹ Jayave Jesús uyemboi.

—Peeni —jei.

Jayave ueni reta jesa mbae vae.

—Iñemiatangatū. Epúa. Nereni ma oī —jei reta chupe.

⁵⁰ Jayave jesa mbae vae ueya iyasoya, jare upúa voi oo Jesús coti. ⁵¹ Jesús upírandu chupe:

—¿Mbae pa ndipota ayapo vaerā ndeve?

—Tamae, oporomboe vae —jei jesa mbae vae.

⁵² Jayave Jesús jei chupe:

—Ndepuere ndeo. Ndecuera ma, nderovia cheré ramo —jei.

Jupivoiño ipuere umae, jare oo Jesús jaicue tape rupi.

11

Jesús uique Jerusalén pe

(Mt 21.1-11; Lc 19.28-40; Jn 12.12-19)

¹ Jare coíno ma Jerusalén güü ñugüinoi yave, yugüiraa uvāe tenta guasu-raí reta Betfagé jare Betania iyipi pe, ivitu guasu Olivos jovai. Jayave Jesús oyocui mocui jemimboe reta:

² —Pecua pea tenta guasu-raí yanderovai oī vae pe —jei chupe reta—. Peo pevāe rupive, pevāeta penti mburica tairusu vae uñenapíti oī. Ndei ave etei quía opo jese. Piyora jare peru —jei—. ³ Jare ime yave quía jei peve vae: ‘¿Maera pa cua piyapo?’ pere chupe: ‘YandeYa uipota uiporu, êrei imambae güeruruca yeta cua pe’ —pere, jei chupe reta.

⁴ Jayave Jesús jemimboe reta yugüiraa, jare uvāe mburica tairusu vae. Uñenapíti oī tape pe penti onque jovai. Jayave jae reta oyora. ⁵ Jare amocue joco pe ñugüinoi vae jei Jesús jemimboe reta pe:

—¿Maera pa piyora peñi mburica?

⁶ Jesús jemimboe reta jei chupe reta Jesús oyocui reta vae. Jayave joco pe ñugüinoi vae reta umaeño güüraa vaerā. ⁷ Jayave güeru mburica tairusu vae Jesús oī vae pe. Jayave Jesús jemimboe reta oñono iyasoya mburica icupe re, jare Jesús opo jese. ⁸ Jare jeta vae uipiso iyasoya tape rupi mburica jenonde, jare ūru vae reta uyasía ñanaroquí jare oñono tape rupi. ⁹ Jare Jesús jenonde yugüiraa vae reta jare jaicue rupi yugüiraa vae reta iñeeäta reve jei:

—¡lcavi co! Tuyembiañoraca yandeYa jee re ou vae.¹⁰ Oporoyocuita yandetenondegua David jee vae oporoyocui rami. Tuyembiañoraca. Tei reta ‘icavi co’ ara pe —jei reta.

¹¹ Jare Jesús oo uvāe Jerusalén pe, jare uique Tumpa jo pe. Joco pe umae opaete mbaembae re. Jare caaru ma yave, ou ye Betania pe jocua doce jemimboe reta ndive.

*Iva ía mbae vae
(Mt 21.18-19)*

¹² Piareve pe yugüiraa ye Betania güi, jare Jesús iyembai.¹³ Jare mbiri güi uecha penti iwa joqui reve, jare oo umae jese ime ra ía. Ërei uecha ia'ã, jaeño joqui. Echa'ã ndei uvāe iwa fa vaerā.¹⁴ Jayave Jesús jei iwa pe:

—Ndarau etei ma ndeía.

Jare jemimboe reta uyandu.

*Jesús Tumpa jo pe uyapo vae
(Mt 21.12-17; Lc 19.45-48; Jn 2.13-22)*

¹⁵ Jare yugüiraa uvāe Jerusalén pe. Jayave Jesús uique Tumpa jo pe, jare umbipi omoë joco güi umaeemee vae reta jare mbae ogua vae reta, jare umbiyapara corepoti uipecica vae reta imesa reta jare picasu reta umee vae reta jenda reta.¹⁶ Jare umaeño'ã quía re jivita reve uguata vaerā Tumpa jo rupi.¹⁷ Jare jei joco pe ñugüinói vae reta pe:

—Tumpa iñee pe uyeucatía oí cuarái: ‘Chero uyembijeeta o opaete iwi pegua reta ipuere uyerure Tumpa pe pipe vaerā.’ Jucuarái uyeucatía oí. Ërei pe reta piyapo ma imonda vae reta iñemia rami —jei chupe reta.

¹⁸ Jayave sacerdote reta itenondegua reta jare mboroyocui re oporomboe vae reta cua uyandu yave, ueca quirái ipuere uyucaca vaerā Jesús. Echa'ã jae reta uquiyé chugüi, opaete vae ipiacaní iporomboe re ramo.¹⁹ Jare pítuipi yave, Jesús ou ye Jerusalén güi.

*Iva yípi ma
(Mt 21.20-22)*

²⁰ Piareve pe neimbove yave uasa yugüiraa ye yave, uecha iwa yípi ma iyípi güive.²¹ Jayave Pedro imandúa jese, jare jei Jesús pe:

—¡Emae, oporomboe vae! Iva pe ndere iata'ã ma vae yípi ma —jei.

²² Jesús jei jemimboe reta pe:

—Perovia Tumpa.²³ Añete che jae peve, yae yave cua iñitu guasu pe: ‘Ecua iyemombo i guasu pe’, jare yae'ã yave yandepia pe: ‘Ndarau ndipo uyeyapo’, Ërei yarovia yave yae vae uyeyapota, uyeyapota co yandeve —jei chupe reta—.²⁴ Jáeramo che jae peve, ime yave mbae pipota vae, piyerure Tumpa pe jese. Jare perovia yave Tumpa umeeta co peve, penoita co —jei—.²⁵ Jare piyerure pei Tumpa pe yave, pembiasa íru icavi mbae vae uyapo pecoti vae pe, peRu ara pe oí vae umbiásasa vaerā vi peve pembaeyoa reta.²⁶ Ërei pembiasa'ã yave íru icavi mbae vae uyapo pecoti vae pe, peRu ara pe oí vae ndarau vi umbiásasa peve pembaeyoa reta —jei.

*Jesús imbaepuere
(Mt 21.23-27; Lc 20.1-8)*

²⁷ Jare yugüiraa uvāe ye Jerusalén pe. Jare Jesús uguata rambueve Tumpa jo rupi, yugüeru jae oí vae pe sacerdote reta itenondegua reta, mboroyocui re oporomboe vae reta, jare tenta guasu pegua reta itenondegua reta.²⁸ Jae reta upírandu chupe:

—¿Mbae nunga mbaepuere pa nenoí cua mbaembae ndiyapo vaerā? ¿Quía pa umee ndeve mbaepuere cua ndiyapo vaerā? —jei reta.

²⁹ Jayave Jesús jei chupe reta:

—Che vi tapirandu peve mbae re. Pemimbeu yave cheve, che vi amimbeuta peve mbae nunga mbaepuere anoi cua mbaembae ayapo vaerā —jei—.³⁰ ¿Quía pa ombou Juan upurumbibautiza vaerā? ¿Tumpa pa ombou? aní ¿iwi pegua reta pa ombou? Pemimbeu cheve —jei chupe reta.

³¹ Jayave jae reta jei uyupe:

—Yae yave: ‘Tumpa co ombou’, jae jeita yandeve: ‘Jucuarái yave, ¿maera pa perovia'ã?’³² Aní ¿yaeta pa: ‘Iwi pegua reta co ombou?’ —jei reta.

Ërei jae reta uquiyé tenta guasu pegua reta güi. Echa'ã opaete vae güirovia Juan co jae añetete penti Tumpa iñee umimbeu vae.³³ Jáeramo jei reta Jesús pe:

—Nduicua'ã.

—Che vi ndarau amimbeu peve mbae nunga mbaepuere anoi cua mbaembae ayapo vaerā —jei Jesús chupe reta.

12

Co iporúa icavi mbae vae reta

(Mt 21.33-46; Lc 20.9-19)

¹Jayave Jesús umbípi imíari chupe reta umijaanga reve.

—Ico penti cuimbae icorá uiquese vae, jare oñoti pipe jeta uva —jei—. Jayave oyoo ivi, jare uyapo uva uitami pipe vaerã. Uyapo vi penti chapapa, umae vaerã ivate güi opaete co re. Jayave uiporuca ico íru vae reta pe, jae reta uyandareco vaerã jese. Jayave co iya oo mbiri ambie ivi pe —jei—. ²Jare uva yagüiye ma yave, co iya ombou penti jembiocui co iporúa reta pe, jae reta umbiyao vaerã tẽi uva chupe reta, iya güinoi vaerã imbaerã. ³Êrei jae reta uipisi uinupa co iya jembiocui, jare omondo ye. Umee'ã etei chupe güiura vaerã —jei—. ⁴Jayave co iya ombou ye tẽi íru jembiocui. Êrei co iporúa reta uyapi ita pe umbipere inäca rupi, jare uyapo reta icavi mbae vae chupe. Jayave omondo ye —jei—. ⁵Jayave co iya ombou ye tẽi íru jembiocui. Êrei co iporúa reta uyuca cua. Jare jucuarãñoi uyapo reta jeta íru co iya jembiocui reta pe. Jae reta uinupa amocue vae, jare uyuca íru vae reta —jei Jesús—. ⁶Co iya güinoi jaeño penti tai uau ete vae. Taicue ete ombou cua tai co iporúa reta pe. Co iya jei tẽi: ‘Aramoi jae reta uipiuña cherai’ —jei, jei chupe reta—. ⁷Êrei co iporúa reta jei uyupe: ‘Cua co jae iyarã vae. Yayuca, jare yande yaicota co iyarã’ —jei reta, jei—. ⁸Jayave jae reta uipisi co iya tai uyuca omombo co güi —jei—. ⁹Mbae ra uyapota co iya? —jei—. Outa, opa uyuca vaerã jocua co iporúa reta, jare uiporucata ico ambie vae reta pe —jei Jesús—. ¹⁰¿Peminguetáã pa cua Tumpa iñee pe uyequatía oí vae?

‘Ita tenta iyapoa reta omombo vae uyeyapo ma ita tenondegua vae.

¹¹YandeYa uyapo cua.

Yaecha ma, jare yandepiacañi jese.’

Jucuarãi uyequatía oí —jei chupe reta.

¹²Jayave jocua uyapisaca jese vae reta uipota tẽi uipisi Jesús. Echa'ã uicuua catu cua umijaanga reve jei vae uicuaca quirãi jae reta teco güinoi. Êrei uquiye tenta guasu pegua reta güi. Jáeramo ueyaño, jare yugüiaraa.

¿Jupi pa yambiepi vaerã César pe?

(Mt 22.15-22; Lc 20.20-26)

¹³Jayave jae reta ombou amocue fariseo reta jare herodiano reta, uyavica vaerã tẽi chupe jae uyemingueta yave. ¹⁴Jae reta yugüera uvâe yave, jei Jesús pe:

—Opromboe vae, nduicuua nde ndere vae añete co. Nde nemaе oyovaque opaete pâve re. Nembutuicha'ã penti ave íru vae güi. Nde ndepromboe cavi quirãi Tumpa uipota yaico vaerã vae re —jei reta—. César yandecui yambiepi vaerã chupe corepoti pe. ¿Jupi pa yambiepi vaerã chupe? ani ¿Jupi'ã pa? ¿Yambiepi pa chupe? ani ¿Yambiepi'ã pa chupe? —jei reta Jesús pe.

¹⁵Êrei Jesús uicuua jae reta uipota tẽi co umbitavi, jare jei chupe reta:

—¿Maera pa pipota piyavica cheve? Peru cheve penti corepoti taecha —jei.

¹⁶Jae reta güeru chupe. Jayave jae upirandu chupe reta:

—¿Quía jova fã pa cua? ¿Quía jee pa cua uyequatía oí vae? —jei.

—Cua César imbae co —jei reta.

¹⁷—Pemee César pe César pegua, jare pemee Tumpa pe Tumpa pegua —jei Jesús chupe reta.

Jare jae reta ipiacañi jese.

¿Icove yeta pa umanocue vae reta?

(Mt 22.23-33; Lc 20.27-40)

¹⁸Jayave yugüera vi Jesús oí vae pe amocue saduceo reta. Opaete saduceo reta jei umanocue vae reta icove ye'ã co. Saduceo yugüera vae reta jei Jesús pe:

—Opromboe vae, Moisés uicuatía ueya yandeve cuarãi: ‘Penti tiiquei vae humano yave, jembirecocue mbaeti imembí chupe yave, cuimbae amiri tivi tumenda jocua cuña ndive. Jayave cuña imembí yave, cuimbae tumbijee sambiai tiiquei amiri jee pe.’ Jucuarãi uicuatía Moisés —jei reta chupe—. ²⁰Ico penti cuimbae seis tivi reta güinoi vae. Cua cuimbae umenda, jare humano umimembí mbae reve —jei reta—. ²¹Cuimbae amiri jaicue rupigua umenda jembirecocue ndive, êrei humano vi umimembí mbae reve. Jae ramioño vi uyeyapo jaicue rupigua ye pe. ²²Opaete siete reve umenda jocua cuña ndive, jare opaete siete reve humano umimembí mbae reve. Taicue rupi cuña humano vi —jei reta—. ²³Jayave umanocue vae reta icove ye yave, ¿quía nunga vae jembirecorã pa icota jocua cuña? Echa'ã opaete siete reve umenda jae ndive —jei reta.

²⁴—Pe reta piyavi co —jei Jesús chupe reta—. Echa'ã picuua'ã Tumpa iñee uyequatía oí vae jare Tumpa imbaepuere —jei—. ²⁵Echa'ã umanocue vae reta icove ye yave, cuimbae reta jare cuña reta ndarau umenda. Yugüiirecota ángel ara pe nyugüinoi vae reta yugüireco ramí —jei—. ²⁶Tamimbeu peve umanocue vae reta regua. Icove yeta co. ¿Peminguetáã pa Moisés uicuatía vae? —jei—. Uyequatía oí

jocua yai regua, jare quirāi Tumpa jei Moisés pe jocua yai jendī vae ipite güi: 'Che co Abraham, Isaac jare Jacob iTumpa' —jei, jei chupe reta—.²⁷ Tumpa mbaeti co umanocue vae reta iTumpa. Jae co tecove güinoi vae reta iTumpa. Tuicha co piyavi —jei.

*Mboroyocui tenondegua vae
(Mt 22.34-40)*

28 Ou vi Jesús oī vae pe penti mboroyocui re oporomboe vae. Uyandu uyeaca reta, jare uicuua Jesús umimbeu cavi co chupe reta. Jayave jae upírandu Jesús pe:

—¿Mbae nunga mboroyocui pa co jae tenondegua vae? —jei.

29 Jesús jei chupe:

—Mboroyocui tenondegua vae co cua: 'Israel pegua, iyapisaca. YandeYa Tumpa, jaeño co Tumpa.

30 Eau ndeYa Tumpa opaete ndepia reve, opaete nderecove reve, opaete ndepiayemingueta reve jare opaete nepirāta reve.' Cua co jae mboroyocui tenondegua vae —jei chupe—.³¹ Jare jaicue rupigua co cua: 'Eau nderapicha nde ndiyerau rami.' Mbaeti ūru mboroyocui tenondegua cua reta güi vae —jei.

32 Jayave mboroyocui re oporomboe vae jei Jesús pe:

—Añete co, oporomboe vae. Icavi ndere Tumpa pentiño co jare mbaeti ye ūru. ³³ Jare yaau yave Tumpa opaete yandepia reve, opaete yanderecove reve, opaete yandepiayemingueta reve jare opaete ñanepirāta reve, jare yaau yave yanderapicha yande yayerau rami, jocua icavi opaete maemimbā Tumpa peguarā ñamee vae reta güi —jei.

34 Jare Jesús uyandu yave jae jei jupi cavi vae, jei chupe:

—Jeta'ā uata ndiyeyocui vaerā Tumpa pe iporoyocua pe.

Jare mbaeti ma quía uipota upírandu chupe mbae re.

¿Quíā iñemoñaa reta pegua pa co Cristo?

(Mt 22.41-46; Lc 20.41-44)

35 Jare Jesús oporomboe oī Tumpa jo pe.

—¿Maera pa jei mboroyocui re oporomboe vae reta Cristo co jae David iñemoñaa reta pegua? —jei—.

36 Echa'ā David etei jei Espíritu Santo rupi cuarāi:

'YandeYa jei cheYa pe:

Eguapí chéyipí pe cheacata cotí,

ñderovaicho reta opa amiamiri regua.'

Jucuarāi jei David aracae —jei Jesús—.³⁷ ¿Quirāi pa ipuere ico David iñemoñaa reta peguarā? Echa'ā David etei jei chupe: 'CheYa' —jei Jesús chupe reta.

Jare jeta vae uyapisaca ñugüinoi Jesús re uyerovia reve.

Jesús umbijeco mboroyocui re oporomboe vae reta

(Mt 23.1-36; Lc 11.37-54; 20.45-47)

38 Jare Jesús oporomboe yave, jei chupe reta:

—Piñemoa ngatu mboroyocui re oporomboe vae reta güi —jei—. Jae reta jecuaeño uipota uguata jemimonde pucu vae reve, jare jecuaeño uipota ūru vae reta pe uyembisaludaca vaerā calle reta rupi —jei—.³⁹ Yugüiraa yave tupao pe jare parea pe, jecuaeño uipota uguapi tenda tenondegua vae reta pe —jei—.⁴⁰ Jare upíro reta cuña ime umano vae reta güi opaete imbaembae, jare pucu uyerure Tumpa pe upurumbitavi vaerā —jei—. Jae reta uiporara eteta co —jei chupe reta.

Cuña ime umano vae umee corepoti Tumpa pe

(Lc 21.1-4)

41 Penti ara Jesús uguapi oī corepoti jíru jovai Tumpa jo pe, jare uecha quirāi jeta yugüeru vae reta oñono corepoti pipe. Icocatu vae reta oñono jeta corepoti.⁴² Jare ou vi penti cuña ime umano vae iparavete vae. Jae oñono mocui riare. Jocua jeta'ā co jepi.⁴³ Jare Jesús ueni jemimboe reta jare jei chupe reta:

—Añete che jae peve, cua cuña ime umano vae iparavete vae uyapo jeta opaete ūru oñono vae reta güi —jei—.⁴⁴ Echa'ā opaete ūru reta güeru oñono jeta güinoi vae güi. Êrei cua cuña, yepe tēi iparavete, oñono opaete güinoi vae. Jocua co jembú jepirā tēi vae —jei chupe reta.

² —¿Nemae pa neī cua o tuicha vae reta re? —jei Jesús chupe—. Ndarau upita penti ave ita īru ita iárambo. Opaete uyeitita co —jei.

Mbaesusere reta uyeyapota vae

(Mt 24.3-28; Lc 21.7-24; 17.22-24)

³ Jare Jesús uguapi oī rambueve īvitu guasu Olivos re Tumpa jo jovai, Pedro, Jacobo, Juan jare Andrés upirandu chupe, jae retaño jae ndive ñugüinói yave:

⁴ —Emimbeu oreve, ¿quirái yave pa cua uyeyapota? Jare opaete cua uyeyapota ma yave, ¿quiráita pa nduicuua? —jei reta chupe.

⁵ Jayave Jesús jei chupe reta:

—Piñemoa ngatu agüiye vaerā petavi. ⁶ Echa'ā yugüeruta jeta cheree pe uyembijeeta vae reta. Jae reta jeita: ‘Che co jae Crísto.’ Jare umbitavita jeta vae reta —jei—. ⁷ Imeta co ñerāro reta coiño pegüi. Imeta vi ñerāro reta mbiri pegüi. Piyandu yave cua reta regua, agüiye pequiyé. Cua susere reta uyeyapoñtai co. Ërei cua susere reta ndei ave co opa vaerā —jei Jesús—. ⁸ Penti īvi pegua reta uñerārota ambie īvi pegua reta ndive, jare mburuvicha reta uñerārota īru mburuvicha reta ndive. Jare īvi tanta ucātata jeta que rupi. Jare imeta caruai reta jare tecorai reta. Ërei cua susere reta uyembipi ramo co oī —jei chupe reta—.

⁹ Piñemoa ngatu. Echa'ā īru vae reta pereraata mburuvicha reta ñugüinói vae pe, uñeapo vaerā peré. Jare penupata judío reta itupao reta pe. Jare pereraata mburuvicha guasu reta jovai chereco pegua, chemimbeu vaerā chupe reta —jei—. ¹⁰ Jare Tumpa iñee icavi vae jerácuata co rani opaete īvi pegua reta pe —jei—. ¹¹ Jare īru vae reta pereraa yave pemee vaerā mburuvichá reta pe, agüiye piyemipia'a mbae pereta vae re —jei—. Pemee yave, Tumpa uicuacata peve mbae pere vaerā. Jocuanó pere. Echa'ā Espíritu Santo pemborita piyeminguela vaerā, pe retaiñol'a co piyeminguetata —jei—. ¹² Tiquei umeeta tivi, uycacávaerā. Jare tu umeeta isambiai. Jare sambiai reta oyovaichota tu jare ichí ndive, jare uycacata reta. ¹³ Jare piñemitaréicata opaete vae pe chereco pegua. Ërei jōsata oo uvāe iyapi pe vae uyembiasacata co —jei chupe reta—.

¹⁴ Jare peechara icavi mbae vae opaete urucumegua vae uyemboi oī oīta'ā tēi vae pe. Tumpa iñee aracae umimbae vae Daniel jei uyeccuata co. (Umingueta vae tuicuua) —jei—. Jayave Judea pe ñugüinói vae reta tosi īvitu guasu cotí —jei—. ¹⁵ Jare o cupe re oī vae ugüeyi yave, agüiye tuique jo pe güüraa vaerā imbaembæ. ¹⁶ Jare ico pe oī vae agüiye tou ye jenta pe güüraa vaerā iyasoya —jei—. ¹⁷ Jare ipurúa vae reta jare umicambu vae reta uiporarata jocua ara reta pe —jei Jesús chupe reta—. ¹⁸ Piyerure Tumpa pe cuarāi: ‘Agüiye emaeño tuyeyapo roi ma yave.’ ¹⁹ Echa'ā jocua ara reta pe īvi pegua reta uiporara eteta. Jucuarāi'a uiporara reta Tumpa īvi uyapo güive, jare ndarau ye jucuarāi uiporara reta —jei—. ²⁰ Jare yandeYa uipota'ā yave opa vaerā jocua ara reta, mbaetita tēi quía ipuere ico. Ërei Tumpa uiparavo vae reta jeco pegua opata jocua ara reta —jei chupe reta—. ²¹ Aramoí jocua ara reta pe quía jeita peve: ‘Mase, co oī Crísto’, ani jeita: ‘Mase, pee oī Crísto.’ Jucuarāi jei yave, agüiye perovia —jei—. ²² Amocue upurumbítavi vae reta jeita: ‘Che co jae Crísto’, jare īru upurumbítavi vae reta jeita: ‘Che co jae penti Tumpa iñee umimbeu vae.’ Jare jae reta uyapota miacañi reta, umbitavi vaerā tēi Tumpa uiparavo vae reta —jei—. ²³ Piñemoa ngatu. Amimbeu ma peve opaete, ndei uyeyapo mbove —jei chupe reta—.

Cuimbaerā uyeyapo vae ou yeta

(Mt 24.29-44; Lc 21.25-36)

²⁴ Jayave opa uiporara reta jocua ara reta pe yave, guarasi uñemipítumimbita, jare yasi ndarau ma jembipe. ²⁵ Yositata reta oata ara güi, jare opaete ara re mbaepuere güinói vae reta ucātata —jei—.

²⁶ Jayave īvi pegua reta cherechata ayu amapítu reve. Che cuimbaerā ayeyapo vae anoita mbaepuere tuicha vae, jare ayembíadoracata opaete vae pe —jei—. ²⁷ Jayave amondota ángel reta güeru vaerā aiparavo vae reta opaete īvi rupi güi —jei—.

²⁸ Yandepuere yamijaanga iva. Piyemboe jese —jei—. Joqui yave, picuua uyaro ma co ama oqui vaerā —jei Jesús—. ²⁹ Jae ramíño vi pe reta peechara yave cua mbaembæ uyeyapo ñugüinói vae, picuuaata che coiño ma co aí —jei—. ³⁰ Añete che jae peve, cua īvi pe añave yugüireco vae reta ndarau opa umano ndei opaete cua mbaembæ uyeyapo mbove —jei chupe reta—. ³¹ Ara jare īvi opata, Ërei chiñee ndarau opa —jei—.

³² Ërei mbaeti quía uicuua mbae ara pe ani mbae ora pe yepe cua uyeyapota, jaeño cheRu. Ángel ara pe ñugüinói vae reta uicuua'ā. Che co jae Tumpa Tai. Ërei che ave aicuua'ā —jei—. ³³ Jecuaeño peáro, jare piyerure Tumpa pe. Echa'ā picuua'ā quirái yave ra uyeyapota —jei—. ³⁴ Yamijaanga penti cuimbæ oo ambie īvi pe vae. Oota ma jenta güi yave, umee mbaepuere jembiocui reta pe, jare oyocui penti penti uyapo vaerā iparavíqui, jare oyocui vi taraquéra jároa uáro cavi vaerā —jei—. ³⁵ Picuua'ā quirái yave ra tenta iya ou yeta uvāe. Aramoí outa uvāe pítu ave ma yave, ani piare catu yave, ani uru cuimbæ uñee

yave, ani neimbove yave —jei—. Jáeramo peáro peí,³⁶ agüiye vaerã, aramoíño ou uvãe yave, pepocou peque peí —jei—.³⁷ Jare cua jae peve vae jae vi opaete vae pe: Peáro peí —jei chupe reta.

14

Jovaicho reta uyemingueta uycacaca vaerã Jesús

(Mt 26.1-5; Lc 22.1-2; Jn 11.45-53)

¹ Mocui araño ma uata pascua uyapo reta vaerã. Jocua ara pe judío reta jou mbiyape ovu mbae vae. Jare sacerdote reta itenondeguia reta jare mboroyocui re oporomboe vae reta ueca ñugüínoi quirãi ipuere uipisi tavi rupi Jesús, uycacaca vaerã.² Érei jei reta:

—Agüiye yaipisi pascua ara rupi, agüiye vaerã tenta guasu pegua reta uyapo tecorai.

Cuña upiyere mbae ipiche cavi vae Jesús re

(Mt 26.6-13; Jn 12.1-8)

³ Jare Jesús ucaro oí rambueve Betania pe Simón ipire ocuse vae jenta pe, uique penti cuña. Jae güeru íru-raí ita alabastro jee vae pegua. Cua íru-raí tinee mbae ipiche cavi vae nardo jee vae pe. Cua nardo jepí etc. Cuña oyoca íru-raí, jare upiyere nardo Jesús iñáca re.⁴ Jayave amocue joco pe ñugüínoi vae pochi jare jei uyupe:

—¿Maera pa umicañítei?⁵ Umee yave corepoti re, güínoita tẽi trescientos ara mbaravíqui jepí pegua umee vaerã iparavete vae reta pe —jei reta.

Jayave iñera reta jese.

⁶ Érei Jesús jei chupe reta:

—Pemaeño jese. ¿Maera pa pemambeco? Icavi vae co uyapo cheve —jei—.⁷ Echa'á yugüirecoñotai co iparavete vae reta pe reta ndive, jare pipota yave, pepuereta pembori. Érei che ndarau aicoño pe reta ndive —jei—.⁸ Cua cuña uyapo ipuere vae. Chembípiche cavi ma, ndei añeñotica mbove —jei—.⁹ Añete che jae peve, opaete ívi rupi Tumpa iñee icavi vae jerácuata, cua uyapo vae vi jerácuata, íru vae reta imandúa vaerã jese —jei chupe reta.

Judas umeeta Jesús

(Mt 26.14-16; Lc 22.3-6)

¹⁰ Jayave jocua doce jemimboe reta güi penti Judas Iscariote jee vae oo sacerdote reta itenondeguia reta ñugüínoi vae pe, umee vaerã Jesús chupe reta.¹¹ Cua uicuña reta yave, uyerovia reta, jare jei Judas pe umeeta co chupe corepoti. Jayave Judas umbipi ueca quirãi ipuere umee vaerã Jesús chupe reta.

Jesús ucaro jemimboe reta ndive

(Mt 26.17-29; Lc 22.7-23; Jn 13.21-30; 1 Cor 11.23-26)

¹² Pascua ara pe judío reta uyuca ovecha. Jocua ara umbipi jou mbiyape ovu mbae vae. Jayave Jesús jemimboe reta jei chupe:

—¿Quiape pa ndipota nduyapicatu vaerã, tembíu pascua pegua ndeu vaerã?

¹³ Jayave Jesús oyocui mocui jemimboe reta:

—Pecua tenta guasu pe —jei chupe reta—. Peoväitita joco pe penti cuimbae i güüraa íru pe vae. Pecua jaicue —jei—.¹⁴ Jare uique yave tenta pe, pere tenta iya pe: ‘Oporomboe vae jei: ¿Quiape pa ime oí o, joco pe jau vaerã tembíu pascua pegua cheremimboe reta ndive’ —jei, pere chupe, jei Jesús—.¹⁵ Jayave tenta iya uechacata peve penti o tuicha vae jo ivate pe, opaete mbaembae yaiporuta vae reve. Joco pe piyapicatu yandeve —jei chupe reta.

¹⁶ Jare Jesús jemimboe reta yugüiraa uvãe yave tenta guasu pe, uvãe opaete Jesús jei chupe reta vae rami. Jare uyapo reta tembíu pascua pegua jou reta vaerã.

¹⁷ Jare pítu ma yave, Jesús oo jocua doce jemimboe reta ndive.¹⁸ Jare mesa pe uguapi ucaro ñugüínoi rambueve, Jesús jei chupe reta:

—Añete che jae peve, penti pepite pe oí vae chemeeta cherovaicho reta pe. Jae co penti ucaro oí che ndive vae —jei.

¹⁹ Jayave jae reta ipiatiti, jare upirandu Jesús pe penti penti rupi:

—Che pa co jae?

²⁰ —Pe reta co jae doce cheremimboe reta —jei Jesús chupe reta—. Penti pepite pe oí vae co jae. Mbiyape umâqui oí che ndive plato pe vae co jae —jei—.²¹ Che cuimbaerã ayeyapo vae aañotai amano vaerã, Tumpa iñee pe uyeucatía oí cheregua rami. Érei jocua cuimbae chemeeta vae uiporarata co. Icavi tẽi mona jocua cuimbae mbaeti ico yave —jei.

²² Jare jae reta ucaro ñugüínoi rambueve, Jesús uipisi mbiyape, jare umee yasurupai Tumpa pe. Jayave upisãa mbiyape jare umee chupe reta.

—Peu —jei chupe reta—. Cua co jae cherete —jei.

²³ Jayave Jesús uipisi vi penti copa, jare yasurupai umee ye yave Tumpa pe, umee jemimboe reta pe. Jare opareve jou copa güi. ²⁴ Jesús jei chupe reta:

—Cua co jae cherugüi. Cherugüi uyepiyereta, Tumpa jei piau ye vae uyeyapo vaerä, jare jeta vae reta uyembiasaca vaerä —jei Jesús—. ²⁵ Añete che jae peve, ndarau ma jau uva ticuecue, Tumpa iporoyocuia pe uva ticuecue ipiau vae jau regua —jei chupe reta.

Pedro uicuacuta Jesús

(Mt 26.30-35; Lc 22.31-34; Jn 13.36-38)

²⁶ Jare opa yave ucanta reta Tumpa pe, oë reta yugüíraa ívitu guasu Olivos coti. ²⁷ Jayave Jesús jei chupe reta:

—Opaete pe reta cheryata cua pítu. Echa'á Tumpa iñee pe uyecuatía oï cuarai: ‘Ayucata ovecha reta iyandarecoa, jare ovecha reta opata uñemial.’ Jucuarai uyecuatía oï —jei chupe reta—. ²⁸ Ërei aicove ye ayu yave umanocue vae reta ipite güi, aata perenonde Galilea pe —jei.

²⁹ Jayave Pedro jei Jesús pe:

—Yepe téri opaete íru reta tandereya, Ërei che ndarau ndueya.

³⁰ —Añete che jae ndeve —jei Jesús chupe—, cua pítu etei, ndei mocui vese uru cuimbae uñee mbove, mbapi vese ma checuacuta —jei.

³¹ Ërei Pedro jeiete jei:

—Yepe téri tamano nde ndive, Ërei ndaraui nducuacu.

Jare jucuarai vi jei opaete Jesús jemimboe reta.

Jesús uyerure Getsemaní pe

(Mt 26.36-46; Lc 22.39-46)

³² Jayave yugüíraa uvâe reta Getsemaní pe.

—Peguapi cua pe, che aa ayerure Tumpa pe rambueve —jei Jesús jemimboe reta pe.

³³ Jayave giúraa Pedro, Jacobo jare Juan, jare umbipi ipiatiti jare uiporara.

³⁴ —Tuicha chepiatiti, jare amano pota echo. Pepita cua pe, jare agüiye peque —jei jocua mbapi jemimboe reta pe.

³⁵ Jayave Jesús usiri catu chugüii reta, jare uyeatica ívi re. Uyerure Tumpa pe, Tumpa uipota yave, umbiassa vaerä chugüii jocua uyeyapota chupe vae.

³⁶ —CheRu, cheRu, opaete mbae ndepuere ndiyapo. Embiassa chegüi cua aiporarata vae. Ërei tuyeyapo cheve nde ndere vae. Agüiye tuyeyapo che jae vae —jei.

³⁷ Jayave Jesús ou jemimboe reta ñugüinói vae pe, jare uecha oque ñugüinói. Jayave jei Simón Pedro pe:

—Simón, ¿ndeque pa? ¿Ndepuere'á pa ndeque mbae neí penti ora yepe? —jei chupe.

³⁸ Jei vi jemimboe reta pe:

—Agüiye peque. Piyerure Tumpa pe, agüiye vaerä peyoa. Pepia pe peratangátu co, Ërei perete iyaqui co —jei.

³⁹ Jayave Jesús usiri ye uyerure Tumpa pe tenonde uyerure vae rami. ⁴⁰ Jayave ou ye jemimboe reta ñugüinói vae pe, jare uecha oque ye ñugüinói. Echa'á jae reta jopei ete ma. Jare uicuaal'á mbae jei vaerä Jesús pe. ⁴¹ Jayave Jesús usiri ye mbapia re, jare ou ye yave, jei chupe reta:

—Peque jare peputuuño ma. Jocuño ma. Ora uvâe ma. Che cuimbae ayeyapo vae penti vae chemeeta cuimbae jeco pochi vae reta pe —jei—. ⁴² Pepúa. Yaaño ma. Mase, chemeeta vae coiño ma ou —jei chupe reta.

Uipisi reta Jesus

(Mt 26.47-56; Lc 22.47-53; Jn 18.2-11)

⁴³ Jare uyemingueta oï rambueve, ou Judas - jae co jocua doce vae güi penti. Jeta vae yugüero jae ndive iquiserucu reve jare íivira reve reve. Sacerdote reta itenondegua reta, mboroyocu re oporomboe vae reta, jare tenta guasu pegua reta itenondegua reta omboi Jesús pe cua reta. ⁴⁴ Jare umeeta vae umimbeu ma íru reta pe mbae uyapota vae. Jei ma chupe reta:

—Jocua ayurupiteta vae co jae. Pipisi curi, jare peraa. Agüiye tosi —jei.

⁴⁵ Judas ou uvâe yave, ou voi Jesús oï vae pe.

—Oporomboe vae, oporomboe vae —jei chupe.

Jayave uyurupite. ⁴⁶ Jayave uipisi reta Jesús. ⁴⁷ Jare penti cuimbae joco pe oï vae uequi iquiserucu jiru güi, sacerdote tenondegua jembiocu re uiporu, jare uyasía inambi chugüi. ⁴⁸ Jayave Jesús jei yugüero vae reta pe:

—¿Maera pa Peru quisepucu reta jare ívira reta chepisi vaerä, imonda vae pipisi vae rami? ⁴⁹ Opa aico pe reta ndive Tumpa jo pe. Joco pe aporomboe, jare chepisi'á. Ërei piyapo cua, Tumpa iñee uyecuatía oï vae uyeyapo vaerä —jei.

⁵⁰ Jayave opaete jemimboe reta ueya Jesús, jare opa osi.

Cunumi osi vae

⁵¹ Jare penti cunumi uñepēgua penti asoya pe vae oo Jesús jaicue rupi. Jare amocue joco pe ñugüïinoi vae reta uipisi tēi. ⁵² Ërei jae ueya iyasoya, jare nani etei oë osi.

Jesús uyemboi jovaicho reta jovai

(Mt 26.57-68; Lc 22.54-55, 63-71; Jn 18.12-14, 19-24)

⁵³ Jayave güïraa reta Jesús sacerdote tenondegua jenta pe. Jare joco pe uyembati opaete sacerdote reta itenondegua reta, tenta guasu pegua reta itenondegua reta, jare mboroyocui re oporomboe vae reta. ⁵⁴ Jare Pedro oo vi Jesús jaicue. Ërei mbiriño oo chugüi. Jae uique sacerdote tenondegua joca pe, jare uguapi sacerdote tenondegua jembiocui reta ndive uyepee ñugüïinoi tataipi pe. ⁵⁵ Jare sacerdote reta itenondegua reta jare opaete íru mburuvicha reta ueca quía uñeapo vaerä Jesús re, uyucaca vaerä. Ërei uvä'e'ä reta teco jese. ⁵⁶ Yepe tēi jeta vae iyapu reve uñeapo jese, ërei jei reta tēi vae oyovaque'ä.

⁵⁷ Jare amocue upúa uñeapo iyapu reve jese vae jei:

⁵⁸ —Ore nduyandu jei: ‘Ambusururuta Tumpa jo cuimbae reta uyapo vae, jare mbapi ara pe che ayapota íru Tumpa jo cuimbae reta uyapota'ä vae’ —jei, jei reta.

⁵⁹ Ërei yepe tēi jucuaräi jei reta, ërei jei reta tēi vae oyovaque'ä. ⁶⁰ Jayave sacerdote tenondegua upúa uyemboi yati vae reta ipite pe, jare upirandu Jesús pe:

—¿Maera pa niñee nemoë'ä? ¿Mbae re pa cua reta uñeapo nderé? —jei.

⁶¹ Ërei Jesús quíño. Jei'ä mbae ave. Jayave sacerdote tenondegua upirandu ye chupe:

—¿Nde pa co jae Cristo, Tumpa omboi vae? ¿Nde pa co jae Tumpa Tai? —jei.

⁶² —Jae co che —jei Jesús chupe—. Jare che cuimbaerä ayeyapo vae cherechata co aguapi aï Tumpa mbaepuere güïnoi vae iyipi pe iyacata coti. Cherechata vi ayu amapitü reve —jei.

⁶³ Jayave sacerdote tenondegua cua uyandu yave, pochi ramo omondoro jemimondei, jare jei:

—¿Maera ma pa yaeca yeta íru vae reta uñeapo vaerä jese? ⁶⁴ Piyandu ma icavi mbae vae jei Tumpa coti —jei—. ¿Mbae pa pere añave? —jei.

Jayave opaete reve jei reta:

—Icaví'ä co. Icavi co yayucaca vaerä —jei reta.

⁶⁵ Jare amocue vae umbipi undivi jese, jare uesañoma, jare ocua jese. Jare jei Jesús pe:

—Emimbeu oreve quía ra ocua oï nderé.

Jare sacerdote tenondegua jembiocui reta ocua vi jese.

Pedro uicuacu Jesús

(Mt 26.69-75; Lc 22.56-62; Jn 18.15-18, 25-29)

⁶⁶ Jare Pedro oca pe oï rambueve, ou penti cuñatai sacerdote tenondegua pe uyeyocui vae. ⁶⁷ Jare uecha yave Pedro uyepee oï, omondo umae jese.

—Nde vi co jae Jesús Nazaret pegua ííru —jei chupe.

⁶⁸ Jayave Pedro uicuacu Jesús.

—Aicuua'ä jocua cuimbae, jare aicuua'ä mbae ndere vae —jei Pedro chupe.

Jayave Pedro oo onque tuicha vae coti. Jare uru cuimbae uñee. ⁶⁹ Jayave cuñatai uecha ye, jare imiari jese joco pe ñugüïinoi vae reta pe:

—Cua cuimbae co jae penti Jesús ííru —jei.

⁷⁰ Ërei Pedro uicuacu ye. Jare ndei ima mbove joco pe ñugüïinoi vae reta jei ye Pedro pe:

—Añete nde co jae penti Jesús ííru. Echa'ä nde vi co jae penti Galilea pegua. Nde ndiyeminguetu jae reta uyemingueta vae ramí —jei reta chupe.

⁷¹ Jayave Pedro jei Tumpa jee re:

—Tumpa tuiporaraca cheve cua jae vae añetete'ä yave. Aicuua'ä jocua cuimbae piyemingueta peí jese vae.

⁷² Jayave uru cuimbae uñee ma mocui vese. Jare Pedro imandúa Jesús jei chupe vae re: “Ndeí mocui vese uru cuimbae uñee mbove, mbapi vese ma checuacuta.” Jare cua re ipia pe uyemingueta yave, umbipi uyoa.

Jesús uyemboi Pilato jovai

(Mt 27.1-2, 11-14; Lc 23.1-5; Jn 18.28-38)

¹ Jayave cõe rupive sacerdote reta itenondegua reta, tenta guasu pegua reta itenondegua reta, mboroyocui re oporomboe vae reta, jare opaete íru mburuvicha reta uyembati uyemingueta ñugüïinoi reta uyupii. Jayave uipocua Jesús jare güïraa Pilato pe umee. ² Jayave Pilato upirandu Jesús pe:

—¿Nde pa co jae judío reta juvicha guasu?

—Nde ndere rami jae co che —jei Jesús chupe.

³Jayave sacerdote reta itenondegua reta uñeapo Jesús re jeta mbaembae re. ⁴Jayave Pilato upírandu ye Jesús pe:

—¿Maera pa niñee nemoē'ā? Mase, jeta mbaembae re uñeapo reta nderé —jei.

⁵Ērei Jesús jei'ā mbae ave chupe. Jáeramo Pilato ipiacañi jese.

Pilato jei Jesús umanota co

(Mt 27.15-31; Lc 23.13-25; Jn 18.38-19.16)

⁶Jare pascua ara rupi Pilato oyoracañoi penti pereso tenta guasu pegua reta uipota vae. ⁷Jare peresoriру pe ñugüiñoi amocue upuruyuca vae reta. Cua reta upuruyuca, mburuvicha reta ndive uñerāro yave. Penti jee co Barrabás. ⁸Jare jeta vae yugüeru uyerure Pilato pe uyapo vaerā chupe reta opa año uyapo rami. ⁹Jayave Pilato jei chupe reta:

—¿Pipota pa ayoraca vaerā peve judío reta juvicha guasu?

¹⁰Echa'ā jae uicuua sacerdote reta itenondegua reta umee Jesús chupe ñacatā jese ramo. ¹¹Ērei sacerdote reta itenondegua reta omboemboe yati vae reta:

—Piyerure Pilato pe oyoraca vaerā peve Barrabás. Agüiye toyoraca Jesús —jei reta.

Jayave jucuarāi uyerure reta Pilato pe. ¹²Jayave Pilato upírandu chupe reta:

—Barrabás ayoraca yave, ¿mbae pa pipota ayapo vaerā cua cuimbae judío reta juvicha guasu pere chupe vae pe?

¹³Jayave jae reta iñeeāta reve jei:

—Icutuca curusu re.

¹⁴Ērei Pilato upírandu chupe reta:

—¿Mbae icavi mbae vae pa uyapo?

Ērei jae reta jeite iñeeāta reve jei:

—Icutuca curusu re.

¹⁵Jayave Pilato oyoraca chupe reta Barrabás, uipota umbiyerovia reta ramo. Jare Pilato uinupaca yave Jesús chicote pe, umee sundaro reta pe, uicutu vaerā curusu re.

¹⁶Jayave sundaro reta güüraa Jesús juvicha joca palacio pe, jare ueni opaete ūru sundaro reta. ¹⁷Jayave sundaro reta omondeca Jesús pe temimonde pīta vae, jare oñope yurāti catui vae, jare umbapúa oñono Jesús iñāca re. ¹⁸Jayave umbipí umbiadora-raanga reta.

—¡Viva, judío reta juvicha guasu! —jei reta.

¹⁹Jare uiporu reta iñāca re ívira. Jare undivi reta jese, jare uyeatica reta jae jovai umbiadora-raanga vaerā. ²⁰Jare opa oyoyai reta yave, sundaro reta omboi chugüi temimonde pīta vae, jare omondeca ye chupe jae jemimondei. Jayave güüraa reta mburuvicha guasu joca güi, uicutu vaerā curusu re.

Jesús uyecutu curusu re

(Mt 27.32-44; Lc 23.26-43; Jn 19.17-27)

²¹Penti cuimbae Simón jee vae tenta guasu Cirene pegua, Alejandro jare Rufo tu, ou uvāe tenta guasu cotí. Jocoropí uasa oo oī yave, sundaro reta güiraaca chupe Jesús icurusu. ²²Jare sundaro reta güüraa Jesús Gólgota jee vae pe. (Cua uipota jei: “Acacerenda.”) ²³Jayave umee reta Jesús pe vino uyea mirra ndive vae. Ērei Jesús jou'ā. ²⁴Jayave sundaro reta uicutu curusu re. Jayave uyuguarda reta Jesús jemimonde re, uicuua vaerā mbae nunga penti penti güüraa iyupe vaerā. ²⁵Jare neimbove yave nueve pe, uicutu reta Jesús curusu re. ²⁶Jare oñono reta curusu re Jesús iñāca iárambo uyeucuatía mbae umbijeco jesegua vae: “Judío reta juvicha guasu.” ²⁷Jare sundaro reta uicutu vi curusu re mocui imonda vae reta, jare oñono penti Jesús iyacata cotí jare ūru iyaso cotí. ²⁸Jare uyeypao ma Tumpa iñee uyeucuatía oī vae: “Ūru vae reta jei tēi jae vi co penti icavi mbae vae.” ²⁹Jare uasa vae reta uñeācambívava reve jei icavi mbae vae Jesús pe.

—Aal —jei reta—. Nde ndere nembusururuta co Tumpa jo jare ndiyapo yeta mbapi ara pe. ³⁰Iyerepi añave, jare egüeyi curusu gií —jei reta.

³¹Jae ramíño vi sacerdote reta itenondegua reta jare mboroyoci re oporomboe vae reta imiari uyupe yave, oyoyai reta.

—Jae uepi ūru vae reta —jei reta—. Ērei ipuere'ā jae uyeerepi. ³²Jae co Cristo, Tumpa ombou vae yave, jae co Israel pegua reta juvicha guasu yave, tugüeyi añave curusu güi, yaecha vaerā, jare yarovia vaerā —jei reta.

Jare Jesús ndive uyecutu ñugüiñoi vae reta vi jei icavi mbae vae chupe.

Jesús umano

(Mt 27.45-56; Lc 23.44-49; Jn 19.28-30)

³³Jare guarasi ara mbite güive mbapi ora rupi uñemipítumimbi opaete ivi pe. ³⁴Jayave mbapi ora ma caaru yave, Jesús iñeeāta reve jei:

—Eloi, Eloi, ¿lama sabactani? (Cua uipota jei: “CheTumpa, cheTumpa, ¿maera pa chereya?”)

³⁵ Amocue joco pe ñugüïnoi vae uyandu jare jei tēi:

—Mase, Elías ueni.

³⁶ Jare penti vae osi oo umâqui esponja vinagre pe, jare oñono ívira re, jare omondo Jesús iyuru coti.

—Peáro —jei—. Yaecha ou Elías umbigüeyi vaerā —jei.

³⁷ Jayave Jesús tanta usapicai, jare umano. ³⁸ Jayave Tumpa jo umbiyao vae osoro mbite rupi ívate güi ivi coti. ³⁹ Jare sundaro reta juvicha Jesús jovai uyemboi oí vae uecha yave quirāi usapicai jare umano, jei:

—Añeteñoi yepe, cua cuimbae co jae Tumpa Tai.

⁴⁰ Jare amocue cuña reta umae ñugüïnoi mbiri güi. Cua reta ipite pe ñugüïnoi María Magdalena, Salomé jare María. Cua María imembí reta co jae Jacobo tairusu vae jare José. ⁴¹ Jesús Galilea pe icose yave, cua cuña reta yugüïraa jae ndive uyeyocui vaerā chupe. Jare jeta íru cuña yugüeru jae ndive Jerusalén pe vae reta joco pe ñugüïnoi vi.

José oñono Jesús jetecue teögüeriru pe

(Mt 27.57-61; Lc 23.50-56; Jn 19.38-42)

⁴² Jocua ara opaete judío reta uyeyapicatu ñugüïnoi piareve peguarā. Echa'ã piareve pe co mbutuu ara. Jáeramo guarasí uique ma yave, ⁴³ penti cuimba tenta guasu Arimatea pegua José jee vae uñemiatangātu oo Pilato pe, jare uyerure chupe Jesús jetecue re. José co jae penti mburuvicha. Opaete tenta guasu pegua reta uipiú cua José. Jae uáro ico Tumpa iporoyocuia. ⁴⁴ Jare Pilato ipiacaní Jesús umano ma vae re. Jayave ueni sundaro reta juvicha, jare upirandu chupe quirāi yave ra umano Jesús.

⁴⁵ Jare sundaro reta juvicha umimbeu chupe. Jayave Pilato jei José pe:

—Ndepuere nderaa Jesús jetecue.

⁴⁶ Jayave José ogua nieso. Jare umbigleyi ma yave Jesús jetecue, oñoma nieso pe. Jayave oñono penti teögüeriru itape uyeyoo vae pe, jare umbiyapayere ita tuicha vae teögüeriru jonque re. ⁴⁷ Jare María Magdalena jare José ichi María jee vae uecha quiape oñono Jesús jetecue.

16

Jesús icove ye

(Mt 28.1-10; Lc 24.1-12; Jn 20.1-10)

¹ Mbutuu ara uasa ma yave, María Magdalena, Jacobo ichi María jee vae jare Salomé ogua mbae ipiche cavi vae, jare yugüïraa uipichi vaerā Jesús jetecue re. ² Jare neimbove así domingo ara pe cua cuña reta yugüïraa teögüeriru coti. ³ Jare jei reta uyupe:

—¿Quía ra umbisírita yandeve ita tuicha vae teögüeriru jonque güi?

⁴ Érei umae reta yave, uecha ita uyembisíri ma teögüeriru jonque güi. Jocua ita tuicha co. ⁵ Jare uique reta yave teögüeriru pe, uecha penti cunumi uguapi oí iyacata coti. Jemimonde pucu jare tī. Jare ipiacaní reta jese. ⁶ Érei cunumi jei chupe reta:

—Agiüye pepiacañi. Peeca co peí Jesús Nazaret pegua uyecutuca curusu re vae. Jae icove ye ma ou umanocue vae reta ipite güi. Mbaeti ma cua pe oí. Mase, pemae jendacue re —jei—. ⁷ Pecua pere jemimboe reta pe jare Pedro pe: ‘Jae oota perenonde Galilea pe. Joco pe pzechata, jae jei peve vae ramí’ —pere chupe reta, jei.

⁸ Jayave cuña reta oé teögüeriru güi, jare tanta osi yugüïraa. Uquiyé ramo umbipi uriri. Jare jei'ã mbae ave quía pe.

María Magdalena uecha Jesús

(Jn 20.11-18)

⁹ Jesús icove ye ou umanocue vae reta ipite güi neimbove así domingo ara pe. Jayave uyechaca tenonde ete María Magdalena pe. Tenonde yave Jesús umbisíri siete aña reta cua cuña güi. ¹⁰ María oo umimbeu Jesús ndive yugüïrecose vae reta pe. Jae reta ipiatiti ramo uyao ñugüïnoi. ¹¹ María jei chupe reta:

—Jesús icove ye ma oí. Aecha ma —jei chupe reta.

Érei uyandu yave, güirovia'ã reta.

Mocui jemimboe reta uecha Jesús

(Lc 24.13-35)

¹² Cua jaicue rupi Jesús uyechaca mocui jemimboe reta pe, jae reta yugüïraa rambueve tape rupi tenta mbae vae coti. Ambie vae echá Jesús chupe reta. ¹³ Jae reta yugüeru ye tenta guasu pe umimbeu íru reta pe. Érei jeseve güirovia'ã reta.

Jesús oyocui jocua once jemimboe reta

(Mt 28.16-20; Lc 24.36-49; Jn 20.19-23)

¹⁴ Cua jaicue rupi Jesús uyeechaca jocua once jemimboe reta pe etei, jae reta ucaru ñugüïnoi rambueve, jare uñeengata chupe reta, upurugüirovia'ã jare ipiatanta ramo. Echa'ã íru vae reta uecha Jesús, icove ye yave ou umanocue vae reta ipite güi, jare umimbeu tẽi jemimboe reta pe. Èrei jae reta güirovia'ã. ¹⁵ Jayave Jesús jei chupe reta:

—Pecua opaete ivi rupi. Pemimbeu Tumpa iñee icavi vae opaete ivi pegua reta pe —jei—. ¹⁶ Jocua güiroviata jare uyembibautizacata vae uyembiasacata. Èrei jocua güirovia'ã vae ucañiteita co —jei—. ¹⁷ Jare íru vae reta uechata güirovia vae reta uyapo ñugüïnoi cua nunga miacañi reta. Cheree re jae reta umbisirita aña reta oya jese vae reta güi. Uyeminguetata ambie ñee pe. ¹⁸ Uipisita mboi reta. Jou yave imbayachi vae, ndarau mbae uyeyapo chupe reta. Oñonota ipo imbaerasi vae reta re umbigüera vaerá —jei chupe reta.

*Jesús oo ara pe
(Lc 24.50-53)*

¹⁹ Jayave yandeYa opa uyemingueta yave jae reta ndive, oo ara pe, jare uguapi Tumpa iyípi pe iyacata cotí. ²⁰ Jare jemimboe reta yugüíraa umimbeu Tumpa iñee opaete que rupi. Jare yandeYa omborí, jare uicuaaca íru vae reta pe jemimboe reta jei vae añete vae miacañi reta uyapo vae rupi. Jaeño ma.

EL SANTO EVANGELIO SEGUN SAN LUCAS

Lucas uicuatía Teófilo pe

¹ Jeta vae umimbeu ma uicuatía reve opaete yandepite pe uyeyapo vae regua. ² Jocua uyeyapo vae iyipí güive uecha vae reta jucuarāi umimbeu yandeve. Echa'ā jae reta umimbeu Tumpa iñee ūru vae reta pe. ³ Jáeramo icavi echa cheve che vi aicuatía vaerā ndeve, mburuvicha Teófilo, amimbeu vaerā ndeve quirāi opaete uyeyapo. Echa'ā che aicuaa cavi opaete iyipí güive uyeyapo vae. ⁴ Aicuatía aī ndeve cua, ndicuaa vaerā añete co jocua ndiyemboe jese vae.

Juan oata vae regua

⁵ Herodes ico yave iñi Judea pegua reta juvicha guasurā, ico vi penti sacerdote Zácarías jee vae. Jae co sacerdote penti atí Abías jee vae pegua. Zácarías jembireco co jae Aarón iñemoñaa reta pegua jare jee co Elisabet. ⁶ Zácarías jare jembireco uyapo jupi vae jare jucuarāi umbiyerovia Tumpa. Echa'ā jecuaeño uyapo yandeYa iporoyocui reta. Mbaeti quíia ipuere umbijeco reta mbae re. ⁷ Ërei mbaeti co Zácarías isambiai. Echa'ā Elisabet imembí mbae vae co. Jare Zácarías jare Elisabet ucuacuaa ete ma.

⁸ Penti ara penti atí Abías jee vae pegua sacerdote reta uparavíqui ñugüinói Tumpa jo pe. Jáeramo Zácarías uyapo oí iparavíqui joco pe. ⁹ Jare jocua ara Zácarías iparavíqui co uique vaerā yandeYa jo japipe pe etei uapi vaerā mbae ipiche cavi vae. Echa'ā jecuaeño uyapo jucuarāi sacerdote reta. ¹⁰ Jare jeta Israel pegua reta yati ma uyerure ñugüinói Tumpa jo oca pe, Zácarías mbae ipiche cavi vae uapi oí rambueve. ¹¹ Jare uyecuaa Zácarías pe penti ángel yandeYa pe uyeyocui vae. Ángel uyemboi oí mbae ipiche cavi vae imesa iyacata coti. ¹² Jare Zácarías uecha yave ángel, ipiacañi jare uquiyé vi. ¹³ Ërei ángel jei chupe:

—Agüiye equiye, Zácarías. Tumpa uyandu ma ndiyerure, jare nembireco Elisabet imembita ndeve cuimbæ. Jare nembijeeta Juan —jei—. ¹⁴ Jare nde ndiyeroviata co tuicha. Jare jeta vi uyeroviata jae oa vae regua —jei ángel Zácarías pe—. ¹⁵ Echa'ā yandeYa umbutuichacata co. Jae ndarau etei ucaa. Jare tineeta Espíritu Santo pe ichí güi oa güive —jei chupe—. ¹⁶ Jare umbiyerovala yandeYa Tumpa coti jeta Israel pegua reta —jei—. ¹⁷ Jae oota yandeYa jenonde uauca vaerā tu reta pe isambiai reta jare Tumpajei vae uyapo'ā vae reta uyeyapo vaerā iyaracuaa vae retardarā jare jupi vae retardarā. Jucuarāi uyapota, Israel pegua reta uáro vaerā yandeYa. Jae icota Elías icose vae ramí jare güinoita mbaepuere Elías güinoise vae ramí —jei ángel Zácarías pe.

¹⁸ Jayave Zácarías jei ángel pe:

—¿Quiráita pa aicuaa añetete ra cua nde ndere cheve vae? Echa'ā che acuacuaa ete ma jare chembireco ucuacuaa ete ma vi —jei.

¹⁹ Jayave ángel jei ye Zácarías pe:

—Che co jae Gabriel. Che ayeyocui Tumpa pe. Tumpa chembou chemiari vaerā ndeve jare amimbeu vaerā ndeve cua ñee icavi vae —jei chupe—. ²⁰ Mase, niñeeta'ā ndepita cua amimbeu ndeve vae uyeyapo regua. Echa'ā nderovia'ā che jae ndeve vae. Ërei che jae ndeve vae uyeyapota co ara ou uyeyapo vaerā yave —jei.

²¹ Jare Israel pegua reta uáro ñugüinói Zácarías oē vaerā Tumpa jo güi, jare ipiacañi reta quirái Zácarías upita íma Tumpa jo japipe pe. ²² Jare Zácarías oē yave, ipuere'ā omoë iñee chupe reta. Jáeramo jae reta uicuaa Zácarías uecha mbae Tumpa jo pe oí rambueve. Echa'ā jae umupúa ipo chupe reta. Ërei ipuere'ā etei mbae jei chupe reta.

²³ Jare opa ma yave Zácarías iparavíqui Tumpa jo pe, oo ye jenta pe. ²⁴ Jare mboví ara rupi Zácarías jembireco Elisabet ipurúa. Jayave Elisabet uñemi pandepo yasi jenta pe. Echa'ā jae jei:

—Cuarái yandeYa uyapo cheve. Íma ma chemara ūru vae reta güi chemembí'ā etei ramo. Ërei añave yandeYa chembori agüiye vaerā chemara chugüi reta —jei.

Jesús oata vae regua

²⁶ Jare Elisabet seis yasi ma ipurúa yave, Tumpa ombou ángel Gabriel tenta guasu Nazaret iñi Galilea pegua pe ²⁷ María ipi. María co jae penti cuñatai güireco'ā etei cuimbæ vae. Ërei jae jei ma umenda vaerā José ndive. José co jae penti David iñemoñaa reta pegua. ²⁸ Jare ángel uique María oí vae pe jare jei chupe:

—Iyerovia. YandeYa ipiacañi ndeve. YandeYa oí nde ndive. YandeYa nemivendise ete ūru cuña reta güi —jei.

²⁹ María cua uyandu yave, ipiacañi. Echa'ā uicuaa'ā mbae ra uipota jei ángel jei chupe vae. ³⁰ Jayave ángel jei chupe:

—Agüiye equiye, María. Echa'ā Tumpa ipiacavi ndeve —jei—. ³¹ Mase, ndepuruata co jare nemembita. Jare nembiyeeta nemembí Jesú —jei María pe—. ³² Jae güñoita mbaepuere tuicha vae, jare jeeta co Tumpa Tai. Jare yandeYa Tumpa uyapota Israel pegua reta juvicha guasurā itenondegua David rami —jei—. ³³ Jare jae icota Jacob iñemoñaa reta juvicha guasurā jaeño mai pegua. Jare jae iporoyocuia ndarau opa —jei ángel chupe.

³⁴ Jayave María jei ángel pe:

—¿Quiráita pa uyeyapo cua? Echa'ā ndei areco cuimbae —jei.

³⁵ Jayave ángel jei María pe:

—Espíritu Santo outa ndeve. Tumpa imbaepuere rupi cua uyeyapota ndeve. Jáeramo nemembí oata iyoa mbae reve jare jeeta co Tumpa Tai —jei—. ³⁶ Mase, nerentará Elisabet ipurúa vi, yepe tēi ucuacuuaa ete ma. Seis yasi ma ipurúa oī, yepe tēi īru vae reta umbijee 'Imembí mbae vae' —jei—. ³⁷ Echa'ā Tumpa ipuere uyapo opaete —jei chupe.

³⁸ Jayave María jei ángel pe:

—Mase, che co jae yandeYa pe ayeyocuia vae. Tome tuyeyapo cheve nde ndere cheve vae rami —jei. Jayave ángel oo ye María oī vae güi.

María opou Elisabet pe

³⁹ Jayave mboví ara rupi María oē oo voi jenta güi penti tenta guasu ivitú reta re Judea pegua pe. ⁴⁰ Jare oo uvāe Zacarías jenta pe, jare umbisaluda Elisabet. ⁴¹ Jare Elisabet uyandu yave María jei chupe vae, Elisabet imembí omí rai jie pe. Jare Elisabet tinee Espíritu Santo pe. ⁴² Jayave Elisabet iñeeäta reve jei:

—Tumpa nemivendise ete īru cuña reta güi. Jare umivendiseta nemembí —jei—. ⁴³ Jare yepe tēi nde co jae cheYa ichirā, ērei nde ndeyu ndepou chepi. Chepiacañi cua re —jei—. ⁴⁴ Mase, nde nembipi chemingueta rupive, chemebi omí rai cherie pe uyerovia ramo —jei Elisabet María pe—. ⁴⁵ Nde nderovia yandeYa uyapota co jae jei ndeve uyapota vae. Jáeramo jae nemivendise ma —jei.

⁴⁶ Jayave María jei:

“Ambiadora yandeYa.

⁴⁷ Ayerovia Tumpa re.

Jae co chembiasa vae.

⁴⁸ Yepe tēi che cheparavete, ērei jae cheparareco.

Mase, añave güive opaete vae jeita Tumpa chemivendise co.

⁴⁹ Echa'ā Tumpa imbaepuere tuicha co.

Jae uyapo icavi vae cheve imbaepuere pe.

Jae co iyoa mbae vae jee vae.

⁵⁰ Jare Tumpa uiparareco opaete uipiu Tumpa vae reta.

⁵¹ Uicuaaca quirái imbaepuere tuicha co.

Opa umiái uyembicate vae reta.

⁵² Jae uequi imbaepuere mburuvicha reta güi,

jare umbutuichaca uñemímichi vae reta.

⁵³ Umingapii iyembai vae reta tembú icavi vae pe.

Ērei umee'ā co mbae icocatu vae reta pe.

⁵⁴ Omborí Israel pegua uyeyocuia chupe vae reta.

Echa'ā imandúa quirái jei uipararecota co.

⁵⁵ Echa'ā jucuarái jei yandetenondegua reta pe - jae reta co Abraham jare iñemoñaa reta.

Echa'ā jei chupe reta uipararecota co jaeño mai pegua" —jei María.

⁵⁶ Jayave María upita Elisabet ipi mbapí yasi pegua. Jayave ramo oo ye jenta pe.

Juan oa vae regua

⁵⁷ Jare ara ou uvāe yave Elisabet imembí vaerā, oa imembí cuimbae. ⁵⁸ Jare jerācua Elisabet jentaigua reta jare jentará reta pe quirái yandeYa uiparareco Elisabet. Jare jae reta uyerovia Elisabet ndive.

⁵⁹ Jare sambiai ocho ara ma güinoi yave, jentará reta yugüero umicircundicada vaerā. Jare jae reta uipota oñono jese tu jee Zacarías. ⁶⁰ Ērei sambiai ichi jei chupe reta:

—Jucuarái'ā co. Yambijeeta co Juan.

⁶¹ Ērei jae reta jei chupe:

—Mbaeti etei co nerentará jocua tee güinoi vae.

⁶² Jayave jae reta iñáca omomi Zacarías pe upirandu vaerā chupe mbae nunga tee ra uipota oñono taí re. ⁶³ Jayave Zacarías uechaca chupe reta jae uipota mbae uicuatía jese vae. Jayave uicuatía cuarái: "Jee co Juan." Jare opaete joco pe ūngüinoi vae reta ipiacañi. ⁶⁴ Jayave jupivoi Zacarías ipuere omoé ye iñee. Jare imiai chupe reta umbiadadora reve Tumpa. ⁶⁵ Jare opaete Zacarías jentaigua reta ipiacañi cua

re. Jare opaete cuá uyeyapo vae jerācua opaete ivitu Judea pegua reta rupi.⁶⁶ Jare opaete uyandu vae reta ipia pe uyemingueta cuá uyeyapo vae re jare jei reta iyupe:

—Mbae nunga sambiai ra co aipo cuá? Echa'ã yandeYa imbaepuere oí jae ndive.

Zacarías umimbeu Tumpa iñee

⁶⁷ Jayave Zacarías - jae co Juan tu - tinee Espíritu Santo pe jare umimbeu Tumpa iñee. Echa'ã jae jei:
⁶⁸ “Tuyembadoraca yandeYa Tumpa.

Yande co jae Israel pegua reta.

Echa'ã Tumpa ipiacavi yandeve ramo, yanderepi ma.

⁶⁹ Jae ombou yandeve jembiocui David iñemoña reta pegua yanembiasa vaerā imbaepuere tuicha vae pe.

⁷⁰ Jucuarai Tumpa jei iyipi güive Tumpa iñee umimbeu vae reta rupi.

Jae reta uñenono tee Tumpa peguarā.

⁷¹ Tumpa yanembiasata yanderovaicho reta güi.

Jae yanembiasata opaete ñanemitaréi vae reta güi. ⁷²⁻⁷³ Tumpa uiparareco Abraham jare íru yandenetenondegua reta.

Echa'ã Tumpa etei uyemingueta Abraham ndive,
jare añave imandúa ma jocua jei uyapota vae re.

⁷⁴ Jáeramo umeeta yandeve yayeyocui vaerā chupe yaquiyé mbae reve.

Echa'ã jae yanderepi yanderovaicho reta güi” —jei Zacarías—.

⁷⁵ “Tumpa ñanenono teeta iyupeguarā jare yayapota jupi vae,

jare jae icota yande ndive cuá ívi pe yaico rambueve.

⁷⁶ Jare íru vae reta uyemingueta nderé yave, jeita:

‘Jae co penti Tumpa iñee umimbeu vae.’

Echa'ã nde, cherai, ndeota yandeYa jenonde ndiyapicatu vaerā japerā.

⁷⁷ Nemimbeuta yandeYa imbae reta pe quirai Tumpa umbiasata chupe reta imbaeyoa reta jare jucuarai uyembiasacata.

⁷⁸ Cuarai Tumpa uyapota, yandeparareco ramo.

Jare ipuruparareco jeco pegua ombouta yanembiasa vaerā, opa ara rupi ombou guarasi yanembori vaerā rami.

⁷⁹ Jae yanemborita guarasi jembipe yanembori rami.

Echa'ã guarasi umee yandeve tembipe agüiye vaerā yaico píatumimbi pe.

Jae yanemborita agüiye vaerā yaquiyé mano güi.

Jae yanemborita yaico vaerā yandepicatu reve” —jei Zacarías.

⁸⁰ Jare sambiai ucuacuaa, jare uñemiatangatú Tumpa coti. Jare ico ñana rupi uyecuaa Israel pegua reta pe regua.

2

Jesús oa vae regua

(Mt 1.18-25)

¹ Juan ichí güi oa yave, romano reta juvicha guasu Augusto César jee vae oyocui opaete vae uyepapaca vaerā.

² Jaeramo opaete vae uyepapaca Cirenio ico ívi Siria pegua reta juvicha guasurá yave. ³ Jare opaete vae yugüiraa itenondegua jenta guasu pe uyepapaca vaerā.

⁴ Jare José vi oo Nazaret Galilea pegua güi tenta guasu Belén Judea pegua pe. Echa'ã jae co David iñemoña reta pegua, jare David jenta guasu co jae Belén. ⁵ Jáeramo José oo Belén pe uyepapaca vaerā, jare güiraa jembireco María. Jare María ipurúa ma. ⁶ Jare Belén pe ñugüinoi rambueve, ara ou uváe María imembri ovaerā. ⁷ Jare María imembiri pi cuimbae oa. Jayave María oñoma penti ñomaa pe jare umbiyapacua penti maemimba icaruariru pe. Echa'ã mbaeti co José jare María jendará tenta pe.

Ángel reta jare ovecha iyandarecoa reta

⁸ Jare jocua pítu amocue ovecha iyandarecoa reta uyandareco ñugüinoi iovecha reta re ñana rupi coíno tenta guasu Belén güi. ⁹ Jare uyecuaa chupe reta penti ángel yandeYa pe uyeyocui vae, jare jembipe jae reta ñugüinoi vae pe. Echa'ã yandeYa imbaepuere uyecuaa chupe reta. Jare jae reta uquiyé ete. ¹⁰ Jayave ángel jei chupe reta:

—Agüiye pequiyé. Mase, amimbeuta peve ñee icavi vae tuicha rupi piyerovia vaerā. Cua ñee opaete vae peguarā co —jei—. ¹¹ Echa'ã cuá pítu oa upurumbiasa vae David jenta guasu pe. Jae co yandeYa Cristo, Tumpa ombou vae —jei ángel chupe reta—. ¹² Jare cuarai picuata: Peväeta sambiai uñenoma oí penti ñomaa pe jare uyapacua oí penti maemimba icaruariru pe —jei.

¹³ Jare jupivoi uyecuuaa jocua ángel ndive jeta ete ángel reta. Opaete vae umbiadora Tumpa. Echa'á jei reta:

¹⁴ "Tuyembidoraca Tumpa ara pe oí vae,
jare iví pegua reta Tumpa ipiacavi chupe reta vae tipiacatu" —jei.

¹⁵ Jare ángel reta yugüiraa ye yave chugüi reta ara pe, ovecha iyandarecoa reta jei uyupe:

—Yaa Belén pe yaecha vaerá cua uyeyapo vae. Echa'á yandeYa uicuaaca yandeve —jei reta.

¹⁶ Jayave javoí pegua yugüiraa joco pe, jare uváe María jare José jare sambiaí. Jocua sambiaí uyapacua oímaemimba icaruariru pe. ¹⁷ Jare uecha ma yave, yugüiraa ye umimbeu íru vae reta pe ángel jei chupe reta jocua sambiaí re vae. ¹⁸ Jare opaete uyandu vae reta ipiacaní ovecha iyandarecoa reta umimbeu chupe reta vae re. ¹⁹ Êrei María imandúa opaete cua re jare ipia pe uyeminguela cavi jese. ²⁰ Jare ovecha iyandarecoa reta yugüiraa ye Belén güi. Umbiadora reta Tumpa jare umee yasurupai chupe opaete uyandu jare uecha vae re. Echa'á jae reta uecha ma sambiaí ángel jei chupe reta rami.

Güiraa reta Jesús Tumpa jo pe

²¹ Jare sambiaí ocho ara ma güinoi yave, tu jare ichi umicircuncidaca jare umbijee Jesús. Echa'á ángel umimbeu María pe jucuarái umbijee vaerá ndei María ipurúa mbove.

²² Jare ara ou uváe María oo vaerá yandeYa jo pe uyeyoeca vaerá yandeYa cotí. Echa'á jucuarái uyecuatía oí Moisés iporoyocui pe cuña imembí vae uyapo vaerá. Jayave tu jare ichi güiraa Jesús tenta guasu Jerusalén pe yandeYa jo pe oñonoca tee vaerá Tumpa peguará. ²³ Echa'á yandeYa iporoyocui pe uyecuatía oí cuarái: "Cuña imembíripi cuimbæ oa yave, sambiaí uñeñono teeta yandeYa peguará." Jucuarái uyecuatía oí. ²⁴ Jáeramo Jesús tu jare ichi yuyacaca umee vaerá yandeYa pe mocui güira tórtola jee vae aní mocui picasu taírusu vae. Echa'á jucuarái jei uyapo vaerá mboroyocui yandeYa umee chupe reta vae pe.

²⁵ Jare jocua ara penti cuimbæ Jerusalén pegua Simeón jee vae oí Tumpa jo pe. Simeón jecuaeño uyapo jipi vae jare umbiadora Tumpa. Jae uáro oí omborita Israel pegua reta vae ou vaerá. Jare jae tñee Espíritu Santo pe. ²⁶ Jare Espíritu Santo uicuaaca ma Simeón pe quirái ndarau umano ndei uecha Cristo yandeYa ombouta vae mbove. ²⁷ Jare jocua ara Espíritu Santo uicuaaca ma Simeón pe oo vaerá uique Tumpa jo pe. Jare Jesús tu jare ichi güiraa Jesús uruique Tumpa jo pe uyapo vaerá mboroyocui jei vae rupi. ²⁸ Jayave Simeón ovoi Jesús jare umbiadora Tumpa. Jae jei:

²⁹ "CheYa, jecuaeño ayeyocui ndeve.

Añave ndepuere nemaeño cheré amano vaerá chepiacatu reve.

Echa'á cuarái nde ndere cheve uyeyapota co.

³⁰ Aecha ma upurumbiasa vae nde nembou vae.

³¹ Nde ndiparavo opaete vae peguará.

³² Jae co penti tembipe rami.

Ime tembipe yave, yaecha cavi mbaembæ.

Jae ramíño vi jae ndecuaaca cavita judío mbae vae reta pe.

Jare Israel pegua reta uyepiucata jae jeco pegua.

Echa'á Israel pegua reta nembae reta co" —jei Simeón.

³³ Jare José jare Jesús ichi ipiacaní Simeón jei Jesús re vae re. ³⁴ Jare Simeón jei Tumpa tumivendise José jare María. Jayave jei María pe:

—Mase, Tumpa uiparavo ma cua nemembi. Jae uicuaacata Israel pegua reta pe quía co jae. Êrei jeta Israel pegua reta güirírota jare jeta vae güiroviata jese —jei—. ³⁵ Echa'á uyecuata opaete vae ipia pe oí vae. Jare nde etei ndepiatiti eteta jese —jei Simeón María pe.

³⁶ Jare ico vi penti cuña Ana jee vae. Jae co Fanuel co jae penti ati Aser jee vae pegua. Ana co jae Tumpa iñee umimbeu vae. Ucuacuua ete ma. Jaeño siete año ico ime ndive. ³⁷ Echa'á jayave ime umano chugüi. Ana güinoi ma ochenta y cuatro año. Jecuaeño ico Tumpa jo pe jare uyeyocui Tumpa pe. Echa'á uyecuacu tembiú güi jare uyerure Tumpa pe ara rupi jare pítu rupi. ³⁸ Jae ou uváe José jare María jare Jesús ñugüinoi vae pe. Jayave jae vi umee yasurupai yandeYa pe, jare imiarí Jesús re opaete Jerusalén pegua uáro ñugüinoi Cristo ou uepi vaerá vae reta pe.

Yugüiraa ye Nazaret pe

³⁹ Jare José jare María uyapo yandeYa jo pe opaete yandeYa iporoyocui jei uyapo vaerá vae. Jayave yugüiraa ye Galilea pe jae jenta guasu Nazaret pe. ⁴⁰ Jare sambiaí ucuacuua jare jatangätu. Iyaracuua catu vi. Jare Tumpa ipiacavi oí jae ndive.

Jesús Tumpa jo pe

⁴¹ Jare opa año Jesús tu jare ichi yugüiraa Jerusalén pe pascua ara pe. ⁴² Jare Jesús doce año ma güinoi yave, oo jae reta jupié pascua peguará, jae reta jecoño mai uyapo vae rami. ⁴³ Jare uasa ma yave pascua, Jesús tu jare ichi oé Jerusalén güi yugüeru ye vaerá jenta pe. Êrei Jesús upita Jerusalén pe tu jare ichi

uicuaa mbae reve. ⁴⁴ Echa'ã jae reta jei tēi Jesús ou co oĩ iguataíru reta jupié. Õrei caaru ma yave, ueca reta tēi jentará reta jare ūru uicuaa vae reta ñugüinoi vae rupi. ⁴⁵ Õrei uväe'ã chupe. Jayave Jesús tu jare ichi yugüiraa ye Jerusalén pe ueca vaerã. ⁴⁶ Jare mbapí ara ma uasa yave, uväe reta chupe Tumpa jo pe. Jesús uguapi oĩ mboroyocui re oporomboe vae reta ipite pe. Uyapisaca oĩ jese reta jare upirandu chupe reta mbaembae re. ⁴⁷ Jare opaete vae ipiacañi. Echa'ã Jesús uicuaa cavi opaete iporomboe jare ipuere umimbeu cavi chupe reta jae reta upirandu chupe mbae re yave. ⁴⁸ Jare Jesús tu jare ichi uecha yave, jae reta vi ipiacañi. Jayave ichi jei Jesús pe:

—Chemembí, ¿maera pa ndiyapo cuarãi oreve? Mase, nderu jare che ndueca tēi opaete que rupi orepiatiti reve —jei.

⁴⁹ Jayave Jesús jei chupe reta:

—¿Maera pa chereca opaete que rupi? Icavi co apita vaerã cua pe ayapo vaerã cheRu iparavíqui. ¿Picuua'ã pa cua? —jei chupe reta.

⁵⁰ Õrei jae reta uicuaa'ã mbae uipota jei jocua Jesús jei chupe reta vae. ⁵¹ Jayave Jesús ou ye Nazaret pe jae reta jupié, jare jecuaeño uyapo jae reta jei vae. Jare Jesús ichi imandúa opaete uyeyapo vae re. ⁵² Jare Jesús jecuaeño ucuacuaa oo oĩ. Jare iyaracuaa catu. Jecuaeño umbiyerovia Tumpa jare ūru vae reta vi.

3

*Juan upurumbibautiza vae umimbeu Tumpa iñee
(Mt 3:1-12; Mr 1:1-8; Jn 1:19-28)*

1-2 Jare Tiberio César quince año ma

romano reta juvicha guasurã ico yave, Tumpa ombou iñee Juan pe. Juan co jae Zacarías tai, jare ico ñana pe. Jocua ara reta pe Poncio Pilato ico Judea pegua reta juvicha guasurã, jare Herodes ico Galilea pegua reta juvicha guasurã, jare Herodes tivi Felipe jee vae ico iñi Iturea pegua reta jare iñi Traconite pegua reta juvicha guasurã, jare Lisanias ico iñi Abilinia pegua reta juvicha guasurã. Jare Anás jare Caifás yugüireco Israel pegua reta isacerdote tenondegu retarã. ³ Jayave Juan uguata ico opaete iñaca Jordán iyipi rupi. Jare umimbeu opaete vae pe ueya vaerã iyemingueta icavi mbae vae ipia pe oĩ vae jare uyembibautizaca vaerã, Tumpa umbiásia vaerã chupe reta imbaeyoa reta. ⁴ Isaías co jae penti Tumpa iñee aracae umimbeu vae. Jae uicuatía cuarãi:

“Jae iñeeáta reve jeita ñana rupi:

‘Piyapicatu yandeYa japerã.

Pemísimi tape’ —jeita—.

⁵ ‘Opaete jugua reta uñemítineeta iñi pe.

Jare opaete iñitu reta uyeyapota ñuu rami.

Jare tape ipari vae reta uñemísímicata.

Jare tape quipe quipe vae reta ipecavita.

⁶ ‘Jare opaete vae uicuaata quirãi Tumpa ipuere upurumbiasa.’ ”

Jucuarãi uicuatía Isaías.

⁷ Jare jeta vae yugüeru Juan oĩ vae pe uyembibautizaca vaerã. Jayave Juan jei chupe reta:

—Pe reta co jae mboi reta rami. ¿Quía pa umimbeu peve piyerova vaerã Tumpa coti agüiye vaerã Tumpa uiporaraca peve? —jei—. ⁸ Piyapo icavi vae, jucuarãi picuacaca vaerã añetete peeyea co piyemingueta icavi mbae vae pepia pe oĩ vae. Agüiye pere piyape pepia pe: ‘Yandetenondegua co jae Abraham.’ Echa'ã che jae peve cua: Tumpa ipuere uyapo cua ita reta güi Abraham iñemoña retarã —jei Juan chupe reta—. ⁹ Yamijaanga penti temiti. Temiti ía icavi'ã yave, iya uyasia japo reve jare uapi. Jae ramíño vi piyapo'ã yave icavi vae, Tumpa uiporaracata peve —jei.

¹⁰ Jayave joco pe ñugüinoi vae reta upirandu Juan pe:

—¿Mbae pa nduyapota?

¹¹ Jayave Juan jei chupe reta:

—Ime yave quía mocui temimonde güinoi vae, tumee penti mbaeti temimonde güinoi vae pe. Jare ime yave quía jeta tembiú güinoi vae, tumee mbaeti tembiú güinoi vae pe —jei.

¹² Yugüeru vi Juan oĩ vae pe mburuvicha peguarã ocovara vae reta uyembibautizaca vaerã. Jae reta upirandu Juan pe:

—Oporamboe vae, ¿mbae pa nduyapota?

¹³ Jayave Juan jei chupe reta:

—Agüiye ma pembiásia pecovara mburuvicha reta peocui vae güi.

¹⁴ Sundaro reta vi upirandu Juan pe:

—¿Mbae pa nduyapota?

Jayave Juan jei chupe reta:

—Agüiye pemumburu ūru vae reta jare agüiye peapu ūru vae reta re. Jare agüiye jecuaeño pipota jeta peruvicha reta umbiepi peve vae güi.

¹⁵ Opaete vae uāro ñugüinoi Cristo ou vaerā, jare ipia pe uyemingueta quirāi aramoi Juan co jae Cristo. ¹⁶ Jáeramo Juan jei chupe reta:

—Che pumbibautiza i pe. Êrei outa ipuere ete chegüi vae. Jupi'â co che ayora vaerā ipipasa ichā. Jae pembibautizata Espíritu Santo pe jare tata pe —jei—. ¹⁷ Jae co trigo uiwoo vae rami. Echa'â trigo uiwoo vae umbiveve trigo uequi vaerā iti. Jayave uñuvatu trigo jiru pe. Êrei uapi iti tata pe. Tata Cristo uioporuta vae opa mbae vae co —jei.

¹⁸ Jare Juan jeta jei chupe reta umimbeu vaerā chupe reta ñee icavi vae. ¹⁹ Jare mburuvicha guasu Herodes umenda tivi Felipe jembireco Herodías jee vae ndive jare uyapo jeta mbae icavi mbae vae. Jare Juan iñeengueta Herodes pe opaete icavi mbae vae uyapo vae re. ²⁰ Jayave Herodes uyapo ye icavi mbae vae. Echa'â oñonoca Juan peresoriru pe.

Juan umbibautiza Jesús

(Mt 3.13-17; Mr 1.9-11)

²¹ Êrei ndei Juan uñeñonoca peresoriru pe mbove, penti ara Jesúis ou Juan oï vae pe. Jare Juan ūru vae reta umbibautiza yave, umbibautiza vi Jesúis. Jare Jesúis uyerure Tumpa pe rambueve, ara uyepea.

²² Jare uyecuua Espíritu Santo ugüeyi Jesúis re pícasu rami. Jayave uyendu ñee ara güi jei:

—Nde co jae cheRai nduau ete vae. Chembiyerovia ete —jei.

Jesúis itenondeguia reta

(Mt 1.1-17)

²³ Jare Jesúis güinoi ma treinta año rupi. ūru vae reta ipia pe uyemingueta tēi jae co José tai ete. José co jae Elí tai. ²⁴ Elí co jae Matat tai. Matat co jae Leví tai. Leví co jae Melqui tai. Melqui co jae Jana tai. Jana co jae José tai. ²⁵ José co jae Matatías tai. Matatías co jae Amós tai. Amós co jae Nahum tai. Nahum co jae Esli tai. Esli co jae Nagai tai. ²⁶ Nagai co jae Maat tai. Maat co jae Matatías tai. Matatías co jae Semei tai. Semei co jae José tai. José co jae Judá tai. ²⁷ Judá co jae Joana tai. Joana co jae Resa tai. Resa co jae Zorobabel tai. Zorobabel co jae Salatiel tai. Salatiel co jae Neri tai. ²⁸ Neri co jae Melqui tai. Melqui co jae Adi tai. Adi co jae Cosam tai. Cosam co jae Elmodam tai. Elmodam co jae Er tai. ²⁹ Er co jae Josué tai. Josué co jae Eliezer tai. Eliezer co jae Jorim tai. Jorim co jae Matat tai. ³⁰ Matat co jae Leví tai. Leví co jae Simeón tai. Simeón co jae Judá tai. Judá co jae José tai. José co jae Jonán tai. Jonán co jae Eliaquim tai. ³¹ Eliaquim co jae Melea tai. Melea co jae Mainán tai. Mainán co jae Matata tai. Matata co jae Natán tai. ³² Natán co jae David tai. David co jae Isaí tai. Isaí co jae Obed tai. Obed co jae Booz tai. Booz co jae Salmón tai. Salmón co jae Naasón tai. ³³ Naasón co jae Aminadab tai. Aminadab co jae Aram tai. Aram co jae Esrom tai. Esrom co jae Fares tai. Fares co jae Judá tai. ³⁴ Judá co jae Jacob tai. Jacob co jae Isaac tai. Isaac co jae Abraham tai. Abraham co jae Taré tai. Taré co jae Nacor tai. ³⁵ Nacor co jae Serug tai. Serug co jae Ragau tai. Ragau co jae Peleg tai. Peleg co jae Heber tai. Heber co jae Sala tai. ³⁶ Sala co jae Cainán tai. Cainán co jae Arfaxad tai. Arfaxad co jae Sem tai. Sem co jae Noé tai. Noé co jae Lamec tai. ³⁷ Lamec co jae Matusalén tai. Matusalén co jae Enoc tai. Enoc co jae Jared tai. Jared co jae Mahalaleel tai. Mahalaleel co jae Cainán tai. ³⁸ Cainán co jae Enós tai. Enós co jae Set tai. Set co jae Adán tai. Adán co jae Tumpa tai.

4

Aña guasu umingueta Jesúis uyavica vaerā tēi chupe

(Mt 4.1-11; Mr 1.12-13)

¹ Jare Jesúis ou ye Jordán güi. Jae tinee Espíritu Santo pe. Jayave Espíritu Santo güíraa Jesúis ñana pe.

² Jare Jesúis upita ñana pe cuarenta ara, jare aña guasu umingueta uyavica vaerā tēi chupe. Jare jocua ara reta pe Jesúis jou'a mbae ave. Jáeramo jocua ara reta opa ma yave, iyembai. ³ Jayave aña guasu jei Jesúis pe:

—Nde co jae Tumpa Tai yave, ere cua ita pe uyeyapo vaerā mbiyaperá.

⁴ Êrei Jesúis jei chupe:

—Tumpa iñee pe uyecuatía oï curarái: ‘Icavi co iví pegua reta jou vaerā mbiyape güinoi vaerā tecove. Êrei icavi ete co uyapisaca vaerā Tumpa iñee re jare uyapo vaerā jei vae güinoi vaerā tecove opa mbae vae.’ Jucuarái uyecuatía oï —jei.

⁵ Jayave aña guasu güíraa Jesúis penti ivitu guasu ivate vae re jare uechaca chupe penti jeia pe opaete mburuvicha guasu reta iporoyocuia iví pe ñugüinoi vae reta. ⁶ Jayave aña guasu jei Jesúis pe:

—Tamee ndeve mbaepuere ndiyeyapo vaerā opaete cua juvicha guasurã, opaete vae nembiadadora vaerā. Echa'â cua mbaepuere uñemee co cheve jare chepuere amee aiporta amee chupe vae pe —jei—.

⁷ Nde ndiyeaticha yave chembiyerovia vaerā, tamee ndeve nembaerā —jei.

⁸Jayave Jesús jei chupe:

—Esíri chegüi, Satanás. Echa'ã Tumpa iñee pe uyecuatía oí cuarái: ‘Che co jae ndeYa Tumpa. Chembiadora. Jaeño cheve iyeyocui.’ Jucuarái uyecuatía oí —jei.

⁹Jayave aña guasu güüraa Jesús Jerusalén pe jare umbuyupi Tumpa jo iyapite re. Jayave jei chupe:

—Nde co jae Tumpa Tai yave, ea cua güi. ¹⁰Echa'ã Tumpa iñee pe uyecuatía oí cuarái:

‘Tumpa oyocuita ángel reta uyandareco vaerä nderé.

¹¹Ipo pe ndepisi neocota reta, agüiye vaerä ndepi uyererocua ita re.’

Jucuarái uyecuatía oí —jei aña guasu chupe.

¹²Jayave Jesús jei chupe:

—Tumpa iñee pe uyecuatía oí cuarái: ‘Che co jae ndeYa Tumpa. Agüiye mbae iyapo ndicuaa vaerä tuicha ra chepiaguasu.’ Jucuarái uyecuatía oí —jei.

¹³Jare aña guasu opa ma umingueta yave uyavica vaerä tẽi chupe, usiri chugüi michi pegua.

Jesús umbipi iparavíqui

(Mt 4.12-17; Mr 1.14-15)

¹⁴Jayave Jesús ou ye Galilea pe. Jare güünoi mbaepuere Espíritu Santo umee chupe vae. Jare jerácua jese opaete jocua íví rupi. ¹⁵Jare jae oporomboe judío reta itupao reta pe jare opaete vae umbiadora.

Jesús Nazaret pe

(Mt 13.53-58; Mr 6.1-6)

¹⁶Jayave ou ye Nazaret pe - joco pe jae ucuacuaa. Jayave mbutuu ara pe uique judío reta itupao pe uyapoñoi ramí, jare uyemboi Tumpa iñee umingueta vaerä. ¹⁷Jare uñiemee Jesús pe penti libro. Jocua libro pe oí Tumpa iñee aracae umimbeu vae Isaías uiciatía vae. Jayave Jesús uipea libro jare uvâe umingueta vaerä. Jayave umingueta cuarái:

¹⁸“YandeYa iEspíritu ime che ndive oí.

Jae cheparavo amimbeu vaerä ñee icavi vae iparavete vae reta pe.

Jae chembou ambipiacatu vaerä ipiatiti vae reta.

Chembou vi amimbeu vaerä pereso reta pe ipuere ma uyeyora,

jare amimbeu vaerä jesa mbae vae reta pe umae vaerä.

Chembou vi ayora vaerä uiporara vae reta uiporaraca chupe vae reta imbaepuere güi.

¹⁹Chembou vi amimbeu vaerä yandeYa ipiacavita opaete vae pe.”

Jucuarái umingueta. ²⁰Jayave Jesús uyuquenda ye libro jare umee ye libro iyandarecoa pe. Jayave uguapi ye. Jare opaete tupao pe ñugüinoi vae reta umae ngatu Jesús re. ²¹Jayave Jesús jei chupe reta:

—Cua ara cua uyecuatía oí vae uyeyapo ma perovaque.

²²Jare opaete joco pe ñugüinoi vae reta uyeminguela cavi jese. Echa'ã ipiacañi iñee icavi ete vae re. Jae reta jei:

—¿Jae'ã yera cua José tai?

²³Jayave Jesús jei chupe reta:

—Pereta co cheve jocua yamijaanga reve yae vae: ‘Nde co jae penti upurupiano vae. Jáeramo iñepiano. Echa'ã jerácua oreve quirái mbaembae ndiyapo Capernaum pe. Jáeramo iyapo vi cua pe ndeivi pe’ —pereta, jei—. ²⁴Añete che jae peve, ime yave quía Tumpa iñee umimbeu jentaigua reta pe vae, jae reta güürovia'ã —jei—. ²⁵Añete che jae peve, jeta cuña ime umano vae reta yugüireco Israel pe Elías ico rambueve. Mbapi año jare seis yasi oquí'ã jare caruai opaete que rupi —jei—. ²⁶Êrei Tumpa omondo'ã Elías penti cuña ime umano vae Israel pegua pe. Jaeño omondo penti cuña ime umano vae tenta guasu Sarepta Sidón pegua vae pe —jei Jesús chupe reta—. ²⁷Jae ramiño vi jeta ipire ocui vae reta yugüireco Israel pe Tumpa iñee aracae umimbeu vae Eliseo ico rambueve. Êrei Tumpa omondo'ã Eliseo umbigüera vaerä penti ipire ocui vae Israel pegua. Jaeño omondo umbigüera vaerä Naamán, jare Naamán co jae Siria pegua —jei.

²⁸Cua uyandu reta yave, opaete tupao pe ñugüinoi vae reta pochi ete Jesús pe. ²⁹Jayave jae reta upúa jare güüraa Jesús tenta guasu güi ívitü iyapite re omombo vaerä tẽi íví cotí joco güi. Jocua tenta guasu oí ívitü guasu re. ³⁰Êrei Jesús uasa jae reta ipite rupi jare oo chugüi reta.

Cuimbæ aña oya jese vae

(Mr 1.21-28)

³¹Jayave Jesús oo tenta guasu Capernaum Galilea pegua pe. Joco pe Jesús oporomboe opaete mbutuu ara pe. ³²Jare uyapisaca jese vae reta ipiacañi iporomboe re. Echa'ã omboe reta mbaepuere güünoi vae ramí. ³³Jare uique oo tupao pe cuimbæ aña oya jese vae. Jae iñeeäta reve jei:

³⁴—¿Maera pa ndeyu oremambeco, Jesús Nazaret pegua? ¿Ndeyu pa oremicañitei vaerä? Che nducuuaa. Nde co jae Tumpa Tai —jei.

³⁵Jayave Jesús uñeengata chupe.

—¡Nequii! ¡Esiri chugüi! —jei.

Jayave opaete vae jovaque aña uití ivi re cuimbae jare usiri chugüi. Ueya caviño.³⁶ Jare opaete uecha vae reta ipiacañi, jare upirandu uyupe:

—Mbae nunga ñee pa cua? Echa'ã mbaepuere pe oyocui aña reta usiri vaerã oya jese vae reta güii, jare jae reta uyapo oyocui vae —jei reta.

³⁷ Jare jerácuja jesegua opaete jocua ivi rupi.

Jesús umbigüera Simón jaicho

(Mt 8.14-15; Mr 1.29-31)

³⁸ Jare Jesús tupao güii oë ye yave, uique Simón jenta pe. Jare Simón jaicho tanta jacu oï. Íru joco pe ñugüinoi vae reta uyerure Jesús pe umbigüera vaerã.³⁹ Jayave Jesús oo cuña oï vae pe, jare jei jacu upita vaerã chugüi. Jayave jacu upita chugüi. Jayave jupivoiño cuña upúa jare umee mbae jou reta vaerã.

Jesús umbigüera imbaerasi vae reta

(Mt 8.16-17; Mr 1.32-34)

⁴⁰ Jare guarasi uique ma yave, opaete jentará imbaerasi vae güinoi vae reta güeru imbaerasi vae reta Jesús oï vae pe. Jare Jesús oñono ipo penti penti re jare umbigüera reta.⁴¹ Jare aña reta usiri oya jese vae reta güii. Usapicai reta jare jei:

—Nde co jae Tumpa Tai.

Êrei Jesús uñeenaga chupe reta. Umaeñoo'ã aña reta re uyemingueta vaerã. Echa'ã jae reta uicuua jae co Cristo, Tumpa ombou vae.

Jesús oo Galilea rupi umimbue Tumpa iñee

(Mr 1.35-39)

⁴² Piareve pe Jesús oë tenta guasu güi oo quii ngatu vae pe. Jayave tenta guasu pegua reta yugüira ueca. Jare yugüira uvae yave oï vae pe, uyerure tēi chupe agüiye vaerã oo chugüi reta.⁴³ Êrei Jesús jei chupe reta:

—Icavi co aa vaerã íru tenta guasu-rai reta pe amimbeu vaerã joco pe vi ñee icavi vae Tumpa iporoyocuia regua. Echa'ã cuarã Tumpa chembou —jei.

⁴⁴ Jare oo opaete ivi Galilea rupi, jare umimbue Tumpa iñee judío reta itupaopao rupi.

5

Uipisi reta jeta ete pira

(Mt 4.18-22; Mr 1.16-20)

¹ Jare penti ara Jesús uyemboi rambueve i guasu Genesaret jee vae jembei pe, jeta vae yugüeru jae oï vae pe uyapisaca vaerã Tumpa iñee re.² Jare Jesús uecha mocui chalana i jembei pe. Iya reta pira uipisi vae reta co. Cua iya reta ueya joco pe, pisa reta oyoe rambueve.³ Jayave Jesús uyupi penti chalana pe, jare uyerure Simón pe uruque vaerã chalana i pe. Echa'ã Simón imbae co jocua chalana. Jayave Jesús uguapi chalana pe jare joco güi omboe joco pe ñugüinoi vae reta.

⁴ Jare opa ma uyemingueta yave, Jesús jei Simón pe:

—Ecua i tipi vae pe pemombo pepisa reta pipisi vaerã pira.

⁵ Jayave Simón jei Jesús pe:

—CheYa, orecoé ma nduparaviqui tēi. Nduipisi'ã mbae ave. Êrei tamombo pisa reta nde ndere cheve ramo —jei.

⁶ Jare jucuarai uyapo reta ma yave, jeta ete pira reta uique pisa pe. Jare pisa uyebipi osoro.⁷ Jayave uyepueru reta iíru íru chalana pe ñugüinoi vae reta pe yugüeru vaerã ombori. Jayave jae reta yugüeru jare umitinee reta mocui reve chalana. Jare mocui reve poi ete jare usacambu pota echa.⁸ Jare Simón Pedro cua uecha yave, uyeatíca Jesús jovai jare jei chupe:

—Esiri chegüi, cheYa. Echa'ã che co jae penti cuimbae iyoa vae —jei.

⁹ Echa'ã Pedro jare opaete jae ndive ñugüinoi vae reta ipiacañi jeta ete pira uipisi vae re.¹⁰ Jae ramíño vi Simón iíru reta Jacobo jare Juan jee vae ipiacañi jese. Jacobo jare Juan Zebedeo tai reta co. Jayave Jesús jei Simón pe:

—Agiüiye equiye. Che nduyapota íru vae reta nderu vaerã cheve cua ara güive —jei.

¹¹ Jayave jae reta güeru ichalana reta i jembei pe. Jayave ueya reta opaete, yugüira vaerã Jesús jupié.

Jesús umbigüera cuimbae ipire ocui vae

(Mt 8.1-4; Mr 1.40-45)

¹² Jare Jesús oo uvae yave penti tenta guasu pe, joco pe oï penti cuimbae ipire ocui vae. Cuimbae uecha Jesús yave, uyeatíca jae jovai jare uyerure chupe.

—CheYa —jei—, ndipota yave, ndepuere chembigüera.

¹³ Jayave Jesús oñono ipo jese.

—Aipota. Ecuela —jei chupe.

Jare jupivoiñño cuimbae ucuela imbaerasi güi. Ocupi'ña ma ipire.¹⁴ Jayave Jesús oyocui:

—Agüiye emimbeu quía pe. Ecuela iyechaca sacerdote pe, jare emee ofrenda Moisés peocui rami, tenta guasus pegua reta uicuua vaerā ndecuera ma co —jei.

¹⁵ Ërei jeta vae uyandu Jesús uyapo vae regua. Jayave jeta vae uyembati jae oí vae pe uyapisaca vaerā jese jae umbigüera vaerā imbaerasi vae reta. ¹⁶ Ërei Jesús oo chugüi reta ñuu coti yuerure vaerā Tumpa pe.

Jesús umbigüera cuimbae ipuere mbae omi vae

(Mt 9.1-8; Mr 2.1-12)

¹⁷ Jare penti ara Jesús oporomboe oí, jare amocue fariseo reta jare mboroyocui re oporomboe vae reta uguapi ñugüiñnoi jocoropi. Jae reta yugüieru Jerusalén jare opaete tenta guasu Galilea jare Judea pegua reta güi. Jare Jesús güiñnoi Tumpa imbaepuere umbigüera vaerā imbaerasi vae reta. ¹⁸ Jayave amocue yugüieru vae reta güeru penti cuimbae imbaerasi vae jupa reve. Cua cuimbae ipuere mbae omi vae. Güeru vae reta uipota tēi uruique imbaerasi vae o pe, oñono vaerā Jesús jovai. ¹⁹ Ërei ipuere'ña uruique Jesús oí vae pe, uyembiapé'ye ñugüiñnoi reta ramo. Jáeramo uruyupi o írambo jare uipea chupe Jesús jese catu. Joco pe umbigüeyi jocua cuimbae ipuere mbae omi vae jupa reve opaete vae ipite pe Jesús jovai. ²⁰ Jesús cua uecha yave, uicuua jae reta güirovia co jese, jare jei cuimbae ipuere mbae omi vae pe:

—Nembaeyoa reta uyembai ma, cherivi.

²¹ Jayave mboroyocui re oporomboe vae reta jare fariseo reta ipia pe uyemingueta: “¿Quía pa co jae cuarāi jei vaerā? Jei icavi mbae vae Tumpa coti. Tumpaño co ipuere umbiásia quía pe imbaeyoa reta.”

²² Ërei Jesús uicuua jae reta ipiayemingueta, jare jei chupe reta:

—Maera pa pepia pe piyemingueta jucuarāi?²³ Chepuere jae cua cuimbae pe: ‘Nembaeyoa reta uyembai ma.’ Jae ramiño vi chepuere jae chupe: ‘Epúa eguata.’ ¿Mbae nunga pa yavai jae vaerā? —jei Jesús chupe reta—. ²⁴ Ërei aipota picuua vaerā cua: Che cuimbaera ayeyapo vae chepuere ambiasa quía pe imbaeyoa reta cua ivi pe aí rambueve —jei.

Jayave jei cuimbae ipuere mbae omi vae pe:

—Che jae ndeve: Epúa evoi nderupa, jare ecua nerenta pe —jei.

²⁵ Jayave jupivoi cuimbae upúa, jare ovoi jupa, jare oé oo jenta coti opaete joco pe ñugüiñnoi vae reta jovaque. Jare oo rambueve, umbiadura Tumpa. ²⁶ Jae ramiño vi opaete joco pe ñugüiñnoi vae reta umbiadura Tumpa. Echa'ña opareve ipiacañi jare uquiyi. Jei reta:

—Cua añave yaecha vae ñanemipiacañi.

Jesús ueni Leví

(Mt 9.9-13; Mr 2.13-17)

²⁷ Jayave Jesús oé jare uecha mburuvicha peguarā ocovara vae Leví jee vae uguapi oí mburuvicha peguarā ocovara ñugüiñnoi vae pe, jare jei chupe:

—Eyu cherupié.

²⁸ Jayave Leví upúa, jare oo jae jupié. Ueya opaete imbaembae joco pe.

²⁹ Jare Leví uyapo parea guasu jae jenta pe Jesús peguarā. Jare joco pe jeta mburuvicha peguarā ocovara vae reta jare íru vae reta ucaru vi ñugüiñnoi Jesús jare íru reta ndive. ³⁰ Ërei mboroyocui re oporomboe vae reta jare fariseo reta iñengurú Jesús jemimboe reta pe. Jei reta:

—¿Maera pa pecaru mburuvicha peguarā ocovara vae reta jare tecu icavi mbae vae uyapo vae reta ndive?

³¹ Jayave Jesús jei chupe reta:

—Icove catu vae reta ueca'ña upurupiano vae. Imbaerasi vae retaño ueca —jei—. ³² Che ayu aeca vaerā iyoa vae reta ueya vaerā iyemingueta icavi mbae vae ipia pe oí vae. Ayu'ña aeca vaerā jupi vae reta —jei.

Maera Jesús jemimboe reta uyecuacu'ña tembíu güi

(Mt 9.14-17; Mr 2.18-22)

³³ Jare amocue vae yugüieru Jesús oí vae pe jare jei chupe:

—Juan jemimboe reta jeta vese uyecuacu tembíu güi yuerure reve Tumpa pe. Jae ramiño vi uyapo jucuarāi fariseo reta jemimboe reta. Ërei nderemimboe reta ucaruñoi —jei reta.

³⁴ Jayave Jesús jei chupe reta:

—Umendata vae pe ñugüiñnoi vae reta ndarau etei uyecuacu tembíu güi, umendata vae jae reta ndive oí rambueve —jei—. ³⁵ Ërei outa uvae ara umendata vae yuereraaca vaerā chugüi reta. Jayave ramo uyecuacuta tembíu güi —jei.

³⁶ Jayave imiari chupe reta umijaanga reve.

—Icaví'ña yamboa vaerā temimonde indechi vae maemboyaa ipiau vae pe. Echa'ña jucuarāi yayapo yave, maemboyaa ipiau vae umiáta temimonde indechi vae, jare temimonde jeiete osoro —jei—. ³⁷ Jae

ramiño vi icavi'ā yambíru vaerā vino ipiau vae vino jíru guacapi indechi vae pe. Echa'ā jucuarāi yayapo yave, vino ipiau vae omondoro jíru, jare vino uyepiyere, jare jíru icavi'ā ma —jei—.³⁸ Jáeramo yambíru vino ipiau vae jíru ipiau vae pe —jei—.³⁹ Jare ime yave quía vino indechi vae jou vae, uipota'ā jupivoi jou vino ipiau vae. Echa'ā jae jei vino indechi vae icavi ete vino ipiau vae güi —jei.

6

Jesús jemimboe reta uipoo trigo mbutuu ara pe

(Mt 12.1-8; Mr 2.23-28)

¹ Mbutuu ara pe Jesús oo co rupi jemimboe reta ndive. Jare jemimboe reta uipoo trigo. Jayave uiopoquiti uequi vaerā ipire, trigo jou vaerā.² Jare amocue fariseo reta jei chupe reta:

—¿Maera pa piyapo piyapota'ā tēi mbutuu ara pe vae?

³ Jayave Jesús jei fariseo reta pe:

—¿Peminguela'ā pa David uyapocue vae regua, jae jare jae ndive ñugüinói vae reta iyembái yave? —jei—.⁴ David uique Tumpa jo pe jare jou mbiyape Tumpa jo pe uñéñono tee vae reta, jare umee vi jae ndive ñugüinói vae reta pe. Agüiyeta tēi co quía jou jocua mbiyape, jaenó sacerdote reta —jei.

⁵ Jayave Jesús jei chupe reta:

—Che cuimbaerā ayeyapo vae chepuere jae mbae icavi uyeyapo vaerā mbutuu ara pe.

Cuimbae ipo jovaicho tipa vae

(Mt 12.9-14; Mr 3.1-6)

⁶ Jare íru mbutuu ara pe Jesús uique judío reta itupao pe jare oporomboe. Jare joco pe oī penti cuimbae ipo iyacata tipa vae. ⁷ Jare mboroyocui re oporomboe vae reta jare fariseo reta umae ngatu Jesús re, uecha vaerā umbigüerata ra quía mbutuu ara pe. Echa'ā uipota tēi umbijeco vaerā.⁸ Ërei Jesús uicuaa jae reta ipiyemingueta, jare jei cuimbae ipo jovaicho tipa vae pe:

—Epúa eyu iyemboi cua reta jovai.

Jayave cuimbae upúa uyemboi joco pe ñugüinói vae reta ipite pe.⁹ Jayave Jesús jei chupe reta:

—Tapirandu peve cua: ¿Mbae pa jei mboroyocui? ¿Yayapota pa icavi vae ani icavi mbae vae mbutuu ara pe? ¿Icavi pa yapuruepi ani yapuruyuca vaerā mbutuu ara pe? —jei.

¹⁰ Jayave umae opaete iyipi rupi ñugüinói vae reta re, jare jei cuimbae pe:

—Eupi ndepo.

Jayave cuimbae ipo uupi, jare ucuera voi.

¹¹ Jayave mboroyocui re oporomboe vae reta jare fariseo reta pochi ete Jesús pe jare uyemboemboe mbae ra uyapota Jesús pe.

Jesús uiparavo doce jemimondo retarā

(Mt 10.1-4; Mr 3.13-19)

¹² Jayave penti pítu Jesús oo ivitu guasu re uyerure vaerā Tumpa pe, jare icōe joco pe uyerure Tumpa pe.¹³ Jare cōe ma yave, ueni jemimboe reta. Jayave uiparavo doce umbijee temimondo reta vae:¹⁴ Simón (Jesús umbijee Pedro), jare Simón tivi Andrés jee vae, jare Jacobo jare Juan, jare Felipe, Bartolomé,¹⁵ Mateo, Tomás, Alfeo tai Jacobo jee vae, Simón (jae co Zelote pe ueni vae),¹⁶ Jacobo tivi Judas jee vae, jare Judas Iscariote (cua cuimbae umee Jesús jovaicho reta pe).

Jesús omboe jeta vae

(Mt 4.23-25)

¹⁷ Jayave Jesús ugüeyi ye ivitu guasu güi ñuu pe jae reta ndive. Jare joco pe ñugüinói jeta Jesús jemimboe reta jare jeta Judea pegua reta jare Jerusalén pegua reta jare tenta guasu Tiro jare Sidón iyipi rupigua reta. Tiro jare Sidón co ñugüinói i guasu güi. Opaete vae yugüera uyapisaca vaerā Jesús re, jare Jesús umbigüera vaerā imbaerasi vae reta.¹⁸ Jesús umbigüera vi aña oya jese vae reta.¹⁹ Jare opaete vae uipota uyavíqui Jesús. Echa'ā jae güinói mbaepuere umbigüera vaerā opaete imbaerasi vae reta.

Uyerovia vae reta

(Mt 5.1-12)

²⁰ Jayave Jesús umae jemimboe reta re jare jei:

—Tuyerovia iparavete vae reta. Echa'ā Tumpa umeeta chupe reta yugüireco vaerā iporoyocuia pe —jei—.²¹ Tuyerovia añave iyembái vae reta. Echa'ā Tumpa jeta umeeta chupe reta. Tuyerovia añave uyao vae reta. Echa'ā upucata reta —jei—.²² Iru vae reta pemitaréita jare ndarau uipota yugüireco peírurā. Jae reta jeita icavi mbae vae peve jare uyemingueta peágüe pe. Cuarái uyapota reta peve, pe reta perovia cheré ramo. Che co jae cuimbaerā uyeyapo vae. Ërei piyerovia —jei Jesús—.²³ Jocua ora ou uvae yave, piyerovia. Echa'ā Tumpa güinói ara pe mbae icavi ete vae pombaerā. Echa'ā jucuarái

uyapota reta peve vae itenondegua reta uyapo cua nunga icavi mbae vae Tumpa iñee aracae umimbeu vae reta pe —jei—.²⁴ Ërei icocatu vae reta uiporarata co. Echa'ã jae reta uyerovia ma jeta corepoti güïnoi vae re —jei Jesús chupe reta—.²⁵ Jare jeta güïnoi vae reta uiporarata co. Echa'ã iyembaita reta. Añave upuca reta. Ërei ipiatitita reta jare uyaota reta —jei—.²⁶ Jare opaete vae jei icavi vae jese vae reta uiporarata co. Echa'ã jucuaräiño vi uyapo itenondegua reta upurumbitavi vae reta pe. Jocua upurumbitavi vae reta jei iyapu reve: ‘Che co jae Tumpa iñee umimbeu vae’ —jei Jesús—.

Peau perovaicho reta

(Mt 5.38-48; 7.12)

²⁷ Ërei che jae pe reta piyapisaca cheré vae pe cu: Peau perovaicho reta, jare piyapo icavi vae pemitarëi vae reta pe —jei—.²⁸ Íru vae reta uyepipeyu peré yave jare icavi mbae vae jei peve yave, piyerure Tumpa pe jae umivendise reta vaerä —jei—.²⁹ Ime yave quía ocua nderovaique re vae, erova ipuere vaerä ocua ye jovalcho re. Jare ime yave quía ndeasoya upíro ndegüi vae, emaeño jese upíro vaerä ndegüi ndecamisa vi —jei—.³⁰ Ime yave quía uyerure ndeve mbae re vae, emee chupe. Jare ime yave quía nembaembae upíro ndegüi vae, agüiye iñemiacatëi chupe —jei—.³¹ Piyapo íru vae reta pe pipota íru vae reta uyapo vaerä peve vae rami —jei chupe reta—.

³² Echa'ã peau yave perau vae retaño, jocua mbaeti co mbae icavi vae. Echa'ã iyoa vae reta uyapo vi jucuaräi —jei—.³³ Jare piyapo yave icavi vae uyapo peve vae reta peño, jocua mbaeti co mbae icavi vae. Echa'ã iyoa vae reta uyapo vi jucuaräi —jei—.³⁴ Jare piporuca yave mbae íru vae pe jae umee ye peve vaeräño, jocua mbaeti co mbae icavi vae. Echa'ã iyoa vae reta uiporuca mbaembae íru vae pe jocua íru vae umbijecovia ye chupe vaerä —jei—.³⁵ Ërei peau perovaicho reta, jare piyapo icavi vae chupe reta. Piporuca mbae íru vae pe jare agüiye peáro umbijecovia ye peve vaerä. Jucuaräi piyapo yave, Tumpa umeeta peve mbae icavi ete vae jare peapota tai retardar. Echa'ã Tumpa ipiacavi umee'ä yasurupai chupe vae reta pe jare icavi mbae vae uyapo vae reta pe —jei—.³⁶ Piparareco íru vae reta, peRu uiparareco rami —jei—.

Iñera íru vae re

(Mt 7.1-5)

³⁷ Agüiye piñera íru vae re, agüiye vaerä íru vae iñera peré. Agüiye pembijeco íru vae mbae re, agüiye vaerä íru vae pembijeco mbae re. Pembiasa íru vae pe, íru vae umbiásasa vaerä peve —jei—.³⁸ Pemee mbaembae íru vae reta pe, jare íru vae reta umeeta mbaembae peve. Jae reta umeeta peve jeta ete íru vae reta pe pemee vae güi. Echa'ã icavi vae piyapo yave íru vae reta pe, íru vae reta uyapota icavi vae peve. Ërei icavi mbae vae piyapo yave íru vae reta pe, íru vae reta uyapota icavi mbae vae peve —jei—.

³⁹ Jayave Jesús jei chupe reta umijaanga reve:

—Penti jesa mbae vae ipuere'ä etei uechaca tape íru jesa mbae vae pe. Jucuaräi uyapo yave, mocui reve uasavita iñicua pe —jei—.⁴⁰ Penti uyemboe oï vae uicuua ete'ä oporomboe vae uicuua vae rami. Ërei opaete re uyemboe yave, uicuata oporomboe vae uicuua rami —jei—.

⁴¹ Agüiye emae iti michi vae neíru jesa pe oï vae re, ime yave nenoit iñi tuicha vae nderesa pe —jei—.

⁴² Ndaraú ndepuere ndere neíru pe: ‘Cherivi, taequi nderesa güi jocua iti michi vae.’ Echa'ã nde nenoit iñi tuicha vae nderesa pe. Nde co jae upurumbitavi vae. Eequi rani iti tuicha vae nderesa güi. Jayave nemae cavita ndepuere vaerä ndeequi iti michi vae neíru jesa güi —jei—.

Ía icavi vae jare ía icavi mbae vae

(Mt 7.17-20; 12.33-35)

⁴³ Penti temiti icavi vae umee'ä ía icavi mbae vae. Jae ramíño vi penti temiti icavi mbae vae umee'ä ía icavi vae —jei—.⁴⁴ Echa'ã yaicuua penti temiti icavi co, ía icavi yave. Yaequ'iä iva penti yai játi vae güi. Jae ramíño vi yaequ'iä uva penti yai játi vae güi —jei—.⁴⁵ Quía nunga jecocavi vae güïnoi icavi vae ipia pe. Jáeramo jei icavi vae. Jae ramíño vi quía nunga jecopochi vae güïnoi icavi mbae vae ipia pe. Jáeramo jei icavi mbae vae. Echa'ã penti penti uyemingueta ipia pe güïnoi vae rupi —jei—.

Tenta iguapica

(Mt 7.24-27)

⁴⁶ ¿Maera pa pere cheve: ‘OreYa, oreYa?’ Echa'ã piyapo'ä che jae peve piyapo vaerä vae —jei—.⁴⁷ Ime yave quía ou cheve uyapisaca vaerä cheré vae, jae uyapo yave che jae chupe uyapo vaerä vae, tamijaanga peve mbae rami co jae —jei—.⁴⁸ Jae co penti cuimbae jentará uyapo vae rami. Oyoo quipe oñono vaerä tenta iguapicarä itape re. Jare tenta uyeyapo ma yave, tuicha oñi jare jeta ete i usiri tenta iyipi rupi. Ërei tenta omi'ä etei. Echa'ã iyapoa oñono itape re —jei—.⁴⁹ Ërei ime yave quía uyapisaca cheré vae, uyapo'ä yave che jae chupe uyapo vaerä vae, jae co íru cuimbae jentará uyapo vae rami. Ërei jae oyoo'ä oñono vaerä tenta iguapicarä itape re. Oñono jentará iñi iaramboño. Jayave tuicha oñi jare jeta ete i usiri tenta iyipi rupi jare opa umbiyapara. Opa uyembai jocua tenta —jei—.

*Jesús umbigüera sundaro reta juvicha jembiocui
(Mt 8.5-13)*

¹Jare opa ma imiari yave uyapisaca jese vae reta pe, Jesús oo Capernaum pe. ²Jare jocua tenta guasu pe ico penti sundaro reta juvicha jembiocui. Cua cuimbae imbaerasi. Umano pota echa. Jare sundaro reta juvicha uau cua jembiocui. ³Jare sundaro reta juvicha uyandu Jesús regua. Jáeramo omondo Jesús oí vae pe amocue judío reta itenondegua reta, jae reta uyerure vaerā Jesús pe oo vaerā umbigüera sundaro reta juvicha jembiocui. ⁴Jare yugüeru uvāe yave Jesús oí vae pe, uyerure chupe cua re. Jei reta chupe:

—Cua mburuvicha ipiacavi co. Jáeramo icavi co nde ndiyapo vaerā cua chupe. ⁵Echa'á jae yanderau jare uyapo yandeve penti tupao —jei reta. ⁶⁻⁷Jayave Jesús oo jae reta jupié. Jare yugüiraa ma uvāe yave coïño mburuvicha jenta güi, mburuvicha ombou amocue iíru reta uñeväiti vaerā Jesús ndive. Jae reta jei chupe:

—Mburuvicha jei: ‘Agüiye iyemambeco, che Ya, ndeyu vaerā cherenta pe. Echa'á mbae'á co che. Jáeramo aa'á nooväiti. Ndepuere ndere joco güiñio cherembiocui ucuera vaerā, jare ucuerata co’ —jei, jei reta chupe. ⁸‘Echa'á ime mburuvicha mbaepuere güiñoi cheré vae reta. Jae ramíño vi che anoi mbaepuere sundaro reta re. Che jae penti sundaro pe: Ecua, jare jae oo. Jae ramíño vi che jae iíru sundaro pe: Eyu, jare jae ou. Jae ramíño vi che jae cherembiocui pe: Iyapo cua, jare jae uyapo’ —jei, jei reta.

⁹Jare Jesús cua uyandu yave, ipiacañi sundaro reta juvicha re. Jayave uyerova jare jei jeta vae yugüiraa jaicue vae pe:

—Che jae peve, avāe'á cua nunga mburugüirovia tuicha vae Israel pegua reta ipite pe.

¹⁰Jayave sundaro reta juvicha ombou vae reta yugüiraa ye sundaro reta juvicha jenta pe, jare uecha ucuera ma co uyeyocui vae imbaerasi ico vae.

Jesús umbijecove ye cuña ime umano vae imembi cuimbae

¹¹Jayave piareve pe Jesús oo tenta guasu Naín pe. Jare jeta jemimboe reta jare iíru vae reta yugüiraa jae jupié. ¹²Jare oo ma uvāe yave coïño tenta guasu jonque güi, umano vae güeru vae reta yugüeru tenta guasu güi. Umano vae penti cuimbae co jare ichi penti cuña ime umano vae co. Umano vae jocua cuña imembi jae vaeno co. Jare jeta tenta guasu pegua reta yugüeru jocua cuña jupié. ¹³Jare yande Ya uecha yave cuña, uiparareco jare jei chupe:

—Agüiye iyao.

¹⁴Jayave Jesús oo uyavíqui umano vae jíru. Jare ovoi güeru vae reta uyemboi. Jayave Jesús jei tairusu vae pe:

—Che jae ndeve: Epūa.

¹⁵Jayave umano vae uguapi jare umbipi uyeminguela. Jayave Jesús umee ye ichi pe. ¹⁶Jayave opaete vae uquiyé. Umbiadora reta Tumpa. Jei reta:

—Penti Tumpa iñee umimbeu vae ipuere ete vae ou ma yandepite pe. Tumpa ombou yandeve yanderau ramo. Echa'á yande co jae imbae reta —jei reta.

¹⁷Jare Jesús uyapo vae jerācua opaete Judea rupi jare opaete Judea iyipí rupigua rupi.

*Juan ombou jemimboe reta Jesús oí vae pe
(Mt 11.2-19)*

¹⁸Jare Juan jemimboe reta umimbeu Juan pe opaete cua regua. ¹⁹Jayave Juan ueni mocui jemimboe reta jare ombou yande Ya oí vae pe jei vaerā chupe:

—¿Nde pa co jae Cristo outa vae? ani ¿nuñota pa iíru vae ou vaerā?

²⁰Jayave jocua cuimbae reta yugüeru uvāe Jesús oí vae pe jare jei chupe:

—Juan upurumbibautizase vae orembou ndeve. Jae jei: ‘¿Nde pa co jae Cristo outa vae? ani ¿nuñota pa iíru vae ou vaerā?’ —jei, jei reta.

²¹Jayave jocua ora pe etei Jesús umbigüera jeta imbaerasi vae reta jare umbisirí aña reta oya jese vae reta güi. Jae ramíño vi umbigüera jeta jesa mbae vae reta, jae reta umae vaerā. ²²Jayave Jesús jei Juan ombou chupe vae reta pe:

—Pecua ye pemimbeu Juan pe peeche jare piyandu vae. Jesa mbae vae reta umae ma. Ipuere mbae uguata vae reta uguata ma. Ipire ocui vae reta ucuera ma. Iyapisa mbae vae reta uyandu ma. Umano vae reta icove ye ma. Iparavete vae reta uyapisaca ñee icavi vae re —jei—. ²³Jare Tumpa umividisetacueas güiñirovia cheré vae reta —jei chupe reta.

²⁴Jare yugüiraa ye yave Juan ombou vae reta, Jesús umbipi umingueta joco pe ñugüinói vae reta Juan re. Jei chupe reta:

—¿Quía re pa co peo ñana pe pema? Jae ipiráta mbae vae'á co tacuarásí omí ivitú uipeyu yave vae rami —jei—. ²⁵¿Quía re pa co peo pema? Jae omonde'á temimonde ipóra vae. Mase, temimonde ipóra

vae omonde vae reta yugüireco mburuvicha guasu reta jenta pe jare icavi ete yugüireco —jei—.²⁶ ¿Peo ra pemae vaerā penti Tumpa iñee umimbeu vae re? Añete che jae peve, Tumpa umee chupe uyapo vaerā jeta ete ūru Tumpa iñee umimbeu vae reta uyapo vae güi —jei—.²⁷ Tumpa iñee pe uyecuatía oíjese cuarāi:

‘Mase’ —jei Tumpa—, ‘che amondota chiñee güiraata vae nderononde, uyapicatu vaerā nderaperā.’

Jucuarāi uyecuatía oí —jei chupe reta—.²⁸ Che jae peve, Tumpa umee Juan upurumbibautizase vae pe uyapo vaerā jeta ete ūru Tumpa iñee umimbeu vae reta uyapo vae güi. Êrei taicuegua vae Tumpa iporoyocuia pegua uyembutuichaca eteta Juan güi —jei—.²⁹ Jare mburuvicha peguarā ocovara vae reta jare opaete uyapisaca Juan re vae reta uicuaaca Tumpa jupi co. Echa’ā Juan umbibautiza reta —jei—.³⁰ Êrei fariseo reta jare mboroyoci re oporomboe vae reta uyapo’ā Tumpa jei uyapo vaerā vae. Echa’ā uyembibautizaca’ā Juan pe —jei.

³¹ Jayave Jesús jei chupe reta:

—Tamimbeu peve mbae ndive amboyovaque añave yugüireco vae reta. Tamimbeu peve mbae ramí co jae reta —jei—.³² Jae reta co sambiai plaza pe uguapiñugüinoi vae reta ramí. Jae reta jei uyupe cuarāi: ‘Nduyemimbí ma peve, êrei pe reta pepirae’ā. Orepiajtíti perovaque, êrei pe reta piyao’ā.’ Jucuarāi jei —jei—.³³ Echa’ā Juan upurumbibautizase vae ou, jare jae uyecuacu tembíu jare vino güi. Jáeramo pe reta pere aña oya co Juan re —jei—.³⁴ Che cuimbaerā ayeyapo vae ayu, jare che ayequacu’ā tembíu jare vino güi. Jáeramo pe reta pere: ‘Mase, jae jou jeta tembíu jare vino. Jae co mburuvicha peguarā ocovara vae reta jare teco icavi mbae vae uyapo vae reta iamigo’ —pere, jei—.³⁵ Êrei opaete iyaracuua vae reta uicuaaca aracuua icavi co —jei.

Jesús Simón jenta pe

³⁶ Jare penti fariseo uparea Jesús pe oo vaerā ucaru jae ndive. Jayave Jesús oo fariseo jenta pe jare uguapi ucaru vaerā.³⁷ Jare penti cuña aguasa rupi ico vae jocua tenta guasu pegua uicuaa Jesús ucaru co oí fariseo jenta pe, jare güeru mbae ipiche cavi vae jíru ita alabastro jee vae pegua pe.³⁸ Jayave cuña uyemboi Jesús icupe cotí jare uyao. Jare umbipi umáqui Jesús ipí jesai pe. Jayave cuña umítini Jesús ipí ía pe jare uyurupite vi ipí. Jayave uipichí mbae ipiche cavi vae ipí re.³⁹ Jare fariseo Jesús pe uparea vae cuña uecha yave, jei iyupe ipí pe: “Cua cuimbae penti Tumpa iñee umimbeu vae yave, uicuaata tēi quíia co cuña jare mbae nunga cuña co jae. Echa’ā iyoa vae co” —jei.

⁴⁰ Jayave Jesús jei fariseo pe:

—Simón, aipota mbae jae ndeve.

—Ere cheve, oporomboe vae —jei Jesús pe.

⁴¹ Jayave Jesús jei chupe:

—Mocui cuimbae ipíá ūru cuimbae pe. Penti cuimbae ipíá chupe quinientos ara mbaravíqui jepí pegua, jare ūru cuimbae ipíá chupe cincuenta ara mbaravíqui jepí pegua —jei—.⁴² Êrei mocui reve mbaeti güireco corepoti ipíá umbiepi vaerā. Jayave upurumbipíá vae opa umicañi mocui reve pe ipíá —jei—. Emimbeu cheve, upurumbipíá vae cuña uyapo ramo, cuña mocui vae güi ¿quíia nunga pa uau eteta upurumbipíá vae? —jei.

⁴³ Jayave Simón jei Jesús pe:

—Che chepía pe ayeminguela jocua cuimbae jeta ipíá opa umicañi chupe vae.

Jayave Jesús jei chupe:

—Jaecavi ndere.

⁴⁴ Jayave Jesús uyerova cuña cotí jare jei Simón pe:

—Mase, emae cuña re. Che aique nerenta pe yave, nemee’ā cheve i ayoe vaerā chepi. Êrei jae umáqui ma chepi jesai pe jare umítini ía pe —jei—.⁴⁵ Nde cheyurupite’ā. Êrei cuña aique güive uyurupite chepi —jei—.⁴⁶ Nde niñono’ā aceite cheáca re. Êrei cuña cuña uipichi mbae ipiche cavi vae chepi re —jei—.⁴⁷ Jáeramo che jae ndeve, yepe tēi jeta cuña imbaeyoa reta, êrei ambiasa chupe. Echa’ā jae cherau ete. Êrei ime yave quíia michiño ūru vae umbiasa chupe vae, jae michiño vi uau jocua ūru vae —jei.

⁴⁸ Jayave Jesús jei cuña pe:

—Ambiasa ma ndeve nembaeyoa reta.

⁴⁹ Jayave Jesús ndive ucaru ñugüinoi vae reta jei iyupe ipíá pe: “¿Quíia ra co cuña? ¿Quiráita ra ipuere umbiasa quíia pe imbaeyoa reta?”

⁵⁰ Êrei Jesús jei cuña pe:

—Ndiyembiasaca ma nderovia cheré ramo. Ecua ndepiacatu reve —jei.

8

Cuña ombori Jesús vae reta

¹ Jare cua jaicue rupi Jesús oo opaete tenta guasu reta jare tenta guasu-rai reta rupi, jare umimbeu ñee icavi vae Tumpa iporoyocuia regua. Jare jocua doce vae yugüiraa jae jupíe. ²⁻³ Jare jeta cuña reta yugüiraa vi jae jupíe jare ombori Jesús jare jemimboe reta. Mbaembae uata Jesús jare jemimboe reta pe yave, jocua cuña reta ogua chupe reta. Tenonde yave amocue jocua cuña reta imbaerasi jare aña reta oya amocue vae re. Êrei Jesús umbigüera. Penti cuña jee co María Magdalena. Jesús umbisiri siete aña reta chugüii. Íru jee co Juana. Jae co Chuza jembireco. Chuza co jae mburuvicha guasu Herodes jembiocui. Íru jee co Susana.

Jesús umijaanga umaeti vae

(Mt 13.1-9; Mr 4.1-9)

⁴ Jare jeta vae yugüeru opaete tenta guasu reta güi uyembati Jesús oí vae pe. Jayave Jesús jei chupe reta umijaanga reve:

⁵ —Penti cuimbae oo umaeti vaerá. Umaeti yave, umiai temiti, jare amocue oa tape rupi. Jayave íru vae reta upíro temiti re jare güira reta jou vi —jei—. ⁶ Íru temiti oa mboviño ívi itape iárambo oí vae pe. Êrei oë rupive, ipiru, jocua ívi ñäqui ngatu'ã ramo —jei—. ⁷ Íru temiti oa ñanapite pe. Ñana ucuacuua yave, opa yuca temiti —jei—. ⁸ Íru temiti oa ivicavi pe. Cua oë jare ucuacuua jare jeta ete ía —jei—.

Jare cua jei ma chupe reta yave, iñeeäta reve jei:

—Uipota uyandu vae tuyapisaca cua ñee re.

Maera Jesús oporomboe umijaanga reve

(Mt 13.10-17; Mr 4.10-12)

⁹ Jayave Jesús jemimboe reta upírandu Jesús pe:

—¿Mbae pa uipota jei cua nemijaanga reve ndere vae?

¹⁰ Jayave Jesús jei chupe reta:

—Amimbeu ma peve Tumpa iporoyocuia regua. Cua uyecuua'ã íru vae reta pe. Jáeramo amboe íru vae reta amijaanga reve. Cua ayapo agüiye vaerá uicuua cavi, yepe tēi uecha, jare agüiye vaerá uicuua, yepe tēi uyandu —jei—.

Umaeti vae uyemijaanga jese vae

(Mt 13.18-23; Mr 4.13-20)

¹¹ Cua amijaanga reve che jae peve vae uipota jei cua: Temiti uyemijaanga Tumpa iñee re —jei—.

¹² Jocua temiti tape rupi oa vae uyemijaanga amocue Tumpa iñee uyandu vae re. Jayave ou aña guasu chupe reta jare umiacañi Tumpa iñee güi, agüiye vaerá güirovia Tumpa uyembiasaca vaerá —jei—.

¹³ Jae ramiño vi jocua temiti uñeñoti mboviño ívi itape iárambo oí vae pe vae uyemijaanga íru vae reta Tumpa iñee uyandu vae re. Jae reta uyandu rupive, güirovia uyerovia reve. Êrei cua reta jocua temiti japo quipe'ã vae rami co. Echa'ã michi peguaño güirovia ñee. Êrei mbaesusere uyeyapo chupe yave, uipota'ã ma uyapisa reta Tumpa iñee re —jei—. ¹⁴ Jae ramiño vi jocua temiti uñeñoti ñanapite pe vae uyemijaanga íru vae reta Tumpa iñee uyandu vae re. Êrei umbipi uyemipi'ã ívi pe mbaembae uyeyapo vae re jare corepoti uipota güinoi vaerá vae re jare yerovia ívi pegua re. Jáeramo jae reta jocua temiti ia'ã vae rami co —jei—. ¹⁵ Êrei jocua temiti uñeñoti ivicavi pe vae uyemijaanga íru vae reta Tumpa iñee uyandu vae re. Cua reta uyapisa cavi Tumpa iñee re ipiacavi reve, jare uyapo Tumpa iñee jei uyapo vaerá vae. Jáeramo jae reta jocua temiti ía cavi vae rami co. Jae reta uyapo icavi vae ipiaguasu reve —jei Jesús—.

Uñeñomi vae uyechacañotai co

(Mr 4.21-25)

¹⁶ Mechero yamiendi yave, ndarau ñañono yapepo uyembovapo oí vae igüi pe, ani güirapembí igüi pe. Ñañono co mechero jenda pe, o pe uique vae reta güinoi vaerá tembipe —jei—. ¹⁷ Ime yave mbae uñeñomi vae, uyechacañotai co. Jae ramiño vi ime yave mbae uyeyasoí vae, uyecuñañotai co —jei—.

¹⁸ Pepia pe piyeminguela cavi piyandu vae re. Echa'ã güinoi vae pe uñemiruta, jare mbaeti güinoi vae güi mboví ete güinoi echa vae uyeequita —jei—.

Jesús ichi jare tivi reta

(Mt 12.46-50; Mr 3.31-35)

¹⁹ Jayave Jesús ichi jare tivi reta yugüeru uväe Jesús oí vae pe. Êrei ipuere'ã oya Jesús re jeta joco pe ñugüinoi vae reta jeco pegua. ²⁰ Jayave amocue vae jei Jesús pe:

—Ndesi jare nderiví reta oca pe ñugüinoi. Ndereca ñugüinoi —jei reta chupe.

²¹ Jayave Jesús jei chupe reta:

—Cua reta uyapisaca Tumpa iñee re jare uyapo jei vae. Cua nunga reta co jae chesi jare cherivi reta —jei.

Jesús umiquíi i guasu

(Mt 8.23-27; Mr 4.35-41)

²² Jare penti ara Jesús uyupi chalana pe jemimboe reta ndive. Jayave Jesús jei chupe reta:

—Yaa i guasu jovaicho pe.

Jayave umbipi uasa i guasu. ²³ Ërei uasa ñugüinói rambueve, Jesús oque oï. Jare ou ivitu tanta ueyepuy, jare i uyembiaparoaroa uiqé chalana pe, jare umitinee seri ma. Jae reta ipia pe uyeminguela umanota co. ²⁴ Jayave omomba reta Jesús, jare jei chupe:

—jOporomboe vae, oporomboe vae! Ñamanota ma.

Jayave Jesús upúa, jare uiñengata ivitu jare i guasu pe. Jare jupivoiño upita ivitu, jare opaete quii ngatá. ²⁵ Jayave Jesús jei chupe reta:

—¿Maera pa pepurugüirovia'a?

Jare jae reta uquiyé jare ipiacañi, jare jei uyupe:

—¿Mbae nunga cuimbae pa cua? Echa'á jae oyocui ivitu jare i guasu, jare jae reta uyapo oyocui vae —jei reta.

Cuimbae Gadara pegua aña reta oya jese vae

(Mt 8.28-34; Mr 5.1-20)

²⁶ Jayave yugüiraa Galilea güi uváe i guasu jovaicho pe, gadareno reta iivi pe. ²⁷ Jesús ugüeyi ma chalana güii yave, ou ováiti penti cuimbae jocua tenta guasu pegua. Íma ma aña reta oya jese. Nani ico. Ico'a etei tenta rupi. Teoguerirurenda rupiño ma ico. ²⁸ Cua cuimbae uecha Jesús yave, usapicai jare ueyatíca Jesús jovai. Jayave iñeeata reve jei:

—¿Maera pa ndeyu chemamboco, Jesús? Nde co jae Tumpa ara pe oï vae Tai. Ayerure ndeve agüiye iporaraca cheve —jei.

²⁹ Echa'á Jesús oyocui ma aña usiri vaerä cuimbae güi. Íma ma uyembiyya jese. Jare íru vae reta uiopucia tēi ipo jare ipi cadena pe. Ërei jae opa omondoo cadena reta. Jare jecuaeño oo ñana coti aña omondo ramo. ³⁰ Jare Jesús upirandu chupe:

—¿Mbae pa nderee?

—Cheree co jae jeta vae —jei.

Echa'á jeta aña reta oya jese. ³¹ Jayave aña reta uyerure Jesús pe agüiye vaerä oyocui reta yugüiraa vaerä umanocue vae reta ipi. ³² Jare joco pe jeta cuchi reta ucaru ñugüinói ivitu guasu re. Jayave aña reta uyerure Jesús pe umaeño vaerä jese reta oya vaerä cuchi reta re. Jayave Jesús umaeño jese reta.

³³ Jayave aña reta usiri cuimbae güi, jare oya cuchi reta re. Jayave cuchi reta tanta osi ivíva rupi oa i guasu pe, jare joco pe opa ipitupa reta.

³⁴ Jare cuchi iyandarecoa reta cua uecha yave, osi yugüiraa tenta guasu pe umimbeu joco pegua reta jare icotí'á rupigua reta pe cua uyeyapo vae regua. ³⁵ Jayave uyandu vae reta yugüeru, uecha vaerä mbae uyeyapo vae. Jare yugüeru uváe yave Jesús oï vae pe, uecha cuimbae aña reta oyase jese vae uguapi oï Jesús jovai. Uecha uyemonde ma jare iyaracuaño ma oï. Jare opaete yugüeru vae reta uquiyé. ³⁶ Jare jocua tenonde yave uecha vae reta umimbeu íru reta pe quirái uyeyapo cuimbae aña reta oyase jese vae pe jae ucuera vaerä. ³⁷ Jayave opaete gadareno reta umiñera Jesús oo ye vaerä jae reta iivi güi. Echa'á uquiyé ete reta. Jayave Jesús uyupi ye chalana pe yugüiraa ye vaerä chugüi reta. ³⁸ Jare cuimbae aña reta oyase jese vae uyerure Jesús pe umaeño vaerä jese oo vaerä jae jupié. Ërei Jesús umaeño'á jese. Jei chupe:

³⁹ —Ecua nerenta pe emimbeu íru vae reta pe mbae icavi vae Tumpa uyapo ndeve vae.

Jayave cuimbae oo, jare umimbeu íru vae reta pe opaete tenta guasu rupi mbae icavi vae Jesús uyapo chupe vae.

Jairo tayi jare cuña Jesús jemimonde uyavíqui vae

(Mt 9.18-26; Mr 5.21-43)

⁴⁰ Jare Jesús oo uváe yave i guasu jovaicho pe, joco pe ñugüinói vae reta umae jese uyerovia reve. Echa'á uáro ñugüinói. ⁴¹ Jayave ou penti cuimbae Jairo jee vae. Jae co judío reta itupao re uyandareco vae. Jae uyeatica Jesús jovai, jare uyerure chupe oo vaerä jae jenta pe. ⁴² Echa'á jae güinói pentiño tayi doce año rupi güinói vae. Umano pota echa ma. Jayave Jesús oo jae jupié. Jare jeta yugüiraa Jesús jupié, jare oyopi reta. ⁴³ Jare jae reta ipite pe oo penti cuña doce año ma uiporara tugüiguasu vae. Cuña opaete ma icorepoti umee iyugüi upurupiano vae reta pe. Ërei penti ave ipuere'á umbigüera. ⁴⁴ Jayave cuña oya Jesús re icupe coti, jare uyavíqui jemimonde jembei. Jare jupivoi jugüiguasu upita chugüi.

⁴⁵ Jayave Jesús jei:

—Quía pa cheremimonde uyavíqui?

Opaete vae jei uyavíqui'ã co jemimonde. Jare Pedro jei Jesús pe:

—Oporomboe vae, jeta ete ñugüinoi cua pe jare ndeopi reta co. ¿Maera pa ndere: ‘Quía pa cheremimonde uyavíqui?’ —jei.

⁴⁶ Ërei Jesús jei:

—Quía nunga vae uyavíqui co cheremimonde. Echa'ã aicuaa ambigüera ma co chembaepuere pe quía —jei.

⁴⁷ Jayave cuña uicuaa ipuere'ã ma uñemi Jesús güi. Jayave ou icoti urirí reve jare uyeatica Jesús jovai. Jayave umimbeu chupe opaete vae jovaque maera uyavíqui jemimonde jare quirái jupivoi ucuera.

⁴⁸ Jayave Jesús jei chupe:

—Ndecuera ma, cherindi, nderovia cheré ramo. Ecua ndepiacatu reve —jei.

⁴⁹ Jare Jesús uyeminguela oĩ rambueve, penti vae ou uväe tupao re uyandareco vae jenta güi.

—Umano ma nderayi —jei—. Agüiye ma emambeco oporomboe vae —jei.

⁵⁰ Ërei Jesús cua uyandu yave, jei tupao re uyandareco vae pe:

—Agüiye ndepiatiti. Epurugüiroviaño. Ucuerata co —jei.

⁵¹ Jare oo uväe yave tenta pe, Jesús umaeño'ã íru reta re uique vaerä jae ndive, jaeño Pedro, Jacobo jare Juan, jare cuñatai tu jare ichi. ⁵² Jare opaete joco pe ñugüinoi vae reta uyao jare jäse ñugüinoi. Jayave Jesús jei chupe reta:

—Agüiye piyao. Umano'ã co. Oqueño co oĩ —jei.

⁵³ Ërei jae reta oyoyai. Echa'ã uicuaa reta umano co. ⁵⁴ Jayave Jesús uipisi cuñatai ipo pe.

—Cuñatai, epúal —jei.

⁵⁵ Jayave cuñatai icove ye, jare jupivoi upüa. Jayave Jesús oyocui umingaru vaerä cuñatai. ⁵⁶ Jare cuñatai tu jare ichi ipiacañi. Ërei Jesús oyocui reta agüiye vaerä umimbeu quía pe ave mbae uyeyapo vae.

9

Jesús omondo jocua doce jemimboe reta

(Mt 10.5-15; Mr 6.7-13)

¹ Penti ara Jesús opa umbati jocua doce jemimboe reta, jare umee chupe reta mbaepuere umbisiri vaerä aña reta oya jese vae reta güi jare umbigüera vaerä imbaerasi vae reta. ² Jayave omondo reta umimbeu vaerä Tumpa iporoyocuia jare umbigüera vaerä imbaerasi vae reta. ³ Jare jei chupe reta:

—Agüiye mbae peraa. Agüiye peraa pepopoca. Agüiye peraa peurupucu, peremburá jare corepoti. Jare agüiye peraa mocui camisa —jei—. ⁴ Peo pevæ yave penti tenta pe, joco pe pej jocua tenta guasu güi peo ye regua —jei—. ⁵ Jare ime yave penti tenta guasu pegua reta uipota'ã pepita vaerä joco pe vae, peo joco güi yave, pemítimo ívícuí pepi güi, uicuaa vaerä jae reta co teco güiñoi —jei.

⁶ Jayave jae reta yugüira tenta guasu-raí reta rupi. Umimbeu reta íru vae reta pe ñee icavi vae jare opaete uguata vae rupi umbigüera imbaerasi vae reta.

Juan imano

(Mt 14.1-12; Mr 6.14-29)

⁷ Jare mburuvicha guasu Herodes uyandu opaete Jesús uyapo vae regua. Jayave ipiacañi. Echa'ã amocue vae jei:

—Juan icove ye ma ou umanocue vae reta ipite güi.

⁸ Jare íru vae reta jei:

—Jae co Elías ou ye vae.

Jare íru vae reta jei:

—Jae co penti Tumpa iñee aracae umimbeu vae icove ye ma ou umanocue vae reta ipite güi vae. ⁹ Ërei Herodes jei:

—Añäcasíaca co Juan. Ërei ¿quía ra co cua? Echa'ã ayandu ma jeta jesegua —jei.

Jáeramo Herodes uipota uecha Jesús.

Jesús umingaru cinco mil cuimbae reta

(Mt 14.13-21; Mr 6.30-44; Jn 6.1-14)

¹⁰ Jare Jesús jemimondo reta yugüieru ye Jesús oĩ vae pe, jare umimbeu Jesús pe opaete uyapo vae regua. Jayave Jesús güíraa reta quí ngatu vae pe coíno tenta guasu Betsaida güi. ¹¹ Ërei jeta vae uicuaa yave, yugüira jaicue. Jare Jesús umbiresive cavi jare imiari chupe reta Tumpa iporoyocuia re jare umbigüera imbaerasi vae reta.

¹² Caaru ma yave, jocua doce vae yugüeru Jesús oĩ vae pe jare jei chupe:

—Emondo cua jeta vae tenta tenta rupi, joco pe ucaru vaerä jare oque vaerä. Echa'ã mbaeti tenta cua rupi —jei reta.

¹³ Ërei Jesús jei chupe reta:

—Pe reta pemee tucaru.

—Jaeño ime nonoi pandepo mbiyape jare mocui pira —jei reta—. ¿Ndoota pa ndogua opaete cua reta jembiarā?

¹⁴ Echa'ā cuimbae retaño uyepapa cinco mil rupi.

Jayave Jesús jei jemimboe reta pe:

—Tuyembatimbati cincuenta rupi tuguapi.

¹⁵ Jayave jucuarāi uyapo reta. Jei reta opaete joco pe ñugüíinoi vae reta pe uguapi vaerā. ¹⁶ Jayave Jesús uipisi jocua pandepo mbiyape jare mocui pira, jare umae ara coti, jare umee yasurupai Tumpa pe. Jayave upisāa mbiyape jare pira, jare umee jemimboe reta pe, jae reta umee vaerā opaete joco pe uguapi ñugüíinoi vae reta pe. ¹⁷ Opareve ucaru, jare iyangapii reta. Jayave Jesús jemimboe reta umbatí tembíu uñepisāacue jembire vae, jare umitinee doce canasta.

Pedro jei Jesús co jae Cristo, Tumpa ombou vae

(Mt 16.13-20; Mr 8.27-30)

¹⁸ Penti ara Jesús ova jeta vae ipite güi uyerure vaerā Tumpa pe. Jare jemimboe reta joco pe ñugüíinoi jae ndive. Jayave Jesús upirandu chupe reta:

—¿Quía pa co che íru vae reta pe? —jei.

¹⁹ Jae reta jei chupe:

—Amocue vae jei nde co jae Juan upurumbibautizase vae, jare íru vae reta jei nde co jae Elías, jare íru vae reta jei nde co jae penti Tumpa iñee aracae umimbeu vae icove ye ma ou umanocue vae reta ipite güi vae —jei reta.

²⁰ Jayave Jesús upirandu chupe reta:

—Jare ¿quía pa co che peve? —jei.

Jayave Pedro jei chupe:

—Nde co jae Cristo, Tumpa ombou vae —jei.

Jesús umimbeu umanota co

(Mt 16.20-28; Mr 8.30-9.1)

²¹ Jayave Jesús oyocui ete reta agüiye vaerā umimbeu quía pe. ²² Jayave Jesús jei chupe reta:

—Che cuimbaera ayeyapo vae aiporara eteta. Jare judío reta itenondegua reta jare sacerdote reta itenondegua reta jare mboroyocui re oporomboe vae reta ndarau uipota aico vaerā juvicha guasurá, jare cheyucacata. Ërei mbapí aria rupi aicove yeta ayu umanocue vae reta ipite güi —jei.

²³ Jayave Jesús jei opaete vae pe:

—Ime yave quía uipota oo cherupié vae, tiñacañi iyugüi, tovoi icurusu opa ara, jare too cherupié —jei—. ²⁴ Uipota uñuvatu jecove vae ndarau ipuere. Ërei jocua umeeta jecove cheroco pegua vae uñuvatatu co —jei—. ²⁵ ¿Mbae ra uminganata quía, umingana yave opaete iví pegua, ërei ipuere'ā yave uñuvatu jecove? —jei—. ²⁶ Ime yave quía imara cheré jare chíñee re vae, che cuimbaera ayeyapo vae chemarata vi jese, ayu ye yave ayembutuichaca vaerā chembaepuere reve, cheRu imbaepuere reve, jare ángel uñeñono tee Tumpa peguarā vae reta imbaepuere reve —jei—. ²⁷ Ërei añete che jae peve, ndei amocue cua pe ñugüíinoi vae umano mbove, uechata reta Tumpa iporoyocuia —jei Jesús.

Jesús uyembambie

(Mt 17.1-8; Mr 9.2-8)

²⁸ Jare ocho ara rupi cua jei rendave pe, Jesús güíraa Pedro, Juan jare Jacobo íru vae reta ipite güi, jare uyupi penti ivitu guasu re uyerure vaerā Tumpa pe. ²⁹ Jare Jesús uyerure Tumpa pe rambueve, jova uyembambie jare jemimonde tí asi jare uvera. ³⁰ Jare mocui cuimbae uyeminguela ñugüíinoi Jesús ndive. Jae reta co Moisés jare Elías. ³¹ Mocui reve uycuua tembipe ipóra ete vae re jare uyeminguela reta Jesús imano re, quirái umanota co Jerusalén pe. ³² Ërei Pedro jare jae ndive ñugüíinoi vae jopei jare oque. Ërei usareco ye, jare uecha Jesús ipóra ete, jare uecha vi jocua mocui cuimbae Jesús ndive ñugüíinoi vae reta. ³³ Jare Moisés jare Elías yugüíraa yeta ma yave, Pedro jei Jesús pe:

—Oporomboe vae, icavi co ñaí vaerā cua pe. Turuyapo mbapí guarasíñanaroqui pegua, penti nembaera, penti Moisés peguarā jare penti Elías peguarā —jei.

Echa'ā Pedro uicuaa'ā mbae jei vae.

³⁴ Jare Pedro cua jei rambueve, ou amapítu umiguarasíñanaroqui pegua, penti nembaera, penti Moisés peguarā jare penti Elías peguarā —jei.

—Cua co jae cheRai aau ete vae. Piyapisaca jese —jei.

³⁵ Jayave uyendu ñee amapítu güi jei:

³⁶ Jare ñee opa ma yave, jae reta uecha'ā quía joco pe, jaeño Jesús. Jare jocua ara reta pe jae reta umimbeu'ā quía pe ave mbaembae uecha vae.

Jesús umbigüera cunumi aña oya jese vae

(Mt 17.14-21; Mr 9.14-29)

³⁷ Jare piareve pe ívitu guasu güi ugüeyi reta yave, jeta vae yugüeru uñeväiti jae reta ndive. ³⁸ Jayave penti cuimbae yati vae reta ipite pe oí vae jei Jesús pe:

—Oporamboe vae, ayerure ndeve nemaе vaerä cherai re. Jae co cherai jae vaeño. ³⁹ Aramoño penti aña oya jese jare umbisapicai. Jayave umbirirí ete jare cunumi iyuru tiriyai. Jayave uyembipere. Jecueaño uyapo jucuaräi chupe —jei—. ⁴⁰ Ayerure téi ma nderemimboe reta pe umbisirí vaerä aña chugüi, ërei ipuerelá reta —jei.

⁴¹ Jayave Jesús jei joco pe ñugüinoi vae reta pe:

—Yavai ete pe reta cua ívi pe pico vae pepurugüirovia vaerä. ¿Quiräi regua ra apitata pe reta ndive? ¿Quiräi regua ra arupiata peve? —jei.

Jayave jei cunumi tu pe:

—Eru nderai cua pe.

⁴² Jare cunumi ou rambueve, aña uipiaca jare umbirirí ete. Jayave Jesús uñengata aña pe. Jayave umbigüera cunumi jare umee ye tu pe. ⁴³ Jare opaete joco pe ñugüinoi vae reta ipiacañi Tumpa imbaepuere tuicha vae re. Ërei ipiacañi rambueve opaete Jesús uyapo vae re, Jesús jei jemimboe reta pe:

Jesús umimbeu ye umanota co

(Mt 17.22-23; Mr 9.30-32)

⁴⁴ —Piyapisaca cavi cua jae peve vae re. Echa'ã che cuimbaerä ayeyapo vae penti vae chemeeta cherovaicho reta pe —jei.

⁴⁵ Ërei jae reta uicuua cavi'a mbae Jesús jei chupe reta vae. Yavai chupe reta uicuua vaerä, jare uipiú reta upírandu vaerä chupe jese.

Tenondegua vae

(Mt 18.1-5; Mr 9.33-37)

⁴⁶ Jayave jae reta umbipi uyemingueta quía ra tenondegua íru reta güi vae. ⁴⁷ Jare Jesús uicuua chugüi reta ipiayemingueta. Jayave ueni penti sambiai jare oñono iyipí pe. ⁴⁸ Jayave jei jemimboe reta pe:

—Ime yave quía uyapo icavi vae cua nunga sambiai pe cheree pe vae, cheve co uyapo icavi vae. Jare jocua cheve uyapo icavi vae, uyapo vi icavi vae chembou vae pe. Echa'ã pepite pe oí vae uñemimichi vae icota tenondeguarä —jei.

Oyovaicho'ã yande ndive vae yanembori co

(Mr 9.38-40)

⁴⁹ Jayave Juan jei Jesús pe:

—Oporamboe vae, nduecha penti cuimbae nderee pe umbisirí aña reta oya jese vae reta güi, jare ndoe chupe agüiye ma uyapo vaerä. Echa'ã jae ñaneíru'ã co —jei.

⁵⁰ —Agüiye pere chupe jucuaräi —jei Jesús chupe—. Echa'ã oyovaicho'ã yande ndive vae yanembori co —jei.

Jesús uñengata Jacobo jare Juan pe

⁵¹ Jare outa ma uvae Jesús oo ye vaerä ara pe. Jáeramo iquírëi ete oo Jerusalén pe. ⁵² Jayave omondo amocue jemimboe reta jenonde. Jae reta yugüiraa penti tenta guasu-rai ívi Samaria pegua pe uyapicatu vaerä Jesús peguarä. ⁵³ Ërei joco pegua reta uipota'ã Jesús upita vaerä joco pe. Echa'ã uicuua reta jae oo Jerusalén coti. ⁵⁴ Jare Jesús jemimboe reta Jacobo jare Juan cua uicuua yave, jei reta Jesús pe:

—OreYa, ¿ndipota pa ore ndoyocui tata ou vaerä ara güi opa vaerä uapi cua tenta guasu-rai pegua reta Elías uyapo ramí?

⁵⁵ Ërei Jesús uyerova icoti jare uñengata chupe reta. Jei chupe reta:

—Agüiye pere jucuaräi. ⁵⁶ Echa'ã che cuimbaerä ayeyapo vae ayu apurumbiasa vaerä. Ayu'a apurumicañitei vaerä —jei.

Jayave yugüiraa íru tenta guasu-rai coti.

Uipota oo Jesús jupíe vae

(Mt 8.19-22)

⁵⁷ Jare tape rupi uguata reta rambueve, penti cuimbae jei Jesús pe:

—Taa nderupié opaete que rupi ndeo vae rupi.

⁵⁸ Jayave Jesús jei chupe:

—Aguara reta güinoi icua reta, jare güira reta güinoi jaiti reta. Ërei che cuimbaerä ayeyapo vae mbaeti cherenta —jei.

⁵⁹ Jare Jesús jei íru cuimbae pe:

—Eyu cherupié.

Êrei cuimbae jei:

—Emaeñō rani cheré aa vaerā aico cheru re umano regua.

⁶⁰Jayave Jesús jei chupe:

—Tecove opa mbae vae güüinoi mbae vae reta toñotí umano vae reta. Êrei nde ecua emimbeu Tumpa iporoyocuia —jei.

⁶¹Jayave íru cuimbae jei Jesús pe:

—Taa nderupié, cheYa. Êrei emaeñō rani cheré aa vaerā cherenta pe amimbeu vaerā chupe reta jáema co aa —jei.

⁶²Êrei Jesús jei chupe:

—Tamijaanga umbiara vae. Umbiara vae umae yave jaicue coti, ndarau simi oo. Jae ramíño vi che amimbaravíqui yave quía, uyapo cavi'á yave iparavíqui, ndarau icavi ico vaerā Tumpa iporoyocuia pe —jei.

10

Jesús omondo setenta vae reta

¹Cua jaicue rupi yandeYa uiparavo íru setenta cuimbae reta jare omondo jenonde mocui mocui rupi opaete tenta guasu reta jae oofa joco pe vae pe. ²Jare jei chupe reta:

—Jeta ete co yaavíro vaerā. Êrei mboví ete co umbaeviro vae reta. Jáeramo pe reta piyerure yandeYa pe omondo vaerā uparavíqui vae reta umbaeviro reta vaerā —jei—. ³Pecua. Mase, pomondo icavi mbae vae uyapo vae reta ipite rupi. Pe reta ovecha-rai reta ramí co. Jae reta yaguapíta reta ramí co —jei Jesús chupe reta—. ⁴Agüiye peraa corepoti, jare urupucu, jare pepipasa. Jare agüiye pemiaríño quía perováiti yave tape rupi —jei—. ⁵Jare pique yave penti tenta pe, pere rani: ‘Tipiacatu cua tenta pegua reta’ —pere, jei—. ⁶Jare ime yave quía jocua tenta pe mbiacatu uipota vae, jae ipiacatuta co. Uipota'á yave, ndarau ipiacatu —jei—. ⁷Jare pepita jocua tenta pe etei. Peu ipotave umee peu vaerā vae. Echa'á icavi co íru vae reta umbiepi vaerā uparavíqui vae pe. Agüiye coti cotiño pepita —jei—. ⁸Jare penti tenta guasu pe peo pevæe yave, joco pegua reta pembiresive cavi yave, peu ipotave umee peu vaerā vae —jei chupe reta—. ⁹Pembigüera imbaerasi vae joco pe ñugüinoi vae reta. Jare pere chupe reta: ‘Tumpa iporoyocuia coiño ma peve’ —pere, jei—. ¹⁰Êrei peo yave penti tenta guasu pe, joco pegua reta uipota'á yave pepita vaerā joco pe, peguata calle rupi jare pere joco pegua reta pe: ¹¹‘Numítimo orepi güi ívicuui, cua tenta guasu pegua reta picuua vaerā pe reta co teco penoi. Êrei turumimbeu peve cua: Tumpa iporoyocuia coiño ma peve’ —pere, jei—. ¹²Êrei che jae peve, Tumpa uña yave ívi pegua reta, jocua tenta guasu pegua reta tanta uiporarata Sodoma pegua reta güi —jei—.

Tenta guasu pegua uiporarata vae reta

(Mt 11.20-24)

¹³Corazín pegua reta uiporarata co. Betsaida pegua reta uiporarata co. Echa'á jeta miacañi reta ayapo ipite pe chembapuere pe. Jucuarái mona ayapo yave Tiro jare Sidón pe, joco pegua reta ueyata tēi aracae ma iyemingueta icavi mbae vae ipia pe oí vae. Omondetá tēi temimonde jaimbe vae jare oñonota tēi tanimbu iñáca re uicuaaca vaerā ipiatiti co —jei—. ¹⁴Êrei Tumpa upuruáa yave, Corazín jare Betsaida pegua reta tanta uiporarata Tiro jare Sidón pegua reta güi —jei—. ¹⁵Jare Capernaum pegua reta ipia pe uyemingueta tēi icavi co yugüireco vaerā Tumpa ndive. Êrei Tumpa omondota reta yugüireco vaerā cañitei pe —jei—. ¹⁶Uyapisaca peré vae uyapisaca co cheré. Êrei pereríro vae chereríro co. Jare chereríro vae güiríro chembou vae —jei—.

Setenta vae reta yugüeru ye

¹⁷Jare jocua setenta vae reta yugüeru ye yave Jesús oí vae pe, uyerovia jare jei Jesús pe:

—OreYa, nderee re nonoi mbaepuere aña reta re.

¹⁸Jayave Jesús jei chupe reta:

—Che aecha Satanás oa ara güi ama uvera vae ramí. ¹⁹Mase, amee ma peve mbaepuere pepuere vaerā pepíro mboi re jare chumicarape re, jare penoi vaerā mbaepuere tovaicho re, yepe tēi jae güüinoi vi mbaepuere. Ipuereta'á mbae uyapo peve —jei—. ²⁰Êrei agüiye piyerovia mbaepuere aña reta re penoi vae re. Êrei piyerovia peree uyecuatía ma oí ara pe vae re —jei—.

Jesús uyerovia

(Mt 11.25-27; 13.16-17)

²¹Jocua ora pe etei Jesús uyerovia jare jei:

—Amee yasurupai ndeve, cheRu, quirái nde nemaeñó'á cua ívi pegua iyaracuaa vae reta re uicuaa vaerā cua mbaembae, êrei ndicuaaca sambiai ramí vae reta pe. Icavi co, cheRu. Echa'á icavi co ndeve ndiyapo vaerā jucuarái. Nde co jae ara pegua reta jare ívi pegua reta iYa —jei—.

²²Jayave jei vi:

—CheRu umee ma cheve opaete. Mbaeti quía uicuua cavi chereguia, jaeño cheRu. Jae ramiño vi mbaeti quía uicuua cavi cheRu regua, jaeño che jare che aicuaaca chupe vae reta —jei.

²³ Jayave uyerova umae jemimboe reta re jare jei chupe retaño:

—Tumpa pemividise ma. Echa'ã umaeño peré pеecha vaerā jeta mbaembæ —jei—. ²⁴ Che jae peve, jeta Tumpa iñee aracae umimbeu vae reta jare mburuvicha guasu reta uipota tēi uecha pe reta pеecha ma vae, ērei uecha'ã. Jae ramiño vi jae reta uipota tēi uyandu pe reta piyandu ma vae, ērei uyandu'ã —jei.

Samaria pegua ipiacavi vae

²⁵ Penti ara penti mboroyocui re oporomboe vae uyemboi Jesús jovai jare jei chupe:

—Oporamboe vae, ¿mbae pa ayapota anoi vaerā tecove opa mbae vae?

Uipota tēi uyavica Jesús pe.

²⁶ Jayave Jesús jei chupe:

—¿Mbae pa uyeucatía oī mboroyocui pe? ¿Mbae pa nemingueta joco pe? —jei.

²⁷ Jayave jei Jesús pe:

—Uyeucatía oī cuarāi: 'Eau ndeYa Tumpa opaete ndepia reve, jare opaete nderecove reve, jare opaete nepirāta reve jare opaete ndepiyemingueta reve. Jae ramiño vi eau nderapicha nde ndiyerau rami.' Jucuarāi uyeucatía oī —jei.

²⁸ Jayave Jesús jei chupe:

—Icavi co ndere. Cuarāi iyapo jare nenoita tecove opa mbae vae —jei.

²⁹ Mboroyocui re oporomboe vae uipota uicuuaaca jupi co jae. Jáeramo upirandu Jesús pe:

—¿Quía pa co jae cherapicha?

³⁰ Jayave Jesús jei chupe:

—Penti cuimbae oo Jerusalén güi tenta guasu Jericó coti. Jare aramoiño imonda vae reta uipisi. Jae reta omboi jemimonde chugüi jare umbipere. Uyuca raí raí ueya reta tape rupi —jei—. ³¹ Jare aramoiño ou penti sacerdote jocua tape rupi. Jare uecha yave cuimbae ipere vae, uipota'ã etei oya jese. Mbiri rupiño uasa chugüi —jei—. ³² Jae ramiño vi ou penti levita jocua tape rupi. Jare uecha yave cuimbae ipere vae, uipota'ã etei oya jese. Mbiri rupiño vi uasa chugüi —jei—. ³³ Ērei penti Samaria pegua ou jocua tape rupi, jare ou uväe cuimbae ipere vae oī vae pe. Jare Samaria pegua uecha yave, uiparareco —jei—. ³⁴ Jayave oya jese jare uequi moa uiplano vaerā chugüi ipere vae jare umbiyasoi ipere. Jayave uipi imburica re jare güiraa penti tenta pe, jare joco pe uyandareco jese —jei—. ³⁵ Jare piareve pe Samaria pegua oota ma joco güi yave, uequi corepoti mocui ara mbaravíqui jepi pegua jare umee tenta iya pe. Jei chupe: 'Iyandareco mi jese. Jare jeta ete cua güi ndiyemingasta yave, ambiepita ndeve ayu ye yave' —jei, jei—.

³⁶ Añave tapirandu ndeve: ¿Quía nunga pa co jae jocua imonda vae reta uipisi vae japicha añetete vae? Echa'ã mbapí cuimbae uasa jocoropi —jei.

³⁷ Jare mboroyocui re oporomboe vae jei Jesús pe:

—Jocua uiparareco vae.

Jayave Jesús jei chupe:

—Ecua iyapo jae uyapo vae rami.

Jesús opou Marta jare María ipi

³⁸ Jesús jare jemimboe reta jecuae yugüiraa Jerusalén coti. Jayave yugüiraa uväe penti tenta guasurai pe. Joco pe penti cuña Marta jee vae umbiresive cavi jenta pe Jesús. ³⁹ Jare Marta ipiquí co jee María. Jare María uguapi yandeYa iyipi pe uyapisaca vaerā jese. ⁴⁰ Ērei Marta uyemipia'ã tembiurā uyapo oī vae re. Jayave ou Jesús oī vae pe jare jei chupe:

—CheYa, chepiquí chembori'ã. Jáeramo cheño ayapo aí tembiurā. ¿Icavi ra ndeve uyapo vaerā cuarāi? Iyocui chembori vaerā —jei.

⁴¹ Jayave yandeYa jei chupe:

—Marta, Marta, ndiyemipia'ã jeta mbaembæ re. ⁴² Ērei yaipota'ã jeta mbaembæ. Cua María uipararo icavi vae ndegüi. Ndarau quía ipuere uequi chugüi —jei.

Jesús oporomboe yerure re

(Mt 6.9-15; 7.7-11)

¹ Jare penti ara Jesús uyerure oī Tumpa pe. Jare opa ma yave, penti jemimboe jei chupe:

—CheYa, oremboe nduyerure vaerā Tumpa pe Juan vi omboe jemimboe reta rami.

² Jayave Jesús jei chupe reta:

—Piyerure Tumpa pe yave, pere cuarāi:

'OreRu ara pe neĩ vae, tuyembia doraca nderee.

Tou ndeporoyocuia.

Tuyeyapo nde ndere vae cua ivi pe ara pe uyeyapo oĩ rami.

³Emee oreve opa ara orerembiurã.

⁴Embiasa oreve orembaeyo reta, ore numbiasa ipotave iyoa orecoti vae pe rami.

Jare agüiye emaeño aña guasu re uyapoca vaerã oreve mbaeyoa.

Orerepi aña guasu güi' —pere, jei.

⁵Jayave jei vi chupe reta:

—Yamijaanga penti cuimbae jare iamigo. Cuimbae oo yave iamigo jenta pe piare mbite rupi uyerure vaerã chupe mbae re, aramoi jeita chupe: 'Cheamigo, iporuca cheve mbapi mbiyape. ⁶Echa'ã penti cheamigo ou uvãe chepi, jare mbaeti mbae anoi amee jou vaerã.' Aramoi jucuarãita jei —jei—. ⁷Jare aramoi iamigo ombouta chupe iñee japipe güi: 'Agüiye chemamboco. Echa'ã uyeyuquenda ma oĩ cheronque, jare che jare opaete chesambiai reta nduyapacua ma noĩ ndoque vaerã. Chepuere'ã ma apúa amee vaerã ndeve.' Aramoi jucuarãita jei —jei—. ⁸Che jae peve, yepe tẽi uipota'ã upúna, jocu cuimbae co jae iamigo ramo, ërei jocua cuimbae jecuaeño ueni oĩ yave, upúata co umee vaerã chupe opaete uipota vae —jei—. ⁹Jare che jae peve, piyerure Tumpa pe mbae re, jare Tumpa umeeta peve. Peeca, jare pevæta. Pembopu onque, jare uyepeata peve —jei—. ¹⁰Echa'ã uyerure yave quía Tumpa pe mbae re, Tumpa umeeta chupe. Jare ueca yave quía mbae, uvæta. Jare ombopu yave quía onque, uyepeata chupe —jei—. ¹¹Nde nenoí yave penti nderai, nderai uyerure yave ndeve mbiyape re, ndarau nemee chupe penti ita mbiyape ipepica pe. Jae ramíño vi nderai uyerure yave ndeve pira re, ndarau nemee chupe penti mboi pira ipepica pe —jei—. ¹²Jae ramíño vi nderai uyerure yave ndeve ururupía re, ndarau nemee chupe penti chumicarape ururupía ipepica pe —jei—. ¹³Yepe tẽi pe reta jecuaeño piyapo icavi mbae vae, ërei pemee co mbaembae icavi vae pesambiai reta pe. Jáeramo peRu ara pe oĩ vae iquirëi ete umee Espíritu Santo uyerure chupe jese vae reta pe —jei—.

Jeí reta icavi mbae vae Espíritu Santo cotí

(Mt 12.22-30; Mr 3.20-27)

¹⁴Penti ara Jesús umbisiri aña penti cuimbae iupa vae güi. Jare aña usiri ma chugüi yave, cuimbae uyemingueta. Jare jeta vae joco pe ñugüinói vae ipiacañi. ¹⁵Ërei amocue vae jei:

—Aña guasu Beelzebú imbaepuere pe umbisiri aña reta oya jese vae reta güi.

¹⁶Jare íru vae reta uipota uicuua mbae ra Jesús ipuere uyapo. Jáeramo jei reta Jesús pe uyeyapo vaerã mbae ara re jae reta uicuua vaerã quía co jae. ¹⁷Ërei Jesús uicuua ipiayemingueta, jare jei chupe reta:

—Penti tenta guasu pegua reta oyovaicho uyupii yave, opata co jocua tenta guasu. Jae ramíño vi penti tenta pegua reta oyovaicho uyupii yave, opata co jocua tenta —jei—. ¹⁸Jae ramíño vi Satanás pochi iyupe yave, opata co iporoyocuia. Echa'ã pe reta pere che ambisiri aña reta oya jese vae reta güi aña guasu Beelzebú imbaepuere pe —jei Jesús chupe reta—. ¹⁹Ërei che ambisiri yave aña reta oya jese vae reta güi Beelzebú imbaepuere pe, ¿quía imbaepuere pe ra umbisiri aña reta oya jese vae reta güi perentará reta? Pepuere pepirandu chupe reta jese —jei—. ²⁰Ërei che ambisiri aña reta oya jese vae reta güi Tumpa imbaepuere pe. Jáeramo pepuere picuua ou ma co uvæ peve Tumpa iporoyocuia —jei—.

²¹Penti cuimbae ipiräta vae mboca güinói vae uyandareco yave jenta re, ipuere'ã quía upíro chugüi imbaembae —jei—. ²²Ërei ou yave íru cuimbae ipiräta ete chugüi vae uñeráro vaerã jae ndive, umiamirita co jare upírota chugüi imboca güirovia catu tẽi uyerepi vaerã pipe vae. Jae ramíño vi upírota chugüi imbaembae umbiyao vaerã umee ííru reta pe —jei—.

²³Ime yave quía uipota'ã ico cheírurá vae, oyovaicho co che ndive. Jae ramíño vi ime yave quía chembori'ã vae, uyapo co icavi mbae vae checotí —jei chupe reta—.

Aña usiri jare ou ye vae

(Mt 12.43-45)

²⁴Penti aña usiri ma yave oya jese vae güi, uguata ñana rupi ueca quiape ico vaerã. Ërei ipuere'ã yave uvæ quiape ico vaerã, jei iyupe: 'Taa ye jocua chero ayu chugüi vae pe' —jei, jei—. ²⁵Echa'ã yandepuere yamijaanga penti o jocua cuimbae aña usiri ma chugüi vae re. Aña ou ye uvæ yave jocua o pe, uecha o iya utupeí ma jare opa oñono cavi —jei—. ²⁶Jayave oo ye aña güeru siete aña icavi mbae ete chugüi vae reta jocua o pe. Jayave ocho reve uiqüe o pe, joco pe yugüireco vaerã. Tenonde yave, penti aña oya jese yave, jocua cuimbae uiporara. Ërei taicue rupi ocho ma aña reta oya jese. Jáeramo tanta uiporara —jei—.

Tumpa umivendiseta vae reta

²⁷Jare Jesús cua mbaembae re imiari yave, penti cuña joco pe ñugüünoi vae reta ipite pe oī vae iñeeäta reye jei:

—Tumpa tumivendise ndesi. Echa'ā nde ndea co chugüü jare jae nemicambu —jei.

²⁸Érei Jesús jei:

—Añete co. Érei Tumpa umivendiseta opaete uyapisaca iñee re vae reta, uyapo yave jae jei vae —jei.

Uipota reta uecha miacañi

(Mt 12.38-42; Mr 8.12)

²⁹Jare jeta vae yugüüreú Jesús oī vae pe. Jayave Jesús jei chupe reta:

—Añave yugüüreco vae reta icavi mbae vae uyapo vae reta co. Jae reta uipota ayapo vaerā mbae aicuaaca vaerā chupe reta quía co che. Érei jaenio uyeyapota mbae Jonás pe uyeyapo vae rami, jae reta uicuaa vaerā quía co che —jei—. ³⁰Echa'ā Jonás pe uyeyapo vae uicuaaca Nínive pegua reta pe Jonás jei chupe reta vae añete vae co. Jae ramíño vi uyeyapota cheve vae uicuaacata añave yugüüreco vae reta pe quía co che. Che co jae cuimbaerā uyeyapo vae —jei—. ³¹Tumpa upuruáa yave, jocua cuña mburuvicha guasu ico sur cotí vae upuñata umbijeco vaerā añave yugüüreco vae reta. Echa'ā jae ou mbiri ete güi uyapisaca vaerā Salomón iyaracuua catu vae re. Érei che clearacuua catu ete Salomón güi —jei—. ³²Tumpa upuruáa yave, Nínive pegua reta upuñata umbijeco vaerā añave yugüüreco vae reta. Echa'ā jae reta ueya iyemingueta icavi mbae vae ipia pe oī vae, Jonás umimbeu chupe reta yave Tumpa iñee. Érei chombaepuere tuicha ete co Jonás imbaepuere güi —jei—.

Mechero yamiendi yave

(Mt 5.14-16; 6.22-23)

³³ Mechero yamiendi yave, ndarau ñañomi. Ndarau ñañono yapepo uyembovapo oī vae igüi pe. Ñañono co mechero jenda pe, o pe uique vae reta güiñoi vaerā tembipe —jei—. ³⁴Tembipe uique yanderete pe yanderesa rupi. Icavi yave nderesa, nderete tineeta tembipe pe. Érei icavi'ā yave nderesa, nderete tineeta pítumimbi pe —jei—. ³⁵Jáeramo iñemoa ngatu aguiye vaerā nderete tineet pítumimbi pe. Echa'ā tineeta tēi tembipe pe —jei—. ³⁶Nderete tineet yave tembipe pe, ndarau ico joco pe pítumimbi. Opaete tineeta tembipe pe, penti tembipe tuicha vae nembiesape vae rami —jei—.

Jesús umbijeco fariseo reta jare boroyocui re oporomboe vae reta

(Mt 23.1-36; Mr 12.28-40; Lc 20.45-47)

³⁷Jare jucuarāi imiari ma yave Jesús, penti fariseo uparea chupe ucaru vaerā jae ndive. Jayave Jesús oo fariseo jenta pe jare uguapi ucaru vaerā. ³⁸Jare fariseo cua uecha yave, ipiacañi jese. Echa'ā Jesús uyepoe'ā ndei ucaru mbove. ³⁹Jayave yandeYa jei:

—Pe reta co jae fariseo reta. Pe reta co jae taza jare plato icupe rupiño uyeyoe vae rami. Érei pepia iquia co. Echa'ā pipota íru vae reta imbaembae jare piyapo icavi mbae vae —jei—. ⁴⁰Pe reta co jae iyaracuua mbae vae reta. Echa'ā Tumpa uyapo opaete yandepuere yaecha vae. Érei uyapo vi opaete yandepuere mbae yaecha vae —jei—. ⁴¹Pemee pequiréi reve mbaembae iparavete vae reta pe. Cua piyapo yave, picuaacata íru vae reta pe iquia mbae co pepia —jei—.

⁴²Pe reta co jae fariseo reta. Piporarata co. Echa'ā pemee Tumpa pe diezmo temiti reta penoi vae güi. Érei piyapo'ā jupi piyapo vaerā vae, jare peau'ā Tumpa. Icavi co pemee vaerā Tumpa pe jocua nunga diezmo. Érei piyapota tēi jupi co piyapo vaerā vae, jare peauta tēi Tumpa —jei—. ⁴³Pe reta co jae fariseo reta. Piporarata co. Echa'ā pipota peguapi tenda tenondegua vae reta pe tupao pe, jare pipota íru vae reta pe piyembisaludaca vaerā calle reta rupi —jei—. ⁴⁴Pe reta co jae mboroyocui re oporomboe vae reta jare fariseo reta. Piporarata co. Echa'ā pepurumbitavíñoi. Pe reta co jae teögüreriu reta quía uecha'ā vae rami. Yepe tēi íru vae reta upíro jese reta, uicuaa'ā joco pe ñugüünoi vae —jei—.

⁴⁵Jayave penti mboroyocui re oporomboe vae jei Jesús pe:

—Cua añave ndere vae rupi ndere vi icavi mbae vae oreve.

⁴⁶Jayave Jesús jei:

—Pe reta co jae mboroyocui re oporomboe vae reta. Pe reta vi piporarata co. Echa'ā pe reta pere íru vae reta pe uyapo vaerā yavai uyapo vaerā vae. Yamijaanga penti tivita. Pe reta pere íru vae reta pe ovoi vaerā penti tivita poi ete vae. Érei pe reta pembori'ā etei ovoi vaerā. Pe reta piyavíqui'ā etei tivita —jei—. ⁴⁷Piporarata co. Echa'ā pe reta piyapo Tumpa iñee aracae umimbeu vae reta iteögüreriu reta. Jare petenondegua reta uyuca reta —jei—. ⁴⁸Jucuarāi picuaaca petenondegua reta uyapo vae icaviño co peve. Echa'ā jae reta uyuca reta, jare pe reta piyapo iteögüreriu reta —jei chupe reta—. ⁴⁹Jucuarāiño vi Tumpa iyaracuua catu vae jei: 'Amondota peve chiñee umimbeu vae reta jare cheremimondo reta, jare pe reta piyucata amocue vae jare piyapota icavi mbae vae íru reta pe' —jei, jei—. ⁵⁰Jare pe reta añave pico vae penoita teco opaete Tumpa iñee umimbeu vae reta ivi uyeyapo güive uyeyucaca vae imano re —jei—. ⁵¹Tenonde voi Abel uyeyucaca, jare taicue rupi Zacarías uyeyucaca. Echa'ā Zacarías

umano maemimba uyeyucacue uñemeearenda jare Tumpajo ipāu pe. Añete che jae peve, cua reta jare opaete īru vae reta imano re pe reta añave pico vae piyembijecota —jei—.

⁵² Pe reta co jae mboroyocui re oporomboe vae reta. Piporarata co. Echa'ā pemboe'ā īru vae reta uicuua vaerā Tumpa. Pe reta etei picuaalā Tumpa. īru vae reta uiporta tēi uicuua Tumpa, ērei pe reta piyopia agüiye vaerā uicuua —jei.

⁵³ Jare jucuarāi jei ma yave chupe reta, mboroyocui re oporomboe vae reta jare fariseo reta pochi ete chupe, jare umbipi upirandu chupe jeta mbaembae re. ⁵⁴ Jecuaeño jae reta uyapisaca cavi jese. Echa'ā uiporta tēi uyandu jei mbae ipuere umbijeco jese vae.

12

Piñemoa ngatu fariseo reta güi

¹ Jare jeta ete uyembati Jesús oī vae pe, jare uñemiañamiaña. Jayave Jesús jei jemimboe reta pe rani:

—Piñemoa ngatu fariseo reta güi. Echa'ā jae reta upurumbitaví vae reta co. Jare tavi ipuere uñemiai levadura rami —jei—. ² Ime yave mbae uyeyasoí vae, uyeechacañotai co. Jae ramíño vi ime yave mbae uñenomí vae, uyecuaañotai co —jei—. ³ Jáeramo pítumimbi pe pere vae uyenduta tembipe pe, jare perenta japipe pe pere viari vae jerācuata opaete vae uyandu vaerā —jei—.

Pequiye Tumpa güi

(Mt 10.26-31)

⁴ Jare che jae peve, cherivi reta, agüiye pequiye upuruyuca vae reta güi. Echa'ā upuruyuca yave, mbaeti ye mbae icavi mbae vae ipuere uyapo peve —jei—. ⁵ Ērei tamimbeu peve quía güi pequiye vaerā. Icavi co pequiye vaerā Tumpa güi. Echa'ā jae güinói mbaepuere upuruyuca vaerā jare oporomondo vaerā cañitei pe. Añete che jae peve, pequiye chugüi —jei—.

⁶ Picuaa co quirái umaemee vae reta umee pandepo güira-rai mboví ete corepoti re. Ērei Tumpa ñacañi'ā penti yepe güira-rai güi —jei—. ⁷ Tumpa uicuua mboví pea penoi peäca re vae. Jáeramo agüiye pequiye. Echa'ā Tumpa perau ete jeta güira-rai reta güi —jei—.

īru vae reta jovaque uyecuaaca vae

(Mt 10.32-33; 12.32; 10.19-20)

⁸ Jae ramíño vi che jae peve cuá: Ime yave quía īru vae reta jovaque jei yave: ‘Che co jae Jesús jemimboe’, che cuimbaerā ayeyapo vae jaeta ángel Tumpa pe uyeyocui vae reta jovaque: ‘Cua co jae cheremimboe’ —jaeta, jei Jesús—. ⁹ Ērei ime yave quía īru vae reta jovaque checuacu vae, che vi aicuacuta ángel Tumpa pe uyeyocui vae reta jovaque —jei—.

¹⁰ Jare ime yave quía jei icavi mbae vae che cuimbaerā ayeyapo vae cotí vae, Tumpa umbiasata chupe. Ērei ime yave quía jei icavi mbae vae Espíritu Santo cotí vae, Tumpa ndarau etei umbiasa chupe —jei Jesús chupe reta—.

¹¹ Jare īru vae reta pereraa yave pemee vaerā tupao reta pe jare mburuvicha reta pe jare īru vae reta mbaepuere güinói vae pe, agüiye piyemipia'ā mbae pereta chupe reta vae re —jei—. ¹² Echa'ā Espíritu Santo uicuaacata peve jocua ora pe etei mbae pere vaerā —jei—.

Cuimbae icocatu vae iyaracuaa mbae vae

¹³ Jayave penti cuimbae jeta vae ipite pe oī vae jei Jesús pe:

—Oporomboe vae, ere cheriquei pe umbiyao vaerā cheve oreru ueya vae.

¹⁴ Jayave Jesús jei chupe:

—Cuimbae, che chepuere'ā co ayapicatu jocua nunga. Ndaraus ambiyao peve nederu ueya vae —jei.

¹⁵ Jayave Jesús jei opaete vae pe:

—Piñemoa ngatu agüiye vaerā pipota īru vae reta imbaembae. Echa'ā ndaraus yaico cavi jeta mbaembae ñanoi vae ramíño —jei—.

¹⁶ Jayave jei chupe reta umijaanga reve:

—Penti cuimbae icocatu vae iavati yagüiye cavi. ¹⁷ Jare cuimbae jei iyupe ipia pe: ‘¿Mbae ra ayapota? Mbaeti ma cheavati jendarā’ —jei, jei—. ¹⁸ Jayave jei iyupe ipia pe: ‘Aicuua ma. Ambaita cheavatío reta jare ambutuicha eteta cheavatío reta, jare joco pe añañutatua opaete cheavatío jare opaete uyeaviro vae’ —jei, jei—. ¹⁹ Jayave che jaeta chercove pe cuarái: ‘Chercove, jeta ete ma mbaeviro niñuvatu. Uepitita jeta año pegua. Eputuu, ecaru, ecau jare iyerovia.’ Cuarái jaeta —jei, jei—. ²⁰ Ērei Tumpa jei jocua cuimbae pe: ‘Nde co jae iyaracuaa mbae vae. Echa'ā cua pítu aequita nderecove ndegüi. Jare jayave ¿quía ra güiñoitaa opaete jocua mbaembae niñuvatu ndiyupeguarā vae?’ —jei, jei.

²¹ Jayave Jesús jei chupe reta:

—Ime yave quía jeta mbaembae uñuvatu iyupeguarā vae, ērei icocatu'ā yave Tumpa cotí, uyeyapota chupe jocua cuimbae icocatu vae pe uyeyapo rami —jei—.

*Agüiye piyemipia'ã mbaembae re
(Mt 6.25-34)*

²² Jayave Jesús jei jemimboe reta pe:

—Jáeramo che jae peve, agüiye piyemipia'ã perembiurā vae re. Jae ramiño vi agüiye piyemipia'ã peremimonderā vae re —jei—. ²³ Ndaraupepuere pico cavi jecuaeño piyemipia'ã yave perembiurā vae re, jare peremimonderā vae re —jei—. ²⁴ Pemae güiira reta re. Echa'ã jae reta umaeti'ã jare umbaeviro'ã vi. Mbaeti vi güinoi avatío uñuvatu vaerā iavati. Êrei Tumpa umingaru reta. Jare Tumpa perau ete güiira reta güi —jei—. ²⁵ Aramoi piyemipia'ã pipota tēi pepucu ramo. Êrei ndarauetei pepuere piyembicuacuaa pepucu ete vaerā —jei Jesús chupe reta—. ²⁶ Mbaeti etei mbae pepuere piyapo cua re. Êrei cua yaval'ã co Tumpa pe. Jáeramo agüiye piyemipia'ã íru mbaembae re —jei—. ²⁷ Pemae mbaepotí reta re, quirái ucuacuaa reta. Uparavíqui'ã reta. Umaepova'ã reta vi. Êrei che jae peve, mbaepotí reta ipóra ete Salomón jemimonde ipóra vae güi. ²⁸ Tumpa omopóra ñana, yepetéi penti ara ñana oí co pe jare piareve pe ocai. Jáeramo Tumpa umeeta co peve peremimonderā. Michi ete co pepurugüirovia —jei—. ²⁹ Agüiye piyemipia'ã perembiurā vae re, jare agüiye piyemipia'ã íru mbaembae re —jei—. ³⁰ Echa'ã opaete ívi pegua reta uyemipia'ã cua mbaembae re. Êrei peRu uicuua icavi co penoi vaerā cua mbaembae —jei—. ³¹ Êrei icavi co pipota ete vaerā Tumpa iporoyocuia, jare Tumpa umeeta peve opaete cua mbaembae —jei—.

*Mbaembae ara pegua
(Mt 6.19-21)*

³² Agüiye pequiyey, yepetéi pe reta mbovi ete co. Echa'ã Tumpa umeeta co pe reta pico vaerā iporoyocuia pe —jei—. ³³ Pemee corepotí re pembaembae, jare pemee corepotí uata chupe vae reta pe. Cuarái piyapo yave, penoita mbaembae ara pegua. Jae co peurupucu ara pe penoita vae rami. Jocua nunga urupucu ndarauetei indechi jare jocua mbaembae icavi vae peurupucu ara pegua pe penoi vae ndaraucuañi. Echa'ã imonda vae ndarauey oya jare cupii ndarauey urucumegua —jei—. ³⁴ Echa'ã piñuvatu yave mbaembae icavi vae piyupeguará ívi pe, jecuaeño pepia pe piyeminguetata ívi pegua re. Êrei piñuvatu yave mbaembae icavi vae piyupeguará ara pe, jecuaeño pepia pe piyeminguetata ara pegua re —jei—.

Uyeyocui vae jecuaeño uâro vae

³⁵⁻³⁶ Yamijaanga peré uyeyocuia vae reta. Uyeyocui vae reta ipatrón oo umenda vaerā yave, uyeyocuia vae reta uâro ñugüinói ipatrón ou ye regua. Uâro reta jare jecuaeño jendí imechero reta. Jare ipatrón ou ye uvâe yave ombopu onque, júpivoi jembiocui reta uipecu onque ipatrón ipuere vaerâ uique jenta pe —jei—. ³⁷ Uyeyocui vae reta jecuaeño uâro ñugüinói yave ipatrón ou ye uvâe yave, uyeroviata reta. Añete che jae peve, ipatrón uyembicuata toalla pe, jare jeita jembiocui reta pe uguapí vaerâ mesa pe, jare ipatrón etei umeingaruta jembiocui reta —jei Jesús—. ³⁸ Aramoi ipatrón ou yeta uvâe pítu ma yave ani piare mbite rupi. Êrei jae uecha yave jembiocui reta uâro ñugüinói, jae reta uyeroviata co —jei—. ³⁹ Aipota picuua vaerâ cua: Penti tenta iya uicuua yave mbae ora pe outa uvâe imonda vae oñomi vaerâ imbaembae, uñemicuatirota tēi jare ndarauey tēi umaeño imonda vae re güiraa vaerâ imbaembae chugüi —jei—. ⁴⁰ Jae ramiño vi pe reta peáro, agüiye vaerâ che cuimbaerâ ayeyapo vae ayu ye avâe piyandareco'ã pei yave —jei chupe reta.

*Uyeyocui vae uyapo'ã ipatrón jei vae
(Mt 24.45-51)*

⁴¹ Jayave Pedro jei Jesús pe:

—CheYa, cua ndere ma nemijaanga reve. ¿Oreve peguarâño pa co cua? ani ¿opaete vae peguarâ pa? —jei.

⁴² Jayave yandeYa jei:

—Penti uyeyocuia vae iyaracuia vae uyapo ipatrón jei chupe uyapo vaerâ vae. Jare ipatrón umee chupe ico vaerâ íru jembiocui reta juvicharâ, jare umee vaerâ chupe reta jembiurâ opa ara —jei—.

⁴³ Ipatrón ou ye uvâe yave jenta pe, uecha yave jocua jembiocui uyapo oí iparavíqui, jocua jembiocui uyeroviata co —jei chupe reta—. ⁴⁴ Añete che jae peve, ipatrón umeeta chupe uyandareco vaerâ opaete imbaembae re —jei Jesús—. ⁴⁵ Êrei aramoi uyeyocuia vae jei iyupe ipia pe: ‘Chepatrón ndaraou ou ye imambae.’ Jare umbipi uinupa íru uyeyocuia vae reta - cuimbæ reta jare cuñatai reta - jare ucara jare ucau jare usavipo —jei—. ⁴⁶ Jayave penti ara ipatrón ou yeta uvâe jembiocui uyandareco'ã oí yave. Jocua ora pe etei ipatrón uipocouta. Jayave ipatrón uiporaraca eteta chupe jare omondota ico vaerâ ipatrón iporoyocuia uyapo mbae vae reta ndive —jei—. ⁴⁷ Ipatrón uiporaraca eteta. Echa'ã uyeyocuia vae uicuua tēi ipatrón iporoyocuia, érei uyapo'ã —jei chupe reta—. ⁴⁸ Êrei ime yave uyeyocuia vae uicuua'ã ipatrón iporoyocuia vae, yepetéi uiporarata co uyapo'ã ipatrón iporoyocuia ramo, érei ipatrón ndarauey

uipuraraca ete chupe. Echa'ã ipatrón uicuaaca yave jembiocui pe iporoyocui, icavi co jembiocui uyapo vaerā uicuaa vae rupi —jei—.

*Ayu uyembiyao vaerā uyugüi ivi pegua reta
(Mt 10.34-36)*

⁴⁹ Che ayu cua ivi pe tata ambiyepota vaerā, jare chequirēi ete opa cheparavíqui ayapo —jei—. ⁵⁰ Che aiporara eteta co jare yava eteta cheve opa uyeyapo regua —jei—. ⁵¹ ¿Pepia pe piyeminguela pa che ayu amee vaerā mbiacatu ivi pegua reta pe? Che jae peve, jucuarā'i co. Che ayu uyembiyao vaerā uyugüi ivi pegua reta —jei chupe reta—. ⁵² Echa'ã añave güüive yugüireco yave pandepo penti tenta pe, uyembiyaoa co uyugüi reta. Mbapi oyovaichota mocui ndive, jare mocui oyovaichota mbapi ndive —jei—. ⁵³ Tu oyovaichota tai ndive, jare tai oyovaichota tu ndive. Ichi oyovaichota imembí cuña ndive, jare imembí cuña oyovaichota ichi ndive. Imesi oyovaichota imembí-tati ndive, jare imembí-tati oyovaichota imesi ndive —jei—.

*Picuaa'ã etei mbae añave uyeyapo oĩ vae
(Mt 16.1-4; Mr 8.11-13)*

⁵⁴ Jare Jesús jei yati vae reta pe:

—Peecha yave amapitú uyeyapo oĩ guarasi uique vae coti, jupivoi pere: ‘Oquita co.’ Jare jucuarā'i uyeyapo —jei—. ⁵⁵ Jae ramíño vi tanta ívitu yave, pere: ‘Aracuta co.’ Jare jucuarā'i uyeyapo —jei—. ⁵⁶ Pe reta co jae upurumbitavi vae reta. Echa'ã ara jare ivi re pemae yave, picuaa mbae uyeyapota vae. Ërei picuaa'ã etei mbae añave uyeyapo oĩ vae —jei chupe reta—.

*Iyeyapicatu nderovaicho ndive
(Mt 5.25-26)*

⁵⁷ ¿Maera pa peatéi picuaa mbae jupi piyapo vaerā vae? —jei—. ⁵⁸ Ndeo yave uipota uñeapo nderé mbae re vae ndive mburuvicha pe, tape rupi peo rambueve iyeyapicatu jae ndive, agüiye vaerā jae uñeapo nderé mburuvicha pe. Echa'ã mburuvicha nemondota peresoriru iyandarecoa pe, jare peresoriru iyandarecoa neñionota peresoriru pe —jei—. ⁵⁹ Che jae ndeve, ndarau etei neẽ peresoriru güi ndei opaete nembiepi mbove —jei—.

13

Peeya piyeminguela icavi mbae vae pepia pe oĩ vae

¹ Jare amocue joco pe ñugüinoi vae reta umimbue Jesúus pe quirā'i Pilato uycacaca amocue Galilea pegua reta, jae reta maemimba uyeyucacue reta umee Tumpa pe ñugüinoi rambueve. ² Jayave Jesúus jei chupe reta:

—Aramoi pe reta pepia pe piyeminguela jucuarā'i uyeyapo jocua Galilea pegua reta pe, jae reta iyoa ete opaete íru Galilea pegua reta güi ramo. ³ Che jae peve, jucuarā'i co. Jare peeya'ã yave piyeminguela icavi mbae vae pepia pe oĩ vae, pe reta pecañiteita vi —jei—. ⁴ Jare jocua torre Siloé pe oise vae usururu jocua dieciocho vae re jare uyuca reta. Aramoí pe reta pepia pe piyeminguela jocua dieciocho vae iyoa ete opaete íru Jerusalén pegua reta güi —jei—. ⁵ Che jae peve, jucuarā'i co. Jare peeya'ã yave piyeminguela icavi mbae vae pepia pe oĩ vae, pe reta pecañiteita vi —jei—.

Iva ía mbae vae

⁶ Jayave Jesúus jei chupe reta umijaanga reve:

—Penti cuimbae güiñoi ico pe penti iva. Oo tēi ueca iva ía. Uvāe'ã chupe —jei—. ⁷ Jayave jei ico pe uparavíqui chupe vae pe: ‘Mase, mbapi año ma ayu tēi aeca cua iva ía jare avāe'ã chupe. Iyasía. Ñañotita tēi íru temiti jendacue pe’ —jei, jei—.

⁸ Jayave co pe uparavíqui vae jei co iya pe: ‘Patrón, emaeño tupita ye penti año pegua. Tayoo rani iyípi rupi jare tañono vacarepoti iyípi rupi’ —jei, jei—. ⁹ Jayave ía yave, icavita co. Ërei ía'ã yave, ndepuereta ndiyasiaca’ —jei, jei.

Jesús umbigüera cuña mbutuu ara pe

¹⁰ Jare Jesúus oporomboe oĩ penti judío reta itupao pe mbutuu ara pe. ¹¹ Jare uecha joco pe penti cuña dieciocho año ma imbaerasi vae. Jecuaeño ipo ete. Ipuere'ã etei uyemboi cavi. ¹² Jare Jesúus uecha ma yave, jei chupe:

—Eyu checoti, cuña. Ndecuera ma co nembaserasi güi —jei—.

¹³ Jayave Jesúus oñono ipo cuña iñáca re. Jare jupivoi cuña ipuere uyemboi cavi jare umbipi umbiadora Tumpa.

¹⁴ Jayave tupao re uyandareco vae pochi cua re. Echa'ã Jesúus umbigüera cuña mbutuu ara pe. Jáeramo tupao re uyandareco vae jei joco pe ñugüinoi vae reta pe:

—Icavi co yaparavíqui vaerā seis ara. Peyu jocua seis ara pecuera vaerā. Agüiye peyu pecuera vaerā mbutuu ara pe —jei.

¹⁵ Ërei yandeYa jei chupe:

—Pe reta co jae upurumbitavi vae reta. Pe reta piyora pegüeye jare pemburica jenda güi mbutuu ara pe peraa vaerā pembiu —jei—. ¹⁶ Mase, cua cuña Abraham iñemoñaa reta pegua co. Ërei Satanás dieciocho año ma umimbaerasi. ¿Icaví'ã pa che ambigüera vaerā cua mbaerasi güi mbutuu ara pe? —jei.

¹⁷ Jare cua Jesús jei ma yave, opaete Jesús jovaicho reta imara. Echa'ã opaete joco pe ñugüinoi vae reta uyerovia opaete icavi ete vae Jesús uyapo vae re.

Mostaza jääcue

(Mt 13.31-32; Mr 4.30-32)

¹⁸ Jayave Jesús jei:

—¿Mbae ra ipuere uyemijaanga Tumpa iporoyocuia re? ¿Mbae ra amijaangata jese? ¹⁹ Yandepuere yamijaanga jese penti mostaza jääcue —jei—. Uñeñotí yave, ucuacuaa jare uyeyapo ivira tuicha vae. Jare güira reta yugüeru uyapo jaitirå jese —jei.

Levadura

(Mt 13.33)

²⁰ Jayave jei chupe reta:

—¿Mbae ra amijaangata Tumpa iporoyocuia re? ²¹ Yandepuere yamijaanga jese levadura —jei—. Cuña umbiyea levadura jeta catu harina ndive, levadura uñemai vaerā opaete masa rupi —jei.

Onque ipi-rai vae

(Mt 7.13-14, 21-23)

²² Jare Jesús uguata opaete tenta guasu reta jare tenta guasu-rai reta rupi, jare oporomboe joco pe. Jare jecuaeño oo Jerusalén coti. ²³ Jayave penti vae upirandu Jesús pe:

—CheYa, ¿ime pa mboví catu uyembiasacata vae?

Jayave Jesús jei joco pe ñugüinoi vae reta pe:

²⁴ —Piñemimiräta pique vaerā onque ipi-rai vae rupi. Echa'ã che jae peve, jeta vae uipota tēita uique, Ërei ndarau ipuere —jei—. ²⁵ Echa'ã tenta iya uequenda ma yave onque, pe reta pepitata oca pe. Jayave pemboputa tēi onque jare pereta tēi: ‘OreYa, ipea onque oreve.’ Ërei jae jeita peve: ‘Che pucuaal’ã’ —jeita, jei—. ²⁶ Jayave pereta: ‘Nducaru nderovaque, jare nde ndeporomboe orecalle reta rupi’ —pereta, jei—. ²⁷ Ërei jae jeita peve: ‘Che jae peve, che pucuaa’ã. Pe reta co jae icavi mbae vae uyapo vae reta. Pesiri chegüi’ —jeita peve, jei—. ²⁸ Jayave piyota jare peräi pembiquiririuta. Echa'ã peecharata Abraham jare Isaac jare Jacob jare opaete Tumpa iñee araceae umimbeu vae reta Tumpa iporoyocuia pe ñugüinoi. Ërei pe reta oca pe pëita —jei—. ²⁹ Yugüeruta reta opaete que rupi rupi güi, jare uguapita reta Tumpa iporoyocuia pe —jei—. ³⁰ Ërei pemandúa cua re: Amocue añave uñemimichi vae uyembitenondecata co, jare amocue añave uyembituicha vae uyembitaicucata co —jei.

Jesús ipiatiti Jerusalén pegua reta re

(Mt 23.37-39)

³¹ Jocua ara yugüeru Jesús oí vae pe amocue fariseo reta. Jae reta jei Jesús pe:

—Ecua cua güi. Echa'ã Herodes uipota ndeyucaca.

³² Jayave Jesús jei chupe reta:

—Herodes co jae penti aguara rami. Pecua ipi jare pemimbeu chupe quiräi jecuae ambisirita aña reta oya jese vae reta güi jare ambigüerata imbaerasi vae reta añave jare curiye. Jare cöeramo opata co cheparavíqui —jei—. ³³ Añete co, icavi co jecuaeño aa Jerusalén coti añave jare curiye jare cöeramo. Echa'ã Jerusalén peño judío reta uyuca Tumpa iñee umimbeu vae reta —jei—.

³⁴ Jerusalén pegua reta, pe reta piyuka Tumpa iñee araceae umimbeu vae reta. Pe reta piyapi ita pe piyuka Tumpa ombou peve vae reta. Jeta vese ma chequiréi tēi pumbati, uru umbati imembí reta ipepo igüi pe rami, Ërei pe reta pipota'ã —jei—. ³⁵ Mase, Tumpa usirita ma pegüi. Che jae peve, ndarau ma cherecha pere regua: ‘Tuyembidoraca yandeYa jee re ou vae’ —jei.

Cuimbae opaete jete iruru vae

¹ Jare penti mbutuu ara pe Jesús oo uique penti fariseo reta itenondegua jenta pe ucaru vaerā jae ndive. Jare fariseo reta umae ñugüinoi Jesús re. ² Jare Jesús uecha joco pe penti cuimbae opaete jete iruru vae. ³ Jayave Jesús upirandu mboroyocu re oporomboe vae reta jare fariseo reta pe:

—Jei pa mboroyocu yandepuere yambigüera vaerā quía mbutuu ara pe?

⁴ Ërei jae reta quíñio. Jayave Jesús oñono ipo cuimbae imbaerasi vae re jare umbigüera. Jayave jei chupe oo vaerä. ⁵Jayave Jesús jei joco pe ñugüinoi vae reta pe:

—Pemburica ani pegüeye uasavi yave penti ívicua pe mbutuu ara pe, jupivoi peo penoë joco güi —jei.

⁶Jare joco pe ñugüinoi vae reta ipuere'ä mbae jei Jesús pe cua regua.

Agüiye eguapi tenda tenondegua vae pe

⁷Jayave Jesús uecha quirai opaete tenta iya uparea chupe vae reta uiparavo tenda icavi vae. Jayave jei chupe reta umijaanga reve:

⁸—Penti cuimbae uparea ndeve yave menda vae pe, agüiye eguapi tenda tenondegua vae pe. Echa'ä aramoi tenta iya uparea vi ïru uiipi ete ndegüi vae pe —jei—. ⁹Jayave tenta iya güeruta jocua ïru vae ndeguapi vae pe jare jeita ndeve: ‘Emee cua cuimbae pe nerenda.’ Jayave nde nemarata co ndeo ndeguapi tenda taicuegua vae pe —jei—. ¹⁰Ërei tenta iya uparea ndeve yave, ecua eguapi penti tenda taicuegua vae pe. Echa'ä ou yave tenta iya, aramoi jeita ndeve: ‘Cheamigo, ecua eguapi penti tenda tenondegua vae pe.’ Jucuaräi ndiyepiucata opaete yugüeru ucaru vaerä vae reta jovaque —jei—. ¹¹Echa'ä ime yave quíia uyembutuicha vae, uñemimichicata co. Jare ime yave quíia uñemimichi vae, uyembutuichacata co —jei.

¹²Jayave Jesús jei tenta iya pe:

—Ndipota yave ndepurumiñgaru, agüiye eparea neamigo reta jare nerentará reta jare nerentaigua icocatu vae reta pe. Echa'ä chupe reta ndeparea yave, jae reta upareata ndeve nde ndeparea chupe reta ramo —jei—. ¹³Ërei ndipota yave ndepurumiñgaru, eparea iparavete vae reta jare ipo chutu vae reta jare icócho vae reta jare jesa mbae vae reta pe —jei—. ¹⁴Jucuaräi ndiyapo yave, Tumpa nemivendiseta. Echa'ä jae reta ndarau ipuere nemingarú. Ërei Tumpa umbijecoviata ndeve jupi vae reta icove ye yave yugüeru umanocue vae reta ipite güi —jei.

Cuimbae jeta vae pe uparea ucaru vaerä vae

(Mt 22.1-10)

¹⁵Jare penti jae ndive uguapi oï mesa pe vae cua uyandu yave, jei Jesús pe:

—Tumpa iporoyocuia pe ucaruta vae uyemivendiseta co.

¹⁶Jayave Jesús jei chupe:

—Penti cuimbae uyapoca jeta tembíu jare uparea jeta vae pe ucaru vaerä. ¹⁷Tembíu oyi ma yave, omundo jembiocui jei vaerä uparea chupe vae reta pe: ‘Peyu. Echa'ä opaete uñeñono ma mesa pe’ —jei, jei—. ¹⁸Ërei penti penti jei uyeyocuia vae pe ipuere'ä oo ucaru vaerä. Penti vae jei chupe: ‘Agua ma checorá jare icavi co aa vaerä amae jese. Jáeramo chepuere'ä aa. Ere ndepatrón pe chembiasa vaerä’ —jei, jei—. ¹⁹Jare ïru vae jei chupe: ‘Agua ma diez güeye. Aata amboporova reta. Jáeramo chepuere'ä aa. Ere ndepatrón pe chembiasa vaerä’ —jei, jei—. ²⁰Jare ïru vae jei chupe: ‘Amenda ramo ete. Jáeramo chepuere'ä aa’ —jei, jei—. ²¹Jayave uyeyocuia vae ou ye ipatrón pe jare umimbeu chupe opaete cua regua. Jayave ipatrón pochi reve jei jembiocui pe: ‘Ecua voi opaete calle rupi jare eru cua pe iparavete vae reta jare ipo chutu vae reta jare icócho vae reta jare jesa mbae vae reta’ —jei, jei—. ²²Uyapo ma yave jucuaräi, uyeyocuia vae jei ipatrón pe: ‘Patrón, ayapo ma ndeporoyocuia, jare imeño ïru vae reta jendarä’ —jei, jei—. ²³Jayave ipatrón jei jembiocui pe: ‘Ecua ye opaete tape rupi jare ere nevæe chupe vae reta pe yugüeru vaerä, tñee vaerä cherenta’ —jei, jei—. ²⁴‘Echa'ä che jae peve, mbaeti penti ave jocua tenonde voi aparea chupe vae ucaruta cherenta pe’ —jei, jei.

Yavaí co oï oo vaerä Cristo jupié

(Mt 10.37-38)

²⁵Jare jeta vae uyebati Jesús oï vae pe. Jayave Jesús umae jese reta jare jei chupe reta:

—Ime yave quíia uipota oo cherupié vae, cherau ete'ä yave tu jare ichi jare jembireco jare isambiai reta jare jentará reta güii, jare uyerau ete yave chegüi, ndarau ipuere ico cheremimboerä —jei—.

²⁷Jare ime yave quíia ovo'ä icurusu oo vaerä cherupié vae, ndarau ipuere ico cheremimboerä —jei—.

²⁸Penti cuimbae iquírei yave uyapo torre, uguapita rani uipapa vaerä mbövi ra jepita, uicuua vaerä icorepoti uepitita ra opa uyapo vaerä —jei chupe reta—. ²⁹Echa'ä uyapol'ä yave jucuaräi, aramoi oñonota torre iguapicarä, érei ndarau uepiti icorepoti opa uyapo vaerä. Jáeramo opaete uecha vae reta oyoyaita jocua cuimbae —jei—. ³⁰Echa'ä jeita reta: ‘Jocua cuimbae umbipi têi uyapo torre, érei ipuere'ä opa uyapo’ —jeita, jei—. ³¹Jae ramíño vi penti mburuvicha guasu iquírei yave oo uñeráro ïru mburuvicha guasu ndive, uguapita rani ipia pe uyeminguela cavi vaerä jese, uicuua vaerä jocua diez mil isundaro reta ipuereta ra umiamiri jocua veinte mil sundaro reta jovaicho güinoi vae —jei—.

³²Echa'ä ipia pe uyeminguela yave isundaro reta ndarau umiamiri jovaicho isundaro reta, mbiri jovaicho güi oï rambueve, omondota amocue vae reta uyerure vaerä chupe agüiye vaerä uñeráro jae

ndive —jei—.³³ Jae ramiño vi ime yave quía pepite pe opaete imbaembae ueya'ã vae, ndarau ipuere ico cheremimboerä —jei chupe reta—.

Yuqui jembochi mbae vae

(Mt 5.13; Mr 9.50)

³⁴ Yuqui icavi co yau vaerä. Ërei jembochi'ã ma yave, ¿quiräita ra jembochi ye? —jei—.³⁵ Icavi'ã ma mbaerä. Icavi'ã yepe ivi peguarä. Yamomboño. Uipota uyandu vae tuyapisaca cua re —jei.

15

Ovecha ucañi vae

(Mt 18.10-14)

¹ Jayave uyembati Jesùs oí vae pejeta mburuvicha peguarä ocovara vae reta jare teco icavi mbae vae uyapo vae reta. ² Jayave fariseo reta jare mboroyocui re oporomboe vae reta iñeenguru jese. Jae reta jei:

—Cua cuimbae uñemiru teco icavi mbae vae uyapo vae reta ndive, jare ucaru jae reta ndive.

³ Jayave Jesùs jei chupe reta umijaanga reve:

⁴ —Penti cuimbae güinnoi yave cien ovecha, umicañi yave penti, ueya íru noventa y nueve ñana pe jare oo ueca ucañi vae uväe chupe regua —jei—. ⁵ Jare uväe ma chupe yave, ovoi güeru ye iyatii re uyerovia reve —jei—. ⁶ Jare ou ye uväe yave jenta pe, umbati opaete iamigo reta jare jentaigua reta, jare jei chupe reta: ‘Piyerovia che ndive. Aväe ye ma cheovecha ucañi vae’ —jei, jei—. ⁷ Che jae peve, jae ramiño vi ara pegua reta uyerovia eteta iyoa vae ueya yave iyemingueta icavi mbae vae ipia pe oí vae. Jucuaräita'ã uyerovia noventa y nueve ‘jupi co che’ jei vae reta re. Echa'ã jae reta jei tëi: ‘Mbaeti anoi yemingueta icavi mbae vae chepia pe’ —jei reta, jei—.

Corepoti ucañi vae

⁸ Jae ramiño vi penti cuña güinnoi yave diez corepoti, umicañi yave penti, umiendi mechero jare utupei opaete tenta rupi. Ueca cavi uväe chupe regua —jei—. ⁹ Jare uväe ma chupe yave, umbati opaete iamiga reta jare jentaigua reta, jare jei chupe reta: ‘Piyerovia che ndive. Aväe ye ma corepoti amicañi vae’ —jei, jei—. ¹⁰ Che jae peve, jae ramiño vi ángel Tumpa pe uyeyocui vae reta uyerovia ete iyoa vae ueya yave iyemingueta icavi mbae vae ipia pe oí vae —jei.

Tai ucañi vae

¹¹ Jayave Jesùs jei chupe reta:

—Penti cuimbae güinnoi mocui tai. ¹² Jare tai taicuega vae jei tu pe: ‘Cheru, emee cheve añave voi mbaembae nde nemano ma yave anoita vae’ —jei, jei—. Jayave tu umbiyao imbaembae umee tai reta pe —jei—. ¹³ Jayave mbovi ara rupi tai taicuega vae umbati umee opaete imbaembae jare oo mbiri ambie ivi pe. Joco pe uyapo jeta parea jare jucuaräi opa umingasta iyugüi opaete icorepoti —jei—. ¹⁴ Jare opa icorepoti umingasta yave, ou caruai tuicha vae jocua ivi pe, jare cuimbae mbaeti ma mbae güinnoi jou vaerä —jei—. ¹⁵ Jayave oo uyerure penti patrón pe umee vaerä chupe mbaravíqui. Jayave jocua patrón omondo jenta pe umingaru vaerä cuchi reta —jei—. ¹⁶ Jare cuimbae uipota tēi uyeminguapí ivope cuchi reta jou vae pipe. Jare mbaeti quía umee chupe jou vaerä —jei—. ¹⁷ Jare cuimbae uicuua ma quiräi uyapo iyaracuua mbae vae uyapo vae rami. Jayave jei iyupe ipia pe: ‘Cheru umimbaravíqui vae reta jeta güinnoi jou vaerä. Ërei che amanota ma aí yembai pipe’ —jei, jei—. ¹⁸ Taa ye cua güi cheru pe jare tae chupe: ‘Cheru, cheyoa ma Tumpa coti jare ndecotí vi. ¹⁹ Jupi'ã ma aico vaerä nderairä. Emee cheve mbaravíqui íru nemimbaravíqui vae reta pe nemee rami’ —jaeta, jei, jei—. ²⁰ Jayave uñatima ye tu jenta coti.

Ërei mbiri catu oí rambueve, tu uecha jare uparareco. Jayave tu osi oováti tai, jare uicuáva jare uyurupite —jei—. ²¹ Jayave tai jei tu pe: ‘Cheru, cheyoa ma Tumpa coti jare ndecotí vi. Jupi'ã ma aico vaerä nderairä’ —jei, jei—. ²² Ërei tu jei jembiocui reta pe: ‘Peru voi temimonde icavi vae pemondeca chupe. Jae ramiño vi piñono moäcaregua ipoäca re jare mbiapasa ipi re’ —jei, jei—. ²³ ‘Jare Peru cua pe vaca tairusu vae aminguira vae piyuca. Yacaru jare yayerovia’ —jei, jei—. ²⁴ ‘Echa'ã tenonde yave cua cherai penti umanocue vae rami co cheve, ërei añave icove ye ma cheve. Tenonde yave ucañi chegüi, ërei añave aväe ye ma chupe’ —jei, jei—. Jare umbipi reta uyembiyerovia —jei—.

²⁵ Jare tai tenondegua vae uparavíqui oí co pe. Jare ou ye oí yave coíño ma tenta güi, uyandu uyemimbí ñugüinnoi tenta pe —jei—. ²⁶ Jayave ueni penti tu jembiocui jare upirandu chupe mbae ra co jocua uyandu vae —jei—. ²⁷ Jayave uyeyocui vae jei chupe: ‘Nderiví ou ye ma, jare nderu uyucaca vaca tairusu vae uminguira vae, tai ou ye icavi uväe ramo’ —jei, jei—. ²⁸ Jayave tai tenondegua vae pochí jare uique'ã tenta pe. Jayave tu oé tenta güi jare jei tai pe uique vaerä —jei—. ²⁹ Jayave tai tenondegua vae jei tu pe: ‘Mase, jeta año ma ayeyocui ndeve. Jecuaeño ayapo ndeporoyocui. Ërei nemee'ã etei cheve capura-rai yepe, aparea vaerä cheamigo reta pe nducaru vaerä’ —jei, jei—. ³⁰ ‘Jare cua nderai

ico cuña aguasa rupi ico vae reta ndive jare jucuarai umingasta opaete nde nemee chupe vae. Êrei jae ou ye uvâe rupive, ndiyucaca chupe vaca taírusu vae neminguira vae' —jei, jei—. ³¹ Jayave tu jei tai tenondeguia vae pe: 'Cherai, jecuaño nde ndico che ndive, jare opaete chembae nembae co' —jei, jei—. ³² 'Cavi co yayerovia vaerâ. Echa'ã tenonde yave cua nderiví penti umanocue vae ramí co cheve, êrei añaive icove ye ma cheve. Tenonde yave ucañi chegüi, êrei añaive avâe ye ma chupe' —jei, jei.

16

Uyeyocui vae ipatrón imbaembæ opa umingasta vae

¹ Jare Jesús jei jemimboe reta pe: —Ico penti patrón icocatu vae jare ime güüreco jembiocui. Jerácu patrón pe quirai jembiocui opa umingasta imbaembæ —jei—. ² Jayave jocua patrón ueni jembiocui jare jei chupe: '¿Mbae pa co cua nererâcua cheve vae? Embeimbe cheve mbae ndiyapo opaete chembæmbe ndive vae. Echa'ã nomoëta co' —jei, jei—. ³ Jayave uyeyocui vae jei iyupe ipia pe: '¿Mbae ra ayapota? Echa'ã chepatrón chemoëta. Chepuere'ã ayoo ivi corepoti amingana vaerâ. Chepuere'ã vi ayerure ūru vae reta pe mbaembæ re. Echa'ã chemarata co' —jei, jei—. ⁴ 'Aicuua ma mbae ayapota vae. Cuarai ayapo yave, chepatrón chemoë ma yave, ūru vae reta uyandarecota cheré' —jei, jei—. ⁵ Jayave omondo umimbeu vaerâ opaete ipatrón pe mbae re ipia vae reta yugüero vaerâ ipi. Jayave upirandu tenonde ou vae pe: '¿Mbovi pa ndepia chepatrón pe?' —jei, jei—. ⁶ 'Cien lata aceite' —jei, jei—. Jayave uyeyocui vae jei chupe: 'Co oíndetupapire. Eguapi voi jare icuatía cincuenta lata' —jei, jei—. ⁷ Jayave upirandu ūru vae pe: '¿Mbovi pa ndepia chepatrón pe?' —jei, jei—. 'Cien arroba trigo' —jei, jei—. Jayave uyeyocui vae jei chupe: 'Co oíndetupapire. Icuatía ochenta arroba' —jei, jei—. ⁸ Jare patrón icocatu vae jei jembiocui jupi mbae vae uyapo vae pe: 'Cavi ete ndiyapo ndiyape. Ndearacuua co' —jei, jei—. Echa'ã cua ivi pegua reta iyaracuua ete corepoti re Tumpa pe uyeyocui vae reta güü —jei—.

⁹ Che pumbiaracuua piporu vaerâ pecorepoti pembori vaerâ ūru vae reta. Jayave jae reta uyeyapota peamigo retarâ. Echa'ã pemano yave, opata peeya pecorepoti. Êrei ara pe peamigo reta pembiresiveta jare joco pe picota jaeño mai pegua —jei Jesús chupe reta—. ¹⁰ Ime yave quia yandepuere yarovia catu mbae michi vae re vae, yandepuere vi yarovia catu mbae tuicha vae re. Jae ramíño vi ime yave quia upurumbitaví mbae michi vae re vae, upurumbitavita vi mbae tuicha vae re —jei—. ¹¹ Jáeramo Tumpa ipuere'ã yave pererovia catu corepoti re, ndarau vi pererovia catu mbaembæ icavi vae ara pegua re —jei—. ¹² Jare ime yave quia yandepuere'ã yarovia catu ūru vae icorepoti re vae, ndarau ñamee chupe corepoti güünoi vaerâ iyupeguarâ —jei—.

¹³ Penti uyeyocui vae uipota yave uyeyocui mocui patrón pe, umitarëita penti patrón jare uauta ūru vae, ani uparavíqui cavita penti patrón pe jare güürirota ūru vae. Pepuere'ã piyeyocui Tumpa pe corepoti peau reve —jei—.

¹⁴ Jare fariseo reta cua uyandu yave, oyoyai Jesús. Echa'ã jae reta uipota ete corepoti. ¹⁵ Jayave Jesús jei chupe reta:

—Pe reta piyembujupi ūru vae reta jovaque. Êrei Tumpa uicuua pepia pe oí vae. Jare yepe têi ūru vae reta pepiu, êrei Tumpa uicuua piyapo vae icavi mbae co —jei—.

Mboroyocui jare Tumpa iporoyocua

¹⁶ Ndei Juan ou mbove, Tumpa umimbeu yandeve yayapo vaerâ mboroyocui jare Tumpa iñee aracae umimbeu vae reta jei vae. Êrei Juan umbipi umimbeu ñee icavi vae Tumpa iporoyocua regua, jare opaete vae uipota uique Tumpa iporoyocua pe —jei—. ¹⁷ Ara jare ivi opata. Êrei yandepuere'ã etei yambai mboroyocui —jei—.

Omombo jembireco vae

(Mt 19.1-10; Mr 10.1-12)

¹⁸ Ime yave quia omombo jembireco vae, güüreco yave ūru vae jembirecorâ, uyuvanga menda re. Jare ime yave quia uyemombo ma vae güüreco vae, jae vi uyuvanga menda re —jei—.

Cuimbae icocatu vae jare Lázaro

¹⁹ Ico penti cuimbae icocatu vae. Jecuaño uyemonde icavi ete jare opa ara rupi uyapoca tembíu icavi vae —jei—. ²⁰ Jare ico vi ūru cuimbae Lázaro jee vae. Jae co iparavete vae. Lázaro ituyu yepai ico. Opa ara rupi uguapi cuimbae icocatu vae jonque jovai —jei—. ²¹ Lázaro uipota jou tembíu usururucue cuimbae icocatu vae imesa güü oa vae. Jare yimbá reta yugüero uere Lázaro ituyu —jei—. ²² Jare penti ara jocua cuimbae iparavete vae umano, jare ángel reta güüraa ara pe Abraham oí vae pe. Jae ramíño vi cuimbae icocatu vae umano jare uñenotica —jei—. ²³ Jare cañitei pe cuimbae icocatuse vae uiporara ete oí. Jayave jovaiva jare uecha Abraham mbiri oí chugüi. Uecha vi Lázaro Abraham ndive —jei—. ²⁴ Jayave iñeeäta reve jei: 'Cheru Abraham, cheparareco. Embou Lázaro oñono vaerâ ipoäca i pe umâqui vaerâ checü. Echa'ã aiporara ete aí cua tata pe' —jei, jei—. ²⁵ Êrei Abraham jei chupe: 'Cherai, nemandúa

quirāi nde ndico ivi pe yave, nde nenoise mbaembae icavi vae. Jae ramiño vi Lázaro ico ivi pe yave, mbaembae icavi mbae vae uyeyapo chupe. Êrei añaave jae ipiacatu oí jare nde ndiporara neí —jei, jei —. ²⁶ ‘Jae ramiño vi ime oí mbae ñanepau pe yandepuere’ã yaasa vae. Jáeramo nduipota yave ndoo pepi, ndarau orepuere. Jae ramiño vi pipota yave peyu orepi, ndarau pepuere’ —jei, jei —. ²⁷ Jayave cuimbae icocatuse vae jei Abraham pe: ‘Cua jeco pegua ayerure ndeve, cheru, nemondo vaerā Lázaro cheru jenta pe’ —jei, jei —. ²⁸ ‘Echa’ã che ime anoi pandepo cherivi reta. Emondo umimbeu vaerā chupe reta, agüiye vaerā jae reta vi yugüieru cua jasi catu noí vae pe’ —jei, jei —. ²⁹ Jayave Abraham jei chupe: ‘Ime güinoi Moisés iporoyocui jare Tumpa iñee aracae umimbeu vae reta uicuatía vae. Tumiñguela reta jocua’ —jei, jei —. ³⁰ Jayave cuimbae icocatuse vae jei Abraham pe: ‘Ndarau umingueta reta, cheru Abraham. Êrei uyecuuaa yave chupe reta umanocue vae, ueyata reta iyemingueta icavi mbae vae ipia pe oí vae’ —jei, jei —. ³¹ Jayave Abraham jei chupe: ‘Uipota’ã yave uyapisaca Moisés iporoyocui jare Tumpa iñee aracae umimbeu vae reta uicuatía vae re, ndarau uyapo Tumpa jei uyapo vaerā vae yepe tēi quíia icove ye oo chupe reta umanocue vae reta ipite güi’ —jei, jei —.

17

Mbaeyoa uyapoca vae

(Mt 18.6-7, 21-22; Mr 9.42)

¹ Jayave Jesús jei jemimboe reta pe: —Jecuaeño yugüirecota upurumbiavai vae reta. Êrei upurumbiavai vae reta uiporarata co —jei —. ² Icavita tēi co íru vae reta uñapiti vaerā iyayu re penti ita tuicha vae umbaeso pipe vae, jare omombo vaerā i guasu pe, agüiye vaerā uyapoca tēi mbaeyoa penti cheré güirovia vae pe —jei —. ³ Piñemoa ngatu. Nderivi uyapo yave icavi mbae vae ndeve, embiaracuua. Jare jae ipiatiti yave jeco re, embiasa chupe —jei —. ⁴ Jare uyapo yave icavi mbae vae ndeve siete vese penti ara pe, jare jei yave ndeve siete vese jocua ara pe: ‘Ndarau ma ayavi ndecoti’, embiasa chupe —jei —.

Mburugüirovia re

⁵ Jayave yandeYa jemimondo reta jei chupe: —Emimbeu oreve quirāi orepurugüirovia ipuere unemiiñu.

⁶ Jayave yandeYa jei chupe reta:

—Aramoi pepurugüirovia michi ete penti mostaza jääcue michi-rai vae ramí. Êrei jocua nunga mburugüirovia penoi yave, pepuereta pere cua ivira sicómoro jee vae pe: ‘Ecua cua güi epita i guasu pe’, jare ivira uyapota pere vae —jei —.

Uyeyocui vae uyapo vae

⁷ Aramoi penti uyeyocui vae oo co pe umbiara vaerā ani umingaru vaerā maemimba reta. Iparavíqui opa ma uyapo yave, ou ye ipatrón jenta pe. Êrei ipatrón jei’ã etei chupe: ‘Eyu eguapi cua mesa pe ecaru.’ Jucuarái’ã jei chupe —jei —. ⁸ Echa’ã ipatrón jei chupe: ‘Ecua rani emboyi mbae jau vaerā. Jayave javoí pegua eru cheve cherembiurā. Jare che opa ma acaru yave, ndepuereta ndecaru’ —jei, jei —. ⁹ Jare ipatrón umee’ã etei yasurupai jembiocui pe jembiocui uyapo jei vae ramo —jei —. ¹⁰ Jae ramiño vi pe reta piyapo ma yave opaete Tumpa jei peve piyapo vaerā vae, pere piyupe: ‘Ayapo’ã mbae ayembutuichaca vaerā cheYa pe. Echa’ã jaeño ayapo jupi ayapo vaerā vae.’ Jucuarái pere —jei —.

Diez cuimbae ipire ocui vae reta

¹¹ Jare Jesús ooñoi Jerusalén coti. Jayave oo uväe Samaria jare Galilea ipäu pe. ¹² Jare oo penti tenta guasus-rai pe uväe, jare joco pe yugüieru Jesús coti diez cuimbae ipire ocui vae reta. Êrei jae reta upita mbiri catu Jesús güi. ¹³ Jayave jae reta iñeeäta reve jei Jesús pe:

—Jesús, oporomboe vae, oreparareco.

¹⁴ Jare Jesús uecha reta yave, jei chupe reta:

—Pecua sacerdote reta pe, jae reta umae vaerā peré —jei —.

Jare yugüiraa rambueve, aramoiño ocui’ã ma ipire. ¹⁵ Jare penti cuimbae ou ye íru cuimbae reta ipite güi jare iñeeäta reve jei:

—Tumpa tuyembadoraca.

Echa’ã uicuua ucuera ma co imbaerasi güi. ¹⁶ Jayave uyeatica Jesús jovai jare umee yasurupai chupe. Jare co Samaria pegua. ¹⁷ Jayave Jesús jei:

—Ambigüera diez cuimbae reta. Êrei nueve yugüieru’ã ye —jei —. ¹⁸ Cua pentiño ou ye umbiadora vaerā Tumpa. Jare cua judío a co —jei —.

¹⁹ Jayave jei cuimbae pe:

—Epüa iyemboi jare ecua nerenta pe. Ndecuera ma, nderovia cheré ramo —jei —.

Tumpa iporoyocuia outa co

(Mt 24.23-28, 36-41)

²⁰ Jare fariseo reta upirandu Jesús pe quirāi yave ra uyecuaata Tumpa iporoyocuia. Jayave Jesús jei chupe reta:

—Tumpa iporoyocuia ndarau uyecuaa pe reta pesareco jese vae rupi —jei—. ²¹ Jae ramíño vi ndarau quía jei: ‘Mase, co oĩ’, ani: ‘Mase, pee oĩ.’ Echa’ã Tumpa iporoyocuia ime ma pepíte pe oĩ —jei.

²² Jayave Jesús jei jemimboe reta pe:

—Outa ara reta pipota vaerã tẽi cherecha - che cuimbaerã ayeyapo vae - penti ara yepe, ērei ndarau cherecha —jei—. ²³ Jayave īru vae reta jeita peve: ‘Mase, co oĩ’, ani: ‘Mase, pee oĩ.’ ērei agüiye pecua jae reta ndive —jei—. ²⁴ Tamijaanga ama uvera vae. Ama uvera vae uyecuaa opaete ara re. Jae ramíño vi che cuimbaerã ayeyapo vae ayecuaata opaete vae pe ayu ye yave —jei—. ²⁵ ērei aiporara eteta rani jare añave yugüireco vae reta ndarau uipota aico vaerã juvicha guasurã —jei—. ²⁶ Picuua co quirāi īvi pegua reta uyapo icavi mbae vae Noé ico rambueve. Jae ramíño vi uyapota reta icavi mbae vae che cuimbaerã ayeyapo vae ayu ye yave —jei—. ²⁷ Echa’ã Noé ico rambueve, īvi pegua reta ucaruñoi jare ucauñoi yugüireco, jecuaeño cuimbae reta umenda cuñatai reta ndive jare tu reta umee tayi reta cuimbae reta pe umenda jae ndive vaerã. ērei penti ara Noé uique jocua chalana guasu pe. Jayave ou iporu guasujare opa uyuca reta —jei—. ²⁸ Jae ramíño vi Lot ico rambueve, Sodoma pegua reta ucaruñoi jare ucauñoi jare jecuaeño ogua mbaembae jare umee mbaembae, jare jecuaeño umaeti jare uyapo jenta retarã —jei—. ²⁹ ērei jocua ara Lot oẽ Sodoma güi yave, Tumpa ombou tata jare azufre jare opa uyuca Sodoma pegua reta —jei—. ³⁰ Jucuarãita vi uyeyapo che cuimbaerã ayeyapo vae ayecuaa yave —jei—.

³¹ Jocua ara ime yave penti cuimbae o cupe re oĩ vae, o cupe güi ugüeyi yave, agüiye tuique jo pe güüraa vaerã imbaembae. Jae ramíño vi ime yave penti cuimbae co pe oĩ vae, agüiye tou ye jenta pe —jei—. Jesú chupe reta—. ³² Pemandúa Lot jembireco pe uyeyapo vae re —jei—. ³³ Uipota uñuvatu jecove vae ndarau ipuere uñuvatu. ērei jocua umeeta jecove vae uñuvatuta co —jei—. ³⁴ Che jae peve, jocua pítu mocui vae uyapacuata ñugüinoi jupa pe. Tumpa güüraacata penti vae jare īru vae upitata jupa pe —jei—. ³⁵ Jae ramíño vi mocui cuña umbaesota ñugüinoi. Tumpa güüraacata penti cuña jare īru cuña upitata —jei—. ³⁶ Jae ramíño vi mocui cuimbae ñugüinoita co pe. Tumpa güüraacata penti cuimbae jare īru cuimbae upitata co pe —jei—.

³⁷ Jayave Jesús jemimboe reta upirandu chupe:

—OreYa, ¿quiape pa uyeyapota cua?

Jayave Jesús jei chupe reta:

—Umano vae jetecue oĩ vae pe uyebatita uruví reta.

18

Cuñaime umano vae jare mburuvicha upuruãa vae

¹ Jare penti ara Jesús imiari ye jemimboe reta pe umijaanga reve. Uipota uicuaaca chupe reta quirāi icavi co jecuaeño uyerure vaerã Tumpa pe jare agüiye vaerã icueri chugüi. ² Jáeramo jei chupe reta:

—Ico penti tenta guasu pe penti mburuvicha upuruãa vae. Uquiyé’ã Tumpa güi jare güiríro īru vae reta —jei—. ³ Jae ramíño vi ico jocua tenta guasu pe penti cuñaime umano vae. Pentí ara cuñaime umano vae oo mburuvicha upuruãa vae pe jare jei chupe: ‘Cherepi cherovaicho güi’ —jei, jei—.

⁴ Mbüruvicha upuruãa vae uyapo’ã mbae uepi vaerã cuña. ērei mboví ara rupi jei iyupe ipia pe: ‘Yepe tẽi aquiyé’ã Tumpa güi jare aríro īru vae reta, ⁵ ērei cua cuñaime umano vae chemambeco ramo, aepita co. Echa’ã aepi’ã yave, jecuaeño outa chepi jare ndarau umaeño aputuu’ —jei, jei.

⁶ Jayave yandeYa jei:

—Jucuarãi co jei jocua mburuvicha upuruãa vae jipi mbae vae uyapo vae. ⁷ ērei Tumpa jipi co. Jáeramo uepita co uiparavo vae ara rupi jare pítu rupi uyerure chupe vae reta, yepe tẽi aramoi ndarau uepi voi —jei—. ⁸ Che jae peve, imambae Tumpa uepita reta. ērei che cuimbaerã ayeyapo vae ayu ye yave īvi pe, ¿imeta ra ñugüinoi upurugüirovia vae reta? —jei.

Fariseo jare mburuvicha peguarã ocovara vae

⁹ Jare Jesús oĩ vae pe ñugüinoi amocue uyembujupi ipiayemingueta pe vae. Jae reta güiríro īru vae reta. Jare Jesús jei chupe reta umijaanga reve:

¹⁰ —Mocui cuimbae yugüira Tumpa jo pe uyerure vaerã Tumpa pe. Pentí co fariseo jare īru vae mburuvicha peguarã ocovara vae co —jei—. ¹¹ Fariseo uyemboí jare uyerure iyupe ipia pe cuarãi: ‘Tumpa, amee yasurupai ndeve. Echa’ã che aico’ã īru cuimbae reta yugüireco rami. Che apurumbitaví’ã apíro vaerã quía güi imbaembae. Ayapo’ã jipi mbae vae. Ayuvanga’ã menda re. Ayapo’ã vi jocua mburuvicha peguarã ocovara vae uyapo rami’ —jei, jei—. ¹² ‘Che ayecuacu tembíu güi mocui vese semana pe, jare amee ndeve diezmo opaete anoi vae güi’ —jei, jei—. ¹³ Jare mburuvicha peguarã ocovara vae uyemboí oĩ mbiri catu fariseo güi, jare uipota’ã jovaíva. Jaeño ocua iyee ipitía re jare jei: ‘Tumpa,

cheparareco. Echa'ā che cheyoa vae co' —jei, jei—. ¹⁴ Che jae peve, Tumpa umbiasa mburuvicha peguarā ocovara vae pe imbaeyoa reta, jare jae oo ye jenta pe. Ěrei umbiasa'ā fariseo pe imbaeyoa reta. Echa'ā ime yave quía uyembutuicha vae, uñemimichicata co. Jare ime yave quía uñemimichi vae, uyembutuichacata co —jei.

*Jesús uyerure Tumpa pe sambiai reta re
(Mt 19.13-15; Mr 10.13-16)*

¹⁵ Jare amocue vae güeru Jesús oī vae pe sambiai reta, Jesús oñono vaerā ipo jese reta. Ěrei Jesús jemimboe reta uecha reta yave, uñeengata güeru vae reta pe. ¹⁶ Ěrei Jesús ueni sambiai reta jare jei:

—Pemaeño sambiai reta re yugüeru vaerā checoti. Agüiye piyopia. Echa'ā cua nunga uyeyocu Tumpa pe iporoyocuia pe —jei—. ¹⁷ Añete che jae peve, pipota'ā yave Tumpa pe piyeyocu vaerā penti sambiai uipota rami, ndarau pico Tumpa iporoyocuia pe —jei.

*Mburuvicha icocatu vae
(Mt 19.16-30; Mr 10.17-31)*

¹⁸ Jare penti mburuvicha jei Jesús pe:

—Oporamboe vae, nde ndepiacavi co. ¿Mbae pa ayapota anoi vaerā tecove opa mbae vae? —jei.

¹⁹ Jayave Jesús jei chupe:

—¿Maera pa ndere cheve chepiacavi vae co? Mbaeti quía ipiacavi, jaeño co Tumpa —jei—. ²⁰ Nde ndicuua co mboroyocu reta: 'Agüiye iyuvanga menda re. Agüiye epuruyuca. Agüiye nemonda. Agüiye ndapu īru vae re. Ipíu nderu jare ndesi' —jei Jesús chupe.

²¹ —Ayaví'ā penti ave cua mboroyocu reta chemichi güiive —jei.

²² Jare Jesús cua uyandu yave, jei chupe:

—Ime mbae uata ndiyapo vaerā. Emee opaete mbaembae nenoí vae corepoti re, jare emee ndecorepoti iparavete vae reta pe, jare ndicocatuta ara pe. Jayave eyu cherupíe —jei.

²³ Ěrei mburuvicha cua uyandu yave, tuicha ipiatití. Echa'ā icocatu ete co.

²⁴ Jare Jesús uecha yave mburuvicha ipiatití upita, jei:

—Yavai ete co icocatu vae reta uique vaerā Tumpa iporoyocuia pe. ²⁵ Yavai ete icocatu vae uique vaerā Tumpa iporoyocuia pe, maemimba camello jee vae yuu jesacua rupi uasa vaerā güi —jei.

²⁶ Jayave cua uyandu vae reta jei:

—Jucuarāi yave, ¿quía pa ipuere uyembiasaca?

²⁷ Jayave Jesús jei chupe reta:

—Ívi pegua reta ipuere'ā uyembiasa. Ěrei Tumpa ipuere umbiasa reta —jei.

²⁸ Jayave Pedro jei Jesús pe:

—Mase, ore opaete mbaembae ndueya, ndoyu vaerā nderupíe.

²⁹ —Añete che jae peve —jei Jesús—, ime yave quía ueya jenta, ani tu, ani ichi, ani tiqueí reta, ani tivi reta, ani jembireco, ani isambiai reta Tumpa iporoyocuia jeco pegua vae, ³⁰ jeta ete jecoviata co chupe ívi pe ico rambueve, jare taicue rupi Tumpa umeeta chupe tecove opa mbae vae —jei.

*Jesús umimbeu ye umanota co
(Mt 20.17-19; Mr 10.32-34)*

³¹ Jayave Jesús ueni jocua doce jemimboe reta, jare jei chupe reta:

—Mase, yaa co ñaí Jerusalén pe, jare opaete Tumpa iñee aracae umimbeu vae reta uicuatiacue cuimbaerá uyeyapo vae regua uyeyapota co cheve —jei—. ³² Echa'ā īru vae reta chemeeta judío mbae vae reta pe. Jare jae reta cheyoyaita, uyapota icávi mbae vae cheve, jare undívita cheré —jei—. ³³ Jayave chenupata chicote pe jare cheyucata. Ěrei mbapi ara rupi aicove yeta ayu umanocue vae reta ipíte güi —jei.

³⁴ Ěrei Jesús jemimboe reta uicuua'ā mbae ra uipota jei cua Jesús jei chupe reta vae. Yavai ete chupe reta uicuua vaerā mbae jei vae.

*Cuimbae jesa mbae vae
(Mt 20.29-34; Mr 10.46-52)*

³⁵ Jare Jesús coíño ma ou Jericó güi yave, penti cuimbae jesa mbae vae uguapí uyerure oī mbae re tape jembei pe. ³⁶ Jae uyandu jeta vae uasa ñugüinoi jocoropi, jare upirandu mbae ra uyeyapo oī. ³⁷ Jayave uasa vae reta umimbeu chupe Jesús Nazaret pegua uasa oī. ³⁸ Jayave jesa mbae vae iñeeäta reve jei:

—Cheparareco, Jesús. Nde co jae David iñemoñaa reta pegua —jei.

³⁹ Jeta joco pe ñugüinoi vae reta uñeengata chupe. Uipota tēi umiquíi. Ěrei jesa mbae vae jeite iñeeäta reve jei:

—Nde co jae David iñemoñaa reta pegua. Cheparareco —jei.

⁴⁰ Jayave Jesús uyemboi, jare jei joco pe ñugüïnoi vae reta pe güeru vaerä jesa mbae vae. Jare jesa mbae vae ou yave Jesús oï vae pe, Jesús upirandu chupe:

⁴¹ —¿Mbae pa ndipota ayapo vaerä ndeve?

—Tamae, cheYa —jei.

⁴² Jayave Jesús jei chupe:

—Emae. Ndecuera ma, nderovia cheré ramo —jei.

⁴³ Jare jupivoi ipuere umae, jare oo Jesús jaicue umbiadora reve Tumpa. Jare opaete joco pe ñugüïnoi vae reta vi cua uecha yave, umbiadora Tumpa.

19

Jesús jare Zaquo

¹ Jare Jesús uique Jericó pe jare oo ye joco güi. ² Jare ico joco pe penti cuimbæ Zaquo jee vae. Jae co mburuvicha peguarä ocovara vae reta itenondegua jare jae co icocatu vae. ³ Jare Zaquo uipota tẽi uecha Jesús. Érei ipuere'ã uecha. Echa'ã jeta vae ñugüïnoi Jesús uasa vae rupi, jare Zaquo ipucu'ã co. ⁴ Jáeramo Zaquo osi oo penti ívira sicómoro jee vae tape jembeí pe oï vae pe, jare uyupi jese uecha vaerä Jesús. Echa'ã Jesús uasata oï jocoropi. ⁵ Jare Jesús oo uväe yave ívira oï vae pe, jovaíva umae jare uecha Zaquo. Jayave jei chupe:

—Egüeyi, Zaquo. Echa'ã añave aipota apou ndepi —jei.

⁶ Jayave Zaquo ugüeyi voi, jare güiraa Jesús jenta pe uyerovia reve. ⁷ Jare opaete íru vae reta cua uecha yave, iñeenguru reve jei reta:

—Jae oo opou penti cuimbæ iyoa vae pe.

⁸ Érei Zaquo uyemboi yandeYa jovai jare jei chupe:

—Mase, cheYa, ameeta chembæmbæ mbite rupi iparavete vae reta pe. Jare ime yave quía güi apíro mbae chugüi vae, irundi ye ambijecovita chupe —jei.

⁹ Jayave Jesús jei chupe:

—Cua ara yembiasa ou cua tenta pegua reta pe. Echa'ã nde vi co jae Abraham iñemoñaa reta pegua —jei—. ¹⁰ Echa'ã che cuimbaerä ayeyapo vae ayu aeca vaerä jare ambiasa vaerä ucañi Tumpa güi vae reta —jei.

Diez corepoti jare uyeyocui vae reta

(Mt 25.14-30)

¹¹ Jare Jesús ndive ñugüïnoi vae reta cua uyandu ma yave, Jesús imiari ye chupe reta umijaanga reve. Echa'ã oo ma uväe coiño Jerusalén güi, jare jae ndive ñugüïnoi vae reta ipia pe uyeminguela tẽi imambae ete co uyecuata Tumpa iporoyocuia. ¹² Jáeramo Jesús jei chupe reta:

—Penti mburuvicha oota iívi güi ambie iívi mbiri oï vae pe uyeyapo vaerä iívi pegua reta juvicha guasurä. Jare taicue rupi ou yeta —jei—. ¹³ Jare ndei oo mbove, ueni diez jembiocui reta jare umee penti penti pe corepoti jepi ete vae, jare jei chupe reta: ‘Piporu cua corepoti ayu ye regua’ —jei, jei—. ¹⁴ Érei mburuvicha jentaigua reta umitarëi mburuvicha, jare mburuvicha oo ma yave ambie iívi pe, jae reta omondo jei vaerä: ‘Ndüpota’ã jocua cuimbæ ico vaerä oreruvicha guasurä’ —jei reta, jei—.

¹⁵ Érei mburuvicha uyeyapo jentaigua reta juvicha guasurä. Jayave ou ye uväe iívi pe jare ueni jembiocui corepoti umee chupe vae reta uyembati vaerä, jae uicuua vaerä mbovi ra penti penti umingana —jei—. ¹⁶ Penti jembiocui jei chupe: ‘Patrón, amimbaravíqui corepoti nemee cheve vae, jare añave anoi diez corepoti’ —jei, jei—. ¹⁷ Jayave ipatrón jei jocua jembiocui pe: ‘Icavi ndiyapo. Nde co jae cherembiocui icavi vae. Cua amee ndeve vae mboviño. Érei nemimbaravíqui cavi. Jáeramo che toroñono diez tenta guasu pegua reta juvicharä’ —jei, jei—. ¹⁸ Jayave íru jembiocui jei chupe: ‘Patrón, amimbaravíqui corepoti nemee cheve vae, jare añave anoi pandepo corepoti’ —jei, jei—. ¹⁹ Jayave ipatrón jei jocua jembiocui pe: ‘Icavi ndiyapo. Che toroñono pandepo tenta guasu pegua reta juvicharä’ —jei, jei—. ²⁰ Jayave íru jembiocui jei chupe: ‘Mase, patrón, co oï corepoti nemee cheve vae. Ayapicua añuvatu ndeve’ —jei, jei—. ²¹ ‘Echa'ã aquiyé ndegüi ndepiapochi ramo. Nde nepíro mbaembæ íru vae reta güi jare ndeaviro íru vae reta oñoti vae’ —jei, jei—. ²² Jayave ipatrón jei jocua jembiocui pe: ‘Nde ndere vae rupi etei che nuáata co. Nde co jae cherembiocui icavi mbae vae. Ndicuua chepiapochi co jare quiräi apíro mbaembæ íru vae reta güi jare quiräi aaviro íru vae reta oñoti vae’ —jei, jei—.

²³ ‘¿Maera pa nderaa'ã checorepoti banco pe? Echa'ã jucuarai ndiyapo yave, ayu ye yave nemeeta tẽi co cheve corepoti amee ndeve vae jare mbovi ye banco pegua reta umifluta tẽi jae ndive vae’ —jei, jei—. ²⁴ Jayave ipatrón jei íru jembiocui joco pe ñugüïnoi vae reta pe: ‘Pepíro chugüi jocua corepoti jare pemee jocua diez corepoti güïnoi vae pe’ —jei, jei—. ²⁵ Érei jae reta jei ipatrón pe: ‘Patrón, jae güïnoi ma diez corepoti.’ ²⁶ ‘Añete co’ —jei ipatrón chupe reta, jei—. ‘Érei che jae peve, güïnoi vae pe

uñemiiruta, jare mbaeti güinoi vae güi mbovi ete güinoi vae uyeequita' —jei, jei—.²⁷ 'Erei peru cua pe jocua cherovaicho reta. Jae reta uipota'ã che aico vaerã juvicha guasurã. Piyuca cherovaque' —jei, jei.

Jesús oo Jerusalén pe

(Mt 21.1-11; Mr 11.1-11; Jn 12.12-19)

²⁸ Jare Jesús cua jei ma chupe reta yave, uguata ye íru vae reta jenonde oo Jerusalén coti. ²⁹ Jare yugüiraa uvae coiño tenta guasu-rai reta Betfagé jare Betania güi. Joco pe oí ívitu guasu Olivos. Jayave Jesús oyocui mocui jemimboe reta.

³⁰ —Pecua pea tenta guasu-rai yanderovai oí vae pe —jei chupe reta—. Peo pevæe rupive, pevæeta penti mburica tairusu vae uñeñapítí oí. Ndei ave etei quía opo jese. Piyora jare peru —jei—. ³¹ Jare ime yave quía jei peve vae: '¿Maera pa piyora?' pere chupe cuarãi: 'YandeYa uipota uiporu' —pere, jei.

³² Jayave Jesús omondo vae reta yugüiraa, jare uvae mburica tairusu vae Jesús umimbeu chupe reta rami. ³³ Jare oyora ñugüinoi yave, mburica iya reta upirandu chupe reta:

—¿Maera pa piyora peí mburica?

³⁴ —YandeYa uipota uiporu —jei reta.

³⁵ Jayave güeru reta mburica tairusu vae Jesús oí vae pe. Jayave Jesús jemimboe reta oñono iyasoya mburica icupe re, jare Jesús opo jese. ³⁶ Jare Jesús oo rambueve Jerusalén coti, joco pe ñugüinoi vae reta uipiso iyasoya tape rupi mburica jenonde.

³⁷ Jare umbipi reta ugüeyí ívitu guasu Olivos güi. Coiño ma yugüeru Jerusalén güi. Jayave opaete Jesús jemimboe reta umbipi uyerovia. Umbiadora reta Tumpa iñeeáta reve opaete miácañí uecha Jesús uyapo vae reta re. ³⁸ Jare jei reta:

—Tuyembadoraca yandeRuvicha Guasurã yandeYa jee re ou vae. Mbíacatu toí ara pe. Ara pegua reta tumbiadora Tumpa —jei reta.

³⁹ Jare amocue fariseo reta jeta vae ipite pe ñugüinoi vae jei Jesús pe:

—Opromboe vae, iñeengata nderemimboe reta pe.

⁴⁰ Ërei Jesús jei chupe reta:

—Che jae peve, cua reta quii yave, jupivoiño ita reta uyeminguetata iñeeáta reve —jei.

⁴¹ Jare Jesús coiño ma Jerusalén güii ou uvae yave, umae Jerusalén re jare umbipi uyao. ⁴² Jare jei:

—Ndicuua'ã quirãi ra ndepuere nenoi mbíacatu. Cua ara reta pe ndicuata téi co. Ërei añave ndarau ndicuua —jei—. ⁴³ Outa ma uvae nderovaicho reta nequëse vaerã jare ndarau umaeño ndepite pe yugüireco vae reta re oë vaerã ndegüi —jei—. ⁴⁴ Jare jae reta opata nembusururu jare uyucata opaete ndepite pe yugüireco vae reta. Ndarau ueya reta penti ita íru ita íarambo, ndicuua'ã Tumpa umeeta téi mbíacatu ndeve ramo —jei.

Jesús Tumpajo pe uyapo vae

(Mt 21.12-17; Mr 11.15-19; Jn 2.13-22)

⁴⁵ Jayave Jesús uique Tumpa jo pe, jare umbipi omoë joco güi umaemee vae reta jare mbae ogua vae reta. ⁴⁶ Jare jei chupe reta:

—Tumpa iñee pe uyecuatía oí cuarãi: 'Chero co jae piyerure cheve pipe vae.' Jucuarãi uyecuatía oí. Ërei pe reta piyapo ma imonda vae reta iñemria rami —jei.

⁴⁷ Jayave Jesús opromboe Tumpa jo pe opa ara rupi. Ërei sacerdote reta itenondegua reta jare mboroyocui re opromboe vae reta jare tenta guasu pegua reta itenondegua reta ueca quirãi ipuere uyucaca vaerã Jesús. ⁴⁸ Ërei uicuua'ã reta quirãita ra uyucaca. Echa'ã opaete tenta guasu pegua reta uipota ete uyapísaca Jesús re.

20

Jesús imbaepuere

(Mt 21.23-27; Mr 11.27-33)

¹ Jare penti ara Jesús opromboe oí Tumpa jo pe, jare umimbeu joco pe ñugüinoi vae reta pe ñee icavi vae. Jayave yugüeru vi joco pe sacerdote reta itenondegua reta jare mboroyocui re opromboe vae reta jare tenta guasu pegua reta itenondegua reta. ² Jayave jae reta jei Jesús pe:

—Emimbeu oreve, ¿mbae nunga mbaepuere pa nenoi cua mbaembae ndiyapo vaerã? ¿Quía pa umee ndeve mbaepuere cua ndiyapo vaerã? —jei reta.

³ Jayave Jesús jei chupe reta:

—Che vi tapirandu peve mbae re. Yaecha pepuere pemimbeu cheve —jei—. ⁴ ¿Quía pa ombou Juan upurumbibautiza vaerã? ¿Tumpa pa ombou? ani ¿ívi pegua reta pa ombou? —jei.

⁵ Jayave jae reta jei uyupo:

—Yae yave: ‘Tumpa co ombou’, jae jeita yandeve: ‘Jucuarāi yave, ¿maera pa perovia’ā?’ ⁶ Êrei yae yave: ‘Ívi pegua reta co ombou’, opaete tenta guasu pegua reta yandeapita ita pe yandeyuca. Echa’ā jae reta güirovia Juan co jae penti Tumpa iñee umimbeu vae —jei reta.

⁷ Jáeramo jei reta Jesús pe:

—Nduicuaa’ā quíra ra ombou Juan.

⁸ Jayave Jesús jei chupe reta:

—Che vi ndarau amimbeu peve mbae nunga mbaepuere anoi cua mbaembae ayapo vaerā —jei.

Co iporúa icavi mbae vae reta

(Mt 21.33-44; Mr 12.1-11)

⁹ Jayave Jesús umbipi’ imiari joco pe ñugüinoi vae reta pe umijaanga reve.

—Penti cuimbae oñotíjeta uva ico pe. Jayave uiporuca ico īru vae reta pe, jae reta uyandareco vaerā jese. Jayave co iya oo mbiri ambie ívi pe upita vaerā ima pegua —jei—. ¹⁰ Jare uva yagüiye ma yave, co iya ombou penti jembiocui co iporúa reta pe, jae reta umbiyao vaerā tēi uva chupe reta, iya güünoi vaerā imbaerā. Êrei co iporúa reta uinupa co iya jembiocui, jare omondo ye. Umee’ā etei chupe güüraa vaerā —jei—. ¹¹ Jayave co iya ombou ye tēi īru jembiocui. Êrei co iporúa reta uinupa jare uyapo icavi mbae vae chupe, jare omondo ye. Umee’ā etei chupe güüraa vaerā —jei—. ¹² Jayave co iya ombou ye tēi īru jembiocui. Êrei co iporúa reta umbipere, jare omondo ye —jei—. ¹³ Jayave co iya jei iyupe: ‘¿Mbae ra ayapota? Amondota cherai aau ete vae. Aramoi jae reta uiipiuta cherai’ —jei, jei—. ¹⁴ Êrei co iporúa reta uecha yave co iya tai, jae reta uyupe: ‘Cua co jae iyará vae. Yaa yayuca, jare yande yaicota co iyará’ —jei reta, jei—. ¹⁵ Jayave jae reta omombo co güi, jare uyuca.

Jáeramo ¿mbae ra uyapota co iya jocua co iporúa reta pe? —jei—. ¹⁶ Outa, opa uyuca vaerā jocua co iporúa reta, jare uiporucata ico ambie vae reta pe —jei.

Jayave cua uyandu vae reta jei:

—Tumpa mona jei agüiye uyeyapo.

¹⁷ Jayave Jesús umae jese reta jare jei:

—¿Mbae ra uipota jei cua Tumpa iñee pe uyecuatía oī vae?

‘Ita tenta iyapoa reta omombo vae uyeyapo ma ita tenondegua vae.’

¹⁸ Ime yave quíra jocua ita re uyepiaca vae, uñemopéta co. Jare ime yave quíra jocua ita oa jese vae, opata umbiperasoro —jei.

¹⁹ Jayave jupivoi sacerdote reta itenondegua reta jare mboroyocui re oporomboe vae reta uipota tēi uiipisi Jesús. Echa’ā uicuaa cua Jesús umijaanga reve jei vae uicuaaca quirái jae reta teco güünoi. Êrei uquiyé tenta guasu pegua reta güi.

¿Jupi pa yambiepi vaerā César pe?

(Mt 22.15-22; Mr 12.13-17)

²⁰ Jare jecuaeño jae reta umae Jesús re. Jare omondo vi īru vae reta uipiáro vaerā Jesús. Cua reta uipota tēi umbitavi Jesús, Jesús ipia pe uyeminguela vaerā tēi jae reta jupi co. Êrei jae reta uipota tēi umbijeco mbae jae vae re, uñeapo vaerā jese mburuvicha pe. ²¹ Jayave jae reta jei Jesús pe:

—Oporomboe vae, nduicuaa nde ndere vae jare ndeporomboe jese vae añete co. Nde nembutuicha’ā penti ave īru vae güi. Nde ndeporomboe cavi quirái Tumpa uipota yaico vaerā vae re —jei reta—. ²² César yandecoui yambiepi vaerā chupe corepoti pe. ¿Jupi pa yambiepi vaerā chupe? ani ¿jupi’ā pa? —jei reta.

²³ Êrei Jesús uicuaa jae reta uipota tēi co umbitavi, jare jei chupe reta:

—¿Maera pa pipota piyavica cheve? ²⁴ Peru cheve penti corepoti taecha —jei—. ¿Quíra jova ía pa cua? ¿Quíra jee pa cua uyecuatía oī vae? —jei.

—Cua César imbae co —jei reta.

²⁵ Jayave Jesús jei chupe reta:

—Pemee César pe César pegua, jare pemee Tumpa pe Tumpa pegua —jei.

²⁶ Jare jae reta ipuere’ā umbijeco Jesús mbae jei vae re tenta guasu pegua reta jovaque. Ipiacañi cua jei vae re, jare jei’ā ye mbae ave chupe.

¿Icove yeta pa umanocue vae reta?

(Mt 22.23-33; Mr 12.18-27)

²⁷ Jayave yugüeru Jesús oī vae pe amocue saduceo reta. Opaete saduceo reta jei umanocue vae reta icove ye’ā co. Saduceo yugüeru vae reta jei Jesús pe:

²⁸ —Oporomboe vae, Moisés uicuatía ueya yandeve cuarái: ‘Penti tiquei vae umano yave, jembirecocue mbaeti imembí chupe yave, cuimbae amiri tíví tumenda jocua cuña ndive. Jayave cuña imembí yave, cuimbae tumbijee sambia tiquei amiri jee pe.’ Jucuarái uicuatía Moisés —jei reta—. ²⁹ Ico penti cuimbae seis tíví reta güünoi vae. Cua cuimbae umenda, jare umano umimembí mbae reve. ³⁰ Cuimbae

amiri jaicue rupigua umenda jembirecocue ndive, ērei umano vi umimembí mbae reve. ³¹Jayave jaicue rupigua ye umenda cuña ndive, jare umano vi umimembí mbae reve. Opaete siete reve umenda jocua cuña ndive, jare opaete siete reve umano umimembí mbae reve —jei reta—. ³²Taicue rupi cuña umano vi. ³³Jayave umanocue vae reta icove ye yave, ¿quía nunga vae jembirecorā pa icota jocua cuña? Echa'ā opaete siete reve umenda jae ndive —jei reta.

³⁴Jayave Jesús jei chupe reta:

—Cua iví pe yugüireco rambueveño cuimbae reta umenda cuña reta ndive jare cuña reta umenda cuimbae reta ndive. ³⁵Ērei icavita co Tumpa pe umbijecove ye vaerā amocue vae güeru umanocue vae reta ipite güi. Jae reta yugüireco yeta co, ērei cuimbae reta ndarau umenda cuña reta ndive jare cuña reta ndarau umenda cuimbae reta ndive icove reta ye yave —jei—. ³⁶Jae ramiño vi ndarau umano ye. Echa'ā yugüirecota ángel reta yugüireco rami. Yugüirecota Tumpa tai retardā. Echa'ā Tumpa umbijecove yeta güeru umanocue vae reta ipite güi —jei—. ³⁷Tamimbeu peve umanocue vae reta regua. Icove yeta co. Moisés uicuacaca cua uicuatia yave jocua yai jendí vae regua. Echa'ā Moisés umimbeu quirāi yandeYa Tumpa jei: ‘Che co jae Abraham, Isaac jare Jacob iTumpa.’ Cua umimbeu Moisés —jei—. ³⁸Echa'ā Tumpa mbaeti co umanocue vae reta iTumpa. Jae co tecove güinoi vae reta iTumpa. Yepe tēi ñamano, yanderecove imeño oī —jei.

³⁹Jayave amocue mboroyocui re oporomboe vae reta jei Jesús pe:

—Oporamboe vae, icavi ndere.

⁴⁰Jare jocua güive uquiyé reta upirandu vaerā chupe mbae re.

¿Quía iñemoñaa reta pega pa co Cristo?

(Mt 22.41-46; Mr 12.35-37)

⁴¹Jayave Jesús upirandu joco pe ñugüinoi vae reta pe:

—¿Maera pa jei mboroyocui re oporomboe vae reta Cristo co jae David iñemonaa reta pega?

⁴²Echa'ā David etei jei Salmo reta pe cuarāi:

‘YandeYa Tumpa jei cheYa pe:

Eguapi cheyipi pe cheacata cotí,

⁴³ñderovaicho reta opa amiamiri regua’ —jei Tumpa.

Jucuarāi jei David —jei—. ⁴⁴¿Maera pa jei reta Cristo co jae David iñemoñaa reta pega? Echa'ā David etei jei chupe: ‘CheYa’ —jei.

Jesús umbijeco mboroyocui re oporomboe vae reta

(Mt 23.1-36; Mr 12.38-40; Lc 11.37-54)

⁴⁵Jayave Jesús jei jemimboe reta pe opaete joco pe ñugüinoi vae reta jovaque:

—Piñemoa ngatu mboroyocui re oporomboe vae reta güi. Jae reta jecuaeño uipota uguata jemimonde pucu vae reve, jare uipota íru vae reta pe uyembisaludaca vaerā calle reta rupi. Jare yugüihraa yave tupao pe jare parea pe, jecuaeño uipota uguapi tenda tenondegua vae reta pe —jei—. ⁴⁶Jae reta upiro cuña ime umano vae reta güi opaete imbaembae, jare pucu uyerure Tumpa pe upurumbitavi vaerā. Jae reta uiporara eteta co —jei.

21

Cuña ime umano vae umee corepoti Tumpa pe

(Mr 12.41-44)

¹Jare Jesús Tumpa jo pe oī yave, uecha icocatu vae reta oñono icorepoti corepoti jíru pe. ²Jare uecha vi penti cuña ime umano vae iparavete vae oñono mocui riare corepoti jíru pe. ³Jayave Jesús jei:

—Añete che jae peve, cua cuña ime umano vae iparavete vae uyapo jeta ete opaete íru oñono vae reta güi. ⁴Echa'ā opaete íru reta güeru oñono mbovi jeta güinoi vae güi. Ērei cua cuña, yepe tēi iparavete, oñono opaete güinoi vae. Jocua co jembíu jepirā tēi vae —jei chupe reta.

Tumpa jo uyeitita

(Mt 24.1-2; Mr 13.1-2)

⁵Jare amocue vae uyemingueta ñugüinoi Tumpa jo re. Jei reta icavi ete co ita reta jare mbaembae tenta guasu pegua reta güeru omopóra vaerā vae. Jayave Jesús jei:

⁶—Outa co uvāe ara cua o reta añave peechea vae uyeiti vaerā. Ndaraupieta penti ave ita íru ita iárambo —jei.

Mbaesusere reta uyeypota vae

(Mt 24.3-28; Mr 13.3-23)

⁷Jayave Jesús jemimboe reta upirandu chupe:

—Oporomboe vae, ¿quirāi yave pa cua uyeyapota? Jare opaete cua uyeyapota ma yave, ¿quirāita pa nduicuaa? —jei reta.

⁸Jayave Jesús jei chupe reta:

—Piñemoa ngatu agüiye vaerā petavi. Echa'ā Yugüeruta jeta cheree pe uyembijeeta vae reta. Jae reta jeita: 'Che co jae Cristo. Outa co uvāe jocua ara reta' —jeita, jei—. Êrei agüiye piñemíru jae reta ndive —jei—. ⁹Imeta co ñerāro reta jare tecorai reta. Êrei piyandu yave cua reta regua, agüiye pequiye. Cua susere reta uyeyapoñotai co. Êrei cua susere reta ndei ave co opa vaerā —jei—.

¹⁰Penti ívi pegua reta uñerārota ambie ívi pegua reta ndive, jare mburuvicha reta uñerārota íru mburuvicha reta ndive. ¹¹Jare ívi tanta ucātata jeta que rupi. Jare imeta caruai reta jare mbaerasí reta jeta vae uyucata vae. Jare mbaembae ara re uyecuata vae upurumínguiyeta co —jei—. ¹²Êrei ndei cua uyeyapo mbove, íru vae reta pepisita jare uyapota icavi mbae vae peve. Jae reta pereraata itupao reta pe jare pēñonota peresoriru pe, jare pereraata mburuvicha guasu reta jovai chereco pegua —jei—. ¹³Êrei jucuarāi uyapo reta peve yave, pepueret pemimbeu cheregua —jei—. ¹⁴Agüiye piyemipia'ā cua re jare agüiye pepia pe piyeminguela mbae ra pereta vae —jei—. ¹⁵Echa'ā che aicuaacata peve mbae pere vaerā, jare che pumbiaracuata agüiye vaerā perovaicho reta uicuua mbae ra ipuera jei peve —jei—. ¹⁶Jare Peru jare pesi, jare periquei reta jare periví reta, jare perentará reta jare peamigo reta pemeeta perovaicho reta pe, jare amocue pe reta piyeyucacata co —jei—. ¹⁷Jare piñemitarēcata opaete vae pe chereco pegua. ¹⁸Êrei ndarau penti ave pea ucañi —jei—. ¹⁹Jare perōsa peo pevāe iyapí pe yave, piyembiasacata co —jei—.

²⁰Jare peeche jeta sundaro reta Jerusalén oñova yave, picuata ou ma co uvāe Jerusalén uyembai vaerā —jei—. ²¹Jayave Judea pe ñugüïnoi vae reta tosi ívitu guasu cotí. Jare Jerusalén pe ñugüïnoi vae reta toë tosi joco güi. Jare jocua coiño Jerusalén güi ñugüïnoi vae reta agüiye tuyugüiraa Jerusalén pe —jei—. ²²Echa'ā jocua ara reta pe ívi pegua reta uiporara eteta, jare opaete Tumpa iñee pe uyecuátia oí vae uyeyapota co —jei chupe reta—. ²³Jare ipurúa vae reta jare umicambu vae reta uiporara eteta jocua ara reta pe. Echa'ā cua ívi pegua reta uiporara eteta. Echa'ā Tumpa uiporaracata co chupe reta —jei—. ²⁴Jare jeta cua ívi pegua reta uyeyucacata quisepucu pe. Jare joaicho reta güüraata jeta cua ívi pegua reta ambie ívi reta pe. Jare judío mbae vae reta yugüirecota Jerusalén pe judío mbae vae reta iara reta opa regua —jei Jesús chupe reta—.

Cuimbaerā uyeyapo vae ou yetá

(Mt 24.29-44; Mr 13.24-37)

²⁵Jayave ívi pegua reta uechata mbae uye cuaa oí guarasi jare yasi jare yasitata reta re. Jare opaete ívi pegua reta uiporarata jare ndarau uicuua mbae uyapo vaerā. Jare i guasí reta jiapu eteta —jei—. ²⁶Jare ívi pegua reta uquiyé eteta. Uquiyé eteta mbae ívi pe uyeyapo oí vae güi. Jare ara re mbaepuere güünoi vae reta ucātata —jei—. ²⁷Jayave ívi pegua reta cherechata ayu amapítu reve. Che cuimbaerā ayeyapo vae anoita mbaepuere tuicha vae, jare ayembiadoracata opaete vae pe —jei—. ²⁸Jare opaete cua mbaembae umbipi uyeyapo yave, piñemiatangátu. Echa'ā imambae Tumpa perepitá —jei chupe reta.

²⁹Jayave Jesús jei chupe reta umijaanga reve:

—Tamijaanga íva jare opaete ívira reta. ³⁰Uyembípi joquí yave, picuua uyaro ma co ama oquí vaerā —jei—. ³¹Jae ramíño vi pe reta peeche yave cua mbaembae uyeyapo ñugüïnoi vae, picuata coiño ma co ou Tumpa iporoyocuia —jei Jesús chupe reta—.

³²Añete che jae peve, cua ívi pe añave yugüireco vae reta ndarau opa umano ndei opaete cua mbaembae uyeyapo mbove —jei—. ³³Ara jare ívi opata, êrei chiñee ndarau opa —jei—.

³⁴Piñemoa ngatu, agüiye vaerā pecau jare pesavipo, jare agüiye vaerā piyemipia'ā mbaembae ívi pegua re. Echa'ā jucuarāi piyapo yave, outa uvāe jocua ara peáro mbae peí reve —jei chupe reta—. ³⁵Echa'ā jocua ara uipocouta opaete ívi pegua reta ñuai oporomboa rami —jei—. ³⁶Jáeramo piñemoa ngatu, jare jecuaeño piyerure Tumpa pe icavi vaerā chupe perepi vaerā opaete cua uyeyapota vae güi jare piyemboí vaerā cherovai. Che co jae cuimbaerā uyeyapo vae —jei—.

³⁷Jare opa ara rupi Jesús oporomboe oí Tumpa jo pe. Êrei caaru ma yave oo joco güi upita ivitu guasu Olivos re. ³⁸Jare opaete tenta guasu pegua reta yugüeru neimbove asi Tumpa jo pe uyapisaca vaerā Jesús re.

¹Jare pascua uyaro ma oī. Jocua ara pe judío reta jou mbiyape ovu mbae vae. ²Jayave sacerdote reta itenondegua reta jare mboroyocu re oporomboe vae reta ueca ñugüïnoi quiräi ipuere uyuaca Jesús. Ërei uquye tenta guasu pegua reta güi.

³Jayave Satanás etei oya Judas Iscariote re - Judas co jae jocua doce vae güi penti. ⁴Jayave Judas oo sacerdote reta itenondegua reta jare Tumpa jo re uyandareco vae reta ñugüïnoi vae pe uyemingueta vaerä jae reta ndive quiräi ra ipuere umee Jesús chupe reta. ⁵Jayave jae reta uyerovia, jare jei Judas pe umeeta co chupe corepoti. ⁶Jayave Judas jei chupe reta umeeta co Jesús chupe reta. Jayave umbipi ueca quiräi ipuere umee Jesús chupe reta tenta guasu pegua reta mbaeti Jesús ndive ñugüïnoi yave.

Jesús ucaru jemimboe reta ndive

(Mt 26.17-29; Mr 14.12-25; Jn 13.21-30; 1 Cor 11.23-26)

⁷Jare ou uväe pascua. Jocua ara judío reta jecuaeño uyuca ovecha jare umbipi jou mbiyape ovu mbae vae. ⁸Jayave Jesús jei Pedro jare Juan pe:

—Pecua piyapicatu yau vaerä tembíu pascua pegua.

⁹Jayave jei reta chupe:

—¿Quiape pa ndipota nduyapicatu vaerä?

¹⁰—Mase, peo peväe yave tenta guasu pe, peoväitita penti cuimbae i güiraa íru pe vae —jei—. Pecua jaicue. Jae uiqueta penti tenta pe. Pique vi pe reta —jei—. ¹¹Jayave pere tenta iya pe: ‘Oporomboe vae jei: ¿Quiape pa ime oī o, joco pe jau vaerä tembíu pascua pegua cheremimboe reta ndive’ —jei—, pere chupe, jei Jesús—. ¹²Jayave tenta iya uechacata peve penti o tuicha vae jo ívate pe, opaete mbaembae yaiporuta vae reve. Joco pe piyapicatu yandeve —jei—.

¹³Jayave Pedro jare Juan yugüïraa jare uväe Jesús jei chupe reta rami. Jare uyapo reta tembiu pascua pegua Jesús jare jemimboe reta jou vaerä. ¹⁴Jare ora ou ma uväe yave, Jesús uguapi mesa pe jocua doce jemimondo reta ndive. ¹⁵Jayave jei chupe reta:

—Chequirëi ete jau cua tembíu pascua pegua pe reta ndive, ndei amano mbove. ¹⁶Che jae peve, ndarau ye jau, opaete cua uyemijaanga jese vae Tumpa iporoyocuia pe uyeyapo regua —jei—.

¹⁷Jayave Jesús uipisi copa, jare umee yasurupai Tumpa pe. Jayave jei:

—Opaete pe reta peu cua vino. ¹⁸Che jae peve, ndarau ye jau vino, Tumpa iporoyocuia ou regua —jei—.

¹⁹Jayave Jesús uipisi mbiyape, jare umee yasurupai Tumpa pe. Jayave upisää mbiyape jare umee chupe reta.

—Cua co jae cherete —jei—. Añemeeta amano vaerä peré. Peu cua cheré pemandúa vaerä —jei—.

²⁰Jae ramiño vi uipisi copa, opa ma ucaru reta yave, jare jei:

—Cua vino co jae Tumpa jei piáu ye vae cherugüi pe ayapota vae. Cherugüi uyepiyereta peré —jei—.

²¹Ërei yandepite pe uguapi of cherovaicho reta pe chemeeta vae —jei—. ²²Añete co, che cuimbaerä ayeyapo vae amanota. Cua Tumpa jei vae co. Ërei jocua cuimbae chemeeta vae uiporarata co —jei—.

²³Jayave jemimboe reta umbipi upírandu uyupe quía ra uyapota chupe jucuaräi.

¿Quía pa icota tenondeguarä vae?

²⁴Jare Jesús jemimboe reta umbipi uyemingueta uyupe quía ra icota tenondeguarä vae. ²⁵Jayave Jesús jei chupe reta:

—Ívi pegua reta juvicha guasu reta oyocui reta. Jare jae reta uipota íru vae reta jei icavi vae jesegua —jei—. ²⁶Ërei pepite pe icaviä jucuaräi piyapo vaerä. Ime yave quía pepite pe uipota ico vaerä tenondeguarä vae, tuyeyapo penti tairusu vae íru vae reta pe uyeyocu vae rami —jei—. ²⁷Mesa pe uguapi ucaru vaerä vae co tenondegua tembíu güeru vae güi. Ërei che aico pepite pe ayeyocu peve vaerä —jei—.

²⁸Pe reta jecuaeño pepita che ndive opaete cua aiporara rambueve —jei—. ²⁹Jare che puparavo ma pico vaerä Tumpa iporoyocuia pe, cheRu cheparavo rami —jei— chupe reta—. ³⁰Jáeramo pecaruta chemesa pe cheporoyocuia pe. Jae ramiño vi penoita mbaepuere peää vaerä jocua doce atí Israel pegua reta —jei—.

Pedro uicuacuta Jesús

(Mt 26.31-35; Mr 14.27-31; Jn 13.36-38)

³¹Simón, Simón, mase, Satanás uipota tēi güinói mbaepuere peré, trigo yambiveve vae rami —jei—.

³²Ërei che ayerure Tumpa pe nderé jecuaeño nenoi vaerä mburugüirovia. Jare ndiyerova ye yave Tumpa cotí, embori nderiví reta ipiräta vaerä ipurugüirovia re —jei—.

³³Jayave Pedro jei Jesús pe:

—CheYa, apitata co nde ndive, peresoríru pe neñono reta yave. Ndarau ndueya, yepe tēi aramoi íru vae reta cheyuca —jei—.

³⁴—Che jae ndeve, Pedro —jei Jesús—, ndei uru cuimbae uñee mbove, mbapi vese ma checuacuta —jei—.

Añave peraa mbaembæ

³⁵ Jayave Jesús jei jemimboe reta pe:

—Che pomondo yave chiñee peraa vaerã, amimbeu peve agüiye vaerã peraa corepoti, jare peu-rupucu, jare pepipasa. ¿Uata pa mbae peve? —jei.

—Uata'â —jei reta.

³⁶ Jayave jei chupe reta:

—Ērei añaive tamimbeu peve cuá: Corepoti penoi yave, peraa. Jae ramíño vi peurupucu penoi yave, peraa. Jare mbaeti yave penoi quísepucu, pemee peremimonde pegua vaerã quísepucu —jei—. ³⁷ Echa'â che jae peve, uyeyapota co cheve Tumpa iñee pe uyecuatía oï vae. Echa'â uyecuatía oï cuarãi: ‘Iru vae reta jei tẽi jae vi co penti icavi mbae vae.’ Jucuarãi uyecuatía oï. Jare opaete cheré uyecuatía oï vae uyeyapota co cheve —jei.

³⁸ Jayave jae reta jei chupe:

—Mase, oreYa, ime nonoi mocui quísepucu.

—Icavíño ma co —jei chupe reta.

Jesús uyerure Getsemaní pe

(Mt 26.36-46; Mr 14.32-42)

³⁹ Jayave Jesús oë o güi oo vaerã ivitú guasu Olivos pe jae jecóno mai rami. Jare jemimboe reta vi yugüíraa jae ndive. ⁴⁰ Jare oo uvâe yave upita vae pe, Jesús jei jemimboe reta pe:

—Piyerure Tumpa pe agüiye vaerã peyoa.

⁴¹ Jayave Jesús usirí catu chugüi reta, jare uyeatíca uyerure Tumpa pe.

—CheRu —jei—, nde ndipota yave, embiásas chegüi cua aiporarata vae. Ērei tuyeyapo cheve nde ndere vae. Agüiye tuyeyapo che jae vae —jei.

⁴³ Jayave uyecuua Jesús pe penti ángel ara güi ou vae umimiráta vaerã. ⁴⁴ Jesús uiporara ete oï, jare jeiете uyerure Tumpa pe. Jeta ipireipo oï. Tugüi rami utíqu iví pe.

⁴⁵ Jare Tumpa pe uyerure ma yave, upúa ye jare ou ye jemimboe reta ñugüínoi vae pe. Uecha oque ñugüínoi ipiatiti güi. ⁴⁶ Jayave Jesús jei chupe reta:

—¿Maera pa peque pe? Pepúa piyerure Tumpa pe, agüiye vaerã peyoa —jei.

Uipisi reta Jesús

(Mt 26.47-56; Mr 14.43-50; Jn 18.2-11)

⁴⁷ Jare uyemingueta oï rambueve, uyecuua jeta vae. Jare Judas - jae co jocua doce vae güi penti - ou jocua jeta vae jenonde. Jayave ou uvâe Jesús oï vae pe, jare uyurupite. ⁴⁸ Jayave Jesús jei chupe:

—Judas, ¿pentí yurupite rupi pa chemee cua reta pe?

⁴⁹ Jare Jesús jemimboe reta uyemboi ñugüínoi Jesús iyipi pe. Jare uicuua mbae uyeyapota vae ramo, jei Jesús pe:

—OreYa, ¿nduiporuta pa quísepucu jese reta? ⁵⁰ Jayave penti Jesús jemimboe uiporu iquísepucu sacerdote tenondegua jembiocui inambi re, jare uyasia inambi chugüi. ⁵¹ Jayave Jesús jei:

—Pemaeño cheré ayapo vaerã cua.

Jayave uyavíqui cuimbae inambi jendacue, jare cuimbae ucuera.

⁵² Yugüeru vi joco pe sacerdote reta itenondegua reta jare Tumpa jo re uyandareco vae reta jare tenta guasu pegua reta itenondegua reta. Jare Jesús jei chupe reta:

—¿Maera pa Peru quísepucu reta jare iñira reta chepisi vaerã, imonda vae pipisi vae ramí? ⁵³ Opa ara aico pe reta ndive Tumpa jo pe, ērei chepisi'â. Ērei ora uvâe ma chepisi vaerã. Cuarãi piyapo pei Satanás imbaepuere pe —jei.

Pedro uicuacu Jesús

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jayave uipisi reta Jesús jare güíraa sacerdote tenondegua jenta pe. Jare Pedro oo jae reta jaicue, ērei mbiriño oo chugüi. ⁵⁵ Jayave joco pe ñugüínoi vae reta uyapo tata sacerdote tenondegua joca pe jare uguapi joco pe. Jare Pedro vi uguapi joco pe jae reta ipite pe. ⁵⁶ Ērei penti cuñatai uecha Pedro uguapi oï tataipi pe. Umae ngatu jese. Jayave jei:

—Cua cuimbae vi icose jocua īru cuimbae ndive.

⁵⁷ Jayave Pedro uicuacu Jesús.

—Aicuua'â jocua cuimbae —jei Pedro cuñatai pe.

⁵⁸ Ndei ima mbove penti cuimbae vi uecha Pedro jare jei chupe:

—Nde co jae īru vi.

—Che'â co —jei Pedro cuimbae pe.

⁵⁹ Jare penti ora rupi ma uasa yave, īru cuimbae jeiете jei:

—Añete co, cua cuimbae icose jocua īru cuimbae ndive. Echa'ā Galilea pegua co —jei. ⁶⁰ —Aicuaa'ā mbae ndere vae —jei Pedro cuimbae pe.

Jare uyemingueta rupive, uru cuimbae uñee. ⁶¹ Jayave yandeYa uyerova jare umae Pedro re. Jayave Pedro imandúa yandeYa jei chupe vae re: 'Ndei uru cuimbae uñee mbove, mbapi vese ma checuacuta.' ⁶² Jayave Pedro oē joco güüi, jare tanta ipiatiti reve uyao.

Uyapo reta icavi mbae vae Jesús pe

(Mt 26.67-68; Mr 14.65)

⁶³ Jare cuimbae uyandareco ñugüinoi Jesús re vae reta oyoyai jare uinupa. ⁶⁴ Jayave jae reta ueseñoma Jesús jare ocua jova re. Jayave jei reta chupe:

—Emimbeu oreve quía ra ocua nderé.

⁶⁵ Jare jeta icavi mbae vae jei reta chupe.

Jesús mburuvicha reta jovai

(Mt 26.59-66; Mr 14.55-64; Jn 18.19-24)

⁶⁶ Jare cõe ma yave, tenta guasu pegua reta itenondegua reta jare sacerdote reta itenondegua reta jare mboroyocui re oporomboe vae reta uyembati. Jayave güeruruca reta Jesús. Jayave jei reta chupe: ⁶⁷ —¿Nde pa co jae Cristo, Tumpa ombou vae? Emimbeu oreve.

—Che amimbeu yave peve, ndarau chererovia —jei Jesús—. ⁶⁸ Jare che apirandu yave peve mbae re, ndarau pemimbeu cheve, jare ndarau cheyora —jei—. ⁶⁹ Ërei che cuimbaerā ayeyapo vae aguapita curi Tumpa mbaepuere güinoi vae iyípi pe iyacata coti —jei.

⁷⁰ Jayave opaete jae reta upírandu chupe:

—¿Nde pa co jae Tumpa Tai?

—Pe reta pere rami jae co che —jei Jesús chupe reta.

⁷¹ Jayave jae reta jei:

—¿Maera pa yaeca ye īru vae reta uñeapo vaerā jese? Echa'ā yande etei yayandu mbae jei vae —jei reta.

23

Jesús Pilato jovai

(Mt 27.1-2, 11-14; Mr 15.1-5; Jn 18.28-38)

¹ Jayave opaete jae reta upūa jare gürraa Jesús Pilato pe. ² Jare umbipi reta uñeapo Jesús re. Jei reta: —Cua cuimbae umimbeu tenta guasu pegua reta pe uyapo vaerā icavi mbae vae. Echa'ā jei chupe reta agüiye vaerā umbiepi corepoti César peguarā. Jare jae co mburuvicha guasu Cristo jee vae —jei reta.

³ Jayave Pilato upírandu Jesús pe:

—¿Nde pa co jae judío reta juvicha guasu?

—Nde ndere rami jae co che —jei Jesús chupe.

⁴ Jayave Pilato jei sacerdote reta itenondegua reta jare tenta guasu pegua reta pe:

—Aväe'ā teco cua cuimbae re. ⁵ Jayave jae reta jeiteje:

—Omboepochi tenta guasu pegua reta. Oporomboe opaete Judea rupi. Umbipi Galilea pe jare añave ou uväe cua pe oporomboe oī —jei reta.

Jesús Herodes jovai

⁶ Pilato uyandu yave jei reta vae, upírandu penti Galilea pegua ra jocua cuimbae. ⁷ Jayave umimbeu reta Pilato pe Galilea pegua co Jesús. Jayave Pilato gürraaca Jesús Herodes pe. Echa'ā Herodes co jae Galilea pegua reta juvicha guasu. Jare jocua ara reta pe Herodes opou oī Jerusalén pe. ⁸ Jare Herodes uecha Jesús yave, uyerovia ete, ima ma uipota uecha ramo. Echa'ā uyandu ma jeta Jesús regua, jare uipota uecha Jesús uyapo penti miacañi. ⁹ Jayave Herodes upírandu Jesús pe jeta mbaembae re, ërei Jesús jei'ā mbae ave chupe. ¹⁰ Jare sacerdote reta itenondegua reta jare mboroyocui re oporomboe vae reta uyemboi Herodes jovai jare iñeeäta reve uñeapo Jesús re. ¹¹ Jare Herodes jare isundaro reta güiriro jare oyoyai Jesús. Jayave omondeca chupe temimonde ipöra vae. Jayave Herodes gürraaca ye Pilato pe. ¹² Jare jocua ara etei Pilato jare Herodes uyeyapicatu ye. Echa'ā tenonde yave uñemitarëi.

Pilato jei Jesús umanota co

(Mt 27.15-26; Mr 15.6-15; Jn 18.39-19.6)

¹³ Jayave Pilato umbatíca sacerdote reta itenondegua reta jare tenta guasu pegua reta itenondegua reta ndive. ¹⁴ Jare jei chupe reta:

—Pe reta Peru cua cuimbae cheve jare pere cheve omboepochi co tenta guasu pegua reta. Mase, che apírandu chupe jocua re perovaque, jare aväe'ā etei teco jocua pe reta piñeapo cheve jese vae re —jei—.

¹⁵ Jae ramíño vi Herodes uväe'ā teco cua cuimbae re. Echa'ā che pomondo Herodes pe. Mase, mbaeti

mbae teco uyapo umano vaerā —jei Pilato chupe reta—. ¹⁶ Jáeramo ainupacañota jare ayoraca yeta —jei.

¹⁷ Echa'ā opa año tenta guasu pegua reta uyerure chupe oyoraca vaerā penti pereso pascua ara rupi, jare Pilato oyoracaño penti pereso. ¹⁸ Jayave opaete vae iñeeāta reve jei:

—Iyucaca cua cuimbae. Iyoraca oreve Barrabás —jei reta.

¹⁹ (Tenonde yave Barrabás upuruyuca Jerusalén pe, mburuvicha reta ndive uñerāro yave. Jáeramo umiingue peresoriru pe.)

²⁰ Êrei Pilato uipota tēi oyoraca Jesús. Jáeramo jei ye chupe reta. ²¹ Êrei iñeeāta reve jei reta:

—Icutuca curusu re. Icutuca curusu re.

²² Jayave Pilato upirandu ye chupe reta:

—¿Mbae pa uyapo? Avā'ā mbae icavi mbae vae jese umano vaerā. Jáeramo ainupacañota jare ayoraca yeta —jei.

²³ Êrei jieite iñeeāta reve jei reta uicutuca vaerā Jesús curusu re. Jare sacerdote reta itenondegua reta jare īru joco pe ñugüinói vae reta iñee umíquiréi Pilato. ²⁴ Jayave Pilato jei uyeyapo vaerā Jesús pe jae reta uipota vae. ²⁵ Jayave oyoraca chupe reta tenonde yave mburuvicha reta ndive uñerāro yave upuruyuca ramo peresoriru pe umiingue vae, jae reta uipota rami. Êrei umee Jesús chupe reta uyeyapo vaerā chupe jae reta uipota vae.

Jesús uyecutuca curusu re

(Mt 27.32-44; Mr 15.21-32; Jn 19.17-27)

²⁶ Jayave güíraa reta Jesús joco güi. Jare penti cuimbae Simón jee vae tenta guasu Cirene pegua, ou uvāe tenta guasu coti. Jocoropi uasa oī yave, sundaro reta uipisi Simón jare güíraaca chupe Jesús icurusu. Jayave Simón güíraa curusu Jesús jaicue. ²⁷ Jare yugüíraa vi Jesús jaicue jeta vae. Jare jae reta ipite pe yugüíraa cuña reta. Jae reta uapíro yugüíraa Jesús. ²⁸ Êrei Jesús uyerova umae jese reta jare jei chupe reta:

—Jerusalén pegua cuña reta, agüiye piyao cheré. Piyao piyee jare pemembí reta re —jei—. ²⁹ Mase, outa uvāe ara reta jei reta vaerā: ‘Uyerovia co imembí mbae vae. Uyerovia co umicambu mbae etei vae’ —jeita, jei—. ³⁰ Jayave umbipita tēi jei iñitu guasu pe: ‘Piyapara oreárambo. Oreasoí’ —jeita, jei—.

³¹ Uyapo reta icavi mbae vae cheve yave, ¿mbae ra uyapota peve? —jei.

³² Jare sundaro reta güíraa vi Jesús ndive mocui cuimbae icavi mbae vae uyapo vae uyuca vaerā. ³³ Jare yugüíraa uvāe Ācacuerenda jee vae pe. Jayave joco pe sundaro reta uicutuca curusu re Jesús jare cuimbae reta icavi mbae vae uyapo vae. Oñono reta penti Jesús iyacata coti jare īru iyaso coti. ³⁴ Jayave Jesús jei:

—CheRu, embiasa chupe reta. Uicua'ā mbae uyapo ñugüinói vae —jei.

Jayave sundaro reta uyuvari Jesús jemimonde re, uicuaa vaerā mbae nunga penti penti güíraa iyupe vaerā. ³⁵ Jare tenta guasu pegua reta uyemboi ñugüinói jocoropi umae Jesús re. Jare tenta guasu pegua reta itenondegua joco pe ñugüinói vae reta oyoyai Jesús. Jei reta:

—Jae uepi īru vae reta. Añave tuyerepi, jae co Cristo yave, jae co Tumpa uiparavo vae yave —jei reta.

³⁶ Jare sundaro reta vi oyoyai Jesús. Oya reta jese jare umee vinagre chupe. ³⁷ Jare jei reta:

—Nde co jae judío reta juvicha guasu yave, iyerepi.

³⁸ Jare oñono reta curusu re Jesús iñáca íárambo uyecuatía jesegua vae: “Cua co jae judío reta juvicha guasu.” Uyecuatía oī griego iñee pe jare latín pe jare hebreo iñee pe.

³⁹ Jare penti cuimbae icavi mbae vae uyapo vae uyecutuca vae uñengata Jesús pe.

—Nde co jae Cristo, Tumpa ombou vae yave, iyerepi jare orerepi vi —jei.

⁴⁰ Êrei īru cuimbae uñengata chupe.

—¿Ndequíye'ā pa Tumpa güi? Echa'ā nde vi nemano neī cua īru vae rami —jei—. ⁴¹ Jare jipi co yande ñamano vaerā. Echa'ā yande ñamanota ñaí icavi mbae vae yayapo vae jeco pegua. Êrei cua cuimbae uyapo'ā mbae icavi mbae vae —jei.

⁴² Jayave jei Jesús pe:

—Jesús, nemandúa cheré ndeporoyocuia pe neī yave.

⁴³ Jayave Jesús jei chupe:

—Añete che jae ndeve, cua ara neīta che ndive ara pe —jei.

Jesús umano

(Mt 27.45-56; Mr 15.33-41; Jn 19.18-30)

⁴⁴ Jare guarasi ara mbite güive mbapi ora rupi uñemipítumimbi opaete iñi pe. ⁴⁵ Guarasi jembipe'ā etei. Jayave Tumpa jo umbiyao vae osoro mbite rupi. ⁴⁶ Jayave Jesús tanta usapicai. Jayave jei:

—CheRu, amee ndeve chercove.

Jare cua jei ma yave, umano.

⁴⁷ Jare cien sundaro vae juvicha joco pe oĩ vae uecha mbae uyeyapo vae. Jayave umbiadora Tumpa jare jei:

—Añetete co, cua cuimbae co jae jupi vae.

⁴⁸ Jare opaete joco pe yati vae reta vi uecha mbae uyeyapo vae jare ocua iyee ipitía re. Jayave opaete vae yugüiraa ye jenta jenta pe. ⁴⁹ Jare opaete Jesús uicuaa vae reta jare cuña Jesús ndive Galilea güi yugüieru vae reta uyemboi ñugüinoi mbiri curusu güi. Umae ñugüinoi mbae uyeyapo vae re.

José oñono Jesús jetecue teögüeriru pe

(Mt 27.57-61; Mr 15.42-47; Jn 19.38-42)

⁵⁰ Jare joco pe oĩ vi penti cuimbae José jee vae. Jae co penti mburuvicha. Ipiacavi jare jupi. ⁵¹ (Jae uipota'ã tēi íru mburuvicha reta uyapo vaerã icavi mbae vae Jesús pe.) Jae co tenta guasu Arimatea pegua. (Arimatea Judea pegua co.) José vi uáro ico Tumpa iporoyocuia. ⁵² Cua cuimbae oo Pilato pe, jare uyerure chupe Jesús jetecue re. ⁵³ Jayave umbigüeyi Jesús jetecue, jare oñoma nieso pe. Jayave oñono penti teögüeriru itape uyeyoo vae pe, ndei quía uñeñono pipe vae pe. ⁵⁴ Jocua ara opaete judío reta uyeyapicatu ñugüinoi piareve peguarã. Echa'ã piareve pe co mbutuu ara.

⁵⁵ Jare cuña Jesús ndive Galilea güi yugüieru vae reta, yugüiraa José jaicue jare uecha teögüeriru jare quirái José oñono pipe Jesús jetecue vae. ⁵⁶ Jayave yugüiraa ye jenta jenta pe jare uyapicatu mbaembiae ipiche cavi vae. Jayave uputuu reta mbutuu ara pe. Echa'ã jucuarã uyecuatia oĩ mboroyoci pe.

24

Jesús icove ye

(Mt 28.1-10; Mr 16.1-8; Jn 20.1-10)

¹ Jare neimbove así domingo ara pe cuña reta yugüiraa ye teögüeriru coti. Güiraa reta mbaembiae ipiche cavi vae uyapicatu ma vae. ² Jare uecha ita tuicha vae uyembisiri ma teögüeriru jonque güi.

³ Jayave uique reta teögüeriru pe, érei uvae'ã yandeYa Jesús jetecue joco pe. ⁴ Ipiacañi ete reta cua re, érei aramoño uyecuaa uyemboi ñugüinoi iyipi pe mocui cuimbae. Jocua mocui cuimbae jemimonde uvera oĩ. ⁵ Jáeramo cuña reta uquije jare ipe cuimbae reta jovai. Jayave cuimbae reta jei chupe reta:

—¿Maera pa peeca peí icove ye vae umanocue vae reta ipite pe? ⁶ Mbaeti ma cua pe oĩ. Jae icove ye ou umanocue vae reta ipite güi. Pemandúa jae icose pe ndive Galilea pe yave jei peve vae re —jei reta—. ⁷ Echa'ã jae jei peve: ‘Chemeeta cuimbae icavi mbae vae uyapo vae reta pe. Jae reta checututa curusu re. Érei che cuimbaerã ayeyapo vae aicove yeta ayu umanocue vae reta ipite güi mbapi ara rupi’ —jei, jei reta.

⁸ Jayave jae reta imandúa Jesús jei chupe reta vae re. ⁹ Jayave yugüieru ye teögüeriru güi jare umimbeu opaete uyeyapo vae jocua once vae jare opaete íru vae reta pe. ¹⁰ Jocua cuña reta co jae María Magdalena, jare Juana, jare Jacobo ichi Marfa jee vae, jare íru cuña jae reta jupíe yugüiraa vae reta. Cua reta umimbeu Jesús jemimondo reta pe mbae uyeyapo vae. ¹¹ Érei iyapu echa reta Jesús jemimondo reta pe. Güirovia'ã reta. ¹² Jayave Pedro osi oo teögüeriru coti. Jare joco pe oo uvae yave, ipe umae vaerã teögüeriru japipe pe, jare uecha nieso reta joco pe oĩ. Jayave ou ye joco güi. Ipiacañi uyeyapo vae re.

Jesús jare mocui jemimboe reta

(Mr 16.12-13)

¹³ Jare jocua ara etei mocui Jesús jemimboe reta yugüiraa tape rupi Jerusalén güi tenta guasu-rai Emaús coti. Emaús oĩ mocui legua Jerusalén güi. ¹⁴ Jare tape rupi yugüiraa rambueve, imiari uyupe opaete uyeyapo vae re. ¹⁵ Jare aramoño uyeminguela ñugüinoi rambueve, Jesús uyecuaa chupe reta jare oo jae reta jupíe. ¹⁶ Érei jae reta uicuaa'ã Jesús. Echa'ã Jesús ndei uipota uyecuaaca chupe reta. ¹⁷ Jayave Jesús upirandu chupe reta:

—¿Mbae re pa pemiasi piyupe peguata rambueve? ¿Maera pa pepiatiti? —jei.

¹⁸ Jare penti Cleofas jee vae upirandu Jesús pe:

—¿Ndico'ã pa Jerusalén pe? ¿Ndicuua'ã pa cua ara reta pe opaete uyeyapo vae? —jei.

¹⁹ —¿Mbae pa? —jei chupe reta.

—Jesús Nazaret pegua pe uyeyapo vae —jei reta chupe—. Jae co penti Tumpa iñee umimbeu vae. Uyapo jeta mbae icavi vae mbaepuere reve, jare icavi oporomboe. Uyeyocuia cavi Tumpa pe jare opaete tenta guasu pegua reta umbiadora —jei reta Jesús pe—. ²⁰ Érei sacerdote reta itenondegua reta jare oretenondegua reta umee mburuvicha guasu pe, jae uyucaca vaerã. Jare uicutuca reta curusu re —jei reta—. ²¹ Érei ore ndugüirovia tēi jae uepita Israel pegua reta. Jare cua ara mbapi ara ma opaete cua uyeyapo vae güi —jei reta—. ²² Érei amocue cuña ore ndive uyeyocuise Jesús pe vae reta iyei neimbove yugüiraa teögüeriru pe, jare yugüieru ye yave, oremipiacañi ete. ²³ Echa'ã jae reta uvae'ã Jesús jetecue, jare yugüieru ye yave, jei oreve quirái uecha ángel reta joco pe jare quirái ángel reta jei Jesús icove ye

ma oī —jei reta—.²⁴ Jayave amocue ore ndive ñugüínoi vae yugüíraa vi teögüeríru pe, jare yugüeru ye yave, umimbeu oreve mbaeti joco pe oī Jesús jetecue cuña reta jei oreve rami —jei reta.

²⁵ Jayave Jesús jei chupe reta:

—Pe reta co jae iyaracuaa mbae vae reta rami. Yavai co oī peve perovia vaerā opaete Tumpa iñee aracae umimbeu vae reta uicuatiacie vae —jei—.²⁶ Picauala tēi ma jae reta uicuatía co quirái Cristo, Tumpa ombou vae, uiporarañotai rani co jare quirái jocua jaicue rupi uyembiadoreacata co —jei.

²⁷ Jayave Jesús umimbeu chupe reta jeta Moisés jare Tumpa iñee aracae umimbeu vae reta uicuatiacie vae güi, jare umimbeu cavi chupe reta quirái opaete jocua uyecuatía oī vae imiari Cristo re.

²⁸ Jare yugüíraa ma uvāe coiño Emaús güi. Echa'ā jocua mocui vae upitata joco pe. Jare Jesús uasata tēi oo cuti.²⁹ Ěrei jae reta jei chupe:

—Epita ore ndive. Echa'ā caaru ma. Pítuta co ndeve —jei reta.

Jayave Jesús upita jae reta jenta pe.³⁰ Jare uguapi rambueve mesa pe ucaru vaerā, Jesús uipisi mbiyape jare umee yasurupai Tumpa pe. Jayave upisaa umee chupe reta.³¹ Jayave ramo uicuua reta Jesús. Echa'ā Jesús umaeño ma jese reta uicuua vaerā. Jayave jupivoiño Jesús ucañi chugüi reta.³² Jayave jei reta uyupe:

—Añete co, jae yanembiyervia ete, tape rupi imiari yandeve rambueve. Echa'ā uicuuaaca yandeve Tumpa iñee uyecuatía oī vae —jei reta.³³ Jayave jocua ora pe etei jae reta upūa mesa güi jare yugüíraa ye Jerusalén pe. Joco pe uvāe jocua once vae yati íru vae reta ndive.

³⁴ —Añete co, yandeYa icove ye ma ou umanocue vae reta ipite güi —jei yati vae reta—. Echa'ā uyecuaa co Simón pe.

³⁵ Jayave jocua mocui vae vi umimbeu yati vae reta pe mbae tape rupi uyeyapo vae jare quirái Jesús uyecuaaca chupe reta mbiyape upisaa yave.

Jesús uyecuaa jemimboe reta pe

(Mt 28.16-20; Mr 16.14-18; Jn 20.19-23)

³⁶ Jare uyemingueta ñugüínoi rambueve, Jesús etei uyecuaa uyemboi oī ipite pe, jare jei chupe reta: —Mbiacatu toī pe ndive.

³⁷ Ěrei jae reta uquiyé ete. Ipia pe uyemingueta tēi jocua co Jesús iācue.³⁸ Ěrei Jesús jei chupe reta: —¿Maera pa pequiyé? ¿Maera pa pepia pe piyemingueta jucuarāi? —jei—.³⁹ Pemae chepo jare chepi re. Che co jae. Pepuere cheavíqui picuua vaerā jae co che. Echa'ā penti vae iācue güínoi'ā soo jare maecägüe. Ěrei pepuere peecha che ime co anoi soo jare maecägüe —jei.

⁴⁰ Jare cua jei ma yave, uechaca chupe reta ipo jare ipi.⁴¹ Jae reta ipiacañi, jare uyerovia ete ramo ndei ipuere güirovia ete. Jayave Jesús upirandu chupe reta:

—¿Ime pa penoi cua pe mbae jau vaerā?

⁴² Jayave umee reta chupe pira oyicue iperaso jare mbovi ei.⁴³ Jare Jesús uipisi jou jae reta jovaque.

⁴⁴ Jayave jei chupe reta:

—¿Pemandua'ā pa pe reta ndive aico rambueve che jae peve vae re? Echa'ā Moisés iporoyocui jare Tumpa iñee aracae umimbeu vae reta uicuatiacie vae jare Salmo reta chemimbeu. Jare amimbeu peve quirái opaete cua chemimbeu vae uyeyapota co —jei.

⁴⁵ Jayave umee chupe reta uicuua cavi vaerā Tumpa iñee uyecuatía oī vae.⁴⁶ Jayave jei chupe reta:

—Cuarāi uyecuatía oī quirái Cristo, Tumpa ombou vae, uiporarañotai co jare icove yeta co ou umanocue vae reta ipite güi mbapi ara rupi,⁴⁷ jare quirái jerácuata íru vae reta pe Cristo jee re ueya vaerā iyemingueta icavi mbae vae ipia pe oī vae Tumpa umbiasa vaerā chupe reta imbaeyoa reta. Jerácuata rani Jerusalén pe. Jayave joco güi jerácuata opaete ivi pegua reta pe —jei—.⁴⁸ Jare pe reta pemimbeuta opaete cua regua —jei—.⁴⁹ Mase, ambouta peve cheRu jei umeeta co peve vae. Ěrei pepita tenta guasu Jerusalén pe mbaepuere güínoi vae ara güi ou peve regua —jei.

Jesús oo ara pe

(Mr 16.19-20)

⁵⁰ Jayave Jesús güíraa reta Betania pe. Jayave uupi ipo ara coti jare umivendise reta.⁵¹ Jare umivendise oī rambueve, oo chugüi reta ara coti.⁵² Jayave jae reta umbiadora. Jayave yugüíraa ye Jerusalén pe uyerovia reve.⁵³ Jare jecuaeño yugüíraa Tumpa jo pe umbiadora reve Tumpa. Amén.

EL SANTO EVANGELIO SEGUN SAN JUAN

Ñee uyeyapo cuimbaerā

¹ Ndei mbae uyeyapo mbove, ico Ñee. Jare Ñee ico Tumpa ndive. Jae co Tumpa etei. ² Ñee ico Tumpa ndive ndei mbae uyeyapo mbove. ³ Jae uyapo opaete. Opaete uyeyapo vae jae etei uyapo. ⁴ Jae umee tecove opaete pe, jare cua tecove rupi jae uyecuaa ivi pegua reta pe mbaembae uyecuaa tembipe rupi rami. ⁵ Jae co tembipe rami. Tembipe jecuaeño jembipe pítmimbi pe, jare pítmimbi ipuere'ā etei ombove. ⁶⁻⁷ Ico penti cuimbae Juan jee vae. Tumpa ombou cua cuimbae umimbeu vaerā tembipe regua, íru vae reta upurugüirovia vaerā uyandu yave. ⁸ Jae jae'ā co jocua tembipe. Jaeño ou umimbeu vaerā jocua tembipe re.

⁹ Tembipe etei ou ma cua ivi pe. Jae uyecuaa opaete vae pe. ¹⁰ Jae ico cua ivi pe, jare jae uyapo cua ivi. Ërei ivi pegua reta uicuaa'ā. ¹¹ Ou ivi pe, Ërei ivi pegua reta umbiresive'ā. ¹² Ërei amocue vae umbiresive. Güirovia jese. Jáeramo jae umee cua reta pe Tumpa tai retardarā jare tayi retardarā yugüireco vaerā. ¹³ Tumpa etei umee cua reta pe tecove. Cua tecove ou'ā co ichi rupi. Güinoi'ā cua tecove tu jei vae rupi.

¹⁴ Jocua Ñee uyeyapo cuimbaerā. Ou cua ivi pe ico vaerā yande ndive. Jare ore nduecha yembutuicha ara pegua co jae. Jaeño Tumpa Tai jae vaeño cua yembutuicha güinoi vae. Jae ipiacavi ete jare opaete jei vae añete co. ¹⁵ Echa'ā Juan umimbeu íru vae reta pe:

—Cua co jae chemiari jese vae —jei chupe reta—. Che jae ma peve: ‘Cheraicue rupi outa vae ipuere ete chegüi. Echa'ā jae ico ndei aico mbove’ —jei.

¹⁶ Jocua Ñee ipiacavi ete. Jáeramo jecuaeño uyapo icavi vae yandeve. ¹⁷ Tumpa umimbeu mboroyoci Moisés rupi. Ërei Jesucristo rupi Tumpa umimbeu ipiacavi co jare yanemboe añete vae re. ¹⁸ Mbaeti etei quía uecha Tumpa. Ërei Tumpa Tai jae vaeño uicuaaca yandeve. Tumpa uau Tai.

Juan upurumbibautiza vae umimbeu vae

(Mt 3.1-12; Mr 1.1-8; Lc 3.1-20)

¹⁹ Penti ara yugüiraa uvāe Juan oī vae pe sacerdote reta jare levita reta. Judío reta Jerusalén pegua omondo cua reta chupe. Jae reta jei Juan pe:

—¿Quía pa co nde?

²⁰ Juan umimbeu cavi. Iyapu'ā chupe reta.

—Che jae'ā co Cristo jee vae —jei chupe reta.

²¹ Jayave upirandu reta ye chupe:

—Nde jae'ā yave, ¿nde pa co jae Elías jee vae?

Juan jei:

—Che'ā co jae.

Jei reta chupe:

—¿Nde pa co jocua Tumpa iñee umimbeu vae?

—Che'ā co jae —jei Juan chupe reta.

²² Jayave upirandu reta ye chupe:

—¿Quía pa co nde? Echa'ā nduipota numimbeu orembou vae reta pe. ¿Mbae pa ndere ndiyupe? —jei reta Juan pe.

²³ Jayave Juan jei:

—Che co jae penti ñee umimbeu vae. Chiñeeäta ñana pe: ‘Piyapicatu yandeYa japerā.’ Jucuaräi che jae —jei Juan—. Echa'ā jucuaräi jei Isaías aracae Tumpa iñee umimbeu vae —jei. ²⁴ Cua Juan oī vae pe yugüiraa vae reta fariseo reta co. ²⁵ Upirandu reta Juan pe:

—Nde jae'ā yave Cristo ani Elías ani jocua Tumpa iñee umimbeu vae, ¿maera pa ndepurumbibautiza?

²⁶⁻²⁷ —Che apurumbibautiza i pe —jei Juan—. Ërei picuaa'ā, ime pepite pe jocua cheraicue rupi outa vae. Jupi'ā co che amboi vaerā ipipasa —jei chupe reta.

²⁸ Opaete cua uyeyapo Betábara pe iäca Jordán jee vae jovaicho pe. Echa'ā joco pe upurumbibautiza Juan.

Tumpa ombou vae

²⁹ Piareve pe Juan uecha Jesús ou icoti jare jei:

—Mase, pee oī Tumpa ombou vae. Jae co ovecha rami. Ou güiraa vaerā opaete ivi pegua reta imbaeyoa —jei—. ³⁰ Cua co jae chemiari jese vae. Che jae ma peve: ‘Cheraicue rupi outa vae ipuere

ete chegüi. Echa'ã jae ico ndei aico mbove.' Cua co jae —jei Juan—. ³¹ Che aicua'a. Ërei ayu apurumbibautiza i pe jae uyecuua vaerä Israel pegua reta pe —jei chupe reta.

³² Juan umimbeu vi chupe reta:

—Aecha Espíritu Santo ugüeyi ara güi picasu rami jare ou upita jese —jei—. ³³ Che aicua'a. Ërei chembou apurumbibautiza vaerä i pe vae jei cheve: 'Ndeechata Espíritu Santo ugüeyi ou upita penti cuimbæ re. Jocua cuimbæ upurumbibautizata Espíritu Santo pe' —jei, jei Juan—. ³⁴ Jocua aecha ma jare amimbeu peve cu co jae Tumpa Taï —jei.

Jesús jemimboe tenondeguá vae reta

³⁵ Piareve pe Juan uyemboi ye oĩ joco pe mocui jemimboe ndive. ³⁶ Jayave ou Jesús uasa jocoropi. Juan umae ngatu jese.

—Mase, pee oĩ Tumpa ombou vae. Jae co ovecha rami —jei.

³⁷ Jocua mocui jemimboe uyandu jare yugüiraa Jesús jaicue. ³⁸ Jesús uyerova yave, uecha yugüieru icoti.

—¿Mbae pa peeca? —jei chupe reta.

—¿Quiape pa ndico, Rabí? —jei reta. (Rabí uipota jei: "Oporomboe vae".)

³⁹ —Peyu peecha —jei Jesús.

Jayave yugüiraa Jesús ico vae pe uecha, jare upita jocua ara jae ndive. Echa'ã caaru catu ma. ⁴⁰ Mocui cuimbæ co jocua Jesús jaicue yugüiraa vae. Echa'ã yugüiraa jaicue uyandu yave Juan jei chupe reta vae. Penti cuimbæ jee co Andrés. Jae co Simón Pedro tivi. ⁴¹ Andrés oo rani uväe tíquei Simón pe jare jei chupe:

—Nuväe ma Mesías. (Cua uipota jei hebreo iñee pe: "Cristo, Tumpa ombou vae".) ⁴² Jayave Andrés güeru Simón Jesús oĩ vae pe. Jesús umae ngatu Simón re jare jei:

—Nde co jae Simón. Nde co jae Jonás taï. Turumbijee Cefas. (Cua uipota jei: "Pedro".)

Jesús ueni Felipe jare Natanael

⁴³⁻⁴⁴ Piareve pe Jesús uipota oo Galilea pe. Jare uväe Felipe Betsaida pegua. Andrés jare Pedro Betsaida pegua vi. Jesús jei Felipe pe:

—Eyu cherupié.

⁴⁵ Jayave Felipe oo uväe Natanael pe jare jei chupe:

—Nuväe ma Moisés mboroyoci pe imiari jese vae. Aracae Tumpa iñee umimbeu vae reta vi imiari jese —jei—. Jae co Jesús Nazaret pegua. Jae co José tai —jei chupe.

⁴⁶ —¿Ime pa mbae icavi vae Nazaret pegua? —jei Natanael.

—Yaa eecha —jei Felipe.

⁴⁷ Jesú uecha Natanael ou icoti jare jei:

—Mase, co ou penti Israel pegua añetete vae. Jecuæño uyapo añete vae rupi —jei.

⁴⁸ Natanael upírandu Jesús pe:

—¿Quirái pa checua?

Jesús jei chupe:

—Ndei Felipe nereni mbove, che nduecha íva igüi pe.

⁴⁹ —Nde co jae Tumpa Taï, Oporomboe vae —jei Natanael—. Nde co jae Israel pegua reta juvicha guasu —jei.

⁵⁰ Jesú jei chupe:

—Amimbeu ndeve che nduecha íva igüi pe. ¿Cua jeco pegua ra ndepurugüirovia ma? —jei—. Ndeechata mbaembæ ndepurugüirovia ete vaerä —jei—. ⁵¹ Añete che jae ndeve, ndeechata ara uyepaea oĩ, jare ndeechata vi ángel Tumpa pe uyeyoci vae reta uyupi ñugüinoi jare ugüeyi ñugüinoi che aï vae pe. Che co jae cuimbaerä uyeyapo vae —jei Jesús.

Penti menda Caná pegua

¹ Mbapi ara rupi penti cuimbæ umenda cuñatai ndive Caná Galilea pegua pe, jare Jesús ichi joco pe oĩ. ² Jare uparea reta vi Jesús jare jemimboe reta pe. ³ Vino opa ma yave, Jesús ichi jei Jesús pe:

—Opa ma vino.

⁴ —Cuña, ¿maera pa ndere cheve cuá? —jei Jesús—. Ndei uväe cheparavíqui ayapo vaerä —jei.

⁵ Jayave Jesús ichi jei joco pe uyeyoci vae reta pe:

—Piyapo umimbeuta peve vae.

⁶ Joco pe ñugüinoi seis íru guasu ita pegua. Judío reta uiporu jocua nunga íru guasu mbaembæ oyoe vaerä Tumpa coti jecoño mai uyapo rami. Penti penti íru guasu ipuere tinee pandepo íru i pe. ⁷ Jesús jei tembiocui reta pe:

—Pemitivee cavi íru guasu reta i pe.

Jayave jae reta umítinee cavi.⁸ Jesús jei chupe reta:

—Añave piñoë peraa peruvicha pe.

Jayave jucuarãi uyapo reta.⁹ Uyeyocui vae reta juvicha jou jocua i vinorã uyeyapo vae. Jae uicuaa'ã quía güi ra ou jocua jou vae, érei jembiocui reta uicuaa catu quía güi co oñoë. Jayave mburuvicha ueni cuimbae umenda vae.

¹⁰ —Opaete íru vae reta umee vino icavi vae mboupa reta pe. Jayave jeta vino jou yave ramo umee chupe reta vino icavi nunga mbae vae —jei chupe—. Érei nde añave ramo nemee vino icavi ete vae —jei.

¹¹ Jesús cua uyapo Caná Galilea pegua pe. Cuarãi Jesús umbipi uicuaaca jemimboe reta pe jae imbaepuere tuicha ete co. Jare cua uyapo vae jeco pegua jemimboe reta güirovia jese.

¹² Cua jaicue rupi Jesús oo Capernaúm pe. Yugüíraa vi jae jupíe ichi jare tivi reta jare jemimboe reta. Jare upita reta joco pe mboví ara.

Jesús Tumpa jo pe uyapo vae

(Mt 21.12-13; Mr 11.15-18; Lc 19.45-46)

¹³ Jare coiño ma ou judío reta pascua iara. Jayave Jesús oo Jerusalén pe. ¹⁴ Jare Tumpa jo pe uecha umaemee vae reta. Umee ñugüínoi güeye reta jare ovecha reta jare picasu reta. Uecha vi corepoti uiipepica vae reta uguapi ñugüínoi joco pe. ¹⁵ Jayave Jesús uyapo chicote jare omoë umaemee vae reta jare ovecha reta jare güeye reta Tumpa jo güi. Jayave upiyere corepoti uiipepica vae reta icorepoti jare umbiyapara imesa reta. ¹⁶ Jare jei picasu umee vae reta pe:

—Peraa cua güi cua reta. Agüiye pemee mbaembae cheRu jo pe —jei.

¹⁷ Jayave jemimboe reta imandúa quirãi ime Tumpa iñee pe uyecuatía oí cuarãi: “Aipota ete Tumpa jo uyepiuca vaerã. Cheragüíro jese. Jáeramo cua jeco pegua íru vae reta uyapota icavi mbae vae cheve.” Jucuarãi uyecuatía oí.

¹⁸ Jayave judío reta upirandu Jesús pe:

—Mbae nunga miacãi pa ndeechacata oreve nduicuaa vaerã ime ra nenoi mbaepuere cua mbaravíquí ndiyapo vae ndiyapo vaerã?

¹⁹ Jesús jei chupe reta:

—Pembusururu yave cua Tumpa jo, che amupúa yeta co mbapí ara pe.

²⁰ —Uparavíquí reta cuarenta y seis año uyapo vaerã cua Tumpa jo —jei judío reta—. ¿Nemupúa yeta ra nde mbapí ara pe? —jei.

²¹ Érei Jesús uyeminguela chupe reta jete re. Echa'ã jete co jae Tumpa jo. ²² Jáeramo Jesús icove ye yave ou umanocue vae reta ipite güi, jemimboe reta imandúa cua jei vae re. Jayave güirovia aracae Tumpa iñee pe uyecuatía oí vae jare jocua Jesús jei chupe reta vae.

Jesús uicuaa opaete vae

²³ Jesús upita Jerusalén pe pascua iara pe. Joco pe oí rambueve, jeta vae güirovia jese uecha yave jocua miacãi reta uyapo vae. ²⁴ Érei Jesús güirovia'ã añetete cua reta ipurugiørovia. Echa'ã uicuaa cavi opaete iví pegua reta. ²⁵ Jae ueca'ã quía umimbœu vaerã chupe iví pegua reta regua. Echa'ã jae uicuaa cavi iví pegua reta ipia pe oí vae.

3

Jesús jare Nicodemo

¹ Ico penti fariseo Nicodemo jee vae. Jae co judío reta juvicha. ² Cua cuimbae ou Jesús oí vae pe pítu yave jare jei chupe:

—Opromboe vae, nduicuaa co Tumpa nembou ndeporomboe vaerã. Echa'ã mbaeti quía ipuere uyapo jocua nunga miacãi ndiyapo vae Tumpa oí'ã yave jae ndive —jei.

³ —Añete che jae ndeve —jei Nicodemo pe—, ime yave quía uiporta ico Tumpa iporoyocua pe vae, güinoita rani co tecove ipiau vae —jei.

⁴ —¿Quirãita pa co yandepuere tecove ipiau vae ñanoi yanendechi ma yave? —jei Nicodemo—. Yandepuere'ã etei yaique ye yandesi jie pe yaa ye vaerã —jei.

⁵ Jesús jei chupe:

—Añete che jae ndeve, ime yave quía uiporta ico Tumpa iporoyocua pe vae, güinoita rani co tecove ipiau vae i jare Espíritu Santo rupi —jei—. ⁶ Yaa yave yandesi güi, ñanoi tecove iví peguarãño. Érei Espíritu Santo umee yandeve tecove Espíritu pegua —jei—. ⁷ Amimbœu ma ndeve quirãi penoita rani co tecove ipiau vae. Agüiye nepiacañi cua re —jei chupe—. ⁸ Ivitu uyepeyu ipotave rupi güi jare ndiyandu jiapu. Érei ndicuaa'ã queti güi ra ou jare queti ra oo. Jucuarãi co oí Espíritu Santo umee tecove chupe vae —jei Jesús.

⁹ Nicodemo upirandu Jesús pe:

—¿Quirāita pa co uyeyapo cuá?

¹⁰Jesús upirandu Nicodemo pe:

—Ndicuaa'á pa cuá? Echa'á nde co jae Israel pegua reta omboe vae —jei—. ¹¹Añete che jae ndeve, nduyeminguela nduicuaa vae re jare numimbeu nduecha vae. Ërei perovia'á numimbeu peve vae —jei—. ¹²Amimbeu ma peve mbaembae uyeyapo iví pe vae, ërei chererovia'á. ¿Quirāita pa pepuere chererovia mbaembae uyeyapo ara pe vae amimbeu peve yave? —jei Jesús Nicodemo pe—. ¹³⁻¹⁴Mbaeti quía ye uyupi oo ara pe, jaéño che ara güi agüeyi ayu vae. Che co jae cuimbaerá uyeyapo vae ara pe oí vae —jei chupe—. Moisés aracaee uupi jocua mboi ivíra re, ñana pe ico yave. Jucuaráí vi íru vae reta chereupita co, ¹⁵ipotave güirovia cheré vae güínoi vaerá tecove opa mbae vae. Ndaraoo cañitei pe —jei.

Tumpa uau ete iví pegua reta

¹⁶Echa'á Tumpa uau ete iví pegua reta. Jáeramo umee Tai jae vaeño, ipotave güirovia jese vae güínoi vaerá tecove opa mbae vae. Ndaraoo cañitei pe. ¹⁷Tumpa ombou Tai iví pe, iví pegua reta uyembásaca vaerá jae jeco pegua. Tai ou'á uää vaerá iví pegua reta.

¹⁸Güirovia Tumpa Tai re vae reta ndaraoo ma uñéäaca. Ërei íru vae reta uñéäaca ma co. Echa'á Tumpa Tai jae vaeño umimbeu ma quía co jae. Ërei jae reta güirovia'á. ¹⁹Tembipe ou ma iví pe, ërei iví pegua reta uipota ete ico pítumimbi pe. Uipota'á ico tembipe pe. Echa'á uyapo reta icavi mbae vae. Jáeramo uñéäaca reta ma co. ²⁰Ipotave icavi mbae vae uyapo vae umitaréi tembipe. Ou'á tembipe oí vae pe agüiye vaerá íru vae reta uicuaa mbae uyapo vae. ²¹Ërei añete pegua rupi ico vae ou tembipe oí vae pe, íru vae reta uicuaa vaerá mbaravíqui uyapo vae uyapo co Tumpa jei vae rupi.

Umendata vae iamigo

²²Cua jaicue rupi Jesús jare jemimboe reta yugüíraa iví Judea jee vae pe. Joco pe upita Jesús jae reta ndive jare upurumbibautizaca oí. ²³Juan vi upurumbibautiza oí Enón pe. Enón coiño oí Salim güi. Echa'á joco pe jeta i oí. Jare amocue vae yugüíraa jare Juan umbibautiza reta. ²⁴Echa'á Juan ndei uyereraaca peresoríru pe.

²⁵Jayave Juan jemimboe reta uyeaca ñugüínoi judío reta ndive quirái ipuere uyeyoe cavi Tumpa peguár vae re. ²⁶Jayave yugüíraa Juan oí vae pe jare jei chupe:

—Opromboe vae, nde nemimbeu ma oreve Jordán joyaicho pe nde ndive icose vae regua. Mase, jae upurumbibautiza oí, jare opaete vae yugüíraa ñugüínoi jae oí vae pe —jei reta Juan pe.

²⁷Jayave Juan jei chupe reta:

—Tumpa umee yandeve vaeño yandepuere ñanooi. ²⁸Che jae ma peve: ‘Che jae'á co Cristo. Jaéño Tumpa che rani chembou chugüi.’ Pe reta etei picuaa cuarái co che jae peve —jei chupe reta—. ²⁹Jae co penti cuimbae umendata vae rami. Che co umendata vae iamigo rami. Echa'á umendata vae iamigo upita umendata vae ndive jare uyapisaca jese jare uyerovia iñee uyandu yave. Jucuaráíno vi co che ayerovia ete —jei—. ³⁰Echa'á jeta vae yugüíraata jae oí vae pe, ërei mboviño ma co yugueruta che aí vae pe —jei Juan chupe reta.

Ara güi ou vae

³¹Ara güi ou vae ipuere opaete íru vae reta güi. Iví pegua reta iví peguaño co jare uyeminguela mbaembae iví pe oí vae re. Ara güi ou vae ipuere opaete íru vae reta güi. ³²Jae umimbeu uecha jare uyandu vae, ërei mbaeti quía güirovia jae umimbeu vae. ³³Jae umimbeu vae güirovia vae uicuaaca íru vae reta pe güirovia co Tumpa iñee añete co. ³⁴Echa'á jocua Tumpa ombou vae umimbeu Tumpa iñee, jare Tumpa umee chupe Espíritu Santo opaete imbaepuere reve. ³⁵Tu uau Tai jare oñono opaete mbaembae ipo pe. ³⁶Tumpa Tai re güirovia vae güínoi ma tecove opa mbae vae. Tumpa Tai re güirovia mbae vae ndaraoo güínoi tecove. Tumpa uiporaracata chupe.

Jesús jare cuña Samaria pegua

¹YandeYa Jesús uyandu jerácuu ma co fariseo reta pe cuarái: “Jesús uyapo oí jare umbibautiza oí jeta jemimboe retará Juan güi.” Jucuaráí jerácuu. ²Ërei Jesús etei upurumbibautiza'á. Jemimboe retaño upurumbibautiza ñugüínoi. ³Jayave cua uicuaa yave, Jesús oë Judea güi oo ye Galilea pe. ⁴Jare oo Samaria rupi. Echa'á tape uasa jocoropi. ⁵Jayave oo uväe tenta guasu Sicar jee vae pe. Jocua tenta guasu Samaria pegua co, jare coiño oí iví Jacob aracaee umee tai José pe vae güi. ⁶Jocua iví pe oí penti icua. Jocua icua jee Jacob iicua. Jayave Jesús uguapi icua iyípi pe. Echa'á mbiri ma uguata, jare icandi. Jare doce pota rupi ma. ⁷Jayave ou uväe penti cuña Samaria pegua i güínoé vaerá. Jare Jesús jei chupe:

—Emee tau i.

⁸Echa'á Jesús jemimboe reta yugüíraa tenta guasu pe jembiurá ogua vaerá. ⁹Jayave cuña Samaria pegua jei Jesús pe:

—Nde co jae penti judío jare che co jae penti Samaria pegua. ¿Maera pa nde ndere cheve: ‘Emee tau i?’ —jei.

(Echa'ã judío reta uyemingueta'ã Samaria pegua reta ndive.) ¹⁰ Jayave Jesús jei cuña pe:

—Che jae ma ndeve: ‘Emee tau i.’ Ndicuua yave Tumpa uipota umee ndeve vae jare ndicuua yave quía co che, ndiyerureta tēi co cheve jare che ameeta tēi co ndeve i tecove güünoi vae —jei Jesús.

¹¹ —Carai —jei cuña Jesús pe—, nde mbaeti mbae nenoí i nenoë pípe vaerā, jare cua i quipe oí. ¿Quía güü pa nderuta jocua i tecove güünoi vae? —jei—. ¹² ¿Tuicha ete pa nembaepuere yandetenondegua Jacob imbaepuere güii? Echa'ã Jacob umee yandeve cua i. Jae etei jare taí reta jare jímbaria reta jou cua güü —jei cuña.

¹³ Jesús jei chupe:

—Ipotave cua i jou vae iúe yeto co. ¹⁴ Ërei ipotave i che ameeta jou vae ndarau ye iúe —jei—. Echa'ã jocua i che ameeta chupe vae uyeyapota ipia pe penti icua i oë vae rami. Jecuáeñó umeeta chupe tecove opa mbae vae —jei.

¹⁵ —Carai —jei cuña—, emee cheve cua i, agüüye ye vaerā cheúe jare agüüye ye vaerā ayu cua pe i anoë vaerā —jei.

¹⁶ Jayave Jesús jei chupe:

—Ecua eeni neme peyu cua pe.

¹⁷ —Mbaeti cheme —jei cuña.

—Añete co ndere: ‘Mbaeti cheme’ —jei Jesús cuña pe—. ¹⁸ Echa'ã nenoí ma pandepo neme, jare jocua cuimbæ añaive nenoí vae jae'ã co neme. Añete co ndere —jei—.

¹⁹ —Carai —jei cuña —, añaive aicuua nde co jae penti Tumpa iñee umimbeu vae —jei—.

²⁰ Yandetenondegua reta umbiádora Tumpa cua ivitu guasu re. Ërei pe reta pere Jerusalén pe oí Tumpa jo, jare joco peño íru vae reta vi umbiádora tēi Tumpa —jei cuña.

²¹ —Chererovia, cuña —jei Jesús—. Outa ma ara agüüye vaerā pembiádora cheRu cua ivitu guasu reño ani Jerusalén peño —jei—. ²² Pe reta pemaembiadura yave, picuua cavi'ã mbae pembiádora vae. Ore numaembiadura yave, ndiuicuua cavi co mbae numbiadura vae. Echa'ã íru vae reta uyembiasacata judío reta rupi —jei—. ²³ Ërei outa ma ara - ou ma co - añetete Tumpa umbiádora vae umbiádora vaerā Espíritu Santo rupi. Umbiádora añete vae rupi —jei—. Echa'ã cheRu ueca cua nunga jae reta umbiádora vaerā —jei—. ²⁴ Tumpa co jae Espíritu. Umbiádora vae reta tumbiadura Espíritu Santo rupi jare añete vae rupi —jei Jesús.

²⁵ Jayave cuña jei Jesús pe:

—Aicuua Tumpa ombou vae outa co - jae co Cristo jee vae - jare jae ou yave, umimbeuta yandeve opaete mbaembæ regua —jei.

²⁶ —Jae co che ayemingueta aí nde ndive vae —jei Jesús.

²⁷ Cua jei oí yave, Jesús jemimboe reta yugüero uväe. Ipiacáñi Jesús uyemingueta oí cuña ndive vae re. Ërei penti ave jei'ã chupe: “¿Mbae pa ndipota?” ani “¿Maera pa ndiyemingueta jae ndive?” ²⁸ Jayave cuña ueya íru joco pe jare oo uväe tenta guasu pe. Jei cuimbæ tenta guasu pegua reta pe:

²⁹ —Pecua peecha cuimbæ opaete ayapocue umimbeu cheve vae. ¿Jae'ã ra co Cristo, Tumpa ombou vae? —jei.

³⁰ Jayave cuimbæ reta oé tenta guasu güü yugüero Jesús cotí.

³¹ Cuña oo ma yave, Jesús jemimboe reta jei chupe:

—Oporomboe vae, ecaru.

³² —Ime anoi cherembíurã pe reta picuua mbae vae —jei Jesús chupe reta.

³³ Jayave jemimboe reta jei uyupe:

—¿Güero ma ra quía mbae jou vaerā?

³⁴ —Che ayapo chembou vae uipota ayapo vaerā vae, jare opaete iparavíqui ayapo —jei Jesús—. Cua co jae cherembíurã rami —jei—. ³⁵ Pe reta pere: ‘Irundi yasi rupi oíta ma co mbaeviro.’ Ërei che jae peve: Mase, pemae co reta re. Joco pe oí vae yagüüye ma co. Uvæ ma mbaeviro —jei Jesús—. ³⁶ Jare tecove opa mbae vae uñemee chupe vae uyeavíro vae rami co. Jare temiti iya umbiepi umbaevíro vae pe, umaeti vae jare umbaevíro vae uyerovia pâve vaerā —jei—. ³⁷ Jucuarái añete co cua: ‘Penti vae umaeti jare íru vae umbaevíro’ —jei—. ³⁸ Che pomondo peavíro vaerā peparavíqui'ã jese vae. Íru vae reta uparavíqui jese, jare pe reta peavíro jae reta iparavíqui vae —jei Jesús chupe reta.

³⁹ Jare jeta jocua tenta guasu pegua reta - Samaria pegua reta co - güürovia Jesús re cuña umimbeu chupe reta vae jeco pegua. Echa'ã cuña jei ma chupe reta: “Opaete ayapocue umimbeu cheve.” ⁴⁰ Jayave Samaria pegua reta yugüero uväe yave Jesús oí vae pe, jei chupe:

—Ecua orerenta pe epita ore ndive.

Jayave Jesús oo upiá joco pe mocui ara. ⁴¹ Jare jeta íru vae reta upurugüürovia Jesús etei jei chupe reta vae jeco pegua. ⁴² Jayave jei reta cuña pe:

—Tenonde yave ndupurugüirovia nde ndere oreve vae jeco pegua. Ërei añave ndupurugüirovia ore etei nduyandu ramo, jare añave nduicuaa cua co jae ïvi pegua reta umbiasa vae Cristo jee vae —jei reta.

Jesús umbigüera mburuvicha tai

⁴³ Mocui ara rupi Jesús oo joco güi Galilea cotí. ⁴⁴ Echa'á Jesús etei jei penti Tumpa iñee umimbeu vae jentaigua reta uiipi'á. ⁴⁵ Jayave Jesús oo uväe yave Galilea pe, joco pegua reta umbiresive cavi.

Echa'á uecha reta ma opaete Jesús uyapo Jerusalén pe pascua pe vae. Echa'á jae reta yugüiraa vi joco pe. ⁴⁶ Jayave Jesús oo uväe Caná Galilea pegua pe. Joco pe tenonde yave uyapo i vinorá. Jare ico Capernaum pe penti mburuvicha. Cua cuimbae tai imbaerasi oí. ⁴⁷ Jare uicuaa yave Jesús ou ma co Judea güi uväe Galilea pe, ou uväe Jesús oí vae pe jare uyerure chupe tai re.

—Ecua cherenta pe embigüera cherai —jei. Echa'á umanota ma oí.

⁴⁸ —Aechaca'á peve yave miacañi reta, ndarau perovia cheré —jei Jesús chupe.

⁴⁹ —Carai —jei mburuvicha—, ecua cherenta pe agüiye vaerá cheraí umano.

⁵⁰ —Ecua yeño —jei Jesús chupe—. Nderai icove catu ye ma oí —jei.

Jayave mburuvicha güirovia Jesús jei chupe vae jare oo ye jenta cotí. ⁵¹ Jare oo rambueve jenta cotí, jembociu reta yugüero oováití jare jei chupe:

—Icove catu ye ma oí nderai.

⁵² Jayave mburuvicha upírandu chupe reta:

—¿Mbae ora pe pa umbipi ucuera?

—Caarumo una rupi jacu upita chugüi —jei reta chupe.

⁵³ Jare cunumi tu uicuaa jocua ora pe etei co Jesús jei chupe: “Nderai icove catu ye ma oí.” Jayave upurugüirovia jae jare opaete jenta pegua reta.

⁵⁴ Cua miacañi uyapo Jesús uicuaaca vaerá quía co jae, ou yave Judea güi Galilea pe. Mocui ma co cua miacañi.

5

Cuimbae ipuere mbae uguata vae

¹ Cua jaicue rupi judío reta uyapo ñugüinói fiesta, jare Jesús oo Jerusalén pe. ² Jare ime Jerusalén pe ovecha reta uñemeea jonque iyípi pe penti estanque tipí vae hebreo iñee pe Betesda jee vae. Ime cua i iyípi rupi pandepo o-raí. ³ O-raí japipe pe uyapacua ñugüinóijeta imbaerasi vae reta. Joco pe ñugüinói jesa mbae vae reta, ipuere mbae uguata vae reta, jare ipuere mbae omí vae reta. Opaete cua reta uáro ñugüinói i omí vaerá. ⁴ Echa'á amo amo pe ugüeyí penti ángel omomí vaerá i. Jare i omí ma yave, jocua imbaerasi vae tenonde voi uique i pe vae ucuera ipotave imbaerasi güi. ⁵ Jare imbaerasi vae reta ipite pe oí penti cuimbae treinta y ocho año ma ipuere mbae uguata vae. ⁶ Jesús uecha cuimbae uyapacua oí joco pe, jare uicuaa íma ete ma imbaerasi. Jayave upírandu chupe:

—¿Ndipota pa ndecuera?

⁷ —Carai —jei cuimbae—, mbaeti quía cheñono vaerá i pe i omí yave. Che aa rambueve, íru vae uique i pe tenonde chegüi —jei.

⁸ Jayave Jesús jei chupe:

—Epúa evoí nderupa jare eguata.

⁹ Jayave cuimbae ucuera voi, jare ovoi jupa uguata. Jare jocua ara mbutuu ara co. ¹⁰ Jayave judío reta jei cuimbae ucuera ma vae pe:

—Cua ara mbutuu ara co. Jupi'á ndevoí vaerá nderupa mbutuu ara pe —jei reta.

¹¹ Cuimbae jei chupe reta:

—Cuimbae chembigüera vae jei cheve: ‘Evoí nderupa jare eguata’ —jei cheve, jei.

¹² Jayave upírandu reta chupe:

—¿Quía pa jae ‘Evoí nderupa jare eguata’ jei ndeve vae?

¹³ Ërei ucuera vae - tenonde yave ipuere mbae uguata vae - uicuaa'á. Echa'á jeta vae joco pe ñugüinói jare Jesús oo ma joco güi. ¹⁴ Ndei íma mbove Jesús oováití cuimbae Tumpa jo pe.

—Ndecuera ma co. Jáeramo agüiye ye iyapo icavi mbae vae. Echa'á ndiyapo ye yave, mbae icavi mbae ete vae uyeyapota ndeve —jei.

¹⁵ Jayave cuimbae oo umimbeu judío reta pe Jesús co jae umbigüera ma vae. ¹⁶ Jare Jesús uyapo ma amocue cua nunga miacañi mbutuu ara pe. Cua jeco pegua judío reta uipota uyapo icavi mbae vae chupe. Uipota vi uyuca. ¹⁷ Ërei Jesús jei chupe reta:

—CheRu jecuaeño uparavíqui, jare che vi aparavíqui.

¹⁸ Cua jeco pegua judío reta uipota uyuca Jesús. Echa'á Jesús uyapo mbutuu ara pe jae reta jei jupi'á uyeyapo vaerá vae, jare Jesús uyemingueta yave, jei: “Tumpa etei co cheRu”, jare cua uipota jei jae co Tumpa etei.

Tumpa Tai imbaepuere

¹⁹Jayave Jesús jei chupe reta:

—Añete che jae peve, che co jae Tumpa Tai. Cheiño chepuere'ā mbae ayapo. Ayapo jocua aecha cheRu uyapo oī vaefño. CheRu uyapo oī vae che ayapo vi —jei—. ²⁰Echa'ā cheRu cherau jare uicuaaca ma cheve opaete iparavíqui. Jare uicuaacata vi cheve mbaravíqui tuicha ete cua reta güi vae, pepiacañi ete vaerā jese —jei Jesús chupe reta—. ²¹CheRu umee tecove umanocue vae reta pe. Jae ramiño vi che amee tecove amocue vae reta pe. Amee aipota vae pe —jei—. ²²CheRu ndarau uāa ivi pegua reta. Echa'ā umaenota cheré aāa vaerā —jei—. ²³Jucuarāi opaete vae chepiuta uipiú cheRu rami. Chepiu'ā vae uipiú'ā vi cheRu. Echa'ā jae co chembou —jei—.

²⁴Añete che jae peve, chiñee piyandu yave jare chembou vae perovia yave, penoi ma tecove opa mbae vae. Ndarau ma piñeāaca. Peasa ma co mano güi tecove opa mbae vae pe. ²⁵Añete che jae peve, outa ma ara - jáema ou - umanocue vae reta uyandu vaerā chiñee - che co jae Tumpa Tai - jare uyandu vae reta icove yeta co —jei Jesús chupe reta—. ²⁶Echa'ā cheRu ipuere umee tecove. Jae ramiño vi umaenota cheré amee vaerā tecove —jei—. ²⁷Jare cheRu umee cheve mbaepuere aāa vaerā ivi pegua reta che ayeyapo cuimbaerā ramo —jei—. ²⁸Agiüye pepiacañi cua re. Echa'ā outa ma ara opaete umanocue uñenotí oī vae reta uyandu vaerā chiñee —jei—. ²⁹Icavi vae uyapo vae reta icove yeta ou tecove opa mbae vae güinói vaerā, jare icavi mbae vae uyapo vae reta icove yeta ou uñeāaca vaerā —jei Jesús chupe reta—.

Cristo regua umimbeu vae reta

³⁰Cheiño chepuere'ā mbae ayapo. Che apuruāa cheRu umimbeu cheve vae rupi. Jáeramo apuruāa jupi vae rupi. Echa'ā ayapo'ā jae vae rupiñ. Ayapo chembou vae jei vae rupi —jei—. ³¹Cheiño chemiari peve chiyee yave, pe reta peroviata'ā jocua jae vae. ³²Ime iru chemimbeu vae, jare aicuaa jae jei peve cheré vae añete co —jei—. ³³Echa'ā pe reta pemondo cuimbae reta Juan re uyapisaca vaerā, jare jae jei cheré vae añete co —jei—. ³⁴Che aeca'ā quía chemimbeu vaerā, ērei cua che jae peve piyembiasaca vaerā —jei Jesús—. ³⁵Juan co jae penti mechero rami. Echa'ā mechero jendi jare umee yandeve tembipe. Íma ngatu rupi icavi echo peve piyervia vaerā tembipe Juan umee peve vae re —jei—. ³⁶Cua mbaravíqui ayapo vae reta chemimbeu ete Juan chemimbeu vae güi. CheRu uipota opa ayapo vaerā cua mbaravíqui reta, jare cua ayapo vae rupi aicuaaca iru vae reta pe cheRu co chembou vae —jei—. ³⁷CheRu chembou jare jae etei chemimbeu. Piyandu'āi cheRu iñee jare peeche'āi —jei—. ³⁸Piyapo'ā cheRu jei peve piyapo vaerā vae. Echa'ā jae chembou, ērei chererovia'ā —jei—. ³⁹Jecuaenó pemingueta Tumpa iñee pe uyecuatía oī vae. Echa'ā pepiá pe piyemingueta joco pe pevæ quirái pepuere penoi tecove opa mbae vae. Jare Tumpa iñee pe uyecuatía oī vae che co chemimbeu —jei Jesús chupe reta—.

⁴⁰Ērei pipota'ā perovia cheré tecove opa mbae vae amee vaerā peve —jei—.

⁴¹Che ayeco'ā yembutuicha ivi pegua reta umee vae re. ⁴²Echa'ā aicuaa pe reta peau'ā Tumpa pepia pe —jei—. ⁴³Che ayu cheRu chembou ramo, ērei pe reta chembiresive'ā. Irú vae ou yave jei vae rupi, pembiresiveta co —jei—. ⁴⁴Peputre'ā etei pepurugiørovia. Echa'ā jecuaenó peeca iru vae reta pembutuicha vaerā, ērei peeca'ā yembutuicha Tumpa uipota tēi penoi vaerā vae. Tumpa co jae pentiño —jei Jesús—. ⁴⁵Agiüye pepia pe piyemingueta che ayu pumbjeco vaerā cheRu jovai. Echa'ā Moisés uicuatía vae co pembijeco, yepe tēi pe reta pere: 'Ore nduyapo Moisés uicuatía vae rupi. Jáeramo icavita oreve.' Jucuarāi pere tēi —jei—. ⁴⁶Echa'ā Moisés uicuatía vae perovia yave, chereroviata tēi co. Echa'ā Moisés uicuatía vae che co chemimbeu —jei—. ⁴⁷Ērei perovia'ā Moisés uicuatía vae ramo, ndarau vi perovia chiñee —jei Jesús chupe reta.

6

Jesús umingaru cinco mil cuimbae reta

(Mt 14.13-21; Mr 6.30-44; Lc 9.10-17)

¹Cua jaicue rupi Jesús oo uvâe i guasu Galilea jovaicho pe. Jocua i guasu jee vi Tiberias. ²Jare tenonde yave Jesús umbigüera amocue imbaerasi vae reta, jare jeta vae uecha ma miacañi Jesús uyapo vae reta. Jáeramo añave cua reta yugüüraa Jesús jaicue. ³Jayave Jesús oo uyupi ivi guasu re jare uguapi joco pe jemimboe reta ndive. ⁴Jare coiño ma ou judío reta ifiesta pascua jee vae. ⁵Jare Jesús umae yave, uecha jeta vae yugüero icoti. Jayave upirandu Felipe pe:

—¿Quiape pa yandepuereta yagua mbiyape cua reta jou vaerā —jei—.

⁶Jare cua Jesús jei uicuaa vaerā mbae ra jeita Felipe. Echa'ā Jesús uicuaa ma mbae uyapota vae. ⁷Felipe jei chupe:

—Doscientos ara mbaravíqui jepi pegua mbiyape ndarau uepití cua reta jou vaerā, penti penti mboviño jou yave.

⁸Penti Jesús jemimboe Andrés jee vae - jae co Simón Pedro tiví - jei Jesús pe:

⁹—Ime cua pe oī penti cunumi pandepo mbiyape jare mocui pira güinoi vae. Êrei jocua mboví co cua jeta vae reta jou vaerä —jei.

¹⁰—Pemimbeu chupe reta uguapi vaerä —jei Jesús.

Jare jeta capichape oī joco pe. Jayave uguapi reta. Jare cuimbae reta cinco mil rupi ñugüinoi. ¹¹ Jayave Jesús uipisi jocua mbiyape jare umee yasurupai Tumpa pe. Jayave umee mbiyape jemimboe reta pe, jare jemimboe reta umee uguapi vae reta pe. Jae ramíño vi umee pira chupe reta. Jare opaete vae jou jare iyangapii. ¹² Jayave iyangapii reta ma yave, Jesús jei jemimboe reta pe:

—Pembati tembíu uñepisääcue jembire vae, agüiye vaerä mbae uyemombo —jei.

¹³ Echa'ã jocua pandepo mbiyape güi jembire mbiyape uñepisääcue jare ueyea joco pe, opa ma ucaru reta yave. Jayave Jesús jemimboe reta umbati jare umitinee doce canasta. ¹⁴ Jare joco pe ñugüinoi vae reta uecha ma yave cua miacañi Jesús uyapo vae, jei reta:

—Cua cuimbae jocua Tumpa iñee umiñbeu vae etei co. Echa'ã Tumpa iñee pe uyequatía oī outa co ivi pe —jei reta.

¹⁵ Jare Jesús uicuaa yugüeruta uipisi uyapo vaerä juvicha guasurä, yepe tēi jae uipota'ã. Jayave oo chugüi reta ivitu guasu re. Jaeño oo.

Jesús uguata i íárambo

(Mt 14.22-27; Mr 6.45-52)

¹⁶ Jare pítu ave ma yave, Jesús jemimboe reta ugüeyi yugüiraa i guasu pe. ¹⁷ Joco pe uyupi chalana pe jare umbipi uasa i guasu rupi Capernaum coti. Pítumimbi ma oī, jare Jesús ndei ou ye jae reta ñugüinoi vae pe. ¹⁸ Jayave tanta uyepeyu ivitu jare i uyembiaparoarao. ¹⁹ Uruguata reta ma yave chalana penti legua rupi ndipo, uecha Jesús uguata ou i íárambo jare ou coiño ma chalana güi. Jayave uquiye reta. ²⁰ Êrei Jesús jei chupe reta:

—Che co. Agüiye pequiyé —jei.

²¹ Jayave uyerovia reve jae reta umbuyupi Jesús chalana pe, jare jupivoiño chalana oo uväe ivi pe uipota yugüiraa uväe vae pe.

Ueca reta Jesús

²² Piareve pe jeta vae reta jecuaeño upita i guasu jovaicho pe. Uecha pentiño chalana joco pe oī ndei Jesús jemimboe reta yugüiraa pipe mbove. Jare uicuaa Jesús oo'ã chalana pe jemimboe reta ndive.

²³ Êrei íru chalana reta tenta guasu Tiberias güi yugüeru vae upita coiño tenonde yave ucaru reta vae güi. Echa'ã joco pe jae reta jou mbiyape yandeYa umee yave yasurupai Tumpa pe. ²⁴ Uicuaa reta ma Jesús jare jemimboe reta mbaeti joco pe ñugüinoi. Jayave uyupi reta jocua chalana reta pe jare yugüiraa Capernaum coti, Jesús ueca vaerä.

Mbiyape tecove umeeta vae

²⁵ I guasu uasa reta ma yave, uväe Jesús jare jei reta chupe:

—Oporomboe vae, ¿quiräi yave pa ndeyu cua pe?

²⁶ Jayave Jesús jei chupe reta:

—Añete che jae peve, pe reta chereca jocua mbiyape pemiangapii ramoño, chereca'ã jocua miacañi pe aipota aicuaaca peve ramo —jei—. ²⁷ Agüiye preparavíqui peremburä imata'ã ico peve vae reño. Êrei preparavíqui peremburä ameeta peve vae re. Che ayeyapo cuimbaerä vae ameeta peve peremburä opata'ã vae. Echa'ã penoita tecove opa mbae vae. Echa'ã cheRu Tumpa uicuaaca ma peve chepuere ayapo jucuaräi —jei Jesús chupe reta.

²⁸ Jayave upirandu reta Jesús pe:

—¿Mbae pa nduyapota? ¿Quiräi pa orepuere nduyapo mbaravíqui Tumpa uipota nduyapo vaerä vae? —jei reta.

²⁹ Jayave Jesús jei:

—Perovia cheré. Cua co mbaravíqui Tumpa uipota piyapo vaerä vae. Echa'ã jae chembou —jei.

³⁰ Jayave jei reta chupe:

—¿Mbae nunga miacañi pa ndiyapota, nduecha vaerä jare ndugüirovia vaerä nderé? ¿Mbae nunga mbaravíqui pa ndiyapota nde? —jei reta—. ³¹ Yandetenondegua reta jou maná ñana pe. Echa'ã Tumpa iñee pe uyequatía oī: ‘Umee chupe reta jemburä ara güi jou reta vaerä’ —jei reta chupe.

³²—Añete che jae peve —jei Jesús—, Moisés umee'ã co jemburä ara güi ou vae. Añave cheRu umeeta peve peremburä añetete vae ara güi ou vae —jei—. ³³ Echa'ã tembíu Tumpa añave umeeta vae jocua co jae ara güi ou vae. Jae umeeta tecove ivi pegua reta pe —jei—.

³⁴—Carai —jei reta—, jecuaeño emee oreve cua nunga oreremburä.

³⁵—Che co jae jocua tembíu tecove umeeta vae —jei Jesús—. Ipotave cheré güirovia vae ndarau iyembai, jare ipotave cheré güirovia vae ndarau iúe —jei—. ³⁶ Êrei che jae ma peve cuaräi: Perovia'ã, yepe tēi cherecha ma. ³⁷ Opaete cheRu umee cheve vae reta güiroviata co cheré —jei—, jare ipotave

cheré güirovia vae ndarau amombo. ³⁸ Echa'ã agüeyi ayu ara güii ayapo vaerã chembou vae jei vae. Ayu'ã che jae vaeño ayapo vaerã —jei Jesús—. ³⁹ Ndarau amicañi penti ave opaete cheRu umee ma cheve vae reta güii. Echa'ã ambijecove yeta aru umanocue vae reta ipite güii ara taicuegua vae pe. Cua uipota chembou vae —jei—. ⁴⁰ Ipotave cherecha vae güünoita tecove opa mbae vae cheré güirovia yave, jare che ambijecove yeta aru umanocue vae reta ipite güii ara taicuegua vae pe. Cua uipota cheRu —jei Jesús.

⁴¹ Jayave judío reta iñeenguru Jesús re. Echa'ã Jesús jei ma: “Che co jae tembíu ara güii ou vae.” ⁴² Jare judío reta jei:

—Cua co jae Jesús. Jae co José tai. Yaicuua catu co tu jare ichi. ¿Quirai pa ipuere jei: ‘Agüeyi ayu ara güii?’ —jei reta.

⁴³ Jayave Jesús jei chupe reta:

—Agüiye piñeenguru checoti. ⁴⁴ CheRu chembou —jei—. CheRu güiroviaca cheré vaeño ipuere güirovia cheré. Jare che ambijecove yeta aru umanocue vae reta ipite güii ara taicuegua vae pe —jei chupe reta—. ⁴⁵ Tumpa iñee aracae umimbeu vae uicuatía cuarai: ‘Jare Tumpa omboeta opaete vae.’ Jucuarai uicuatía —jei—. Ipotave uyapisaca Tumpa re jare uyemboe Tumpa jei chupe vae re vae outa checoti —jei—.

⁴⁶ Mbaeti quía uecha cheRu, jaeño che ayu Tumpa güii vae. Che aecha ma co cheRu —jei Jesús—.

⁴⁷ Añete che jae peve, cheré güirovia vae güünoi tecove opa mbae vae. ⁴⁸ Che co jae jocua tembíu tecove umee vae —jei—. ⁴⁹ Petenondegua reta jou jocua maná ñana pe jare umano reta. ⁵⁰ Che co jae tembíu ara güii ou vae. Cua tembíu jou vae ndarau umano —jei—. ⁵¹ Che co jae tembíu tecove umee vae. Che agüeyi ayu ara güii. Ipotave cua tembíu jou vae güünoita tecove opa mbae vae —jei Jesús chupe reta—. Jare jocua tembíu ameeta vae cherete co. Ameeta cherete ivi pegua reta güünoi vaerã tecove —jei—.

⁵² Jayave judío reta uyeaca uyupi.

—¿Quirai ra ipuere cua cuimbae umee yandeve jete yau vaerã? —jei reta.

⁵³ —Añete che jae peve —jei Jesús chupe reta—, peul'á yave cherete jare cherugüi, ndarau tecove opa mbae vae penoi. Che co jae cuimbaerã uyeyapo vae —jei—. ⁵⁴ Cherete jare cherugüi jou vae güünoi tecove opa mbae vae, jare ambijecove yeta aru umanocue vae reta ipite güii ara taicuegua vae pe —jei—.

⁵⁵ Echa'ã cherete jare cherugüi tembíu añetete vae co —jei Jesús—. ⁵⁶ Cherete jare cherugüi jou vae ico che ndive jare che aico jae ndive —jei—. ⁵⁷ CheRu güünoi tecove opa mbae vae jare jae chembou, jare che anoi tecove opa mbae vae cheRu güii. Jae ramíño vi jocua cherete jou vae güünoita tecove opa mbae vae chegüi —jei chupe reta—. ⁵⁸ Che co jae tembíu ara güii ou vae. Cua tembíu jae'ã co jocua tembíu petenondegua reta jou vae rami. Echa'ã jae reta umano. Èrei ipotave cua tembíu jou vae güünoita tecove opa mbae vae —jei—.

⁵⁹ Jucuarai jei Jesús judío reta itupao pe, Capernaum pe oporomboe oí yave.

Ñee reta tecove opa mbae vae pegua

⁶⁰ Cua uyandu reta yave, jeta Jesús jemimboe reta jei uyupe:

—Icavi'ã co cua jei vae. Agüiye yayapisaca cua nunga ñee re —jei reta.

⁶¹ Jesús uicuua jemimboe reta iñeenguru co icoti. Jayave jei chupe reta:

—¿Maera pa piñeenguru checoti cua re? ⁶² ¿Mbae pa piyapota cherecha yave ayupi aa tenonde aico vae pe? Che co jae cuimbaerã uyeyapo vae —jei—. ⁶³ Jaeño Espíritu Santo ipuere umee tecove opa mbae vae. Yanderete ipuere'ã umee yandeve cua nunga tecove. Cua amimbeu ma peve vae ivi pegua'ã co. Jae co tecove opa mbae vae pegua —jei Jesús—. ⁶⁴ Èrei amocue pe reta perovia'ã cheré —jei—.

Echa'ã Jesús uicuua iyipi güüve quía reta güirovia'ã jese jare quía umeeta jovaicho reta pe. ⁶⁵ Jayave jei chupe reta:

—Jáeramo amimbeu ma peve quirai cheRu güiroviaca cheré vaeño ipuere güirovia cheré —jei—.

⁶⁶ Cua jaicue rupi jeta jemimboe reta uñatima ye Jesús güii, jare uguata'ã ma jae ndive. ⁶⁷ Jayave Jesús upirandu jocua doce vae reta pe:

—¿Peota pa chegüi pe reta vi?

⁶⁸ —¿Quía re pa ndoota, oreYa? —jei Simón Pedro chupe—. Nde co nemimbeu oreve tecove opa mbae vae regua. ⁶⁹ Jare ndugüirovia ma nderé jare nduicuua ma nde co jae Tumpa oñono tee iyupeguarã vae —jei—.

⁷⁰ Jayave Jesús jei:

—Che puparavo. Pe co jae doce vae reta. Èrei ime penti pepite pe oí vae uyeyocui aña guasu pe —jei—.

⁷¹ Cuarai uyemingueta Judas re. Judas co jae Simón Iscariote tai. Echa'ã Jesús uiparavo doce jare jae reta güii penti co jae Judas. Judas umeeta Jesús jovaicho reta pe.

Jesús tivi reta güirovia'ã jese

¹ Cua jaicue rupi Jesús oo tenta guasu Galilea pegua reta pe. Oo'ã Judea pe. Echa'ã judío reta uipota yuca. ² Jare outa ma uvae judío reta ifiesta Tabernáculos jee vae iara reta. ³ Jayave Jesús tivi reta jei chupe:

—Ecua cua güii Judea pe, nderemimboe reta uecha vaerä mbaraviqui ndiyapo vae. ⁴ Echa'ã ime yave quía uipota īru vae reta uicuua cavi vaerä jesegua vae, uyapo viari'ã iparaviqui. Ndiyapo co cua mbaraviqui. Jáeramo iyapo opaete vae jovaque —jei reta chupe:

⁵ Echa'ã tivi reta vi güirovia'ã jese. ⁶ Jayave Jesús jei chupe reta:

—Ndei uvae jucuaräi ayapo vaerä, ērei pe reta pepuere peo pequiréi vae rupi —jei—. ⁷ Tivi pegua reta ipuere'ã pemitaréi, ērei ivi pegua reta chemitaréi. Echa'ã che amimbeu chupe reta icavi mbae vae co jae uyapo reta vae —jei Jesús—. ⁸ Pe reta pecua fiesta pe. Che ndei rani aa cua fiesta pe. Echa'ã ndei uvae che aa joco pe vaerä —jei.

⁹ Jucuaräi jei chupe reta Jesús, jare upita Galilea pe.

Fiesta Tabernáculos jee vae

¹⁰ Cua jaicue rupi tivi reta yugüiraa ma yave fiesta pe, Jesús oo vi. Oo'ã jeta vae jupíe agüiye vaerä uecha reta. ¹¹ Jare judío reta ueca ñugüinoi Jesús fiesta pe.

—¿Quíape paime oí? —jei reta.

¹² Jare joco pe ñugüinoi vae reta uyeaca uyupii Jesús re. Amocue vae jei:

—Cuimbae jecocavi vae co jae.

īru vae reta jei:

—Jecocavi'ã co. Upurumbitavi vae co.

¹³ Ērei opaete vae uquiyé judío reta güii. Jáeramo uyemingueta viariño reta.

¹⁴ Fiesta mbite ma yave, Jesús oo Tumpa jo pe umbipi oporomboe. ¹⁵ Jare judío reta ipiacañi.

—¿Quiräi ra cua cuimbae jeta uicuua mbaembae re uyemboe mbae reve? —jei reta.

¹⁶ Jayave Jesús jei chupe reta:

—Cheporomboe chembaeño'ã co. Jae co chembou vae iporomboe —jei—. ¹⁷ Ipotave Tumpa jei vae uipota uyapo vae uicuata cheporomboe Tumpa iporomboe co. Uicuata chiñeeño'ã co —jei—.

¹⁸ Ipotave vae jae iñee reño oporomboe yave, jae uipota īru vae reta pe uyembutuichaca vaeräño. Ērei quía ueca umbutuicha vaerä ombou vae, jae oporomboe añete vae re. Iyapu'ã co —jei Jesús—.

¹⁹ Moisés umee peve mboroyocui. Ērei mbaeti penti ave pe reta piyapo mboroyocui pe uyecuatía oí vae rupi —jei—. ¿Maera pa pipota cheyuca? —jei chupe reta.

²⁰ Jayave judío reta jei:

—Aña oya ma nderé. ¿Quía pa uipota ndeyuca? —jei reta.

²¹ —Ayapo ma penti mbaraviqui —jei Jesús—, jare opaete pe reta pepiacañi jese. ²² Moisés umimbeu peve piñemicircuncidaca vaerä. Ērei uyembipi'ã Moisés umimbeu yave. Echa'ã Moisés itenondegua reta uyapo jucuaräi. Jare pe reta pepurumicircuncidaca mbutuu ara pe —jei—. ²³ Che ambigüera ma penti cuimbae mbutuu ara pe. Opaete jete ucuera cavi ma. ¿Maera pa pepochi cheve cua jeco pegua? Echa'ã pe reta pepurumicircuncidaca mbutuu ara pe mboroyocui Moisés umimbeu peve vae pipota'ã piyaví ramo —jei Jesús—. ²⁴ Agüiye pepuruña peeche vae rupiño. Pepuruña cavi jupi vae rupi —jei.

Jae pa co Cristo?

²⁵ Jáeramo amocue Jerusalén pegua reta jei:

—Jae'ã ra cua judío reta uipota uyuca vae? ²⁶ Mase, co oí cua pe, jare uyemingueta oí opaete vae pe. Ērei mbaeti quía mbae jei chupe. Aramo yanderuvicha reta uicuua ma jae co Cristo, Tumpa ombou vae —jei reta—. ²⁷ Ērei yaicuua queti güii ou cua cuimbae. Echa'ã Cristo uycuua yave, ndarau quía uicuua queti güii ou —jei reta.

²⁸ Jáeramo Jesús oporomboe oí rambueve Tumpa jo pe, iñeeata reve jei:

—Pe reta checuua co, jare picuua co queti güii ayu vae. Ērei ayu'ã che aipota ayu rupiño. Echa'ã chembou vae imiari añete vae re, jare pe reta picuua'ã chembou vae —jei—. ²⁹ Ērei che aicuua. Echa'ã ayu jae oí vae güii. Jae chembou —jei.

³⁰ Jáeramo judío reta uipota tēi uipisi. Ērei uipisi'ã quía. Echa'ã ndei uvae uyepisi vaerä. ³¹ Jare jeta joco pe ñugüinoi vae güirovia jese. Echa'ã jei reta:

—Cristo ou yave, ¿uyapota ra jeta ete miacaní cua cuimbae uyapo vae güii?

Fariseo reta ombou jembiocui reta uipisi vaerä Jesús

³² Jare fariseo reta uyandu jeta vae iñenguru ñugüinoi Jesús re. Jayave sacerdote reta itenondegua reta jare fariseo reta ombou jembiocui reta uipisi vaerä Jesús. ³³ Jayave Jesús jei:

—Aīta pe reta ndive michi peguaño. Jayave aata chembou vae pe.³⁴ Cherecata co, ērei ndarau chevāe. Ndaraus peo che aīta vae pe —jei.

³⁵ Jayave judío reta jei uyupe:

—¿Queti ra oota cua cuimbae agüiye vaerā ñavāe chupe? Oota ndipo judío reta judío mbae vae reta ipite rupi uñemaias vae pe. Omboeta ndipo judío mbae vae reta.³⁶ ¿Mbae ra uipota jei, jei yave cuarāi: 'Cherecata co, ērei ndarau chevāe. Ndaraus peo che aīta vae pe?' —jei reta.

I tecove umee vae

³⁷ Jocua ara fiesta opata ma yave icavi ete opaete īru fiesta iara güi. Jayave Jesús uyemboi jare iñeeāta rewe jei:

—Ime yave quía iúe vae, tou checoti i tou —jei.—³⁸ Cheré güirovia vae güi usirita jeta i tecove umee vae. Jucuarāi Tumpa iñee pe uyequatía oī —jei.

³⁹ Jucuarāi uyemingueta Jesús Espíritu Santo re. Uipota jei umeeta Espíritu Santo güirovia jese vae reta pe. Echa'ā ndei umee Espíritu Santo. Echa'ā Jesús ndei oo ye ara pe.

Yati vae reta uyeaca uyupii

⁴⁰ Cua uyandu yave, amocue joco pe ñugüiinoi vae jei:

—Cua cuimbae jocua Tumpa iñee umimbeu vae etei co.

⁴¹ īru vae reta jei:

—Cua cuimbae Cristo, Tumpa ombou vae co.

Ērei amocue vae jei:

—¿Galilea pegua ra Cristo?⁴² Echa'ā Tumpa iñee pe uyequatía oī Cristo co jae David iñemoñaa reta pegua jare Belén pegua co. Echa'ā David joco pegua vi co —jei reta.

⁴³ Jesús jei chupe reta vae jeco pegua, joco pe ñugüiinoi vae reta uyeaca uyupii.⁴⁴ Jare amocue vae uipota tēi uipisi Jesús, ērei uipisi'ā quía.

Mbaeti etei quía uyemingueta jucuarāi

⁴⁵ Jayave uyeyocui vae sacerdote reta itenondegua reta jare fariseo reta ombou vae reta yugüiraa ye jucuarāiño chupe reta. Jayave sacerdote reta itenondegua reta jare fariseo reta jei jembiocui reta pe:

—¿Maera pa Peru'ā?

⁴⁶ Jembiocui reta jei:

—Echa'ā mbaeti etei quía uyemingueta jocua cuimbae uyemingueta ramí.

⁴⁷ Jayave fariseo reta jei:

—¿Piyembitavica ma pa pe reta vi?⁴⁸ ¿Güirovia ma ra jese mburuvicha reta jare fariseo reta? Güirovia'ā penti ave —jei reta.—⁴⁹ Ērei cua jeta vae uicuua'ā mboroyocui pe uyequatía oī vae. Tumpa uiporaracata co chupe reta —jei reta.

⁵⁰ Jayave penti jae reta ipite pe oī vae jei īru reta pe - jae co Nicodemo jee vae - tenonde yave jae oo opou Jesús pe pītu yave:

⁵¹ —Mboroyocui pe uyequatía oī vae rupi yandepuere'ā ñaāa ipotave vae ndei yayapisaca jese mbove. Echa'ā yayapisaca jese yave, yaicuua mbae uyapo vae —jei.

⁵² īru reta jei chupe:

—¿Nde vi ra Galilea pegua? Ndeeca yave, ndicuaata mbaeti co penti ave Tumpa iñee umimbeu vae Galilea pegua —jei reta.

Cuña menda re uyuvanga vae

⁵³ Jayave opaete vae yugüiraa ye jenta jenta pe.

¹ Ērei Jesús oo ivitu guasu Olivos jee vae pe.

² Piareve pe neimbove asi Jesús oo ye Tumpa jo pe. Jayave jeta vae yugüeru jae oī vae pe, jare jae ugupi omboe reta oī.³ Jayave mboroyocui re oporomboe vae reta jare fariseo reta güeru penti cuña. Uipocou reta cuña menda re uyuvanga oī yave. Jayave oñono reta joco pe ñugüiinoi vae reta ipite pe.

⁴ —Oporomboe vae —jei reta Jesús pe —, cua cuña nduipocou menda re uyuvanga oī yave.

⁵ Mboroyocui pe Moisés yandeocui yayaucua vaerā cua nunga cuña reta ita pe. ¿Mbae pa ndere nde cua re? —jei reta.

⁶ Cua jei reta uicuua vaerā mbae ra jeita Jesús. Echa'ā uipota umbijeco. Jayave Jesús ipe jare uicuatiá mbae ivi re ipoāca pe.⁷ Jecuaecuae upirandu reta chupe cua re. Jayave Jesús uyemboi jare jei chupe reta:

—Mbaeti mbaeyoa güiñoipite pe vae rani tuyapi ita pe.

⁸ Jayave ipe ye jare uicuatiá ye mbae ivi re ipoāca pe.⁹ Ērei cua uyandu reta yave, ipia umbijeco jeco re jare yugüiraa joco güi penti penti rupi. Tenonde yugüiraa indechi vae reta. Jayave opaete vae

yugüíraa. Jaeño Jesús upita joco pe cuña jae jovai uyemboi oī vae ndive. ¹⁰ Jayave Jesús uyemboi ye umae jese, jare jei:

—¿Jama pa jocua cuimbae reta, cuña? ¿Mbaeti ma pa quía nembijeco?

¹¹ —Mbaeti quía, carai —jei cuña chupe.

Jayave Jesús jei:

—Che numbijeco'ā vi. Ecua, agüiye ye iyapo jocua mbaeyoa —jei.

Jesús co penti tembipe rami

¹² Cua jaicue rupi Jesús jei yati vae reta pe:

—Che co jae penti tembipe rami. Ayu co ivi pegua reta uecha cavi vaerā. Ico che ndive vae ndarau uguata pítumimbi pe. Echa'ā güinoita tecove ipuere vaerā uecha cavi —jei.

¹³ Jayave fariseo reta jei Jesús pe:

—Nemimbeu oreve vae ndarau ndugüirovia. Echa'ā nde nemari ndiyee —jei reta.

¹⁴ —Amimbeu ma peve vae pepuere perovia, yepe tēi chemiari peve chiyee —jei Jesús—. Echa'ā che aicuaa co queti güi ayu jare queti aa vae. Ërei pe reta picuaa'ā queti güi ayu jare queti aa vae.

¹⁵ Pe reta pepuruāa opaete ivi pegua reta upuruāa rami. Che aāa'ā quía —jei—. ¹⁶ Ërei apuruāa yave, apuruāa añete vae rupi. Echa'ā cheRu chembou. Jare che jare cheRu nupuruāa - cheiñol'ā co —jei—.

¹⁷ Peporoyoci pe uyecuatía oī cuarāi: ‘Mocui jei vae oyovaque yave, peroviata co.’ Jucuarāi uyecuatía oī —jei—. ¹⁸ Chemiari peve chiyee jare cheRu chemimbeu peve - jae co chembou —jei.

¹⁹ Jayave judío reta jei:

—¿Quiape pa oī nde Ru?

—Pe reta checuaa'ā jare picuaa'ā cheRu —jei Jesús chupe reta—. Checuaa yave mona, cheRu picuaata tēi co vi —jei.

²⁰ Cua jei Jesús Tumpa jo pe corepoti Tumpa pegua jiru reta ñugüinói vae pe. Echa'ā joco pe oporomboe. Ërei uipisi'ā quía. Echa'ā ndei uvāe uyepisi vaerā.

Pe reta ndarau pepuere peo che aata vae pe

²¹ Jare Jesús jei ye chupe reta:

—Aata ma cua güi. Pe reta chercata co, Ërei pemanota pumbaeyoa uyembai mbae reve. Pe reta ndarau pepuere peo che aata vae pe —jei.

²² —¿Uyeyucata ra? —jei judío reta—. Echa'ā jei ma: ‘Pe reta ndarau pepuere peo che aata vae pe.’

²³ Jayave Jesús jei:

—Pe reta ivi pegua co, Ërei che ara pegua co. Pe reta ivi pegua co, Ërei che ivi pegua'ā co. ²⁴ Amimbeu ma peve pemanota pumbaeyoa uyembai mbae reve. Echa'ā pemanota co pumbaeyoa uyembai mbae reve, perovia'ā yave che co jae vae —jei.

²⁵ Jayave jei reta Jesús pe:

—¿Quía pa co nde?

—Jocua tenonde güive amimbeu ma peve vae —jei Jesús—. ²⁶ Jeta mbaembae re chepuere chemiari peré jare jeta mbae re chepuere puāa. Ërei chembou vae imiari añete vae re, jare amimbeu ivi pegua reta pe chembou vae umimbeu cheve vae —jei.

²⁷ Jae reta uicuaa'ā Jesús imiari chupe reta Tu ara pe oī vae regua. ²⁸ Jayave Jesús jei:

—Pe reta chereupi ma curusu re yave - che ayeyapo cuimbaerā vae - picuaata che co jae. Ayapo'ā mbae che aipota ayapo rupiño. CheRu umimbeu cheve vae rupiño chemiari —jei—. ²⁹ Jare chembou vae ico che ndive. Chereya'ā cheiñol'ā aico vaerā. Echa'ā jecuaeño ayapo jae uipota vae rupi —jei.

³⁰ Jare Jesús imiari yave, jeta vae güirovia jese.

Añete vae peyorata co

³¹ Jayave Jesús jei jocua judío güirovia jese vae reta pe:

—Jecuaeño piyapo yave che jae peve piyapo vaerā vae, picota co cheremimboe retarā añetete vae.

³² Jare picuaata añete vae, jare añete vae peyorata co —jei.

³³ Judío reta jei chupe:

—Abraham iñemoñaa reta co ore. Mbaeti etei nduyeyocui quía pe. ¿Maera pa ndere nduyeyorata co? —jei reta.

³⁴ —Añete che jae peve —jei Jesús—, iyoa vae uyeyocui oī mbaeyoa pe. ³⁵ Uyeyocui vae ipuere'ā ico ete tenta pe. Ërei tenta iya taí jecuaeño ico tenta pe —jei—. ³⁶ Che co jae Tumpa Tai. Che poyora yave mbaeyoa güi, añetete piyeyora ma co —jei—. ³⁷ Che aicuaa Abraham iñemoñaa reta co pe reta. Ërei pipota cheyuca, pipota'ā piyapo che jae peve piyapo vaerā vae ramo —jei—. ³⁸ Chemiari peve cheRu ndive aico yave aecha vae re, jare pe reta piyapo Peru umimbeu peve piyapo vaerā vae rupi —jei Jesús.

Aña guasu co jae Peru

³⁹ —Abraham co jae oreru —jei reta.

—Pe reta Abraham tai reta añetete vae yave mona —jei Jesús—, piyapota tēi co Abraham uyapo vae rami.⁴⁰ Êrei añave pipota cheyuca, yepe tēi amimbeu ma peve añete vae. Jae co Tumpa umimbeu cheve vae. Cuarāi'ā uyapo Abraham —jei—.⁴¹ Pe reta piyapo peī peru iparavíqui —jei Jesús chupe reta.

—Oremiñemoña'ā co aguasa pe oreru reta —jei reta—. Tumpaño co jae oreRu.

⁴² Jayave Jesús jei chupe reta:

—Tumpa co jae peRu yave mona, pe reta cherauta tēi co. Echa'ā che ayu Tumpa güi. Che Tumpa pegua co. Che aipota ramoño'ā co ayu. Jae co chembou —jei—.⁴³ ¿Maera pa picuua'ā amimbeu peve vae? Pipota'ā piyapisaca chiñee re. Jáeramo picuua'ā —jei Jesús—.⁴⁴ Aña guasu co jae peru, jare pe reta pipota piyapo Peru uipota vae rupi. Peru jecuaeño upuruyuca ico, jare uyapo'ā etei añete vae rupi. Echa'ā añetete vae pegua'ā co. Jae co aña guasu. Jáeramo jecuaeño iyapu. Echa'ā jae co iyapu vae jare omboe ivi pegua reta iyapu vaerā —jei—.⁴⁵ Êrei pe reta chererovia'ā, añete vae amimbeu peve ramo —jei—.⁴⁶ Mbaeti penti yepe pepuere pere cheve: ‘Ndeyoa co.’ Echa'ā che amimbeu peve añete vae. ¿Maera pa chererovia'ā? —jei—.⁴⁷ Tumpa tai reta uyapisaca Tumpa iñee re. Pe reta Tumpa tai reta'ā co. Jáeramo piyapisaca'ā jese —jei.

Cristo icōño mai

⁴⁸ Jayave judío reta jei:

—Ndoe ma nde co jae penti Samaria pegua, jare aña oya ma nderé. Añete co cua ndoe vae —jei reta.

⁴⁹ —Oya'ā co cheré aña —jei Jesús—. Che aipiu aī cheRu, êrei pe reta chereriro.⁵⁰ Êrei aipota'ā ivi pegua reta chembutuicha vaerā. Ime co quía uipota chembutuichaca vae. Jae upuruāata co —jei Jesús—.⁵¹ Añete che jae peve, uyapo che jae chupe uyapo vaerā vae ndarau umano —jei.

⁵² Jayave judío reta jei Jesús pe:

—Añave nduicuua ma aña oya co nderé. Abraham jare Tumpa iñee aracae umimbeu vae reta umano. Êrei nde ndere: ‘Uyapo che jae chupe uyapo vaerā vae ndarau umano.’⁵³ ¿Tuicha ete pa nembaepuere yandetenondegua Abraham imbaepuere güi? Echa'ā Abraham umano. Jae ramíño vi Tumpa iñee aracae umimbeu vae reta umano. ¿Quía pa co nde? ¿Mbae pa ndere ndiyee? —jei reta Jesús pe.

⁵⁴ —Ayembutuicha'ā co —jei Jesús—. Echa'ā jucuarāi ayapo yave, jocua nunga yembutuicha mbae'ā co. Êrei cheRu chembutuichaca, jare pe reta pere Tumpa co jae peRu —jei—.⁵⁵ Êrei pe reta picuua'ā Tumpa. Che aicuua co. Che jae yave: ‘Aicuua'ā’, cheaputa tēi co pe reta peapu ramí. Êrei aicuua co, jare ayapo jei cheve ayapo vaerā vae —jei—.⁵⁶ Petenondegua Abraham uyerovia cherechata ramo. Cherecha co jare uyerovia —jei.

⁵⁷ Jayave judío reta jei chupe:

—Nde ndei nenoí cincuenta año. ¿Quirāi pa ndepuere ndere ndeecha co Abraham? —jei reta.

⁵⁸ —Añete che jae peve —jei Jesús—, ndei Abraham ico mbove, che imeño mai aico —jei.

⁵⁹ Jayave judío reta omonoo ita reta uyapi vaerā tēi Jesús. Êrei Jesús uasa jae reta ipite rupi oē Tumpa jo güi, jare jae reta uecha'ā ma.

9

Jesús umbigüera jesa mbae vae

¹ Jare Jesús uasa oo yave, uecha penti cuimbae jesa mbae vae. Cua cuimbae jucuarāi ico ichi güi oa güive. ² Jayave Jesús jemimboe reta upirandu Jesús pe:

—Oporamboe vae, ¿quía pa iyoa, ichi güi oa yave jesa mbae vaerā? ¿Iyoa pa jae etei? ¿Iyoa pa tu jare ichi? —jei reta.

³ —Jae imbaeyoa jeco pegua'ā co jare tu jare ichi imbaeyoa jeco pegua'ā co cuarāi oī —jei Jesús—. Cuarāi oī Tumpa imbaepuere uyecuua vaerā ucuera yave —jei—.⁴ Icavi co ayapo vaerā ara rupi chembou vae iparavíqui. Echa'ā ara rupi ñanoi tembipe. Êrei outa pítu, jare pítu yave mbaeti quía ipuere uparavíqui —jei—.⁵ Cua ivi pe aico rambueve, che co jae penti tembipe ramí. Ayu co ivi pegua reta uecha cavi vaerā —jei.

⁶ Cua jei ma yave, undiví ivi re jare jocua güi uyapo tuñuu. Jayave oñono tuñuu cuimbae jesa re. ⁷ Jayave jei chupe:

—Ecua iyoa nderesa i Siloé pe.

(Cua Siloé uipota jei: “Uyemondo”.) Jayave cuimbae oo oyoe jesa jare ou ye yave, umae ma.⁸ Jayave cuimbae jenta iyipi rupiugua reta jare íru vae reta tenonde uecha uyerure oī corepoti re vae jei:

—¿Jae'ā ra cua uguapí uyerure corepoti re vae?

⁹ Amocue vae jei:

—Jae co.

Íru vae reta jei:

—Jae'ā co. Êrei jae echá ete vae co.

Êrei cuimbae jei:

—Che co jae.

¹⁰ Jayave jei reta chupe:

—Quiräi pa añave ndepuere nemae?

¹¹ —Jocua cuimbae Jesús jee vae uyapo tuñuu oñono cheresa re —jei cuimbae chupe reta—. Jayave jei cheve: ‘Ecua Siloé pe iyoe nderesa’ —jei cheve, jei—. Jáeramo aa ayoe cheresa, jare amae ma —jei.

¹² —¿Quiape pa ime oí? —jei reta.

—Aicuua'ã —jei cuimbae chupe reta.

Fariseo reta upirandu cuimbae ucuera vae pe

¹³ Jayave jae reta güüraa fariseo ñugüünoi vae pe cuimbae tenonde yave jesa mbae ico vae. ¹⁴ Jare jocua ara mbutuu ara co. Echa'ã jocua ara Jesús uyapo tuñuu umimae vaerã cuimbae. ¹⁵ Jayave fariseo reta vi upirandu cuimbae pe quiräi ra ipuere umae.

—Oñono tuñuu cheresa re —jei cuimbae—. Jayave ayoe cheresa, jare amae voi —jei.

¹⁶ Amocue fariseo reta jei:

—Tumpa pegua'ã co cua cuimbae. Echa'ã uyapo mbutuu ara pe mboroyocui pe jei agüiye yayapo vaerã vae.

Êrei íru fariseo reta jei:

—¿Quiräi ra ipuere cuimbae iyoa vae uyapo cua nunga miacañi?

Jare uyeaca reta uyupii. ¹⁷ Jayave jei reta ye cuimbae tenonde yave jesa mbae ico vae pe:

—¿Mbae pa ndere nde jocua nemimae vae re?

—Jae co penti Tumpa iñee umimbeu vae —jei chupe reta.

¹⁸ Judío reta güürovia'ã cua cuimbae tenonde yave jesa mbae ico vae co. Güürovia'ã vi jaeramo co umae. Jáeramo uenica cuimbae umae ma vae tu jare ichi. ¹⁹ Jayave upirandu reta tu jare ichi pe:

—¿Jae pa co cua nderai jesa mbae co oa pere chupe vae? ¿Quiräi pa añave umae?

²⁰ —Aicuua jae co cheraí jesa mbae oa ichi güii vae —jei chupe reta—. ²¹ Êrei nduicuua'ã quiräi ra añave umae. Nduicuua'ã vi quía ra umimae. Pepirandu chupe. Echa'ã ucuacuua ma co jae. Jae etei ipuere umimbeu peve —jei.

²² Jucuaräi jei cuimbae tu jare ichi, uquiyé judío reta güü ramo. Echa'ã judío reta jei ma uyupe: “Jocua Jesús co jae Crísto jei vae tuyemombo yandetupao güü.” ²³ Jáeramo tu jare ichi jei: “Ucuacuua ma co jae. Pepirandu chupe.”

²⁴ Jayave judío reta ueni ye cuimbae tenonde yave jesa mbae ico vae.

—Emimbeu cavi oreve Tumpa jovaque —jei reta chupe—. Echa'ã nduicuua cua cuimbae iyoa vae co.

²⁵ —Aicuua'ã iyoa vae ra jae —jei cuimbae—. Êrei cua co aicuua: Tenonde yave cheresa mbae aico vae co, añave amae.

²⁶ Jayave upirandu reta ye chupe:

—¿Mbae pa uyapo ndeve? ¿Quiräi pa nemimae?

²⁷ —Amimbeu ma peve —jei cuimbae—, êrei pipota'ã piyapisaca cheré. ¿Maera pa pipota piyandu ye? ¿Pipota pa pe reta vi piyeyapo jemimboe retarä? —jei.

²⁸ Jayave judío reta uñengata cuimbae pe.

—Nde co jae jemimboe —jei reta—. Ore co jae Moisés jemimboe reta. ²⁹ Ore nduicuua Tumpa umingueta co Moisés. Êrei nduicuua'ã quía pegua ra cua cuimbae —jei reta.

³⁰ —Cua co penti miacañi —jei cuimbae—. Pe reta picuua'ã quía pegua ra. Êrei jae chemimae.

³¹ Yaicuua Tumpa uyapísaca'ã iyoa vae reta re. Êrei ime yave quía umbiadura Tumpa jare uyapo Tumpa jei vae, Tumpa uyapísaca jese —jei—. ³² Iví uyeyapo güive mbaeti etei quía ipuere umimae jesa mbae oa ichi güii vae —jei—. ³³ Tumpa pegua'ã yave cua cuimbae, ipuereta'ã tēi mbae uyapo —jei.

³⁴ Jayave judío reta jei chupe:

—Nde ndea ndesi güü ndeyoа reve. Mbaeti mbae re ndepuere oremboe —jei reta.

Jayave omombo reta cuimbae.

Tumpa cotí jesa mbae vae reta

³⁵ Jare Jesús uicuua yave judío reta omombo ma cuimbae, oo ueca. Jare ooväiti yave, jei chupe:

—¿Nderovia pa cuimbaerã uyeyapo vae re?

³⁶ —¿Quía pa co jae, carai? —jei Jesús pe—. Emimbeu cheve, arovia vaerã jese.

³⁷ —Ndeecha ma —jei Jesús chupe—. Che ayemingueta aí nde ndive vae co jae.

³⁸ —CheYa, arovia ma —jei cuimbae.

Jayave cuimbae uyeatíca Jesús jovai jare umbiadura. ³⁹ Jayave Jesús jei:

—Ayu iví pe ambiyao vaerã uyugüi iví pegua reta. Ayu ipuere mbae umae vae reta umae vaerã, jare ipuere umae vae reta agüiye vaerã umae —jei.

⁴⁰ Amocue fariseo reta joco pe ñugüïnnoi vae uyandu cua, jare upirandu chupe:

—¿Ore vi pa co jae umae mbae vae reta?

⁴¹ —Pemae'ã yave, mbaetita tēi teco penoi —jei Jesús—. Ërei pere ma: ‘Numae.’ Jáeramo teco imeño penoi —jei.

10

Jesús umijaanga ovecha-rocaí

¹ —Añete che jae peve —jei Jesús—, imonda vae uique'ã onque rupi ovecha-rocaí pe. Uique icoti'ã rupi. Echa'ã uipota oñomi güïraa ambie vae iovecha reta —jei—. ² Ërei ovecha iyandarecoa uique onque rupi —jei—. ³ Jare ovecha iyandarecoa uipota uique yave, onque jároa uipea chupe. Jare ovecha reta uyandu iyandarecoa iñee. Echa'ã iyandarecoa ueni ovecha reta jee rupi jare güïraa ovecha-rocaí güi —jei—. ⁴ Jare güïraa yave opaete imbae reta ovecha-rocaí güi, jae oo tenonde jare ovecha reta yugüïraa jaicue. Echa'ã uicuua iñee —jei—. ⁵ Ndarau yugüïraa cuimbæ uicuua mbae vae jaicue. Osita chugüi. Echa'ã uicuua'ã iñee —jei—.

⁶ Cua ñee umijaanga vae pe Jesús omboe reta tēi, ërei jae reta uicuua'ã mbae re ra umijaanga cua jei chupe reta vae.

Jesús co jae ovecha reta iyandarecoa icavi vae rami

⁷ Jayave Jesús jei:

—Añete che jae peve, che co jae ovecha-rocaí jonque rami. ⁸ Amocue vae yugüeru ndei ayu mbove. Ërei ovecha reta uyapo'ã jocua reta jei vae. Echa'ã jocua reta imonda vae reta co. Jae reta uipota güïraa ambie vae iovecha reta —jei—. ⁹ Che co jae onque rami. Che rupi ovecha-rocaí pe uique vae uyembiasacata co. Uiqueta jare oëta jare uväeta mbae jou vaerä —jei Jesús—. ¹⁰ Imonda vae ou güïraa vaerä ambie vae iovecha reta. Ou uyuca vaerä ovecha reta. Che ayu ivi pegua reta güïnoi vaerä tecove opa mbae vae, jare jocua tecove güïnoi yave tuicha uyeroviata —jei—. ¹¹ Che co jae ovecha reta iyandarecoa icavi vae rami. Echa'ã ovecha reta iyandarecoa icavi vae umano ovecha reta uepi vaerä —jei—. ¹² Jepi re ovecha reta re uyandareco vae uecha yave yaguapítä ou, ueya ovecha reta jare osi. Echa'ã jae'a co ovecha reta iyandarecoa añetete vae, jare ovecha reta imbae'ã. Jayave yaguapítä ou uipisi amocue ovecha reta, jare íru ovecha reta opa uñemíai. ¹³ Jocua cuimbae osi jepi reño uyandareco ovecha reta re ramo. Echa'ã ipiatití'ã ovecha reta uiporara yave —jei—.

¹⁴ Che co jae ovecha reta iyandarecoa icavi vae rami. Aicuua cheovecha reta jare cheovecha reta checuaa —jei Jesús—. ¹⁵ Jucuaräi cheRu checuaa jare che aicuua cheRu. Jare che amanota ovecha reta aepi vaerä —jei—. ¹⁶ Jare ime anoi íru ovecha reta. Jae reta cua pegua'ã co. Jae reta aruta vi. Jae reta uyapisacata chiñee re. Jayave imeta penti ati jare penti ovecha reta iyandarecoa —jei—.

¹⁷ CheRu cheru amanota ramo. Amanota co, cherecove anoi ye vaerä —jei—. ¹⁸ Mbaeti quía ipuere uequi chegüi cherecove. Amanota aipota ramo. Chepuere amee cherecove amano vaerä, jare chepuere anoi ye. Cuaräi cheocui cheRu —jei—.

¹⁹ Jesús cua jei ramo, judío reta uyeaca ye uyupii. ²⁰ Jeta jae reta jei:

—Aña oya ma jese. Uicuua'ã ma mbae jei. ¿Maera pa piyapisaca jese?

²¹ Íru vae reta jei:

—Mbaeti quía aña oya jese vae ipuere uyemingueta jucuaräi. Ipuere'ã etei aña umimae jesa mbae vae reta —jei reta.

Judío reta güiríro Jesús

²² Roi ma Jerusalén pe, jare judío reta uyapo ñugüïnnoi fiesta imandúa vaerä Tumpa jo uyepiu ye yave. ²³ Jare Jesús uguata Tumpa jo pe oca Salomón jee vae rupi. ²⁴ Jayave judío reta uyembati Jesús iyipi rupi jare jei:

—¿Quiräi yave pa nemimbeu cavita oreve, agüiye vaerä orembopa? Nde co jae Cristo yave, emimbeu cavi oreve —jei reta.

²⁵ —Amimbeu ma peve —jei Jesús—, ërei perovia'ã chiñee. CheRu chembou cua mbaravíquí ayapo vaerä, jare cua mbaravíquí uicuuaaca quía co che —jei—. ²⁶ Amimbeu ma peve pe reta cheovecha'ã co. Jáeramo perovia'ã cheré. ²⁷ Cheovecha reta uyapisaca chiñee re. Aicuua cheovecha reta, jare jae reta yugüïraa cheräicue rupi —jei—. ²⁸ Jare amee chupe reta tecove opa mbae vae, jare ndarau etei oo cañitei pe. Mbaeti quía ipuere upíro chegüi —jei—. ²⁹ CheRu umee ma cheve cua reta, jare cheRu imbaepuere tuicha ete opaete vae imbaepuere güi. Jare mbaeti quía ipuere upíro cheRu güi —jei—. ³⁰ Che jare cheRu pentiño co —jei—.

³¹ Jayave judío reta omonoo ye ita reta uyapi vaerä tēi Jesús. ³² Jayave Jesús jei chupe reta:

—Aechaca ma peve jeta mbaravíquí icavi vae. Cua ayapo cheRu imbaepuere rupi. ¿Mbae nunga mbaravíquí jeco pegua pa pipota cheapi ita pe? —jei—.

³³—Penti mbaravíquí icavi vae jeco pegua'á —jei judío reta chupe—. Nde ndere icavi mbae vae Tumpa coti. Jocua jeco pegua nduyapita ita pe. Echa'á ndere co jae penti cuimbaeño, ñrei ndere ndiyupe nde co jae Tumpa vae —jei reta.

³⁴ Jayave Jesús jei chupe reta:

—Mboroyocui penoi vae pe uyecuatía oí quirái Tumpa jei cuarái: ‘Pe reta co jae tumpa reta.’ Jucuarái jei. ³⁵ Echa'á Tumpa iñee oí chupe reta vae pe, jae etei umbijee tumpa reta. Jare Tumpa iñee pe uyecuatía oí vae jecuaeño co añete. ³⁶ Jáeramo ¿maera pa pere cheve: ‘Nde ndere icavi mbae vae Tumpa coti’, che jae vae jeco pegua? Echa'á che jae: ‘Che co jae Tumpa Taí.’ Echa'á Tumpa cheñono tee cua mbaravíquí ayapo vaerá, jare jae chembou cua iví pe —jei—. ³⁷ Ayapo'á yave mona cheRu iparavíquí, agüüyeta tēi chererovia. ³⁸ Ñrei ayapo co cheRu iparavíquí. Jáeramo yepe tēi chererovia'á, perovia mbaravíquí ayapo vae cheRu pegua co, picuua vaerá cheRu ico che ndive jare che aico cheRu ndive —jei.

³⁹ Jayave judío reta uipota ye tēi uipisi Jesús, ñrei jae oo chugüi reta.

⁴⁰ Jare Jesús oo ye i Jordán jovalcho pe tenonde yave Juan upurumbibautiza oí vae pe, jare joco pe upita. ⁴¹ Jare jeta vae reta yugüeru jae oí vae pe jare jei:

—Juan uyapo'á penti ave miacañi. Ñrei opaete Juan jei cua cuimbae re vae añete co —jei reta.

⁴² Jare jeta vae güürovia Jesús re joco pe.

11

Lázaro imano

¹ Penti cuimbae Lázaro jee vae imbaerasi oí. Jae jare María jare Marta - jae co María tíque - Betania pegua reta co. ² Jocua María upiyere mbae ipiche cavi vae yandeYa re jare umitini ipí ía pipe. Jocua Lázaro imbaerasi oí vae María iquivi co. ³ Jare Lázaro jindí reta omondo umimbeu vaerá Jesús pe:

—OreYa, imbaerasi oí cua ndeau vae.

⁴ Jesús cua uicuua yave, jei:

—Cua imbaerasi oí chupe íru vae reta umbiadora vaerá Tumpa. Ou'á jae umano vaerá. Echa'á che co jae Tumpa Taí, jare íru vae reta chembiadadora cua mbaerasi jeco pegua —jei.

⁵ Jesús uau Marta jare ipiquíi jare Lázaro. ⁶ Ñrei uicuua ma yave Lázaro imbaerasi oí, upitaño mocuia joco pe. ⁷ Cua jaicue rupi jei jemimboe reta pe:

—Yaa ye ma Judea pe.

⁸ —Opromboe vae —jei reta—, ndei co ima judío reta uipota tēi ndeapi ita pe joco pe. Jáeramo ¿maera pa ndeo yeta?

⁹ —Ime doce ora güünoi ara —jei Jesús—. Ara rupi uguata vae ndarau ipí güürocua. Echa'á güünoi tembipe cua iví pegua —jei—. ¹⁰ Ñrei pítu yave uguata vae ipí güürocua. Echa'á güünoi'á tembipe.

¹¹ Jucuarái jei Jesús. Jayave jei:

—Ñaneamigo Lázaro oque ma oí. Ñrei che aata amomba —jei.

¹² Jemimboe reta jei:

—OreYa, oque oí yave, ucuera yeta co.

¹³ Ñrei Jesús jucuarái jei yave, uipota jei umano ma. Jae reta ipia pe uyeminguela tēi uipota jei uputuuño oque oí. ¹⁴ Jayave Jesús umimbeu cavi chupe reta:

—Lázaro umano ma. ¹⁵ Jare ayerovia joco pe aí'á vae re. Cua icavita co peve. Echa'á peroviata co. Yaa ma icoti —jei.

¹⁶ Jayave Tomás - jae co Choguaquiri pe uyembijee vae - jei íru Jesús jemimboe reta pe:

—Yaa vi yande, ñamano vaerá jae ndive.

Jesús co jae tecove umee vae

¹⁷ Jare Jesús ou uvae yave, amocue vae umimbeu chupe irundi ara ma co Lázaro oí teögüeriru pe. ¹⁸ Betania coíño oí Jerusalén güii. Uepiti penti legua seri rupi. ¹⁹ Jare jeta judío reta yugüeru ma Marta jare María ipí umbiapacatu vaerá iquivi amiri re. ²⁰ Jare Marta uicuua yave Jesús ou co uvae, oo ooväiti. Ñrei María upita tenta pe. ²¹ Jayave Marta jei Jesús pe:

—CheYa, nde mona cua pe neñ yave, umanota'á tēi chequivi. ²² Jare añave aicuua ipotave mbae ndiyerure Tumpa pe jese vae Tumpa umeeta co ndeve —jei.

²³ —Ndequivi icove yeta co ou umanocue vae reta ipite güii —jei Jesús chupe.

²⁴ —Aicuua icove yeta co ou umanocue vae reta ipite güii ara taicuegua vae pe —jei Marta—. Echa'á jocua ara íru vae reta vi icove yeta yugüeru umanocue vae reta ipite güii —jei.

²⁵ —Che co amee tecove umanocue vae reta pe jare aru ye íru umanocue vae reta ipite güii —jei Jesús —. Cheré güürovia vae, yepe tēi umano oí, icove yeta co. ²⁶ Jare opaete icove oí vae cheré güürovia vae ndarau etei umano. ¿Nderovia pa cua? —jei.

²⁷ —Arovia, cheYa —jei Marta—. Añave arovia nde co jae Cristo. Nde co jae Tumpa Tai. Echa'ã Tumpa iñee pe uyeucuatá oĩ outa co Tumpa Tai ivi pe —jei.

Jesús uyao

²⁸ Marta cua jei ma yave, oo ueni María - jae co Marta ipiqui. Jayave güíraa íru vae reta ipite güi jare jei chupe:

—Oporamboe vae cua pe oĩ jare uiporta ndeo vaerã jae oĩ vae pe.

²⁹ María cua uyandu yave, imambae upüa oo Jesús oĩ vae pe. ³⁰ Marta ooväiti vae peño upita Jesús. Echa'ã ndei uique tenta guasus-rai pe. ³¹ Tenta pe judío uyemingueta ñugüinoi María ndive umbipiácatu vaerã vae reta uecha María imambae upüa oo tenta güi. Jayave yugüíraa María jaicue. Echa'ã ipia pe uyemingueta tẽi jae oo teögüeriru oĩ vae pe uyao vaerã joco pe.

³² Jayave María oo uvæ Jesú oĩ vae pe. Uecha rupive oo uyeatíca jae jovai jare jei:

—CheYa, nde mona cua pe neñ yave, umanota'ã tẽi chequivi.

³³ Jesús uecha yave María jare judío María ndive yugüeru vae reta uyao ñugüinoi, iañeequi jare tuicha ipiatiti. ³⁴ Jayave upírandu:

—¿Quíape pa piñono?

—Eyu eecha, carai —jei reta chupe.

³⁵ Jayave Jesús uyao. ³⁶ Jare judío reta jei:

—Mase, uau ete co.

³⁷ Ërei amocue vae jei:

—¿Ipuere'ã ra uyapo mbae cua cuimbae agüiye vaerã umano tẽi Lázaro? Echa'ã umimae cuimbae jesa mbae vae.

Lázaro icove ye

³⁸ Jesús iañeequi ye. Jayave oo teögüeriru oĩ vae pe. Jocua teögüeriru penti itape uyeyoo vae co jare ita tuicha vae oĩ teögüeriru jonque re. ³⁹ Jayave Jesús jei:

—Pembisiri ita joco güi.

Marta - jae co cuimbae amiri jindi - jei chupe:

—CheYa, ine ma co. Echa'ã irundi ara ma oĩ umano güive —jei.

⁴⁰ Jesús jei chupe:

—Amimbeu ma ndeve nderovia yave ndeephata mbae ayapota íru vae reta umbiadora vaerã Tumpa.

⁴¹ Jayave umbisiri reta ita teögüeriru jonque güi. Jayave Jesús umae ara coti jare jei:

—CheRu, amee yasurupai ndeve nde ndiyandu cheve vae re. ⁴² Aicuua jecuaeño ndiyandu cheve, ërei jae cuarãi cua cheyipí rupi ñugüinoi vae reta jeco pegua, jae reta güirovia vaerã nde co chembou vae —jei.

⁴³ Jayave iñeeäta.

—Lázaro, eë joco güi —jei.

⁴⁴ Jare cuimbae amiri oë. Ipo jare ipi uyeyocua tarapo pe, jare jova uñenoma nieso pe. Jayave Jesús jei:

—Piyora iyocuua. Pemaño tunguata —jei.

Uyemboemboe reta uyucaca vaerã Jesús

(Mt 26.1-5; Mr 14.1-2; Lc 22.1-2)

⁴⁵ Jare jeta judío yugüeru opou María ipi vae reta uecha Jesús uyapo vae jare güirovia jese. ⁴⁶ Ërei amocue vae yugüíraa fariseo reta pe umimbeu Jesús uyapo vae. ⁴⁷ Jayave sacerdote reta itenondegua reta jare fariseo reta umbati opaete mburuvicha reta.

—¿Mbae pa yayapata? —jei reta—. Cua cuimbae jecuaeño uyapo jeta miacañi reta. ⁴⁸ Ñamaño yave cuarãi uyapo vaerã, opaete vae reta güiroviata jese. Jayave romano reta yugüeruta umbusururu Tumpa jo jare uyucata opaete ñanerentraigua reta —jei reta.

⁴⁹ Ërei penti ipite pe oĩ vae - Caifás jee vae - jae co sacerdote tenondegua jocua año - jei:

—Picuua'ã etei mbae. ⁵⁰ Pepia pe piyemingueta cavi'ã. Echa'ã icavita co yandeve penti cuimbae umano vaerã opaete vae reta ipepica pe. Echa'ã jucuarã'ã yave, aramoí opaete vae reta umanota —jei.

⁵¹ Jare cua umimbeu chupe reta ndei uyeyapo mbove. Umimbeu'ã jaeiño. Echa'ã jae sacerdote tenondegua co jocua año. Umimbeu Jesús umanota opaete judío reta ipepica pe. ⁵² Umanota umbati vaerã opaete Tumpa tai uñiemai vae reta - umanota'ã judío reta reño. ⁵³ Jáeramo jocua ara güive uyemboemboe quirãi uyucaca vaerã Jesús.

⁵⁴ Jáeramo Jesús upita'ã ma Judea pe, agüiye vaerã judío reta uecha. Oo joco güi penti tenta guasu Efraín jee vae pe. Jocua tenta guasu coiño oĩ ñana güi. Jare joco pe Jesús upita jemimboe reta ndive.

⁵⁵ Jare coiño ma ou judío reta ifiesta pascua jee vae, jare jeta judío reta yugüíraa Jerusalén pe joco güi ndei pascua iara ou uvæ mbove. Echa'ã uiporta uyeyoe Tumpa coti fiesta peguarã. ⁵⁶ Jayave ueca ñugüinoi Jesús, jare Tumpa jo pe ñugüinoi rambueve jei uyupe:

—¿Mbae pa pepia pe piyemingueta? ¿Ndaraus ra ou cua fiesta pe? —jei reta.

⁵⁷ Echa'ā sacerdote reta itenondegua reta jare fariseo reta oyocui ma opaete vae cuarāi: “Ime yave quía uicuas quiapé Jesús imo oī vae, tumimbeu oreve orepure nduipisi vaerā.”

12

María upiyere mbae ipiche cavi vae Jesús ipi re

(Mt 26.6-13; Mr 14.3-9)

¹ Seis araoño ma uata pascua uvāe vaerā. Jayave Jesús oo ye Betania pe. Echa'ā joco pe ico Lázaro tenonde yave umano vae Jesús umbijecove ye güeru umanocue vae reta ipite güi vae. ² Piñu ma yave Lázaro jenta pegua reta uyapo Jesús jou vaerā. Marta güeru tembiú, jare Lázaro uguapi ucaru mesa pe Jesús ndive. ³ Jayave María güeru penti libra mbae ipiche cavi vae nardo jee vae jepi ete vae jare upiyere Jesús ipi re. Jayave umitini ipi ía pípe. Jare opaete o ipiche cavi. ⁴ Jayave penti Jesús jemimboe Judas Iscariote jee vae - jae co Simón tai - jae co umeeta Jesús joaicho reta pe vae - jei:

⁵ —¿Maera pa umee'ā cua mbae ipiche cavi vae trescientos ara mbaravíqui jepi pegua pe? Echa'ā ipureta tēi co umee corepoti iparavete vae reta pe —jei.

⁶ Ërei jae ipiatit'ā iparavete vae reta re. Echa'ā jucuarāi jei imonda ramo. Echa'ā jae güiñoi corepoti íru vae reta umee chupe reta vae jiru, jare jecuaeño uequi viari chugüi corepoti iyupeguarā. ⁷ Jayave Jesús jei:

—Emaeño jese. Penti ara añeñoticata co. Jocua ara peguarā uñuvatu cua mbae ipiche cavi vae —jei—.

⁸ Iparavete vae reta yugüirecoñotai co pe reta ndive. Ërei che ndaraus aicoño pe reta ndive —jei.

Uyemingueta reta uyucaca vaerā Lázaro

⁹ Jare jeta judío reta uicuas Jesús joco pe oī. Jáeramo yugüeru. Jare yugüeru'ā Jesús joco pe oī ramoño. Ërei yugüeru vi umae vaerā Lázaro re. Echa'ā Jesús umbijecove ye Lázaro güeru umanocue vae reta ipite güi. ¹⁰ Jayave sacerdote reta itenondegua reta uyemingueta vi quirāi uyucaca vaerā Lázaro. ¹¹ Echa'ā Lázaro jeco pegua jeta judío reta yugüiraa chugüi reta. Echa'ā güirovia ma Jesús re.

Jesús uique Jerusalén pe

(Mt 21.1-11; Mr 11.1-11; Lc 19.28-40)

¹² Piáreve pe jeta ete pascua pe yugüeru ma vae uicuas Jesús outa ma co Jerusalén pe. ¹³ Jayave uequi reta carandai joquí yugüiraa oovāiti vaerā Jesús.

—¡lcavi co! —jei reta—. Tuyembidoraca yandeYa jee re ou vae. Tuyembidoraca Israel pegua reta juvicha guasu —jei reta.

¹⁴ Jare Jesús uvāe penti mburica tairusu vae, jare opo jese. Echa'ā Tumpa iñee pe uyecuatía oī cuarāi:

¹⁵ Agüiye pequiyé, Jerusalén pegua reta.

Mase, co ou ma peruvicha guasu.

Opo ou mburica taírusu vae re. Jucuarāi uyecuatía oī.

¹⁶ Jocua ara Jesús jemimboe reta uicuas cavi'ā cua regua. Ërei Jesús oo ye ma ara pe yave, imandúa reta cua re. Echa'ā jucuarāi Tumpa iñee pe uyecuatía oī jese, jare jucuarāi uyeyapo chupe.

¹⁷ Jare amocue joco pe ñugüinoi vae jei:

—Ore noī Jesús ndive, jae umbijecove ye yave Lázaro güeru umanocue vae reta ipite güi jare oyocui oē vaerā teögüeríru güi —jei reta.

¹⁸ Jáeramo jeta vae yugüiraa oovāiti Jesús. Echa'ā uicuas ma uyapo cua miacañi. ¹⁹ Jayave fariseo reta jei uyupe:

—Mase, mbaeti mbae yandepuere yayapo. Echa'ā opaete que rupi rupigua reta yugüiraa umae vaerā jese.

Griego reta ueca Jesús

²⁰ Jare amocue griego reta yugüeru ma pascua pe íru vae reta ndive umbiadora vaerā Tumpa. ²¹ Jare reta yugüeru Felipe Betsaida pegua pe - jocua Betsaida Galilea pegua co - jare jei chupe:

—Carai, nduipota nduecha Jesús.

²² Jayave Felipe oo umimbeu Andrés pe. Jayave mocui reve yugüiraa umimbeu Jesús pe. ²³ Jayave Jesús jei:

—Ara uvāe ma che ayeyapo cuimbaerā vae ayembidoraca vaerā. ²⁴ Añete che jae peve, penti trigo jāicue uñeñoti'ā yave, jaeño upita. Ërei uñeñoti yave, jeta uñemoña —jei—. ²⁵ Uyerau vae ndaraus uyembíasaca. Ërei uyerau'ā cua ivi pe vae uyembíasacata co. Güinoita tecove opa mbae vae —jei—.

²⁶ Uyeyocui cheve vae too cherupié. Cherembiocui oīta che aīta vae pe. Jare cheRu umbutuichacata uyeyocui cheve vae —jei Jesús—.

Jesús umimbeu umanota co

²⁷ Tuicha chepiatiti aī. Ērei chepuere'ā jae: 'CheRu, cherepi cua ora pe uyeyapota cheve vae güi.' Echa'ā uvāe ma cua ora cua uyeyapo cheve vaerā —jei—. ²⁸ CheRu, iyapo cheve ivi pegua reta nembiadura vaerā —jei.

Jayave ñee uyendu ara güi:

—Ayapo ma mbaembae nde rupi ivi pegua reta chembiadura vaerā, jare cuarāi ayapo yeto co.

²⁹ Jeta joco pe ñugüinoi vae reta uyandu ñee jare jei ara co jiapu. īru reta jei:

—Penti ángel ombou iñee chupe.

³⁰ Jayave Jesús jei:

—Cua ñee uyendu pereco pegua - chereco pegua'ā co. ³¹ Uñeāa ma ivi pegua reta, jare jae reta juvicha uyemombota co —jei—. ³² Jare īru vae reta chereupi curusu re yave ivi güi, arurucata opaete ivi pegua reta checoti —jei.

³³ Cua jei Jesús uicuaaca vaerā chupe reta quirāita co umano. ³⁴ Jayave jae reta jei Jesús pe:

—Mboroyocui pe uyequatía oī vae umimbue oreve Cristo imeñoi ico. ¿Mbae pa uipota jei jocua ndere vae? Echa'ā nde ndere īru vae reta uupita ivi güi cuimbaerā uyeyapo vae. ¿Quía pa co jae cuimbaerā uyeyapo vae? —jei reta.

³⁵ —Tembipe imeño ico pe reta ndive —jei Jesús—. Ērei ndarau ëma upita pe reta ndive. Peguata tembipe ico pe reta ndive rambueve, agüiye vaerā pítu peve. Echa'ā pítumimbi pe uguata vae uicua'ā queti oo —jei—. ³⁶ Tembipe pe reta ndive ico rambueve, perovia tembipe re, pe reta pei vaerā tembipe rami —jei chupe reta.

Cua jei ma yave, Jesús oo chugüi reta, jare ipuere'ā ma uvāe chupe.

Judío reta güirovia'ā

³⁷ Ērei yepe tēi Jesús uyapo jeta miacañi reta jae reta jovaque uicuaaca vaerā tēi chupe reta quía co jae, ērei jae reta güirovia'ā jese, ³⁸ uyeyapo vaerā Isaías uicuatía vae - Isaías co jae Tumpa iñee aracae umimbue vae. Echa'ā Isaías uicuatía cuarāi:

"CheYa, ¿quía pa güirovia numimbue vae?"

¿Quía nunga vae pe pa ndicuaaca nembaepuere?"

Jucuarāi uicuatía Isaías aracae. ³⁹ Jáeramo jae reta ipuere'ā güirovia. Echa'ā Isaías uicuatía vi cuarāi:

⁴⁰ "Tumpa uyapo reta jesa mbae vae reta rami jare umipiata,

agüiye vaerā uecha cavi reta,

jare agüiye vaerā uicuaa cavi reta,

jare agüiye vaerā uyerova icoti.

Echa'ā uyerova yave Tumpa coti, Tumpa umbaita tēi imbaeyoa reta."

Jucuarāi uicuatía Isaías. ⁴¹ Isaías cua jei, uecha yave yembutuicha ara pegua. Jáeramo imiari jucuarāi jese.

⁴² Ērei amocue mburuvichá reta güirovia Jesús re. Ērei uipota'ā jei jae co Cristo fariseo reta jeco pegua. Echa'ā jucuarāi jei yave, fariseo reta omombota tēi co judío reta itupao güi. ⁴³ Echa'ā jae reta uipota ete japicha reta pe uyembutuichaca vaerā Tumpa umbutuichaca vaerā tēi güi.

Jesús iñee reta uñata ivi pegua reta

⁴⁴ Jayave Jesús iñeeata reve jei:

—Cheré güirovia vae chereñol'ä güirovia. Güirovia chembou vae re —jei—. ⁴⁵ Cherecha vae uecha vi chembou vae —jei—. ⁴⁶ Ayu ivi pe amee vaerā tembipe ivi pegua reta pe, agüiye vaerā cheré güirovia vae upita pítumimbi pe —jei—. ⁴⁷ Chiñee re uyapisaca vae uyapo'ā yave che jae vae rupi, che aña'ā. Echa'ā che ayu ambiasa vaerā ivi pegua reta. Ayu'ā aña vaerā —jei Jesús—. ⁴⁸ Jocua güirovia'ā cheré jare uyapo'ā che jae chupe uyapo vaerā vae uñeāata co. Echa'ā ara taicuegaa vae pe cua che jae vae uñata —jei chupe reta—. ⁴⁹ Echa'ā cheporomboe chembaen'ā co. Cheru chembou, jare jae cheocui mbae jae vaerā, jare quirāi chemiari vaerā —jei—. ⁵⁰ Jare aicuaa cheRu cheocui vae tecove opa mbae vae pegua co. Jáeramo che jae peve cheRu jei cheve vae —jei.

13

Jesús oyoe jemimboe reta ipi

¹ Uyaro ma pascua iara. Jare Jesús uicuaa ara uvāe ma ueya vaerā cua ivi oo ye vaerā Tu pe. Imeño uau imbae cua ivi pe ñugüinoi vae reta, jare añave uicuaacata quirāi uau ete. ²⁻⁴ Judas Iscariote - jae co Simón tai - ipia pe uyemingueta ma umee vaerā Jesús jovaicho reta pe. Echa'ā jucuarāi uipota aña guasu Judas ipia pe uyemingueta vaerā. Jare Jesús uicuaa cavi ma Tu oñono opaete mbaembae ipo pe. Uicuaa vi ou co Tumpa güi jare oo yeta co Tumpa pe. Jare pítu yave Jesús jare jemimboe reta ucaru ñugüinoi yave, Jesús upúa mesa güi, omboi iyasoya iarambogua, jare oñoma icúa penti toalla pe. ⁵ Jayave oñono

í penti ia pe jare umbipi oyoe jemimboe reta ipi, jare oyoe ma yave, umítini toalla icúa re oĩ vae pipe.

⁶Jare oo uväe yave Simón Pedro oĩ vae pe, Pedro jei chupe:

—CheYa, ¿nequirëi pa ndiyoe chepi?

⁷—Cua ayapo aĩ vae ndicuaa cavi'ã añave —jei Jesús—, ërei ndicuaa cavita co taicue rupi.

⁸—Ndaraus etei ndiyoe chepi —jei Pedro.

—Jucuaräi yave, nde cheiru'ã co —jei Jesús chupe.

⁹Jayave Simón Pedro jei:

—CheYa, iyoe chepo jare cheäca vi - agüiye iyoe chepiño.

¹⁰—Uyau ma vae uyau yetá ma —jei Jesús—. Ipíño ma oyoeta. Echa'ã opaete jete iquia mbae ma. Jare pe reta pequia mbae ma. Ërei opaete'ã co pe reta —jei.

¹¹Echa'ã Jesús uicuaa quía umeeta jovaicho reta pe. Jáeramo jei: “Ërei opaete'ã co pe reta.”

¹²Jayave opa yave ipi reta oyoe, uyemonde ye Jesús jare oo uguapi jenda pe. Jayave upirandu chupe reta:

—¿Picuaa cavi pa ayapo ma peve vae? ¹³Pe reta pere cheve: ‘Oporomboe vae’, jare pere vi: ‘OreYa.’ Añete co cua pere vae. Echa'ã aporomboe jare che co jae peYa —jei chupe reta—. ¹⁴Ërei yepé tẽi che pomboe jare che co jae peYa, ërei ayoe ma pepi reta. Jáeramo icavi co pe reta piyoe vaerä pepi piyugüi —jei—. ¹⁵Echa'ã che cua ayapo aicuaaca vaerä peve, pe reta vi piyapo vaerä che ayapo peve vae ramí —jei—. ¹⁶Añete che jae peve, penti uyeyocui vae imbaepuere tuicha'ã ete ipatrón imbaepuere ramí. Jae ramíño vi penti temimondo imbaepuere tuicha'ã ete omondo vae imbaepuere ramí —jei—. ¹⁷Cua picuaa cavi. Piyapo yave, Tumpa uyapota icavi vae peve —jei Jesús chupe reta—.

¹⁸Opaete pe reta re'l ayemingueta aĩ. Che aicuaa quía aiparavo vae reta. Ërei Tumpa iñee pe uyecuatía oĩ vae uyeyapota co. Echa'ã uyecuatía oĩ cuaräi: ‘Jocua ucaru che ndive vae chemeeta.’ Jucuaräi uyecuatía oĩ —jei—. ¹⁹Cua amimbeu peve añave ndei uyeyapo mbove, cua uyeyapo yave perovia vaerä quía co che —jei—. ²⁰Añete che jae peve, cheremimondo pe uyapo icavi vae, cheve co uyapo icavi vae. Jare jocua cheve uyapo icavi vae, uyapo vi icavi vae chembou vae pe —jei—.

Jesús umimbue Judas umeeta

(Mt 26.20-25; Mr 14.17-21; Lc 22.21-23)

²¹Cua jei ma yave, Jesús tuicha ipiatití jare jei:

—Añete che jae peve, penti pepite pe oĩ vae chemeeta cherovaicho reta pe.

²²Jayave Jesús jemimboe reta umae iyee reta. Uicuaa'ã quía re ra uyemingueta. ²³Penti jemimboe - jae co Jesús uau vae - ucaru oĩ Jesús iyípi pe. ²⁴Jayave Simón Pedro omomí iñäca jocua íru temimboe uecha vaerä, jare jae upirandu vaerä Jesús pe quía regua ra uyemingueta. ²⁵Jayave jocua temimboe Jesús iyípi pe ucaru oĩ vae upirandu Jesús pe:

—¿Quía pa co jae, cheYa?

²⁶—Ameeta chupe mbiyape —jei Jesús—, tembíu pe amäqui ma yave. Jocua co jae —jei—.

Jayave tembíu pe umäqui ma yave, uequí umee Judas Iscariote pe - jae co Simón tai. ²⁷Jayave Judas jou ma yave, Satanás oya jese. Jayave Jesús jei Judas pe:

—Iyapo voi jocua ndiyapota vae.

²⁸Ërei mbaeti quía mesa pe oĩ vae uicuaa maera Jesús jei jucuaräi Judas pe. ²⁹Amocue vae ipia pe uyemingueta tẽi Jesús jei chupe vae uipota jei: “Ecua egua yaipota fiesta peguarä vae”, ani: “Ecua emee mbae iparavete vae reta pe.” Echa'ã Judas güinói corepotí jíru. ³⁰Jayave opa yave jou mbiyape, Judas oẽ oo. Jare pítu ma co.

Mboroyocui ipiau vae

³¹Jayave oẽ ma yave Judas, Jesús jei:

—Che ayeyapo cuimbaerä. Añave iví pegua reta chembadorata. Jare umbiadorata vi Tumpa chereco pegua —jei—. ³²Iví pegua reta umbiadorata Tumpa chereco pegua. Jáeramo Tumpa etei chembadoracata iví pegua reta pe. Añave voi chembadoracata —jei—. ³³Cherivi reta, michi peguaño ma apitata pe reta ndive. Jayave chereca tẽita, ërei pe reta ndaraus pepuere peo che aata vae pe. Echa'ã cuaräi amimbeu judío reta pe, jare añave amimbeu vi peve —jei—. ³⁴Amee peve penti mboroyocui ipiau vae. Piyerau. Piyerau che puau ramí —jei Jesús chupe reta—. ³⁵Piyerau yave, opaete iví pegua reta uicuaata pe reta cheremimboe reta co —jei—.

Jesús umimbue Pedro uicuacuta co
(Mt 26.30-35; Mr 14.26-31; Lc 22.31-34)

³⁶Simón Pedro jei Jesús pe:

—CheYa, ¿quetí pa ndeota?

—Ndaraus añave ndepuere ndeo che aata vae pe —jei Jesús—. Ërei taicue rupi ndeota co —jei—.

³⁷ Pedro jei:

—CheYa, ¿maera pa chepuere'ā aa nde ndive añave? Che tamano ndepepica pe —jei.

³⁸ —Nde ndere nemanota chepepica pe —jei Jesús—. Añete che jae ndeve, ndei uru cuimbae uñee mbove, mbapí vese ma checuacuta —jei—.

14

Jesús co jae tape Tumpa pe oo vae

¹ Agüiye pepiatiti. Perovia Tumpa re. Perovia vi cheré —jei—. ² CheRu jenta pe ime jeta o. Jucuarāi'ā yave, amimbeuta tēi co peve. Aata ayapicatu perendarā —jei Jesús chupe reta—. ³ Jare aa ma yave ayapicatu perendarā, ayu yeta puraa vaerā, pe reta vi pico vaerā che aicota vae pe —jei—. ⁴ Jare pe reta picuua tape que rupi aata —jei—.

⁵ Jayave Tomás jei:

—OreYa, ore nduicuaa'ā quetí ndeota vae. ¿Quirāita ra nduicuaa tape?

⁶ —Che co jae tape —jei Jesús—. Che co jae añetete uyemingueta vae. Che co jae tecove opa mbae vae umee vae. Mbaeti quía ipuere uñemíru cheRu ndive jaeño che rupi —jei—. ⁷ Checuua cavi yave mona, picuuaa tēi co cheRu vi. Ërei añave güüve picuua co. Echa'ā peeche ma —jei—.

⁸ Felipe jei chupe:

—OreYa, eechaca oreve ndeRu. Jocuaño nduipota.

⁹ —Ima ma aico pe reta ndive, Felipe —jei Jesús—. ¿Ndei pa co checuuaa cavi? Cherecha vae uecha ma co cheRu. ¿Maera pa nddere: ‘Eechaca oreve ndeRu?’ —jei—. ¹⁰ ¿Perovia'ā pa che aico cheRu ndive jare cheRu ico che ndive vae? Nee amimbeu peve vae chembaeño'ā co. Echa'ā cheRu ico che ndive, jare jae uyapo mbaravíqui reta —jei Jesús—. ¹¹ Perovia cua che jae peve vae: Che aico cheRu ndive, jare cheRu ico che ndive. Cua perovia'ā yave, chererovia mbaravíqui ayapo vae reta jeco pegua —jei—. ¹² Añete che jae peve, cheré güürovia vae uyapota mbaravíqui reta che ayapo ma vae reta rami. Jare iparavíqui reta tuicha eteta cheparavíqui reta güü, che aata cheRu pe ramo —jei—. ¹³ Pepuereta piyerure ipotave mbae re cheree re, jare che ayapota peve, cheRu uyembadoraca vaerā che ayapota vae rupi —jei—.

¹⁴ Piyerure yave ipotave mbae re cheree re, ayapota co peve —jei Jesús chupe reta—.

Espíritu Santo outa

¹⁵ Cherau yave, piyapo cheporoyocui reta —jei—. ¹⁶ Jare che ayerureta cheRu pe jae ombou vaerā peve íru vae. Jae jecuaeño icota pe reta ndive membipiacatu vaerā. Jae co Espíritu Santo —jei—. ¹⁷ Jae imiarita añete vae re. Upurugüirovia mbae vae reta ndarau ipuere umbiresive Espíritu Santo. Echa'ā upurugüirovia mbae vae reta uecha'ā jare uicuaa'ā. Ërei pe reta picuua. Echa'ā jae ico pe reta ndive jare icota pepia pe —jei—. ¹⁸ Che aa ma yave, ndarau pueya jentarā mbae vae reta rami. Echa'ā che ayu yeta co —jei—. ¹⁹ Michi peguaño ma ívi pegua reta cherechata. Ndarau ma cherecha ye. Ërei pe reta cherecha yeta. Che jecuaeño aico ramo, pe reta picota vi —jei chupe reta—. ²⁰ Jocua ara picuuaa co che aico cheRu ndive, jare pe reta pico che ndive vae, jare che aico pepia pe —jei—. ²¹ Ime yave quía uyapisaca cheporoyocui reta re uyapo vaerā vae, jae co cherau. Jare cheRu uauta cherau vae, jare che aauta, jare aicuacata chupe quía co che —jei—.

²² Jayave Judas - jae'ā co Judas Iscariote - jei chupe:

—OreYa, ¿quirāita pa ndicuaaca oreve quía co nde, ndicuaaca'ā yave upurugüirovia mbae vae reta pe?

²³ —Cherau vae uyapota che jae chupe uyapo vaerā vae —jei Jesús—. Jare cheRu uauta. Jare ndoyuta nduico vaerā jae ndive —jei—. ²⁴ Cherau'ā vae uyapo'ā che jae chupe uyapo vaerā vae. Jare chiñee piyandu vae chembaeño'ā co. Echa'ā cua ñee cheRu iñee co. Jae co chembou —jei—. ²⁵ Cua mbaembae re chemiari ma peve, aico pe ndive rambueve. ²⁶ Ërei jocua pembipiacatuta vae pemboeta opaete mbae re. CheRu ombouta peve cheree re. Jae co Espíritu Santo. Jae pemimanduata opaete che jae peve vae re —jei—. ²⁷ Mbiacatu aeya pe ndive. Mbiacatu che anoi vae amee peve. Ívi pegua reta ipuere'ā umee peve che amee peve vae nunga mbiacatu. Agüiye pepiatiti. Agüiye pequiyé —jei—. ²⁸ Piyandu ma quirái che jae: ‘Aata ma jare ayu yeta peve.’ Cherau yave mona, piyeroviata fēi. Echa'ā aata cheRu pe, jare cheRu imbaepuere tuicha ete chembaepluere güü —jei—. ²⁹ Amimbeu ma peve ndei uyeyapo mbove, perovia vaerā uyeyapo yave —jei—. ³⁰ Ndarau ma ima chemiari peve. Echa'ā ívi pegua reta juvicha imambae outa uvāe cheve. Ërei ndarau ipuere cheré —jei—. ³¹ Ërei ayapota cheRu iporoyocui, ívi pegua reta uicuaa vaerā che aau cheRu. Pepúa, yaa ma cua güü —jei chupe reta—.

15

Jesús co jae uva iyipi añetete vae ramí

¹ Che co jae uva iyipi añetete vae rami, jare cheRu co jae uva iyipi iyandarecoa rami —jei—. ² Opaete jāca ía mbae vae reta cheRu uyasiata. Jare opaete jāca ía vae reta jae uitioti, jeta ía vaerä —jei—. ³ Pe reta piyeyoeca ma ñee amimbeu peve vae pe —jei—. ⁴ Pico cheré perovia reve, jare che aicota pepia pe. Penti jāca uyeasia yave uva iyipi güi, ndarau ipuere ía. Echa'á jāca jaeñio ipuere'á ía. Jae ramíño vi pe reta pico'á yave cheré perovia reve, ndarau pepuere piyapo icavi vae Tumpa peguarä —jei—. ⁵ Che co jae uva iyipi rami, jare pe reta co jae jāca reta rami. Jocua ico cheré güirovia reve vae uyapota jeta icavi vae Tumpa peguarä. Echa'á che aico ipia pe. Ërei che aico'á yave pepia pe, pepuereta'á mbae piyapo Tumpa peguarä —jei—. ⁶ Jocua ico'á cheré güirovia reve vae uyemombota penti jāca uyeasia vae uyemombo yípi vaerä vae rami. Jare jāca yípi vae reta uyembatica jare uyemondoca tata pe ocai vaerä —jei—. ⁷ Pico yave cheré perovia reve, jare piyapo yave che jae peve piyapo vaerä vae, pepuereta piyerure pipota vae re jare penoita co —jei—. ⁸ Piyapo yave jeta icavi vae cheRu peguarä, ivi pegua reta umbiadorata cheRu. Jare cuarái picuaacata pe reta co cheremimboe reta —jei—. ⁹ CheRu cherau. Jae ramíño vi che puau. Jecuaeño piyeyocui cheve, che puau ramo —jei—. ¹⁰ Piyapo yave cheporoyocui reta, che jecuaeño puauta. Echa'á cuarái che ayapo cheRu iporoyocui reta, jare jecuaeño jae cherau —jei Jesúus chupe reta—. ¹¹ Cuarái chemiari ma peve piyerovia vaerä che ayerovia rami. Cuarái ayapo tuicha ete piyerovia vaerä —jei—. ¹² Cua co jae cheporoyocui: Piyerau che puau rami. ¹³ Ime yave quía iquiréi umano uepi vaerä iamigo reta vae, ipuruau tuicha ete co íru mburuau güi —jei—. ¹⁴ Pe reta co jae cheamigo reta, piyapo yave che jae peve piyapo vaerä vae —jei—. ¹⁵ Che jae'á ma peve pe reta co cherembiocui reta. Echa'á opaete cheRu umimbeu cheve vae aicuaaca ma co peve —jei chupe reta—. ¹⁶ Pe reta cheparavo'á. Che co puparavo. Jare amee ma peve mbaepuere peo vaerä piyapo icavi vae Tumpa peguarä, jare jecuae jucuarái piyapo vaerä. Cua ayapo cheRu umee vaerä peve ipotave piyerureta chupe jese cheree re vae —jei—. ¹⁷ Cua co poyocui: Piyerau —jei—.

Upurugüirovia mbae vae reta umitarëi Jesúus jare imbae reta

¹⁸ Piñemitarëica upurugüirovia mbae vae reta pe yave, pemandúa quirái jae reta che rani co chemitarëi —jei—. ¹⁹ Pico yave mona upurugüirovia mbae vae reta yugüireco rami, upurugüirovia mbae vae reta perauta tēi. Ërei che puparavo ma upurugüirovia mbae vae reta ipite güi. Jáeramo pico'á ma upurugüirovia mbae vae reta yugüireco rami. Jáeramo piñemitarëica upurugüirovia mbae vae reta pe —jei—. ²⁰ Pemandúa cua che jae peve vae re: ‘Penti uyeyocui vae imbaepuere tuicha'á ete ipatrón imbaepuere rami.’ Echa'á upurugüirovia mbae vae reta uyapo yave icavi mbae vae cheve, uyapota vi icavi mbae vae peve. Uyapo reta yave che jae chupe uyapo vaerä vae, uyapota vi pe reta pere chupe uyapo vaerä vae —jei—. ²¹ Ërei upurugüirovia mbae vae reta uyapota peve opaete cua mbaembae cheré perovia ramo. Echa'á jae reta uicuaal'á chembou vae —jei—.

²² Ayu'á yave mona chemiari vaerä chupe reta, ndarau tēi teco güinoi. Ërei añave opaete vae ipuere uicuaa jae reta co teco güinoi —jei—. ²³ Chemitarëi vae umitarëi vi cheRu —jei—. ²⁴ Ayapo'á yave mona ipite pe mbaravíqui mbaeti quía ye uyapo vae reta, ndarau tēi teco güinoi. Ërei jae reta cherecha ma - jae co cheRu uecha rami - jare oremitarëi —jei—. ²⁵ Cua uyapo reta uyeyapo vaerä mboroyocui pe uyecuatía oí vae. Echa'á uyecuatía oí cuarái: ‘Jae reta chemitarëi mbaeti mbae icavi mbae vae ayapo chupe reta reve.’ Jucuarái uyecuatía oí —jei—. ²⁶ Ërei ambouta peve cheRu ico vae güi pembipiácatatua vae - jae co Espíritu Santo añete vae re imiarita vae. Jae ou yave, chemimbeuta co —jei—. ²⁷ Jare pe reta vi chemimbeuta. Echa'á tenonde güive pico che ndive —jei—.

16

¹ Opaete cua che jae ma peve agüiye vaerä piyerova Tumpa güi —jei—. ² Piyemombocata co judío reta itupao reta güi. Añete co, outa ma ara piyeyucaca vaerä. Jare jocua reta peyucata vae ipia pe uyemingueta tēita uyeyocui co oí Tumpa pe —jei—. ³ Jae reta uicuaal'á cheRu jare checuaal'á vi. Jáeramo jucuarái uyapota —jei chupe reta—. ⁴ Ërei cua che jae ma peve, pemandúa vaerä cuarái amimbeu peve vae re jucuarái uyapo reta yave —jei—.

Espíritu Santo uyapo vae

Amimbeu'á peve cua tenonde güive. Echa'á che aico pe ndive. ⁵ Ërei aata chembou vae pe. Jare penti ave añave pepirandu'á cheve: ‘¿Quetí pa ndeota?’ —jei—. ⁶ Ërei cua che jae peve vae jeco pegua pepiatiti. ⁷ Ërei amimbeu peve añete vae. Icavita co peve che aa vaerä. Echa'á che aa'á yave, ndarau ou peve pembipiácatatua vae. Ërei aa yave, ambouta peve. ⁸⁻¹¹ Jare jae ou yave, uicuaacata ivi pegua reta pe jae reta uyapo co mbaeyoa. Echa'á güirovia'á cheré. Uicuaacata jupi vae. Echa'á aata cheRu oí vae pe jare pe reta ndarau ye ma cherecha. Uicuaacata Tumpa uāata ivi pegua reta. Echa'á uāa ma ivi pegua reta juvicha —jei—.

¹² Ime jeta aipota tēi jae peve vae, ērei ndeiño pepuere picuua cavi —jei—. ¹³ Ērei Espíritu Santo añete vae re imiarita vae ou ma yave, umimbeuta peve añete vae. Echa'ā née umimbeuta peve vae ndarau imbaeñio. Imiarita Tumpa umimbeutu chupe vae re, jare umimbeuta peve uyeyapota vae —jei—. ¹⁴ Jae chembiadoracata co. Echa'ā jae pemboeta che pomboe rami —jei Jesús chupe reta—. ¹⁵ Opaete cheRu imbae chembae vi co. Jáeramo che jae cuarāi: 'Jae pemboeta che pomboe rami' —jei—.

Ipiatiti vae uyeroviata co

¹⁶ Michi peguaño ma pe reta cherechata. Ērei imambae cherecha yeta. Echa'ā aata cheRu pe —jei chupe reta.

¹⁷ Amocue jemimboe reta jei uyupe:

—¿Mbae pa uipota jei cuia jei yandeve vae? Echa'ā jei: 'Michi peguaño ma pe reta cherechata. Ērei imambae cherecha yeta.' Jare jei vi: 'Echa'ā aata cheRu pe.' ¹⁸ ¿Mbae pa uipota jei: 'Michi peguaño ma?' Yaicuaa'ā mbae ra uipota jei —jei reta.

¹⁹ Jesús uicuua jae reta uipota tēi upirandu chupe cuia re. Jáeramo jei chupe reta:

—Che jae peve cuarāi: 'Michi peguaño ma pe reta cherechata. Ērei imambae cherecha yeta.' Jare pepirandu pei piyupe mbae ra uipota jei cuia che jae peve vae —jei—. ²⁰ Añete che jae peve, piyaota jare pepiatitita, ērei upurugüirovia mbae vae reta uyeroviata. Pepiatitita co, ērei jaicue rupi piyeroviata co —jei—. ²¹ Penti cuña imembí oata ma oī yave, cuña ipiatiti jasi chupe ramo. Ērei imembí oa ma yave, imandua'ā ma jasi chupe vae re. Echa'ā uyerovia imembí oa ma ramo —jei—. ²² Jae ramíño vi pe reta pepiatitita añave, ērei puecha yeta, jare piyeroviata, jare ndarau quía ipuere pembipiattí ye —jei—.

²³ Jocua ara ndarau pepirandu cheve mbae re. Añete che jae peve, ipotave piyerureta cheRu pe jese vae cheRu umeeta peve cheree re —jei—. ²⁴ Ndeiño peeca mbae cheree re. Piyerure Tumpa pe mbaembae re, jare cheRu umeeta co peve tuicha ete piyerovia vaerā —jei—.

Che chepuere ete ivi pegua reta güi

²⁵ Cua amimbeu ma peve amijaanga reve. Ērei outa ma ara reta amimbeu cavi vaerā peve cheRu regua. Ndarau ye ma amimbeu peve amijaanga reve —jei—. ²⁶ Jocua ara reta pe piyerureta mbaembae re cheree re. Jare che jae'ā peve ayerureta cheRu pe jae uyapo vaerā piyerure jese vae —jei—. ²⁷ Echa'ā cheRu etei perau, pe reta cherau jare perovia che ayu cheRu güi ramo —jei—. ²⁸ Ayu co cheRu güi cua ivi pe. Aa yeta ma cua ivi güi cheRu pe —jei chupe reta.

²⁹ Jesús jemimboe reta jei chupe:

—Añave nemimbeu cavi ma oreve nemijaanga mbae reve. ³⁰ Añave nduicuua nde ndicuua co opaete vae, jare ndeeca'ā quía umimbeu vaerā ndeve mbae re. Cua jeco pegua ndugüirovia nde ndeyu co Tumpa güi —jei reta.

³¹ Jesús jei chupe reta:

—Pe reta pere perovia ma. ³² Ērei outa ma ara - ou ma co - pe reta piñemai vaerā. Chereyata jare penti penti peota perenta pe. Cheño apitata. Ērei ndarau cheño aico. Echa'ā cheRu ico che ndive —jei—. ³³ Cua che jae ma peve pepiácatu vaerā cheré perovia ramo. Cua ivi pe pico rambuve, piporarata co. Ērei agüiye pepiatiti. Echa'ā che chepuere ete ivi pegua reta güi —jei—.

17

Jesús uyerure Tumpa pe jemimboe reta re

¹ Cua jei ma yave, Jesús urnae ara cotí jare jei:

—CheRu, ara uvāe ma. Che co jae ndeRai. Chembiadoraca, chepuere vaerā numbiadoraca vi —jei—.

² Echa'ā nde cheapo ma opaete vae iYarā, amee vaerā tecove opa mbae vae opaete nde nemee cheve vae reta pe —jei—. ³ Ime yave quía yandecuua vae, jae güinoi tecove opa mbae vae. Nde co jae pentiño Tumpa añetete vae. Che co jae Jesucristo. Nde chembou —jei—.

⁴ Che numbiadoraca cua ivi pe. Echa'ā opa ma ayapo mbaravíqui nde nemee cheve ayapo vaerā vae —jei—. ⁵ Ndei ivi uyeyapo mbove aico nde ndive yave ayembiadoraca co. Jae ramíño vi añave chembiadoraca ye nderovai —jei—. ⁶ Nde nemee ma cheve cua cuimbae reta upurugüirovia mbae vae reta ipite güi. Che amimbeu ma nderegua cua reta pe. Jae reta nembae co jare nde nemee ma cheve. Jae reta uyapo nde ndere chupe reta uyapo vaerā vae —jei—. ⁷ Jae reta uicuua opaete nde nemee cheve vae ou co ndegüi. ⁸ Echa'ā che amee ma chupe reta née nde nemee cheve vae, jare jae reta güirovia niñee. Uicuua cavi che ayu co ndegüi. Güirovia ma nde co chembou —jei—.

⁹ Ayerure ndeve jese reta. Ayerure'ā upurugüirovia mbae vae reta re. Ayerure ndeve nde nemee cheve vae reta re. Echa'ā jae reta nembae co —jei—. ¹⁰ Opaete chembae nembae co, jare nembae chembae co. Jare che ayembiadoraca ma jae reta jeco pegua —jei—. ¹¹ Jare ndarau ma aico cua ivi pe. Ērei jae reta upitañota cua ivi pe. Che aata ma ndepi. CheRu, nde co jae jupi vae. Cua reta nemee ma cheve. Embori nembaepuere pe, agüiye vaerā uyerova ndegüi, jare yugüireco vaerā penti ramíño.

Echa'ã jucuarãi yande yaico penti ramiño —jei—. ¹² Che aico jae reta ndive rambueve, che ambori nembaepuere pe cuia nemeet cheve vae reta, agüiye vaerã uyerova ndegüii. Pentiño oota cañitei pe, niñee pe uyecuatía oí vae uyeyapo vaerã. Êrei ambori ūru reta, agüiye vaerã yugüüraa cañitei pe —jei—.

¹³ Êrei aata ma ndepi. Cuarãi chemiari chupe reta ivi pe aico rambueve, jae reta uyerovia ete vaerã che ayerovia rami —jei—. ¹⁴ Amee ma chupe reta niñee, jare uñemitarëica upurugüirovia mbae vae reta pe. Che aico'ã upurugüirovia mbae vae reta yugüüreco rami. Jae ramiño vi jae reta yugüüreco'ã upurugüirovia mbae vae reta yugüüreco rami —jei—. ¹⁵ Ayerure'ã ndeve nde nderaa vaerã cua ivi güi. Ayerure ndeve nembori vaerã, agüiye vaerã icavi mbae vae iya umiamiri —jei—. ¹⁶ Che aico'ã upurugüirovia mbae vae reta yugüüreco rami. Jae ramiño vi jae reta yugüüreco'ã upurugüirovia mbae vae reta yugüüreco rami. ¹⁷ Iñono tee reta ndiyupegarã añete vae rupi. Niñee co jae añete vae —jei— Jesús—. ¹⁸ Nde chembou ivi pe. Jae ramiño vi che amondo cuia reta opaete ivi rupi —jei—. ¹⁹ Cua reta jeco pegua añeñono tee ma ndeve peguarã, jae reta vi uñeñono tee vaerã ndeve peguarã añete vae rupi —jei—.

²⁰ Jare ayerure ndeve cheré güüroviata vae re. Echa'ã güüroviata cua reta iñee rupi. Cua reta reñó'ã ayerure ndeve —jei—. ²¹ Ayerure ndeve opaete jae reta yugüüreco vaerã penti ramiño. Nde ndico che ndive, cheRu, jare che aico nde ndive. Jae ramiño vi ayerure ndeve cua reta yugüüreco vaerã yanderé güürovia reve, ivi pegua reta güürovia vaerã nde co chembou vae —jei—. ²² Nde ndepiacavi ndeechaca cheve vae, che vi aechaca chupe reta, jae reta yugüüreco vaerã penti ramiño. Echa'ã jucuarãi yande yaico penti ramiño —jei— Jesús—. ²³ Nde ndicota che ndive jare che aicota ipia pe, añetete yugüüreco vaerã penti ramiño, ivi pegua reta uicuua vaerã nde co chembou jare nde ndeau co cua reta nde cherau rami —jei—.

²⁴ CheRu, aipota cuia nernee cheve vae reta vi yugüüreco vaerã che aicota vae pe, uecha vaerã ndepiacavi cheve vae. Echa'ã ndei ivi uyeyapo mbove nde cherauño mai —jei—. ²⁵ CheRu, nde co jae jupi vae. Upurugüirovia mbae vae reta ndecuua'ã. Êrei che co nducuua, jare cua reta uicuua nde co chembou vae —jei—. ²⁶ Che numimbeu ma chupe reta jare numimbeu yeta, jae reta tuau ūru vae reta nde cherau rami, jare che aico vaerã ipia pe —jei—.

18

Uipisi reta Jesús

(Mt 26.47-56; Mr 14.43-50; Lc 22.47-53)

¹ Jesús cua jei ma yave, uasa jemimboe reta ndive iäca Cedrón jee vae jovaicho pe oo uvae temiti reta ñugüünoi vae pe. Joco pe uiqie Jesús jare jemimboe reta. ² Jare Judas - jae co umee jovaicho reta pe vae - uicuua jocua temiti reta jenda. Echa'ã joco pe uyembariño yepi Jesús jemimboe reta ndive. ³ Jayave Judas oo sacerdote reta itenondegua reta jare fariseo reta ñugüünoi vae pe, jare jae reta omondo amocue sundaro reta jare jembiocui reta temiti reta ñugüünoi vae coti Judas jupié. Güüraa reta mechero jare ivira jare quísepucu reta. ⁴ Jayave Jesús oo jae reta ñugüünoi vae coti jare jei:

—¿Quíá pa peeca?

Echa'ã jae uicuua ma mbae uyeyapota chupe vae.

⁵ —Jesús Nazaret pegua —jei reta.

—Che co jae —jei Jesús.

Jare Judas - jae co umee jovaicho reta pe vae - uyemboi oí joco pe jae reta ndive. ⁶ Jesús jei yave chupe reta: "Che co jae", jae reta opa usiri jaicue coti jare oa reta ivi re. ⁷ Jayave Jesús upirandu ye chupe reta:

—¿Quíá pa peeca?

Jeí reta ye:

—Jesús Nazaret pegua.

⁸ —Amimbeu ma peve che co jae —jei Jesús—. Pe reta che chereca. Jáeramo pemaefio cua che ndive ñugüünoi vae reta re yugüüraa ye vaerã —jei—.

⁹ Cua jei uyeyapo vaerã tenonde yave jei vae: "Amicañi'ã penti ave nde nemeet cheve vae reta güi." Jucuarãi jei ma. ¹⁰ Jare Simón Pedro güünoi penti quísepucu. Jayave uequi jiru güi jare uiporu sacerdote tenondegua jembiocui inambi iyacata cotigua re, jare uyasia inambi chugüi. (Jocua uyeyocui vae jee co Malco.) ¹¹ Jayave Jesús jei Pedro pe:

—Iñono ye ndequísepucu jiru pe. Aiporarañotai co. Echa'ã cheRu uipota aiporara vaerã —jei—.

Jesús Anás jovai

(Mt 26.57-58; Mr 14.53-54; Lc 22.54)

¹² Jayave sundaro reta juvicha ndive jare judío reta itenondegua reta jembiocui reta uipisi Jesús uñapiti. ¹³ Jayave güüraa Jesús Anás pe rani - jae co Caifás jembireco tu - Caifás co jae sacerdote tenondegua jocua año. ¹⁴ Tenonde yave cuia Caifás umimbeu judío reta pe icavita co chupe reta penti cuimbae umano vaerã opaete vae reta ipepica pe.

Pedro Anás joca pe

(Mt 26.69-70; Mr 14.66-68; Lc 22.55-57)

¹⁵ Jare Simón Pedro jare ūru temimboe yugüüraa Jesús jaicue. Jare cua ūru temimboe uique sacerdote tenondegua joca pe Jesús uique yave. Echa'ā sacerdote tenondegua uicuua cua temimboe. ¹⁶ Érei Pedro uique'ā japipe pe. Upita uyemboi oī onque tuicha vae iyípi pe. Jayave ūru temimboe sacerdote tenondegua uicuua vae oē umingueta cuñatai onque uāro vae pe jare uruique Pedro. ¹⁷ Jayave cuñatai onque uāro vae jei Pedro pe:

—¿Jae'ā pa co nde penti jocua cuimbæ jemimboe?

—Jae'ā co che —jei Pedro.

¹⁸ Jare sacerdote tenondegua jembiocui reta jare judío reta itenondegua reta jembiocui reta uyapo ma tata jare uyemboi reta tata iyípi rupi uyepée vaerā. Echa'ā roi co. Pedro vi upita joco pe uyemboi oī jae reta ndive uyepée vaerā.

Anás upirandu Jesús pe

(Mt 26.59-66; Mr 14.55-64; Lc 22.66-71)

¹⁹ Jayave sacerdote tenondegua upirandu Jesús pe jemimboe reta re jare iporomboe re. ²⁰ Jayave Jesús jei chupe:

—Che ayemingueta co opaete vae jovaque. Jecuaeño aporomboe judío reta itupao reta pe jare Tumpa jo pe. Echa'ā joco pe jecuaeño uyembati judío reta. Ayemingueta viari'ā etei —jei—. ²¹ ¿Maera pa ndepirandu cheve? Epiprandu uyapisaca cheré vae reta pe che jae chupe reta vae re. Jae reta uicuua che jae vae —jei.

²² Cua jei ma yave Jesús, penti judío reta itenondegua reta jembiocui joco pe oī vae ocua Jesús jova re.

—¿Maera pa jucuarāi ndiyemingueta sacerdote tenondegua pe? —jei.

²³ —Icavi'ā ayemingueta yave, emimbeu mbae ra icavi'ā —jei Jesús—. Érei icavi ayemingueta. ¿Maera pa ndecua cheré? —jei.

²⁴ Jayave Anás omundo Jesús iyocuua reve Caifás pe - jae vi co sacerdote tenondegua.*Pedro uicuacu Jesús*

(Mt 26.71-75; Mr 14.69-72; Lc 22.58-62)

²⁵ Jare Simón Pedro uyemboi uyepée oī. ūru vae reta jei chupe:

—¿Jae'ā pa co nde penti jemimboe?

Pedro uicuacu. Jei:

—Jae'ā co che.

²⁶ Penti sacerdote tenondegua jembiocui - jae co jocua cuimbæ Pedro uyasia inambi chugüi vae jentará - jei Pedro pe:

—Che nduecha co temiti reta ñugüünoi vae pe jae ndive.

²⁷ Pedro jei ye:

—Jae'ā co che.

Jare cua jei ma yave, uru cuimbæ uñee.

Jesús Pilato jovai

(Mt 27.1-2, 11-14; Mr 15.1-5; Lc 23.1-5)

²⁸ Jayave giüraa reta Jesús Caifás jentü palacio pe. Neimbove asi. Jae reta uique'ā palacio japipe pe. Echa'ā uique yave joco pe jocua ara, iporomboe umimbeu chupe reta uyeminguata tēi co, jare ndarau tēi ipuere jou tembiú pascua pegua. ²⁹ Jayave Pilato oē chupe reta.

—¿Mbae re pa pembijeco cua cuimbæ? —jei chupe reta.

³⁰ —Cua cuimbæ jecocavi yave mona, ndarau tēi numee ndeve —jei reta.³¹ —Pe reta etei peraa peāa vaerā peporoyoci rupi —jei Pilato.

—Romano reta umaeño'l oreré nduyuca vaerā quía —jei reta.

³² Jucuarāi jei reta, uyeyapo vaerā Jesús jei ma uyeyapota chupe vae. Echa'ā Jesús umimbeu ma quiráita co umano. ³³ Jayave Pilato uique ye palacio pe jare ueni Jesús.

—¿Nde pa co jae judío reta juvicha guasu? —jei.

³⁴ —¿Ndeño pa ndiyemingueta jucuarāi, ani ūru vae reta pa umimbeu ndeve cheregua? —jei Jesús.

³⁵ —Che penti judío'ā co —jei Pilato—. Nerentaigua reta jare sacerdote reta itenondegua reta nemee cheve. ¿Mbae pa ndiyapo? —jei.

³⁶ —Che co jae penti mburuvicha guasu —jei Jesús—, érei che jae'ā co mburuvicha guasu ivi pegua reta rami. Che jocua reta rami yave mona, cherembiocui reta uñerārota tēi co, agüiye vaerā añemee judío reta pe. Érei che jae'ā co mburuvicha guasu ivi pegua reta rami —jei Jesús.

³⁷ Jayave Pilato jei chupe:

—¿Nde pa co jae penti mburuvicha guasu?

—Nde ndere rami che co jae penti mburuvicha guasu —jei Jesús—. Cuarā ayeyapo cuimbaerā. Cuarā ayu ivi pe. Ayu amimbeu vaerā añete vae. Opaete añete vae güirovia vae reta uyapisaca chiñee re —jei.

38 Jayave Pilato upirandu chupe:

—¿Mbae pa jocua añete vae?

Pilato jei Jesús umanota co

(Mt 27.15-31; Mr 15.6-20; Lc 23.13-25)

Jare cua jei ma yave, Pilato oẽ ye judío reta jovai jare jei chupe reta:

—Avāe'ã etei teco jese. 39 Êrei pe reta jecuaeño pipota ayora vaerā peve penti pereso pascua pe.

¿Pipota pa ayora vaerā peve cua judío reta juvicha guasu? —jei chupe reta.

40 Jae reta iñeeäta reve jei:

—Agiüye iyora jocua cuimbae. Iyora oreve Barrabás —jei reta.

Jocua Barrabás co jae imonda vae.

19

1 Jayave Pilato güüraaca Jesús uinupaca chicote pe. 2 Jare sundaro reta oñope yurāti catuii vae jare umbapúa oñono Jesús iñäca re. Jare omondeca reta Jesús pe temimonde pita vae. 3 Jayave jei reta chupe:

—¡Viva, judío reta juvicha guasu!

Jayave ocua reta jese ipo pe.

4 Jayave Pilato oẽ ye, jare jei judío reta pe:

—Mase, aruta peve picuua vaerā avāe'ã co teco jese.

5 Jayave Jesús oẽ. Güinoi jocua yurāti catuii vae iñäca re jare omonde temimonde pita vae. Jayave Pilato jei chupe reta:

—Mase, co oĩ cua cuimbae.

6 Sacerdote reta itenondegua reta jare jembiocui reta uecha yave Jesús, iñeeäta reve jei:

—¡Cutuca curusu re, icutuca curusu re!

Jayave Pilato jei chupe reta:

—Pe reta etei peraa picutuca curusu re. Echa'ã che avāe'ã etei teco jese —jei.

7 Judío reta jei Pilato pe:

—Ore nonoi penti mboroyocui, jare jocua mboroyocui rupi umanota co. Echa'ã jei jae co Tumpa Tai —jei reta.

8 Cua uyandu yave, Pilato uquiyete. 9 Jayave uique ye palacio pe jare upirandu Jesús pe:

—¿Quíá pegua pa nde?

Êrei Jesús jei'ã mbae ave chupe. 10 Jayave Pilato jei chupe:

—¿Maera pa niñee nemo'ã cheve? Che anoi mbaepuere nducutuca vaerā curusu re. Anoi vi mbaepuere ndoyora vaerā. ¿Ndicuaal'ã pa cua? —jei.

11 —Tumpa umaeño'ã nideré yave, ndarau tēi ndepuere cheré —jei Jesús—. Jáeramo chemee ndeve vae iyoa ete ma co.

12 Cua uyandu ma yave, Pilato uipota tēi oyora Jesús. Êrei judío reta iñeeäta reve jei:

—Cua cuimbae ndiyora yave, nde ndiyeyocu'ã ma co César pe. Echa'ã ipotave jei jae co mburuvicha guasu vae oyovaicho ma César ndive —jei reta.

13 Pilato cua uyandu yave, güünoë Jesús jare uguapi Empedrado jee vae pe. (Cua co jee Gabata hebreo iñee pe.) Echa'ã joco pe jecuaeño uña teco güinoi vae reta. 14 Jare jocua ara judío reta uyeyapicatu ñugüünoi pascua peguarā, jare ara mbite seri ma. Jayave Pilato jei judío reta pe:

—Co oĩ peruvicha guasu.

15 Jayave jae reta iñeeäta reve jei:

—¡Eraaca cua güi, eraaca cua güi, icutuca curusu re!

Pilato upirandu chupe reta:

—¿Aicutucata pa peruvicha guasu?

Jayave sacerdote reta itenondegua reta jei:

—Jaeño César oreruvicha guasu.

16 Jayave Pilato umee Jesús chupe reta uicutuca vaerā curusu re. Jayave jae reta uipisi Jesús güüraa.

Jesús uyecutuca curusu re jare umano

(Mt 27.32-44; Mr 15.21-32; Lc 23.26-43)

17 Jayave Jesús oẽ jare ovoi güüraa icurusu. Jayave sundaro reta güüraa Jesús Ācacuerenda jee vae pe. (Cua co jee Gólgota hebreo iñee pe.) 18 Joco pe uicutuca reta Jesús curusu re. Uicutuca reta vi íru mocui cuimbae reta jare oñono penti Jesús iyacata coti jare íru iyaso coti. Jesús oĩ mbite pe. 19 Jare

Pilato uicuatía curusu re oñonoca vaerā. Cuarāi uyecuatía oī: "Jesús Nazaret pegua, judío reta juvicha guasu." ²⁰ Jare jeta judío reta umíngueta cua uyecuatía oī vae. Echa'ā Jesús uyecutuca vae coiño oī tenta guasu güi. Jare uyecuatía oī hebreo iñee pe jare griego iñee pe jare latín pe. ²¹ Jayave judío reta isacerdote reta itenondegua reta jei Pilato pe:

—Agüiyeta tēi co ndicuatiá: 'Judío reta juvicha guasu.' Ndicuatiata tēi co: 'Cua cuimbae jei: Che co jae judío reta juvicha guasu' —jei reta.

²² —Cua aicuatía vae aicuatía ma co —jei Pilato.

²³ Jare sundaro reta uicutu ma yave Jesús, irundi reve uyembiiya Jesús jemimonde re umbiyao ma yave. Érei jemimonde pucu vae uyembívivi'ā. Uyeyapo penti güiñio. Cua vi sundaro reta uequi chugüi.

²⁴ Jayave sundaro reta jei uyupe:

—Agüiye yamondoro. Yayuguari jese, yaicuaa vaerā quía güiraata vae —jei reta.

Cuarāi uyeyapo Tumpa iñee pe uyecuatía oī vae. Echa'ā uyecuatía oī cuarāi: "Uyuguari reta cheremimonde re, uicuaa vaerā mbae nunga penti penti güiraa iyupe vaerā." Jucuarāi uyecuatía oī, jare jucuarāi uyapo sundaro reta.

²⁵ Jare uyemboi ñugüinói Jesús icurusu iyipi pe Jesús ichi, jare ichi ipiqui, jare María - jae co Cleofas jembireco - jare María Magdalena. ²⁶ Jesús uecha ichi jare jemimboe jae uau vae uyemboi ñugüinói coiño chugüi. Jare jei ichi pe:

—Chesi, joco oī nemembirā.

²⁷ Cua jaicue rupi jei jemimboe pe:

—Joco oī ndesirā.

Jáeramo jocua ora güive jocua jemimboe güiraa jenta pe Jesús ichi.

Jesús humano

(Mt 27.45-56; Mr 15.33-41; Lc 23.44-49)

²⁸ Cua jaicue rupi Jesús jei:

—Cheúe.

Cuarāi uyeyapo ma Tumpa iñee pe uyecuatía oī vae. Echa'ā Jesús uicuaa opaete iparavíqui opa ma.

²⁹ Jare joco pe oī vinagre penti yapepo pe. Jayave umäqui reta esponja vinagre pe. Jayave oñono reta ivira re jare omondo Jesús iyuru pe. ³⁰ Jare Jesús jou ma yave vinagre, jei:

—Opa ma ayapo Tumpa jei vae.

Jayave iñácatindi jare humano.

Jesús iyique uyecetu

³¹ Jare jocua ara judío reta uyeyapicatu ñugüinói pascua peguarā. Jáeramo uyerure reta Pilato pe omopéca vaerā curusu re ñugüinói vae reta itímaca jare güiraa vaerā joco güi. Echa'ā uipota'ā jetecue reta upita vaerā curusu reta re jocua mbutuu ara pe. Echa'ā jocua mbutuu ara uyepiu reta. ³² Jáeramo sundaro reta yugüiraa omopé penti cuimbae Jesús ndive curusu re uyecetu oī vae itímaca. Jayave omopé íru cuimbae itímaca. ³³ Érei yugüiraa yave Jesús pe, uecha umano ma. Jáeramo omopé'ā itímaca. ³⁴ Érei penti sundaro uicutu Jesús iyique pe, jare oē voi tugüi jare i. ³⁵ Jare uecha vae umimbeu cua, pe reta vi perovia vaerā. Jare cua umimbeu vae añete co. Echa'ā jae uicuaa cavi umimbeu vae añete co. ³⁶ Echa'ā opaete cua uyeyapo Tumpa iñee pe uyecuatía oī vae uyeyapo vaerā. Echa'ā uyecuatía oī cuarāi: "Ndaraú icágüe ave opé." ³⁷ Jare: "Umaeta reta jocua uicutu vae re." Jucuarāi uyecuatía oī.

Oñoti reta Jesús jetecue

(Mt 27.57-61; Mr 15.42-47; Lc 23.50-56)

³⁸ Cua jaicue rupi José Arimatea pegua uyerure Pilato pe güiraa vaerā Jesús jetecue. Cua José co jae penti Jesús jemimboe, érei uyecuaaca'ā. Echa'ā uquiyé judío reta güi. Jayave Pilato jei chupe ipuere güiraa Jesús jetecue. ³⁹ Nicodemo ou vi - jae co tenonde yave oo pítu yave Jesús pe vae. Jae güeru mirra jare áloes ueyaeue vae. Uepiti treinta kilo rupi. ⁴⁰ Jayave umbigüeyi reta Jesús jetecue, jare oñoma mbae ipiche cavi vae reta reve nieso pe. Echa'ā jucuarāiño mai uyapo judío reta, jetecue oñoti yave. ⁴¹ Jare Jesús uyecutuca vae pe oī penti temiti reta ñugüinói vae, jare jocua ipite pe oī penti teögüeriru ipiāu vae - ndei quía uñeñono pipe vae pe. ⁴² Jocua ara judío reta uyeyapicatu ñugüinói pascua peguarā. Jáeramo oñono reta Jesús jetecue jocua teögüeriru pe. Echa'ā coiño oī.

Jesús icove ye

(Mt 28.1-10; Mr 16.1-8; Lc 24.1-12)

¹ Jare ndei cōe cavi mbove domingo ara pe María Magdalena ou teögüeriru pe, jare uecha ita uyembísiri ma teögüeriru güi. ² Jayave osi oo Simón Pedro jare íru temimboe Jesús uau vae ñugüinói vae pe, jare jei chupe reta:

—Güiraa reta ma yandeYa teögüreriu güi, jare nduicuua'ã quiape ra oñono reta.

³ Jayave Pedro jare ūru temimboe oẽ pâve jare yugüiraa teögüreriu coti. ⁴ Mocui reve osi pâve yugüiraa, ērei ūru temimboe iñacua ete Pedro güi, jare oo uvâe teögüreriu pe Pedro jenonde. ⁵ Jayave ipo umae vaerā japipe coti, jare uecha nieso reta joco pe oĩ, ērei uique'ã. ⁶ Jayave Simón Pedro oo uvâe jaicue rupi, jare uique teögüreriu pe. Jare uecha nieso reta joco pe oĩ. ⁷ Uecha vi nieso Jesús iñâca re tenonde yave uñeñono vae uñeñomañoma oĩ tee ūru nieso reta güi. ⁸ Jayave jocua ūru temimboe vi - jae Pedro jenonde oo uvâe vae - uique teögüreriu pe, jare uecha yave, upurugüirovia. ⁹ Echa'ã ndei uicuua cavi reta Tumpa iñee pe uyecuatía oĩ vae quirâi Jesús icove yeta ou umanocue vae reta ipite güi.
¹⁰ Jayave temimboe reta yugüiraa ye jenta pe.

*Jesús uyecuua María Magdalena pe
(Mt 16.9-11)*

¹¹ Ērei María uyemboi oĩ teögüreriu iyipi pe. Uyao oĩ. Jare uyao oĩ rambueve, ipo umae vaerā teögüreriu japipe coti. ¹² Jare uecha mocui ángel reta uguapi ñugüinoi Jesús jetecue uñeñono vae pe. Jemimonde ti asi co. Penti uguapi oĩ Jesús iñâca jendacue coti jare ūru uguapi oĩ Jesús ipita jendacue coti. ¹³ Ángel reta jei María pe:

—Maera pa ndiyao?

—Güiraa reta ma cheYa, jare aicuua'ã quiape ra oñono reta —jei María.

¹⁴ Cua jei ma yave, María uyerova jare uecha Jesús uyemboi oĩ joco pe. Ērei uicuua'ã jae co Jesús vae.
¹⁵ Jayave Jesús jei chupe:

—Cuña, ¿maera pa ndiyao? ¿Quía pa ndeeca?

María ipia pe uyemingueta têi jae co temiti reta iyandarecoa. Jáeramo jei chupe:

—Carai, nde nderaa yave, emimbeu cheve quiape niñono, jare che araata.

¹⁶ —¡María! —jei Jesús chupe.

María uyerova ye icoti jare jei chupe:

—Raboni. (Cua uipota jei: “Oporomboe vae”.)

¹⁷ Jayave Jesús jei chupe:

—Agüiye chepisi. Echa'ã ndei ayupi cheRu pe. Ērei ecua emimbeu cheriví reta pe che jae cuarâi: ‘Aata ma cheRu pe - jae co peRu vi. Jae co cheTumpa - jae co peTumpa vi’ —jei.

¹⁸ Jayave María Magdalena oo umimbeu Jesús jemimboe reta pe.

—Aecha ma yandeYa —jei.

Jayave umimbeu chupe reta Jesús jei chupe vae.

Jesús uyecuua jemimboe reta pe

(Mt 28.16-20; Mr 16.14-18; Lc 24.36-49)

¹⁹ Jare jocua pîtu - domingo ara pe - Jesús jemimboe reta uyembati jare uyuquenda jonque reta. Echa'ã jae reta uquiyé judío reta güi. Jayave ou Jesús uyemboi ipite pe jare jei chupe reta:

—Pepiacatu.

²⁰ Cua jei ma yave, Jesús uechaca chupe reta ipo jare iyique. Jayave Jesús jemimboe reta uyerovia. Echa'ã uecha ma iYa. ²¹ Jayave Jesús jei ye chupe reta:

—Pepiacatu. CheRu chembou. Jae ramíño vi che pomondo —jei.

²² Jare cua jei ma yave, iputûé omoë icoti reta jare jei:

—Amee ma peve Espíritu Santo. ²³ Pembiasa yave ipotave vae pe imbaeyoa, imbaeyoa uyembaita co. Jare pembiasa'ã yave ipotave vae pe imbaeyoa, imbaeyoa ndarau uyembai —jei.

Tomás güirovia'ã Jesús regua

²⁴ Jare jocua doce jemimboe reta güi penti Tomás jee vae - jae co Choguaquiri pe uyembijee vae - oĩ'ã joco pe ūru reta ndive Jesús ou yave. ²⁵ Jare ūru Jesús jemimboe reta jei Tomás pe:

—Nduecha ma yandeYa.

Ērei Tomás jei:

—Aecha'ã yave uyecuturendacue ipo re jare añono'ã yave chepoáca uyecuturendacue pe jare añono'ã yave chepo iyique pe, ndarau arovia.

²⁶ Ocho ara uasa ma yave, temimboe reta ñugüinoi ye jocua o pe. Tomás joco pe oĩ vi. Yepe têi onque reta uyuquenda ñugüinoi, ērei Jesús ou uyemboi ipite pe jare jei:

—Pepiacatu.

²⁷ Jayave jei Tomás pe:

—Emae chepo re. Iñono cua pe nepoáca. Eupi ndepo iñono cheyique pe. Agüiye ma ico ndepurugüirovia mbae reve. Mburugüirovia reve ma ico —jei.

²⁸ —Nde co jae cheYa jare cheTumpa —jei Tomás.

²⁹ Jayave Jesús jei:

—Ndepurugüirovia ma cherecha ramo. Tuicha uyeroviata jocua cherecha mbae reve upurugüiroviata vae reta —jei.

Maera uyecuatía oī cua ñee reta

³⁰ Jare Jesús uyapo jemimboe reta jovaquejeta īru miacañi reta uicuaaca vaerā quía co jae, yepe tēi uyecuatía'ā oī cua pe. ³¹ Ërei aiciatía cua pe uyecuatía oī vae, perovia vaerā Jesús co jae Cristo - jae co Tumpa Tai - jare penoi vaerā tecove opa mbae vae cua perovia yave.

21

Jesús uyecuaa siete jemimboe reta pe

¹ Cua jaicue rupi Jesús uyecuaa ye jemimboe reta pe i Tiberias jee vae iyipi pe. Uyecuaa chupe reta cuarāi: ² Simón Pedro jare Tomás - jae co Choguaquiri pe uyembijee vae - jare Natanael Caná pegua - jocua Caná Galilea pegua co - jare Zebedeo tai reta jare mocui īru temimboe reta uyembati. ³ Jayave Simón Pedro jei īru reta pe:

—Aata pira aipisi vaerā.

—Ore ndoota vi nde ndive —jei reta.

Jayave yugüiraa uyupi chalana pe. Ërei jocua pītu uipisi'ā mbae ave. ⁴ Jare cōeta ma yave Jesús uyemboi oī i jembeí pe. Ërei temimboe reta uicuaa'ā jae co Jesús. ⁵ Jayave Jesús jei chupe reta:

—Cherivi reta, ¿pipisi ma pa mbae?

—Nduipisi'ā mbae ave —jei reta chupe.

⁶ —Pemombo pepisa chalana iyacata coti jare pipisita pira reta —jei Jesús.

Jayave jucuarāi uyapo reta, jare ipuere'ā ma umiāta pisa i güi jeta ete pira omboa ramo. ⁷ Jayave jocua temimboe Jesús uau vae jei Pedro pe:

—Jae co yandeYa.

Simón Pedro uyandu yave jocua cuimbae co jae iYa, uyemonde jare ugüeyi voi i pe. Echa'ā omboi jemimonde uparavíqu i cavi vaerā. ⁸ Jare īru reta yugüero chalana pe. Jae reta umiāta pisa pira reve. Echa'ā coiño ñugüinói i jembeí güi - cien metro rupi. ⁹ Jare yugüero oē i güi yave, uecha tata tatāpi reve joco pe. Uecha vi pira tatāpi íárambo jare mbiyape vi. ¹⁰ Jayave Jesús jei chupe reta:

—Peru mbovi pira pipisi vae.

¹¹ Jayave Simón Pedro uyupi ye chalana pe jare umiāta pisa i güi. Pisa tinee pira tuichacue vae pe - güinói ciento cincuenta y tres. Ërei yepe tēi jeta ete, ërei omondoro'ā pisa. ¹² Jayave Jesús jei chupe reta:

—Peyu rani pecaru.

Jare penti ave jemimboe iquiréi'ā upirandu chupe: “¿Quía pa co nde?” Echa'ā uicuaa jae co iYa. ¹³ Jayave Jesús oo uipisi mbiyape umee chupe reta. Jae ramíño vi umee chupe reta pira. ¹⁴ Jare mbapi vese ma cua re Jesús uyecuaa jemimboe reta pe icove ye güiive ou umanocue vae reta ipite güi.

Emingaru cheovecha reta

¹⁵ Ucaru reta ma yave, Jesús jei Simón Pedro pe:

—Simón, Jonás tai, ¿cherau ete pa cua reta güi?

—Nduau, cheYa —jei Pedro—. Ndicuaa che nduau co.

—Emingaru cheovecha-rai reta —jei Jesús chupe.

¹⁶ Jesús jei ye chupe:

—Simón, Jonás tai, ¿cherau pa?

—Nduau, cheYa —jei ye Pedro—. Ndicuaa che nduau co.

—Iyandareco cheovecha reta re —jei Jesús.

¹⁷ Jesús jei ye chupe mbapi vecea re:

—Simón, Jonás tai, ¿cherau pa?

Pedro ipiatiti. Echa'ā mbapi vese ma Jesús jei chupe: “¿Cherau pa?” Jayave jei ye:

—CheYa, nde ndicuaa opaete. Nde ndicuaa che nduau co.

—Emingaru cheovecha reta —jei Jesús chupe —. ¹⁸ Añete che jae ndeve, nde ndetairusu yave, ndiyemonde jare ndeguota ndipota ndeo vae rupi. Ërei nendechi ma yave, ndeupita ndeyiva jare īru vae omondecata ndeve jare nederata ndipota'ā ndeo vae pe —jei.

¹⁹ Cua jei Jesús umimbeu vaerā quiráita co umano Pedro. Jare Pedro umano yave, Tumpa uyembíadoracata imano rupi. Jayave Jesús jei Pedro pe:

—Eyu che ndive.

Temimboe Jesús uau vae

²⁰ Pedro uyerova yave, uecha jocua temimboe Jesús uau vae ou jaicue. Jocua temimboe co jae tenonde yave ucaru ñugüinoi yave ucaru oī Jesús iyipi pe jare: “¿Quía pa nemeeta, CheYa?” jei chupe vae. ²¹ Jare Pedro uecha yave jocua temimboe, upirandu Jesús pe:

—Mbae pa uyeypota chupe, cheYa?

²² Jesús jei chupe:

—Che aipota yave jae ico vaerā che ayu ye regua, jocua mbae'ā co ndeve. Nde eyu che ndive —jei.

²³ Jare opaete upurugüirovia vae reta uícuua cua Jesús jei vae, jare ipia pe uyemingueta tēi cua uipota jei jocua jemimboe ndarau umano. Êrei Jesús jei'ā ndarau umano. Jaeño jei: “Che aipota yave jae ico vaerā che ayu ye regua, jocua mbae'ā co ndeve.”

²⁴ Che co jae jocua Jesús jemimboe, jare che amimbeu añete co cua pe uyequatía oī vae. Echa'ā che aicuatía cua. Jare opaete nduicuua cua amimbeu vae añete co.

²⁵ Jare ime yejeta mbaembae Jesús uyapo vae. Opaete cua mbaembae regua uyequatía oī yave penti penti rupi, uatata opaete tupapire jendarā cua ivi pe. Amén.

LOS HECHOS DE LOS APÓSTOLES

Espíritu Santo outa

¹ Teófilo, tenonde aicuatía ndeve vae pe amimbeu ndeve opaete Jesús uyapo vae jare jocua oporomboe jese vae. ² Ndei oo ye ara pe mbove, umee mboroyocui reta Espíritu Santo rupi jemimondo uiparavo vae reta pe. ³ Jesús imano rendave pe, uyecuua chupe reta. Jae reta uicuua catu jae icove ye co jeta mbaembae uyapo jovaque vae jeco pegua. Jesús uyecuua chupe reta cuarenta ara, jare umingueta reta Tumpa iporoyocuia re.

⁴ Jae reta uyembati yave, Jesús oyocui agüiye vaerā yugüiraa tenta guasu Jerusalén güi. Oyocui uáro vaerā yandeRu umeeta chupe reta vae. Jesús jei chupe reta:

—Jocua re chemiari ma peve. ⁵ Juan upurumbibautiza i pe, ērei pe reta piyembibautizacata Espíritu Santo pe mbovi ara rupi —jei.

Jesús oo ye ara pe

⁶ Jayave yati vae reta upirandu Jesús pe: —OreYa, ¿nemaeñota pa Israel pegua reta re uyeyapo vaerā mburuvicha retardā cua ara reta rupi?

⁷ —Ndarau picuua jocua ara regua —jei Jesús—. Jaeño cheRu jeita jocua re —jei—. ⁸ Ērei pe reta penoita Espíritu Santo imbaepuere, ou yave peve, jare pe reta chemimbeuta Jerusalén pe, opaete Judea rupi, Samaria rupi jare opaete ívi rupi —jei chupe reta.

⁹ Jare Jesús opa imiari chupe reta yave, oo ivate, jae reta umae jese rambueve. Jayave amapitu umbiyasoí Jesús, jare uecha'á ma reta. ¹⁰ Jare umae ngatu ñugüinoi rambueve ara cotí, Jesús oo rambueve, mocui cuimbæ uyecuua jae reta iyipi pe. Cua cuimbæ reta jemimonde tí asi. ¹¹ Cua reta jei chupe reta:

—Cuimbae Galilea pegua reta, ¿maera pa piyemboi pemaе peí ara cotí? Jesús oo ma pegüi ara pe. Ērei jae etei ou yeta jucuarái ete, peeche oo rami —jei reta.

Uiparavo reta íru vae Judas ipepica pe

¹² Jayave temimondo reta yugüero ye Jerusalén pe ivitu guasu Olivos jee vae güi. Jocua ivitu guasu coño oí Jerusalén güi. Judío reta iporoyocui umaeño uguata vaerā joco pe Jerusalén güi mbutuu ara pe. ¹³ Yugüero uvæ yave, uique reta penti tenta pe, jare uyupi o ivate vae pe. Joco pe yugüireco Pedro, Jacobo, Juan, Andrés, Felipe, Tomás, Bartolomé, Mateo, Alfeo tai Jacobo jee vae, Simón Zelote jare Jacobo tíví Judas jee vae. ¹⁴ Opaete cua reta, jare Jesús ichí María jare íru cuña reta, jare Jesús tíví reta jecuae uyerure penti ramíño.

¹⁵ Upurugüirovia vae joco pe ñugüinoi vae reta ciento veinte rupi. Jare penti ara Pedro uyemboi ipite pe jare jei:

¹⁶ —Cheriví reta, jupi co uyeyapo vaerā David aracae uicuatía Judas re vae. Espíritu Santo etei cua umimbeu yandeve David rupi. Judas güiraa cuimbæ reta Jesús oí vae pe uipísica vaerā —jei—. ¹⁷ Jae icose yande ndive, jare uyparavo co uyapo vaerā cua mbaravíqui —jei—. ¹⁸ Jae uipisi corepoti icavi mbae vae uyapo vae re. Jayave corepoti pe ogua penti ívi. Joco pe oa ivate güi, jare jie osoro, jare opaete ichuri uyecuavo —jei Pedro—. ¹⁹ Cua jerácuia opaete Jerusalén pegua reta pe. Jáeramo jocua ivi jee Acéldama jae reta iñee pe —jei—. (Acéldama uipota jei: “Ívi tugüi jepicue.”) ²⁰ Echa'á uyecuatiá oí Tumpa iñee pe Salmo reta pe cuarái:

‘Tuyeyapo ívi ipo mbae ico vae,
jare agüiye quía tuico pipe.’

Jare:

‘Íru vae tuyapo chugüi iparavíqui.’

Jucuarái uyecuatiá oí —jei chupe reta—. ²¹⁻²² Ime cua pe ñugüinoi cua cuimbæ reta. Jae reta yugüireco yande ndive, yandeYa Jesús ico yande ndive rambueve. Echa'á yugüireco yande ndive Juan umbibautiza Jesús güive Jesús yandepite güi oo regua —jei Pedro—. Jáeramo icavi co cua cuimbæ reta güi penti yaiparavo vaerā. Jae umimbeuta íru vae reta pe yande ndive Jesús icove ye co ou umanocue vae reta ipite güi —jei chupe reta. ²³ Jayave uiparavo reta mocui cuimbæ. Penti jee co José Barsabás - jae co uyembijee Justo pe vae. Íru cuimbæ jee co Matías. ²⁴ Jayave uyerure reta Tumpa pe cuarái:

—OreYa, nde ndicuua opaete vae ipia. Eechaca oreve quía nunga ra ndiparavo ma cua mocui cuimbæ güi, ²⁵ jae ombori vaerā cua mbaravíqui pe, jare ico vaerā nderemimondorá. Judas opia cua mbaravíqui güi, icavi mbae vae uyapo ramo, jare oo ma jendará jae uiparavo vae pe —jei reta Tumpa pe.

²⁶ Jayave uyuguari reta jee re, uicuua vaerā quía nunga ra Tumpa uiparavo ma. Jare uiparavo Matías, jare jae uyeyapo Jesús jemimondorā īru once reta ndive.

2

Espíritu Santo ou

¹ Pentecostés ara pe opaete upurugüirovia vae reta penti ramiño uyembati. ² Jare aramoíno ou ara güi jiapu vae penti ívitu tanta uyepeyu vae rami. Tanta jiapu uguapi ñugüïnnoi vae pe. ³ Jayave uyecuua chupe reta tataendi rami. Cua uyecuua penti penti iyapite re. ⁴ Jayave opaete joco pe ñugüïnnoi vae reta tinee Espíritu Santo pe, jare umbipi uyemingueta reta ambie vae iñee Espíritu Santo umee chupe reta uyemingueta vaerā vae pe.

⁵ Jare jocua ara reta pe yugüüreco Jerusalén pe jeta judío ambiembie ivi güi yugüero vae reta. Cua reta umbiadora Tumpa. ⁶ Jare cua jiapu vae uyendu yave, uyembati jeta vae, jare opaete vae ipiacañi. Echa'ā upurugüirovia vae reta uyemingueta ñugüïnnoi, jare penti penti yati vae reta uyandu iñeei pe jei vae. ⁷ Ipiacañi reve jei reta:

—¡Mase, Galilea pegua reta co opaete cua uyemingueta vae reta! ⁸ ¿Quirai ra yayandu uyemingueta ñaniñee ñanemichi güiive yayemingueta pipe vae pe? —jei reta—. ⁹ Yande co jae Parto pegua, Medo, Elam, Mesopotamia, Judea, Capadocia, Ponto, Asia, ¹⁰⁻¹¹ Frigia, Panfilia jare Egipio pegua, jare Africa pegua Cirene iyipi pe yaico vae, jare romano reta cua pe yaico vae, Creta jare Arabia pegua. Yande co jae judio reta jare judiorā yayeyapo vae reta. Opaete yayandu ñaniñee pe uyemingueta ñugüïnnoi miacañi Tumpa uyapo vae re —jei reta.

¹² Jare opaete yati vae reta ipiacañi jare jei uyupe:

—Mbae ra co cua?

¹³ īru vae reta oyoyai.

—Usavipo ñugüïnnoi —jei reta.

Pedro umimbeu yati vae reta pe

¹⁴ Jayave Pedro uyemboi jocua īru once Jesús jemimondo reta ndive, jare jei yati vae reta pe iñeeäta reve:

—Cuimbae Judea pegua reta, jare opaete pico Jerusalén pe vae. Cua regua pipota picuua yave, piyapisaca chiñee re —jei—. ¹⁵ Pe reta pepiá pe piyemingueta tēi cua reta usavipo ñugüïnnoi. Èrei jucuarāi'ā co. Echa'ā neimboveño co —jei—. ¹⁶ Tumpa iñee aracae umimbeu vae Joel imiari cua re. Jae jei cuarāi:

¹⁷ 'Jare ara taicuegua reta pe' —jei Tumpa— 'ameeta cheEspíritu opaete vae pe.

Jare perai reta jare perayi reta umimbeuta chiñee.

Jare cunumi reta jare indechi vae reta upauta.

¹⁸ Jayave jocua ara reta pe ameeta cheEspíritu cuimbae reta jare cuña reta uyeyocui cheve vae pe, jare umimbeuta reta chiñee.

¹⁹ Jare tambou miacañi reta ara re jare ivi pe.

Imeta tugüi, tata jare tatāti.

²⁰ Guarasi uñemipiñumimbita, jare yasi uyeyapota tugüi rami, ndei pe Ya iväe ara ou mbove.

Jocua ara opaete vae ipiacañita co.

²¹ Jare opaete uyerureta pe Ya pe ombori vaerā vae reta uyembiasacata co' —jei.

Jucuarāi jei Joel —jei Pedro chupe reta.

²² Pedro jei vi chupe reta:

—Cuimbae Israel pegua reta, piyapisaca cua re. Tumpa uyapoca pepite pe miacañi reta Jesús Nazaret pegua pe. Jucuarāi Tumpa uechaca peve Jesús añete vae co. Cua picuua catu co pe reta —jei—. ²³ Cua Jesús uñemee umano vaerā, Tumpa jei vae uyeyapo vaerā. Tumpa uicuua opaete ndei uyeyapo mbove. Èrei pe reta pipisi picutuca curusu re cuimbae jeco pochi vae reta pe piyucaca —jei—. ²⁴ Èrei Tumpa oyora mano yandepisi pipe vae güi, jare umbijecove ye güero umanocue vae reta ipite güi. Echa'ā mano ipuere'ā etei oyopia Jesús —jei Pedro—. ²⁵ Echa'ā David jei Jesús re cuarāi:

'Aecha cheYa jecuaeño cherovai.

Cheacata pe oí ramo, ndarau aquíye.

²⁶ Jáeramo ayerovia chepia pe,

jare chemiari ayecou reve.

Aicota co aäro reve.

²⁷ Echa'ā ndeeyata'ā cherecove umanocue vae reta ñugüïnnoi vae pe.

Che co jae jupi vae.

Nemaenota'ā cheretecue re icumegua vaerā.

²⁸ Ndicuaaca cheve quirāi aico vaerā ayerovia reve,
jare ayerovia eteta vi nde ndive aī yave.
Jucuarāi jei David —jei chupe reta—.

²⁹ Cherivi reta, chepuere chemiari peve yandetenondegua David re. Jae umano jare uñenotica, jare iñenoticarenda imeño oī yande ndive —jei Pedro—. ³⁰ Êrei Tumpa jei jee re David pe umbiguapita co David iguapia pe David iñemoñaa reta güi penti oporoyocui vaerā. Jocua co jae Cristo, Tumpa ombou vae. Opaete cua David uicuua. Echa'ā David Tumpa iñee aracae umimbeu vae ico ramo. ³¹ Uicuua ndei uyeyapo mbove, jare imiari Cristo icove yeta ou umanocue vae reta ipite güi vae re. Echa'ā jei Cristo re uyeyata'ā co jecove umanocue vae reta ñugüinoi vae pe, jare icumeguata'ā co jetectue —jei—. ³² Tumpa umbijecove ye cua Jesús güeru umanocue vae reta ipite güi, jare ore opareve cua numimbeu ūru vae reta pe —jei—. ³³ Tumpa güiraa ma ara pe imbaepuere pe, jare umee chupe jocua jei umeeta chupe Espíritu Santo vae. Jáeramo Jesús etei ombou cua peeche jare piyandu vae —jei Pedro chupe reta—. ³⁴ Echa'ā David uyupi'ā ara pe. Êrei jae etei jei cuarāi:

'YandeYa jei cheYa pe:

Eguapi cheyipí pe cheacata coti,

³⁵ nderovaicho reta opa amiamiri regua' —jei.

Jucuarāi jei David —jei Pedro chupe reta—.

³⁶ Pe reta co jae Israel pegua reta. Jáeramo picuua catu cua. Pe reta picutuca Jesús, ërei Tumpa uyapo ma yandeYara - jae co Cristo —jei Pedro.

³⁷ Cua uyandu reta yave, tuicha rupi ipiatiti reta, jare upirandu Pedro jare ūru Jesús jemimondo reta pe:

—Oreriquei reta, ¿mbae pa nduyapota?

³⁸ Jayave Pedro jei chupe reta:

—Peeya piyeminguela icavi mbae vae pepia pe oī vae, jare piyembibautizaca Jesucristo jee re, Tumpa umbiasa vaerā peve pembae yoa reta. Jare jae umeeta peve Espíritu Santo —jei—. ³⁹ Echa'ā cua Tumpa jei umeeta vae co jae pembaeña, perai reta peguarā, opaete mbiri ñugüinoi vae reta peguarā jare opaete yandeYa Tumpa uenita vae reta peguarā —jei.

⁴⁰ Jare Pedro umbiaracuaa jeta ye ye. Jei chupe reta:

—Añave yugüireco vae reta icavi mbae vae uyapo. Piyembiasaca pe reta cua reta güi —jei.

⁴¹ Jayave Pedro jei vae güirovia vae reta uyembibautizaca, jare jocua ara tres mil rupi uñemiru upurugüirovia vae reta ndive. ⁴² Jare jecuae upurugüirovia vae reta uyemboe Jesús jemimondo reta iporomboe re, jare opaete penti ramíño ñugüinoi. Jecuae uyembati, umbiyao tembíu uyupe, jare uyerure Tumpa pe.

Upurugüirovia vae reta uyapo vae

⁴³ Jare opaete tenta guasu pegua reta ipiacañi, jare Jesús jemimondo reta uyapo jeta miacañi reta.

⁴⁴ Jare opaete upurugüirovia vae reta uyembati, jare opaete imbaembae reta penti ramíño co. ⁴⁵ Jare umee imbaembae reta, jare umbiyao jepicue mbaeti mbae güiñoi vae reta pe. ⁴⁶ Jare opa ara yugüiraa pâve uyembati Tumpa jo pe. Jare tenta tenta rupi umbiyao tembíu uyupe jare ucaru pâve reta uyerovia jare ipiacañu reve. ⁴⁷ Jae reta umbiadora Tumpa, jare opaete tenta guasu pegua reta umae cavi jese reta. Jare opa ara yandeYa umíru jae reta ndive uyembiasaca vae reta.

3

Uguata mbae vae ucuera

¹ Pedro jare Juan yugüiraa pâve Tumpa jo pe, Tumpa pe uyerure vaerā, mbapi ora ma caaru yave.

² Jare ūru vae reta güeru opa ara rupi penti cuimbae ipuere mbae uguata vae oñono Tumpa jo jonque pe. Cua onque jee co ipóra vae. Cuimbae ichi güi oa güiive ipuere'ā etei uguata. Jocua onque pe cuimbae uyerure corepoti re Tumpa jo pe uique vae reta pe. ³ Cuimbae uecha Pedro jare Juan ndei uique Tumpa jo pe mbove, jare uyerure corepoti re chupe reta. ⁴ Jayave Pedro jare Juan umae ngatu jese, jare Pedro jei:

—Emae oreré.

⁵ Jayave cuimbae umae ngatu jese reta, umeeta echá mbae chupe ramo. ⁶ Êrei Pedro jei:

—Mbaeti anoi corepoti jare oro. Êrei anoi vae tamee ndeve. Jesucristo Nazaret pegua jee re epúa jare egua —jei chupe.

⁷ Jayave Pedro uipisi cuimbae ipo iyacata pe umupúa. Jare jupivoiño ipirata cuimbae ipi jare ipiñúa.

⁸ Jare cuimbae uyemboi voi. Jayave uguata jare uique jae reta ndive Tumpa jo pe. Uguata jare upiririquiriquí oo, jare umbiadora Tumpa. ⁹ Jare opaete tenta guasu pegua reta uecha uguata jare umbiadora Tumpa. ¹⁰ Uicuua reta jae co uguapise Tumpa jo jonque ipóra vae pe uyerure corepoti re vae. Jare ipiacañi reta. Uquiye reta vi cua uyeyapo cuimbae pe vae re.

Pedro umimbeu yati vae reta pe oca Salomón jee vae pe

¹¹ Cuimbae ucuera ma vae uyepisi Pedro jare Juan re. Jare opaete tenta guasu pegua reta osi uyembati ipiacañi reve jae reta ñugüinói vae pe oca Salomón jee vae pe. ¹² Jayave Pedro uecha yave, jei tenta guasu pegua reta pe:

—Cuimbae Israel pegua reta, ¿maera pa pepiacañi cua re? ¿Maera pa pemaе ngatu oreré? ¿Pepia pe piyemingueta pa oreño nduyapo uguata vaerā cua cuimbae orembaepuere rupi ani jupi vae nduyapo ramo? Jucuará'i co —jei—. ¹³ Abraham, Isaac, Jacob jare yandetenondegua reta iTumpa umbiadatoraca ma Jesús —jae co Tumpa Tai. Cua Jesús pe reta pemee, jare períro Pilato jovai. Echa'á Pilato jei tēi oyoraca vaerā —jei—. ¹⁴ Èrei pe reta períro cua Jesús —jae co iyoa mbae vae jare jupi vae —jare piyerure Pilato pe oyoraca vaerā peve penti upuruyuca vae —jei Pedro—. ¹⁵ Jare piyucaca jocua tecove umee yandeve vae. Jae co Tumpa umbijecove ye güeru umanocue vae reta ipite güi. Jocua co ore numimbeu nduico —jei—. ¹⁶ Mburugüirovia Jesús jee re vae jeco pegua, jae jee umbigüera cua cuimbae pe reta peechea jare picuua vae. Añete co, jocua mburugüirovia Jesús umee vae umbigüera cavi ete cua cuimbae opaete pe reta perovaque —jei chupe reta—.

¹⁷ Añave, cherivi reta, aicuua peruvicha reta jare pe reta vi piyapo cua icavi mbae vae, picuua'á ramo —jei—. ¹⁸ Èrei jucuarái uyapo Tumpa, opaete iñee aracae umimbeu vae reta jei rami. Echa'á jei reta Cristo uiporarañotai co —jei—. ¹⁹ Jayave peeya piyemingueta icavi mbae vae pepia pe oí vae jare piyerova Tumpa coti, pombaeyoa reta uyembai vaerā, jare ou vaerā yandeYa güii ara mbiacatu pegua reta, ²⁰ jare Tumpa ombou ye vaerā Jesucristo tenonde yave jerácula peve vae —jei—. ²¹ Jae upitata ara pe opaete mbaembae uyeyapicatu cavi regua. Jocua mbaembae re Tumpa imiari oñono tee iñee umimbeu vaerā vae reta rupi aracae güive —jei Pedro chupe reta—. ²² Echa'á Moisés jei yandetenondegua reta pe: 'YandeYa Tumpa ombouta peve iñee umimbeuta vae periví reta ipite güi, chembou rami. Piyapisacata jese opaete jeita peve vae re. ²³ Jare ime yave quía uyapisacata'á jocua Tumpa iñee umimbeuta vae re vae, Tumpa omombota co íru vae reta ipite güi' —jei, jei Pedro—.

²⁴ Jare jucuarái vi jei opaete Tumpa iñee aracae umimbeu vae reta Samuel güive. Opaete penti rami umierácula cua ara reta —jei—. ²⁵ Pe reta co jae Tumpa iñee aracae umimbeu vae reta iñemoñaa reta, jare petenondegua reta pe Tumpa jei vae uyeyapota peve. Echa'á Tumpa jei Abraham pe: 'Niñemoñaa rupi ayapota co icavi vae opaete ivi pegua reta pe' —jei, jei Pedro—. ²⁶ Tumpa umbijecove ye Tai güeru umanocue vae reta ipite güi, jare ombou ma peve tenonde ete, uyapo vaerā icavi vae peve, penti piyerova vaerā Tumpa coti pereco icavi mbae vae güi —jei Pedro chupe reta.

4

Pedro jare Juan mburuvicha reta jovai

¹ Pedro jare Juan imiari ñugüinói rambueve tenta guasu pegua reta pe, yugüeru sacerdote reta, Tumpa jo iyandarecoa reta juvicha jare saduceo reta. ² Jae reta pochi Jesús jemimondo reta pe. Echa'á Jesús jemimondo reta omboe tenta guasu pegua reta, jare umimbeu chupe reta Jesús icove ye co ou umanocue vae reta ipite güi. ³ Jayave jae reta uiplisi Pedro jare Juan, jare oñono peresoriru pe piareve regua. Echa'á caaru ma co. ⁴ Èreijeta ete Tumpa iñee uyandu vae reta güirovia. Cuimbae reta güirovia vae cinco mil rupi.

⁵ Piareve pe uyembati Jerusalén pe mburuvicha reta, tenta guasu pegua reta itenondegua reta, mboroyoci re oporomboe vae reta, ⁶ Anás —jae co sacerdote tenondegua — Caifás, Juan, Alejandro jare opaete sacerdote tenondegua jentará reta. ⁷ Jayave güeruruca Pedro jare Juan jae reta ipite pe, jare upirandu chupe reta:

—Mbae nunga mbaepuere pe pa piyapo cua? Jare ¿quía jee re pa piyapo?

⁸ Jayave Pedro tñee Espíritu Santo pe, jare jei chupe reta:

—Mburuvicha tenta guasu pegua reta jare tenondegua Israel pegua reta, ⁹ añave pepirandu peí oreve cua icavi vae uyeyapo vae re. Pipota picuua quirái ra cua cuimbae ucuera ma imbaerasí güi —jei Pedro—. ¹⁰ Picuua catu opaete pe reta, jare tuicuua opaete Israel pegua reta, Jesucristo Nazaret pegua jee re ucuera ma cua cuimbae perovaque oí vae. Pe reta picutuca curusu re cua Jesucristo, èrei Tumpa umbijecove ye güeru umanocue vae reta ipite güi —jei—. ¹¹ Cua Jesús pe reta períro, tenta ita pegua iyapoa reta penti ita güiríro rami. Èrei jae uyeyapo ma ita uñeñono tenonde tentarā vae rami —jei—. ¹² Jare mbaeti ye quía re yandepuere yayembiasaca. Echa'á uñemee'á ivi pegua reta pe íru tee, jese uyembiasaca vaerā —jei chupe reta.

¹³ Jayave yati vae reta uecha quirái Pedro jare Juan uquiyé mbae reve imiari, yepe tēi mocui revejeta'á uyemboe. Járamo ipiacañi reta jese. Jare uicuua Jesús ndive yugüirecose vae. ¹⁴ Èrei uecha reta yave cuimbae ucuera vae uyemboi oí jae reta ndive, ipuere'á jei mbae Jesús jemimondo reta coti. ¹⁵ Jayave oyocui Pedro jare Juan oé rani vaerā ipite güi. Jayave uyemingueta reta.

¹⁶ —¿Mbae ra yayapota cua cuimbae reta pe? Echa'ã opaete Jerusalén pegua reta uicuua penti miacañi tuicha vae uyapo reta co, jare yande yandepuere'ã yaicuacu —jei reta—. ¹⁷ Jayave yayocui cua reta agüiye vaerā añave güive ímiari quía pe cua cuimbae jee re, agüiye vaerā íru vae reta uicuua —jei reta.

¹⁸ Jayave ueni Pedro jare Juan, jare oyocui:

—Agüiye ye pemiarí ani peporomboe Jesúis jee re.

¹⁹ Érei Pedro jare Juan jei chupe reta:

—¿Mbae ra Tumpa uiptota nduyapo vaerā? Nduyapo yave peporoyocui, ndarau nduyapo Tumpa iporoyocui. ¿Mbae nunga mboroyocui ra nduyapotá? Pe reta pemimbeu oreve. ²⁰ Echa'ã ore numimbeuñotai co nduecha jare nduyandu vae —jei reta.

²¹ Jayave yati vae reta uminguiey tēi omondo Pedro jare Juan. Uinupaca'ã, tenta guasu pegua reta güi uquiyé ramo. Echa'ã opaete tenta guasu pegua reta umbiadora Tumpa jocua uyeyapo vae jeco pegua.

²² Echa'ã cuimbae miacañi pe ucuera vae cuarenta año uasa ma güiñoi.

Upurugüirovia vae reta uyerure Tumpa pe umiatangátu vaerā

²³ Jare Pedro jare Juan omoé ma yave, yugiiraa íru reta pe, jare umimbeu chupe reta opaete sacerdote reta itenondegua reta jare tenta guasu pegua reta itenondegua reta jei chupe reta vae. ²⁴ Jae reta cua uyandu yave, uyerure Tumpa pe:

—OreYa Tumpa, nde co jae ara, ivi, i guasu jare opaete mbaembae ñugüinoi pipe vae iyapoa —jei reta—. ²⁵ Nde ndere nderembiocui David jee vae rupi cuarái:

‘¿Maera pa pochi judío mbae vae reta?

¿Maera pa ivi pegua reta ipia pe uyemingueta uyapo vaerā icavi mbae vae?

²⁶ Mburuvicha guasu ivi pegua reta

jare ivi pegua reta itenondegua reta uyembati penti rami

yandeYa jare Cristo jovaicho retarā.’

Jucuarái nde ndere David rupi —jei reta—.

²⁷ Añete co, Herodes, Poncio Pilato, judío mbae vae reta jare Israel pegua reta uyembati cua tenta guasu pe Jesúis jovaicho retarā. Jesúis co jae ndeRai. Jae co jupi vae nde ndiparavo vae —jei reta—. ²⁸ Uyembati reta uyapo vaerā nde ndiyapoca vae. Aracae güive nde ndipota uyapo reta vaerā —jei reta Tumpa pe—. ²⁹ Añave, oreYa, ndicuua oreminguiey tēi vae reta jei vae. Jáeramo orembori numimbeu vaerā niñee nduquiyé mbae reve. Echa'ã ore co nderembiocui. ³⁰ Jare eechaca nembaepuere ndepurumbigüera vaerā, jare iyapo vi miacañi reta Jesúis jee re. Jae co ndeRai jupi vae —jei reta.

³¹ Jare opa uyerure yave, yati ñugüinoi vae pe ivicata vae echa. Jare opaete jae reta tínee Espíritu Santo pe, jare imiari Tumpa iiñee re uquiyé mbae reve.

Upurugüirovia vae reta uyembori

³² Jare opaete upurugüirovia vae reta penti ramíño ñugüinoi. Mbaeti penti ave jei imbaembae re: “Jocua co chembae.” Echa'ã opaete imbaembae reta penti ramíño. ³³ Jare mbaepuere tuicha vae reve Jesúis jemimondo reta umimbeu yandeYa Jesúis icove ye co ou umanocue vae reta ipite güi. Jare opaete jae reta ipiacavi ete. ³⁴ Mbaeti penti ave mbae uata chupe vae jae reta ipite pe. Echa'ã opaete ivi retajare tenta reta güinoi vae reta umee, jare güeru jepicue, ³⁵ jare oñono Jesúis jemimondo reta jovai. Jayave umbiyao reta uata chupe vae reta pe. ³⁶⁻³⁷ Jare penti levita ivi Chipre pegua José jee vae güinoi vi penti ivi. Jesúis jemimondo reta umbijee cua cuimbae Bernabé. (Cua tee uiptota jei: “Upurumbipiacatu vae”). Jae umee iiñi jare güeru jepicue oñono Jesúis jemimondo reta jovai.

5

Ananías jare Safira

¹ Érei íru cuimbae Ananías jee vae jembireco Safira jee vae ndive umee penti iiñi. ² Jayave Ananías unuvatu iyupe mbovi ivi jepicue güi jembireco uicuua reve, jare güeru mboviño oñono Jesúis jemimondo reta jovai. ³ Jayave Pedro jei chupe:

—Ananías, ¿maera pa nemaeño Satanás re umitinee vaerā ndepia icavi mbae vae pe? Niñuvatu ndiyupe mbovi ndeiví jepicue güi. Ndapu ma co Espíritu Santo pe —jei—. ⁴ Ndeí nemee ndeiví mbove, nembae co. Jare nemee ma yave, jepicue vi nembae co. ¿Maera pa ndepia pe ndiyemingueta icavi mbae vae ndiyapo vaerā? Ndapu'ã co cuimbae reta peñio. Ndapu Tumpa pe etei —jei Pedro Ananías pe.

⁵ Cua uyandu yave, Ananías oa ivi re, jare umano. Jare opaete cua regua uicuua vae reta uquiyé ete.

⁶ Jayave upúa cuimbae tairusu vae reta, jare oñoma umanocue, jare güiraa oñoti.

⁷ Mbapi ora ma uasa yave, uique jembireco. Jae uicuua'ã mbae uyeyapo vae. ⁸ Jayave Pedro upirandu chupe:

—Emimbeu cheve, ¿pemee pa peiví cuarái pe?

Cuña jei chupe:

—Añete, jucuarāi pe co —jei.

⁹—¿Maera pa pe reta piyemboemboe pembiavai vaerā yandeYa iEspíritu? —jei Pedro chupe—. Co onque pe ma yugüeru neme iñotia reta. Jae reta ndereraata vi —jei.

¹⁰ Jare jupivoiño Safira oa Pedro jovai, jare umano. Uique ma yave cuimbae tairusu vae reta, uecha umano ma. Jayave güíraa oñoti imecue iyípi pe. ¹¹ Jare upurugiørovia vae reta jare opaete cua mbaembae regua uicuua vae reta uquiyé ete.

Jeta miacañi reta

¹² Jare uyeyapo jeta miacañi reta tenta guasu pegua reta ipite pe Jesús jemimondo reta rupi. Jare opaete upurugiørovia vae reta uyembati oca Salomón jee vae pe. ¹³ Jare opaete íru vae reta uquiyé uyembati vaerā jae reta ndive. Ërei tenta guasu pegua reta uipiu. ¹⁴ Jare jecuaeño jeta íru cuimbae reta jare cuña reta güírovia yandeYa re. ¹⁵ Jare tenta guasu pegua reta güíraa imbaerasi vae reta oñono calle reta rupi jupa reve. Cua uyapo reta Pedro iguariasía yepe oí vaerā amocue vae re, jae uasa oo oí yave. ¹⁶ Jare jeta vae yugüeru Jerusalén pe íru tenta guasu coiño Jerusalén güi ñugüinoi vae reta güi, jare güeru imbaerasi vae reta jare aña oya jese vae reta. Jare opareve ucuera.

Mburuvicha reta uyapo icavi mbae vae Pedro jare Juan pe

¹⁷ Jayave sacerdote tenondegua jare opaete saduceo jae ndive ñugüinoi vae reta ñacatāa Jesús jemimondo reta re. ¹⁸ Jáeramo uipisi reta, jare oñono peresoriru tenta guasu pegua pe. ¹⁹ Ërei pítu yave penti ángel yandeYa pe uyeyocui vae uipecia peresoriru jonque reta. Jayave güíraa Pedro jare Juan oca pe, jare jei chupe reta:

²⁰—Pecua piyemboi Tumpa jo pe pemimbeu tenta guasu pegua reta pe cua tecove ipíau vae regua.

²¹ Cua uyandu yave, Pedro jare Juan uique Tumpa jo pe neimbove asi jare oporombœ.

Cua uyeyapo rambueve, sacerdote tenondegua jare jae ndive ñugüinoi vae reta ueni opaete mburuvicha reta jare tenondegua Israel pegua reta. Jayave jae reta omondo sacerdote tenondegua jembiocui reta peresoriru pe, jae reta güeru vaerā tēi Jesús jemimondo reta. ²² Ërei uyeyocui vae reta yugüiraa uvâe yave, uvâe'á Jesús jemimondo reta peresoriru pe. Jayave yugüeru ye yave, jei reta yati vae reta pe:

²³—Nduetcha peresoriru jonque reta uyeyuquenda cavi oí, jare jāroa reta uyemboi ñugüinoi onque reta rupi. Ërei nduiepa yave, nuvâe'á quíapipe pe —jei reta.

²⁴ Cua uyandu yave, sacerdote tenondegua, Tumpa jo iyandarecoa reta juvicha jare sacerdote reta itenondegua reta ipíacañi. Jare uicuua'á mbae ra uyeyapota. ²⁵ Jayave ou penti vae, jare jei chupe reta:

—Cuimbae piñono peresoriru pe vae reta ime Tumpa jo pe ñugüinoi, jare omboe ñugüinoi tenta guasu pegua reta —jei.

²⁶ Jayave Tumpa jo iyandarecoa reta juvicha oo sacerdote tenondegua jembiocui reta ndive, jare güeru cavi Jesús jemimondo reta uinupa mbae reve. Echa'á uquiyé reta tenta guasu pegua reta güi. Ipia pe uyeminguela aramoi uyapita reta ita pe. ²⁷ Jare güeru yave, oñono mburuvicha reta jovai. Jayave sacerdote tenondegua jei Jesús jemimondo reta pe:

²⁸—Poyocui tēi ma agüiye ye vaerā peporombœ jocua cuimbae jee re. Echa'á pemimbeu ma opaete Jerusalén pegua reta pe cua moromboe. Jare pipota pemboya jocua cuimbae imano oreré —jei reta.

²⁹ Jayave Pedro jare íru Jesús jemimondo reta jei chupe reta:

—Icavi ete co nduyapo vaerā Tumpa iporoyocui, cuimbae reta iporoyocui güi. ³⁰ Yandetenondegua reta iTumpa umbijecove ye Jesús güeru umanocue vae reta ipite güi. Pe reta picutuca curusu re cua Jesús piyucaca —jei—. ³¹ Imbaepuere pe Tumpa uyapo ma cua Jesús tenondegua vae jare upurumbiasa vae, Israel pegua reta ueya vaerā iyeminguela icavi mbae vae ipia pe oí vae, jare Tumpa umbiasa vaerā chupe reta imbaeyoa reta. ³² Jare ore numimbeu íru vae reta pe cua, jare Espíritu Santo vi umimbeu. Echa'á Tumpa umee Espíritu Santo jei vae uyapo vae reta pe —jei reta.

³³ Cua uyandu yave, yati vae reta pochi chupe reta, jare uipota tēi uyuca. ³⁴ Ërei upúa penti fariseo Gamaliel jee vae yati vae reta ipite pe. Jae co penti mboroyocui re oporombœ vae, jare opaete tenta guasu pegua reta uipiu. Jae oyocui omondo reta rani vaerā michi pegua Jesús jemimondo reta oca pe. ³⁵ Jayave jae jei yati vae reta pe:

—Cuimbae Israel pegua reta, pepia pe piyeminguela cavi mbae piyapota cua cuimbae reta pe vae re.

³⁶ Echa'á caramboe yave uyecuua Teudas jee vae, jare uyereroviaca íru vae reta pe. Jare jeta cuimbae reta, aramoi cuatrocientos, uyembati jae ndive. Ërei jae uyeyucaca, jare opaete jae ndive ñugüinoi vae reta opa uñemai, jare ipuere'á ma mbae uyapo. ³⁷ Jaicue rupi, mburuvicha reta upurupapa ñugüinoi yave, uyecuua Galilea pegua Judas jee vae. Jae umbati jeta tenta guasu pegua reta. Ërei jae vi umano, jare opaete jae ndive ñugüinoi vae reta opa uñemai —jei Gamaliel chupe reta—. ³⁸ Jáeramo añave che jae peve cua: Agüiye ma piyapo mbae cua cuimbae reta pe, jare pemaeño ma jese reta. Echa'á

imbaepuere peño yave jucuarāi imiari reta jare cua mbaembae uyapo reta, ndarau mbae uyapo reta —jei—. ³⁹ Ërei cua Tumpa güi ou yave, ndarau pepuere pembai. Echa'ã aramoi piyovaichota Tumpa ndive —jei chupe reta.

⁴⁰ Jare cua Gamaniel jei vae icavi chupe reta. Jayave ueni reta Jesús jemimondo reta, jare uinupa. Jayave oyocui reta agüiye vaerā ma imiari ye Jesús jee re, jare omondo. ⁴¹ Jayave Jesús jemimondo reta oë yati vae reta ñugüïnoi vae güi. Uyerovia reta, Jesús umaeño uiporara reta ramo. Echa'ã uñereríroca reta, Jesús re güirovia ramo. ⁴² Jare opa ara jecuae oporomboe reta Tumpa jo pe jare tenta reta rupi. Umimbeu íru vae reta pe Jesucristo regua.

6

Siete cuimbae reta uyeparavoca

¹ Jocua ara reta pe íru vae reta upurugüïrovia jare uñemíru ñugüïnoi upurugüïrovia vae reta ndive yave, griego pe uyeminguela vae reta iñeenguru hebreo pe uyeminguela vae reta coti. Echa'ã uyandareco'ã reta ime umano vae reta griego iñee pe uyeminguela vae re, opa ara rupi mbae uñemee yave. ² Jayave jocua doce Jesús jemimondo reta umbatí upurugüïrovia vae reta, jare jei chupe reta:

—Icavi ore ndoo numimbeu vaerā Tumpa iñee, cua reta numingaru vaeräve. ³ Jáeramo piparavo pepite güi, orerivi reta, siete cuimbae jeräcua cavi jese vae reta, tínee Espíritu Santo pe jare iyaracuaa catu vae reta. Jae reta uyapota yandeve cua mbaravíqui —jei reta—. ⁴ Ërei ore jecuae nduyerureta Tumpa pe jare numimbeuta Tumpa iñee —jei reta.

⁵ Cua jei vae icavi opareve pe, jare uiparavo reta Esteban - jae co penti cuimbae upurugüïrovia cavi jare tínee Espíritu Santo pe vae - Felipe, Prócoro, Nicanor, Timón, Parmenas jare Nicolás - jae co tenta guasu Antioquía pegua judiorä uyeyapo vae. ⁶ Jayave güeru reta cua uiparavo vae reta Jesús jemimondo reta jovai. Jayave Jesús jemimondo reta uyerure Tumpa pe, jare oñono ipo jese reta.

⁷ Jare Tumpa iñee jecuae uñemai. Jeta vae upurugüïrovia Jerusalén pe jare uñemíru upurugüïrovia vae reta ndive, jare jeta sacerdote reta vi upurugüïrovia.

Uipisi reta Esteban

⁸ Jare Esteban ipiacavi ete, jare mbaepuere reve uyapo miacañi tuicha vae reta tenta guasu pegua reta ipite pe. ⁹ Jare yugüeru amocue cuimbae judío reta itupao pegua reta uyeaca Esteban ndive. Jocua judío reta itupao jee Esclavos Libertados. Cua tupao pegua reta yugüeru tenta guasu reta Cirene jare Alejandría, jare ivi reta Cilicia jare Asia güi. ¹⁰ Ërei jae reta ipuere'ã umiamiri Esteban. Echa'ã Esteban imiari iyaracuaa catu reve Espíritu Santo rupi. ¹¹ Jayave jae reta omboemboe íru cuimbae reta iyapu vaerā Esteban re.

—Nduyandu jei ñee icavi mbae vae Moisés jare Tumpa coti —jei reta.

¹² Jucuarāi jae reta umbiarasica tenta guasu pegua reta, tenta guasu pegua reta itenondegua reta, jare mboroyocui re oporomboe vae reta. Jayave cua reta yugüeru uipisi Esteban, jare güüraa mburuvicha reta uyembati vae pe. ¹³ Joco pe jae reta güeru iyapu reve uñeapo jese vae reta. Cua reta jei:

—Cua cuimbae jecuaeñoi jei ñee icavi mbae vae Tumpa jo re jare mboroyocui re. ¹⁴ Echa'ã nduyandu jei jocua Jesús Názaret pegua umbaita cua Tumpa jo, jare ueyacata yandeve moromboe Moisés umee yandeve vae reta —jei reta.

¹⁵ Jayave opaete joco pe uguapi ñugüïnoi vae reta umae ngatu Esteban re, jare jova penti ángel jova echo chupe reta.

7

Esteban imiari

¹ Jayave sacerdote tenondegua upirandu Esteban pe:

—¿Añete pa jucuarāi?

² Jayave Esteban jei joco pe ñugüïnoi vae reta pe:

—Cheriquei reta, tenta guasu pegua reta itenondegua reta, piyapisaca cheré. Tumpa yembiadora pegua uyecuuaa yandetenondegua Abraham pe, Mesopotamia pe ico yave, ndei oo ico Harán pe mbove —jei—. ³ Jare jei chupe: ‘Ecua ndeiví güi jare eeya nerentará reta, jare ecua jocua ivi aechacata ndeve vae pe’ —jei, jei—. ⁴ Jayave Abraham oo Caldeo reta ivi güi, jare ico Harán pe. Jare tu umano yave, Tumpa ombou joco güi cua ivi añave pico pipe vae pe —jei—. ⁵ Ërei Tumpa umee'ã Abraham pe iivirá cua pe, umee'ã ipi jendará yepe. Ërei jei umeeta co chupe jare iñemoñaa reta pe iivirá, yepe téi Abraham ndei tai —jei chupe reta—. ⁶ Jare Tumpa umimbeu chupe: ‘Niñemoñaa reta yugüirecota íru vae reta ivi pe, jare jocua ivi pegua reta uyapota jembiocui retará, jare uyapota icavi mbae vae chupe reta cuatrocientos año pegua. ⁷ Ërei che aiporaracata jocua ivi pegua uyapota jembiocui retará vae reta pe, jare taicue rupi niñemoñaa reta oëta joco güi, jare uyeyocuita cheve cua ivi pe’ —jei, jei Esteban—. ⁸ Jare

Tumpa jei Abraham pe jae jare opaete iñemoña cuimbae reta uñemicircuncidaca vaerā, imandúa reta vaerā Tumpa jei vae uyapota co. Jáeramo Abraham taí Isaac oa ma yave, Abraham umicircuncida, Isaac ocho ara ma güinoi yave. Jae ramíño vi Isaac umicircuncida taí Jacob, jare Jacob umicircuncida jocua doce tai yandetenondegua reta —jei—.

⁹ Jocua yandetenondegua reta umitaréi José, jare umee corepoti re, José Egipto pe uyeyoci vaerā. Ërei Tumpa ico José ndive, ¹⁰ jare uepi opaete susere reta güi. Jare mburuvicha guasu Egipto pegua Faraón uicuaa Tumpa umee José pe ipiacavi jare iyaracuaa catu vaerā. Jáeramo Faraón uyapo mburuvicharā, jare José oyocui opaete Egipto pegua reta jare Faraón jentará reta —jei—.

¹¹ Ërei caruai ou opaete Egipto jare Canaán pe, jare opaete vae uiporara. Jare jocua yandetenondegua reta uváe'á mbae ave jou vaerā —jei—. ¹² Ërei Jacob uicuaa ime tembíu Egipto pe yave, omondo jocua yandetenondegua reta joco pe. Jaeramo etei jae reta yugüiraa Egipto pe. ¹³ Jare Jacob omondo reta ye yave, José uyecuaca tíquei reta pe, jare Faraón uicuaa José jentará reta —jei—. ¹⁴ Jayave José ombou umimbeu tu pe yugüiraa vaerā ipi jae jare opaete jentará reta. Opaete rupi ñugüinoi setenta y cinco —jei—. ¹⁵ Jáeramo Jacob oo Egipto pe. Jare joco pe jae jare jocua yandetenondegua reta umano. ¹⁶ Taicue rupi iñemoña reta güeru jete cue reta Siquem pe, jare joco pe oñoti reta teögürerenda Abraham oguacue pe. Echa'á Abraham umbiepi Hamor tai reta pe corepoti pe, Siquem pe oí yave —jei Esteban—.

¹⁷ Ërei coiño ma ou yave Tumpa uyapo vaerā Abraham pe jei vae, yandetenondegua reta jeta uñemoña Egipto pe. ¹⁸ Jayave íru cuimbae uyeyapo Egipto pegua reta juvicha guasurā. Ërei uicuaa'á José —jei—. ¹⁹ Cua mburuvicha guasu iyaracuaa catu uyapo vaerā icavi mbae vae yandetenondegua reta pe. Jei chupe reta uicuaaca vaerā tai reta oa yave, uyucaca vaerā chugüi —jei—. ²⁰ Jocua ara reta pe oa Moisés. Tumpa uau Moisés. Jare mbapí yasi Moisés ico tu jenta pe. ²¹ Jare uyecuua yave, Faraón tayi uepi, jare umbicuacuaa imembí rami —jei—. ²² Jare Moisés uyemboe opaete aracuaa Egipto pegua re, jare uyeminguela cavi jare jatangátu —jei Esteban chupe reta—.

²³ Jare Moisés cuarenta año güinoi yave, uipota uecha quirái ra yugüireco Israel pegua reta - jae reta co jae jentaigua reta. ²⁴ Jare uecha penti Egipto pegua icavi mbae vae uyapo oí penti Israel pegua pe. Jayave uinupa uyuka Egipto pegua, jare jucuaráí uepi uiporara vae —jei—. ²⁵ Moisés ipia pe uyeminguela tēi jentaigua reta uicuaata co Tumpa uepita jae rupi, Ërei uicuaalá reta —jei Esteban—. ²⁶ Piareve pe uecha mocui jentaigua reta uñeráro ñugüinoi, jare uipota tēi uyapicatu cavi reta. Jáeramo jei chupe reta: 'Cuimbae reta, pe reta penti tentaigua vae co. ¿Maera pa icavi mbae vae piyapo piyupe?' —jei, jei Esteban—. ²⁷ Ërei jocua cuimbae icavi mbae vae uyapo íru pe vae umiaña Moisés, jare jei chupe: '¿Quía pa neñono oreruvicharā, orerāa vaerā?' ²⁸ ¿Ndpota pa cheyuca Egipto pegua caarumo ndiyuca rami?' —jei, jei Esteban—. ²⁹ Cua uyandu yave, Moisés osi, jare ico ívi ambie Madián jee vae pe. Joco pe uñemoña mocui tai —jei—.

³⁰ Cuarenta año ma uasa yave, ñana pe coiño ivitu guasu Sinaí jee vae güi oí yave, penti ángel uyecuua Moisés pe penti yai jendí oí vae pe —jei—. ³¹ Moisés uecha yave, ipiacañi. Ërei oya jese yave, umae vaerā jese coi güi, uyandu yandeYa iñee jei: ³² 'Che co jae ndetenondegua reta - jae co Abraham, Isaac jare Jacob - iTumpa' —jei, jei—. Jayave Moisés uríri uquiyé ramo, jare uipiu umae vaerā jese. ³³ Jayave yandeYa jei chupe: 'Emboi ndepipasa. Echa'á ndiyemboi co neí Tumpa jupi vae jovai. ³⁴ Che añetete aecha quirái uiporara reta aiparavo vae reta Egipto pe, jare ayandu iyo. Jáeramo agüeyí aepí vaerā. Añave eyu toromondo Egipto pe' —jei, jei Esteban—.

³⁵ Cua Moisés co jae Israel pegua reta güiríro vae. Echa'á jae reta jei chupe: '¿Quía pa neñono oreruvicharā, orerāa vaerā?' —jei reta, jei—. Tumpa omondoca cua Moisés ángel yai jendí vae pe uyecuua chupe vae pe. Omondoca ico vaerā jae reta juvicharā jare uepi reta vaerā. ³⁶ Moisés güinoë reta güeru, jare uyapo miacañi reta Egipto pe, f Guasu Píta jee vae pe, jare cuarenta año ñana rupi yugüireco rambueve —jei—. ³⁷ Moisés jei Israel pegua reta pe: 'YandeYa Tumpa ombouta peve iñee umimbeuta vae periví reta ipite güi, chembou rami. Piyapisacata jese' —jei, jei Esteban—. ³⁸ Ángel umingueta Moisés ivitu guasu Sinaí pe, ñana pe uyembati yave Moisés jare yandetenondegua reta. Tumpa umee Moisés pe iñee tecove pegua, jae umimbeu vaerā yandeve —jei—.

³⁹ Ërei yandetenondegua reta uipota'á uyapo Moisés jei vae, jare güiríro reta. Jae reta ipia pe uyemingueta tēi yugüiraa ye vaerā Egipto pe. ⁴⁰ Jare jei reta Aarón pe: 'Iyapo ñanetumpa retarā yugüiraa vaerā yanderonde. Echa'á yaicuadá mbae ra uyeyapo cua Moisés Egipto güi yandereru vae pe' —jei reta, jei—. ⁴¹ Jayave uyapo reta penti vaca tairusu vae-raanga, jare uyuka reta maemimba umee vaerā jocua itumpa-raanga pe. Uyerovia reta jocua ipo pe uyapo vae re. ⁴² Jáeramo Tumpa uyerova chugüi reta, jare umaeño umbiadora reta vaerā opaete ara regua reta. Echa'á Tumpa iñee aracae umimbeu vae reta itupapire pe uyecuatía oí cuarái:

'¿Cheve ra pemee maemimba piyuka vae cuarenta año ñana pe pico rambueve, Israel pegua reta?

⁴³ Jucuaráí'á co. Pevoi peraa tumpa-raanga Moloc jee vae ico pipe vae,

jare petumpa-raanga Renfán jee vae iyasitata-raanga.
 Jae reta jaanga piyapo pembiadora vaerā.
 Jáeramo che pomondota Babilonia cuti.'
 Jucuarāi uyeucatía oī —jei Esteban chupe reta—.

⁴⁴ Yandetenondegua reta güürecose o Tumpa uyemingueta chupe reta pipe vae ñana pe. Echa'ā Tumpa oyocui Moisés jocua tupao uyapo vaerā jae uechaca chupe rami etei. ⁴⁵ Jocua tupao uñemee yandetenondegua reta pe, jare jae reta Josué ndive güieru, cua ivi judío mbae vae reta güü upíro yave. Echa'ā Tumpa omombo reta yandetenondegua reta güü. Jare David ico mburuvicha guasurā yave, iméño cua pe oī jocua tupao —jei—. ⁴⁶ Tumpa umae cavi David re, jare David uyerure Tumpa pe umaeño vaerā uyapo Tumpa jo. Echa'ā itenondegua Jacob umbiadora co Tumpa. ⁴⁷ Ërei Salomón uyapo Tumpa jo, ⁴⁸ yepe teí Tumpa ara pe ico vae ico'ā yambiadorenda yande yayapo vae reta pe. Echa'ā Tumpa iñee aracae umimbeu vae jei cuarāi:

⁴⁹ 'Ara co jae cheguapírenda,
 jare ivi co jae chepi jenda' —jei Tumpa—.
 ¿Mbae nunga o ra piyapota cheve?
 ¿Quiape ra apuntuuta?

⁵⁰ Chepo pe co ayapo opaete cua mbaembæ' —jei.
 Jucuarāi jei Tumpa iñee aracae umimbeu vae —jei Esteban chupe reta—.

⁵¹ Pe reta pepiatanta. Pipota'ā piyeyoci Tumpa pe, jare pipota'ā ave piyapisaca jese. Jecuae piyovaicho Espíritu Santo ndive. Petenondegua reta uyapo rami, jucuarāi vi piyapo pe reta —jei—. ⁵² Petenondegua reta uyapo icavi mbae vae opaete Tumpa iñee aracae umimbeu vae reta pe. Amocue Tumpa iñee aracae umimbeu vae reta jei jocua jipi vae outa co. Petenondegua reta uyuca reta. Jare añave pe reta vi pemee piyucaca jocua jipi vae —jei—. ⁵³ Echa'ā Tumpa umeeca peve iporoyoci ángel reta pe, érei piyapo'ā —jei Esteban.

Esteban imano

⁵⁴ Jare yati vae reta cua uyandu ma yave, pochi, jare umbiquiririú jái Esteban jei vae jeco pegua. ⁵⁵ Érei Esteban tinee Espíritu Santo pe, jare umae ngatu ara coti, jare uecha Tumpa iyembiadorenda jare Jesús Tumpa iyacata coti. ⁵⁶ Jayave Esteban jei:

—¡Mase! Aecha ara uyepea oī, jare aecha vi cuimbærañ uyeypao vae uyemboi oī Tumpa iyacata coti.
⁵⁷ Jayave jae reta usapicai tanta, jare iyapisa oyopia. Jayave penti rami uepeña reta Esteban uipisi.
⁵⁸ Jare güiraa ma yave tenta guasu güü ñana coti, uyapi reta ita pe. Jare jocua iyapu reve uñeapo jese vae reta omboi iyasoya, jare oñono penti cuimbæ tairusu Saulo jee vae jovai. ⁵⁹ Jare uyapi reta rambueve, Esteban uyerure:

—CheYa Jesús, eraa cherecove.
⁶⁰ Jayave uyeaticá, jare iñeeáta reve jei:
 —CheYa, agüiye tuiporara reta cua mbaeyoa jeco pegua.
 Jare cua jei yave, umano.

8

Saulo uyapo icavi mbae vae upurugüirovia vae reta pe

¹ Jare Esteban imano icavi Saulo pe. Jare jocua ara upurugüirovia vae Jerusalén pe ñugüinoi vae reta jovaicho reta umbipi uiporaraca chupe reta. Jare Jesús jemimondo retaño upita Jerusalén pe. Opaete íru upurugüirovia vae reta uñemíai ivi reta Judea jare Samaria rupi. ² Jare amocue cuimbæ umbiadora Tumpa vae reta oñoti Esteban, jare ipiatiti reta jese. ³ Érei Saulo uiporaraca upurugüirovia vae reta pe. Echa'ā oo tenta tenta rupi, jare umbitiriri güiraa cuimbæ reta jare cuña reta oñono peresoriru pe.

Felipe umimbeu ñee icavi vae Samaria pe

⁴ Jayave jocua upurugüirovia vae uñemíai vae reta umimbeu ñee icavi vae yugüiraa vae rupi. ⁵ Felipe oo tenta guasu Samaria pe, jare umimbeu tenta guasu pegua reta pe Cristo regua. ⁶ Jare tenta guasu pegua reta uyanu yave, penti rami uyiapisaca cavi Felipe umimbeu chupe reta vae re. Uecha vi miacañi uyapo vae reta. ⁷ Echa'ā aña reta usirí usapicai reve oya jese vae reta güü. Jarejeta ipuere mbae omi vae reta jarejeta uguata mbae vae reta ucuera. ⁸ Jare jocua tenta guasu pegua reta uyerovia.

⁹ Jare joco pe ico penti cuimbæ Simón jee vae. Cua cuimbæ ipaye vae co, jare umipiacañi umbitavi Samaria pegua reta mbaembæ uyapo vae pe. Jáeramo uyereroviaca catu. ¹⁰ Jare opaete sambiai reta jare ucuacua vae reta uyiapisaca cavi jese, jare jei reta:

—Cua cuimbæ güinoi Tumpa imbaepuere tuicha vae.
¹¹ Jáeramo opaete vae uyiapisaca cavi jese. Echa'ā jae ipaye vae ramo, ima ma uyapo mbaembæ umipiacañi reta vaerā. ¹² Érei Felipe umimbeu tenta guasu pegua reta pe ñee icavi vae. Imiari

chupe reta Tumpa iporoyocuia re jare Jesucristo re. Jayave cuimbae reta jare cuña reta güirovia jare uyembibautizaca.¹³ Jare Simón vi güirovia, jare uyembibautizaca güive upita Felipe ndive. Jare uecha yave miacañi tuicha vae uyeyapo vae reta, ipiacañi.

¹⁴ Jare Jesús jemimondo Jerusalén pe ñugüinói vae reta uicuaa yave quirái Samaria pegua reta güirovia ma Tumpa iñee, omondo reta Pedro jare Juan. ¹⁵ Jare jae reta yugüiraa uvae yave Samaria pe,uyerure upurugüirovia vae reta re, Espíritu Santo ou vaerä chupe reta. ¹⁶ Echa'á ndeiño ou Espíritu Santo chupe reta. Jaeño uyembibautizaca Jesús jee re. ¹⁷ Jayave Pedro jare Juan oñono ipo jese reta, jare Espíritu Santo ou chupe reta.

¹⁸ Jare Simón uecha Espíritu Santo ou, Jesús jemimondo reta ipo oñono jese reta yave. Jayave uipota tēi umee corepoti chupe reta ¹⁹ jare jei:

—Cheve vi pemee cua mbaepuere, ou vaerä ipotave vae pe Espíritu Santo, che añono chepo jese yave.

²⁰ Ërei Pedro jei chupe:

—Nde necañiteita co ndecorepoti reve. Echa'á ndepia pe ndiyeminguela tēi ndepuere ndegua corepoti pe mbae Tumpa umee vae —jei—. ²¹ Nde ndepuere'á nenoi cua nunga mbaepuere. Echa'á ndepia jupi'á Tumpa cotí. ²² Eeya cua icavi mbae vae, jare iyerure Tumpa pe. Aramoi umbiasata ndeve cua ndepia pe ndiyeminguela vae re. ²³ Echa'á aicuaa nde niñemiro, jare mbaeyoa jeco pegua ndepuere'á ndiyapo icavi vae —jei.

²⁴ Jayave Simón jei chupe reta:

—Piyerure cheré yandeYa pe, agüiye vaerä cua pere cheve vae uyeyapo cheve.

²⁵ Jayave Pedro jare Juan umimbeu yave Tumpa iñee íru vae reta pe, yugüiraa ye Jerusalén pe. Jare yugüiraa rambueve, umimbeu ñee icavi vae íru Samaria pegua tenta guasu-raí reta rupi.

Felipe jare Etiopía pegua

²⁶ Jayave penti ángel yandeYa pe uyeyocuia vae jei Felipe pe:

—Epúa ecua sur cotí tape Jerusalén güi oo Gaza cotí vae rupi.

Cua tape uasa ñana rupi. ²⁷ Jayave Felipe upúa oo. Jare penti eunuco ivi Etiopía pegua oo ye jenta cotí Jerusalén güi. Echa'á ou Jerusalén pe umbiadora vaerä Tumpa. Cua eunuco co jae penti mburuvicha. Jae uyandareco ico Candace icorepoti jare íru imbaembae icavi vae re. Candace co jae Etiopía pegua reta juvicha guasu. ²⁸ Jare eunuco oo ye yave jenta cotí, uguapi icarro pe umingueta oo Isaías uicuatiacue vae. Isaías co jae penti Tumpa iñee aracae umimbeu vae. ²⁹ Jare Espíritu Santo jei Felipe pe:

—Ecua iñemíru pea carro pe oo oí vae ndive.

³⁰ Jayave Felipe osi oo carro cotí, jare uyandu cuimbae umingueta Tumpa iñee Isaías uicuatiacue vae. Jayave upírandu chupe:

—¿Ndicuaa pa nemingueta neí vae?

³¹ Jare eunuco jei Felipe pe:

—¿Quiráita pa aicuaa, mbaeti yave quía umimbeu cheve?

Jare umiñera Felipe uyipi vaerä icarro pe uguapi jae ndive.

³² Jare Tumpa iñee umingueta vae pe uyecuatía oí cuarái:

“Penti ovecha rami uyereraaca umano vaerä.

Jare jae quíñio, penti ovecha-raí jocua uñapi vae jovai oí vae quíñio oí rami.

³³ Uñereríroca yave, uña vae reta uyapo'á jupi vae chupe.

¿Quíá ra ipuere umierácula jentaigua reta regua?

Echa'á jecove ucañi ivi güi.”

Jucuarái uyecuatía oí.

³⁴ Jare eunuco jei Felipe pe:

—Aipota nemimbeu vaerä cheve quía re ra jei cua Tumpa iñee umimbeu vae. ¡Jei pa iyee ani íru vae re? —jei.

³⁵ Jayave Felipe umbipi cua Tumpa iñee uyecuatía oí vae güi umimbeu chupe ñee icavi vae Jesús regua. ³⁶ Jare tape rupi yugüiraa rambueve, yugüiraa uvae i jenda pe, jare eunuco jei:

—Co oí i. ¡Ime pa mbae ayapo vaerä ndei ayembibautizaca mbove?

³⁷ —Ndepurugüirovia yave opaete ndepia pe, ndepuere ndiyembibautizaca —jei Felipe chupe.

—Arovia Jesucristo co jae Tumpa Tai —jei eunuco Felipe pe.

³⁸ Jayave eunuco umbiyemoica carro, jare mocui reve ugüeyi i pe. Jayave Felipe umbibautiza eunuco. ³⁹ Jare oé reta i güi yave, yandeYa iEspíritu güiraa joco güi Felipe. Jare eunuco uecha'á ye ma. Jayave uyerovia reve oo ye jenta cotí. ⁴⁰ Jare Felipe uyecuaa tenta guasu Azoto pe. Jare joco güi oo tenta guasu Cesarea pe. Jare oo rambueve, umimbeu ñee icavi vae opaete tenta guasu reta rupi.

*Saulo güirovia Jesús re
(Hch 22.6-16; 26.12-18)*

¹ Jare Saulo umumburu uyuca vaerā yandeYa re güirovia vae reta, jare oo sacerdote tenondegua pe.
² Jare uyerure sacerdote tenondegua pe umee vaerā chupe tupapire, ipuere vaerā oo judío reta itupao tenta guasu Damasco pegua reta pe, jare uvāe yave joco pe cuimbae reta jare cuña reta Jesús re güirovia vae, ipuere vaerā uipisi güero Jerusalén pe. ³ Jare coño ma Damasco güii oo yave, aramoño jembipe Saulo re penti tembipe tuicha vae ara güii. ⁴ Jayave Saulo oa ivi re, jare uyandu ñee jei chupe:

—Saulo, Saulo, ¿maera pa ndiyapo icavi mbae vae cheve?

⁵ Jayave Saulo upirandu:

—¿Quífa pa co nde, cheYa?

Jayave ñee jei chupe:

—Che co jae Jesús. Nde ndiyapo icavi mbae vae cheve. Nde co jae penti güeye ívira jacuarovi vae re upatara vae rami. Jáeramo ndiporara neí.

⁶ Saulo urirí uquiyé ramo.

—CheYa, ¿mbae pa ndipota ayapo vaerā? —jei.

—Epúa ecua tenta guasu pe, jare amimbeucata ndeve mbae ndiyapota vae —jei yandeYa Saulo pe.

⁷ Jare cuimbae Saulo jupié yugüíraa vae reta uyemboi quíññugüínoi ipiacañi güii. Echa'ã uyandu ñee, ërei uecha'ã quíave. ⁸ Jayave Saulo upúa ivi güii, jare umae tēi, ërei ipuere'ã uecha quíá. Jare jae jupié yugüíraa vae reta uipoco, jare güíraa Damasco pe. ⁹ Jare Saulo joco pe oī mbapi ara umae mbae reve, jare ucaru'ã jare i jou'ã.

¹⁰ Jare ico Damasco pe penti upurugüírovia vae Ananías jee vae. YandeYa jei chupe ique pe:

—Ananías.

Jare jae jei:

—CheYa, co aí.

¹¹ Jayave yandeYa jei chupe:

—Epúa ecua calle Sími jee vae pe, jare eeca Judas jenta pe penti Tarso pegua. Jae jee co Saulo. Echa'ã jae uyerure oī —jei—. ¹² Jare jae uecha ma ique pe penti cuimbae Ananías jee vae uique jare oñono ipo jese, umae ye vaerā —jei Tumpa chupe.

¹³ Ërei Ananías jei:

—CheYa, jeta vae umimbeu cheve cua cuimbae regua, quirái jeta icavi mbae vae uyapo Jerusalén pe nderé güirovia vae reta pe. ¹⁴ Jare cua pe jae ime güínoi mbaepuere sacerdote reta itenondegua reta güii, uipisi vaerā opaete nderé güirovia vae reta —jei.

¹⁵ —Ecuaño —jei yandeYa chupe—. Echa'ã che aiparavo ma cherembiporurã, oo vaerā umimbeu cheregua judío mbae vae reta pe, mburuvicha reta pe jare Israel pegua reta pe. ¹⁶ Echa'ã che aicuaacata chupe quirái uiporara eteta chereco pegua —jei.

¹⁷ Jayave Ananías oo uiue tenta pe. Jare oñono ipo Saulo re jare jei chupe:

—Cherívi Saulo, yandeYa Jesús uyecuua ndeve, ndeyu tape rupí rambueve. Jae chembou nemaе ye vaerā, jare netinee vaerā Espíritu Santo pe —jei.

¹⁸ Jare jupivoíño mbae uyeequi Saulo jesa güii yanderesapíra uyeequi rami, jare Saulo umae cavi. Jayave upúa uyembautizaca. ¹⁹ Jayave ucaru jare ipiráta ye ma. Jare upita mbovi ara upurugüírovia vae Damasco pe yugüireco vae reta ndive.

Saulo uñemíñee Damasco pe

²⁰ Jayave Saulo umbípi umimbeu Jesús regua judío reta itupao reta pe. Jei chupe reta Jesús co jae Tumpa Tai. ²¹ Jare opaete uyandu vae reta ipiacañi, jare jei:

—Jae'ã ra cua Jerusalén pe cua Jesús re güirovia vae reta uiporaraca vae? Jare ou vi cua pe uipisi vaerā cua nunga reta güíraa sacerdote reta itenondegua reta pe —jei reta.

²² Ërei Saulo uñemiatangátu, jare umiamiri judío Damasco pegua reta. Echa'ã uicuaaca chupe reta Jesús co jae Cristo.

Judío reta uipota tēi uipisi Saulo

²³ Jare ima ma uasa yave, judío reta uyemboemboe uyuca vaerā Saulo. ²⁴ Ërei cua jerácu Saulo pe. Jae reta uáro tenta guasu jonque pe ara rupí jare pítu rupí, uyuca vaerā tēi. ²⁵ Ërei upurugüírovia vae reta güíraa Saulo pítu yave umbiasa tenta guasu iquesemba ita pegua vae íárambo rupí umbigüeyí canasta guasu pe.

Saulo Jerusalén pe

²⁶ Jare Saulo oo uvāe yave Jerusalén pe, uipota tēi uñemíñu upurugüírovia vae reta ndive. Ërei opaete jae reta uyepiú chugüi. Echa'ã güirovia'ã reta jae Jesús re güirovia ma co. ²⁷ Ërei Bernabé güíraa Saulo

Jesús jemimondo reta pe, jare umimbeu chupe reta quirāi Saulo uecha yandeYa tape rupi, jare quirāi yandeYa umingueta vae. Jei vi chupe reta quirāi Saulo umimbeu uquiyē mbae reve Damasco pe Jesús regua.²⁸ Jayave Saulo uñemíru upurugüirovia vae reta ndive Jerusalén pe. Jecuaeño oē Jerusalén güi jare uique ye.²⁹ Jare umimbeu uquiyē mbae reve yandeYa regua. Jare uyeaca vi griego pe uyeminguela vae reta ndive. Jáeramo jae reta uipota uyuca.³⁰ Jare upurugüirovia vae reta cua uicuua yave, güiraa reta Saulo Cesarea pe, jare joco güi omondo tenta guasu Tarso coti.

³¹ Jayave umambeco'a ma quía upurugüirovia vae reta, jare jae reta uñemimirāta opaete Judea rupi, Galilea rupi jare Samaria rupi. Jare yugüireco reta uipiu cavi reve yandeYa, jare Espíritu Santo umbipiácatu. Jare jecuaeño íru vae reta uñemíru jae reta ndive.

Eneas ucuera

³² Jare Pedro oo opou yave opaete upurugüirovia vae reta ñugüinoi vae rupi, oo uvāe tenta guasu Lida pegua reta pe.³³ Joco pe uvāe penti cuimbae Eneas jee vae ocho año ma ico jupa pe vae. Echa'á ipuere mbae omi vae.³⁴ Jare Pedro jei chupe:

—Eneas, Jesucristo nembigüera ma. Epúa ipiso nderupa —jei.

Jare jupivoiño jae upúa.³⁵ Jare opaete Lida pegua reta jare tenta tenta ñuu Sarón pegua reta uecha cua cuimbae, jare uyerova reta yandeYa coti.

Dorcus umano jare icove ye

³⁶ Jare ico tenta guasu Jope pe penti cuña upurugüirovia vae Tabita jee vae. (Cua tee uipota jei ambie ñee pe: Dorcas.) Cua cuña uyapo jeta icavi vae, jare umeei jeta mbae iparavete vae reta pe.³⁷ Jayave imbaerasi, jare umano. Jare íru vae reta opa umbiyau yave, oñono penti o ívate vae pe.³⁸ Jare Lida coiño oī Jope güi. Jare upurugüirovia vae Jope pegua reta uicuua ma yave Pedro oī Lida pe, omundo icoti mocui cuimbae reta jei vaerā chupe:

—Tabita, epúa.

Jayave cuña umae, jare uecha Pedro yave, upúa uguapi.⁴¹ Jayave Pedro uipisi ipo pe, jare umupúa. Jayave ueni upurugüirovia vae reta jare ime umano vae reta, jare uechaca chupe reta icove ye ma co.⁴² Jare cua jerácu opaete Jope pegua reta pe. Jare jeta vae güirovia yandeYa re.⁴³ Jare Pedro upíta íma Jope pe. Ico penti guacapi umipítā vae Simón jee vae jenta pe.

10

Pedro jare Cornelio

¹ Ico Cesarea pe penti cuimbae Cornelio jee vae. Jae co sundaro reta juvicha penti atti Italiana jee vae pegua.² Jae jare opaete jenta pegua reta umbiadora Tumpa, jare jae umeei jeta mbae iparavete vae reta pe, jare jecuaeño iyerure Tumpa pe.³ Cua cuimbae uecha cavi ique pe penti ángel Tumpa pe uyeyocu vae uique jae oī vae pe mbapí ora ma caaru yave. Ángel jei chupe:

—Cornelio.

⁴ Cornelio uquiyē reve umae ngatu ángel re jare upirandu:

—¿Mbae pa, cheYa?

Jare ángel jei chupe:

—Tumpa imandúa ndiyerure reta jare mbae nemeei vae reta re.⁵ Añave emondo cuimbae reta Jope pe, güeru vaerā penti cuimbae Simón jee vae. Jae uyembijee Pedro pe —jei—.⁶ Jae ico penti guacapi umipítā vae Simón ipi. Simón jenta oī i guasu jembei pe —jei.

⁷ Ángel uyeminguela jae ndive vae oo ma yave, Cornelio ueni mocui jembiocui reta jare penti sundaro umbiadora Tumpa vae. Cua sundaro vi uyeyocu Cornelio pe.⁸ Jare opa umimbeu cavi chupe reta yave, omondo Jope coti.

⁹ Piareve pe guarasi ara mbiteta ma yave, jae reta yugüiraa tape rupi coiño ma Jope güi rambueve, Pedro uyupi tenta iárambo, uyerure vaerā Tumpa pe.¹⁰ Jare iyembai, jare uipota ucaru. Ërei íru vae reta omboyi ñugüinoi rambueve jembiarā, Pedro oque.¹¹ Jare ique pe uecha ara uyepea jare penti nieso tuicha vae rami vae ugüeyi ou icoti. Cua uyembigüeyi uyepisi reve irundi jembei reta pe.¹² Cua nieso japipe pe ñugüinoi ipotave maemimba uguata vae reta jare oponi vae reta, jare ipotave güira reta.

¹³ Jare ou Pedro pe penti ñee:

—Pedro, epúa iyuca jeu.

¹⁴ Ërei Pedro jei:

—Ndarau, cheYa. Jau'ā etei co mboroyocui jei agüiye vaerā jau vae. Icavi'ā co —jei.

¹⁵ Jayave ñee jei chupe:

—Tumpa umee ndeou vaerā vae, agüiye erīro.

¹⁶ Cua mbapí vese ma uyeyapo yave, nieso rami vae uyereraa ye ara pe. ¹⁷ Jare Pedro ipiacañi reve ipia pe uyemingueta oī rambueve mbae re ra uyemijaanga cua ique pe uecha vae, cuimbae Cornelio ombou vae reta upirandu yugüeru Simón jenta re, jare yugüeru ma uvāe onque pe. ¹⁸ Jare jae reta ueni upirandu joco pe ra ico Simón uyembijee Pedro pe vae. ¹⁹ Jare Pedro ipia pe uyemingueta oī rambueve jocua ique pe uecha vae re, Espíritu Santo jei chupe:

—Mase, mbapí cuimbae reta ndereca. ²⁰ Epūa egüeyi ecua jae reta jupíe neatēi mbae reve. Echa'ā che co ambou —jei.

²¹ Jayave Pedro ugüeyi cuimbae Cornelio ombou vae reta ñugüinnoi vae pe, jare jei chupe reta:

—Che co jae pe reta peeca vae. ¿Maera pa peyu chereca?

²² Jayave cuimbae reta jei Pedro pe:

—Ime penti cuimbae Cornelio jee vae. Jae co cuimbae jupi vae. Umbiadora co Tumpa. Jae co sundaro reta juvicha opaete judío reta uyemingueta cavi jese vae. Penti ángel Tumpa pe uyeyocui vae jei chupe ndereruca vaerā jenta pe, jae uyapisaca vaerā nemimbeuta chupe vae re —jei reta.

²³ Jayave Pedro uruíque cuimbae reta, jare umimbita joco pe. Jayave piáreve pe Pedro upūa oo jae reta jupíe. Jare amocue upurugüirovia vae Jope pegua reta yugüiraa jae jupíe.

²⁴ Jare piáreve pe yugüiraa uvāe Cesarea pe. Jare Cornelio umbati ma jentará reta jare iíru reta, jare uáro oī Pedro. ²⁵ Jare Pedro uiqueta ma yave tenta pe, Cornelio oo oováiti jare uyeatíca Pedro jovai umbiadora vaerā. ²⁶ Èrei Pedro jei chupe:

—Epúa. Che cuimbaeño vi co.

Jare umupúia. ²⁷ Jare uyemingueta jae ndive rambueve, Pedro uique tenta pe, jare uecha jeta vae yati ñugüinnoi joco pe. ²⁸ Jayave Pedro jei chupe reta:

—Pe reta picuua cavi co quirái penti judío ipuere'ā uñemiíru penti judío mbae vae ndive, jare quirái ipuere'ā opou ipi. ²⁹ Èrei Tumpa uechaca cheve quirái icavi'ā aeni vaerā penti vae yepe iquia vae, yepe tēi uyapo'ā mboroyocui. ³⁰ Jáeramo pe reta cherenica yave, ayu cheatéi mbae reve. Añave tapírandu peve, ¿maera pa cherenica? —jei Pedro.

³⁰ Jayave Cornelio jei chupe:

—Irundi ara ma uasa curaái yave ayerure aí ayecuacu reve tembíu güi cua cherenta pe. Jare aramoíño mbapí ora ma caaru yave aecha penti cuimbae uyemboi oī cherovai. Jemimonde jembipe —jei—.

³¹ Jae jei cheve: Cornelio, ndiyerure uyendu ma, jare Tumpa imandúa ma mbae nemeei vae reta re.

³² Emundo quía Jope pe, jare erurucu Simón uyembijee Pedro pe vae. Jae ico penti guacapi umipítavae Simón ipi. Simón jenta oī i guasu jembei pe. Ou yave, jae nemingueta —jei cheve, jei—. ³³ Jáeramo jupivoiño amondo ndecotí, jare yasurupai ndeyu vae re. Añave ore co noī opaete cua pe Tumpajovaque, nduyandu vaerā opaete Tumpa ndecoci vae re —jei.

³⁴ Jayave Pedro jei chupe reta:

—Añetete aicuua ma quirái Tumpa uau'ā penti vaeño íru vae güi. ³⁵ Echa'ā jocua umbiadora jare jupi vae uyapo vae ipotave ívi pegua icavi co Tumpa pe —jei—. ³⁶ Tumpa ombou ñee icavi vae Israel pegua reta pe. Jae umimbeu chupe reta ime mbiacatu Jesucristo re. Jesucristo co jae opaete vae iYa —jei Pedro —.

³⁷⁻³⁸ Juan umimbeu uyapisaca jese vae reta pe uyembibautizaca vaerā. Cua jaicue rupi Jesús Nazaret pegua jerácuia Galilea pe jare opaete Judea rupi. Jerácuia quirái Tumpa umee chupe Espíritu Santo jare mbaepuere, jare quirái jae oo opaete que rupi uyapo icavi vae, jare quirái umbigüera opaete aña guasu uiporaraca chupe vae reta. Echa'ā Tumpa ico jae ndive. Opaete cua pe reta picuua co —jei—.

³⁹ Jare ore numimbeu íru vae reta pe opaete Jesús uyapo Judea rupi jare Jerusalén pe vae. Jayave judío reta uicutuca curusu re uyucaca —jei Pedro chupe reta—. ⁴⁰ Èrei Tumpa umbijecove ye güeru umanocue vae reta ipite güi mbapí ara umano rendave pe, jare umibiyecuua. ⁴¹ Umbiyecuua'ā opaete vae pe, jaeño oreve. Echa'ā tenonde ma Tumpa oreparavo numimbeu vaerā íru vae reta pe. Ore nducaru jare i ndou jae ndive, icove ye yave ou umanocue vae reta ipite güi —jei—. ⁴² Jare jae oreocui numimbeu vaerā íru vae reta pe quirái Tumpa uiparavo uáa vaerā icove vae reta jare umanocue vae reta —jei Pedro—. ⁴³ Cua regua co umimbeu opaete Tumpa iñee aracae umimbeu vae reta. Echa'ā jae reta jei Tumpa umbiasata opaete jese güirovia vae reta pe imbaeyoa reta jae jeco pegua —jei.

Espíritu Santo ou judío mbae vae reta pe

⁴⁴ Jare Pedro imiari oī rambueve, Espíritu Santo ou opaete cua ñee uyandu vae reta pe. ⁴⁵ Jare judío upurugüirovia vae Pedro jupíe yugüeru vae reta ipiacañi quirái judío mbae vae reta pe vi uñemee Espíritu Santo vae re. ⁴⁶ Echa'ā jae reta uyandu uyemingueta reta ambie vae iñee pe. Jare uyandu vi umbiadora Tumpa. ⁴⁷ Jayave Pedro jei:

—¿Quía pa umbiavaita agüiye vaerā uyembibautizaca cua reta? Echa'á Espíritu Santo ou ma chupe reta, yandeve ou rami —jei.

⁴⁸ Jayave Pedro oyocui uyembibautizaca vaerā yandeYa Jesús jee re. Jayave joco pegua reta umiñera Pedro upita vaerā jae reta ndive mbovi ara pegua.

11

Pedro umimbeu upurugüirovia vae Jerusalén pegua reta pe

¹Jayave Jesús jemimondo reta jare ūru upurugüirovia vae Judea rupi ñugüinoi vae reta uicuua quirái judío mbae vae reta vi güirovia Tumpa iñee. ²Jayave Pedro oo ye uvāe yave Jerusalén pe, judío upurugüirovia vae reta uñeeengata chupe. ³Jae reta jei:

—Maera pa ndique judío mbae vae reta jenta pe? —Maera pa ndecaru jae reta ndive? —jei reta.

⁴Jayave Pedro iyipí güive umbipi umimbeu cavi chupe reta opaete uyeyapo vae. Jae jei chupe reta:

⁵—Che ayerure aí yave tenta guasu Jope pe, cheque pe aecha penti nieso tuicha vae rami vae ugüeyí ou checoti. Cua uyembigüeyí ara güi uyepisi reve irundi jembei reta pe ou uvāe cheve —jei—. ⁶Amae ngatu jese yave, aecha maemimba uguata vae reta, amocue pochi vae jare amocue pochi mbae vae, jare maemimba oponí vae reta, jare güüra reta. ⁷Jare ayandu vi penti née jei cheve: ‘Pedro, epúa iyuca jeu’ —jei, jei Pedro—. ⁸Êrei che jae: ‘Ndarau, cheYa. Jau'á etei co mboroyocui jei agüiye vaerā jau vae. Icavíl'á co’ —jae chupe, jei—. ⁹Êrei née ou ara güi vae jei cheve: ‘Tumpa umee ndeu vaerā vae, agüiye eríro’ —jei cheve, jei—. ¹⁰Jare cua mbapi vese ma uyeyapo yave, opaete uyereraa ye ara pe. ¹¹Jare jupivoíno yugüeru uvāe che aico vae pe mbapi cuimbae Cesarea güi Cornelio ombou vae reta —jei Pedro—. ¹²Jare Espíritu Santo jei cheve aa vaerā jae reta jupié cheatéi mbae reve. Jare cua seis upurugüirovia vae reta vi yugüiraa cherupié, jare nduique jocua cuimbae jenta pe —jei. ¹³Jare jocua cuimbae umimbeu oreve quirái uecha penti ángel uyemboi oí jae jo pe, jare quirái ángel jei chupe: ‘Emondo cuimbae reta Jope pe eruruca penti cuimbae Simón jee vae. Jae uyembijee Pedro pe’ —jei chupe, jei—. ¹⁴Jae umimbeuta ndeve née, nde jare opaete nerentia pegua reta piyembiasaca vaerā —jei chupe, jei—. ¹⁵Jayave che ambipi amingueta reta yave, Espíritu Santo ou chupe reta, yandeve tenonde yave ou rami. ¹⁶Jayave chemandúa yandeYa jei yandeve vae re. Echa'á jei: ‘Juan upurumbibautiza i pe. Êrei pe reta piyembibautizaca Espíritu Santo pe’ —jei yandeYa, jei—. ¹⁷Tumpa umee chupe reta Espíritu Santo yandeYa Jesucristo re vae pe umee vae. Jáeramo che chepuere'á etei ambiavai Tumpa uyapo vae —jei.

¹⁸Jayave cua Pedro jei chupe reta vae uyandu yave, jae reta ipuere'á ma mbae jei. Umbiadoraño Tumpa, jare jei reta:

—Tumpa umaeño vi judío mbae vae reta re ueya vaerā iyemingueta icavi mbae vae ipia pe oí vae, güinoin vaerā tecove opa mbae vae.

Upurugüirovia vae reta Antioquía pe

¹⁹Jare Esteban uyuca yave, joyaicho reta uporaraca upurugüirovia vae reta pe. Jare upurugüirovia vae reta opa uñemíai, jare yugüiraa uvāe ívi Fenicia, Chipre jare Antioquía pe. Jare jae reta umimbeu judío reta peño Tumpa iñee. ²⁰Êrei jae reta ipite pe ñugüinoi amocue cuimbae Chipre jare Cirene pegua. Cua reta yugüiraa uvāe yave Antioquía pe, umingueta judío mbae vae reta pe vi, jare umimbeu chupe reta née icavi vae yandeYa Jesús regua. ²¹Jare yandeYa ombori, jare jeta vae güirovia jare uyerova yandeYa cotí.

²²Jare cua jerácuia upurugüirovia vae Jerusalén pe ñugüinoin vae reta pe. Jayave jae reta omondo Bernabé Antioquía pe. ²³Jare jae oo uvāe yave, uecha jocua uyeyapo Tumpa ipiacavi jeco pegua vae, jare uyerovia. Jayave jei chupe reta jecuareño uguata cavi vaerā yandeYa ndive ipiráta reve ipia pe. ²⁴Echa'á Bernabé co jae cuimbae ipiacavi vae. Jae upurugüirovia cavi, jare tñee Espíritu Santo pe. Jare jeta vae güirovia yandeYa re jare uñemíru upurugüirovia vae reta ndive.

²⁵Cua jaicue rupi Bernabé oo Tarso pe, ueca vaerā Saulo. Jare uvāe chupe yave, güeru Antioquía pe. ²⁶Jare joco pe uñemíru reta penti año upurugüirovia vae reta ndive, jare omboe jeta vae. Jare Antioquía pe jaeramo etei ūru vae reta umbipi jei upurugüirovia vae reta re:

—Cua reta co jae cristiano reta.

²⁷Jare jocua ara reta pe amocue Tumpa iñee umimbeu vae reta yugüeru Jerusalén güi Antioquía pe. ²⁸Penti jee co Agabo. Jae upúa uyemboi, jare jei Espíritu Santo rupi imeta co caruai tuicha vae opaete ívi rupi. Cua uyeyapo Claudio mburuvicha guasurá ico yave. ²⁹Jayave penti penti upurugüirovia vae reta iquiréi omondo ime güinoin vae güi, ombori vaerā upurugüirovia vae Judea rupi ñugüinoin vae reta.

³⁰Jare jucuarai uyapo reta. Jare jae reta omondo upurugüirovia vae reta itenondegua reta pe Bernabé jare Saulo ndive.

12

Herodes uyucaca Jacobo, jare oñonoca Pedro peresoriru pe

¹ Jocua ara reta pe mburuvicha guasu Herodes uipísica amocue upurugüirovia vae reta, uyapo vaerā icavi mbae vae chupe reta. ² Jare uyucaca quise pe Jacobo - jae co Juan tiquei. ³ Jare Herodes uicuaa yave cua uyapo vae icavi judío reta pe, uipísica Pedro vi. Jocua ara reta pe judío reta jou ñugüinoi mbiyape ovu mbae vae. ⁴ Jare uipísica ma yave, oñonoca peresoriru pe. Umee irundi ati sundaro reta pe uyandareco jese vaerā. Penti penti ati güinoi irundi sundaro. Herodes uipota tēi güinoëca Pedro tenta guasu pegua reta jovai pascua uasa ma yave. ⁵ Jayave sundaro reta uyandareco Pedro re peresoriru pe. Erei upurugüirovia vae reta icueri mbae reve uyerure Tumpa pe jese.

Pedro oẽ peresoriru güi

⁶ Piareve pe ma Herodes güinoëcata tēi yave, jocua p̄tu etei Pedro oque oĩ mocui sundaro ipāu pe, jare uñeaپtī oĩ mocui cadena pe. Jare sundaro reta peresoriru jonque uārō ñugüinoi. ⁷ Jare aramoño penti ángel yandeYa pe uyeyocui vae uyecuaa, jare penti tembipe uesape peresoriru pe. Jayave ángel uñatai Pedro iyique pe umbisareco vaerā, jare jei chupe:

—Epūa voi.

Jare cadena reta uyera ipapí güi. ⁸ Jayave ángel jei chupe:

—Iyemonde jare emonde vi ndepipasa.

Jare Pedro jucuarāi uyapo. Jayave ángel jei chupe:

—Iñeñoma ndeasoya pe, jare eyu cheraicue. ⁹ Jayave Pedro oẽ oo ángel jaicue rupi. Jae uicuaa'ã añete ra ángel uyapo vae. Ipia pe uyemingueta tēi opaete cua uecha oĩ ique pe vae. ¹⁰ Uasa ma yave mocui sundaro peresoriru uārō vae, yugüiraa uvāe onque fierro calle coti oo vae pe. Cua onque jaei uyepea chupe reta. Jare oẽ reta ma yave, uguata reta penti calle rupi. Jayave aramoño ángel oo Pedro güi ueya.

¹¹ Jayave ramo Pedro uicuaa cua uyeyapo vae añete co, jare jei iyupe:

—Añiave aicuaa cheYa co ombou ángel jare cherepica Herodes güi jare opaete judío reta uipota uyapo cheve vae güi.

¹² Cua re ipia pe uyemingueta rambueve, oo uvāe María jenta pe. María co jae Juan Marcos ichi. Joco pe jeta vae yate uyerer ñugüinoi Tumpa pe. ¹³ Pedro ombopu onque, jare oẽ tenta güi penti cuñatai Rode jee vae uyapisaca vaerā. ¹⁴ Cua cuñatai uicuaa Pedro iñee, erei uyerovia güi uipea'ã onque. Osi uique tenta pe, jare umimbeu ūru reta pe Pedro co oĩ onque pe. ¹⁵ Erei jae reta jei chupe:

—Nembiquere co.

Erei jae jeitejei añete co. Jayave jae reta jei:

—Ángel uyandarecose jese vae co.

¹⁶ Erei Pedro jecuac ombopu onque. Jare jae reta uipec yave, uecha jae co, jare ipiacañi. ¹⁷ Erei Pedro umupūa ipo umiquií reta vaerā, jare umimbeu chupe reta quirāi yandeYa güinoë peresoriru güi. Jare jei chupe reta:

—Picuaca cua Jacobo jare ūru upurugüirovia vae reta pe.

Jayave oẽ oo joco güi icoti'ã.

¹⁸ Jare cõe rupive sundaro reta uyemipial'ã ete. Echa'ã uicuaa'ã mbae ra uyeyapo Pedro pe. ¹⁹ Jare Herodes uecaca tēi yave, Pedro uñeväe'ã. Jayave Herodes upirandu sundaro reta pe jese. Jayave oyocui sundaro reta uyeyucaca vaerā. Jayave Herodes oo Judea güi Cesarea pe, jare upita joco pe.

Herodes umano

²⁰ Jare Herodes pochi ico Tiro pegua reta jare Sidón pegua reta coti. Jayave jae reta penti ramí yugüeru ipi, jare uñemíru reta penti mburuvicha guasu jembiocui tenondegua vae Blasto jee vae ndive. Jae reta jei chupe agüiye vaerā mburuvicha guasu pochi chupe reta. Echa'ã jae reta güeru jembiurá mburuvicha guasu Herodes iivi güi. ²¹ Jare Herodes uiparavo penti ara imiari vaerā chupe reta. Jayave jocua ara Herodes uyemonde cavi, jare uguapi mburuvicha upuruā vae pe, jare imiari chupe reta.

²² Jare jae reta iñeeäta reve jei:

—Tumpa iñee co, cuimbæ iñee'ã co.

²³ Jare jupivoño penti ángel yandeYa pe uyeyocui vae umimbaerasi Herodes taso pe. Echa'ã Herodes umbiadora'ã Tumpa. Jáeramo umano.

²⁴ Erei Tumpa iñee uñemíai, jare jeta vae upurugüirovia.

²⁵ Jare Bernabé jare Saulo yugüeru ye Jerusalén güi, iparavíqu joco pe uyapo ma yave. Jare güeru jae reta jupié Juan Marcos.

13

Bernabé jare Saulo yugüiraa umimbeu ñee icavi vae

¹ Jare yugüüreco upurugüürovia vae Antioquía pe ñugüünoi vae reta ipite pe amocue Tumpa iñee umimbeu vae reta jare Tumpa iñee re oporomboe vae reta. Jae reta co Bernabé, Simón Niger, Lucio Cirene pegua, mburuvicha guasu Herodes jentará Manaén jee vae jare Saulo. ² Cua reta uyeyocui yandeYa pe jare uyecuacu tembfu güi rambueve, Espíritu Santo jei chupe reta:

—Pemondo Bernabé jare Saulo uyapo vaerā mbaravíqui che aiparavo ma chupeguarā vae.

³ Jare uyecuacu reta tembfu güi, jare uyerure reta Tumpa pe. Jayave ūru reta oñono ipo jese reta jare omondo.

Umimbeu reta ñee icavi vae Chipre pegua reta pe

⁴ Jayave Saulo jare Bernabé uyemondoca Espíritu Santo pe, jare yugüüraa tenta guasu Seleucia pe, jare joco güi uasa i guasu rupi ivi Chipre pe. ⁵ Jare yugüüraa uvāe yave tenta guasu Salamina pe, umimbeu reta Tumpa iñee judío reta itupao reta pe. Jare Juan oo jae reta ndive ombori vaerā. ⁶ Jare opaete Chipre umbapí yave, yugüüraa uvāe tenta guasu Pafos pe, jare joco pe uñevāe penti judío Barjesús jee vae ndive. Jae co penti ipaye vae, jare jei jae co penti Tumpa iñee umimbeu vae. Cua jei upurumbítavi vaerā. ⁷ Cua cuimbae oí mburuvicha Sergio Paulo jee vae ndive. Cua mburuvicha iyaracuaa catu co. Jae ueni Bernabé jare Saulo, jare uipota uyapisaca Tumpa iñee re. ⁸ Ěrei Elimas (cua tee uipota jei: “Ipaye vae”) umbiávai, agüüye vaerā tēi mburuvicha upurugüürovia. ⁹ Ěrei Saulo (uyembijee vi Pablo pe vae) tineel Espíritu Santo pe, jare umaae ngatu Elimas re ¹⁰ jare jei chupe:

—Nde co jae aña guasu tai upurumbítavi vae. Nde ndiyapo icavi mbae vae, jare ndipota'ā ūru vae reta uyapo vaerā jupi vae. Jecuaeño ndeporoyopia yandeYa jape icavi vae güi. ¹¹ Mase, añave yandeYa tombou ipo nderé, nderesa mbae ndico vaerā. Ndarau ndeecha guarasi mbovi ara pegua —jei.

Jare jupivoiño Elimas ipuere'ā mbae uecha, pítmimbi oí yave rami, jare coti coti uyerova ueca tēi quia uipoco güüraa vaerā. ¹² Jayave mburuvicha cua uyeyapo vae uecha yave, güirovia Tumpa iñee. Echa'ā ipiacaní yandeYa iporomboe re.

Pablo jare Bernabé Antioquía Pisidia pegua pe

¹³ Jayave Pablo jare jae ndive ñugüünoi vae reta yugüüraa Pafos güi, jare uasa i guasu rupi tenta guasu Perge ivi Panfilia pegua pe. Ěrei Juan ueya reta oo ye Jerusalén coti. ¹⁴ Jayave jae reta yugüüraa Perge güi tenta guasu Antioquía Pisidia pegua coti. Jare joco pe yugüüraa uvāe yave, uique reta judío reta itupao pe mbutuu ara pe, jare uguapí reta. ¹⁵ Jare ūru vae reta opa umingueta yave mboroyocui güi jare Tumpa iñee araceae umimbeu vae reta uicuatiacue güi, tupao pegua reta itenondegua reta omondo jei chupe reta:

—Oreriví reta, ime yave ñee penoi orembiaracuaa vaerā, pepuere piyeminguela.

¹⁶ Jayave Pablo upūa, jare umupūa ipo umiquíi reta vaerā. Jayave jei chupe reta:

—Cuimbae Israel pegua reta jare opaete pe reta Tumpa re pipiu vae, piyapisaca cheré. ¹⁷ Israel pegua reta i Tumpa uiaparavo yandetenondegua reta, jare umbutuichaca Egipto pe yugüüreco rambueve. Ěrei Egipto jae reta iivi'ā co. Jare Tumpa imbaepuere tuchua vae pe güinoé joco güi —jei—. ¹⁸ Jare cuarenta año urupia chupe reta ñiana rupi. ¹⁹ Jare opa umbai yave Canaán güi siete ivi ambiembie vae pegua reta, umee cua reta iivícue Israel pegua reta pe iivirā —jei—. ²⁰ Cua jaicue rupi cuatrocientos cincuenta año rupi Tumpa umee chupe reta mburuvicha reta uáa vaerā Samuel oí regua. Samuel co jae Tumpa iñee araceae umimbeu vae —jei—. ²¹ Jayave jae reta uyerure mburuvicha guasu re. Jayave Tumpa umee chupe reta Cis tai Saúl jee vae cuarenta año pegua. Jae co penti cuimbae Benjamín iñemoñaa pegua. ²² Jare Tumpa cua cuimbae omombo yave, umee chupe reta David juvicha guasurā. Jare Tumpa jei David re: ‘Che aicuua Isaí tai David. Jae co penti cuimbae chembiyerovia vae. Jae uyapota opaete che aipota vae’ —jei, jei Pablo—. ²³ Cua David iñemoñaa reta güi Tumpa umee Jesús. Jae co Israel pegua reta umbiás vae. Jucuarái Tumpa uyapo ma araceae jei vae —jei—. ²⁴ Ndei Jesús ou mbove, Juan umimbeu opaete Israel pegua reta pe ueya vaerā iyeminguela icavi mbae vae ipá pe oí vae, jare uyembibautizaca vaerā. ²⁵ Jare Juan opata ma umimbeu chupe reta yave, jei: ‘Pe reta pepia pe piyeminguela tēi che co jae. Ěrei jucuarái’ā. Co ou cheraicue ūru vae. Jupi'ā co che amboi vaerā ipipasa’ —jei, jei—.

²⁶ Cheriqueí reta, pe reta co jae Abraham iñemoñaa reta jare ūru vae reta pe reta Tumpa re pipiu vae co. Tumpa ombou peve cua ñee piyembiasaca vaerā. ²⁷ Echa'ā Jerusalén pegua reta jare juvicha reta uicuua'ā quía ra co jae Jesús. Uicuua'ā vi Tumpa iñee araceae umimbeu vae reta uicuatiacue opa mbutuu ara pe jae reta umingueta tēi vae. Jáeramo jae reta jei Jesús uyeyucaca vaerā, jare jucuarái uyeyapo uyecuatía oí jese vae —jei Pablo—. ²⁸ Jare yepé tēi uvāe'ā tecó Jesús re uyucaca reta vaerā, ērei uyerure Pilato pe uyucaca vaerā. ²⁹ Jare jae reta opa ma uyapo chupe yave opaete jese uyecuatía oí vae, umbigüeyica reta curusu güi, jare oñonoca teögüeriru pe —jei—. ³⁰ Ěrei Tumpa umbijecove ye güeru umanocue vae reta ipite güi. ³¹ Jare jeta ara uyecuua jae jupié yugüüraa Galilea güi Jerusalén pe vae reta pe. Jae reta añave umimbeu ūru vae reta pe —jei Pablo chupe reta—. ³²⁻³³ Jare ore vi numimbeu peve

ñee icavi vae, quirāi Tumpa jei yandetenondegua reta pe vae Tumpa etei uyapo ma yandeve. Echa'ā umbijecove ye Jesús güeru umanocue vae reta ipite güi. Uyecuatía oī Salmo mocui pe cuarāi: 'Nde co jae cheRai. Cua ara che co jae ndeRu.' Jucuarāi uyecuatía oī. ³⁴ Tumpa umbijecove ye güeru umanocue vae reta ipite güi, agüiye vaerā etei jetecue icumegua. Jare cua re jei: 'Tamee ndeve bendición reta David pe jae ameeta chupe vae' —jei Tumpa, jei—. ³⁵ Jáeramo jei íru Salmo pe: 'Che co jae jupi vae. Nemaenota'ā cheretecue re icumegua vaerā' —jei, jei—. ³⁶ Echa'ā David opa uyeyocui yave opaete jentaigua reta pe Tumpa uipota vae rupi, umano, jare uñenotica itenondegua reta ñugüiñoi vae pe, jare jetecue icumegua —jei—. ³⁷ Êrei jocua Tumpa umbijecove ye güeru umanocue vae reta ipite güi vae jetecue icumegua'ā etei —jei—. ³⁸ Jáeramo, cheriquei reta, picuacá cavi cua ore numimbeu íru vae reta pe vae. Tumpa umbiasata peve pombaeyoa reta cua Jesús rupi. ³⁹ Jare opaete güirovia jese vae reta uyembujupica ma. Echa'ā yandepuere'ā yayembujupica Moisés iporoyocui re —jei—. ⁴⁰ Jáeramo piñemoa ngatu, agüiye vaerā uyeyapo peve Tumpa iñee aracae umimbeu vae reta jei vae. Echa'ā jei reta cuarāi:

⁴¹ 'Mase, upurugüiñiro vae reta, pepiacañi jare pecañitei' —jei Tumpa—.

'Echa'ā che ayapota penti mbaravíqu pico rambueve.

Pe reta ndarau perovia, yepe tēi quía umimbeuta peve' —jei.

Jucuarāi jei reta —jei.

⁴² Jare oē reta yave judío reta itupao güi, judío mbae vae reta umiñera umimbeu vaerā chupe reta cua ñee mbutuu ara outa vae pe. ⁴³ Jare tupao pe yati vae reta opa yugüiña yave, jeta judío reta jare judiorā uyeyapo vae umbiadora Tumpa vae reta yugüiña Pablo jare Bernabé ndive. Cua mocui reve imiari chupe reta, jare oyocui jecuaeño uyeco reta vaerā Tumpa ipiacaví re.

⁴⁴ Jare mbutuu ara ou vae pe opaete seri tenta guasu pegua reta uyembati, uyapisaca vaerā Tumpa iñee re. ⁴⁵ Êrei judío reta uecha yave jeta vae yati, uñemigüiñiro, jare jei añete'ā co Pablo jei vae, jare jei icavi mbae vae Pablo coti. ⁴⁶ Jayave Pablo jare Bernabé imiari uquiye mbae reve chupe reta. Jei reta:

—Añete icavi co ore numimbeu vaerā peve rani Tumpa iñee. Êrei períro ma. Pipota'ā ma. Jucuarāi picuacá oreve penoita'ā co tecove opa mbae vae. Jáeramo añave numimbeuta judío mbae vae reta pe.

⁴⁷ Echa'ā yandeYa oreocui cuarāi:

'Pomondo judío mbae vae reta pe, peraa vaerā tembipe chupe reta,
jare pemimbeu vaerā opaete ivi pegua reta pe Tumpa umbiasata co.'

Jocuarāi oreocui —jei reta.

⁴⁸ Jare judío mbae vae reta uyandu yave cua ñee, tuicha uyerovia reta, jare umbutuicha Tumpa iñee. Jare güirovia opaete jocua Tumpa uiparavo tecove opa mbae vae güiñoi vaerā vae reta. ⁴⁹ Jare Tumpa iñee uñemai opaete jocua ivi rupi. ⁵⁰ Êrei judío reta omboemboe cuña tenta guasu pegua reta itenondegua uipiu Tumpa vae reta jare cuimbae tenta guasu pegua reta itenondegua reta, jare umbipi uiporaraca Pablo jare Bernabé pe, jare omombo reta ivi güi. ⁵¹ Jayave Pablo jare Bernabé umítimo ivicuui ipi güi, uechaca vaerā tenta guasu pegua reta co tecu güiñoi, jare yugüiña tenta guasu Iconio coti. ⁵² Êrei upurugüirovia vae reta uyerovia ete, jare tñee Espíritu Santo pe.

14

Pablo jare Bernabé Iconio pe

¹ Jare Iconio pe Pablo jare Bernabé uique pāve judío reta itupao pe, jare imiari reta joco pe ñugüiñoi vae reta pe. Jáeramo jeta judío reta jare judío mbae vae reta upurugüirovia. ² Êrei judío upurugüirovia mbae vae reta omboemboe judío mbae vae reta, jare umitarëica chupe reta upurugüirovia vae reta. ³ Jáeramo Pablo jare Bernabé upita joco pe ima pegua, jare imiari íru vae reta pe uquiye mbae reve yandeYa re. Jare yandeYa uechaca añete co iñee mbiacavi regua miacañi Pablo jare Bernabé uyapo vae reta rupi. ⁴ Êrei tenta guasu pegua reta uyembiyo uyugüi. Amocue uñemiru judío reta ndive, jare amocue uñemiru Jesús jemimondo reta ndive. ⁵ Jare judío reta jare judío mbae vae reta juvicha reta ndive uipota upurupeña Jesús jemimondo reta re, uyapo vaerā tēi icavi mbae vae chupe reta jare uyapi vaerā tēi ita pe. ⁶ Êrei Pablo jare Bernabé cua uicuua yave, osi yugüiña tenta guasu reta Listra jare Derbe pe jare cua mocui tenta guasu iyipi rupi. Cua tenta guasu reta co ivi Licaonia pegua. ⁷ Jare joco pe vi jae reta umimbeu ñee icavi vae.

Listra pegua reta uyapi Pablo ita pe

⁸ Jare Listra pe uguapi oī penti cuimbae ipuere mbae uguata vae. Ichi jie güi oa güive ipuere'ā etei uguata. ⁹ Cua cuimbae uyandu Pablo imiari oī. Jare Pablo umae ngatu jese, jare uecha güiñoi mburugüirovia ucuera vaerā. ¹⁰ Jayave Pablo iñeeäta reve jei chupe:

—Epúa iyemboi.

Jare jae upúa voi uyemboi jare umbipi uguata. ¹¹ Jayave yati vae reta uecha yave Pablo uyapo vae, jei reta Licaonia pegua reta iñee pe iñeeäta reve:

—Tumpa cuimbae reta rami vae reta ugüeyí yandeve.

¹²Jare jae reta umbijee Bernabé Júpiter, jare umbijee Pablo Mercurio. Echa'á Pablo icatu imiari vaerã. ¹³Jare jocua tumpa-raanga Júpiter jee vae itupao oí tenta guasu jovai. Jare Júpiter isacerdote güeru güeye reta jare mbaepotí reta tenta guasu jonque pe, jare jae jare yatí vae reta uipota tẽi uyuca güeye reta umbiadora vaerã Pablo jare Bernabé. ¹⁴Êrei Jesús jemimondo reta cua uicuua yave, omondoro reta jemimondei, jare osi yatí vae reta ipite pe, jare iñeeáta reve jei chupe reta:

¹⁵—Cuimbae reta, ¿maera pa piyapo cua? Ore perapicha retaño co. Jare numimbeu peve piyerova vaerã cua icavi mbae vae piyapo vae güi Tumpa icove vae coti. Echa'á jae uyapo ara, ivi, i guasu jare opaete mbaembae ime ñugüinoi pipe vae reta —jei reta—. ¹⁶Tumpa umaeño aracae pegua reta re uyapo vaerã jae reta uipota vae. ¹⁷Êrei jae jecuaeño uycuua chupe reta mbaembae icavi vae jae uyapo vae rupi. Echa'á jae ombou yandeve ama jare umbicuacuua cavi temiti reta yanderembirã ime vaerã. Jare jucuarã uyapo, yayerovia vaerã —jei reta.

¹⁸Cua jei reta yave, añapea umbiavai tenta guasu pegua reta agüiye vaerã uyuca güeye reta umbiadora vaerã.

¹⁹Jayave amocue judío reta yugüeru Antioquía jare Iconio güi. Jae reta omboemboe tenta guasu pegua reta uyapi vaerã Pablo ita pe. Jare uyapi ma yave, umbitiriri güiraa tenta guasu güi ñana coti. Umano echa chupe reta. ²⁰Êrei upurugüirovia vae reta yugüeru uyembati yave Pablo iyípi rupi, Pablo upúa oo ye tenta guasu pe. Jayave piareve pe oo Bernabé ndive Derbe coti.

²¹Jare umimbeu reta ñee icavi vae Derbe pe, jare jeta Derbe pegua reta güirovia Jesús re. Jayave Pablo jare Bernabé yugüeru ye Listra, Iconio jare Antioquía pe. ²²Jare cua tenta guasu reta pe jae reta umiatangátu upurugüirovia vae reta, jare umbiaracuua jecuaeño güinoi vaerã mburugüirovia Tumpa coti. Jare jei vi chupe reta:

—Jetañotai co yaiporara yaique vaerã Tumpa iporoyocuia pe.

²³Jare upurugüirovia vae reta uyembatimbati vae pe Pablo jare Bernabé uiparavo upurugüirovia vae reta itenondegua retarã. Jare uyerure reta uycuacu reve tembiú güi. Uyerure yandeYa pe jae uyandareco vaerã cua itenondegua reta re. Echa'á güirovia reta ma yandeYa re.

Yugüiraa ye Antioquía Siria pegua pe

²⁴Jayave Pablo jare Bernabé uasa Pisidia rupi, jare yugüiraa uvæ Panfilia pe. ²⁵Jayave umimbeu ma yave Tumpa iñee Perge pe, yugüiraa tenta guasu Atalia pe. ²⁶Jare joco güi uasa i guasu rupi Antioquía coti. Echa'á upurugüirovia vae reta Antioquía pegua tenonde yave uyerure Tumpa pe ipiácati oí vaerã jae reta ndive cua mbaravíqu opa ma uyapo vae re. ²⁷Jare yugüiraa uvæ yave, Pablo jare Bernabé uyembati upurugüirovia vae reta ndive, jare umimbeu chupe reta opaete Tumpa uyapo chupe reta vae, jare quirãi Tumpa umaeño judío mbae vae reta re upurugüirovia vaerã. ²⁸Jare upita reta joco pe íma pegua upurugüirovia vae reta ndive.

15

Jerusalén pe uyeypao vae

¹Jare yugüeru Judea güi amocue cuimbae reta, jare jei upurugüirovia vae reta pe:

—Piñemicircuncidaca'á yave Moisés iporoyocui pe jei rami, ndarau pepuere piyembiasaca.

²Jare Pablo jare Bernabé jeta uyeaca jae reta ndive cua re. Jayave upurugüirovia vae reta uiparavo Pablo jare Bernabé jare íru vae reta jae reta ipite güi, yugüiraa vaerã Jerusalén pe uyeminguela cua re Jesús jemimondo reta jare upurugüirovia vae reta itenondegua reta ndive.

³Jayave íru upurugüirovia vae reta omondo ma yave, jae reta uasa Fenicia jare Samaria rupi jare umimbeu joco pegua reta quirãi judío mbae vae reta uyerova Tumpa coti. Jare umbiyerovia ete upurugüirovia vae reta.

⁴Jare yugüiraa uvæ yave Jerusalén pe, Jesús jemimondo reta jare opaete upurugüirovia vae reta itenondegua reta ndive umbiresive cavi reta. Jare Pablo jare Bernabé umimbeu chupe reta opaete Tumpa uyapo chupe reta vae. ⁵Êrei amocue fariseo pegua upurugüirovia vae reta upúa jare jei:

—Icavi co ñamicircuncidaca vaerã, jare yayocui uyapo vaerã Moisés iporoyoci.

⁶Jayave Jesús jemimondo reta jare upurugüirovia vae reta itenondegua reta uyembati, uyeminguela vaerã cua re. ⁷Jare uyeaca ma uypui yave, Pedro upúa jare jei chupe reta:

—Cherivi reta, picuua catu co quirãi caramboe yave Tumpa cheparavo amimbeu vaerã judío mbae vae reta pe ñee icavi vae, jae reta güirovia vaerã. ⁸Tumpa uicuua opaete vae ipia pe oí vae, jare jae uechaca jae reta güirovia co. Echa'á umee chupe reta Espíritu Santo, yandeve umee rami —jei Pedro—.

⁹Jare Tumpa umbiyuavíá etei yandegüi. Echa'á oyoe ma ipia, jae reta güirovia yave —jei—. ¹⁰Jayave ¿maera pa pipota pembiavai Tumpa? Echa'á mboroyocu penti tívita rami. Pe reta pipota pembiavita

jocua upurugüirovia vae reta. Êrei yandetenondegua reta jare yande vi yandepuere'ã yavoí —jei—.
¹¹ Yande yarova yayembiasaca ma co yandeYa Jesús ipiacavi re, jae reta rami —jei.

¹² Jayave opaete yati vae reta iquiiño, jare uyapisaca Bernabé jare Pablo jei vae re. Jae reta umimbeu chupe reta opaete miacaní reta Tumpa uyapo jae reta rupi judío mbae vae reta ipite pe vae. ¹³ Jare jae reta opa imiari yave, Jacobo jei:

—Cherivi reta, piyapisaca cheré. ¹⁴ Simón umimbeu ma yandeve quirai Tumpa jaeramo etei uparaviqui judío mbae vae reta ipite pe, uiparavo vaerá chugüi reta amocue jae jee umbiadora vaerá —jei—. ¹⁵ Cua re co jei vi Tumpa iñee aracae umimbeu vae reta. Uyecuatí oí cuarai:

¹⁶ 'Cua jaicue rupi ayu yeta,

jare ayapo yeta David jenta opa usururu vae' —jei yandeYa—.

'Amupúa yeta usururucue, jare ambipauta,

¹⁷ opaete íru ivi pegua reta chereca vaerá,

jare opaete judío mbae vae reta.

Che co jae reta iYa.

¹⁸ Che aicuaaca cua aracae güive' —jei yandeYa.

Jucuarai uyecuatí oí —jei chupe reta—. ¹⁹ Jáeramo che jae agüiye yamamboco jocua judío mbae vae uyerova Tumpa coti vae reta. ²⁰ Êrei yaicuatí chupe reta agüiye vaerá jou soo tumpa-raanga pe uñemee vae, jare maemimba uyeyuví vae isoo, jare soo jugüi reve, jare agüiye vaerá uyapo aguasa —jei Jacobo—. ²¹ Echa'a aracae güive yugüiroco tenta guasu guasu pe Moisés iporoyocui umimbeu vae reta. Opa mbutuu ara jae reta umingueta Moisés iporoyocui itupao reta pe —jei.

²² Jayave Jesús jemimondo reta jare opaete upurugüirovia vae reta itenondegua reta ndive jei icavi co uyeparavo vaerá amocue cuimbae reta jae reta ipite güi, omondo vaerá Antioquia pe Pablo jare Bernabé ndive. Jayave uiparavo Judas Barsabás jare Silas. Jae reta co upurugüirovia vae reta itenondegua reta.

²³ Jare jae reta güiraa tupapire. Cua tupapire pe jei cuarai: "Ore co jae Jesús jemimondo reta jare opaete upurugüirovia vae reta itenondegua reta ndive. Nomondo numbisaluda opaete judío mbae vae upurugüirovia vae Antioquia, Siria jare Cilicia pegua reta. ²⁴ Jerácua oreve quirai amocue orepite güi yugüiraa pemamboco. Jucuarai uyapo reta, yepe tēi ore ndoyocui'á. Jáeramo pe reta picua'a mbae piyapo vaerá. Echa'a jei reta piñemicircundidaca vaerá jare piyapo vaerá mboroyocui pe uyecuatí oí vae. ²⁵ Nduyeminguela ma cua re, jare ore opaete ndoe icavi co uyeparavo vaerá amocue orepite güi, nomondo vaerá pecoti Bernabé jare Pablo ndive. Nduau co Bernabé jare Pablo. ²⁶ Jae reta iquirai umee jecove yandeYa Jesucristo pe uyeyocui vaerá. ²⁷ Jáeramo nomondo pepi Judas jare Silas. Jae reta iñee pe etei umimbeuta vi peve cua. ²⁸ Ore ndarau pumbiavai. Cua mboviño numimbeuta peve. Cua icavi Espíritu Santo pe jare oreve vi. ²⁹ Agüiye peu soo tumpa-raanga pe uñemee vae, jare maemimba uyeyuví vae isoo, jare soo jugüi reve. Jare agüiye piyapo aguasa. Cua ore ndoe peve vae piyapo yave, icavita pico. Tumpa ndiveño." Jucuarai uyecuatí oí tupapire pe.

³⁰ Jayave uyemondoca vae reta yugüiraa uvae Antioquia pe. Jare umbati yave upurugüirovia vae reta, umee chupe reta tupapire. ³¹ Jare opa umingueta yave, opareve uyerovia cua ñee umbipiácatu vae re.

³² Jare Judas jare Silas Tumpa iñee umimbeu vae reta co, jare jeta uyemingueta upurugüirovia vae reta pe, umbipiácatu jare umimirata vaerá. ³³ Jare ima ma joco pe ñugüinoi yave, upurugüirovia vae reta omondo cavi ye ombou vae reta coti. ³⁴ Êrei icavi echa Silas pe upita vaerá joco pe. ³⁵ Jare Pablo jare Bernabé upita Antioquia pe oporomboe Tumpa iñee re, jare umimbeu ñee icavi vae jeta íru vae reta ndive.

Pablo ueya Bernabé, jare oo ye umimbeu ñee icavi vae

³⁶ Mbovi ara rupi Pablo jei Bernabé pe:

—Yaa ye yapou upurugüirovia vae reta pe opaete tenta guasu yamimbeu ma yandeYa iñee vae reta rupi, yaecha vaerá quirai ra ñugüinoi.

³⁷ Jare Bernabé uipota tēi güiraa jae reta jupié Juan Marcos. ³⁸ Êrei Pablo jei icavi'á güiraa vaerá jae reta jupié. Echa'a Juan Marcos ou ye Panfilia güi chugüi reta, jare oo'á jae reta jupié Tumpa iparavíqui uyapo vaerá. ³⁹ Jare uyeaca reta uyupii cua re. Jáeramo uyembiyao reta uyugüi. Marcos oo Bernabé jupié, jare jae reta uasa i guasu rupi Chipre pe. ⁴⁰ Êrei Pablo uiparavo Silas iguataírurá, jare upurugüirovia vae reta uyerure yandeYa pe ipiacavi oí vaerá jae reta ndive. Jayave jae reta yugüiraa.

⁴¹ Jare uasa reta ivi Siria jare Cilicia rupi umiatangátu reve upurugüirovia vae reta uyebatimbati vae rupi.

¹Jayave yugüüraa uvāe Derbe pe, jare joco güi yugüüraa Listra pe. Jare joco pe ico penti upurugüürovia vae Timoteo jee vae. Ichi co jae penti judía upurugüürovia vae, jare tu co jae penti griego. ²Upurugüürovia vae Listra jare Iconio pe ñugüüinoi vae reta uyemingueta cavi Timoteo re. ³Pablo uipota güüraa Timoteo jae reta jupíe. Jáeramo umicircuncidaca, jocoropi judío ñugüüinoi vae reta jeco pegua. Echa'ä opaete vae uicuua jae tu griego co. ⁴Jare yugüüraa rambueve tenta guasu reta rupi, umimbeu upurugüürovia vae reta pe Jesús jemimondo reta jare upurugüürovia vae reta itenondeguia Jerusalén pe ñugüüinoi vae reta uicuatiá chupe reta vae, jae reta uyapo vaerā. ⁵Jayave upurugüürovia vae reta uyembatimbati vae rupi uñemiatangātu Tumpa coti, jare opa ara rupi ïru vae reta güürovia Jesús re jare uñemíru jae reta ndive.

Cuimbae Macedonia pegua

⁶Jare Pablo jare jae ndive ñugüüinoi vae reta uasa ivi Frigia jare Galacia rupi. Jare Espíritu Santo oyopia reta, agüiye vaerā umimbeu Tumpa iñee Asia pe. ⁷Jare ivi Misia pe yugüüraa uvāe yave, uipota tēi yugüüraa ivi Bitinia pe. Ërei Espíritu Santo umaeño'ä yugüüraa vaerā. ⁸Jayave uasa reta coiño Misia güi, jare yugüüraa uvāe tenta guasu Troas pe. ⁹Jare pítu yave Pablo uecha ique pe penti cuimbae ivi Macedonia pegua uyemboi oí joco pe. Jare cuimbae uyerure Pablo pe:

—Ecua Macedonia pe orembori.

¹⁰Jare cua uecha ma yave, jupivoiño nduipota ndoo Macedonia coti. Echa'ä nduicuua ma Tumpa orereni numimbeu vaerā Macedonia pegua reta pe ñee icavi vae.

Peresoriru pe Filipes pe

¹¹Jayave ndoo nduasa simi i guasu rupi Troas güi ivi Samotracia pe. Jayave piareve pe ndoo nuvāe tenta guasu Neápolis pe. ¹²Jayave joco güi ndoo tenta guasu Filipes pe. Cua co tenta guasu tenondeguia ivi Macedonia pegua, jare cua pe yugüero yugüireco vaerā Roma pegua reta. Cua tenta guasu pe ndupita mboví ara. ¹³Jare mbutuu ara pe ndoo tenta guasu jonque rupi iäca jembei pe. Joco pe oí penti yerurerenda. Jare joco pe nduguapi ma yave, oremiari cuña joco pe yati vae reta pe. ¹⁴Jare penti cuña Lidia jee vae tenta guasu Tiatira pegua uyapisaca oí. Cua cuña umbiadora Tumpa. Jae co temimonde pítu vae umee vae. Jare yandeYa uparavíquí ipia pe, jae uyapisaca cavi vaerā Pablo jei vae re. ¹⁵Jare jae jare jentará reta uyembibautizaca ma yave, jae jei oreve:

—Perovia yave che arovia cavi yandeYa re, peyu pepita cherenta pe.

Jare oremiñera ndupita vaerā joco pe.

¹⁶Jare ndoo yave yerurearenda pe, orerováiti penti cuñatai aña oya jese vae. Cua cuñatai iya reta umingana jeta corepoti jese. Echa'ä cuñatai umimbeu ïru vae reta pe aña imbaepuere rupi mbae uyeyapota vae. ¹⁷Cua cuñatai oo oreraicue, jare iñeeäta reve jei:

—Cua cuimbae reta Tumpa ivate pegua jembiocui reta co. Jae reta umimbeu yandeve quirái yandepuere yayembiasaca —jei.

¹⁸Jare jeta ara jucuarái uyapo cuñatai. Jayave cua umambeco Pablo, jare jae uyerova jei aña pe:

—Jesucristo jee re ndoyocui: ¡Esíri chugüi!

Jare jupivoiño aña usíri chugüi.

¹⁹Jare cuñatai iya reta uicuua yave uminganata'ä ma co jese, uipisi reta Pablo jare Silas, jare güüraa reta plaza pe mburuvicha reta pe. ²⁰Jare mburuvicha reta pe güüraa ma yave, jei reta:

—Cua cuimbae reta judío reta co, jare umambeco ete ñanerenta guasu pegua reta. ²¹Jupi'ä yambiresive vaerā ani yayapo vaerā cua moromboe umimbeu yandeve vae. Echa'ä yande Roma pegua reta co —jei reta mburuvicha reta pe.

²²Jayave yati vae reta penti ramí uepeña reta. Jare mburuvicha reta omondoro Pablo jare Silas jemimonde reta, jare uinupaca ivira pe. ²³Jare jeta ma uinupaca reta yave, umiñgueca reta peresoriru pe. Jare oyocui reta peresoriru iyandarecoa uáro cavi vaerā, agüiye vaerā osi. ²⁴Cua uyandu yave, peresoriru iyandarecoa umiñgue reta peresoriru japipe coti ete oí vae pe, jare oñono ipi iviracua pe.

²⁵Ërei piare mbite ma yave Pablo jare Silas uyerure Tumpa pe, jare ucanta ñugüüinoi umbiadora Tumpa. Jare ïru pereso reta uyapisaca ñugüüinoi jese reta. ²⁶Jare aramoiño tanta ucata ivi, jare uñemicäta peresoriru iguapica. Jare jupivoiño ueyepa opaete onque reta, jare uyeru opaete cadena pereso reta uñeapiti pipe vae reta. ²⁷Jayave peresoriru iyandarecoa usareco, jare uecha ueyepa ñugüüinoi peresoriru jonque reta. Jayave uequi iquiseputu jíru güi, uyeyuca vaerā. Echa'ä jae jei tēi pereso reta opa ma co osi. ²⁸Ërei Pablo iñeeäta reve jei:

—Agüiye iyeyuca. Echa'ä opareveño noí cua pe —jei.

²⁹Jayave peresoriru iyandarecoa ueni quía güero vaerā chupe tembipe. Jayave osi peresoriru japipe pe, jare ueyaticha Pablo jare Silas jovai. Uríri oí uquiyre ramo. ³⁰Jayave güinoë reta oca pe jare jei chupe reta:

—Carai reta, ¿mbae pa ayapota ayembiasaca vaerā?

³¹ Jayave jae reta jei chupe:

—Erovia yande Ya Jesucristo re, jare ndiyembiasacata co, jare nerenta pegua reta vi.

³² Jayave jae reta umimbeu Tumpa iñee chupe jare opaete jenta pegua reta pe. ³³ Jare jocua ora voi peresoriru iyandarecoa güíraa Pablo jare Silas oyoe ipere. Jayave jae jare opaete jenta pegua reta uyembíbautizaca. ³⁴ Jayave peresoriru iyandarecoa güíraa jenta pe umingaru Pablo jare Silas. Jare jae jare opaete jenta pegua reta uyerovia ete. Echa'ã güírovia reta ma Tumpa re.

³⁵ Jare cõe ma yave, mburuvicha reta ombou amocue sundaro reta jei vaerã:

—Iyora jocua cuimbæ reta.

³⁶ Jare peresoriru iyandarecoa umimbeu cua ñee Pablo pe. Jei chupe:

—Mburuvicha reta ombou cheocui moyora vaerã. Jáeramo añave pepuere peẽ jare peo cavi.

³⁷ Ërei Pablo jei sundaro reta pe:

—Mburuvicha reta orenupaca opaete vae jovalque orereco mbae reve, jare oreminiueca peresoriru pe, yepe tẽi ore co jae romano reta. Jare añave uipota oreyoraca viari. Ndaraú uyapo jucuarãi. Tuyugüeru jae reta etei oreyora vaerã —jei.

³⁸ Jayave sundaro reta yugüíraa umimbeu cua ñee mburuvicha reta pe. Jayave mburuvicha reta uquiyé, uicuña yave jae reta romano reta co. ³⁹ Jayave yugüeru peresoriru pe ueca vaerã ñee cavi Pablo jare Silas pe. Jayave güínoë oca pe, jare umiñera yugüíraa vaerã tenta guasu güi. ⁴⁰ Jayave Pablo jare Silas yugüíraa peresoriru güi Lidia jenta pe. Jare uecha upurugüirovia vae reta, jare umbiaracuaa. Jayave yugüíraa joco güi.

17

Tecorai Tesalónica pe

¹ Pablo jare Silas uasa yave tenta guasu Anfípolis jare Apolonia rupi, yugüíraa uvæe tenta guasu Tesalónica pe. Joco pe oĩ penti judío reta itupao. ² Jare Pablo oo tupao pe. Echa'ã jucuarãi uyapo opaete tenta guasu reta rupi. Jare mbapi mbutuu ara uyeaca judío reta ndive. ³ Uechaca chupe reta Tumpa iñee uyequatía oĩ vae, jare uicuaca quirãi Cristo uiporarañotai co jare icove yeñotai co ou umanocue vae reta ipite güi. Jare jei chupe reta:

—Cua Jesús que amimbeu peve vae co jae Cristo.

⁴ Jayave amocue güírovia Pablo jei vae, jare jae reta, jare jeta griego umbiadura Tumpa vae reta, jare jeta cuña tenta guasu pegua reta itenondegua reta uñemírro Pablo jare Silas ndive. ⁵ Ërei judío güírovia mbae vae reta ñacatãa Pablo jare Silas re, jare güeru amocue cuimbæ iyaquí vae reta. Jeco pochi co cua cuimbæ reta. Jayave umbatí jeta íru vae reta, jare uyapo tecorai. Jayave upurupeña reta Jasón jenta re ueca tẽi Pablo jare Silas. Uipota tẽi güíraa tenta guasu pegua reta jovai. ⁶ Ërei uvæe'ã chupe reta. Jayave uipisi güíraa Jasón jare amocue upurugüirovia vae reta mburuvicha tenta guasu pegua reta pe, jare iñeeäta reve jei reta:

—Jocua cuimbæ umamboco opaete ivi pegua reta vae reta yugüeru vi cua pe. ⁷ Jare Jasón güínoi jenta pe. Jare opaete jae reta oyovaicho César iporoyocui ndive. Echa'ã jei reta ime íru mburuvicha guasu Jesús jee vae —jei reta.

⁸ Jayave tenta guasu pegua reta jare juvicha reta cua uyandu yave, uyemipia'ã. ⁹ Jare Jasón jare íru vae reta umbiepi chupe reta yave, jae reta umaeño yugüíraa ye vaerã.

Pablo jare Silas Berea pe

¹⁰ Jare jupivoiño upurugüirovia vae reta omondo Pablo jare Silas pítu yave tenta guasu Berea jee vae coti. Jare jae reta yugüíraa uvæe yave joco pe, yugüíraa judío reta itupao pe. ¹¹ Jare joco pegua judío reta iyaracuaa catu Tesalónica pegua reta güi. Iquiréi uyapisaca Tumpa iñee re, jare opa ara umingueta cavi Tumpa iñee uyequatía oĩ vae, uicuña vaerã añete ra Pablo jei vae. ¹² Jare jeta joco pegua reta güírovia. Jare güírovia vi jeta griega reta itenondegua reta, jare jeta griego reta. ¹³ Ërei judío Tesalónica pegua reta uicuña yave Pablo umimbeu Berea pegua reta pe vi Tumpa iñee, yugüíraa joco pe omboemboe umamboco vaerã joco pegua reta. ¹⁴ Jayave upurugüirovia vae reta omondo Pablo i guasu coti. Ërei Silas jare Timoteo upita Berea pe. ¹⁵ Jare Pablo jupié yugüíraa vae reta güíraa tenta guasu Atenas pe. Jayave Pablo oyocui jae reta umimbeu vaerã Silas jare Timoteo pe yugüeru vaerã icoti imambae, ipuere yave. Jayave jae reta yugüeru ye Berea coti.

Pablo Atenas pe

¹⁶ Jare Pablo uâro oĩ rambueve Atenas pe, uecha yave jeta tumpa-raanga reta ñugüinoi tenta guasu rupi, uyemipia'ã. ¹⁷ Jayave uyeaca judío reta itupao pe judío reta jare íru umbiadura Tumpa vae reta ndive. Jare uyeaca vi opa ara plaza pe joco pe ñugüinoi vae reta ndive. ¹⁸ Jare amocue iyaracuaa vae reta uyeaca Pablo ndive. Jae reta co Epicúreo jare Estoico jee vae reta. Amocue jei:

—¿Mbae ra uipota jei cua iyeminguetase vae?

Jare ūru vae reta jei:

—Aramoi jae umimbeu ūru tumpa yaicuaa mbae vae reta regua.

Echa'ā Pablo umimbeu chupe reta ñee icavi vae Jesús regua, jare quirāi jae icove ye ou umanocue vae reta ipite güi.¹⁹ Jare jae reta güüraa Pablo iñitu Areópago jee vae pe. Jare jei reta chupe:

—Emimbeu oreve mbae nunga moromboe ipiau vae ra cua nemiasi jese vae.²⁰ Echa'ā cua nemimbeu ma oreve vae jaeramo nduyandu. Jáeramo nduipota nduicuaa mbae ra uiporta jei cua —jei reta.

²¹ Echa'ā opaete Atenas pegua reta jare queti güi yugüero yugüüreco joco pe vae reta jaeño ma yugüüreco imiasi vaerā jare uyapisaca mbae ipiau vae re.

²² Jayave Pablo uyemboi Areópago pe jeta vae reta ipite pe, jare jei chupe reta:

—Cuimbae Atenas pegua reta, aecha ma pe reta pembiadura co tumpa reta.²³ Echa'ā aguata rambueve tenta guasu rupi, amae jocua pembiadura vae reta re, jare aecha penti yembiadorarenda, jare jese uyecuatía oī cuarāi: ‘Tumpa yaicuaa mbae vae’. Jucuarāi uyecuatía oī. Jáeramo tamimbeu peve pera picuaa'ā reve pembiadura vae —jei—.

²⁴ Tumpa uyapo iñi jare opaete oī pipe vae. Jae co ara jare iñi Ya. Jae ico'ā yembiadorarenda vae rupi yande yayapo vae reta pe.²⁵ Tumpa ueca'ā etei iñi pegua reta umee vaerā mbae chupe. Echa'ā jae etei co umee yandeve tecove, jare ñaneputüé, jare opaete mbaembae —jei chupe reta—.

²⁶ Jare Tumpa uyapo penti cuimbae, jare opaete iñi pegua reta iñemoñaa reta co. Jucuarāi Tumpa uyapo, jae reta yugüüreco vaerā opaete iñi iárambo. Tumpa etei co umee quirāi yave iñi pegua reta yugüüreco vaerā, jare umbiyaoyao iñi chupe reta yugüüreco tee tee vaerā —jei Pablo—.²⁷ Opaete cua Tumpa uyapo, iñi pegua reta ueca vaerā Tumpa, jare aramoi uvāe vaerā iyupe. Echa'ā añetete jae mbirí'ā oī penti penti güi.²⁸ Jese yaicove jare ñami, yaico vaerā. Jare jucuarāi vi amocue pepíte pe oī vae jei uicuatía vae pe: ‘Echa'ā jese yaico’ —jei, jei—.²⁹ Jare Tumpa umee yandeve tecove ramo, icavi'ā yae vaerā Tumpa co jae oro pegua, ani corepoti pegua, ani ita pegua. Echa'ā cuimbae reta uyapo cua nunga iyaracuaa rupiño.³⁰ Aracae iñi pegua reta uicuaa'ā ramo, Tumpa umaeño jese reta. Ërei añave jae oyocui opaete iñi pegua reta ueya vaerā iyemingueta icavi mbae vae ipia pe oī vae —jei chupe reta—.³¹ Echa'ā Tumpa uiiparavo ma penti ara uñaca vaerā jupi rupi iñi pegua reta jocua cuimbae jae uiiparavo vae pe. Jare cua uicuaaca opaete iñi pegua reta pe. Echa'ā Tumpa umbijecove ye jocua uiiparavo vae güero umanocue vae reta ipite güi —jei.

³² Jare uyandu reta yave icove ye ou umanocue vae reta ipite güi vae regua, amocue vae oyoyai. Ërei ūru vae reta jei Pablo pe:

—Nduyapisaca yeta nderé ūru ara pe cua re.

³³ Jayave Pablo oo chugüi reta.³⁴ Ërei amocue vae güürovia Tumpa iñee, jare uñemiñu Pablo ndive. Cua reta ipite pe ñugüünoi penti Areópago pegua Dionisio jee vae, penti cuña Dámaris jee vae, jare ūru vae reta.

18

Pablo Corinto pe

¹ Cua jaicue rupi Pablo oo Atenas güi tenta guasu Corinto pe.² Jare uñevae joco pe penti judío Aquila jee vae ndive. Jae co Ponto pegua. Cua judío ou ramo uvāe Italia güi jembireco Priscila jee vae ndive. Echa'ā mburuvicha guasu Claudio jee vae oyocui opaete judío reta yugüüraa vaerā Roma güi. Jayave Pablo opou ipi.³ Jare Pablo icatu uyapo Aquila iparavíqu. Jáeramo Pablo upita jae reta ndive, jare uparavíqu pâve reta. Jae reta co o reta guacapi pegua iyapoa.⁴ Jare opa mbutuu ara Pablo uyeaca judío reta itupao pe. Cua uyapo, judío reta jare judío mbae vae reta güürovia vaerā.

⁵ Jare Silas jare Timoteo yugüero uvāe yave Macedonia güi, Pablo uñemiatangåtu umimbeu vaerā Tumpa iñee. Umimbeu judío reta pe Jesús co jae Cristo, Tumpa ombou vae.⁶ Ërei judío reta oyovaicho jae ndive, jare jei reta icavi mbae vae icoti. Jáeramo Pablo umitimo jemimonde, jare jei chupe reta:

—Pecañiteita co, jare pe retaño penoita teco. Che anoi'ā ma teco. Añave güive aata amimbeu judío mbae vae reta pe —jei.

⁷ Jayave oo joco güi cuimbae Justo jee vae jenta pe. Cua cuimbae umbiadura Tumpa, jare jae jenta oī judío reta itupao iyipi pe.⁸ Jare judío reta itupao pegua reta itenondegu Crispo jee vae jare opaete jenta pegua reta güürovia yandeYa re. Jare jeta Corinto pegua reta uyandu Pablo umimbeu vae yave, güürovia jare uyembibautizaca.⁹ Jare yandeYa jei Pablo pe pítu yave ique pe:

—Agüüye equiye. Nesiari jare agüüye nequii.¹⁰ Echa'ā che aí nde ndive, jare ndarau quía ipuere nderé, uyapo vaerā icavi mbae vae ndeve. Echa'ā ime jeta cheré güürovia vae reta cua tenta guasu pe —jei.

¹¹ Jare Pablo upita joco pe penti año jare seis yasi, jare umimbeu Tumpa iñee tenta guasu pegua reta pe.

¹² Ërei Galión jee vae ico mburuvicha ívi Acaya pe yave, judío reta oyovaicho penti rami Pablo ndive, jare güüraa mburuvicha upuruña vae pe ¹³ jare jei reta:

—Cua cuimbae omboe yave tenta guasu pegua reta umbiadora vaerā Tumpa, omboe'ã mboroyocui pe uyecuatía oí vae rupi.

¹⁴ Jare Pablo omoëta ma yave iñee, Galión jei judío reta pe:

—Judío reta, cua cuimbae uyapo yave icavi mbae vae pecoti, ani jeco pochi yave, icavita tēi ayapisaca vaerā peré. ¹⁵ Ërei pipota yave aña vaerā ñee reta re, tee reta re jare peporoyocui re, ndarau ayapisaca peré. Pe reta etei pepuere peña. Echa'ã che aipota'ã aña cua nunga re —jei chupe reta.

¹⁶ Jayave Galión omondo reta upuruña vae güü. ¹⁷ Jayave griego reta uipisi judío reta itupao pegua itenondegua Sóstenes jee vae, jare ocua jese mburuvicha upuruña vae jovai. Ërei Galión uyemamboco'ã etei jese.

¹⁸ Jare cua rendave pe Pablo upita ye jeta ara joco pe. Jayave oo upurugüirovia vae reta güü, jare uasa i guasu rupi Siria coti Priscila jare Aquila jupié. Jare tenta guasu Cencrea pe Pablo uipépica iñáca. Echa'ã tenonde yave jei Tumpa pe uyapota mbae chupe ndei uipépica iñáca mbove. ¹⁹ Jare yugiüraa uväe yave tenta guasu Efeso pe, Pablo ueya Priscila jare Aquila. Jayave uique judío reta itupao pe, jare uyeaca judío reta ndive. ²⁰ Jare judío reta umiñera yave upita vaerā joco pe, uipota'ã. ²¹ Jare oota ma yave chugüi reta, jei:

—Aata co Jerusalén pe, ayapo vaerā pascua uyaro ma oí vae. Ërei Tumpa uipota yave, tayu ye pepi curi —jei.

Jayave oo i guasu rupi Efeso güü.

Pablo oo ye Antioquía güü umimbeu ñee icavi vae

²² Jare oo uväe yave Cesarea pe, oo umbisaluda vaerā upurugüirovia vae reta Jerusalén pe. Jayave oo joco güü Antioquía pe. ²³ Jare mbovi ara joco pe oí yave, oo umbapi opaete tenta tenta Galacia jare Frigia rupi umiatangåtu vaerā opaete upurugüirovia vae reta.

Apolos uñemiñee Efeso pe

²⁴ Jare ou Efeso pe penti judío Alejandría pegua Apolos jee vae. Cua cuimbae ipuere imiari cavi, jare uicuaa cavi Tumpa iñee uyecuatía oí vae. ²⁵ Cua cuimbae uyernboe ma yandeYa iporomboe re. Jatangåtu, jare imiari jare oporomboe jaecavi yandeYa re. Ërei uicuaa moromboe Juan upurumbibautizase jese vaeño. ²⁶ Jae umbipi imiari uquiye mbae reve judío reta itupao pe. Ërei Priscila jare Aquila uyandu yave jei vae, güüraa jenta pe, jare omboe cavi quirái yaico vaerā Tumpa coti vae re. ²⁷ Jare Apolos uipota oo yave Acaya pe, upurugüirovia vae reta umiatangåtu jese, jare uicuatía reta penti tupapire upurugüirovia vae reta pe, umbiresive cavi reta vaerā Apolos. Jare jae oo uväe yave joco pe, ombori jocua Tumpa ipiacavi jeco pegua upurugüirovia vae reta. ²⁸ Jae imiari mbaepuere reve, jare umiamiri judío reta tenta guasu pegua reta jovaque. Echa'ã uechaca chupe reta Tumpa iñee uyecuatía oí vae pe Jesús co jae Cristo.

19

Pablo Efeso pe

¹ Apolos Corinto pe oí rambueve, Pablo ou uväe Efeso pe, opa yave umbapi opaete tenta guasu-rai-rai guarasi oë vae coti ñugüinoi vae reta rupi. Jare Efeso pe uñeväe amocue upurugüirovia vae reta ndive. ² Jare Pablo upirandu chupe reta:

—¿Ou pa Espíritu Santo peve pepurugüirovia yave?

Jare reta jei chupe:

—Nduicuaa'ã etei Espíritu Santo ou vae regua.

³ Jayave Pablo upirandu chupe reta:

—¿Mbae nunga moromboe re pa piyembibautizaca?

Jare jae reta jei chupe:

—Juan iporomboe re nduyembibautizaca.

⁴ Jayave Pablo jei chupe reta:

—Juan umbibautiza jocua reta ueya iyeminguela icavi mbae vae ipia pe oí vae. Jare jei chupe reta güürovia vaerā outa jaicue rupi vae re. Cua uipota jei Jesús re. Jesús co jae Cristo —jei—. ⁵ Jare cua uyandu yave, uyembibautizaca yandeYa Jesús jee re —jei chupe reta.

⁶ Jayave Pablo oñono ipo jese reta, jare ou chupe reta Espíritu Santo, jare jae reta uyeminguela ambie vae iñee pe, jare umimbeu reta Tumpa iñee. ⁷ Jare cua cuimbae reta uepití doce rupi.

⁸ Jayave Pablo oo judío reta itupao pe, jare imiari uquiye mbae reve. Jare mbapi yasi uyeaca judío reta ndive Tumpa iporoyocua re. ⁹ Ërei amocue ipiatanta jare uipota'ã güürovia, jare jei reta ñee icavi mbae vae tenta guasu pegua reta jovaque upurugüirovia vae reta ipurugüirovia coti. Jayave Pablo oo

chugüi reta, jare güüraa jae ndive upurugiürovia vae reta, jare uyeaca opa ara rupi Tiranno jo tuicha vae pe.¹⁰ Jare jucuaräi uyapo mocui año. Jáeramo opaete judío jare judío mbae vae Asia pegua reta uyandu ñee yandeYa Jesús regua.¹¹ Jare Tumpa uyapo miacaní tuicha vae reta Pablo rupi.¹² Echa'ã íru vae reta güüraa yave mbaembae Pablo omonde vae imbaerasi vae reta pe, imbaerasi vae reta ucuera, jare aña reta usirí oya jese vae reta güi.

¹³ Jayave amocue judío reta umbipi tẽi ueni yandeYa Jesús jee aña reta oya jese vae reta re. Cua nunga judío reta uguata opaete que rupi umbisiri aña reta oya jese vae reta güi. Jae reta jei:

—Poyocui Jesús Pablo umimbeu vae jee re.¹⁴ Jare penti judío Esceva jee vae güinoi siete tai reta. Esceva co jae penti sacerdote reta itenondegua. Jare cua cuimbae tai reta vi jucuaräi jei aña pe.¹⁵ Êrei aña jei chupe reta:

—Che aicuaa co Jesús, jare aicuaa catu quía co jae Pablo. Êrei ¿quía pa co pe reta?

¹⁶ Jare jocua cuimbae aña oya jese vae upurupeña jese reta, jare umiamiri. Jare jae reta opa osi jocua tenta güi nani jare ipere reve.¹⁷ Jare cua jeräcua opaete judío jare judío mbae vae Efeso pegua reta pe. Jáeramo opareve uquiyé, jare umbiadura yandeYa Jesús jee.

¹⁸ Jare jeta upurugüirovia vae reta yugüeru umimbeu jeco icavi mbae vae ueya ma vae regua.¹⁹ Jare jeta ipaye vae reta güeru itupapire reta, jare uapi opaete vae jovaque. Jare cua tupapire reta jepi uyepapa yave, uepití cincuenta mil corepoti tí vae.²⁰ Echa'ã Tumpa iñee mbiri rupi ma uñemai, jare mbaepuere tuicha vae güinoi.

²¹ Cua jaicue rupi Pablo jei oo vaerä Macedonia jare Acaya rupi Jerusalén pe. Jare jae jei:

—Joco güi aata vi co Roma pe.

²² Jayave omondo Macedonia cotí mocui imboria reta Timoteo jare Erasto jee vae. Êrei jae upita ye mbovi ara Asia pe.

Tecorai Efeso pe

²³ Jare jocua ara reta pe oí tecorai upurugüirovia vae reta ipurugüirovia re.²⁴ Echa'ã penti cuimbae Demetrio jee vae umindicui corepoti, jare uyapo tupao-raanga michi vae corepoti pegua reta. Efeso pegua reta umbiadura itumba-raanga Diana jee vae cua nunga tupao-raanga michi vae pe. Jare Demetrio umbiepi cavi ombori uyapo vae reta pe.²⁵ Cua cuimbae umbati ombori uyapo vae reta jare íru cua nunga mbaravíquí uyapo vae reta, jare jei chupe reta:

—Cuimbae reta, picuua catu co cua mbaravíquí güi ñamingana yaicocatu vaerä.²⁶ Jare peechea jare piyando ma quirái cua Pablo umbiyerova jeta vae Efeso pe jare opaete seri Asia rupi jae iporomboe pe. Echa'ã jae jei tumba-raanga cuimbae reta uyapo vae tumba'ã co reta —jei—.²⁷ Jare aramoi tenta guasu pegua reta güiríota cua yandeparavíquí. Jare aramoi güiríota vi tumba cuña uyembiadura vae Diana itupao, jare ndarau ma quía umbiadura. Echa'ã añaave opaete Asia pegua reta jare opaete ivi pegua reta umbiadura —jei chupe reta.

²⁸ Cua uyandu reta yave, pochi ete, jare iñeeäta reve jei:

—Uyembiadura co Diana Efeso pegua.

²⁹ Jare tecorai uñemai opaete tenta guasu rupi. Jare jeta vae penti rami osi tenta guasu pegua reta uyuvanga vae pe. Jare uipisi güüraa joco pe Pablo iguataíru reta Gayo jare Aristarco. Cua reta co Macedonia pegua.³⁰ Jayave Pablo uipota tẽi uiique tenta guasu pegua reta yati ñugüinoi vae pe. Êrei upurugüirovia vae reta umaeño'ã jese.³¹ Jare amocue Asia pegua mburuvicha Pablo ndive uyepocuua vae reta omondo umimbeu Pablo pe agüiye vaerä oo tenta guasu pegua reta uyuvanga vae pe.³² Jare opaete yati vae reta iñeeäta, êrei oyovaque'ã iñee reta. Tecorai tuicha vaeño uyapo reta. Echa'ã jeta joco pe ñugüinoi vae reta uicuaal'ã maera ra uyembati joco pe.³³ Jayave judío reta umiaña jenonde Alejandro jee vae yati vae reta ipite güi, iñee omoë vaerä. Jayave Alejandro umupúa ipo umiquíi vaerä tẽi. Echa'ã uipota tẽi imiari tenta guasu pegua reta pe, agüiye vaerä jae reta umbijeco judío reta.³⁴ Êrei yati vae reta uicuaa yave jae co judío, opaete penti rami mocui ora seri iñeeäta reve jei:

—Uyembiadura co Diana Efeso pegua.

³⁵ Jayave tenta guasu pegua reta juvicha umiquíi yati vae reta, jare jei chupe reta:

—Cuimbae Efeso pegua reta. Diana co jae tumba cuña uyembiadura vae. Cua tenta guasu pegua reta uyandareco Diana itupao re. Jare uyandareco vi ita Diana echa vae Júpiter güi ou vae re. Opaete vae uicuaa cua —jei—.³⁶ Jayave ipuere'ã quía cua uicuacu ramo, icavi co pequíi vaerä, agüiye vaerä mbae piyapo güirave ndei pepia pe piyeminguela mbove.³⁷ Echa'ã Peru cua cuimbae reta cua pe, yepe tẽi oñomi'ã mbae yandetupao güi, jare jei'ã vi mbae icavi mbae vae ñanetumpa cuña cotí —jei chupe reta —.³⁸ Demetrio jare imboria reta uipota yave uñeapo quía re, ime mburuvicha reta ñugüinoi uyapisaca vaerä jese reta.³⁹ Êrei pipota yave piñeapo íru mbae re, mburuvicha reta uyapicatuta, uyembati yave —jei chupe reta—.⁴⁰ Echa'ã aramoi mburuvicha reta yanembijecota yayapo vae re. Jei tẽita yaipota

ññañerāro jae reta ndive. Echa'ã yaicuata'ã mbae ra yaeta chupe reta, jae reta upirandu yandeve yave maera ra yayapo cua tecorai —jei.

⁴¹ Jare tenta guasu pegua reta juvicha cua jei yave, opa omondo yati vae reta.

20

Pablo oo Macedonia jare Grecia pe

¹ Opa ma tecorai yave, Pablo ueni upurugüirovia vae reta. Jayave opa umbiaracuua reta yave, uicuáva jare oo chugüi reta Macedonia coti. ² Jare umbapí opaete jocua tenta guasu reta rupi umbiaracuua cavi reve upurugüirovia vae reta. Jayave oo uvae ívi Grecia pe. ³ Jare upita joco pe mbapí yasi. Jare i guasu rupi oota yave joco güi Siria coti, judío reta uyemboemboe uyapo vaerä icavi mbae vae chupe. Jáeramo Pablo jei oota Macedonia rupi. ⁴ Jare yugüiraa jae jupié Sópater Berea pegua, Aristarco jare Segundo Tesalónica pegua reta, Gayo Derbe pegua, Timoteo, jare Tíquico jare Trófimo Asia pegua reta. ⁵ Cua reta yugüiraa orerenonde, jare oreraáro Troas pe. ⁶ Êrei ara reta mbiyape ovu mbae vae pegua uasa yave, ore ndoo i guasu rupi Filipos güi, jare pandepo ara pe ndoo nuvæe Troas pe. Joco pe nuñevæe íru reta ndive, jare ndupita joco pe siete ara.

Pablo opou Troas pe

⁷ Jare domingo ara pe upurugüirovia vae reta uyembati tembíu umbiyo vaerä uyupe. Jayave Pablo piareve pe oota ramo, ipiare mbite rupi omboe reta. ⁸ Jare jeta tembipe ñugüinoi jocua o ivate vae pe yati ñugüinoi vae pe. ⁹ Jare jocua tenta co mbapí o ivate vae. Jare penti cunumi Eutico jee vae uguapi oí ventana pe, jare tanta oque oí. Jare Pablo jecuae omboe oí rambueve, cunumi oque oí ramo, oa joco güi oca coti ívi pe. Jare íru vae reta yugüiraa uupi yave, uecha umano ma. ¹⁰ Jayave Pablo ugüeyi jare ipre cunumi iárambo. Jayave uicuáva jare jei:

—Agiüye pepiatiti. Jecoveño oí.

¹¹ Jayave Pablo uyupi ye, jare joco pe ñugüinoi vae reta umbiyo uyupe tembíu, jare ucaru reta. Jayave Pablo icõe omboe. Jayave oo chugüi reta. ¹² Jare joco pe yati vae reta güiraa cunumi icove ye vae, jare ipiacatu reta.

Troas güi Mileto pe

¹³ Jare ore rani ndoo nduasa i guasu rupi tenta guasu Asón pe. Nduipota nuñevæe Pablo ndive joco pe, jae jei rami. Echa'ã jae uipota oo ívi rupi. ¹⁴ Jare nuñevæe yave jae ndive Asón pe, Pablo uyupi chalana guasu pe, jare ndoo pâve ívi Mitilene pe. ¹⁵ Jare joco güi ndoo ye i guasu rupi, jare piareve pe ndoo nuvæe ívi Quíjovai. Piareve pe ndoo nuvæe ívi Samos pe. Jayave ndupita ívi Trogilio pe, jare piareve pe ndoo nuvæe tenta guasu Mileto pe. ¹⁶ Pablo iquiréi uasa güirave Efeso güi, agüye vaerä uyembiavai Asia pe. Echa'ã jae uipota uvae vaerä Jerusalén pe Pentecostés ara pe, ipuere yave.

Pablo imari Mileto pe

¹⁷ Jayave Mileto güi Pablo omondo Efeso pe uenica upurugüirovia vae reta itenondegua reta. ¹⁸ Jare jae reta yugüeru uvae yave Pablo oí vae pe, jae jei chupe reta:

—Pe reta picuua catu co quirái aico pe reta ndive tenonde ete Asia pe ayu güive. ¹⁹ Ayeyocui yandeYa pe añemimichi reve jare ayao reve. Judío reta chembiavai ete. Echa'ã jecuaeño iquiréi reta uyapo icavi mbae vae cheve —jei—. ²⁰ Aipiu'ã amimbeu vaerä peve opaete icavi peve peguarä vae. Jare pomboe jeta vae ipite pe jare perenta rupi vi. ²¹ Jare amimbeu judío reta jare judío mbae vae reta pe ueya vaerä iyemingueta icavi mbae vae ipia pe oí vae jare uyerova vaerä Tumpa coti, jare güiravia vaerä yandeYa Jesucristo re —jei chupe reta—. ²² Jare añave aa Jerusalén coti, Espíritu Santo chemondo ramo. Jare aicuua'ã mbae ra ueyeyapota cheve joco pe —jei—. ²³ Êrei opaete tenta guasu reta rupi Espíritu Santo umimbeu cheve íru vae reta cheñonota co peresoriru pe jare aiporarata. ²⁴ Êrei aquíye'ã. Chepiá pe ayemingueta'ã etei ayerepi vaerä. Jaeño aipota ambapí cheguata Tumpa coti vae ayerovia reve. Aipota ayapo mbaraviquí yandeYa Jesús umee cheve vae. Echa'ã jecuaeño aipota amimbeu íru vae reta pe ñee icavi vae Tumpa ipiacavi regua —jei Pablo chupe reta—. ²⁵ Amimbeu ma pepite rupi Tumpa iporoyocuia regua, jare añave aicuua catu co pe reta ndarau ma cherecha ye. ²⁶ Jáeramo añave amimbeu peve che anoi'ã etei co teco pecoti —jei—. ²⁷ Echa'ã aipiu'ã etei amimbeu vaerä peve opaete Tumpa jei vae. ²⁸ Jáeramo piñemoa ngatu, jare piyandareco opaete upurugüirovia vae reta re, penti ovecha iyandarecoa ovecha reta re uyandareco ramo. Echa'ã Espíritu Santo co preparavo piyandareco vaerä jese reta. Jare pemimbeu Tumpa iñee yandeYa re güiravia vae reta pe, penti ovecha reta iyandarecoa ovecha reta umingaru ramo. Echa'ã yandeYa uepí reta jae jugüi pe —jei—. ²⁹ Che aicuua catu co che aa ma yave, yugüeruta pepite pe íru vae reta. Cua reta uyapota icavi mbae vae upurugüirovia vae reta pe, yaguapita ou jou ovecha reta ramo —jei—. ³⁰ Jare pepite güi etei imeta cuimbae moromboe pichii vae re oporomboeta vae reta. Cua reta ombopata upurugüirovia vae reta. ³¹ Jáeramo piñemoa ngatu, jare

pemandúa quirāi chiyao reve pumbiaracuaa vae re. Mbapí año ma jucuarāi ayapo, ara rupi jare pītu rupi —jei—.

³² Añave ayerure Tumpa pe uyandareco vaerā peré, jare aeya pe reta ndive iñee ipiacavi regua. Echa'á cuá fñee ipuere pemimiráta jare umee peve pembaaerā opaete jocua íru uñehóno tee Tumpa peguarā vae reta ndive —jei Pablo—. ³³ Aipota'á anoi íru vae icorepoti, ioro jare jemimonde. ³⁴ Pe reta picuua catu co quirāi chepo pe etei aparavíqui, mbaembae uata cheve vae anoi vaerā, jare amee vaerā cheiru reta pe —jei—. ³⁵ Opaete rupi aicuaaca ma peve quirāi icavi co yaparavíqui vaerā, yambori vaerā mbae uata chupe vae reta. Yanemandúa yandeYa Jesús etei jei vae re. Echa'á jae jei: 'Tumpa umbiyerovia eteta mbae umeeiño vae mbae umbiresive vae güi' —jei, jei Pablo.

³⁶ Jare cua opa ma jei yave, Pablo uyeatíca jare uyerure Tumpa pe opaete jae reta ndive. ³⁷ Jayave opaete joco pe ñugüinói vae reta uyao, jare uicuáva reta Pablo jare uyurupíte reta. ³⁸ Jare jae reta tuicha ipiatiti, Pablo jei chupe reta ndarau ma uecha ye ramo. Jayave jae reta yugüíraa jae jupíe chalana guasu oí vae pe.

21

Pablo oo Jerusalén pe

¹ Jare ndoo ma yave chugüi reta, nduasa simi i guasu rupi tenta guasu Cos pe. Jare piareve pe nduasa tenta guasu Rodas pe. Jayave joco güi nduasa tenta guasu Pátara pe. ² Jare nuvæe joco pe chalana guasu oota Fenicia pe vae. Jayave nduyupi pipe, jare ndoo. ³ Jare Chipre nduecha oreaso cotí, jare nduasa. Jare jecuae ndoo Siria cotí, jare ndoo nuvæe tenta guasu Tiro pe. Echa'á joco pe chalana guasu ueyata jivita. ⁴ Jare nuñevæ upurugüirovia vae joco pegua reta ndive, jare ndupita joco pe siete ara. Jare jae reta Espíritu Santo rupi jei Pablo pe agüiye vaerā oo Jerusalén pe. ⁵ Jocua ara reta uasa yave, ndoo tenta guasu güi, jare opaete upurugüirovia vae reta jembireco reta jare isambiai reta ndive oremírru. Jayave nduyeatíca i guasu jembeí pe nduyerure Tumpa pe. ⁶ Jayave nuñecuáva yave jae reta ndive, nduyupi chalana guasu pe, jare jae reta yugüíraa ye jenta pe.

⁷ Jayave Tiro güi ndoo nuvæe tenta guasu Tolemaida pe. Jare joco pe numbisaluda upurugüirovia vae reta, jare ndupita jae reta ipi penti ara. ⁸ Piareve pe ndoo chugüi reta Pablo jupíe Cesarea pe, jare joco pe nduique ndupita Felipe ñee icavi vae umimbeu vae jenta pe. Jae co jocua siete vae güi penti. ⁹ Cua cuimbae güinói irundi tayí Tumpa iñee umimbeu vae. Cua irundi reve ndei umenda. ¹⁰ Jare ndupita joco pe mboví ara. Jare Tumpa iñee umimbeu vae Agabo jee vae ou Judea güi. ¹¹ Jare jae ou ore noí vae pe, jare uequi Pablo jumbicuaa. Jayave uñearpítí ipi rupi jare ipo rupi jare jei:

—Cua jei Espíritu Santo: 'Cuarái Jerusalén pe judío reta uñapítita cua tumbicuaa iya, jare umeeta reta judío mbae vae reta pe' —jei, jei Agabo.

¹² Cua nduyandu yave, ore jare joco pegua reta numiñera tēi Pablo agüiye vaerā oo Jerusalén pe. ¹³ Ërei Pablo jei:

—¿Maera pa piyao jare chembiatiití? Echa'á aipiu'á añaepítí vaerā Jerusalén pe. Aipiu'á vi amano vaerā joco pe yandeYa Jesús jeco pegua —jei.

¹⁴ Jayave ndoe'á ye ma mbae chupe cua re, orepuere'á jese ramo. Jayave ndoe:

—Tuyeyapo yandeYa jei vae.

¹⁵ Jare jocua ara reta uasa yave, nduyeyapicatu ndoo Jerusalén cotí. ¹⁶ Jare yugüíraa vi orerupíe Cesarea güi amocue upurugüirovia vae joco pegua reta. Oo vi jae reta jupíe Chipre pegua Mnasón jee vae. Echa'á ndupitata Mnasón jenta pe. Cua Mnasón tenonde voi güirovia Jesús re.

Uipisi reta Pablo Tumpa jo pe

¹⁷ Jare ndoo nuvæe yave Jerusalén pe, upurugüirovia vae reta orembiresive uyerovia reve. ¹⁸ Jayave piareve pe Pablo oo ore ndive opou Jacobo pe. Jare opaete upurugüirovia vae reta itenondegua reta uyembati joco pe. ¹⁹ Jare opa ma umbisaluda yave, Pablo umimbeu chupe reta quirāi jae uparavíqui judío mbae vae reta ipite rupi, jare quirāi Tumpa jeta mbaembae uyapo chupe reta. ²⁰ Jae reta uyandu yave, umbiadora Tumpa. Jayave jei reta Pablo pe:

—Orerivi, ndicuaa ma quirāi jeta ete judío reta güirovia ma co Jesús re, jare opaete jae reta uñemiatangátu mboroyocui re. ²¹ Ërei jerácua chupe reta quirāi nde nemboe opaete judío judío mbae vae reta ipite rupi ñugüinói vae reta agüiye vaerā uyapo Moisés iporoyocui. Echa'á jerácua quirāi nde ndere chupe reta agüiye vaerā umicircuncidaca tai reta, jare agüiye vaerā uyapo yande yayapoñoí vae —jei reta Pablo pe—. ²² ¿Mbae pa yayapota? Uyembati co jeta vae. Echa'á jae reta uicuata nde ndeyu ma co cua pe. ²³ Jáeramo iyapo cua ndoeta ndeve vae. Ime cua pe ñugüinói irundi cuimbae tenonde yave jei mbae uyapota Tumpa pe vae. ²⁴ Eraa cua cuimbae reta jare iyeyoe Tumpa cotí mboroyocui jei rami jae reta ndive, jare embiepi iñáca uñearpíca reta vaerā. Jayave opaete vae uicuata afeteté'á nererácua chupe reta vae. Echa'á jae reta uicuata nde vi co ndiyapo ndico mboroyocui —jei reta—.

²⁵ Ërei yaicuatiá ma judío mbae vae upurugüirovia vae reta pe agüiye vaerã uyapo mboroyocui. Jaeño agüiye tou reta soo tumpa-raanga pe uñemee vae, jare soo jugüi reve, jare maemimbä uyeyuví vae isoo, jare agüiye tuyapo aguasa —jei reta.

²⁶ Jayave Pablo oo jocua cuimbae reta jupié, jare piareve pe uyeyoe Tumpa cotí mboroyocui jei ramí jae reta ndive, jare uique Tumpa jo pe umimbéu mbae ara pe opata uyeyoe vae. Echa'ã jocua ara penti umeeta iofrenda.

²⁷ Jare cua rendave pe siete ara opata ma yave, judío Asia pegua reta uecha Pablo Tumpa jo pe, jare uyapo reta tecorai jeta vae ndive. Jayave uipisi reta Pablo, ²⁸jare iñeeáta reve jei:

—Cuimbae Israel pegua reta, oremborí. Cua cuimbae oporomboe opaete que rupi opaete íru vae reta oyovaicho vaerã yande ndive, mboroyocui ndive jare cua Tumpa jo ndive. Jare jae güeru griego reta uruique Tumpa jo pe, jare jucuarãi uminguíaca cua o Tumpa oí pipe vae —jei reta.

²⁹ Echa'ã tenonde yave uecha reta tenta guasu pe Efeso pegua Trófimo jee vae Pablo ndive. Jare ipia pe uyemingueta tēi Pablo uruique jocua cuimbae Tumpa jo pe.

³⁰ Jare opaete tenta guasu pegua reta pochi. Jáeramo uyembatí reta, jare uipisi reta Pablo umbitiriri Tumpa jo güi oca pe. Jare jupivoiño Tumpa jo iyandarecoa reta uyuquenda onque reta. ³¹ Jayave yati vae reta uipota tēi uyuca Pablo. Ërei jerácu sundaro reta juvicha pe opaete Jerusalén pegua reta uyapo ñugüinói tecorai. ³² Jare jupivoiño jae osi ou yati vae reta cotí sundaro reta jare sundaro reta juvicha reta ndive. Jare tenta guasu pegua reta uecha yave sundaro reta jare juvicha, oculá' ma Pablo re. ³³ Jayave sundaro reta juvicha oo Pablo cotí jare uipisi. Oyocui sundaro reta uñapítí vaerã mocui cadena pe. Jayave upirandu quía ra co jae jare mbae ra co uyapo. ³⁴ Amocue tenta guasu pegua reta iñeeáta, érei oyovaque'ã iñee reta. Jare tecorai jeco pegua sundaro reta juvicha ipuere'ã uicuua mbae ra añete vae. Jáeramo oyocui sundaro reta güíraa vaerã Pablo jae reta yugüireco vae pe. ³⁵ Jare uyupi ñugüinói yave sundaro reta yugüireco vae pe, sundaro reta ovoi güíraa Pablo, yati vae reta uipota uipisi ramo. ³⁶ Echa'ã opaete yati vae reta yugüira sundaro reta jaicue, jare iñeeáta reve jei:

—Tumano jocua cuimbae.

Pablo imiari tenta guasu pegua reta pe

³⁷ Jare sundaro reta uruiqueta ma yave yugüireco vae pe, Pablo jei sundaro reta juvicha pe:

—¿Nemaehota pa mbae jae nndeve?

Jae jei Pablo pe:

—¿Ndicuua pa griego iñee? ³⁸ Caramboe yave penti Egipto pegua omboemboe cuatro mil upuruyuca vae reta uñeráro vaerã mburuvicha reta ndive, jare güíraa ñana pe. ¿Nde pa co jae jocua Egipto pegua? —jei.

³⁹ Jayave Pablo jei chupe:

—Che co jae penti judío Tarso pegua. Jocua tenta guasu oí Cilicia pe, jare tuicha co. Emaeño tachemiarí tenta guasu pegua reta pe —jei.

⁴⁰ Jayave sundaro reta juvicha jei Pablo pe imiari vaerã. Jayave Pablo uyemboi ivate oí vae pe, jare umupúa ipo tenta guasu pegua reta cotí. Jare opaete vae quíi yave, Pablo imiari chupe reta hebreo iñee pe. Jei chupe reta:

22

¹ —Cheriví reta jare cheriqueí reta, piyapisaca che jaeta peve chiyee vae re.

² Jare tenta guasu pegua reta uyandu yave jae imiari chupe reta hebreo iñee pe, opareve quíi ngatu. Jayave Pablo jei chupe reta:

³ —Che co jae penti judío. Aa Tarso Cilicia pegua pe, érei acuacuaa cua tenta guasu pe. Gamaliel chemboe cavi yandetenondegua reta iporoyocui re. Che aipota ayapo Tumpa jei vae, opaete pe reta añave pipota rami —jei—. ⁴ Che ayapo icavi mbae vae opaete Jesús re güírovia reve yugüireco vae reta pe. Jare aipisi amiingueca peresoriru pe cuimbae reta jare cuña reta. Ayucaca vi amocue vae —jei Pablo —. ⁵ Sacerdote tenondegua jare opaete tenta guasu pegua reta itenondegua reta ipuere umimbéu peve cheregua. Jae reta uicuatiá umee cheve tupapire araa vaerã íru judío reta pe. Jayave aa Damasco cotí, aipisi vaerã tēi Jesús re güírovia vae joco pe ñugüinói vae reta, jare aru vaerã tēi Jerusalén pe, aiporaraca vaerã tēi chupe reta —jei—.

Pablo jei quirái güírovia Jesús re

(Hch 9.1-19; 26.12-18)

⁶ Érei che coiño ma Damasco güi aa yave, guarasi ara mbite rupi yave, aramoiño penti tembipe tuicha vae ara güi jembipe cheré. ⁷ Jare aa íví re, jare ayandu penti ñee jei cheve: ‘Saulo, Saulo, ¿maera pa ndiyapo icavi mbae vae cheve?’ ⁸ Jayave che jae: ‘¿Quíi pa co nde, cheYa?’ Jayave jae jei cheve: ‘Che co jae Jesús Nazaret pegua. Nde ndiyapo icavi mbae vae cheve’ —jei, jei Pablo—. ⁹ Jare che

ndive ñugüïnoi vae reta uecha co tembipe, jare uquïye reta. Êrei uicuaa'ã mbae jei jocua uyeminguela cheve vae. ¹⁰ Jayave che apírandu: '¿Mbae pa ayapota, cheYa?' Jare yandeYa jei cheve: 'Epüa ecua Damasco pe, jare joco pe amímbeucata ndeve opaete mbae ndoyocuita jese vae' —jei, jei—. ¹¹ Jayave che ndive ñugüïnoi vae reta chepoco chereraa chereruvä Damasco pe. Echa'ã chepuera'ã etei amae, jocua tembipe jembipe cheré vae jeco pegua —jei—. ¹² Jare ico joco pe penti cuimbae Ananías jee vae. Jae uiþiu Tumpa mboroyocui uyapo reve, jare opaete judío joco pe yugüïreco vae reta uyeminguela cavi jese. ¹³ Jae ou chepi. Uyemboi cheyipi pe jare jei: 'Saulo, nde co jae cherivi. Emae ye.' Jare jupivoïño chepuere amae, jare aecha Ananías joco pe oï —jei Pablo—. ¹⁴ Jayave jae jei cheve: 'Yandetenondegua reta iTumpa ndeparavo, ndicuaa vaerä jae jei vae, jare ndeecha vaerä jocua jupi vae, jare ndiyandu vaerä iñee. ¹⁵ Echa'ã nemimbeuta co jesegua opaete ivi pegua reta pe. Nemimbeuta chupe reta ndeecha jare ndiyandu vae' —jei, jei—. ¹⁶ '¿Maera pa añave neáro nei? Epüa iyembibautizaca ndiyerure reve chupe, nembaeyoa reta uyembai vaerä' —jei, jei Pablo—.

Jesús omondo Pablo judío mbae vae reta pe

¹⁷ Jayave ayu ye Jerusalén pe, jare ayerure aï rambueve Tumpa jo pe, cheque pe aecha. ¹⁸ Jare aecha Jesús, jare jae jei cheve: 'Ecua imambae Jerusalén güi. Echa'ã ndarau uipota güirovia nde nemimbeuta cheregua chupe reta vae' —jei cheve, jei—. ¹⁹ Jayave che jae chupe: 'CheYa, jae reta uicuaa catu co quiräi che aase opaete judío reta itupao reta rupi añonoca vaerä peresoriru pe jare ainupaca vaerä nderé güirovia vae reta. ²⁰ Jare uyuca reta yave Esteban nderegua umimbeu vae, che vi aï joco pe, jare icavi cheve imano. Jare che ayandareco upuruyuca vae reta jemimonde re' —jae chupe, jei—. ²¹ Jayave jae jei cheve: 'Ecua. Echa'ã che nomondota mbiri judío mbae vae reta coti' —jei cheve, jei.

Sundaro reta uipisi Pablo

²² Jare Pablo cua jei yave, tenta guasu pegua reta uipota'ã ma uyapisaca jese. Iñeeäta reve jei reta: —Tumano jocua cuimbae. Echa'ã icavi'ã ico vaerä —jei reta.
²³ Jare iñeeäta reta rambueve, umbivava jemimonde, jare ivicuui omombo ivate. ²⁴ Jayave sundaro reta juvicha oyocui sundaro reta uruïque vaerä Pablo jae reta yugüïreco vae pe. Jare oyocui vi uinupa reta vaerä chicote pe upírandu chupe reve, uicuaa cavi vaerä maera ra tenta guasu pegua reta iñeeäta jucuaräi icoti. ²⁵ Êrei sundaro reta uñapiti yave timasa pe, Pablo jei sundaro reta juvicha joco pe oï vae pe:

—Jupi pa pinupa vaerä penti romano peña mbae reve?

²⁶ Cua uyandu yave, sundaro reta juvicha oo itenondegua pe jare jei chupe:

—¿Mbae pa ndiyapota? Echa'ã jocua cuimbae penti romano co.

²⁷ Jayave sundaro reta juvicha itenondegua ou Pablo oï vae pe jare jei chupe:

—Emimbeu cheve, ¿romano pa co nde?

Jayave Pablo jei chupe:

—Jae co che.

²⁸ Jayave sundaro reta juvicha itenondegua jei chupe:

—Che jeta ambiépi ayeypa vaerä romanorä. Jayave Pablo jei chupe:

—Êrei che pipe voi aa.

²⁹ Jayave yugüïraa Pablo güi upíranduta tēi chupe vae reta. Jare sundaro reta juvicha itenondegua uquïye, uicuaa yave jae romano co, uñapítica ramo.

Pablo mburuvicha reta jovai

³⁰ Jare piareve pe sundaro reta juvicha itenondegua uipota uicuaa cavi mbae re ra judío reta umbijeco Pablo. Jáeramo oyora Pablo, jare oyocui sacerdote reta itenondegua reta jare opaete íru mburuvicha reta uyembati vaerä. Jayave güïraa Pablo oñono jae reta jovai.

23

¹ Jayave Pablo umae ngatu mburuvicha reta re jare jei:

—Cheriquei reta, che jecuaeño aico cavi, chepiá icavi anoi vaerä Tumpa coti.

² Jayave sacerdote tenondegua Ananías jee vae oyocui Pablo iyipi pe ñugüïnoi vae reta ocua vaerä iyuru re. ³ Jayave Pablo jei chupe:

—Tumpa tocua nderé. Echa'ã nde co jae iguambi tñ asi vae rami. Nde ndeguapi co neí cherää vaerä mboroyocui jei vae rupi. Êrei ndiyavi mboroyocui. Echa'ã ndiyocui reta ocua vaerä cheré —jei.

⁴ Jayave joco pe ñugüïnoi vae reta jei chupe:

—¿Maera pa nde ndere ñee icavi mbae vae Tumpa isacerdote tenondegua pe?

⁵ Jayave Pablo jei:

—Cheriquei reta, aicuaa'ã jae co sacerdote tenondegua. Echa'ã uyecuatía oï: 'Ndereta'ã ñee icavi mbae vae nderuvicha coti' —jei.

⁶ Jare Pablo uecha yave amocue jae reta saduceo reta jare amocue fariseo reta, iñeeäta reve jei mburuvicha reta ipite pe:

—Cheriquei reta, che co jae penti fariseo, jare cheru vi co jae penti fariseo. Che arovia umanocue vae reta icove yeta co. Cua jeco pegua pe reta cheräa pei —jei.

⁷ Jare cua jae yave, uyembiyao uyugüi yati vae reta, jare fariseo reta uyeaca saduceo reta ndive.

⁸ Echa'ä saduceo reta jei umanocue vae reta ndarau ma icove ye. Jei vi mbaeti co oí ángel jare espíritu. Ërei fariseo reta güürovia ime co. ⁹Jare uyeaca reta uyupii. Jare upüa amocue fariseo pegua mboroyocui re oporomboe vae reta jare jei:

—Ore nuvää'ä etei teco cuimbae re. Aramoi penti espíritu ani ángel imiari chupe. Agüiye yayovaicho Tumpa ndive —jei reta.

¹⁰ Jare jeite uyeaca reta uyupii yave, sundaro reta juvicha itenondegua ipia pe uyemingueta aramoi uyucata reta Pablo, jare oyocui sundaro reta yugüeru vaerä güüraa Pablo jae reta ipite güi sundaro reta yugüüreco vae pe.

¹¹ Jare piareve pe pütu yave yandeYa uyecuaa Pablo pe jare jei chupe:

—Iñemiatangätu, Pablo. Chemimbeu ma Jerusalén pe. Chemimbeuta vi co Roma pe.

Judío reta uipota tēi uyuca Pablo

¹² Jayave piareve pe amocue judío reta uyemboemboe, jare uyepipeyu reve iyee jei ucaruta'ä jare jouta'ä i, uyuca regua Pablo. ¹³ Jare cuimbae cua jae uyepipeyu reve iyee vae reta cuarenta uasa.

¹⁴ Jayave jae reta yugüüraa sacerdote reta itenondegua reta jare tenta guasu pegua reta itenondegua reta pe jare jei chupe reta:

—Ore ndoe ma nduyepipeyu reve oriyeed nducaruta'ä, nduyuca regua Pablo. ¹⁵ Jáeramo pe reta ūru mburuvicha reta ndive pemimbeu sundaro reta juvicha itenondegua pe tugüeru Pablo peve piareve. Jae ipia pe uyemingueta tēita pe reta pipota pepirandu cavi ete chupe mbae uyapo vae re. Jayave ore nucuatírota nof jese nduyuca vaerä, ndei ou uväe mbove —jei reta.

¹⁶ Ërei Pablo jindi imembí cuimbae vae uicuuaa yave jae reta ucuatírota Pablo re vae, oo uique sundaro reta yugüüreco vae pe, jare umimbeu Pablo pe.

¹⁷ Jayave Pablo ueni sundaro reta juvicha jare jei chupe:

—Eraa cua cunumi nderuvicha pe. Echa'ä uipota mbae umimbeu chupe —jei.

¹⁸ Jayave sundaro reta juvicha güüraa cunumi juvicha tenondegua vae pe, jare jei chupe:

—Pablo uyepisi oí vae chereni, jare chemiñera aru vaerä ndepi cua cunumi. Echa'ä uipota mbae umimbeu ndeve —jei.

¹⁹ Jayave sundaro reta juvicha itenondegua uipisi cunumi ipo pe, jare güüraa ūru vae reta ūugüünoi vae güi. Jayave upirandu chupe:

—¿Mbae pa nemimbeuta cheve?

²⁰ Jayave cunumi jei chupe:

—Judío reta uyemboemboe ma, jare nemíñerata Pablo nderaaca vaerä curiye mburuvicha reta pe. Uipota nde ndepia pe ndiyemingueta tēi vaerä jae reta upirandu cavi eteta chupe mbae uyapo vae re —jei—, ²¹ Ërei agüiye erovia. Echa'ä judío reta ucuatírota jese. Jae reta cuarenta uasa. Jei reta uyepipeyu reve iyee ucaruta'ä jare jouta'ä i, uyuca regua Pablo. Jare añave uâro ūugüünoi, aramoi nderaaca pegua —jei chupe.

²² Jayave sundaro reta juvicha itenondegua jei cunumi pe:

—Agüiye emimbeu quía pe cua nemimbeu cheve vae.

Jayave omondo cunumi.

Omondo reta Pablo mburuvicha guasu Félix jee vae pe

²³ Jayave sundaro reta juvicha itenondegua ueni mocui sundaro reta juvicha jare jei chupe reta:

—Piyapicatu cavi doscientos sundaro reta, jare setenta sundaro cavayu re opo vae reta, jare doscientos sundaro güüraa ui vae reta, yugüüraa vaerä Cesarea pe nueve ora ma pütu yave. ²⁴Jare peeca Pablo opo vaerä, peraa cavi vaerä mburuvicha guasu Félix pe —jei chupe reta.

²⁵ Jayave jae uicuatía penti tupapire pe cuarai: ²⁶ “Félix. Nde co jae mburuvicha guasu uyembu tuichaca vae. Che co jae Claudio Lisias. Numbisaluda. ²⁷ Judío reta uipisi cua cuimbae, jare uyucata tēi. Jayave che aa sundaro reta ndive aepi chugüi reta. Echa'ä jerácua cheve jae romano co. ²⁸ Jare aipota aicuuaa maera ra jae reta umbijeco. Jáeramo araa judío reta juvicha reta upuruâa vae pe. ²⁹ Joco pe aicuuaa jae reta umbijeco iporoyocui re. Ërei jae uyapo'ä teco umano vaerä ani oí vaerä peresoriru pe. ³⁰ Ërei jerácua cheve judío reta ucuatírota jese. Jáeramo jupivoiño amondo ndecotí. Jare ayocui umbijeco vae reta uñeapo vaerä jese ndeve teco uyapo chupe reta vae re. Jaeño ma.” Jucuarai uicuatía.

³¹Jayave pítu yave sundaro reta güiraa Pablo tenta guasu Antípatris pe, juvicha oyocui rami. ³²Jayave piareve pe sundaro cavayu re opo vae reta güiraa Pablo, jare ūru sundaro reta yugüeru ye yugüireco vae pe. ³³Jare yugüiraa uvāe yave Cesarea pe, sundaro reta umee Pablo tupapire reve mburuvicha guasu pe. ³⁴Jare opa umingueta yave tupapire, mburuvicha guasu upirandu Pablo pe quía tenta guasu pegua ra co jae. Jare uicuaa yave Cilicia pegua co, ³⁵jei Pablo pe:

—Tayapisaca nderé, yugüeru yave nembijeco vae reta.

Jayave oyocui sundaro reta uyandareco vaerā jese mburuvicha Herodes jenta pe.

24

Pablo imiari Félix pe

¹Pandepo ara ma uasa yave, yugüeru sacerdote tenondegua Ananías, amocue tenta guasu pegua reta itenondegua reta jare penti cuimbae Tértulo jee vae. Cua cuimbae iyaracuaa catu uyemingueta vaerā. Jae reta uñeapo Pablo re mburuvicha pe. ²Jare Pablo uñeeni ma yave, Tértulo umbipi umbijeco Pablo. Jae jee Félix pe:

—Ndereco pegua orepiacatu nduico. Ndearacuaa jeco pegua ndeporoyocui cavi jeta mbaembae re oreiví pe. ³Nde co jae oreruvicha numbutuicha vae. Opaete que rupi jecuaeño nduyapo yasurupai ndeve opaete cua re —jei—. ⁴Ndepiacavi ramo, numiñera ndiyapisaca vaerā oriñee re michi peguaño, agüiye vaerā numambeco mbatee —jei—. ⁵Echa'á nduicuaa ma cua cuimbae upurumbiavai penti mbaerasi rami. Jae omboemboe judío opaete ívi rupi ñugüinnoi vae reta. Jare jae co penti nazareno pegua reta itenondegua —jei Tértulo Félix pe—. ⁶Jae uipota vi uyapo jupi mbae vae Tumpa jo pe. Ërei ore nduipisi, jare nuáata tēi oreporyocui pe uyecuatía oí vae rupi. ⁷Ërei sundaro reta juvicha itenondegua Lisisas ou umiñta oregüi jare upíro güiraa oregüi. ⁸Jare oyocui umbijeco vae reta yugüeru vaerā ndepi. Nde etei neña yave, ndicuaata opaete numbijeco vae —jei.

⁹Judío reta vi jei añete co opaete cua mbaembae. ¹⁰Jayave mburuvicha guasu upuvée Pablo re uyemingueta vaerā. Jayave Pablo jei:

—Che aicuaa catu co nde íma ete ma neña cua ívi pegua reta. Jáeramo ayerovia reve chemiarita ayerepi vaerā —jei—. ¹¹Nde ndepuere ndicuaa rami, doce ara ramo aa güive Jerusalén pe, ambiadora vaerā Tumpa. ¹²Jare cua reta cherecha'á ayeaca quía ndive, ani amoemboe tenta guasu pegua reta Tumpa jo pe, ani itupao reta pe, ani tenta guasu rupi —jei—. ¹³Añete chembijeco ma cua mbaembae re. Ërei mbaeti mbae añete vae ipuere umimbeu ndeve cua mbaembae re —jei Pablo—. ¹⁴Ërei cua amimbeu ndeve. Che aico Jesús re arovia reve, jare jucuarái ayeycoui chetenondegua reta iTumpa pe, yepe tēi judío reta jei aico penti moromboe añete mbae vae re. Echa'á che arovia opaete mboroyocui pe uyecuatía oí vae, jare Tumpa iñee aracae umimbeu vae reta uicuatiacue —jei—. ¹⁵Che arovia Tumpa umbijecove yeta co umanocue vae reta. Jae umbijecoveta jupi vae reta jare jupi mbae vae reta. Jucuarái cua reta güirovia vi. ¹⁶Jáeramo che jecuaeño aipota chepia icavi anoi vaerā Tumpa coti jare ívi pegua reta coti —jei—.

¹⁷Che mbovi año ma aico'á cheivi pe. Jaeramo ayu ye, corepoti aru vaerā iparavete vae reta peguarrá jare Tumpa peguarrá. ¹⁸Jare cua ayapo aí rambueve, amocue Asia pegua judío reta cherecha Tumpa jo pe. Joco pe ayeyoe aí Tumpa coti mboroyocui jei rami. Ayembati'á co jeta vae ndive. Ayapo'á vi tecorai —jei—. ¹⁹Icavi tēi co jocua judío reta yugüeru vaerā cua pe uñeapo cheré ndeve, ime yave mbae chembijeco jese vae —jei Pablo Félix pe—. ²⁰Cua reta etei tumimbeu ndeve mbae nunga tecu uvāe cheré, mburuvicha reta jovai ayemboi yave. ²¹Aramoi jaeño penti mbae re ipuere chembijeco. Mburuvicha reta ipite pe aí rambueve, chiñeeäta reve jae: ‘Umanocue vae reta icove yeta vae re pe reta cherää peí cua ara.’ Jucuarái jae —jei—.

²²Jare Félix cua uyandu yave, oyopia judío reta. Echa'á jae uicuaa catu Jesús re güirovia vae reta ipurugüirovia regua. Jáeramo jei judío reta pe:

—Sundaro reta juvicha itenondegua Lisisas ou yave, aãata cua pemimbeu cheve vae re.

²³Jayave Félix oyocui sundaro reta juvicha uyandareco vaerā Pablo re. Ërei oyocui vi umaeño vaerā icoinño, jare agüiye vaerā oyopia jentará reta, ou yave ipi uyeyocui chupe vaerā.

²⁴Mbovi ara rupi Félix ou jembireco Drusila jee vae ndive. Drusila co jae penti judía. Jayave Félix ueni Pablo, jare uyapisaca quirái yaroviata co Jesucristo re vae re. ²⁵Jare Pablo jei chupe quirái icavi yayojo vaerā jupi vae, jare yayopia vaerā yanderete uipota vae güi, jare quirái Tumpa uáata ívi pegua reta. Jayave Félix uquiyé jare jei Pablo pe:

—Ecuaño rani. Chepuere yave, turueni ye curi.

²⁶Ërei Félix uipota tēi vi Pablo umee vaerā corepoti chupe, oyoraca vaerā. Jáeramo güeruruca aveño, uyemingueta vaerā jae ndive. ²⁷Ërei mocui año ma uasa yave, Porcio Festo ou uipecica Félix. Jare Félix uipota umbiyerovia judío reta ramo, ueya Pablo peresoriru pe.

25

Pablo uipota oo mburuvicha guasu César jee vae pe

¹ Festo ou uvāe yave jocua īvi pe, mbapi ara ma uasa yave, oo Cesarea güi Jerusalén pe. ² Jayave sacerdote reta itenondegua reta jare judío reta itenondegua reta imiari chupe Pablo jeco re, jare umiñera ³ uyapo vaerā icavi vae chupe reta, güeruruca vaerā Pablo Jerusalén pe. Jare jae reta ucuatirota jese tape rupi, uyuva vaerā tēi. ⁴ Ërei Festo jei chupe reta:

—Ore nduyandareco noī Pablo re Cesarea pe, jare che aata joco pe curi. ⁵ Pepuere yave, pecua cherupié. Jare uyapo yave teco icavi mbae vae jocua cuimbae, piñeapo jese —jei chupe reta.

⁶ Jayave Festo upita yave joco pe aramoi ocho ani diez ara, ou ye Cesarea pe. Jayave piareve pe uguapi upuruāa vae pe, jare güeruruca Pablo. ⁷ Jare Pablo ou ma yave, judío Jerusalén güi yugüero vae reta uyemboi Pablo iyipi rupi jare umbijeco jeta icavi mbae vae re. ⁸ Ërei ipuere'ā uicuaaca cua teco uipota omboya jese vae añete co. ⁹ Jayave Pablo jei uyerepi vaerā:

—Ayovaicho'ā etei judío reta iporoyocui ndive, ani Tumpa jo ndive, ani César ndive.

⁹ Ërei Festo uipota umbiyerovia judío reta. Jáeramo upirandu Pablo pe:

—¹⁰ Ndipota pa ndeo Jerusalén pe, che nuāa vaerā joco pe cua teco reta re?

¹⁰ Ërei Pablo jei chupe:

—César ndeocui nepuruāa vaerā, jare icavi co nde cherāa vaerā cua pe. Ayapo'ā etei teco judío reta coti. Nde etei ndicuaa cua —jei—. ¹¹ Ime yave teco ayapo icoti, ani ime yave mbae ayapo amano vaerā, ndarau ayerure ndeve ayerepi vaerā mano güi. Ërei cua teco uipota omboya cheré vae ayapo'ā yave, ndarau quía ipuere chemee chupe reta. Aipota César cherāa vaerā —jei chupe.

¹² Jayave Festo uyemingueta ūru mburuvicha reta ndive. Jayave jei Pablo pe:

—Ndipota César nerāa vaerā. César pe ndeota —jei.

Pablo Agripa jare Berenice jovai

¹³ Jare mbovi ara ma uasa yave, mburuvicha guasu Agripa jare jindi Berenice yugüero Cesarea pe, umbisaluda vaerā Festo. ¹⁴ Jare mbovi ara ma joco pe ūrugüinoi yave, Festo umimbeu mburuvicha guasu pe Pablo regua. Jei chupe:

—Ime cua pe oī penti cuimbae Félix ueya peresoriru pe vae. ¹⁵ Jerusalén pe aa yave, judío pegua sacerdote reta itenondegua reta jare tenta guasu pegua reta itenondegua reta umimbeu cheve cua cuimbae regua. Jae reta chemiñera che jae vaerā icavi co uyeyucaca vaerā —jei—. ¹⁶ Ërei che jae chupe reta: ‘Romano reta uyepocua’ā umeet vaerā quía, ndei umbijeco vae reta yugüero uñeapo jese mbove jare ndei uyerepi umbijeco vae reta güi mbove’ —jae chupe reta, jei—. ¹⁷ Jáeramo jae reta yugüero uvāe yave, aārō'ā. Piareve pe aguapi apuruāa vae pe, jare aruruca jocua cuimbae —jei—. ¹⁸ Jare umbijeco vae reta joco pe ūrugüinoi, Ërei umimbeu'ā cheve jocua nunga teco che chepia pe ayemingueta tēi omboyata jese vae. ¹⁹ Jaeño umbijeco reta jae ipurugüirovia re, jare penti cuimbae Jesús jee vae re. Jocua Jesús umano ma. Ërei Pablo jei icove yea co —jei—. ²⁰ Che aicuaa'ā mbae ra ayapota cua re. Jáeramo apirandu Pablo pe uipota ra oo Jerusalén pe, joco pe che aāa vaerā cua mbaembae re. ²¹ Ërei Pablo uipota nduyandareco vaerā jese, Augusto uāa vaerā. Jáeramo ayocui sundaro reta uyandareco vaerā jese, César pe chepuere amondo regua —jei.

²² Jayave Agripa jei Festo pe:

—Che vi aipota ayapisaca jocua cuimbae re.

Jayave Festo jei chupe:

—Curiye ndiyapisacata jese.

²³ Jayave piareve pe Agripa jare Berenice yugüero jemimonde ipōra vae ndive, jare uique reta Festo upuruāa vae pe sundaro reta juvicha itenondegua reta jare tenta guasu pegua reta itenondegua reta ndive. Jayave Festo oyocui güero vaerā Pablo. ²⁴ Jayave Festo jei:

—Mburuvicha guasu Agripa, jare opaete pe reta cua pe peī vae, co oī cua cuimbae. Opaete judío Jerusalén pegua reta jare cua pegua reta chemiñera iñeeāta reve jae umano vaerā —jei—. ²⁵ Ërei che avāe'ā teco jese umano vaerā. Jare jae etei uipota mburuvicha guasu Augusto uāa vaerā. Jáeramo chepia pe ayemingueta ma amondo vaerā icoti —jei—. ²⁶ Ërei aicuaa'ā mbae ra aicuatiata cheruvicha pe. Jáeramo aruruca perovai, jare nderovai etei, mburuvicha guasu Agripa, aicuaa vaerā mbae ra aicuatiata, opa yipirandu chupe yave —jei chupe reta—. ²⁷ Echa'ā icavi'ā co yamondo vaerā penti pereso yamimbeu mbae reve mbae re uñeapo vae reta umbijeco jese vae —jei.

26

Pablo imiari Agripa pe

¹ Jayave Agripa jei Pablo pe: —Ndepuere nemiari ndiyee.

Jayave Pablo umupüa ipo, jare cuarāi imiari iyee:

² —Mburuvicha guasu Agripa, ayerovia quirāi añaive chemiarita chiyee nderovai opaete judío reta chembijeco vae re. ³ Echa'ā nde ndicuaa catu opaete judío reta iyemboe jare iyeaca. Jáeramo numiñera ndiyapísaca vaerā cheré ndepiaquirēi reve —jei—.

Quirāi Pablo uyapo ndei güirovia Jesús re mbove

⁴ Chetaírusu güiive aico cherentará reta ndive Jerusalén pe, jare judío reta uicuaa catu quirāi aico. ⁵ Jae reta uicuaa catu vi quirāi iyipi güiive che aico moromboe fariseo pegua re. Cua moromboe pegua reta uipota yayapo cavi ete vaerā iporomboe jei vae. Jae reta ipuere chemimbeu ndeve, uipota yave —jei—. ⁶ Jare añaive che arovia Tumpa uyapota co yandetenondegua reta pe jei chupe vae. Jáeramo judío reta uñeapo cheré —jei Pablo—. ⁷ Jare jocua doce yandetenondegua reta iñemoñaa reta vi güirovia Tumpa uyapota co jei chupe vae. Jáeramo uyeyocui reta Tumpa pe iquirēi reve ara rupi jare pítu rupi. Mburuvicha guasu Agripa, cua che arovia ramo, judío reta chembijeco —jei—. ⁸ ¿Maera pa perovia'a Tumpa ipuere umbijecove ye umanocue vae reta? —jei chupe reta—.

Pablo uyapo icavi mbae vae upurugüirovia vae reta pe

⁹ Che chepia pe ayemingueta tēi icavi co ayapo vaerā jeta icavi mbae vae Jesús Nazaret pegua re güirovia vae reta coti. ¹⁰ Jare jucuarāi ayapo Jerusalén pe. Sacerdote reta itenondegua reta mbaepuere umee cheve yave, añono peresoriru pe jeta upurugüirovia vae reta. Jare ndei uyeyucaca mbove, che jae vi umanota co reta —jei—. ¹¹ Jare jeta ainupaca opaete judío reta itupao reta rupi, jare aipota jae reta jei vaerā icavi mbae vae Jesús coti. Jare chepochi ete ma chupe reta ramo, ayapo icavi mbae vae chupe reta tenta guasus ambie vae reta rupi —jei—.

Pablo jei quirāi güirovia Jesús re

(Hch 9.1-19; 22.6-16)

¹² Cua ayapo aico rambueve, sacerdote reta itenondegua reta umee cheve mbaepuere chemondo Damasco coti. ¹³ Jare guarasi ara mbite ma oī yave tape rupi aa rambueve, mburuvicha guasu, aecha penti tembipe ara güi jembipe ete guarasi güi vae. Jembipe cheré jare cherupié yugüiraa vae reta re —jei—. ¹⁴ Jare opareve ndoa ívi re, jare che ayandu penti ñee hebreo iñee pe jei cheve: ‘Saulo, Saulo, ¿maera pa ndiyapo icavi mbae vae cheve? Nde co jae penti güeye ívira jacuarovi vae re upatara vae ramo. Jáeramo ndiporara neí’ —jei cheve, jei—. ¹⁵ Jayave che apírandu: ‘¿Quía pa co nde, cheYa?’ Jare yandeYa jei: ‘Che co jae Jesús. Nde ndiyapo icavi mbae vae cheve. ¹⁶ Êrei epúa iyemboi. Che aipota ndiyeyocui vaerā cheve, jare nemimbeu vaerā aicuaaca ndeve jare aicuaacata ndeve vae. Echa'ā cua jeco pegua ayecuaa ndeve’ —jei, jei Pablo—. ¹⁷ Jare che nduepita nerentaiqua reta güi jare judío mbae vae reta güi. Echa'ā nomondota icoti, ¹⁸ nemimae reta vaerā, jare uyerova reta vaerā pítmimbi güi tembipe coti, jare Satanás güi Tumpa coti. Cua uyapo reta yave, Tumpa umbiasata chupe reta imbaeyoa reta cheré güirovia ramo, jare umeeta chupe reta imbaerā íru uñeñono tee Tumpa peguarā vae reta ndive’ —jei, jei—.

Pablo uyapo Jesús oyocui vae

¹⁹ Jáeramo, mburuvicha guasu Agripa, cheatéi'ā ayapo vaerā Tumpa uicuaaca cheve ayapo vaerā vae. ²⁰ Echa'ā tenonde amimbeu Damasco pegua reta pe. Jayave amimbeu vi Jerusalén pegua reta pe, opaete Judea pegua reta pe jare judío mbae vae reta pe. Amimbeu chupe reta ueya vaerā iyemingueta icavi mbae vae ipia pe oī vae, jare uyerova vaerā Tumpa coti. Amimbeu vi chupe reta uyapo vaerā icavi vae, íru vae reta uicuaa vaerā ueya ma co iyemingueta icavi mbae vae ipia pe oī vae —jei—. ²¹ Cua jeco pegua, amocue judío reta chepisi Tumpa jo pe, jare uipota tēi cheyuca. ²² Êrei Tumpa chembori ramo, iméño aico cua ara. Moisés jare íru Tumpa iñee aracae umimbeu vae reta jei uyeyapota vae re. Jocuaño che vi amimbeu sambiai reta jare ucuacuaa vae reta pe —jei—. ²³ Echa'ā jae reta jei Cristo uiporarañotai co, jare jae tenonde icove yeta co ou umanocue vae reta ipite güi, uechaca vaerā tembipe judío reta jare judío mbae vae reta pe —jei Pablo chupe reta.

Pablo jei tēi Agripa pe upurugüirovia vaerā

²⁴ Jare Pablo jucuarāi imiari iyee yave, Festo iñeeäta reve jei:

—Pablo, nembiquere ma. Jeta mbaembae re ndiyemboe ramo, nembiquere ma —jei chupe.

²⁵ Êrei Pablo jei chupe:

—Chembiquere'ā co, mburuvicha guasu Festo. Che jae ndeve vae añete vae jare aracuaa pegua co —jei—. ²⁶ Echa'ā mburuvicha guasu Agripa uicuaa catu cua mbaembae regua, jare chepuere chemiarí chupe aipiu mbae reve. Aicuaa jae uicuaa catu cua mbaembae regua. Echa'ā cua uyeyapo viari'ā —jei chupe—. ²⁷ Mburuvicha guasu Agripa, ¿nderovia pa Tumpa iñee aracae umimbeu vae reta uicuaciue? Che aicuaa nderovia co —jei Agripa pe.

²⁸Jayave Agripa jei Pablo pe:

—Ndipota tēi ndipo īmambae cheapo cristianorā.

²⁹Jayave Pablo jei chupe:

—Ayerure Tumpa pe, īmambae ani īma pe, nde jare opaete īru añaive uyapisaca cheré vae reta piyeyapo vaerā che rami, ērei agüiye vaerā penoi cua nunga cadena —jei.

³⁰Jare Pablo jucuarāi jei ma yave, uyemboi reta mburuvicha guasu Agripa, mburuvicha guasu Festo, Berenice jare jae ndive uguapí ñugüinói vae reta. ³¹Jare oē reta oca pe yave, jei uyupe:

—Cua cuimbae uyapo'ā mbae umano vaerā ani oī vaerā peresoriru pe.

³²Jare Agripa jei Festo pe:

—Yatorata tēi cua cuimbae, uipota'ā yave César uāa vaerā.

27

Omondo reta Pablo Roma pe

¹Jare mburuvicha reta ipia pe uyeminguela ma yave icavi co ndoo vaerā ivi Italia pe, umee reta Pablo jare amocue īru pereso reta sundaro reta juvicha Julio jee vae pe. Jae co penti ati Augusto jee vae pegua.

²Jare ndoo joco güi penti chalana guasu tenta guasu Adramitio pegua pe. Cua oota Asia pegua tenta guasu i guasu jembeí pe ñugüinói vae reta pe. Jare oo orerupié Aristarco Tesalónica pegua. Tesalónica ivi Macedonia pegua co. ³Piareve pe ndoo nuvāe tenta guasu Sidón pe. Jare Julio ipiacavi Pablo pe. Jáeramo umaeño jese oo vaerā opou īru reta pe, jae reta uyandareco vaerā jese. ⁴Jayave joco güi ndoo ye i guasu rupi, jare nduasa Chipre icupe rupi, agüiye vaerā ivitu orerováiti. ⁵Jayave nduasa i guasu Cilicia jare Panfilia jovai oī vae rupi, jare ndoo nuvāe tenta guasu Mira pe. Mira ivi Licia pegua co.

⁶Jare joco pe sundaro reta juvicha uvāe penti chalana guasu Alejandría pegua oota Italia coti vae pe, jare pípe orembuyupi. ⁷Jeta ara ndoo ndeve, jare yavai ete ndoo vaerā nuvāe tenta guasu Gnido jovai, ivitu orerováiti ramo. Jare Gnido güi ndoo ivi Creta icupe rupi ivi Salmón jovai. ⁸Jare ndoo ivi iyipi rupi, ērei yavai ete ndoo vaerā nuvāe Buenos Puertos pe. Cua güi coiño oī tenta guasu Lasea.

⁹Jare īma ete ma nduguata ramo, icaví'ā ma ndoo ye vaerā i guasu rupi. Echa'ā uyaro ma roi vaerā, jare jocua yasi reta rupi uguata'ā chalana guasu reta. Jayave Pablo umbiaracuua jei:

¹⁰—Cherivi reta, yaaño yave, che aicuaa ucañita co tivita reta jare chalana guasu, jare yande vi aramoi ñamanota —jei.

¹¹Ērei sundaro reta juvicha güirovia chalana guasu uruguata vae reta juvicha jare chalana guasu iya Pablo güi. ¹²Jare jocua chalana uñeapítiarena i guasu jembeí pe icavi'ā ndupita vaerā opaete roi guasu iara reta uasa regua. Jáeramo jeta ore ndive ñugüinói vae reta umbiaracuua ndoo vaerā joco güi. Jei reta aramoi orepuereta ndoo nuvāe tenta guasu Fenice pe, ndupita vaerā joco pe roi guasu iara pegua. Fenice co jae penti chalana uñeapítiarena Creta pegua. Joco güi i guasu uyecuua guarasi oē vae coti.

Ivitu tanta vae i guasu pe

¹³Jare ivitu umbipi uyepeyu ndeve catu sur coti güi yave, jae reta jei tēi icavita ndoo vaerā. Jayave chalana guasu uruguata vae reta uupi chalana iyepitasoca, jare ndoo Creta iyipi rupi coiño ivi güi.

¹⁴Ērei ndei īma mbove uñeováiti chalana guasu ndive tanta ivitu cusumirón ndive Euroclidón jee vae.

¹⁵Jare ivitu uipota umbiyerova chalana guasu, jare orepuere'ā ma numísimi ivitu coti. Jayave numaeño ivitu re orereraa vaerā. ¹⁶Jayave ndoo yave ivi michi vae Clauda icupe rupi, añapea nduupi chalana-rai chalana guasu jaicue numbitiriri ndugüiraa vae. ¹⁷Jare nduupi ma yave chalana guasu pe, chalana guasu uruguata vae reta oyocua chalana guasu piola pe. Jare ipia pe uyeminguela aramoi oota upāa Sirte jee vae pe, jare uquiyie reta. Echa'ā Sirte pe i tipí'ā co. Jáeramo umbigüeyi reta ivitu umiaña chalana guasu pípe vae tuicha vae ivate güi. Jare jucuarāi ivitu orereraa. ¹⁸Jare jecuaeño tanta ete ivitu oreve. Jáeramo piareve pe chalana guasu uruguata vae reta umbipi omombo tivita reta. ¹⁹Jare mbapi ara uasa ma yave orepo pe etei nomombo jocua ivitu umiaña chalana guasu pípe vae ivate güi umbigüeyi reta vae. ²⁰Uyecuua'ā guarasi jare yasitata jeta ara ma, jare jecuaeño tanta ivitu oreve. Nduicuaa'ā ma quirái nduyembiasa vaerā.

²¹Jare īma ma nducaru'ā yave, Pablo uyemboi orepite pe jare jei:

—Cuimbae reta, piyapisacata tēi co chiñee re, agüiye vaerā tēi yayu Creta güi pemicañi cua mbaembiae. ²²Ērei añaive che jae peve piñemiatangātu vaerā. Echa'ā ndarau quía umano pepite pe. Jaaño chalana guasu ucañita —jei—. ²³Echa'ā piare uyecuua cheve penti ángel Tumpa pe uyeyocui vae. Che co jae Tumpa imbae, jare chupe ayeyocui —jei Pablo—. ²⁴Ángel jei cheve: ‘Pablo, agüiye equiyie. Ndeñotai co ndiyemboi César jovai. Jare Tumpa ipiacavi nde ndive ramo, uepita vi opaete cua nderupié yugüiraa vae reta’ —jei cheve, jei—. ²⁵Jáeramo, cuimbae reta, piñemiatangātu. Echa'ā che arovia Tumpa, jare jae jei cheve vae uyeyapota co. ²⁶Ērei yaañotai co ñavāe penti ivi oī vae pe —jei.

²⁷ Jare catorce ara uasa ma yave, ivitu orereraa rambueve i guasu Adriático rupi, piare catu yave chalana guasu uruguata vae reta uicuaa coíño ma yugüiraa ivi güi. ²⁸ Jayave umbigüeyi i tipi pe umiaanga vaerā, jare uicuaa i tipicue oí treinta y seis metro rupi. Jare ndoo catu ye ma yave, umiaanga ye, jare uicuaa i tipicue oí veintisiete metro rupi. ²⁹ Jayave ipia pe uyemingueta aramoi upáata ita reta re, jare uquiyé reta. Jayave umbigüeyi reta chalana guasu jaicue coti irundi chalana iyepitasoca reta. Jare uipota echá ma cõe vaerā tēi chupe reta. ³⁰ Jare chalana guasu uruguata vae reta uipota tēi osi chalana guasu güi. Jáeramo umbigüeyi chalana-rai i pe. Uipota íru reta ipia pe uyemingueta vaerā jae reta umbigüeyita chalana guasu jenonde coti chalana iyepitasoca reta. ³¹ Jayave Pablo jei sundaro reta juvicha jare sundaro reta pe:

—Cua reta upita'ã yave chalana guasu pe, ndarau pepuere piyembiasa.

³² Jayave sundaro reta uyasía chalana-rai ichā, jare umaeño oo ucañi.

³³ Jare cõeta ma yave, Pablo umbiaracuaa opaete joco pe ñugüiñoi vae reta ucaru vaerā. Jei chupe reta:

—Catorce ara ma piyemipiá, jare pecaru'ã. ³⁴ Jáeramo che pumiñera pecaru, pepirata vaerā. Echa'ã ndarau ucañi pea ave peáca güi —jei.

³⁵ Jare cua jae yave, uipisi mbiyape, jare umee yasurupai Tumpa pe opaete vae jovaque. Jayave upisaa mbiyape jare jou. ³⁶ Jayave opaete jae reta uñemiatangátu, jare ucaru reta vi. ³⁷ Jare opaete nduico chalana guasu pe vae co doscientos setenta y seis. ³⁸ Jare opareve iyangapií yave, omombo reta trigo i pe, jare jucuarái umbivevi chalana guasu.

Chalana guasu icumegua

³⁹ Jare cõe ma yave, uicuaa'ã reta jocua ivi. Ërei uecha reta penti i jugua jare ivi ipecavi joco pe. Jáeramo jocoti uipota reta omondo chalana guasu, ipuere yave. ⁴⁰ Jayave jae reta omombo ueya i pe chalana iyepitasoca reta, jare umungúe timón ichá. Jayave uupi ivitu umiaña chalana guasu pipe vae michi vae, jare güiraa i jembeí coti. ⁴¹ Jayave chalana guasu oo yuererocua ivicuítí re upáa ndei oo uváe i jugua pe mbove. Echa'ã joco pe i uyuasa oí. Jare chalana guasu ití uyeatíca upita, jare omi'ã ye. Jayave i yacarachi ete ramo, oyoca chalana guasu jaicue coti. ⁴² Jare sundaro reta uipota tēi uyuca pereso reta, agüiye vaerā quía osi, uitai yave. ⁴³ Ërei sundaro reta juvicha uipota uepi Pablo. Jáeramo jei sundaro reta pe agüiye vaerá uyuca reta. Oyocui ipuere uitai vae reta raní oa vaerá i pe, yugüiraa vaerá uváe ivi pe. ⁴⁴ Jare oyocui íru reta yugüiraa vaerá ivirape re ani ipotave chalana guasu pe oí vae re. Jare jucuarái opareve yugüiraa cavi uváe ivi pe.

28

Pablo Malta pe

¹ Opareve noë ma ivi pe yave, nduicuaa jocua ivi jee Malta. ² Jare joco pegua reta ipiacavi oreve. Echa'ã orembiresive cavi, jare uyatapi, ama oquí jare roí ramo. ³ Jare Pablo umbati yepea, jare oñono tata pe. Jayave penti mboi tata güi oë osi, jare uñemama Pablo ipo re, uichuu yave. ⁴ Jare joco pegua reta uecha yave mboi usagüigüi oí Pablo ipo re, jei reta uyupe:

—Añetete yepe cuá cuimbæ upuruyuca vae. Yepe tēi umano'ã i guasu pe, Ërei ndarau ipuere icoño, jupi'ã ramo.

⁵ Ërei Pablo umítimo ipo güi mboi tata pe, jare uyeyapo'ã mbae chupe. ⁶ Jare joco pegua reta ipia pe uyemingueta tēi iruruta ani aramoi oata jare umanota. Ërei jae reta uñro tēi ma imá yave, uecha uyeyapo'ã mbae chupe. Jayave jae reta jei'ã ma tenonde rami. Jei reta ma:

—Cua cuimbæ penti tumpa co.

⁷ Jare jocua ivi pegua reta juvicha Publio jee vae güiñoi jocoropi iivi reta. Jae orembiresive cavi, jare oreningarú mbapí ara. ⁸ Jare Publio tu imbaerasí oí jupa pe. Jacu jare jepotiegüi. Pablo oo umae jese. Jare uyerure Tumpa pe yave, oñono ipo jese, jare umbigüera. ⁹ Jare cua uyeyapo yave, íru imbaerasí vae jocua ivi pegua reta yugüieru, jare Pablo umbigüera vi. ¹⁰ Jayave jae reta umeei oreve jeta mbaembæ. Jare nduyupi ye yave chalana guasu pe, umbuyupi vi oreve mbaembæ nduipota vae.

Pablo oo uváe Roma pe

¹¹ Jare mbapí yasi ma uasa yave, ndoo joco güi penti chalana guasu Alejandría pegua pe. Cua chalana guasu upita jocua ivi pe, roí iara umbiásia vaerā. Chalana guasu ití re ñugüiñoi choguaquiri-raanga ivira pegua Cástor jare Pólux jee vae. ¹² Jayave ndoo nuváe tenta guasu Siracusa pe, jare ndupita joco pe mbapí ara. ¹³ Jayave joco güi nduyere jare ndoo nuváe tenta guasu Regio pe. Jayave piareve pe ivitu uyepetu sur coti güi, jare piareve ye pe ndoo nuváe tenta guasu Puteoli pe. ¹⁴ Jare joco pe nuñeváe upurugüirovia vae reta ndive. Jare jae reta uparea oreve ndupita vaerá jae reta ndive siete ara pegua. Jare joco güi ndoo tenta guasu Roma coti. ¹⁵ Jare orererácuá upurugüirovia vae Roma pegua reta pe, jare amocue jae reta yugüieru orerováti Foro Apio pe, jare íru vae reta yugüieru orerováti Tres Tabernas

pe. Jare Pablo uecha yave cua reta, umee yasurupai Tumpa pe, jare uñemiatangātu. ¹⁶Jare ndoo nuvāe yave Roma pe, sundaro reta juvicha umee pereso reta penti sundaro reta juvicha tenondegua vae pe. Êrei umaeño Pablo re icoíño vaerā penti sundaro uyandareco jese vae ndive.

Pablo umimbeu ñee icavi vae Roma pe

¹⁷Jare mbapi ara ma uasa yave, Pablo uenica judío reta itenondegua reta. Jare uyembati reta yave, Pablo jei chupe reta:

—Cheriquei reta, yepe tēi ayapo'ā mbae nunga tecu ñanerentaigua reta coti ani yandetenondegua reta iyemboe coti, ërei Jerusalén pegua reta chemee romano reta pe, jare romano reta cheñono peresoriru pe —jei—. ¹⁸Jare jae reta upirandu yave cheve, uipota tēi cheyora, ayapo'ā mbae nunga tecu amano vaerā ramo. ¹⁹Êrei judío reta oyovaicho cheré ramo, ayapo'ā vaerā mbae, jaeño ayu vaerā cheráa César, yepe tēi mbaeti mbae ambijeco vaerā cherentaigua reta jese vae —jei chupe reta—. ²⁰Jáeramo che pueni puecha vaerā, jare ayemingueta vaerā pe reta ndive. Echa'ā Israel pegua reta güürovia vae jecó pegua añaepiti aí cua cadena pe —jei.

²¹Êrei jae reta jei chupe:

—Mbaeti quía ombou tupapire oreve Judea güi nemimbeu vaerā oreve. Jare ou'ā penti ave ñanerentaigua joco güi umimbeu vaerā oreve icavi mbae vae nderegua. ²²Êrei nduipota nduicuaa mbae ndepia pe ndiyemingueta vae. Echa'ā nduicuaa opaete que rupi jei reta icavi'ā co cua moromboe —jei reta.

²³Jayave jei reta Pablo pe īru ara rupi yugüeruta co. Jayave jocua ara jeta vae yugüeru Pablo jenta pe. Jare neimbove güüve Pablo icaaru umimbeu chupe reta Tumpa iporoyocuia regua. Jare Moisés iporoyoci rupi jare Tumpa iñee aracae umimbeu vae reta uicuatiacue vae rupi umimbeu vi chupe reta Jesús regua. Cua uyapo, jae reta güürovia vaerā. ²⁴Jare amocue güürovia Pablo jei vae. Êrei īru vae reta güürovia'ā. ²⁵Jáeramo uyembiyao reta uyugüi, jare yugüiraa Pablo jenta güi, Pablo opa yave jei chupe reta cua ñee:

—Jupi co jei Espíritu Santo Tumpa iñee aracae umimbeu vae Isaías rupi yandetenondegua reta pe. Echa'ā jei cuarāi:

²⁶Ecua tenta guasu pegua reta pe, jare ere chupe reta:

Piyandu tēita, ërei ndarau picuua.

Peecha tēita, ërei ndarau picuua cavi.

²⁷Echa'ā cua reta ipiatanta,

jare iyapisa pe uyandu tēi,

jare usapimíño,

agüiye vaerā uecha jesa pe,

jare agüiye vaerā uyandu iyapisa pe,

jare agüiye vaerā uicuua ipia pe,

jare agüiye vaerā uyerova checoti' —jei Tumpa—.

'Echa'ā uyerova checoti yave, ambaita tēi imbaeyoa reta' —jei.

Jucuarāi jei —jei Pablo chupe reta—.

²⁸Picuua cavi cua: Tumpa umimbeucata cua ñee judío mbae vae reta pe, jae reta uyembiasaca vaerā. Echa'ā jae reta uyapisacata jese —jei.

²⁹Jare cua Pablo opa ma jei yave, judío reta yugüiraa uyeaca reve uyupii.

³⁰Jare Pablo uiporu penti o umbiepi reve, jare ico joco pe mocui año. Jare umbiresive opaete yugüeru opou ipi vae reta. ³¹Jare jecuaeño umimbeu Tumpa iporoyocuia regua, jare oporomboe yandeYa Jesucristo re uquiyé mbae reve, jare mbaeti quía umbiavai.

LA CARTA DEL APOSTOL SAN PABLO A LOS ROMANOS

¹ Che co jae Pablo. Che ayeyocui Jesucristo pe. Jae cheparavo aico vaerā jemimondorā, jare cheñono tee amimbeu vaerā ñee icavi vae Tumpa regua.

² Echa'ā aracae Tumpa umee ñee icavi vae iñee umimbeu vae reta rupi uyecuatía oī vae pe. ³ Ñee icavi vae umimbeu yandeve Tumpa Tai regua. Jae co yandeYa Jesucristo. Jae David iñemoñaa reta pegua co. ⁴ Ërei Espíritu iyoa mbae vae rupi jae uyecuua Tumpa Tai mbaepuere güiñoi vae. Echa'ā cuá uyecuua, icove ye yave ou umanocue vae reta ipite güi. ⁵ Jesucristo rupi Tumpa umee oreve ipiacavi jare oremondo numimbeu vaerā opaete iñi pegua reta pe, Tumpa jei rami jae reta upurugüirovia vaerā. Cua nduyapo, Tumpa uyembiadoraca vaerā. ⁶ Jare pe reta co cua nunga amocue. Echa'ā Tumpa peparavo, pico vaerā Jesucristo imbaerā.

⁷ Aicuatía cuá tupapire opaete Roma pe pico vae pe. Tumpa perau jare peparavo peñono tee vaerā iyupeguarā. YandeRu Tumpa jare yandeYa Jesucristo tumee peve ipiacavi jare ipiacatu.

Pablo uipota oo Roma pe

⁸ Tenonde voi amee yasurupai Tumpa pe Jesucristo rupi peré, quirái pepurugüirovia jerácuá opaete iñi rupi. ⁹ Che ayeyocui Tumpa pe opaete chequiréi reve. Echa'ā amimbeu iñu vae reta pe ñee icavi vae Tumpa Tai regua. Jare chepuere jae peve Tumpa jovaque quirái jecuacuño ayerure chupe peré. ¹⁰ Aipota ete apou pepi. Jáeramo ayerure Tumpa pe jese. Tumpa uipota yave, aañotai co pepi. ¹¹ Echa'ā aipota puecha, pombori vaerā Espíritu pegua re, piñemimiráta vaerā. ¹² Jare cuarái yayembipiñacatuta yandepurugüirovia rupi. Echa'ā pe reta vi pepurugüirovia che apurugüirovia rami.

¹³ Ërei, cheriví reta, aipota picuua vaerā quirái jeta vese ma aata tēi pepi, ërei jecuacuño mbae chembíavai. Echa'ā aipota ayeyocui Cristo pe pepite pe, jae uyembiadoraca vaerā pe reta rupi, jucuarái uyeyapo iñu judío mbae vae reta ipite pe rami. ¹⁴ Echa'ā chepiá co Cristo pe ayeyocui vaerā uyemboe vae reta jare uyemboe mbae vae reta pe, jare iyaracuua vae reta jare iyaracuua mbae vae reta pe. ¹⁵ Jáeramo chepuere yave, aipota ete amimbeu ñee icavi vae pe reta Roma pe pico vae pe.

Ñee icavi vae imbaepuere

¹⁶ Echa'ā chemara'ā ñee icavi vae re. Echa'ā ñee icavi vae rupi Tumpa umbiasa imbaepuere pe opaete güirovia vae reta. Umbiasa judío reta rani jare judío mbae vae reta vi. ¹⁷ Echa'ā ñee icavi vae umimbeu yandeve quirái Tumpa yanembujupi co yarovia yave. Jare jucuarái umimbeu yandeve, yarovia vaerā. Echa'ā Tumpa iñee pe uyecuatía oī cuarái: "Tumpa umbujupi vae güinoita tecove upurugüirovia ramo." Jucuarái uyecuatía oī.

Ivi pegua reta imbaeyoa

¹⁸ Jare uyecuua ara güi quirái Tumpa uiporaraca ete opaete jae ndive oyovaicho vae reta jare icavi mbae vae uyapo vae reta pe. Echa'ā jae reta umbíavai añete vae icavi mbae vae uyapo vae rupi. ¹⁹ Opaete vae ipuere uicuua Tumpa regua vae uyecuua co chupe reta. Echa'ā Tumpa etei uicuacca chupe reta.

²⁰ Añete co, mbaeti quía ipuere uecha Tumpa jare imbaepuere opa mbae vae. Ërei ivi uyeyapo güive, Tumpa uicuacca cuá imbaepuere jare quirái jae co Tumpa. Echa'ā ivi pegua reta ipuere tēi uicuua, opaete mbaembae Tumpa uyapo vae jeco pegua. Jáeramo mbaeti penti ave ipuere jei: "Che aicuua'ā co." ²¹ Yepe tēi jucuarái uicuua reta tēi Tumpa, umbiadora'ā co. Umee'ā vi yasurupai chupe. Ërei ipia pe uyeminguela reta iyaracuua mbae vae reta rami, jare iyaracuua mbae vae reta rami ipuere'ā ipia pe uyeminguela cavi mbae re. ²² Jae reta ipia pe uyeminguela tēi iyee iyaracuua catu vae reta co. Ërei uyeyapo reta iyaracuua mbae vae reta. ²³ Jae reta umbiadora'ā Tumpa umano mbae vae. Ërei umbiadora cuimbæ-raanga reta, yepe tēi cuimbæ reta umano vae co. Umbiadora reta vi güira-raanga reta, maemimba-raanga reta jare mboi-raanga reta.

²⁴ Jáeramo Tumpa umaeño jese reta ipia pe uyeminguela vaerā icavi mbae vae re ipia jei vae rupi, jare jucuarái uyapo reta uyape imarata tēi jese vae. ²⁵ Güirovia'ā añete vae Tumpa regua. Ërei güirovia reta apu. Echa'ā umbiadora'ā reta Tumpa opaete mbaembae uyapo vae, jare uyeyocui'ā vi chupe. Ërei umbiadora mbaembae Tumpa uyapo vae jare uyeyocui chupe reta. Tumpa tuyembiadoraca jaeño mai pegua. Amén.

²⁶ Jáeramo Tumpa umaeño jese reta uyapo vaerā pichíi vae imarata tēi jese vae. Echa'ā cuña reta opoco iyee. Tumpa uyapo'ā cuña reta jucuarái uyapo vaerā. ²⁷ Jae ramíño vi cuimbæ reta uyapo'ā cuña reta ndive Tumpa uipota uyapo vaerā vae. Ërei cuimbæ reta uyupii uyepota, jare opoco iyee. Jáeramo Tumpa uiporaraca chupe reta. Echa'ā jae reta uyemimbaerasi icavi mbae vae uyapo vae jeco pegua.

²⁸Jare uipota'ā reta uicuaa Tumpa ramo, Tumpa umaeño jese reta ipia pe uyemingueta vaerā opaete mbae icavi mbae vae re, jae reta uyapo vaerā opaete mbae icavi mbae vae. ²⁹Jae reta jecuaeño uyapo jipi mbae vae. Uyapo agusa. Uipota ūru vae reta imbaembae. Uyapo icavi mbae vae. Ñacatāa. Upuruyuca. Jovaichopota. Upurumbitavi. Ipia pe uyemingueta icavi mbae vae uyapo vaerā. Indayepota. ³⁰Oporomboyoavaichochā ūru ndive. Umītarēi Tumpa. Jecopochi. Uyembicate. Uyembutuicha. Icatu ete uyapo vaerā icavi mbae vae. Uyapo'ā tu jare ichi jei vae. ³¹Imbiquere. Uyapo'ā jei uyapota tēi vae. Mbaeti etei güinoi mburaua. Ipiatanta. Mbaeti güinoi mburuparareco. ³²Cua reta uicuaa Tumpa jei ma co quirāi cua mbaembae icavi mbae vae uyapo vae reta umanota co. Ērei yepe tēi cua uicuaa, ērei jecuaeño uyapo cua mbaembae icavi mbae vae, jare icavi chupe jucuarāi uyapo vae reta.

2

Tumpa upuruāa jipi vae rupi

¹Nde vi ndarau ndepuere ndiyerepi. Echa'ā ime yave quía ūru vae umbijeco vae, uyembijeco vi co, ūru vae umbijeco yave. Echa'ā ūru vae umbijeco vae uyapo vi jocua jeco icavi mbae vae reta. ²Ērei yaicuaa quirāi Tumpa uāa añete vae rupi jocua jeco icavi mbae vae reta uyapo vae reta. ³Agiyiye ndepia pe iyemingueta nde ndiyerepita vae re, agüiye vaerā Tumpa nerāa. Echa'ā penti vae umbijeco yave jocua jeco icavi mbae vae reta uyapo vae reta, ndarau uyerepi. Echa'ā jae etei vi jucuarāi uyapo. ⁴Nde nerīro ndico Tumpa ipiacavi jare quirāi Tumpa umiguanta jare ipiaguasu ndeve. Ndicuaa co quirāi Tumpa ipiacavi ndeve, nde ndeeya vaerā icavi mbae vae ndepia pe oī vae. ⁵Ērei ndepiatanta yave, jare ndeeya'ā yave icavi mbae vae ndepia pe oī vae, Tumpa uiporaracata ndeve jocua ara opaete ūru vae reta pe uiporaraca yave. Echa'ā jocua ara uyecuaata co quirāi Tumpa upuruāa jipi vae rupi. ⁶Tumpa umeeta opaete vae pe ipotave vae uyapo vae rupi. ⁷Icavi vae jecuaeño ipiaguasu reve uyapo vae reta pe Tumpa umeeta tecove opa mbae vae. Echa'ā jocua rupi jae reta uicuaaca quirāi jecuaeño ueca mbaembae opa mbae vae yembadora pegua. ⁸Ērei Tumpa uiporaracata co mbaembae iyupeguarāo uipota vae reta pe. Echa'ā uipota'ā uyapo añete vae rupi. Jaeño uipota uyapo jipi mbae vae. Jáeramo Tumpa uiporaracata chupe reta. ⁹Opaete ivi pegua icavi mbae vae uyapo vae reta uiporarata co jare ipiatitā co - judío reta rani jare judío mbae vae reta vi. ¹⁰Ērei opaete icavi vae uyapo vae reta güinoita yepiu jare mbiacatu - judío reta jare judío mbae vae reta vi. ¹¹Echa'ā Tumpa uau'ā penti vaeñio ūru vae güi. ¹²Echa'ā opaete Moisés iporoyocui mbaeti güinoi vae iyoa vae reta yugüiraata cañitei pe, yepe tēi mbaeti güinoi Moisés iporoyocui. Jare opaete Moisés iporoyocui güinoi vae iyoa vae reta uñéacata Moisés iporoyocui re. ¹³Echa'ā Tumpa umbujupi'ā mboroyocui uyanduiño vae reta. Tumpa umbujupita mboroyocui jei vae uyapo vae reta. ¹⁴Echa'ā judío mbae vae reta, yepe tēi mbaeti güinoi Moisés iporoyocui, ērei amo pe uyapo reta mboroyocui jei vae mbaeti quía umimbeu chupe reta reve. Cua uicuaaca ime güinoi penti mboroyocui ipia pe, yepe tēi mbaeti güinoi Moisés iporoyocui. ¹⁵Echa'ā uicuaaca ime güinoi penti mboroyocui ipia pe, mbaembae uyapo vae rupi. Jae reta uicuaa vi ipia pe mbae icavi uyapo vaerā vae. Jáeramo ipia pe uyemingueta rupiño uyembijeco ani uyerepi mbaembae uyapo vae re. ¹⁶Jucuarāi co uñéacata reta, Tumpa uāa yave ivi pegua reta Jesucristo rupi. Echa'ā jocua ara uyecuaata co opaete vae uyapo vae tenonde yave uyecuaa mbae vae. Jare Tumpa upuruāata nñee icavi vae che amimbeu vae re.

Judío reta jare mboroyocui

¹⁷Ērei nde ndere ndiyupe nde co jae judío. Nde ndiyeco mboroyocui re, jare ndiyembicate nde ndere ndicuaa co Tumpa ramo. ¹⁸Nde ndicuaa Tumpa jei vae, jare mboroyocui jei vae rupi nde ndicuaa mbae icavi ete ndiyapo vaerā vae. ¹⁹Nde nderovia ndepuere co nemímae jesa mbae Tumpa coti vae reta, jare ndepuere nemee Tumpa jembipe pítumimbi pe ñugüinoi vae reta pe. ²⁰Nde nderovia vi ndicuaa co quirāi ndepuere nemboe mbaeti mbae uicuaa vae reta jare sambiai reta. Echa'ā mboroyocui umimbeu ndeve aracuaa jare añete vae. ²¹Nde nemboe ūru vae. Jáeramo nde rani ndiyemboeta tēi. Nde nemimbeu ūru vae reta pe agüiye vaerā imonda. Jáeramo agüiyeta tēi nemonda nde vi. ²²Nde ndere ūru vae reta pe agüiye vaerā uyuvanga menda re. Jáeramo agüiyeta tēi ndiyuvanga menda re nde vi. Nde nemitarēi tumpa-raanga reta. Jáeramo agüiyeta tēi nde vi niñomi mbaembae icavi vae itupao reta güi. ²³Nde ndiyembicate mboroyocui nenoi ramo. Ērei ūru vae reta güiríro Tumpa nde ndiyapo'ā mboroyocui jei vae ramo. ²⁴Echa'ā Tumpa iñee pe uyecuatía oī cuarāi: "Judío mbae vae reta jei mbaembae icavi mbae vae Tumpa coti pereco pegua." Jucuarāi uyecuatía oī.

²⁵Icavi co niñemicircuncidaca vaerā, Moisés iporoyocui jei vae ndiyapo yave. Ērei ndiyapo'ā yave mboroyocui jei vae, ndiyeyapo co penti uñemicircuncidaca mbae vae rami, yepe tēi niñemicircuncidaca. ²⁶Jare uñemicircuncidaca'ā vae uyapo yave mboroyocui jei vae, jae uyeyapo co penti uñemicircuncidaca vae rami, yepe tēi uñemicircuncidaca'ā. ²⁷Jare uñemicircuncidaca'ā jete pe

vae, mboroyocui jei vae uyapo yave, nembijecota co. Echa'ã nde ndiyavi mboroyocui jei vae, yepe tẽi ime nenoí mboroyocui uyecuatía oĩ vae, jare yepe tẽi niñemicircuncidaca.²⁸ Echa'ã penti judío mbaeti co judío aňetete vae uyecuaa vae jeco peguaño. Jae ramíño vi penti uñemicircuncidaca vae mbaeti co uñemicircuncidaca vae aňetete vae uyecuaa vae jeco peguaño. Echa'ã jete peño uñemicircuncidaca.²⁹ Ërei penti judío ipia pe oĩ vae jeco pegua judío aňetete vae co. Jae ramíño vi penti uñemicircuncidaca vae ipia pe oĩ vae jeco pegua uñemicircuncidaca vae aňetete vae co. Echa'ã cua nunga uyapo Espíritu jei vae rupí, uyecuatía oĩ vae rupiño'ã. Tumpa jeita icavi cua nunga, yepe tẽi ūru vae reta jeita'ã jucuarãi.

3

¹ Jáeramo ḡmbae pe pa uyuaví judío reta judío mbae vae reta güii? ḡMbae pe pa uyuaví uñemicircuncidaca vae reta uñemicircuncidaca mbae vae reta güii? ² Jeta co opaete quirãirãi rupí. Tenonde tae cua: Tumpa umee iñee chupe reta, jae reta uñuvatu vaerã. ³ Añete co, aramoi amocue vae güirovia'ã. Ërei yepe tẽi jae reta güirovia'ã, érei cua uiporta'ã jei Tumpa ndarau uyapo jei vae.⁴ Jucuarãi'ã etei co. Echa'ã Tumpa uyapo opaete aňete vae rupí, yepe tẽi opaete ivi pegua reta iyapu vae reta co. Echa'ã Tumpa iñee pe uyecuatía oĩ cuarãi:

"Ndiyeminguela yave, uyecuaata aňete vae co jocua nde ndere vae."

Jare ūru vae reta nembijeco yave, ndicuaacata jupi vae co nde ndiyapo vae." Jucuarãi uyecuatía oĩ.

⁵ Upurugüirovia mbae vae reta jei cuarãi: "Jupi mbae vae yayapo vae uicuaaca quirãi Tumpa co jae jupi vae. Jáeramo Tumpa uiporaraca yandeve yave, jupi mbae vae co uyapo." Jucuarãi jei reta. ⁶ Ërei yandepuere'ã yae jucuarãi. Echa'ã Tumpa uyapo yave mona jupi mbae vae, ndarau tẽi ipuere uâa ivi pegua reta.

⁷ Jare jei reta vi cuarãi: "Cheapu yave, ūru vae reta umbiadora eteta Tumpa. Echa'ã uicuaata aňete vae Tumpa jei vae icavi ete co. Jáeramo Tumpa agüiyeta tẽi chembijeco cheapu re." ⁸ Añete co, yandepuere yae: "Yayapo icavi mbae vae, icavi vae uyeyapo vaerã." Jucuarãi jei reta. Icavi co Tumpa umbijeco vaerã jucuarãi jei vae reta. Jare amocue vae jei ore jucuarãi ndoporomboe. Cuarãi jei icavi mbae oreré.

Mbaeti co jupi vae

⁹ Jáeramo yandepuere'ã etei yae judío reta icavi ete judío mbae vae reta güii. Echa'ã yaicuaaca ma quirãi judío reta jare judío mbae vae reta teco güinoi. Echa'ã opaete vae iyoa vae reta co. ¹⁰ Echa'ã Tumpa iñee pe uyecuatía oĩ cuarãi:

"Mbaeti co quía uyapo icavi vae, mbaeti penti ave.

¹¹ Mbaeti co quía uicuaa Tumpa vae.

Mbaeti co quía ueca Tumpa vae.

¹² Opaete vae uyerova Tumpa güii.

Opaete vae uyapo icavi mbae vae.

Mbaeti co quía uyapo icavi vae, mbaeti penti ave.

¹³ Iyuru co penti teögüriru uyasoi mbae vae ramí.

Uyeminguela yave, upurumbitaviñoi.

Opaete jei vae jasi ete, mboi imbayachi jasi ete ramí.

¹⁴ Jecuaeñeo jei icavi mbae vae ūru vae reta cotí, jare jecuaeñeo iarasi ūru vae reta pe.

¹⁵ Iquirëi ete upuruyuca.

¹⁶ Jecuaeñeo uyapo icavi mbae vae ūru vae reta pe umbipiatiti vaerã.

¹⁷ Jare iquirëi'ã etei umbipiácatu ūru vae reta.

¹⁸ Ipia pe uyeminguela'ã etei Tumpa re, yepe tẽi uquiyeta tẽi co chugüi."

Jucuarãi uyecuatía oĩ.

¹⁹ Jare yaicuaa quirãi mboroyocui jei vae imiari mboroyocui güinoi vae reta pe, agüiye vaerã penti ave ipuere uyerepi, jare opaete ivi pegua reta uyecuaa vaerã iyoa vae reta co Tumpa jovai. ²⁰ Jáeramo mbaeti quía ipuere uyembujupi Tumpa jovai mboroyocui jei vae re uyapo vae rupí. Echa'ã mboroyocui güinoi ramo, uicuaa reta iyoa vae reta co.

Añave Tumpa yanembujupi yandepurugüirovia rupí

²¹ Ërei añave uyecuaa ma quirãi Tumpa ipuere yanembujupi mboroyocui jei vae yayapo mbae reve. Jare mboroyocui pe uyecuatía oĩ vae jare Tumpa iñee aracae umimbeu vae reta uicuatía vae umimbeu cua regua. ²² Echa'ã Tumpa umbujupita opaete Jesucristo re güirovia vae reta ipurugüirovia rupí. Penti vae uyuaví'ã ūru vae güii. ²³ Echa'ã opaete vae iyoa vae reta co. Tumpa ipuere'ã jei penti ave re: "Cua co jae jupi vae." ²⁴ Ërei Tumpa ipuere ma yanembujupi ipiacavi rupí. Jae co penti regalo Tumpa umee yandeve vae. Echa'ã Tumpa yanderepi ma Cristo Jesús rupí. ²⁵ Tumpa umee Cristo humano vaerã maemimba uyeyucacue sacerdote umee vae ramí, agüiye vaerã ma uiporaraca yandeve, yarovia yave Cristo humano co yanderé. Jare jucuarãi uyecuaa quirãi Tumpa jupi co. Echa'ã aracae yave, ivi pegua

reta iyoa yave, Tumpa ipiaguasu chupe reta. Uiporaraca'ã chupe reta imbaeyoa reta re. ²⁶Jare añave uyecuua ma quirãi Tumpa jipi co. Echa'ã jae uyapo jipi vae, umbujupi yave Jesùs re güirovia vae.

²⁷Jáeramo mbaeti etei ñanoi mbae yandepuere yayembiccate jese vae. Echa'ã yayapo'ã mboroyocui jei vae - jaenyo yapurugüirovia. ²⁸Jáeramo yaicuua ma quirãi Tumpa yanembujupi yandepurugüirovia rupi. Yanembujupi'ã mboroyocui jei vae yayapo vae rupi.

²⁹Jare Tumpa co jae judío mbae vae reta iTumpa - judío reta peguaño'ã co. ³⁰Echa'ã Tumpa pentiño co, jare umbujupita uñemicircuncidaca vae reta ipurugüirovia rupi. Jae ramíño vi umbujupita uñemicircuncidaca mbae vae reta ipurugüirovia rupi. ³¹Jáeramo aramoi quía jeita: "Jucuarãi yave, mboroyocui mbaeti co mbaerã. Echa'ã Tumpa yanembujupi yandepurugüirovia rupi." Jucuarãi'ã co. Echa'ã cua jeco pegua yaicuua ma maera Tumpa uicuaaca mboroyocui.

4

Abraham pe uyeyapo vae

¹Jáeramo, ¿mbae ra güinoi yandetenondegua Abraham jae uyapo vae rupi? (Abraham co jae opaete judío reta itenondegua.) ²Echa'ã Abraham uyembujupi yave mona jae uyapo vae rupi, uyembicata têi. Ërei ipurel'ã uyembicate Tumpa jovai. ³Echa'ã Tumpa iñee pe uyecuatía oĩ cuarãi: "Abraham güirovia Tumpa, jare jocua jeco pegua Tumpa umbujupi." Jucuarãi uyecuatía oĩ. ⁴Ërei ime yave quía uparavíqui vae, umimbaravíqui vae umbiepi uparavíqui vae pe ipía chupe ramo - ipiacavi ramo'ã. ⁵Ërei ime yave quía güirovia Tumpa mbae uyapo mbae reve vae, Tumpa umbujupi ipurugüirovia rupi. Echa'ã Tumpa umbujupi iyoa vae. ⁶Jae ramíño vi David jei quirãi uyerovia catu co mbae uyapo mbae reve uyembujupica Tumpa pe vae. ⁷Echa'ã aracae jei cuarãi:

"Uyerovia catu co imbaeyoa reta Tumpa umbiåsa chupe vae reta.

Uyerovia catu co imbaeyoa reta uyembai oĩ vae reta.

⁸Uyerovia catu co Tumpa umbijeco'ã imbaeyoa re vae reta."

Jucuarãi jei.

⁹¿Umee ra Tumpa cua yerovia catu uñemicircuncidaca vae reta peño? Ani ¿umee ra uñemicircuncidaca mbae vae reta pe vi? Echa'ã yae ma quirãi Tumpa umbujupi Abraham ipurugüirovia rupi. ¹⁰Ërei ¿quirãi yave ra umbujupi? ¿Uñemicircuncidaca ma yave ra? ani ¿ndeïno uñemicircuncidaca mbove ra? Uñemicircuncidaca yave'ã co. Tumpa umbujupi ndeïno uñemicircuncidaca mbove. ¹¹Jayave Abraham uñemicircuncidaca uicuaaca vaerã íru vae reta pe Tumpa umbujupi co ipurugüirovia rupi ndei uñemicircuncidaca mbove. Jáeramo Abraham co opaete upurugüirovia vae uñemicircuncidaca mbae vae reta tu rami. Echa'ã jae reta vi uyembujupica ma Tumpa pe. ¹²Jae ramíño vi Abraham co opaete uñemicircuncidaca vae reta tu rami. Cua reta uñemicircuncidacaiño'ã co. Jae reta güinoi mburugüirovia yandetenondegua Abraham ndei uñemicircuncidaca mbove güinoi vae rami.

Tumpajei uyapota Abraham pe vae

¹³Echa'ã Tumpa jei Abraham jare iñemoñaa reta pe umee vaerã chupe reta ivi. Ërei umee'ã chupe reta cua jei uyapota vae, Abraham uyapo mboroyocui jei vae ramo - jaenyo umee chupe reta Abraham ipurugüirovia rupi umbujupi ramo. ¹⁴Echa'ã Tumpa umee yave mona ivi mboroyocui jei vae uyapo vae reta pe mboroyocui jei vae uyapo reta ramo, jae reta mbaetita têi mbaerã mburugüirovia güinoi vaerã, jare mbaetita têi mbaerã vi co Tumpa jei uyapota vae. ¹⁵Echa'ã mboroyocui uicuaaca quirãi Tumpa uiporaracata jei vae uyapo'ã vae reta pe. Ërei mbaeti yave mboroyocui, mbaetita têi co quía uyavi mboroyocui.

¹⁶Jáeramo jei uyapota vae mburugüirovia pegua co, Tumpa umee vaerã jei uyapota vae ipiacavi rupi, jare opaete Abraham iñemoñaa reta añetete güinoi vaerã. Cua reta co opaete Abraham güinoi vae nunga mburugüirovia güinoi vae reta - mboroyocui jei vae uyapo vae retaño'ã co. Echa'ã Abraham co jae opaete yanderu rami Tumpa jovai. ¹⁷Echa'ã jae vi güirovia Tumpa. Echa'ã Tumpa iñee pe uyecuatía oĩ cuarãi: "Che nduyapo jeta vae reta tu rami" —jei Tumpa. Jucuarãi uyecuatía oĩ. Echa'ã Tumpa umee tecove umanocue vae reta pe, jare uyeyapota co mbaembæ ndeïno uyeyapo vae.

¹⁸Yepe têi mbaeti echa mbaerã Abraham uâro vaerã, Ërei jecuaeño güirovia Tumpa jare uâro uyerovia reve. Jáeramo uyeyapo jeta vae reta tu rami. Echa'ã Tumpajei ma chupe cuarãi: "Ndiyeyapota jeta vae reta tu rami." Jucuarãi jei. ¹⁹Cien año seri ma güinoi yave, Abraham uicuaa ma jae jete pe umanota ma co. Uicuaa vi Sara ucuacuua ete ma co jare jáeramo ndarau ma echa imembi. Ërei jecuaeño güinoi mburugüirovia Tumpa coti. ²⁰Umicani'ã etei ipurugüirovia. Jecuaeño güirovia Tumpa uyapota co jei chupe vae. Jáeramo ipurugüirovia umimirâta, jare cua jeco pegua umbiadora Tumpa. ²¹Echa'ã jae uicuaa catu Tumpa ipureco uyapo opaete jei vae. ²²Jáeramo Tumpa umbujupi ipurugüirovia rupi. ²³Jare cua Tumpa umbujupi ipurugüirovia rupi vae uyecuatía'ã Abraham reño. ²⁴Echa'ã uyecuatía vi

yanderé. Echa'ā Tumpa yanembujupi yandepurugüirovia rupi, yande yarovia yave jese - umbijecove ye yandeYa Jesús güeru umanocue vae reta ipite güi vae re.²⁵ YandeYa Jesús uñemee umano vaerā yanembaeyoa reta re, jare icove ye ou umanocue vae reta ipite güi uicuaaca vaerā yayembujupica ma co.

5

Yembujupi rupi ñanoi vae

¹ Tumpa yanembujupi ma yandepurugüirovia rupi. Jáeramo ñanoi ma mbiacatu Tumpa ndive yandeYa Jesucristo rupi. ² Jae ramíño vi yaya ma Tumpa re Jesucristo rupi yandepurugüirovia rupi, Tumpa ipiacavi vaerā yandeve. Ñañemimiräta ma Tumpa ipiacavi re, jare ñaāro ñaī yayerovia reve Tumpa ndive yaico vaerā jae uyembidadoraca yave. ³ Jare cuao'ā co, Jae ramíño vi yayerovia yaiporara yave. Echa'ā yaicuaa quirāi yaiporara yave, Tumpa umee yandeve yandepiaguasu vaerā. ⁴ Jare yandepiaguasu yave, yaicuaa ñanepiräta ma co. Jare yaicuaa yave ñanepiräta ma co, ñaāro yayerovia reve. ⁵ Jare ñaāro yave yayerovia reve, ndarau yandetavi. Echa'ā Tumpa uicuaaca ma yandeve yandepia pe ipuruau Espíritu Santo jae umee yandeve vae rupi.

⁶ Echa'ā yande yandepuere'ā etei yayembiasa. Ërei Cristo umano iyoa vae reta re ara ou ma uvāe yave umano vaerā. ⁷ Añete co, ndarau ndipo quía uipota umano penti jupi vae ipepica pe. Ërei aramoi quía iquiréita umano penti ipiacavi vae ipepica pe. ⁸ Ërei Tumpa uicuaaca ma ipuruau yandecoti. Echa'ā yepe tēi yande co jae iyoa vae reta, Ërei Cristo umano yanderé. ⁹ Jare Tumpa jeta eteta uyapo yandeve. Echa'ā Tumpa yanembujupi ma Cristo imano rupi. Jáeramo Cristo uyapo vae rupi Tumpa ndarau uiporaraca yandeve. ¹⁰ Echa'ā yepe tēi yande yayovaichose Tumpa ndive, Ërei añave yayembipiåcatuca ma Tumpa ndive Tai imano rupi. Jare Tumpa jeta eteta uyapo yandeve. Echa'ā yayembipiåcatuca ma Tumpa ndive ramo, yaicuaa catu yayembiasacata co Tai icove ye ramo. ¹¹ Jare cuao'ā co. Jae ramíño vi yayerovia Tumpa re yandeYa Jesucristo rupi. Echa'ā Cristo rupi yayembipiåcatuca ma Tumpa ndive.

Adán jare Cristo

¹² Jare mbaeyoa uique cua ïvi pe penti cuimbae rupi. Jare mano uique mbaeyoa rupi. Jáeramo mano ou opaete vae pe. Echa'ā opaete vae iyoa. ¹³ Jare ndei Tumpa uicuaaca Moisés iporoyocui mbove, imeño mai mbaeyoa ïvi pe. Ërei mbaeti mboroyocui yave, yandepuere'ā etei quía yambijeco uyaví ramo. ¹⁴ Ërei opaete vae umano Adán güiive Moisés ico regua, yepe tēi ïru vae reta iyoa'ā Adán iyoa ramí. Jare Adán uyemijaanga Cristo re, jae co outa vae.

¹⁵ Ërei yandepuere'ā yamboyovaque Adán imbaeyoa Tumpa umee yandeve vae ndive. Echa'ā penti cuimbae iyoa ramo, jeta vae umano. Ërei Tumpa umee yandeve ipiacavi rupi vae tuicha ete co cua güi. Echa'ā Tumpa umee ma ipiacavi jeta vae pe penti cuimbae rupi - jae co Jesucristo. ¹⁶ Yandepuere'ā yamboyovaque jocua penti cuimbae imbaeyoa Tumpa umee yandeve vae ndive. Echa'ā jocua penti mbaeyoa jeco pegua Tumpa uña jare umbijeco opaete vae. Ërei Tumpa umee yandeve vae rupi yayembujupica ma, yepe tēi jeta mbaeyoa reta yayapo. ¹⁷ Echa'ā mano güïnoi mbaepuere opaete vae re jocua penti cuimbae imbaeyoa jeco pegua. Ërei Tumpa imbaepuere tuicha ete co cua güi. Echa'ā umee ma yandeve ipiacavi yayembujupica vaerā, tecove imbaepuere ñanoi vaerā penti cuimbae rupi - jae co Jesucristo.

¹⁸ Jáeramo penti cuimbae imbaeyoa jeco pegua Tumpa umbijeco opaete vae. Jae ramíño vi penti cuimbae jupi vae uyapo vae jeco pegua Tumpa ipuere umbujupi opaete vae tecove opa mbae vae güïnoi reta vaerā. ¹⁹ Pentí cuimbae Tumpa jei vae uyapo'ā ramo, jeta vae uyeyapo iyoa vae retarā. Jae ramíño vi penti cuimbae Tumpa jei vae uyapo ramo, Tumpa umbujupita jeta vae.

²⁰ Jare Tumpa uicuaaca mboroyocui, mbaeyoa uyecuaa cavi vaerā. Ërei uyecuaa yave jeta co mbaeyoa reta, uyecuaa vi tuicha ete co Tumpa ipiacavi. ²¹ Echa'ā mbaeyoa jecuaeño güïnoi mbaepuere opaete vae re. Echa'ā opaete vae umano. Jae ramíño vi Tumpa ipiacavi güïnoi mbaepuere yanembujupi vaerā, jare jucuarāi umee vaerā yandeve tecove opa mbae vae yandeYa Jesucristo rupi.

6

Ñamano ma mbaeyoa güi

¹⁻² Jáeramo icavi'ā etei yandepia pe

yayeminguela vaerā cuarāi: "Icavi co yayapo vaerā mbaeyoa uyecuaa vaerā tuicha ete co Tumpa ipiacavi." Yande ñamano ma co mbaeyoa güi. Jáeramo icavi'ā etei jecuaeño mbaeyoa yayapo vaerā. ³ Picuua co quirāi opaete yande yayembibautizaca pentiño Cristo Jesús ndive ñaī vaerā vae ñamano jae ndive yayembibautizaca yave. ⁴ Jáeramo yayembibautizaca yave, ñañeñotica Cristo ndive ñamano ramo. Ërei Tumpa umbijecove ye Cristo güeru umanocue vae reta ipite güi imbaepuere rupi. Jae ramíño vi Tumpa umee ma yandeve tecove ipiau vae.

⁵ Echa'ã Tumpa yandeapo pentiño Cristo ndive Cristo imano re. Jae ramiño vi Tumpa yanembijecove yeta yandereru umanocue vae reta ipite güi, umbijecove ye Cristo güeru umanocue vae reta ipite güi rami. ⁶ Yaicuaa quiräi yanderecove indechicue umano curusu re Cristo ndive, agüiye vaerä mbaeyoa yanderete pe of vae mbaepuere güinoi yanderé, agüiye vaerä jecuaeño yayapo mbaeyoa. ⁷ Echa'ã umanocue vae ipuere'ã ma uyapo mbaeyoa. ⁸ Yande ñamano Cristo ndive ramo, yarovia yaicoveta vi co jae ndive. ⁹ Echa'ã yaicuaa quiräi Tumpa umbijecove ye Cristo güeru umanocue vae reta ipite güi. Jáeramo Cristo ndarau umano ye. Echa'ã mano ipuere'ã ma jese. ¹⁰ Echa'ã Cristo umano yave, penti veseño umano mbaeyoa jeco pegua. Ërei añave icoño mai. Jecuaeño ico pentiño Tumpa ndive. ¹¹ Jae ramiño vi pe reta perovia quiräi pemano ma co mbaeyoa güi, jare pico Tumpa pe piyeyocui vaerä yandeYa Cristo Jesús rupi.

¹² Jáeramo agüiye pemaeño mbaeyoa re güinoi vaerä mbaepuere perete re. Agüiye piyapo mbaeyoa perete uipota uyapo vae. ¹³ Agüiye vi pemee perete mbaeyoa uyapo vaerä. Echa'ã jucuaräi yave, perete uyapota icavi mbae vae. Ërei piñemee Tumpa pe. Echa'ã pe reta co jae umanocue vae tecove ipiau vae güinoi vae reta rami. Jáeramo pemee perete Tumpa pe. Echa'ã jucuaräi yave, perete uyapota icavi vae. ¹⁴ Echa'ã mbaeyoa ndarau güinoi mbaepuere peré. Echa'ã pico'ã mboroyocui jei vae re. Pico ma ñee mbiacavi pegua re.

Yaico jupi vae rupi

¹⁵ Jáeramo icavi'ã etei yandepia pe yayeminguela vaerä cuaräi: "Yayapo mbaeyoa, yaico'ã mboroyocui jei vae re ramo jare yaico ñee mbiacavi pegua re ramo." ¹⁶ Piñemee yave quía pe piyeyocui chupe vaerä, pe reta co jae jembiocui reta. Jecuaeño mbaeyoa piyapo yave, pemanota co. Ërei piyapo yave Tumpa jei vae, picota jupi vae rupi. ¿Picuaal'ã pa cua? ¹⁷ Jecuaeño piyapose mbaeyoa. Ërei amee yasurupai Tumpa pe piyapo ma Tumpa jei vae perovia reve jocua moromboe uñemee peve vae. ¹⁸ Jáeramo piyerova ma mbaeyoa güi, jare piyeyocui ma Tumpa pe pico vaerä jupi vae rupi. ¹⁹ (Chemiari aí peve cuaräi amijaanga reve, pepuere'ã picuua cavi cua mbaembæ ramo.) Tenonde yave pemee perete piyapo vaerä mbaeyoa, piyapo vaerä pichii vae jare jupi mbae vae. Ërei añave pemee perete Tumpa pe pico vaerä jupi vae rupi, perete uñeñono tee vaerä Tumpa peguarä.

²⁰ Echa'ã jecuaeño mbaeyoa piyapose yave, piyeyocui'ã Tumpa pe pico vaerä jupi vae rupi. ²¹ Mbaeti etei mbae icavi vae piyapo jocua ara reta pe. Echa'ã añave pemara jocua mbaembæ piyapose vae re. Echa'ã jocua mbaembæ mano pegua co. ²² Ërei añave piyapo'ã ma mbaeyoa. Piyeyocui ma Tumpa pe. Jáeramo añave piyapo icavi vae. Echa'ã perete uñeñono tee oí Tumpa peguarä. Jare perecove opa yave cua ivi pe, penoita tecove opa mbae vae. ²³ Echa'ã mbaeyoa uyapo vae umanota co. Ërei regalo Tumpa umee yandeve yandeYa Cristo Jesús rupi vae tecove opa mbae vae co.

7

Menda re umijaanga vae

¹ Cherivi reta, pe reta picuua co mboroyocui jei vae. Jare picuua co quiräi mboroyocui güinoi mbaepuere penti vae re jae ico rambueveño. ² Echa'ã mboroyocui jei cuña umenda vae penti ramiño co ime ndive, ime ico rambueve. Ërei ime umano chugüi yave, cuña uyeyora ma jocua mboroyocui ime regua güi. ³ Jáeramo cuña imega yave ime tenondegua vae ico rambueve, cuña uyuvanga menda re. Ërei ime umano ma yave, cuña uyeyora ma jocua mboroyocui ime regua güi. Jayave umenda yave íru cuimbae ndive, uyuvanga'ã menda re.

⁴ Jae ramiño vi, cherivi reta, pe reta piyeyora mboroyocui güi Cristo imano rupi, pico vaerä Cristo re. Afiete co, pico ma Tumpa umbijecove ye güeru umanocue vae reta ipite güi vae re, piyapo vaerä icavi vae, Tumpa uyembijadorac vaerä. ⁵ Echa'ã yaico yave yande yae vae reñio, yaipota yayapo mbaeyoa, mboroyocui jei agüiye vaerä yayapo ramo. Jare cua mbaeyoa uparavíqu yanderete pe ñamano vaerä. ⁶ Ërei añave yayeyora ma mboroyocui güi. Echa'ã yayeyora ma yandecouise vae güi. Jáeramo yandepuere yayeyocui Tumpa pe tecove ipiau vae rupi Espíritu umee yandeve vae rupi. Yayeyocui'ã ma chupe mboroyocui indechi vae jei vae re.

Mbaeyoa ico chepia pe vae

⁷ Yandepuere'ã etei yae icavi mbae vae co mboroyocui. Mboroyocui umimbeu'ã yave cheve mbaeyoa regua, ndarau tēi aicuaa jesegua. Echa'ã ndarau tēi aicuaa aipota íru vae reta imbaembæ yave cheyoa co vae, mboroyocui jei'ã yave: "Agüiye ipota íru vae reta imbaembæ." ⁸ Ërei mboroyocui jei agüiye vaerä ayapo ramo, mbaeyoa jeite uparavíqu chepia pe che aipota vaerä íru vae reta imbaembæ. Echa'ã mbaeti yave mboroyocui, aicuaa'ã co cheyoa. ⁹ Tenonde yave aicuaa'ã mboroyocui jei vae yave, che aico penti icove catu vae rami. Ërei aicuaa yave mboroyocui jei vae, aicuaa vi cheyoa co mboroyocui jei

vae ayavi ramo, jare aicuaa vi amanota co. ¹⁰⁻¹¹Chepia pe ayemingueta tēi mboroyocui umeeta cheve tecove. Êrei chetavi. Echa'ã cheyoa yave, mboroyocui uicuaaca cheve amanota co.

¹² Êrei mboroyocui mbaeyoa pegua'ã co, jare mboroyocui jei vae iyoa mbae vae pegua jare jupi vae pegua jare icavi vae pegua co. ¹³Jocua icavi vae pegua uyeyapo'ã etei cheve mano peguarã. Mbaeyoa mano pegua co. Jare jucuarãi uyecuaa mbaeyoa. Jocua icavi vae pegua uicuaaca cheve amanota co cheyoa ramo. Jare jucuarãi mboroyocui uicuaaca mbaeyoa icavi mbae ete co.

¹⁴ Echa'ã yaicuaa Espíritu Santo umee mboroyocui. Êrei che aico che jae vae reño. Añemee ayapo vaerã mbaeyoa. ¹⁵Aicuaa'ã maera ra ayapo curaãi. Echa'ã ayapo'ã chequiréi tēi ayapo vae. Êrei ayapo cheatéi tēi ayapo vae. ¹⁶Jáeramo aicuaa mboroyocui icavi vae pegua co. Echa'ã ayapo cheatéi tēi ayapo vae. ¹⁷Jáeramo icavi mbae vae uyapo vae che'ã co. Icavi mbae vae uyapo vae co jae mbaeyoa chepia pe ico vae. ¹⁸Che aico che jae vae reño. Jáeramo aicuaa mbaeti co mbae icavi vae anoi chiyee. Echa'ã chequiréi tēi ayapo icavi vae, ërei chepuere'ã ayapo. ¹⁹Ayapo'ã icavi vae chequiréi tēi ayapo vae. Êrei jecuae ayapo icavi mbae vae cheatéi tēi ayapo vae. ²⁰Jáeramo icavi mbae vae uyapo vae che'ã co. Icavi mbae vae uyapo vae co jae mbaeyoa chepia pe ico vae. Echa'ã ayapo cheatéi tēi ayapo vae.

²¹ Uyeyapo cheve cu: Icavi vae chequiréi tēi ayapo yave, jecuaeño ayapo icavi mbae vae. ²²Aicuaa chepia pe icavi co Tumpa iporoyocui. ²³Êrei che jae vae reño aico ramo, jecuaeño uyecuaa cheve chequiréi tēi chepia pe ayapo vae ndive oyovaicho vae. Jae co mbaeyoa ayapo vae. Cua mbaeyoa güinõi mbaepuere cheré.

²⁴Chepiatiti ete. ¿Quía ra umeeta cheve mbaepuere agüiye vaerã ayapo mbaeyoa? Echa'ã mbaeyoa mano pegua co. ²⁵Jaeño Tumpa, yande Ya Jesucristo rupi. Yasurupai amee Tumpa pe. Jayave chequiréi reve chepia pe ayemingueta ayapo vaerã Tumpa iporoyocui jei vae. Êrei che jae vae reño aico ramo, jecuaeño ayapo mbaeyoa.

8

Ñanoi tecove opa mbae vae Espíritu Santo rupi

¹Jáeramo Tumpa ndarau etei umbijeco Cristo Jesús re güirovia vae reta. ²Echa'ã Espíritu Santo uparavíqui ma, anoi vaerã tecove opa mbae vae Cristo Jesús re arovia ramo. Jáeramo ayeyora ma mbaeyoa imbaepuere güi. Echa'ã mbaeyoa ayapo ramo amanota tēi. ³Moisés iporoyocui ipuere'ã yanembori, yandepuere'ã yayapo mboroyocui jei vae ramo. Jáeramo Tumpa yanembori. Echa'ã ombou Tai etei cuá ivi pe. Tai uyeyapo penti cuimbaerã. Yope tēi opaete ivi pegua reta iyoa, jae iyoa'ã co. Ou umano vaerã yanembaya re. Umiamiri mbaeyoa, agüiye vaerã mbaeyoa güinõi mbaepuere yanderé. ⁴Cristo cua uyapo, Tumpa yanembujipi vaerã. Echa'ã mboroyocui jeise yayapo vaerã jupi vae. Echa'ã yaico'ã ma yande yae vae reño. Yaico ma co Espíritu Santo jei vae re.

⁵Jei vae reño yugüireco vae reta ipia pe uyemingueta mbaembae jete uipota vae reño. Êrei Espíritu Santo jei vae re yugüireco vae ipia pe uyemingueta Espíritu Santo uipota vae re. ⁶Echa'ã mbaembae jete uipota vae reño ipia pe uyemingueta vae reta umanota co. Êrei Espíritu Santo uipota vae re ipia pe uyemingueta vae reta güinõi tecove opa mbae vae jare mbiacatu. ⁷Echa'ã mbaembae jete uipota vae reño ipia pe uyemingueta vae reta oyovaicho Tumpa ndive. Echa'ã ñatéi reta uyapo Tumpa iporoyocui. Ipuere'ã etei uyapo Tumpa iporoyocui. ⁸Jáeramo jei vae reño yugüireco vae reta ipuere'ã uyapo Tumpa uipota uyapo vaerã vae.

⁹Êrei pe reta pico'ã ma pipota vae reño. Pico Espíritu Santo jei vae re. Echa'ã Tumpa iEspíritu ico pepia pe. Echa'ã Cristo iEspíritu mbaeti güinõi vae Cristo imbae'ã co. ¹⁰Êrei Cristo ico pepia pe. Jáeramo Espíritu Santo umee peve tecove opa mbae vae, yope tēi perete umanota co mbaeyoa jecó pegua. Echa'ã Tumpa pembujipi ma. ¹¹Tumpa umbijecove ye Jesús güeru umanocue vae reta ipite güi. Jare Tumpa iEspíritu ico pepia pe. Jáeramo Tumpa umbijecove catutá co perete umanota vae iEspíritu ico pepia pe vae rupi. Echa'ã umbijecove ye Cristo Jesús güeru umanocue vae reta ipite güi.

¹²Jáeramo, cherivi reta, yandepuere'ã ma yayapo yanderete pe yayapose vae. ¹³Echa'ã ime yave quía jei vae reño ico vae, umanota co. Êrei Espíritu imbaepuere rupi pepuere peeyaa piyugüi perete uipota vae. Jare jucuarãi yave, picoñotai co.

¹⁴Echa'ã opaete Espíritu Santo jei vae re yugüireco vae reta Tumpa tai reta co. ¹⁵Echa'ã Tumpa umee peve iEspíritu piyeyapo vaerã Tumpa tai retardá. Peapo'ã co uyeyocui vae uquiyé ipatrón güi vae reta rami. Jáeramo Espíritu Santo yanembori yandepuere vaerã yae: "CheRu." ¹⁶Jare Espíritu Santo etei uicuaaca yandevé yande co jae Tumpa tai reta. ¹⁷Jare yande co jae Tumpa tai reta ramo, ñanoita vi yanembauerã Tumpa umeeta yandevé vae. Ñanoita co yanembauerã Cristo ndive. Echa'ã yaiporara ñaí Cristo uiporara rami. Jáeramo Tumpa yanembutuichacata Cristo ndive.

¹⁸Añave yaiporara ñaí. Êrei arovia cua yaiporara ñaí vae mbae'ã co. Echa'ã icavi eteta co yandevé jocua ndeíño uyecuaa vae Tumpa umeeta yandevé vae. ¹⁹Echa'ã opaete Tumpa uyapo vae uáro oí

íquiréi ete reve Tumpa umbutuichaca vaerā tai reta. ²⁰ Tumpa uyapo opaete mbaembæc icavi ete. Êrei opaete uyapo vae icumegua ma, yepe tēi mbaembæc etei uyapo'ā mbae icumegua vaerā. Echa'ā Tumpa umaeño icumegua vaerā Adán iyoa ramo. Êrei ndarau jecuaeño mbaembæc icumegua. ²¹ Echa'ā Tumpa uepita tai reta opaete mbae icavi mbae vae güi, umbutuichaca reta yave. Jae ramiño vi Tumpa uepita uyapo vae etei, agüiye vaerā jecuaeño icumegua. ²² Echa'ā yaicuac co quirai iyipí güive jare jecuae añave opaete Tumpa uyapo vae uiporara oī penti cuña imembí oata vae uiporara oī rami. ²³ Jae ramiño vi yande yaiporara ñaï yandepia pe, yepe tēi ñanoí ma Espíritu Santo - echá'ā Espíritu Santo rani Tumpa umee yandeve. Echa'ā ñaïr ñaï Tumpa uicuacaa vaerā opaete pe yande co jae Tumpa tai reta. Cua uyeyapo yave, Tumpa uipecicata yanderete añave ñanoí vae, yanderete ipiau vaerā. ²⁴ Echa'ā yayembiasaca yave, yambipi ñaïr yayerovia reve. Êrei Tumpa uepi yanderete yave, ndarau ma ñaïr tēi. Echa'ā ime yave quía mbae uáro vae, jocua güinoí ma yave, uáro'ā ma. ²⁵ Êrei ñaïr ñaï mbae ndeiño ñanoí vae. Jáeramo ñaïr ñaï yandepiaguasreve.

²⁶ Jae ramiño vi Espíritu Santo yanembori, ñanepirata'ā ramo. Yayerureta tēi co Tumpa pe mbae re. Êrei yaicuac'ā mbae re yayerure vaerā chupe. Amo pe yaicuac'ā mbae yae vaerā. Êrei jeseve Espíritu Santo etei uyerure Tumpa pe yanderé. ²⁷ Tumpa uicuacaa opaete vae ipia pe oī vae, jare uicuacaa vi Espíritu Santo ipiyemingueta. Echa'ā Espíritu Santo uyerure Tumpa pe yanderé Tumpa jei vae rupi. Yande co jae uñenono tee Tumpa peguará vae reta.

Opaete mbaembæc ñamiamirita

²⁸ Jare yaicuac co quirai opaete uyeyapo vae rupi Tumpa yanembori oī icavi vaerā yandeve, yande yaau Tumpa ramo. Echa'ā Tumpa jei vae rupi yandeparavo. ²⁹ Echa'ā iyipí güive Tumpa yandecuacaa. Jae ramiño vi iyipí güive Tumpa yandeparavo yande yayeyapo vaerā Tai rami, jare Tai ico vaerā tenondeguará opaete Tumpa tai reta ndive. ³⁰ Jae ramiño vi Tumpa ñanereni, iyipí güive yandeparavo ramo. Jae ramiño vi Tumpa yanembujupi, ñanereni ramo. Jae ramiño vi yanembutuichacata co, yanembujupi ramo.

³¹ Jare cua yaicuac ramo, yaicuac vi cua: Tumpa yanembori ramo, mbaeti quía ipuere ñanemiamiri. ³² Tumpa ñatéi'ā umee yandeve Tai. Echa'ā umee co, jae umano vaerā yanderé. Jáeramo Tumpa umeeta co yandeve opaete mbaembæc. Echa'ā umee yandeve Tai. ³³ Mbaeti quía ipuere yanembijeco mbae re. Echa'ā yande co jae Tumpa uiparavo vae reta, jare Tumpa yanembujupi ma. ³⁴ Mbaeti quía ipuere yanembijeco yanembæyoa reta re. Echa'ā Cristo umano yanembæyoa reta re, jare icove ye ou umanocue vae reta ipite güi, jare añave ime oī Tumpa iyacata coti. Jae etei uyerure Tumpa pe yanderé. ³⁵ Cristo yanderau, jare ndarau quía ipuere yanembisiri Cristo güi. Aramoi yaiporarata, ani yavaita co yandeve yaico vaerā, ani iru vae reta uyapota icavi mbae vae yandeve, ani caruai outa yandeve. Aramoi ndarau ñanoí corepoti yanderemimonderá yagua vaerā. Aramoi iru vae reta iquiréita yandeyuca. Aramoi yepe yandeyucata. Êrei jecuaeño Cristo yanderauta. ³⁶ Echa'ā Tumpa iñee pe uycuacatia oī curaái:

"Cristo re yarovia ramo, opa ara rupi iru vae reta ñanemiataréi ipia pe.

Umae yanderé ovecha reta uyeyucacata vae re umae vae rami."

Jucuarái uycuacatia oī. ³⁷ Êrei yepe tēi opaete cua uyeyapo yandeve, êrei jecuae ñamiamirita opaete yayerovia reve Cristo imbaepuere rupi. Echa'ā jae yanderau. ³⁸ Che aicuac catu Tumpa yanderau co, jare ndarau quía ipuere yanembisiri Tumpa güi. Aramoi ñamanota, ani aramoi jecuaeño yaicota. Êrei jeseve Tumpa yanderauta. Ángel reta jare mburuvicha ara pegua reta ndarau ipuere yanembisiri Tumpa güi. Opaete añave uyeyapo oī vae jare opaete uyeyapota vae ndarau ipuere yanembisiri Tumpa güi. ³⁹ Ipotave ivate oī vae, jare ipotave ívígüi pe oī vae, jare ipotave iru mbae Tumpa uyapo vae yepe ndarau ipuere yanembisiri Tumpa güi. Jecuaeño Tumpa yanderau. Echa'ā uicuacaa yandeve ipuruau yande Ya Cristo Jesús rupi.

Tumpa uiparavo Israel pegua reta

¹ Che co jae Cristo imbae. Cua che jae vae añete vae co. Cheapu'ā co. Espíritu Santo ico chepia pe. Jáeramo aicuac catu cua che jae vae añete vae co. ² Jecuaeño chepiatiti. ³ Echa'ā aipota tēi ayembisiri vaerā Cristo güi penti yepipeyu oa jese vae rami, jucuarái yave chepuere amborí cheriví reta. Jae reta co cherentaihua reta. ⁴ Jae reta co Israel pegua reta. Uyeyapo reta Tumpa tai retarā. Tumpa uechaca imbaepuere jae reta jovaque. Tumpa umee chupe reta itrato reta, jare uicuacaa vi chupe reta Moisés iporoyoci. Jae reta uyeyocui Tumpa pe Tumpa jo pe. Tumpa umimbeu chupe reta uyapota chupe reta vae. ⁵ Jae reta co Israel pegua reta itenondegu reta iñemoñaa reta, jare chugüi reta Cristo ou uyeyapo cuimbaerā. Cristo co jae Tumpa etei. Jae co opaete mbaembæc iYa. Tuyembiadoraca jaeño mai pegua. Amén.

⁶ Cua uipota'ā jei Tumpa uyapo'ā jae jei uyapota vae. Echa'ā mbaeti co opaete Israel iñemoñaa reta Israel pegua añetete vae reta. ⁷ Jae ramíño vi mbaeti co opaete Abraham ifñemoñaa reta Abraham tai añetete vae reta. Echa'ā Tumpa jei Abraham pe cuarāi: "Isaac iñemoñaa retaño co jae niñemoñaa añetete vae reta." Jucuarāi jei. ⁸ Cua uipota jei jocua uñemoña cuimbae jei vae jeco peguaño vae reta Tumpa tai reta'ā co. Jaeño Tumpa jei vae rupi uñemoña vae reta co jae iñemoñaa añetete vae reta. ⁹ Echa'ā Tumpa jei Abraham pe. Jei chupe cuarāi: "Íru año re cuarāi yave ayu yeta, jare Sara imembita co." Jucuarāi jei.

¹⁰ Jare cua mbaeti co opaete Tumpa jei vae. Echa'ā Tumpa imiari Rebeca pe jae imembita yave. Jocua imembi reta tu co jae yandetenondegua Isaac. ¹¹⁻¹² Jare Tumpa imiari Rebeca pe yave, ndeñio oa choguaquiri reta. Jáeramo ndeñio uyapo icavi vae jare icavi mbae vae. Êrei Tumpa jei Rebeca pe cuarāi: "Tenondegua vae uyeyocuita co taicuegua vae pe." Jucuarāi jei. Jare cua uicuaaca yandeve quirāi Tumpa uiparavo jae jei vae rupi. Tumpa uiparavo'ā mbae ipotave vae uyapo vae jeco pegua. Tumpa uiparavo jae etei uipota ramo. ¹³ Echa'ā Tumpa iñee pe uyecuatía oī cuarāi: "Aiparavo Jacob. Aiparavo'ā Esaú" —jei Tumpa. Jucuarāi uyecuatía oī.

¹⁴ Jare Tumpa uyapo'ā etei jupi mbae vae jucuarāi jei ramo. ¹⁵ Echa'ā Tumpa jei Moisés pe cuarāi: "Aipararecota co chequirēi aiparareco vae. Jare chepiacavita co chequirēi chepiacavi chupe vae pe." Jucuarāi jei. ¹⁶ Jáeramo ñanoí mburuparareco Tumpa güi, Tumpa etei iquirēi yandeparareco ramo, yandeñio'ā ñanequirēi ramo, jare mbaeti vi mbae yande yayapo vae jeco pegua. ¹⁷ Echa'ā Tumpa iñee pe uyecuatía oī vae pe yamingueta quirāi Tumpa jei Egípto pegua reta juvicha guasu pe cuarāi: "Cuarā etei che nduparavo mburuvicha guasurā, aicuaaca vaerā chembaepuere nderovaque, opaete ivi pegua reta pe chererācua vaerā." Jucuarāi jei. ¹⁸ Jáeramo Tumpa uiparareco iquirēi uiparareco vae. Jae ramíño vi umipiñatanta iquirēi umipiñatanta vae.

¹⁹ Jáeramo aramoí quíá upiranduta cheve: "Jucuarāi yave, ¿maera pa Tumpa yanembijeco? Echa'ā mbaeti quíá ipuere oyopia Tumpa jei vae." ²⁰ Aguiye ere jucuarāi. Echa'ā nde co jae penti ivi peguaño. Icavi'ā etei niñeeengata vaerā Tumpa pe. Iru ipuere'ā etei uñeeengata iyapoa pe. Ipuere'ā jei: "¿Maera pa nde cheapo cuarāi?" ²¹ Ñaeu uyapo vae ipuere uyapo ñaeu güi jae uipota vae rupi. Iyapoaño ipuere uyapo penti mbae ipóra vae jare íru mbae ipóra mbae vae.

²² Tumpa pochí co oī uyembaita oī vae reta pe. Êrei umiguanta chupe reta ipiaguasu ete reve, yepe tēi iquirēi uicuaaca quirāi pochí chupe reta jare quirāi uicuaacata chupe reta imbaepuere. ²³ Cua Tumpa uyapo, uicuaaca vaerā quirāi umbutuichacata co uiparareco vae reta. Echa'ā iyipí güive Tumpa uiparavo cua reta umbutuichacata vaerā. ²⁴ Cua reta co jae yande reta. Echa'ā Tumpa yandeparavo. Yande co jae judío reta jare judío mbae vae reta. ²⁵ Echa'ā Tumpa jei Oseas uicuatía vae pe cuarāi: "Tenonde yave chembae'ā vae reta uyeyapota co chembae retarā, jare tenonde yave aau'ā vae reta añave aauta co.

²⁶ Tenonde yave che jae peve: 'Pe reta chembae'ā co.' Êrei jocua che jae vae pe etei che jaeta peve: Pe reta co jae cherāi reta. Che co jae Tumpa icove vae." Jucuarāi jei. ²⁷ Jare Isaías jei iñeeata reve Israel pegua reta re: "Yepe tēi jeta ete Israel iñemoñaa reta jeta ete ivicuiti i guasu jembeí pe oī vae rami, ërei imbovíño Tumpa umbiasata. ²⁸ Echa'ā yandeYa opa voita uyapo cua ivi pe jei uyapota vae." Jucuarāi jei. ²⁹ Echa'ā tenonde yave Isaías jei cuarāi: "YandeYa co jae opaete vae iYa. Jae umbiasa amocue ñanerentaihua reta. Jucuarāi'ā yave uyapo, uyeyapota tēi yandeve Sodoma jare Gomorra pe uyeyapo vae rami." Jucuarāi jei.

Yembujupi Tumpa umee mburugüirovia re vae

³⁰ Jáeramo yandepuere yae cua: Judío mbae vae reta, yepe tēi ueca'āse uyembujupica vaerā, añave uyembujupica ma co. Uyembujupica ma co, mburugüirovia güinoí ramo. ³¹ Êrei Israel pegua reta uipota tēi uyembujupica mboroyocui jei vae re uyapo vae rupi. Êrei ipuere'ā uyapo mboroyocui jei vae. ³² ¿Maera ra uyembujupica'ā? Uipota'ā uyembujupica mburugüirovia rupi ramo. Echa'ā uipota tēi uyembujupica mboroyocui jei vae re uyapo vae rupi. Jáeramo Cristo umbiavai chupe reta penti ita re jae reta ipísayeyuca jese vae rami co. ³³ Echa'ā Tumpa iñee pe uyecuatía oī cuarāi: "Che añono judío reta ipite pe penti vae" —jei Tumpa—.

"Jae co penti ita ipísayeyuca jese vae rami. Ipísapaa reta jocua ita re.

Êrei güirovia jese vae cuarāi jeita: 'Icaviño arovia jese.' "

Jucuarāi uyecuatía oī.

uyembujupi. Umaeñō'ā Tumpa re umbujupi vaerā. ⁴ Echa'ā Cristo opa ma umbai Moisés iporoyocu. Mbaeti ma quía ipuere uyembujupica mboroyocui jei vae re uyapo vae rupi. Opaete Cristo re güirovia vae reta uyembujupica co.

⁵ Echa'ā Moisés uicuatía jocua uipota uyembujupica mboroyocui jei vae re uyapo vae rupi vae re cuarāi: "Ime yave quía jocua mbaembae uyapo vae, güinoita tecove opa mbae vae uyapo ramo." Jucuarāi uicuatía. ⁶ Érei uyembujupica mburugüirovia rupi vae re Tumpa jei cuarāi: "Agüiye ndepia pe iyemingueta: ¿Quía ra oota ara pe güero vaerā cua ivi pe Cristo?" ⁷ Agüiye vi ere: "¿Quía ra ugüeyita güero vaerā Cristo umanocue vae reta ipite güii?" Jucuarāi jei. ⁸ Jare Tumpa jei vi cuarāi: "Chiñee coño oí ndegüi. Ndepuere ndiyeminguela jese, jare ndepuere ndepia pe ndiyeminguela jese." Jucuarāi jei. Jae co ñee numimbeu vae. Echa'ā numimbeu íru vae reta pe jae reta güirovia vaerā. ⁹ Nde ndere yave: "Jesús co jae cheYa", jare nderovia yave ndepia pe Tumpa umbijecove ye co Jesús güero umanocue vae reta ipite güii, ndiyembiasacata co. ¹⁰ Echa'ā ndepia pe nderovia yave, ndiyembujupica co, jare ndere yave: "Jesús co jae cheYa", ndiyembiasacata co.

¹¹ Echa'ā Tumpa iñee pe uyecuatía oí cuarāi: "Güirovia jese vae cuarāi jeita: 'Icaviño arovia jese.' " Jucuarāi uyecuatía oí. ¹² Echa'ā judío jare judío mbae vae uyuaví'ā uyugüi. Echa'ā yandeYa co jae opaete vae iYa, jare tuicha ete uyecuua yandeve imbaepuere yayerure chupe mbae re yave. ¹³ Echa'ā uyerure yandeYa pe umbiasa vaerā vae uyembiasacata co. ¹⁴ Érei ndarau quía uyerure yandeYa pe umbiasa vaerā, güirovia'ā yave jese. Jare ndarau güirovia jese, uyandu'ā yave jesegua. Jare ndarau uyandu jesegua, mbaeti yave quía umimbeu chupe. ¹⁵ Jare ndarau quía umimbeu chupe, Tumpa omondo'ā quía yave. Echa'ā Tumpa iñee pe uyecuatía oí cuarāi: "Yayerovia ete co. Echa'ā yugüero ma uvae ñee mbiacatú pegua umimbeu vae reta. Yugüero umimbeu vaerā yandeve ñee icavi vae, yande yayerovia vaerā." Jucuarāi uyecuatía oí.

¹⁶ Érei opaete vae'ā güirovia ñee icavi vae. Echa'ā aracae Isaías jei cuarāi: "CheYa, ¿quía ra güirovia numimbeu chupe vae?" Jucuarāi jei. ¹⁷ Jáeramo numimbeu Cristo regua, íru vae reta uyandu vaerā. Jare uyandu yave, amocue vae güirovia.

¹⁸ Érei tapirandu peve: ¿Uyandu'ā ra reta? Uyandu reta tēi co. Echa'ā Tumpa iñee pe uyecuatía oí cuarāi:

"Tumpa jembiocui reta yugüiraa opaete ivi rupi,
jare umimbeu opaete vae pe."

Jucuarāi uyecuatía oí. ¹⁹ Érei tapirandu ye peve: ¿Uicuaa'ā ra Israel pegua reta? Uicuaa reta tēi co. Echa'ā tenonde voi aracae Moisés jei cuarāi:

"Ayapota icavi vae chembae'ā vae reta pe, pe reta piñemiagüiro vaerā jese reta" —jei Tumpa—.

"Ayapota icavi vae iyaracuua mbae vae pere chupe vae reta pe, pombopochica vaerā" —jei.

Jucuarāi jei. ²⁰ Jare Isaías jei vi uquiyé mbae reve cuarāi:

"Chereca'ā vae reta chevæ ma" —jei Tumpa—.

"Ayecuua upirandu'ā cheré vae reta pe" —jei.

Jucuarāi jei. ²¹ Jare Isaías jei vi Israel pegua reta re cuarāi: "Jecuaeño aeni tēi yugüero vaerā checotí" —jei Tumpa—. "Érei uyapo'ā che jae chupe reta uyapo vaerā vae. Jecuaeño oyovaicho che ndive" —jei. Jucuarāi jei.

11

Tumpa uiparavo amocue Israel pegua reta

¹ Érei yepe tēi jucuarāi uyapo reta, érei Tumpa ueya'ā etei jae uiparavo vae reta. Echa'ā che vi co jae penti Israel pegua. Che co jae Abraham iñemoñaan reta pegua jare Benjamín iñemoñaan reta pegua.

² Tumpa ueya'ā co jae uiparavo vae reta. Echa'ā iyipi güive uicuuua reta. Picuua co Tumpa iñee pe Elías regua uyecuatía oí vae. Echa'ā Elías uyerure Tumpa pe yave, umbijeco Israel pegua reta. Jei Tumpa pe cuarāi: ³ "CheYa, uyuca reta niñee umimbeu vae reta, jare umbai reta maemimba uyeyuca vae uñemeearenda reta. Cheño ayeyocu ndeve, jare jae reta uipota vi cheyuca." Jucuarāi jei. ⁴ Érei Tumpa jei chupe cuarāi: "Imeño siete mil cuimbæ che aiparavo uyeyocui cheve vaerā vae reta. Jae reta uyeatica'ā tumpa-raanga Baal jovai umbiadora vaerā." Jucuarāi jei. ⁵ Jae ramíño vi añave ime amocue vae Tumpa uiparavo ipiacaví rupi vae. ⁶ Tumpa uiparavo reta ipiacaví rupi. Uiparavo'ā mbae jae reta uyapo vae rupi. Echa'ā uiparavo yave mbae jae reta uyapo vae rupi, Tumpa ipiacaví mbiacaví'ā ma co.

⁷ Jáeramo Israel pegua reta güinoi'ā jocua uipota tēi güinoi vae. Jaeño Tumpa uiparavo vae reta güinoi. Jare íru reta uyempiatantaca. ⁸ Echa'ā Tumpa iñee pe uyecuatía oí cuarāi: "Tumpa uyapo chupe reta agüiye vaerā iyaracuua. Jáeramo yepe tēi umingueta Tumpa iñee, érei uicuaa'ā, jare yepe tēi uyandu Tumpa iñee, érei güirovia'ā. Jare jecuaeño cuarāi oí." Jucuarāi uyecuatía oí. ⁹ Jae ramíño vi aracae David jei cuarāi:

“Opaete uyeco reta jese vae toī ūuai reta rami.

Toa reta ūuai pe. Tuiporara reta imbaeyoa jeco pegua.

¹⁰ Agüiye tuicuua, Tumpa iñee umingueta reta yave.

Tuiporara reta, títiva poi ete vae güüraa vae rami.”

Jucuarāi jei.

Tumpa umbiasata judío mbae vae reta

¹¹ Aramoi amocue vae jei tēi Israel pegua reta uyempiatantaca agüiye etei vaerā Tumpa uiparareco. Jucuarāi'ā co. Ērei iyoa reta ramo, Tumpa omondo ūnee yembiasa pegua judío mbae vae reta pe. Jare judío mbae vae reta uyembiasaca yave, Israel pegua reta ūncatataa jese reta jare uipotata uyembiasaca vaerā vi. ¹² Jare Israel pegua reta uyavi ramo, icavi co judío mbae vae reta pe. Echa'ā Israel pegua reta iyoa ramo, Tumpa ipiacavi opaete iñi pegua reta pe. Ērei Israel pegua reta uyeyapo ye yave Tumpa imbaerā, icavi eteta co opaete iñi pegua reta pe.

¹³ Pe reta co jae judío mbae vae reta. Chemiari aī peve. Echa'ā che co jae Cristo jemimondo judío mbae vae reta pe. Ambutuicha ete co cua mbaravíqui Cristo umee cheve vae. ¹⁴ Jucuarāi aipota amiagüiroca judío reta, amocue vae uyembiasaca vaerā. ¹⁵ Echa'ā Tumpa uyerova chugüi reta ramo, opaete iñi pegua reta ipuere uyembiacatu Tumpa ndive. Echa'ā uñatima Tumpa coti reta yave, icavi eteta co opaete iñi pegua reta pe - umanocue vae icove ye ou ūru umanocue vae reta ipite güi yave ramo. ¹⁶ Yamijaanga. Mbiyape tenonde voi oyi vae uñeñono tee yave Tumpa peguarā, opaete harina omonacue vae vi uñeñono tee Tumpa peguarā. Yamijaanga vi. Penti temiti japo reta uñeñono tee yave Tumpa peguarā, opaete jāca reve uñeñono tee Tumpa peguarā.

¹⁷ Yandepuere yayasia amocue temiti olivo jee vae jāca reta, ūñono vaerā jendacue pe olivo ūana rupigua jāca reta. Jucuarāi yave, temiti olivo iyaísí uguata olivo ūana rupigua jāca reta re jare umee chupe reta tecove. Jae ramiño vi Tumpa uyerova judío reta güi ipiacavi vaerā peve. Pe reta co jae judío mbae vae reta. ¹⁸ Ērei agüiye pepia pe piyeminguela pe reta icavi ete co judío reta güi. Echa'ā pe reta co jae olivo ūana rupigua jāca reta rami. Jáeramo agüiye piyembicate. Echa'ā jāca reta umee'ā tecove japo reta pe. Japo reta umee tecove jāca reta pe.

¹⁹ Jayave aramoi pereta: “Tumpa omombo judío reta olivo jāca reta yayasia rami, ipiacavi vaerā judío mbae vae reta pe. Echa'ā judío mbae vae reta olivo ūana rupigua jāca temiti olivo reta jāca reta jendacue pe uñeñono vae reta rami.” ²⁰ Añete co. Ērei Tumpa uyerova chugüi reta, jae reta güirovia'ā ramo, jare judío mbae vae reta upitata joco pe, güirovia yave. Jáeramo agüiye piyembicate. Pequieño. ²¹ Echa'ā Tumpa uyerova judío reta güi, yepe tēi jae reta co temiti olivo jāca reta etei rami. Jae ramiño vi Tumpa uyerovata pegüi, perovia'ā yave. ²² ¡Mase! Tumpa ipiacavi co. Ērei uiporaraca vi. Echa'ā uiporaraca jocua Israel pegua uyavi vae reta pe. Ērei ipiacavita co judío mbae vae reta pe, jare jecuaeño ipiacavita chupe reta güirovia reta yave. Ērei güirovia'ā yave, Tumpa omombota vi temiti olivo jāca reta yayasia rami. ²³ Jare yayasia yaequi yave temiti olivo jāca reta, yandepuere ye ūñono reta. Jae ramiño vi Tumpa ipiacavita co Israel pegua reta pe, jae reta mbaeti yave jecuae ūnatēi güirovia vaerā. Echa'ā Tumpa ipuere uyapo jucuarāi. ²⁴ Echa'ā yandepuere yave ūñono jāca yayasia olivo ūana rupigua güi vae reta temiti olivo re, yavai'ā co oī ūñono vaerā temiti olivo jācacue reta etei jese. Echa'ā olivo ūana rupigua uyuavi temiti olivo güi. Jae ramiño vi Tumpa ipiacavi yave judío mbae vae reta pe, yavai'ā co oī ipiacavi vaerā Israel pegua reta pe.

Israel pegua reta uyembiasacata co

²⁵ Cherivi reta, aipota picuua vaerā cuándeñoo uyecuua vae regua, agüiye vaerā piyembicate. Jae co cua: Jeta Israel pegua reta ipiatanta ma. Ērei ndarau jecuaeño jucuarāi, jaeno opaete judío mbae vae reta uyembiasaca regua. ²⁶ Jare cuándeñoo uyecuua vae regua, aipota jae chupe reta vae, Echa'ā Tumpa iñee pe uyecuatiá oī cuará:

“Outa judío reta ipite güi uepi vaerā.

Jae umbaita opaete Jacob iñemoñaa reta güi imbaeyoa reta.

²⁷ YandeYa jei: ‘Echa'ā cuarāi ayapota jae chupe reta vae, ambai yave imbaeyoa reta.’”

Jucuarāi uyecuatiá oī.

²⁸ Israel pegua reta oyovaicho Tumpa ndive. Echa'ā güirovia'ā reta ūnee icavi vae. Ērei cuándeñoo uyecuatiá oī. Echa'ā Tumpa uiparavo Israel pegua reta. Jáeramo uau reta, itenondegua reta uiparavo vae rupi. ²⁹ Echa'ā Tumpa umeeta co chupe reta jei umeeta co chupe reta vae. Ndarau omombo uiparavo vae reta. ³⁰ Pe reta co jae judío mbae vae reta. Tenonde yave pe reta piyapo'ā Tumpa jei vae. Ērei añave Tumpa preparareco, Israel pegua reta uyapo'ā Tumpa jei vae ramo. ³¹ Jae ramiño vi añave Israel pegua reta uyapo'ā Tumpa jei vae, ērei Tumpa uiparareco reta,

peparareco rami. ³² Echa'ā Tumpa uicuaaca opaete vae oyovaqueño. Mbaeti co quía Tumpa jei vae uyapo vae. Cuarāi Tumpa uyapo, ipuere vaerā uparareco opaete vae.

³³ Tumpa iyaracua catu ete co, jare uicuaa opaete. Yandepuere'ā etei yaicuaa Tumpa ipiyemingueta. Uepiti'ā yaicuaa jae uyapo vae. ³⁴ Echa'ā mbaeti quía uicuaa yandeYa ipiyemingueta. Mbaeti quía umbiaracuaa yandeYa mbae re. ³⁵ Mbaeti quía ipuere umee rani mbae yandeYa pe, yandeYa umbijecovia chupe vaerā. ³⁶ Echa'ā opaete mbaembae ou yandeYa güi. Jae uyapo opaete mbaembae iyupeguarā. YandeYa tuyembadoraca jaeño mai pegua. Amén.

12

Upurugüirovia vae reta mbae uyapo vaerā

¹ Jáeramo, cherivi reta, pumiñera piñemee vaerā Tumpa pe. Echa'ā jae peparareco. Israel pegua reta umee Tumpa pe maemimba uyeyucacue. Jucuarāi vi pe reta pemee chupe perete icove vae. Perete tuñeñono tee Tumpa peguarā. Cuarāi yave, Tumpa uyeroviata co. Echa'ā jipi co piyeyocui vaerā Tumpa pe cuarāi. ²Jare agüiye pico jei vae reño tuyüreco vae rami. Pemaeno Tumpa re umee vaerā peve pepiyemingueta ipiāu vae, pepia pe piyemingueta vaerā icavi vae re. Cuarāi yave, picuata co Tumpa jei vae. Echa'ā icavi co peve piyapo vaerā Tumpa jei vae, pembiyerovia vaerā Tumpa. Echa'ā Tumpa jei vae icavi ete co.

³ Tumpa ipiacavi cheve ayeyocui vaerā chupe. Jáeramo che jae peve cua: Agüiye quía ipia pe tuyemingueta ete iyee uyemitenonde vaerā ipia pe uyemingueta tēi iyee vae güi. Penti penti ipia pe tuyemingueta cavi iyee. Echa'ā Tumpa umee penti penti pe mburugüirovia, ipuere vaerā mbae uyapo Tumpa peguarā. ⁴ Echa'ā pentiño co yanderete. Ërei yanderete pe ñanoi yandepi jare yandepo jare yandeapisa jare yanderesa jare jeta īru īru vae. Jare opaete güinói iparavíqui penti penti yanderete pe. ⁵Jae ramíño vi yande jeta ete co. Ërei yayeyapo ma Cristo ndive penti jete ramíño, jare yayemborimbori penti jete rami.

⁶ Tumpa ipiacavi yandeve. Jáeramo umee yandeve mbaepuere uyuavi vae reta. Mbaepuere güinói Tumpa iñee umimbeu vaerā vae tumimbeu mburugüirovia Tumpa umee chupe vae rupi. ⁷ Mbaepuere güinói īru upurugüirovia vae reta pe uyeyocui vaerā vae tuyeyocui cavi chupe reta. Mbaepuere güinói oporomboe vaerā vae toporomboe cavi. ⁸ Mbaepuere güinói upurumbiaracuaa vaerā vae tupurumbiaracuaa cavi. Mbae ipuere umee īru vae pe vae tumei iquiréi reve. Mbaepuere güinói īru vae reta oyocui vaerā vae toporoyocui cavi. Mbaepuere güinói ombori vaerā iparavete vae reta vae tombori uyerovia reve.

⁹ Piyerau mburuau añetete vae pe. Pemitaréi icavi mbae vae. Jecuaeño piyapo icavi vae. ¹⁰ Piyerau penti cuimbae uau tiví rami. Pemaе cavi piyee piyepi reve.

¹¹ Piyapo mbaravíqui peaqui mbae reve. Peratangátu Espíritu Santo imbaepuere pe. Piyeyocui yandeYa pe.

¹² Peáro yandeYa piyerovia reve. Pepiaguasu piporara yave. Peratangátu piyerure vaerā Tumpa pe.

¹³ Mbae uata yave īru uñeñono tee Tumpa peguarā vae reta pe, pemee mbae chupe reta. Pepiacavi mboupa reta pe.

¹⁴ Piyerure Tumpa pe uyapo vaerā icavi vae chupe uioporaraca peve vae reta pe. Agüiye piyepipayu jese reta.

¹⁵ Piyerovia uyerovia vae reta ndive. Pepiatiti ipiatiti vae reta ndive.

¹⁶ Penti ramíño pico uyupii. Agüiye piyembicate. Peau iparavete vae reta. Agüiye pepia pe piyemingueta piyee opaete aracuaa penoi co vae.

¹⁷ Yepe tēi quía uyapo icavi mbae vae peve, agüiye pembijecovia icavi mbae vae pe. Jecuaeño piyapo icavi vae opaete vae jovaque. ¹⁸ Pepuere yave, īru vae reta umaeno yave peré, pico cavi pepiacatu reve īru vae reta ndive. ¹⁹ Cherivi reta, agüiye pembijecovia mbae icavi mbae vae uyapo peve vae icavi mbae vae pe. Pemaeno Tumpa tuiporaraca chupe. Echa'ā Tumpa iñee pe uyequatía oī cuarāi: "Che taiporaraca chupe. Che tambijecovia" —jei yandeYa. Jucuarāi uyequatía oī. ²⁰ Jáeramo oyovaicho nde ndive vae iyembai yave, emingaru. Jare iúe yave, emee i tou. Echa'ā jucuarāi yave, imarata co icavi mbae vae uyapo ndeve vae re. ²¹ Iyapo icavi vae mbae icavi mbae vae uyapo ndeve vae pe. Echa'ā jucuarāi nemiamirita icavi mbae vae. Icavi mbae vae ndarau nemiamiri.

13

¹ Opaete vae tuyapo mburuvicha reta jei vae. Echa'ā Tumpa etei oñono mburuvicha retarā. Tumpa uparavo mbaepuere güinói reta vaerā. ² Jáeramo uyapo'ā mburuvicha jei vae oyovaicho co Tumpa iporoyoci vae. Jare mburuvicha uioporaracata oyovaicho jae ndive vae pe ³ Echa'ā mburuvicha reta uminguíye'ā icavi vae uyapo vae. Uminguiye icavi mbae vae uyapo vae. Jáeramo iyapo icavi vae, agüiye vaerā ndequiye mburuvicha güi. Echa'ā mburuvicha uyemingueta cavita nderé. ⁴ Mburuvicha reta

uyeyocui ñugüinoi Tumpa pe. Echa'ã Tumpa uiparavo, nembori vaerã. Ërei icavi mbae vae ndiyapo yave, equiye chugüi reta. Echa'ã Tumpa umee chupe reta mbaepuere uioporaraca vaerã. Jäeramo uyeyocui ñugüinoi Tumpa pe, uioporaraca yave icavi mbae vae uyapo vae reta pe. ⁵ Jäeramo piyapo mburuvicha reta jei vae, jipi co piyapo vaerã ramo, pequiye'ã uioporaracata peve vae güi ramoño. ⁶ Jare cua jeco pegua pembiepi mburuvicha reta ocovara peve vae. Echa'ã uyeyocui ñugüinoi Tumpa pe, jare jae reta iparavíqui co ocovara vaerã peve.

⁷ Piyapo opaete vae pe jipi co piyapo vaerã vae. Echa'ã jipi co mburuvicha reta ocovara vaerã peve. Pequiye jipi co pequiye vaerã chugüi vae güi. Pipiú jipi co pipiú vaerã vae. ⁸ Agüiye pepia quía pe mbae re. Ërei jecuaeno piyerau. Echa'ã japicha uau vae uyapo ma opaete mboroyocui. ⁹ Echa'ã mboroyocui jei cuarãi: "Agüiye iyuvanga menda re. Agüiye epuruyuca. Agüiye nemonda. Agüiye ndeapu íru vae re. Agüiye ipota íru vae reta imbaembæ." Jucuarãi jei. Jare ime vi íru mboroyocui reta. Ërei opaete cua mboroyocui reta penti ramíño co. Jae co cua: "Eau nderapicha nde ndiyerau rami." ¹⁰ Echa'ã japicha uau vae ndarau uyapo icavi mbae vae chupe. Jäeramo japicha uau vae uyapo ma opaete mboroyocui.

¹¹ Coiño ma oĩ yanembiasa ete vaerã. Yapurugüirovia ramo yave, mbiri echa yandeve. Ërei añave coiño ma oĩ. Picuua cavi cua. Jäeramo icavi co ñañemiatangátu vaerã. ¹² Yamijaanga pítu mbaeyoa re. Cõe seri ma. Jäeramo agüiye ma yayapo pítmimbi pe uyeyapo vae. Yayapo tembipe oĩ yave uyeyapo vae. Jucuarãi yandepuereta ñañeráro mbaeyoa ndive. ¹³ Yaico cavi tembipe pe yugüireco vae reta rami. Agüiye yacau. Agüiye yasavipo. Agüiye yandeporopotaño. Agüiye yayapo pichii vae. Agüiye yayovaicho íru vae ndive. Agüiye ñaneacat  a íru vae re. ¹⁴ Ërei pemaeño yandeYa Jesucristo re pemimir  ta vaerã, pepuere vaerã píñer  ro mbaeyoa ndive. Agüiye pepia pe piyeminguela quir  i pepuere piyapo pipota vaeño.

14

Upurugüirovia vae reta agüiye tiñera

¹ Pemaeño upurugüirovia vae uicuua cavi'ã mburugüirovia regua vae re uñem  ru vaerã pe ndive, Ërei agüiye piyeaca jae ndive mbae uicuua cavi'ã vae re. ² Echa'ã penti vae güirovia opaete mbaembæ ipuere co jou. Ërei íru vae uicuua cavi'ã mburugüirovia regua vae jou'ã so. ³ Opaete mbaembæ ipuere jou vae agüiye tugüir  ro jou'ã so vae. Jare soou jou'ã vae agüiye tiñera opaete mbaembæ ipuere jou vae re. Echa'ã jae co Tumpa imbae. ⁴ Soou jou'ã vae agüiyyeta t  i iñera Tumpa jembiocui re. Jaeño iYa ipuere jei icavi vae uyapo ani icavi mbae vae co uyapo. Jare Tumpa ipuere uparavíqui ipia pe, jae uyapo vaerã icavi vae.

⁵ Penti vae ipia pe uyeminguela penti ara icavi ete íru ara reta güi. Íru vae jei opaete ara reta oyovaque co. Penti penti tuicuua cavi maera ipia pe uyeminguela cuar  i. ⁶ Ipi  a pe uyeminguela penti ara icavi ete íru ara reta güi vae jei cuar  i uiptota umbiyerovia yandeYa ramo. Jae ramíño vi ipia pe uyeminguela opaete ara reta oyovaque co vae jei cuar  i uiptota umbiyerovia yandeYa ramo. Opaete mbaembæ ipuere jou vae umbiyerovia Tumpa jou yave. Echa'ã umee yasurupai Tumpa pe. Jae ramíño vi soou jou'ã vae umbiyerovia Tumpa jou'ã yave. Echa'ã jae vi umee yasurupai Tumpa pe.

⁷ Mbaeti penti ave yaico yayapo vaerã yande yaipota vaeño. Jae ramíño vi mbaeti penti ave ñamano yaipota ñamano ramo. ⁸ Echa'ã yaico rambueve, yayeyocui yandeYa pe. Jare ñamanota, yandeYa uiptota ñamano vaerã ramo. Jäeramo yaico rambueve jare ñamano yave, yande co jae yandeYa imbae reta. ⁹ Echa'ã cuar  i Cristo umano jare icove ye ou umanocue vae reta ipite güi, uyeyapo vaerã umanocue vae reta jare icove vae reta iYar  a.

¹⁰ Penti upurugüirovia vae agüiyyeta t  i iñera íru upurugüirovia vae re. Jae ramíño vi penti upurugüirovia vae agüiyyeta t  i güir  ro íru upurugüirovia vae. Echa'ã opaete yande yayemboita Tumpa jovai, jae u  a vaerã yandeparavíqui. ¹¹ Echa'ã Tumpa iñee pe uyeucuat  a o  i cuar  i:

"Añetete co" —jei Tumpa—. "Opaete vae uyeaticata cherovai, jare opaete vae chembiadorata co."

Jucuar  i uyeucuat  a o  i. ¹² Jäeramo penti penti yamimbeuta Tumpa pe yayapocue vae regua.

¹³ Jäeramo agüiye ma ñaniñera. Ña  nemoa ngatu quir  i yaico cavi vaerã, agüiye vaerã íru upurugüirovia vae iyoa yandereco pegua. ¹⁴ Che aicuua yandepuere co yau opaete mbaembæ. Echa'ã yandeYa Jes  s uicuuaaca cheve cua regua. Ërei ime yave qu  a ipia pe uyeminguela jipi'ã jou vaerã mbae nunga temb  u vae, ndarau icavi chupe jou vaerã. ¹⁵ Ërei penti upurugüirovia vae umbipiatiti yave íru upurugüirovia vae jou vae jeco pegua, ico'ã co upuruau reve. Agüiye tou jocua nunga temb  u. Echa'ã jou yave, aramoi ombopiacata íru upurugüirovia vae jou vae jeco pegua. Echa'ã Cristo umano vi jocua íru upurugüirovia vae re. ¹⁶ Jäeramo agüiye tou jocua nunga temb  u, yepe t  i uicuua ipuere co jou. Echa'ã jou yave, íru vae reta jeita uyapo icavi mbae vae. ¹⁷ Echa'ã Tumpa yandeocui ramo, agüiye yayemipia'ã mbae yau vae re. Yayapo jipi vae, jare yaico mbiacatu reve uyupii, jare yayerovia. Echa'ã Esp  ritu

Santo yanembori, cuarāi yaico vaerā.¹⁸ Uyeyocui Cristo pe cuarāi vae umbiyerovia co Tumpa, jare ūru vae reta uyemingueta cavi jese.

¹⁹ Jáeramo jecuaeño yaico cavi, yandepiacatu vaerā uyupii, jare jecuaeño yaipota ūñanemimirāta vaerā.²⁰ Agüiye yarucumegua Tumpa iparavíqui mbae yau vae jeco pegua. Añete co, yandepuere yau opaete mbaembæ. ²¹ Erei ūru vae reta iyoa yave mbae nunga tembíu yau ramo, icavi'ā yau vaerā jocua nunga tembíu. ²² Agüiye yau soo jare vino, jare agüiye yayapo ūru mbaembæ, yambíavai yave ūru upurugüirovia vae jocua nunga mbaembæ jeco pegua. Echa'ā aramoi ūru upurugüirovia vae iyoata ani ipituta ipurugüirovia re.²³ Añete co, amocue upurugüirovia vae reta güirovia ipuere jou opaete mbaembæ. Tumpaño tuicuaa jesegua. Jae reta jou yave uicuaa Tumpa uipota jou vaerā vae, uyeroziata co.²⁴ Erei ipia pe uyemingueta jupi'ā jou vaerā mbae nunga tembíu vae, uyembijeco jocua tembíu jou yave. Echa'ā güirovia'ā jupi jou vaerā. Echa'ā mbae yayapo yave, yarovia'ā yave jupi yayapo vaerā, yandeyoa co.

15

¹ Ime amocue yande ūnanepirāta yandepurugüirovia re vae. Jáeramo icavi co yambori vaerā uicuaa cavi'ā mburugüirovia regua vae reta. Agüiye yayapo yande yaipota yayapo vaeño.² Penti penti yaico yambiyerovia vaerā ūru vae, jucuarāi yandepuere yave yayapo icavi vae chupe, ipirāta vaerā ipurugüirovia re.³ Echa'ā Cristo etei uyapo'ā jae uipota uyapo vaeño. Jae uyapo Tumpa jei vae. Echa'ā Tumpa iñee pe uyecuatía oī cuarāi: "Jei icavi mbae vae ndeve vae jei vi icavi mbae vae checoti" — jei Cristo Tumpa pe. Jucuarāi uyecuatía oī.⁴ Opaete tenonede yave Tumpa iñee pe uyecuatía oī vae uyecuatía co yande yayemboe vaerā. Echa'ā Tumpa iñee pe uyecuatía oī vae ipuere umee yandevé mbiaguasu jare mbiacatu, ūñäro vaerā yayerovia reve.⁵ Tumpa co jae mbiaguasu jare mbiacatu umee peve vae. Tumpa tuparavíqui pepia pe, pico cavi vaerā penti ramiño. Echa'ā cua co jae Cristo Jesús jei vae.⁶ Pepia pe piyemingueta jare piyemingueta penti ramiño, pembiadura vaerā Tumpa. Jae co yande Ya Jesucristo Tu.

Umimbeu ūnee icavi vae judío mbae vae reta pe

⁷ Jáeramo pemaе cavi piyee, Cristo umae cavi yanderé rami, ūru vae reta umbiadura vaerā Tumpa.⁸ Echa'ā che jae peve cua: Cristo ou uyeyocui vaerā judío reta pe, uicuaaca vaerā chupe reta Tumpa iñee añete vae. Echa'ā jae ou uicuaaca vaerā judío reta pe Tumpa uyapota itenondeguia reta pe jei vae.⁹ Jare Cristo ou judío mbae vae reta vi umbiadura vaerā Tumpa, jae uiparareco reta ramo. Echa'ā aracae David jei Tumpa pe cuarāi:

"Jáeramo che numbiadorata judío mbae vae reta ipite pe.

Che numbiadorata canta pe."

Jucuarāi jei.¹⁰ Jare aracae Moisés vi jei cuarāi:

"Judío mbae vae reta tuyerovia Tumpa imbae vae reta ndive."

Jucuarāi jei.¹¹ Jare David jei vi cuarāi:

"Judío mbae vae opaete ivi pegua reta tumbiadura yande Ya,
tuyemingueta imbaepuere re, opaete ivi pegua reta."

Jucuarāi jei.

¹² Jare aracae Isaías jei cuarāi:

"Outa co Isaí ūñemoñaa.

Jae uyeyapota judío mbae vae reta juvicha guasurā.

Judío mbae vae reta güiroviata jese."

Jucuarāi jei.

¹³ Tumpa uparavíqui yandepia pe ūñäro vaerā yayerovia reve. Jecuaeño tuparavíqui pepia pe, pembiyerovia ete vaerā jare pembiacatu vaerā pepurugüirovia rupi. Jucuarāi yave, pearoña co piyerovia ete reve Espíritu Santo imbaepuere rupi.

¹⁴ Che etei vi aicuaa catu, cherivi reta, quirāi pe reta pepiacavi ete co. Picuaa catu jeta mbaembæ regua. Jáeramo pepuere piyembiaracuaa.¹⁵ Erei aicuatía ma peve, cherivi reta, aquíye mbae reve amocue mbaembæ re, pumimandúa jese vaerā. Cuarāi ayapo, Tumpa ipiacavi umee cheve vae rupi.¹⁶ Echa'ā Tumpa cheparavo ayeyocui vaerā Jesucristo pe judío mbae vae reta ipite pe. Jáeramo amimbeu chupe reta ūnee icavi vae Tumpa regua. Jare judío mbae vae reta güirovia yave, Tumpa uyerozia co. Echa'ā Espíritu Santo oñono tee jocua judío mbae vae reta Tumpa peguarā.

¹⁷ Jáeramo chepuere chemiari cavi cheparavíqui re. Erei jucuarāi ambiadura Cristo Jesús. Echa'ā mbaravíqui co jae Tumpa iparavíqui.¹⁸ Chemiariata Cristo uyapo che rupi vae reño. Jae uparavíqui judío mbae vae reta ipia pe che amimbeu vae jare ayapo vae rupi, jae reta upurugüirovia vaerā.¹⁹ Jare Espíritu Santo umee cheve mbaepuere ayapo vaerā miacañi reta, judío mbae vae reta ipiacañi vaerā. Jare che ambapí opaete que rupi Jerusalén güi Ilírico pe amimbeu vaerā ūnee icavi vae Cristo regua.

²⁰ Jare cuarāi aipota ayapo. Aipota ete amimbeu ñee icavi vae uyandu'ā etei Cristo regua vae pe, agüiye vaerā aparavíqui īru vae uparavíqui vae pe. ²¹ Jare jucuarāi uyeyapo Tumpa iñee pe uyecuatía oī vae. Echa'ā uyecuatía oī cuarāi:

"Ndeiño quíá umimbeu Cristo chupe vae reta uyanduta co.
Ndeiño uyandu vae reta uicuata co."
Jucuarāi uyecuatía oī.

Pablo iquirēi oo Roma pe

²² Jare cua jeco pegua ayembíavai ete, yepe tēi aipota aa pepi. ²³ Jeta año ma aipota ete aa apou pepi, jare añave opa ma cheparavíqui cua pe. ²⁴ Jáeramo España pe aa yave, aipota aa apou pepi, ayerovia vaerā pe ndive mbovi ara pegua. Jayave joco güi aramoi pepureta chembori aa ye vaerā España coti. ²⁵ Èrei aata rani Jerusalén pe araa vaerā corepoti uñeñono tee Tumpa peguarā vae reta pe. ²⁶ Echa'ā Macedonia jare Acaya pegua reta jei icavi co omondo vaerā corepoti Jerusalén pegua uñeñono tee Tumpa peguarā vae iparavete vae reta pe. ²⁷ Añete co, jae reta uvāe icavi cua uyapo vaerā. Jare ipia co judío reta pe. Echa'ā judío reta rani umimbeu judío mbae vae reta pe Tumpa iñee. Jáeramo icavi co judío mbae vae reta ombori vaerā judío reta mbaembae cua ivi pegua pe. ²⁸ Jáeramo araata rani chupe reta cua corepoti. Jayave cua mbaravíqui opa ma yave, aata pepi, jare joco güi aata España coti. ²⁹ Jare aicuua che aa pepi yave, amimbeu cavita peve ñee icavi vae Cristo regua. Jáeramo piyerovia eteta co.

³⁰ Pe reta perovia yandeYa Jesucristo re, jare Espíritu Santo pemboe piyerau vaerā. Jáeramo che pumiñera, cherivi reta, piyerure Tumpa pe cheré. ³¹ Piyerure Tumpa pe jae cherepi vaerā upurugüirovia mbae vae Judea pegua reta güi. Piyerure vi Jerusalén pegua Tumpa peguarā uñeñono tee vae reta uyerovia vaerā cua corepoti araata chupe reta vae re. ³² Jae ramiño vi piyerure aa vaerā pepi ayerovia reve Tumpa jei vae rupi, jare aputuu vaerā pe reta ndive. ³³ Tumpa toī opaete pe ndive. Echa'ā jae umee yandeve mbiacatu. Amén.

16

Saludo reta

¹ Amondota pepi yanderindi Febe. Jae uyeyocui īru upurugüirovia vae Cencrea pegua reta pe. ² Pempires cavi yandeYa jee pe. Echa'ā icavi co uñeñono tee Tumpa peguarā vae reta jucuarāi uyapo vaerā uyupe. Jare pembori, mbae uata chupe yave. Echa'ā jae ombori jeta vae, jare chembori vi.

³ Tumpa ndiveño toī Priscila jare Aquila. Jae reta chembori Cristo Jesús iparavíqui pe. ⁴ Jae reta umano seri cherepi vaerā. Jáeramo amee yasurupai chupe reta. Jae ramiño vi opaete judío mbae vae uyembatimbatí vae reta umee yasurupai chupe reta. ⁵ Jae ramiño vi Tumpa ndiveño toī opaete Priscila jare Aquila jenta pe uyembati vae reta. Jae ramiño vi Tumpa ndiveño toī yanderivi Epeneto. Jae rani güirovia Cristo re Acaya pe. ⁶ Jae ramiño vi Tumpa ndiveño toī María. Jae uparavíqui tanta pepite pe. ⁷ Jae ramiño vi Tumpa ndiveño toī Andrónico jare Junias. Jae reta co cherentaiqua reta, jare yugüirecose peresoriru pe che ndive. Temimondo reta uyeminguela cavi ete jese reta. Jae reta güirovia Cristo re ndei che arovia jese mbove.

⁸ Jae ramiño vi Tumpa ndiveño toī Amplias. Jae güirovia yandeYa re jare che aau. ⁹ Jae ramiño vi Tumpa ndiveño toī Urbano. Jae orembori Cristo iparavíqui pe. Jae ramiño vi Tumpa ndiveño toī yanderivi Estaquis. ¹⁰ Jae ramiño vi Tumpa ndiveño toī Apeles. Uyecuua co quirái uyeyocui cavi Cristo pe. Jae ramiño vi Tumpa ndiveño toī Aristóbulo jenta pegua reta. ¹¹ Jae ramiño vi Tumpa ndiveño toī Herodión. Jae co cherentaiqua. Jae ramiño vi Tumpa ndiveño toī Narciso jenta pegua upurugüirovia vae reta. ¹² Jae ramiño vi Tumpa ndiveño toī Trifena jare Trifosa. Jae reta uparavíqui ñugüinói yandeYa pe. Jae ramiño vi Tumpa ndiveño toī Rufo jare ichi. Rufo uyeyocui cavi yandeYa pe. Jare ichi uyandareco cavi cheré chesi ramí. ¹⁴ Jae ramiño vi Tumpa ndiveño toī Asínrito, Flegonte, Hermas, Patrobas, Hermes jare opaete cherivi uyembati jae reta ndive vae reta. ¹⁵ Jae ramiño vi Tumpa ndiveño toī Filólogo, Julia, Nero, Nero jindi, Olimpas jare opaete uñeñono tee Tumpa peguarā vae uyembati jae reta ndive vae reta.

¹⁶ Piyembisaluda yave, piñecuāva piyerau reve. Opaete upurugüirovia vae uyembatimbatí vae jei peve Tumpa ndiveño pei.

¹⁷ Añave che pumiñera, cherivi reta, piñemoa ngatu vaerā yembiyao uyapo vae reta güi. Echa'ā jae reta umbiavai Tumpa iparavíqui. Jae reta iporomboe yuuvavi piyemboe jese vae güi. Agüiye piyembati jae reta ndive. ¹⁸ Echa'ā jae reta uyeyocui'ā yandeYa Jesucristo pe. Jaeño uparavíqui reta iyupeguarā. Jae reta uiporu ñee icavi vae echa. Èrei jucuarāi umbitaví yemboe añete vae uicuua cavi'ā vae reta.

¹⁹ Opaete vae uicuua quirái pe reta perovia yandeYa re. Jáeramo ayerovia peré. Jare aipota jecuaeño pequiréi vaerā piyapo icavi vae. Agüiye petaví piyapo vaerā icavi mbae vae. ²⁰ Tumpa jecuaeño umee

yandeve ipiacatu. Jae pemberita, imambae pemiamiri ete vaerā Satanás. YandeYa Jesucristo tumee peve ipiacavi.

²¹ Timoteo uparavíqu oī che ndive. Jae jare Lucio, Jasón jare Sosípater - jae reta co cherentaigua reta - jei peve Tumpa ndiveño peī.

²² Tercio uicuatía oī cua tupapire cheve peguarā. Jae vi jei peve Tumpa ndiveño peī yandeYa re perovia ramo.

²³ Gayo vi jei peve Tumpa ndiveño peī. Che aico jae jenta pe, jare opaete upurugüirovia vae reta vi uyembati cua pe. Erasto vi jei peve Tumpa ndiveño peī. Jae uñuvatu tenta guasu pegua reta icorepoti. Yanderiví Cuarto vi jei peve Tumpa ndiveño peī.

²⁴ YandeYa Jesucristo tumee opaete peve ipiacavi. Amén.

Tumpa tuyembadoraca

²⁵ Jare añave yambiadora Tumpa. Echa'ā jae ipuere pemimirāta. Cuarāi amimbeu ma peve, ñee icavi vae Jesucristo regua amimbeu peve yave. Echa'ā jae umee cheve etei amimbeu vaerā. Cua ñee icavi vae uyecuaa'ā etei ivi uyeyapo güive. Jaeramo Tumpa uicuaaca. ²⁶Jáeramo añave uyecuaa. Jare Tumpa icoño mai vae oyocui uyecuaa vaerā opaete ivi pegua reta pe Tumpa iñee umimbeu vae reta uicuatía vae rupi, opaete vae güirovia vaerā Tumpa jei chupe reta rami.

²⁷ Tumpaño co jae iyaracuaa catu vae. Tumpa tuyembadoraca Jesucristo rupi jaeño mai pegua. Amén.

PRIMERA CARTA DEL APOSTOL SAN PABLO A LOS CORINTIOS

¹ Che co jae Pablo. Tumpa cheparavo aico vaerā Jesucristo jemimondorā. Echa'ā cua co jae Tumpa jei vae. Cherivi Sóstenes ime cua pe oī che ndive. ² Aicuatía cua tupapire opaete pepurugüirovia vae Corinto pe piyembati vae reta pe. Pe reta co jae Tumpa imbae. Tumpa peparavo peñono tee vaerā iyupeguarā. Cuarāi Tumpa uyapo Cristo Jesús rupi. Jae ramíño vi Tumpa uiparavo opaete yondeYa Jesucristo re güirovia vae reta. Jae reta opaete que rupi ñugüinoi. Jae reta i'Ya co jae yandeYa Jesucristo.

³ YandeRu Tumpa jare yandeYa Jesucristo tumee peve ipiacavi jare ipiacatu.

Yasurupai umee Tumpa pe Corinto pegua reta re

⁴ Jecuaeño amee yasurupai Tumpa pe peré, Tumpa umee ipiacavi peve Cristo Jesús rupi ramo. ⁵ Echa'ā Tumpa pemivendise ete, pepuere vaerā pemimbeu īru vae reta pe jare picuua cavi vaerā. ⁶ Jare jucuarāi pe reta picuuaaca īru vae reta pe añetete vae co jocua amimbeu peve Cristo regua vae. ⁷ Jucuarāi uata'ā etei peve penti ave mbaepuere Espíritu Santo umee vae. Jare jecuaeño peáro piyerovia reve yandeYa Jesucristo ou ye vaerā. ⁸ YandeYa Jesucristo jecuaeño pemimirātata jae ou ye regua, agüiye vaerā quía ipuere pembijeco mbae re jocua ara. ⁹ Tumpa jecuaeño uyapo jei uyapota vae. Echa'ā jae peparavo, pico vaerā Tai ndive. Jae co yandeYa Jesucristo.

Upurugüirovia vae reta uyembiyao uyugüi

¹⁰ Cherivi reta, che pumiñera, yandeYa Jesucristo jee re agüiye vaerā piyeaca uyupii, jare agüiye vaerā piyembiyao piyugüi. Pumiñera pico vaerā penti ramíño. Toyovaque pepia pe piyemingueta oī vae jare pearacuua. ¹¹ Echa'ā Cloé jenta pegua reta umimbeu cheve peregua, cherivi reta, quirāi piyeaca pico uyupii. ¹² Amocue pe reta pere: "Che co jae Pablo regua." Jare amocue pere: "Che co jae Apolos regua." Jare īru pe reta pere: "Che co jae Pedro regua." Jare īru pe reta pere: "Che co jae Cristo regua." Jáeramo tae peve cua: ¹³ Cristo uyembiyao'ā etei. Che amano'ā co curusu re pembaeyoa retajeco pegua. Piyembautizaca'ā co cheree re. ¹⁴ Amee yasurupai Tumpa pe quirāi mbivoño pumbibautiza. Jaeno ambibautiza Crispo jare Gayo. ¹⁵ Jáeramo pepuere'ā etei pere cheree re piyembibautizaca co. ¹⁶ Añete yepo, ambibautiza Estéfanas jenta pegua reta vi. Ërei chemandua'ā ambibautiza ra īru vae. ¹⁷ Echa'ā Cristo chembou'ā apurumbibautiza vaerā. Jaeno chembou amimbeu vaerā ñee icavi vae. Ërei aiporu'ā ñee iyaracuua catu vae pegua. Echa'ā jocua nunga ñee aiporu yave, aramoi ñee Cristo icurusu regua ndarau tēi mbaepuere güinoi.

Cristo co jae Tumpa iyaracuua jare imbaepuere

¹⁸ Echa'ā yamimbeu yave ñee Cristo icurusu regua, cañitei pe yugüiraata vae reta ipia pe uyemingueta tēi jae penti mbiquere co. Ërei cua ñee rupi Tumpa uicuuaaca yandeve imbaepure. Echa'ā yande yayemiasaca co. ¹⁹ Echa'ā Tumpa iñee pe uyecuatía oī cuarāi:

"Che aicuacata quirāi iyaracuua catu echo vae reta añetete iyaracuua'ā etei co" —jei Tumpa—.

"Jae ramíño vi aicuacata quirāi opaete mbaembae uicuua cavi echo vae reta añetete uicuua cavi'ā etei co" —jei.

Jucuarāi uyecuatía oī.

²⁰ ¿Quía ra co jae iyaracuua catu vae? ¿Quía ra co jae mboroyoci re oporomboe vae? ¿Quía ra co jae ipoqui cua ivi pe uyeaca vaerā vae? Echa'ā Tumpa uicuuaaca quirāi aracuua cua ivi pegua mbae'ā co. ²¹ ivi pegua reta ipuere'ā uicuua Tumpa jae reta iyaracuua catu echo vae rupi. Ërei Tumpa umbibasa upurugüirovia vae ñee icavi vae yamimbeu vae rupi, yepo tēi penti mbiquere echo īru vae reta pe.

²² Echa'ā judío reta uipota yayapo vaerā penti miacañi jae reta uecha vaerā. Jare judío mbae vae reta uipota yayemingueta vaerā iyaracuua catu vae cua ivi pegua reta uyemingueta ramíño. ²³ Ërei yande yamimbeu chupe reta quirāi Cristo humano curusu re. Ërei cua yamimbeu vae penti yembiavai judío reta pe, jare judío mbae vae reta ipia pe uyemingueta tēi penti mbiquere co. ²⁴ Ërei Tumpa uiparavo vae reta pe Tumpa uicuuaaca Cristo rupi quirāi tuicha ete co imbaepuere jare quirāi iyaracuua catu ete co. Tumpa uiparavo vae reta co jae judío reta jare judío mbae vae reta. ²⁵ Ime amocue ivi pegua iyaracuua catu vae. Ërei Tumpa iyaracuua catu ete ye cua reta güi, yepo tēi jae reta ipia pe uyemingueta tēi penti mbiquere co Tumpa Cristo rupi uyapo vae. Jae ramíño vi ime amocue ivi pegua mbaepuere güinoi vae. Ërei Tumpa imbaepuere tuicha ete cua reta imbaepuere güi, yepo tēi jae reta ipia pe uyemingueta tēi Tumpa Cristo rupi uyapo vae jucuarāi uyapo mbaeti mbaepuere güinoi ramo. ²⁶ Cherivi reta, pemandúa Tumpa peparavo vae re, yepo tēi jeta'ā co iyaracuua catu vae reta pepite pe - jucuarāi jei chupe reta ivi peguareta - jare jeta'ā co mbaepuere güinoi vae reta, jare jeta'ā co mburuvicha reta iñemoñaa reta. ²⁷ Echa'ā Tumpa uiparavo iyaracuua mbae vae reta cua ivi pegua re vae reta, iyaracuua catu vae reta

uicuaa vaerā iyaracuaa mbae'ā co Tumpa pe. Jae ramiño vi Tumpa uiparavo mbaepuere güinoi mbae vae reta cua ivi pegua re vae reta, mbaepuere güinoi vae reta uicuaa vaerā imbaepuere mbae'ā co Tumpa pe.²⁸ Jae ramiño vi Tumpa uiparavo iparavete vae reta jare uñereriroca vae reta. Uiparavo vi mbaembae uyembutuichaca mbae vae, uicuaaca vaerā mbae'ā co mbaembae uyembutuichaca vae.²⁹ Jare jucuarāi uyapo Tumpa, agüiye vaera quía uyembicate jae jovaque.³⁰ Ërei Tumpa etei peapo penti ramiño Cristo Jesús ndive. Echa'ā Cristo Jesús rupi Tumpa umee yandeve aracuaa. Jae ramiño vi Cristo Jesús rupi Tumpa yanembujipi que ñaneñono tee iyupeguarā jare yanderepi mbaeyoa güi.³¹ Jáeramo yayapo Tumpa iñee pe uyecuatí oí vae ramí. Echa'ā uyecuatí oí cuarāi: "Ime yave quía uipota uyembicate vae, tuyembicate yandeYa re." Jucuarāi uyecuatí oí.

2

Uimbeu quirāi Cristo umano curusu re

¹ Jare aa pepi yave, cheriví reta, amimbeu peve añete vae Tumpa regua. Aipota'ā pepia pe piyemingueta vaerā aicatu co chemiari vaerā ani clearacuaa catu co. ² Echa'ā pepite pe aī rambueve, chequirēi amimbeu peve cuaño - Jesucristo jare quirāi jae umano curusu re. ³ Jare pepite pe aī rambueve, chepia pe ayemingueta aramoi ndarau piyapisaca cheré. Jáeramo arirí aquiyre ramo. ⁴ Jare chemiari peve yave amimbeu vaerā peve ñee icavi vae, aiporu'ā ñee reta cuimbæ iyaracuaa catu vae uioporú vae aicuaaca vaerā peve ñee icavi vae añete co. Echa'ā chemiari peve yave, aicuaaca peve ñee icavi vae añete co Espíritu Santo imbaepuere rupi. ⁵ Jare cua ayapo agüiye vaerā cuimbæ iyaracuaa catu vae jei vae jeco pegua pepurugüirovia. Aipota pepurugüirovia vaerā Tumpa imbaepuere jeco pegua.

Tumpa uicuaaca yandeve Espíritu Santo rupi vae

⁶ Ërei ore nduiporú ñee aracuaa pegua ipirāta ipurugüirovia re vae reta ipite rupi. Ërei cua aracuaa ivi pegua'ā co jare jae'ā vi co ivi pegua reta juvicha reta iyaracuaa. Echa'ā cua juvicha reta immbæ opata. ⁷ Ërei ore ndoe vae aracuaa Tumpa güi ou vae co. Cua aracuaa tenonde yave uyecuaa'ā. Echa'ā tenonde yave Tumpa uicuaaca'ā etei. Ërei iyipí güiive Tumpa iquirēi uicuaaca yandeve cua aracuaa, yayembiasaca vaerā. ⁸ Ërei mbaeti penti ave ivi pegua reta juvicha uicuaa cua aracuaa. Echa'ā mburuvicha reta uicuaa yave mona, ndarau tēi uyuca curusu re yandeYa yembiadora pegua vae. ⁹ Ërei Tumpa iñee pe uyecuatí oí cuarāi:

"Mbaeti quía uecha jare mbaeti quía uyandu jocua mbaembæ Tumpa umicuatíro ma uau Tumpa vae reta pe vae."

Mbaeti vi quía ipia pe uyemingueta jese."

Jucuarāi uyecuatí oí.¹⁰ Ërei Tumpa uicuaaca yandeve Espíritu Santo rupi. Echa'ā Espíritu Santo uicuaa opaete. Uicuaa vi opaete Tumpa regua yavai ete yaicuaa vaerā vae.

¹¹ Penti vae ipuere'ā uicuaa ūru vae ipia pe uyemingueta vae. Jae eteíño uicuaa. Jae ramiño vi mbaeti quiave uicuaa Tumpa ipiayemingueta. Jaéño Tumpa iEspíritu uicuaa. ¹² Jare Tumpa umee ma yandeve Espíritu Santo. Jáeramo yandepia pe yayemingueta'ā ma upurugüirovia mbae vae reta ipia pe uyemingueta rami. Echa'ā Espíritu Santo uicuaaca yandeve mbaembæ Tumpa umee yandeve ipiacavi jeco pegua vae. ¹³ Jare ore numimbeu ūru vae reta pe cua mbaembæ. Ërei nduiporú'ā ñee iyaracuaa catu vae oporomboe jese vae reta. Ore nduiporú ñee Espíritu Santo oremboe jese vae reta: Jáeramo nduicuaaca ūru vae reta pe mbaembæ Espíritu Santo pegua ñee Espíritu Santo oremboe jese vae reta pe.

¹⁴ Ërei upurugüirovia mbae vae uipota'ā güirovia Tumpa iEspíritu oporomboe jese vae. Echa'ā mbae'ā echa chupe. Ipuere'ā uicuaa. Echa'ā jaeño Espíritu Santo ico ipia pe vae ipuere uicuaa.

¹⁵ Echa'ā Espíritu Santo ico ipia pe vae ipuere uicuaa cavi opaete cua mbaembæ. Ërei upurugüirovia mbae vae ipuere'ā uicuaa cavi upurugüirovia vae regua. ¹⁶ Echa'ā mbaeti quía uicuaa cavi yandeYa ipiayemingueta, jare mbaeti quía ipuere omboe yandeve mbaembæ re. Ërei yande yandepia pe yayemingueta Cristo ipia pe uyemingueta rami.

3

Uyeyocui reta Tumpa pe

¹ Cheriví reta, chepuere'ā pumingueta ipirāta ipurugüirovia re vae reta pe ayemingueta rami. Pumingueta jei vae rupiño yugüireco vae reta pe ayemingueta rami jare Cristo re güirovia ramo vae reta pe ayemingueta rami. ² Pe reta co jae sambiai necheño jou vae reta rami. Pe reta jae'ā co ucuacuaa vae tembiú ipuere jou vae reta rami. Echa'ā che pomboe mbaembæ yavai'ā etei yaicuaa vaerā vae re. Chepuere'ā pomboe mbaembæ yavai yaicuaa vaerā vae re. Echa'ā jecuaéño pepuere'ā picuua yavai vae.³ Pe reta pepia pe piyemingueta jei vae rupiño yugüireco vae reta ipia pe uyemingueta rami. Echa'ā peacatáa jare piyovaicho uyupii. Cua uicuaaca quirái pico upurugüirovia mbae vae reta yugüireco rami.

Echa'ā jae reta yugüireco jei vae reño. ⁴ Echa'ā amocue pe reta pere: "Che co jae Pablo regua." Jare īru pe reta pere: "Che co jae Apolos regua." Cua uicuaaca quirāi pepia pe piyemingueta jei vae reño yugüireco vae reta ipia pe uyeminguela rami co.

⁵ Che mbae'ā co, jare Apolos mbae'ā co. Jaeño nduyeyocui yandeYa pe, pe reta perovia vaerā jese. Jare penti nduyapo mbaravíquí yandeYa umee oreve vae. ⁶ Che rani amimbeu peve ñee icavi vae perovia vaerā jare taicue rupi Apolos pembori picuua cavi vaerā. Īrei Tumpa co jae pemimirāta pepurugüirovia re vae. Yamijaanga penti temiti. Che co jae temiti oñoti vae rami, jare Apolos co jae temiti umbiu vae rami. Īrei Tumpa etei umbicuacuaa temiti. ⁷ Jáeramo che mbae'ā co, yepe tēi che co jae temiti oñoti vae rami. Jae ramíño vi Apolos mbae'ā co, yepe tēi jae co temiti umbiu vae rami. Mbaravíquí Tumpa iparavíquí co. Echa'ā jae umbicuacuaa temiti. ⁸ Jare temiti oñoti vae jare temiti umbiu vae uparavíquí penti ramíño. Jare Tumpa umbiepitá penti penti pe iparavíquí rupi. ⁹ Echa'ā ore nduparavíquí nduico Tumpa ndive. Pe reta co jae temiti Tumpa ico pe ñugüinoi vae reta rami. Jae ramíño vi pe reta co jae penti tenta Tumpa uyapo oí vae rami. ¹⁰ Che co jae icatu tenta uyapo vae rami. Jare Tumpa umaeño cheré jae ipiacavi jeco pegua añono vaerā tenta iguapicarā. Jare īru vae co jae tenta oñono oí iguapica iárambo vae rami. Īrei penti penti tuñemoa ngatu quirāi uparavíquí tenta iguapica iárambo. ¹¹ Echa'ā Jesucristo co jae tenta iguapica rami. Tentu iguapica uñeñono ma co. Mbaeti ye co īru tenta iguapica. ¹² Tenta iyapoa reta ipuere oñono tenta iguapica iárambo oro jare corepoti jare ita ipóra ete vae, ani ipuere oñono ivíra reta jare capii jare atiigüile. ¹³ Pentu penti iparavíquí uyecuata co jocua ara Tumpa uicuaaca yave. Echa'ā jocua ara imeta co tata, jare tata uicuaacata mbae nuunga mbaravíquí penti penti uyapo vae. ¹⁴ Mbaravíquí tenta iguapica iárambo uyeyapo vae ocaí'ā yave, Tumpa umbiepitá jocua mbaravíquí uyapo vae pe. ¹⁵ Mbaravíquí ocaí yave, Tumpa ndarau umbiepi jocua mbaravíquí uyapo vae pe. Īrei mbaravíquí uyapo vae etei uyembiasacata co, penti cuimbae oyepetata güi vae rami.

¹⁶ Picuua co quirāi pe reta co jae Tumpa jo jare quirāi Tumpa iEspíritu ico pepia pe. ¹⁷ Ime yave quía Tumpa jo urucumegua vae, jocua Tumpa umbaita. Echa'ā Tumpa jo uñeñono tee Tumpa peguarā. Pe reta co jae Tumpa jo.

¹⁸ Agüiye quía tuyembitavi. Ime yave quía ipia pe uyemingueta iyaracuaa catu co aracuaa iví pegua re vae, tuicuaa uicuaa cavi'ā co mbae. Jucuarāi uicuaa yave, añetete iyaracuaa catuta co. ¹⁹ Echa'ā Tumpa uicuaaca quirāi aracuaa cua iví pegua mbae'ā co. Echa'ā Tumpa íñee pe uyecuatía oí cuarāi: "Tumpa umiamiri iyaracuaa catu vae reta aracuaa jae reta güünoi vae re." ²⁰ Jare: "YandeYa uicuaa quirāi iyaracuaa catu vae reta ipiyemingueta mbae'ā co." Jucuarāi uyecuatía oí. ²¹ Jáeramo agüiye quía tuyembicate cuimbae reta re. Echa'ā Tumpa uyapo opaete mbaembae pembori vaerā. ²² Echa'ā Tumpa umee peve Pablo jare Apolos jare Cefas pembori vaerā. Umee vi peve mbaembae iví pegua piporu vaerā. Jae ramíño vi umee peve tecove pico cavi vaerā, jare pemano yave icavita peve. Opaete añaive uyeyapo vae jare opaete uyeyapota vae icavita peve. ²³ Jare pe reta co jae Cristo imbae, jare Cristo co jae Tumpa imbae.

4

Uyeyocui reta Tumpa pe Tumpa jei vae rupi

¹ Oreré pepia pe piyemingueta yave, pemandúa cua re: Ore co jae Cristo jembiocui reta. Tumpa uicuaaca oreve jocua tenonde yave uyecuua mbae vae, ore nduicuaaca vaerā īru vae reta pe. ² Jare penti upurumimbaravíquí vae jecuaeño uipota jembiocui uyapo vaerā jei vae. ³ Īrei pe reta cherāa yave ani īru vae reta cherāa yave, mbae'ā co cheve. Che añaea'ā vi. ⁴ Yepe tēi aicuaa'ā co mbae ayembijeco jese vaerā, cua uipota'ā jei anoi'ā co teco. Echa'ā yandeYa co jae cherāa vae. ⁵ Jáeramo agüiye ñapuruña añaive. Peáro yandeYa ou ye regua. Echa'ā jae güeruta tembipe opaete mbaembae añaive uñemi pítumimbi pe vae uyecuua cavi vaerā. Echa'ā yandeYa uicuaacata opaete vae ipiyemingueta. Jayave Tumpa umbiyeroviata penti penti. ⁶ Cheriví reta, cua moromboe amimbeu ma peve chiyee jare Apolos re, piyemboe vaerā cua pemingueta oreré vae rupi quirāi icavi'ā pembutuicha vaerā cuimbae retaño. Pepia pe piyemingueta cuimbae reta re uyecuatía oí vae rupiño. Jare agüiye pembutuicha penti vae īru vae güi. Echa'ā jucuarāi piyapo yave, períro jocua īru vae. ⁷ ¿Quía ra co jei nde icavi ete īru vae güi? ¿Mbae ra co nenoí Tumpa umee'ā ndeve vae? Tumpa co umee ndeve opaete nenoí vae. Jáeramo ¿maera pa ndiyembicate? ¿Ndepia pe ndiyemingueta ra Tumpa umee'ā co ndeve?

⁸ Pe reta piyerovia iyangapii vae reta uyerovia rami. Jare piyembicate icocatu vae reta uyembicate rami. Jae ramíño vi piyembicate mburuvicha reta uyembicate rami, jare pepia pe piyemingueta ndipo jucuarāi piyeyapo ore pombori mbae reve. Īrei tome piyeyapo mburuvicha añetete vae retardā, ore vi ndoporoyoci vaerā pe reta ndive. ⁹ Ore co jae Cristo jemimondo reta. Īrei chepia pe ayemingueta quirāi Tumpa oreñono opaete vae jaicue. Ore co jae jocua cuimbae uyeparavo umano vaerā vae reta

rami. Opaete vae umae oreré. Ángel reta umae oreré, jare ívi pegua reta umae oreré. ¹⁰ Ore nduyeyocui Cristo pe ramo, íru vae reta orereni imbiquere vae reta. Ërei pe reta pepia pe piyemingueta pearacuua catu co Cristo re. Ore co jae ipiráta mbae vae reta rami, jare pe reta co jae ipiráta vae reta rami. Pe reta piyepiuca íru vae reta pe, ërei íru vae reta orereríro. ¹¹ Jecuaeñio oriyembai jare oreúe. Jecuaeñio uata oreve temimonde. Íru vae reta orenupa. Mbaeti co orerenta. ¹² Jecuaeñio orecandi nduparavíquí orepo pe. Íru vae reta uyepipeyu oreré, ërei ore nduyerure Tumpa pe uyapo vaerã chupe reta icavi vae. Íru vae reta uyapo mbaembae icavi mbae vae oreve, ërei ore orepiaguasu chupe reta. ¹³ Íru vae reta iyapu oreré, ërei ore oremiari cavi chupe reta. Jecuaeñio íru vae reta oremombo ipite güi, ití jare icavi'á ma uyeporu vaerã vae uyemombo ramí.

¹⁴ Aicuatia'á cuarái pumímaraca vaerã. Pe reta co jae cherivi aau vae reta. Jáeramo cuarái pumbiaracuua. ¹⁵ Echa'á yepe tēi jocua pemboe Cristo re vae reta uyepapa diez mil, ëreijeta'á co peru. Echa'á che co jae Peru mburugüirovia Cristo Jesús regua re. Echa'á che amimbeu peve ñee icavi vae.

¹⁶ Jáeramo che pumiñera pico vaerã peechea che aico rami.

¹⁷ Cua jeco pegua amondo ma peve Timoteo. Jae co cherivi aau vae, jare jae uyeyocui cavi yandeYa pe. Jae pemimanduata co quirái che aico Cristo re, jare quirái cuarái amboe opaete upurugüirovia vae uyembatimbatí vae reta opaete que rupi. ¹⁸ Ërei amocue pepite pe ñugüinoi vae uyembutuicha, ipia pe uyemingueta tēi ndarau ma aa pepi ramo. ¹⁹ Ërei aata imambaeño pepi, yandeYa uipota yave. Jare aa yave, aicuaata mbae ipuere uyapo jocua uyembutuicha vae reta. Ndarau apirandu mbae ra jei reta. ²⁰ Echa'á yayeyocui Tumpa pe yave, ñanói mbaepuere. Yayeminguetaño'á. ²¹ ¿Mbae nunga ra pipota? ¿Pipota ra aa vaerã pepi aiporaraca peve vaerã? Ani ¿pipota ra añemimichi reve aicuaaca vaerã peve chepuraua?

5

Menda re uyuvanga vae uñeáda

¹ Jeta vae uicuaa quirái penti pepite pe oí vae güireco ichi-raanga. Jocua uyuvanga menda re vae mbae pichíi ete vae uyapo. Echa'á uicuaa'á Tumpa vae reta umaeño'á etei uyapo vaerã jucuarái. ² Aguiyeta tēi piyembicate mbae re. Pemara eteta tēi ma cua re. Pemombota tēi pepite güi jocua cuimbae jucuarái jeco vae. ³ Echa'á yepe tēi che aí'á co pepi, ërei jecuaeñio chepia pe ayemingueta peré, jare aña ma jocua cuimbae jucuarái jeco vae. Jucuarái aáata tēi pepi aí yave. ⁴ Piyembati yave pembiadura vaerã yandeYa Jesús, pemandúa quirái che chepia pe ayemingueta aí peré jare quirái yandeYa Jesús imbaepuere penoita co. ⁵ Aguiye pemaeño jocua cuimbae re uyembati vaerã pe reta ndive. Jucuarái imarata uyapo vae re, jare jecove uyembiasacata yandeYa ou ye yave.

⁶ Icaví'á co piyembicate pico vaerã. Picuua co jocua yae vae: "Mbovíño levadura umbiayasi opaete masa uñemonia vae." ⁷⁻⁸ Yamijaanga judío reta pascua pe uyapo vae. Echa'á judío reta omombo mbiyape indechi vae levadura güinoi vae, jare fiesta uyapo yave jou mbiyape ipiau vae levadura güinoi mbae vae. Jae ramíno vi pe reta co jae mbiyape ipiau vae levadura mbaeti güinoi vae ramí. Jáeramo agüiye ma yayapo icavi mbae vae yayapose vae. Echa'á Cristo uyeyucaca yanderé, pascua pe maemimba reta uyeyucada uñemeevaerã Tumpa pe ramí. Jáeramo jecuaeñio yayapo icavi vae añete vae rupi.

⁹ Che aicuatía peve íru tupapire, jare joco pe che moyocui agüiye vaerã piñemíru aguasa uyapo vae reta ndive. ¹⁰ Poyocui'á etei piyembiyao vaerã opaete cua ívi pegua aguasa uyapo vae reta güi, jare íru vae reta imbaembae uipota vae reta güi, jare íru vae reta güi imbaembae upíro vae reta güi, jare tumpa-raanga reta umbiadura vae reta güi. Echa'á jucuarái piyapo yave, pepueretá'á tēi pico cua ívi pe. ¹¹ Ërei aicuatía co peve agüiye vaerã piñemíru penti upurugüirovia vae jei iyupe vae ndive aguasa uyapo yave, ani íru vae reta imbaembae uipota yave, ani tumpa-raanga reta umbiadura yave, ani icavi mbae vae japicha reta cotí jei yave, ani jecuaeñio usavípo yave, ani íru vae reta güi imbaembae upíro yave. Agüiye etei pecaru jocua nunga ndive. ¹²⁻¹³ Echa'á chepuere'á etei aña upurugüirovia mbae vae reta. Tumpa uáata co jocua reta. Ërei pe reta penoi mbaepuere peáa vaerã upurugüirovia vae reta. Jáeramo pembisiri pepite güi cuimbae jocua icavi mbae vae uyapo vae.

6

Ñeapo reta

¹ Ime yave quía pepite pe oí vae íru vae mbae re umbijeco vae, icavi'á co uñeapo vaerã íru vae re upurugüirovia mbae vae reta pe. ¿Maera pa uñeapo'á jese uñeñono tee Tumpa peguarã vae reta pe? ² ¿Picuua'á pa uñeñono tee Tumpa peguarã vae reta uáata co ívi pegua reta? Jáeramo ¿maera pa pepuere'á pepuruáa mbaembae yaval'á ñapuruáa jese vaerã vae re? Echa'á pe reta peáata ívi pegua reta. ³ Picuua co quirái yande ñaáata ángel reta. Jáeramo ¿maera pa pepuere'á pepuruáa cua ívi pegua teco re? Echa'á cua mbaembae yaval'á co ñapuruáa jese vaerã. ⁴ Jáeramo ime yave quía íru vae cua ívi

pegua teco re umbijeco vae, agüiye pemaeno upurugüirovia mbae vae reta re uña vaerä. ⁵ Cuaräi jae pumimaraca vaerä. ¿Mbaeti pa co penti iyaracua catu vae pepite pe? ¿Mbaeti pa quia pepite pe penti ñeapo ipuere uyapicatu vae? ⁶ Echa'ã upurugüirovia vae reta uñeapo iyee upurugüirovia mbae vae reta pe.

⁷ Ërei jucuaräi piñeapo piyee yave, penti teco tuicha vae co. Agüiye piñeapo piyee, yepe tẽi penti vae uyapo icavi mbae vae ūru vae pe ani penti vae umbitavi ūru vae. ⁸ Pe reta piyapo icavi mbae vae ūru upurugüirovia vae reta pe jare pembitavi ūru upurugüirovia vae reta.

⁹ Picuua co quiräi jupi mbae vae reta ndarau ico Tumpa iporoyocua pe. Agüiye piyembitavi. Aguasa uyapo vae reta, jare tumpa-raanga umbiadora vae reta, jare menda re uyuvanga vae reta, jare cuimbæ uyupii uyereco vae reta, ¹⁰ jare imonda vae reta, jare ūru vae reta imbaembæ uipota vae reta, jare usavipo vae reta, jare uyepipeyu vae reta, jare ūru vae reta güi imbaembæ upiro vae reta ndarau ico Tumpa iporoyocua pe. ¹¹ Jare jucuaräi piyapose amocue pe reta. Ërei yandeYa Tumpa iEspíritu oyoe pegüi opaete cua mbaembæ icavi mbae vae, jare peñono tee Tumpa peguarä, jare pembujupi. Cuaräi ueyapo peve yandeYa Jesucristo jee re.

Pembiadora Tumpa perete pe

¹² Chepuere ayapo opaete aipota vae. Ërei icavi'ã opaete ayapo vaerä. Añete co, chepuere ayapo opaete aipota vae. Ërei ndarau che amaeñoca cheré mbae pe. ¹³ Tembíu yanderie peguarä co, jare yanderie tembíu pegua co. Ërei Tumpa umbaita co mocui reve. Ërei ñanoi'ã yanderete yayapo vaerä aguasa. Ñanoi yanderete yayeyocu vaerä yandeYa pe, jare yandeYa ipuere umee yandeve opaete yanderete uipota vae. ¹⁴ Jare Tumpa umbijecove ye yandeYa güeru umanocue vae reta ipite güi. Jae ramíño vi umbijecove yeta yanderete güeru umanocue vae reta ipite güi imbaepuere pe.

¹⁵ Picuua co perete co jae Cristo jete pegua. Jáeramo agüiye etei peya cuña iaguasapota vae re. ¹⁶ ¿Picuua'ã pa quiräi cuimbæ uñemiíru penti cuña iaguasapota vae ndive vae uyeyapo pentiño jae ndive? Echa'ã Tumpa jei cuaräi: "Mocui reve uyeyapota penti ramíño." Jucuaräi jei. ¹⁷ Ërei jocua uñemiíru yandeYa ndive vae uyeyapo pentiño yandeYa ndive Espíritu Santo rupi.

¹⁸ Agüiye piyapo aguasa. Opaete ūru mbaeyoa piyapo vae piyapo'ã co perete pe. Ërei aguasa piyapo yave, perete coti etei mbaeyoa piyapo. ¹⁹ ¿Picuua'ã pa perete co jae Espíritu Santo ico pipe vae? Echa'ã Tumpa ombou peve Espíritu Santo, jare jae ico pepia pe. Jáeramo pe reta pico'ã ma piyupeguarä. ²⁰ Echa'ã Tumpa umbiepi jeta peré, peapo vaerä jae imbaerä. Jáeramo pembiadora Tumpa perete pe jare perecove pe. Echa'ã mocui reve Tumpa imbae co.

7

Menda regua

¹ Añave aipota aicuatía peve jocua mbaembæ picuatía cheve jese vae re. Icavi tẽi co cuimbæ agüiye vaerä güireco cuña. ² Ërei agüiye vaerä piyapo aguasa, penti penti cuimbæ tugüinoi jembireco jare penti penti cuña tugüinoi imei. ³ Cuimbæ tuico jembireco ndive, uyupii reta icavi yugüireco vaerä vae rupi. Jae ramíño vi cuña tuico ime ndive, uyupii reta icavi yugüireco vaerä vae rupi. ⁴ Cuña ipuere'ã uyapo jete pei jae uipota uyapo vae rupi. Echa'ã jete ime imbae co. Jae ramíño vi cuimbæ ipuere'ã uyapo jete pei jae uipota uyapo vae rupi. Jae jete jembireco imbae co. ⁵ Mocui reve pipota'ã pepoco piyee yave mbovi ara pegua piyerure vaerä Tumpa pe, icaviño jucuaräi piyapo. Ërei agüiye piyeyea etc. Taicue rupi pepoco ye piyee, agüiye vaerä Satanás pe perégua pepuera'ã ma piyopia yave perete uipota vae güi. ⁶ Ërei cua che jae peve picuua vaerä mbae icavi piyapo vaerä. Poyocu'ã co mbae re. ⁷ Ërei aipota tẽi opaete cuimbæ reta yugüireco vaerä che aico rami. Ërei penti penti güinoi Tumpa umee chupe vae. Jare Tumpa umee penti vae pe vae uyuaví umee ūru vae pe vae güi.

⁸ Jáeramo che jae ndeiño umenda vae reta pe jare ime umano vae reta pe cua: Icavi tẽi co agüiye vaerä umenda, che amenda'ã rami. ⁹ Ërei ipuere'ã yave oyopia jete uipota vae güi, icavi co umenda vaerä. Echa'ã ipuere'ã yave uyapo jete uipota ete uyapo vae, uiporara eteta co. Jáeramo icavi co umenda vaerä.

¹⁰ Jare ayocui umenda vae reta cuaräi - Ërei cheño'ã ayocui, echa'ã yandeYa vi oyocui cuaräi: Cuña agüiye tomombo ime. ¹¹ Ërei omombo yave ime, tuico umenda mbae reve, ani tuñatima ye ime pe tuico ye jae ndive. Jare cuimbæ agüiye tomombo jembireco.

¹² Ërei ūru reta pe che jae cua - mboroyocu yandeYa umee vae'ã co: Ime yave penti cuimbæ upurugüirovia vae jare jembireco upurugüirovia'ã yave, jembireco uipota yave ico jae ndive, agüiye tomombo. ¹³ Jae ramíño vi ime yave penti cuña upurugüirovia vae jare ime upurugüirovia'ã yave, ime uipota yave ico jae ndive, agüiye tomombo. ¹⁴ Echa'ã cuimbæ upurugüirovia mbae vae aramoi güiroviata Cristo re jembireco upurugüirovia vae jeco pegua. Jae ramíño vi cuña upurugüirovia mbae vae aramoi güiroviata Cristo re ime upurugüirovia vae jeco pegua. Jare uyemombo reta yave,

isambiaī reta ndarau ndipo güirovia Cristo re. Êrei uyemombo'ã reta yave, aramoí güiroviata Cristo re.¹⁵ Êrei upurugüirovia mbae vae omombo yave upurugüirovia vae, cua mboroyocui amimbue peve vae upurugüirovia vae peguarã'ã co. Echa'ã Tumpa yandeparavo yaico cavi vaerã yandepiacatu reve.¹⁶ Echa'ã nde, cuña, ndicuaa'ã uyembiasacata ra neme ndereco pegua. Jae ramíño vi nde, cuimbae, ndicuaa'ã uyembiasacata ra nembireco ndereco pegua.

¹⁷ Êrei penti penti jecuaeño tuyapo mbaraviqui yandeYa umee chupe uyapo vaerã vae. Penti penti tuico, Tumpa ueni uyembiasaca vaerã yave ico ramí. Jare jucuarãi ayocui opaete upurugüirovia vae uyembatimbiat vae reta.¹⁸ Aramoí Tumpa ueni uñemicircuncidaca vae uyembiasaca vaerã. Tupita jucuarãiño. Jae ramíño vi aramoí Tumpa ueni uñemicircuncidaca mbae vae uyembiasaca vaerã. Agüiye tuñemicircuncidaca.¹⁹ Nañemicircuncidaca yave, mbae'ã co. Jae ramíño vi nañemicircuncidaca'ã yave, mbae'ã co. Jaeño icavi yayapo vaerã Tumpa iporoyocui reta.²⁰ Penti penti jecuaeño tuico Tumpa ueni uyembiasaca vaerã yave ico ramí.²¹ Aramoí Tumpa ueni penti uyeyocui vae uyembiasaca vaerã. Agüiye tipiatiti jocua re. Êrei ipuere yave uyeyora ipatrón güi, icavi co uyapo vaerã.²² Echa'ã yandeYa ueni yave uyeyocui vae uyembiasaca vaerã, yandeYa oyora ma opaete imbaeyoa güi. Jae ramíño vi yandeYa ueni yave uyeyocui mbae vae uyembiasaca vaerã, jae uyeyapo ma Cristo jembiocuirã.²³ Tumpa umbiepi ma perepi vaerã. Jáeramo piyeyocui chupe.²⁴ Cherivi reta, penti penti tuico Tumpa ueni uyembiasaca vaerã yave ico ramí. Jucuarãi tuyeyocui Tumpa pe.

²⁵ Añave taicuatía peve ndeiño umenda vae re. Anoi'ã mboroyocui yandeYa güi jesegua. Êrei che tupumbiaracuaa. Jare pepuere chererovia, yandeYa cheparareco ramo.²⁶ Jáeramo che jae icavi co penti cuimbae oĩ vaerã añave oĩ ramí, cua ara reta pe yaiporara ramo.²⁷ Jocua cuimbae umenda ma vae agüiye tomombo jembireco. Jare jocua cuimbae ndeiño umenda vae, agüiye tueca jembirecorã.²⁸ Êrei umenda yave, iyoa'ã co. Jae ramíño vi cuñatai umenda yave, iyoa'ã vi co. Êrei yemipiã'ã ivi pegua güinoita umenda vae reta, jare che aipota'ã piyemipiã'ã vaerã jucuarãi.

²⁹ Êrei che jae peve cua, cherivi reta: Mbaetita ma íma yaico vaerã. Jáeramo mbaeti ma tiempo jembireco güinoi vae reta uyemipa'ã ete vaerã jembireco re.³⁰ Jae ramíño vi mbaeti ma tiempo ipiatiti vae reta uyao vaerã. Jae ramíño vi mbaeti ma tiempo uyerovia vae reta upuca vaerã. Jae ramíño vi mbaembae ogua vae reta mbaeti ma güinoi tiempo opa vaerã uiporu imbaembae.³¹ Jare mbaembae cua ivi pegua uiporu vae agüiye tuipota ete. Echa'ã mbaembae cua ivi pegua opata co.

³² Êrei aipota'ã mbae pemipiã'ã vaerã. Cuimbae umenda mbae vae uyandareco yandeYa iparaviqui re. Echa'ã uipota umbiyerovia yandeYa.³³ Êrei cuimbae umenda vae uyandareco mbaembae ivi pegua re. Echa'ã uipota umbiyerovia jembireco.³⁴ Jae ramíño vi cuña ime reve vae uyuaví cuñatai ndeiño umenda vae güi. Echa'ã ndeiño umenda vae uyandareco yandeYa iparaviqui re. Echa'ã uipota jete jare jecove uñeñono tee vaerã Tumpa peguarã. Êrei umenda vae uyandareco mbaembae ivi pegua re. Echa'ã uipota umbiyerovia ime.

³⁵ Jare cua che jae peve icavi peve vaerã. Aipota'ã etei poyopia menda güi. Jaeño aipota piyapo vaerã jocua icavi piyapo vaerã vae, pepuere vaerã piyeyocui yandeYa pe piyemipiã'ã mbae reve.

³⁶ Êrei penti cuimbae uicuaa yave uyapo'ã co jupi vae tayi ndeiño umenda vae coti - echa'ã aramoí tayi tairusu'ã ma jare uipota tẽi umenda. Tumaeño tayi re umenda vaerã. Jucuarãi uyapo yave, iyoa'ã co.³⁷ Êrei aramoí iru cuimbae ipia pe ipirata jare güinoi mbaepuere uyapo vaerã iquirëi uyapo vae yepe tẽi yavai chupe, jare jae ipia pe uyemingueta cavi tayi re agüiye vaerã umaeño jese umenda vaerã. Jucuarãi yave, icavi uyapo.³⁸ Jáeramo cuimbae umaeño tayi re umenda vaerã vae icavi uyapo. Êrei cuimbae umaeño'ã tayi re umenda vaerã vae icavi ete uyapo.

³⁹ Mboroyocui jei vae rupi cuña ime pegua co ime ico rambuve. Êrei ime umano yave, cuña ipuere umenda ye jae uipota vae ndive. Êrei tumenda cuimbae yandeYa re güirovia vae ndive.⁴⁰ Êrei che jae icavi eteta co chupe umenda'ã ye yave. Jare aicuaa Tumpa iEspíritu chembiaracuaa che jae vaerã cuarãi.

8

Soo uñemee tumpa-raanga pe vae

¹ Añave taicuatía peve soo uñemee tumpa-raanga pe vae re. Añete co, opaete yaicuaa cua regua. Yaicuaafio yave yayembicte co, ñrei yayerau yave nañemimirata co.² Ime yave quia ipia pe uyemingueta iyee uicuaa co mbaembae, jae uicuaa'ã viteño mbae uicuaata tẽi vae.³ Êrei ime yave quia uau Tumpa vae, Tumpa uicuaa cua nunga.

⁴ Jayave yayemingueta soo uñemee tumpa-raanga pe vae re. Yaicuaa co tumpa-raanga güinoi'ã co tecove. Jare yaicuaa vi Tumpa pentiño co.⁵ Ime mbaembae ivi pegua reta umbijee tumpa vae. Cua mbaembae ñugüinoi ivi pe jare ara re. Jeta co jocua tumpa reta, jare jeta vi co ivi pegua iya reta.⁶ Êrei

yande yaicuua ime co pentiño Tumpa. Jae co yandeRu. Jae uyapo opaete, jare yande yaico yambiadora vaerā. Ime vi co pentiño yandeYa. Jae co Jesucristo. Jae vi uyapo opaete, jare jae umee yandeve tecove.

⁷ Ërei ime amocue cua regua uicuua mbae vae. Echa'ã jae reta tenonde yave umbiadora tumpa-raanga, jare jecuaño ipia pe uyemingueta quirāi soo jou vae uñemee co tumpa-raanga pe. Jáeramo jou yave, ipia pe uyemingueta tēi mbae icavi mbae vae co uyapo oī. Echa'ã ipirāta'ã ipurugüirovia re.

⁸ Ërei yau yave, mbae'ã co Tumpa pe. Echa'ã yau yave, Tumpa ndarau jei mbae icavi vae co yayapo. Jare yau'ã yave, Tumpa ndarau jei mbae icavi mbae vae co yayapo. ⁹ Pepuere peu jocua nunga soo. Ërei piñemoa agüiye vaerā cua piyapo vae rupi jocua ipirāta'ã ipurugüirovia re vae uyapo mbae icavi mbae echu chupe vae. ¹⁰ Echa'ã nde ndicuaa cavi co cua regua. Ërei jocua ipirāta'ã ipurugüirovia re vae nderecha yave ndeguapi neí tumpa-raanga jo pe soo ndeu vaerā, aramoi jae ipia pe uyemingueta jae vi co ipuere jou soo uñemee tumpa-raanga pe vae. ¹¹ Jáeramo ipirāta'ã ipurugüirovia re vae opiaa ndipo nde ndicuaa ndiyupe vae jeco pegua. Ërei jese vi co Cristo humano. ¹² Jáeramo jucuarāi peyoa yave íru upurugüirovia vae ipurugüirovia re ipirāta'ã vae coti, Cristo coti peyoa vi co. Echa'ã jocua íru upurugüirovia vae uyapo mbae ipia pe uyemingueta tēi icavi'ã uyapo vaerā vae. ¹³ Jáeramo íru upurugüirovia vae iyoa yave che jau vae jeco pegua, ndarau ye jau soo, agüiye vaerā íru upurugüirovia vae iyoa ayapo vae jeco pegua.

9

Temimondo ipuere uyapo vae

¹ Che vi chepuere ayapo che aipota vae rupi. Echa'ã che co jae penti temimondo. Che aecha yandeYa Jesús. Jare pe reta perovia yandeYa re che aparavíqui chupe ramo. ² Aramoi íru vae reta jei'ã che co jae penti temimondo. Ërei pe reta picuua cavi che co jae penti temimondo. Echa'ã pe reta perovia yandeYa re, jare cua uicuaca che co jae penti temimondo.

³ Cua co che jae iñera cheré vae reta pe: ⁴ Orepueco ndou ipotave tembíu. ⁵ Nduipota yave, ore vi orepuere numenda cuña upurugüirovia vae ndive jare ndugüira orerupfē, íru temimondo reta jare yandeYa tivi reta jare Pedro uyapo ramo. ⁶ Aramoi pepia pe piyemingueta tēi jaeño Bernabé jare che orepuere'ã nduico nduparavíqui mbae reve. ⁷ Ime yave quía oo uñeráro vaerā vae, omondo vae umbiepi co chupe. Uva oñotí vae jou co uva iaque. Jae ramíño vi ovecha reta re uyandareco vae jou co ovecha inche. ⁸ Cua mbaembae che jae ívi pegua reta jei ramíño. Ërei jucuarāi vi jei mboroyocui. ⁹ Echa'ã Moisés iporoyocui pe uyecuatía oī cuarāi: "Güeye trigo umbipiriri oī yave, agüiye iyuruyocua." Jucuarāi uyecuatía oī. Ërei Tumpa cua jei yave, jei'ã co güeye reta reño. ¹⁰ Jei vi oreré. Echa'ã ore co jae co pe uparavíqui vae reta ramíño. Umaeti vae jare trigo umbipiriri vae uñro pâve yelerovia reve. Echa'ã mocui reve uipta ucaru iparavíqui güi. ¹¹ Ore co jae umaeti vae ramíño. Echa'ã numimbeu peve mbaembae Espíritu pegua. Jae ramíño vi ore co jae umbaeviro vae ramíño. Echa'ã yavaita'ã tēi peve ore nonoi vaerā mbaembae ívi pegua jocua penoi vae güi. ¹² Íru vae reta ipuere yave güinoi mbaembae pegüi, orepuere eteta tēi chugüi reta. Ërei yepe tēi orepuere nonoi mbaembae pegüi, ërei nduyerure'ã peve jese. Opaete numíguanta, agüiye vaerā numbiavai ñee icavi vae Cristo regua. ¹³ Picuua'ã pa quirāi Tumpa jo pe uparavíqui vae reta jou tembíu Tumpa jo pegua? Echa'ã maemimba uyeyucacue Tumpa pe uñemeearenda pe vae uparavíqui vae reta jou maemimba uyeyucacue isoo. ¹⁴ Jae ramíño vi yandeYa oyocui íru vae reta umbiepi vaerā ñee icavi vae umimbeu vae reta pe. ¹⁵ Ërei che aipota'ã etei íru vae reta umbiepi vaerā cheve. Aicuatiá'ã vi cua mbaembae peve, pe reta pembiepi vaerā cheve. Ayerovia cua chepuere jae peve vae re. Icavi ete co amano vaerā pe reta pembiepi cheve vaeráve.

¹⁶ Yepe tēi amimbeu ñee icavi vae, ërei ayembicate'ã etei. Echa'ã yandeYa cheocui amimbeu vaerā. Amimbeu'ã yave ñee icavi vae, aramoi mbae icavi mbae vae uyeyapota cheve. ¹⁷ Echa'ã che ayapo yave cua mbaravíqui che etei aipota ramíño, icavita tēi íru vae reta umbiepi vaerā cheve. Ërei ayapo cua mbaravíqui, yandeYa cheocui ayapo vaerā ramíño. Jáeramo ñee icavi vae amimbeu yave, ayeyocui aí Tumpa pe. ¹⁸ Ayerovia ete quirāi amimbeu ñee icavi vae acovara mbae reve. Jare Tumpa umbiepi cheve cua yerovia anoi vae pe. Echa'ã yepe tēi amimbeu ñee icavi vae, jare yepe tēi icavi co íru vae reta umbiepi vaerā ñee icavi vae umimbeu vae pe, ërei che aipota'ã íru vae reta umbiepi vaerā cheve.

¹⁹ Jáeramo íru vae reta ipuere'ã cheocui mbae ayapo vaerā. Ërei ayeyapo ma opaete vae jembiociurā, jeta vae güirovia vaerā Cristo re chereco pegua. ²⁰ Judío reta ndive aico yave, che aico vi penti judío ico ramíño, judío reta güirovia vaerā Cristo re chereco pegua. Mboroyocui jei vae uyapo vae reta ndive aico yave, che aico vi penti mboroyocui jei vae uyapo vae ico ramíño, jae reta vi güirovia vaerā Cristo re chereco pegua. Cuarāi ayapo, yepe tēi añave aico'ã ma mboroyocui jei vae re. ²¹ Moisés iporoyocui güinoi'ã vae reta ndive aico yave, che aico vi penti Moisés iporoyocui güinoi'ã vae ico ramíño, jae reta vi güirovia vaerā Cristo re chereco pegua. Cua uipta'ã jei aico'ã ma Tumpa iporoyocui re. Echa'ã che aico Cristo iporoyocui re. ²² Ipirāta'ã ipurugüirovia re vae reta ndive aico yave, che aico vi penti

ipirātaã ipurugüirovia re vae ico rami, jae reta vi güirovia vaerā Cristo re chereco pegua. Jecuaeño ayembayoqave penti penti ndive, amocue vae uyembiasaca vaerā chereco pegua.²³ Jare opaete cua ayapo ūru vae reta güirovia vaerā ñee icavi vae, jae reta uñemíru vaerā che ndive.

²⁴ Pe reta picuua co quirāi amocue vae uñeñocui yave, opaete jae reta osi, ērei pentiño upurumiamiri jare güinoi upurumiamiri vae pe uñemee vae. Pico penoi vaerā upurumiamiri vae pe uñemeeta vae.

²⁵ Jare penti penti uiporta upurumiamiri vae uyequacu opaete mbaembae icavi'ã chupe vae güi. Jare jae reta jucuarāi uyapo güinoi vaerā upurumiamiri vae pe uñemee vae imambae icumegua vae. ērei yande yaipota ñanoi mbae jaeno mai pegua icota vae.²⁶ Jáeramo che aico penti uñeñocui vae simi osi vae rami, mbaeti osiño vae rami. Che aico penti uñerāo vae uiporta upurumiamiri vae rami.²⁷ Echa'ã aiporaraca cherete pe, uyapo vaerā che aipota uyapo vaerā vae, agüiye vaerā che etei anoi'ã upurumiamiri vae pe uñemeeta vae, yepe tēi amimbeu ūru vae reta pe.

10

Tumpa-raanga regua

¹ Jare aipota picuua cavi vaerā, cherivi reta, quirāi opaete Israel pegua reta yugüiraa jocua amapitú igüi pe, jare opaete jae reta uasa i guasu. ² Jare opaete vae uyeyapo pentiño Moisés ndive amapitú igüi pe yugüiraa yave jare i guasu uasa reta yave. ³ Jare opaete vae jou tembiú Espíritu Santo umee chupe reta vae. ⁴ Jare opaete vae jou i Espíritu Santo umee chupe reta vae. Jare opaete vae jou jocua ita Espíritu pegua jae reta jupié oo vae güi. Jare jocua ita Cristo co. ⁵ ērei Tumpa pochi jeta vae pe. Jáeramo opa uyucaca ueya ñana pe.

⁶ Jare Tumpa uechaca yandeve cua mbaembae uyeyapo chupe reta vae, agüiye vaerā yande yaipota mbaembae icavi mbae vae jae reta uiporta vae rami. ⁷ Jáeramo agüiye pembiadura tumpa-raanga, amocue jae reta umbiadura tumpa-raanga rami. Echa'ã Tumpa iñee pe uyequatía oí cuarāi: "Jae reta uguapi ucaru vaerā. Jayave upúa reta upirae vaerā." Jucuarāi uyequatía oí. ⁸ Agüiye vi yayapo aguasa, amocue jae reta uyapo rami. Jare jucuarāi uyapo ramo, umano veintitrés mil jocua ara. ⁹ Agüiye vi yayapo icavi mbae vae yaicuua vaerā tuicha ra yandeYa ipiaguasu. Echa'ã jucuarāi uyapo amocue jae reta, jare uyucaca reta mboi reta pe. ¹⁰ Agüiye vi piñeenguru yandeYa coti. Echa'ã jucuarāi uyapo amocue jae reta, jare Tumpa uyucaca penti ángel pe.

¹¹ ērei Tumpa uechaca opaete cua mbaembae uyeyapo chupe reta vae, jare uyequatía oí yanembiaracua vaerā. Echa'ã yande yaico ara taicuegua vae reta pe. ¹² Jáeramo ipia pe uyemingueta ipirāta co ipurugüirovia re vae tuñemoa ngatu agüiye vaerā iyoa. ¹³ Jecuaeño aña guasu pepiáro uyavica peve vaerā. Echa'ã jucuarāi uyapo opaete vae pe. ērei jecuaeño pepuere perovia catu Tumpa pembori vaerā. Echa'ã Tumpa ndarau umaeño peréguia ete vaerā aña guasu pe. Echa'ã aña guasu pepiáro yave, Tumpa uicuacata peve quirāi pepuere piyapo agüiye vaerā peyoa, jare jucuarāi pepuereta pemiamiri aña guasu.

¹⁴ Jáeramo, cherivi reta, agüiye pembiadura tumpa-raanga. ¹⁵ Che jae cua peve, jare chepia pe ayemingueta pe reta co jae iyaracuaa vae reta. Pe reta etei pepuere picuua añete ra cua che jae peve vae. ¹⁶ Ñamee yasurupai yandeYa pe jocua vino re. Vino uyemijaanga icavi vae yandeYa uyapo yandeve vae re. Jucuarāi yayapo yave, yaicuaca quirāi yande ñai pentiño Cristo ndive Cristo jugüi uyepiyere vae jeco pegua. Jae ramíño vi ñapisää yave mbiyape, yaicuaca quirāi yande ñai pentiño Cristo ndive Cristo jete umano vae jeco pegua. ¹⁷ Echa'ã yepe tēi yande co jeta vae, ērei yande co jae Cristo jete pegua reta. Jáeramo yande ñai penti rami. Echa'ã mbiyape pentiño co, jare opaete vae yau jocua mbiyape.

¹⁸ Yamijaanga Israel pegua reta. Jae reta jou maemimba uyeyucacue Tumpa pe uñemee vae isoo, jare jucuarāi uicuacata quirāi jae reta uñemíru Tumpa ndive jocua maemimba uyeyucacue vae jeco pegua. ¹⁹ Aipota'ã etei jae penti tumpa-raanga co jae penti tumpa añetete vae. Aipota'ã vi jae soo tumpa-raanga pe uñemee vae ūru soo ramíño co. ²⁰ ērei che jae peve cua: Jocua reta umee maemimba uyeyucacue vae isoo aña reta pe. Umee'ã Tumpa pe. Jare aipota'ã piñemíru vaerā aña reta ndive. ²¹ Icavi'ã etei peu vaerā vino uyemijaanga yandeYa jugüi re vae vino aña reta pe uñemee vae ndive. Jae ramíño vi icavi'ã etei peu vaerā mbiyape uyemijaanga yandeYa jete re vae aña reta pe uñemee vae ndive. ²² Agüiye ñamíñemiro yandeYa aña reta pe. YandeYa ipuere ete co yandegüi.

Opate mbae piyapo vae rupi pembiadura Tumpa

²³ Chepuere ayapo opaete aipota vae. ērei icavi'ã opaete ayapo vaerā. Añete co, chepuere ayapo opaete aipota vae. ērei opaete'ã yanembori ñanepirāta vaerā. ²⁴ Agüiye quía tuyapo jae uiporta uyapo vaeño. Penti penti tuipota tombori ūru vae reta.

²⁵ Pepuere peu ipotave soo mercado pe uñemee vae. Agüiye pepirandu uñemee ra tumpa-raanga pe. Echa'ã picuua yave, aramoi pepia pe piyemingueta jupi'ã co peu vaerā. ²⁶ Echa'ã cua ivi jare opaete ivi pegua co jae yandeYa imbae.

²⁷ Penti upurugiürovia mbae vae uparea yave peve pecaru vaerā jae ndive, pipota yave peo, peu ipotave umee peve peu vaerā vae. Agüiye pepirandu uñemee ra soo tumpa-raanga pe. Echa'ā picuua yave, aramoi pepia pe piyeminguetata jipi'ā co peu vaerā. ²⁸ Ërei aramoi uparea peve vae jeita peve: "Uyucu reta cua maemimbä umee vaerā tumpa-raanga pe." Jucuarāi jei peve yave, agüiye peu umimbeu peve vae jeco pegua. Echa'ā aramoi jae ipia pe uyeminguetata jipi'ā co peu vaerā. ²⁹ Añave chemiari aí íru vae ipia pe uyeminguetata jecuuaeño: "Ërei ñmaera pa ndere cheve chepuera'ā co jau soo íru vae ipia pe uyeminguetata jese vae jeco pegua?" ³⁰ Echa'ā jecuuaeño che amee yasurupai Tumpa pe cherembü re. Jáeramo ñmaera pa chembijeo jese? Echa'ā amee yasurupai Tumpa pe jese." Jucuarāi ndipo pepia pe piyeminguetata. ³¹ Ërei che jae peve cua: Jecuuaeño pembiadura Tumpa. Opaete mbaembæ peu vae rupi jare opaete mbaembæ piyapo vae rupi pembiadura Tumpa. ³² Agüiye piyapo icavi mbae echa íru vae reta pe vae - judío reta pe, jare judío mbae vae reta pe, jare Tumpa uiiparavo vae reta pe. Echa'ā piyapo yave, aramoi pembiavaita. ³³ Jucuarāiño vi che ayapo opaete mbaembæ icavi echa opaete íru vae reta pe vae. Aico'ā che ayembiyerovia vaeraño. Jaeño aipota ambori jeta íru vae reta, jae reta uyembiasaca vaerā.

11

¹ Pico che aico rami. Echa'ā jecuuaeño che aico Cristo uipota aico vaerā rami.

Cuña reta jemimonde

² Jare ayerovia peré, cherivi reta, quirái jecuuaeño pemandúa cheré, jare jecuuaeño piyapo che amimbeu peve rami. ³ Ërei aipota picuua vaerā cua: Cuimbae reta uyeyocui Crísto pe, jare cuña reta uyeyocui ime pe, jare Crísto uyeyocui Tumpa pe. ⁴ Penti cuimbaeuyerure Tumpa pe yave ani umimbeu Tumpa iñee íru vae reta pe yave, uñeäcasoí reve, penti ñemimaraca co. ⁵ Ërei penti cuñauyerure Tumpa pe yave ani umimbeu Tumpa iñee íru vae reta pe yave, uñeäcasoí mbae reve, penti ñemimaraca vi co. Echa'ā jae oyovaque cuña opaete iñäca uñeäpi vae ndive. ⁶ Cuña uñeäcasoí mbae vae tuñeäpi ía. Echa'ā penti ñemimaraca co cuña ía chutu ete yave ani opaete iñäca uñeäpi yave. Jáeramo cuña tuñeäcasoí. ⁷ Añete co, icavi'ā cuimbae uñeäcasoí vaerā. Echa'ā cuimbaeuyemijaanga Tumpa re jare Tumpa yaruanda vae re. Ërei cuñauyemijaanga cuimbae yaruanda vae re. ⁸ Echa'ā Tumpa uyapo'ā cuimbae cuña güi. Uyapo cuña cuimbae güi. ⁹ Jae ramíño vi Tumpa uyapo'ā cuimbae cuña iñirurá. Uyapo cuña cuimbae iñirurá. ¹⁰ Jáeramo icavi co cuña uñeäcasoí vaerā tuicuaaca vaerā uyeyocui co cuimbae pe, jare ángel reta uecha vaerā. ¹¹ Ërei cuimbae ipuere'ā ico cuña mbae reve. Jae ramíño vi cuña ipuere'ā ico cuimbae mbae reve. YandeYa uyapo reta yugüireco vaerā penti rami. ¹² Añete co, Tumpa uyapo cuña cuimbae güi. Ërei cuimbae oa cuña güi. Jare Tumpa uyapo opaete.

¹³ Tapirandu peve cua re: ¿Icavi ra cuñauyerure vaerā Tumpa pe uñeäcasoí mbae reve? ¹⁴ Opaete vae yaicuua quirái penti cuimbae iavucu yave, penti ñemimaraca co. ¹⁵ Ërei penti cuña iavucu yave, iyaruandaca co. Echa'ā Tumpa umee cuña pe ía iñäca uyasoi vaerā. ¹⁶ Ërei ime yave quía uipota uyeaca cua re vae, tuicuaa quirái ore nduyemboe jucuarāi. Jae ramíño vi upurugiürovia vae opaete que rupi uyembatimbatu umbiadura vaerā Tumpa vae reta jucuarāi vi uyemboe.

Icavi mbae uyapo vae, yandeYa re imandúa yave

¹⁷ Ërei chepuere'ā ayerovia peré añave aiciuatiata peve jese vae re. Echa'ā piyembati yave, piyapo icavi mbae vae, icavi vae piyapo vaerāv. ¹⁸ Cua rani tae peve: Jeräcua cheve quirái piyembiyao piyugüi, piyembati yave pembiadura vaerā Tumpa. Jare chepiá pe ayeminguetata aramoi añete co. ¹⁹ Echa'ā imeta co yembiyao reta pepite pe, añetete upurugiürovia vae reta uyecuua vaerā pepite pe. ²⁰ Jáeramo piyembati yave pemandúa vaerā yandeYa re, añetere'ā co pemandúa yandeYa re tembüfú peu yave. ²¹ Echa'ā amocue pe reta pembiipi peu tembüfú Peru vae ndei íru reta yugüeru mbove. Jáeramo penti vae iyembai, jare íru vae usavípo. ²² Pipota yave pecaru cavi, pepuere pecaru perenta pei. Agüiye períro íru Tumpa uiiparavo vae reta. Agüiye pemimaraca mbaeti mbae güinói vae reta. ¿Mbae ra jaeta peve? ¿Ayeroviata ra peré cua jeco pegua? Ndarau etei co.

Pablo oporomboe quirái yanemandúa vaerā yandeYa re

(Mt 26.26-29; Mr 14.22-25; Lc 22.14-20)

²³ Echa'ā yandeYa umimbeu cheve che amimbeu-yuapi ye peve vae. Jae co cua: YandeYa uipisi mbiyape jocua piare uñemeeta umano vaerā yave. ²⁴ Jayave yasurupai Tumpa pe umee yave, upisáa mbiyape jare jei: "Pipisi peu. Cua co jae cherete peré ameeta vae. Peu cua, pemandúa vaerā cheré." Jucuarāi jei. ²⁵ Jae ramíño vi yandeYa uipisi copa opa ma ucara reta yave, jare jei: "Cua vino co jae Tumpa jei píau ye vae cherugüi pe ayapota vae. Peu ñave, pemandúa cheré." Jucuarāi jei. ²⁶ Echa'ā

mbiyape jare vino peu ñave ñave, picuaacata quirāi yandeYa umano co, jare jucuarāi piyapota yandeYa ou ye regua.

²⁷ Jáeramo ime yave quía jou mbiyape jare vino yanemimandúa yandeYa re vae cua icavi mbae vae uyapo reve vae, iyoa co yandeYa jete jare jugüi coti. ²⁸ Ërei penti penti tuñeää ipia pe. Jayave tou jocua mbiyape jare jocua vino. ²⁹ Echa'ä ime yave quía jou mbiyape jare vino cua icavi mbae vae uyapo reve vae, uyembijeco jou ramo. Echa'ä uyandareco'ä yandeYa jete re. ³⁰ Cua jeco pegua jeta pepite pe ñügiñoi vae reta imbaerasi jare ipitu mbaerasi jeco pegua, jare jeta ma umano. ³¹ Echa'ä ñañeää yave, yandeYa ndarau uiporaraca yandeve. ³² Ërei yaiporara yandeYa ñanenupa ramo, icavi vaerā yandeve, agüiye vaerā yayembijeco upurugüirovia mbae vae reta ndive.

³³ Jáeramo, cherivi reta, piyembati yave pecaru vaerā, piñeraäro rani. ³⁴ Jare ime yave quía iyembai vae, tucaru rani jenta pe, agüiye vaerā yandeYa uiporaraca peve, piyembati yave. Jare opaete ñru mbaembae ayapicatuta aa pepi yave.

12

Mbaepuere reta Espíritu Santo umee vae

¹ AÑave, cherivi reta, aipota amimbeu peve mbaepuere reta Espíritu Santo umee vae regua. Aipota'ä pico vaerā picuua mbae reve.

² Picuua cavi quirāi ndei perovia yandeYa re mbove, pembiadorase tumpa-raanga reta, piyemboe jese rami, yepe tēi tumpa-raanga reta iñee'ä etei. ³ Jáeramo aipota picuua vaerā cua: Tumpa iEspíritu rupi piyeminguela yave, ndarau piyepipeyú Jesús re. Jare jaeño Espíritu Santo rupi ipuere quía jei: "Jesús co jae cheYa."

⁴ Jare mbaepuere Espíritu Santo umee vae reta uyuavi, ërei Espíritu Santo pentiño co. ⁵ Jare jocua mbaravíquí yayapo yayeyocui vaerā yandeYa pe vae reta uyuavi, ërei yandeYa pentiño co. ⁶ Jare yepe tēi mbaravíquí yayapo vae reta uyuavi, Tumpa pentiño co, jare Tumpa umbupuere opaete vae opaete mbaravíquí reta uyapo vaerā. ⁷ Ërei Espíritu Santo umee mbaepuere penti penti pe, penti penti ipuere vaerā omborí ñru vae reta. ⁸ Echa'ä Espíritu Santo umee penti vae pe uyemingueta vaerā iyaracua catu reve. Jare jae etei umee ñru vae pe uyemingueta vaerā uicuua cavi reve. ⁹ Jare Espíritu Santo umee ñru vae pe mburugüirovia. Jare jae etei umee ñru vae pe umbigüera vaerā imbaerasi vae reta. ¹⁰ Umee ñru vae pe uyapo vaerā miacaní reta, jare ñru vae pe umimbeu vaerā Tumpa iñee. Umee ñru vae pe uicuua vaerā ou ra penti ñee Espíritu Santo güi ani ambie cotí güi. Umee ñru vae pe uyemingueta vaerā ambiembie vae iñee reta pe, jare ñru vae pe umimbeu vaerā mbae uipota jei ambiembie vae iñee reta pe uyendu vae. ¹¹ Ërei pentiño co Espíritu Santo opaete cua mbaepuere reta güinoi vae reta umbupuere vae. Jare jae umee mbaepuere uyuavi vae reta jae uipota vae rupi.

Cristo jete pegua reta pentiño co

¹² Echa'ä pentiño co yanderete. Ërei yanderete pe ñanoj yandepi jare yandepi jare yandeapisa jare yanderesa jare jeta ñru ñru vae. Jare opaete yanderete pegua reta uyapo pentiño yanderete, yepe tēi jeta uyuavi vae co. Jae ramiño vi Cristo jete pegua reta pentiño co. ¹³ Echa'ä pentiño co Espíritu Santo jare jae yanembibautiza opaete, Cristo jete yayeyapo vaerā. Pentíño vi co Cristo jete. Jucuarāi Espíritu Santo uyapo judío reta jare judío mbae vae reta pe. Jae ramiño vi jae uyapo uyeyocui vae reta jare uyeyocui mbae vae reta pe. Jare pentiño co Espíritu Santo cua uyapo yandeve vae.

¹⁴ Ime jeta yanderete pegua reta, pentiño'ä co. ¹⁵ Aramoj yandepi jeita: "Che ipo'ä co. Jáeramo che jete pegua'ä co." Ërei yepe tēi jucuarāi jeita, ërei yanderete pegua co. ¹⁶ Jae ramiño vi aramoj yandeapisa jeita: "Che jesa'ä co. Jáeramo che jete pegua'ä co." Ërei yepe tēi jucuarāi jeita, ërei yanderete pegua co. ¹⁷ Opaete yanderete yanderesa catuui yave, ndarau tēi yandepuere mbae yayandu. Jae ramiño vi opaete yanderete yandeapisa catuui yave, ndarau tēi yandepuere mbae ñaetu. ¹⁸ Ërei Tumpa oñono penti penti yanderete pegua reta yanderete pe jae uipota vae rupi. ¹⁹ Jare ime yave pentiño yanderete pegua, ndarau tēi yanderete. ²⁰ Ërei ime co jeta yanderete pegua reta, ërei pentiño co yanderete.

²¹ Jare yanderesa ipuere'ä jei yandepo pe: "Che aipota'ä nde chembori vaerā." Jae ramiño vi ñaneäca ipuere'ä jei yandepi pe: "Che aipota'ä nde chembori vaerā." ²² Añete, jucuarāi'ä co. Echa'ä yanderete pegua reta iparavíquí'ä echa vae uparavíqui ete co. ²³ Jare yanderete pegua reta icavi'ä echa yandeve vae ñamopóra. Jae ramiño vi yanderete pegua reta ñanemara jese vae yamiemonde cavi.

²⁴ Ërei yanderete pegua reta icavi tēi yandeve vae ñamopóra'ä. Ërei Tumpa umbiyuapiyuapi opaete yanderete pegua reta, jare uipiua jocua yanderete pegua yande yaipi'ä vae reta. ²⁵ Jucuarāi uyapo, agüiye vaerā yanderete pegua reta uyembiyao uyugüi, opaete yanderete pegua reta uyandareco cavi vaerā iyee. ²⁶ Jare penti yanderete pegua uiporara yave, opaete yanderete pegua reta uiporara pâve. Jae ramiño vi penti yanderete pegua uyepiúca yave, opaete yanderete pegua reta uyerovia pâve.

²⁷Jare pe reta co jae Cristo jete, jare penti penti co jae Cristo jete pegua. ²⁸Jare Tumpa oñono amocue vae upurugüirovia vae reta ipite pe temimondo retarā yugüireco vaerā. Oñono vi ūru vae reta Tumpa iñee umimbeu vaerā. Oñono vi ūru vae reta omboe vaerā upurugüirovia vae reta. Oñono vi ūru vae reta uyapo vaerā miacañi reta, jare ūru vae reta umbigüera vaerā imbaerasi vae reta, jare ūru vae reta ombori vaerā ūru upurugüirovia vae reta, jare ūru vae reta ipuere vaerā oyocui ūru upurugüirovia vae reta, jare ūru vae reta uyemingueta vaerā ambiembie vae iñee reta pe. ²⁹Opaete'ā co temimondo reta vae. Opaete'ā vi co Tumpa iñee umimbeu vae reta. Opaete'ā vi co upurugüirovia vae reta omboe vae reta. Opaete'ā vi co miacañi reta uyapo vae reta. ³⁰Opaete'ā vi co imbaerasi vae reta umbigüera vae reta. Opaete'ā vi co ambiembie vae iñee reta pe uyemingueta vae reta. Opaete'ā vi co mbae uipota jei ambiembie vae iñee reta pe uyendu vae umimbeu vae reta. ³¹Ērei pipota ete penoi vaerā mbaepuere icavi ete ūru reta güi vae reta. Ērei amimbeuta peve mbae icavi ete cua mbaembae reta güi vae.

13

Mburuau icavi ete

¹Aramoi chepuere ayemingueta ambiembie vae iñee reta pe jare ángel reta iñee pe. Ērei apuruau'ā yave, che jae vae mbae'ā co, jare ayeypao campana ipu rami ani temimbi iñee rami. ²Jare aramoi ime anoi mbaepuere Tumpa iñee amimbeu cavi vaerā. Jare aramoi aicuua mbaembae ūru vae reta pe uyecuua mbae vae jare mbaembae ūru vae reta uicuua mbae vae. Jare aramoi ime anoi mburugüirovia tuicha ete vae chepuere vaerā ambisiri ivitu guasu reta. Ērei apuruau'ā yave, che mbae'ā co. ³Jare aramoi ameeta opaete chembaembae amingaru vaerā iparavete vae reta. Jare aramoi ameeta cherete etei amano vaerā tata pe. Ērei apuruau'ā yave, mbae'ā co cheve.

⁴Yapuruau yave, yandepiaguasu jare yandepiacavi ūru vae reta pe. Yapuruau yave, yaipota'ā ūru vae reta imbaembae, yayemitenonde'ā, yayembicate'ā, ⁵yayapo'ā icavi mbae vae, yaipota'ā mbae yandeyupegaráño, yandearasi'ā, yanemandua'ā icavi mbae vae ūru vae reta uyapo yandeve vae re, ⁶yayerovia'ā ūru vae reta iyoa yave, ērei yayerovia añete vae re. ⁷Yapuruau yave, ñamiaguanta opaete yapurugüirovia reve, jare ñaáro yandepiaguasu reve.

⁸Mburuau ndarau etei opa. Ērei mbaepuere Tumpa iñee umimbeu vaerā ñanoi vae opata co. Jae ramíño vi mbaepuere ambiembie vae iñee reta pe yayemingueta vaerā ñanoi vae opata co. Jare mbaepuere mbaembae yaicuua vaerā ñanoi vae opata co. ⁹Echa'ā mboviño co jocua yaicuua vae, jare Tumpa iñee yamimbeu yave mboviño vi co jocua yamimbeu vae. ¹⁰Ērei opaete uyecuua yave, jocua mboviño vae opata co.

¹¹Che chemichi yave, ayemingueta penti sambiai uyemingueta rami, jare aicuua penti sambiai uicuua rami, jare chepia pe ayemingueta penti sambiai ipia pe uyemingueta rami. Ērei acuacuua ma yave, ayapo'ā ma penti sambiai uyapo rami. ¹²Ñamae yave yanderova re espejo pe, yayechea cavi'ā. Jucuaráño vi añave yaicuua cavi'ā mbaembae regua. Ērei ñamae yave ūru vae re coiño güi, yaecha cavi. Jucuaráño vi penti ara yaicuua cavita mbaembae regua. Echa'ā añave mboviño aicuua. Ērei jocua ara aicuata opaete, Tumpa checuua rami. ¹³Ērei jecuua yapurugüiroviata, jare ñaárota yayerovia reve, jare yapuruauta. Ērei mburuau icavi ete cua ūru mocui güi.

14

Ambiembie vae iñee reta

¹Jecuaeño pepuruau. Jare penoi quirēi pipota vaerā mbaepuere Espíritu Santo umee vae reta. Ērei pemitenonde mbaepuere Tumpa iñee pepuere pemimbeu vaerā. ²Echa'ā ambiembie vae iñee reta pe uyemingueta vae uyemingueta Tumpa pe, ūru vae reta pe'ā. Echa'ā quía uicuua'ā mbae jei vae. Jae uyemingueta Espíritu Santo rupi uyecuua mbae vae re. ³Ērei Tumpa iñee umimbeu vae uyemingueta ūru vae reta pe, umimiráta jare umbiaracuua jare umbipiácatu vaerā. ⁴Ambie vae iñee pe uyemingueta vae jaeño uñemimiráta. Ērei Tumpa iñee umimbeu vae umimiráta ūru upurugüirovia vae reta.

⁵Che aipota opaete pe reta piyemingueta vaerā ambiembie vae iñee reta pe. Ērei aipota ete pemimbeu vaerā Tumpa iñee. Echa'ā Tumpa iñee umimbeu vae uyeyocui ete ūru upurugüirovia vae reta pe ambiembie vae iñee reta pe uyemingueta vae güi. Ērei ambiembie vae iñee reta pe uyemingueta vae umimbeu vave mbae uipota jei ambiembie vae iñee reta pe uyandu vae, uyeyocui vi ūru upurugüirovia vae reta pe. Echa'ā umimbeu yave, umimiráta ūru upurugüirovia vae reta. ⁶Jáeramo, cheriví reta, che aa yave pepi, jare ayemingueta vave ambiembie vae iñee reta pe, ndarau etei mbae icavi vae ayapo peve, aicuaca'ā peve yave Tumpa uicuaca cheve vae, ani amimbeu peve mbae aicuua vae, ani Tumpa iñee, ani pomboe mbae re.

⁷Yamijaanga mbaembae tecove güinoi mbae vae ipu vae. Temimbi ñamiñee yave ani miori yambopu yave, yambopu cavi'ā yave, ndarau quía uicuua mbae nunga canta ra ipu oī vae. ⁸Picuua co quirái

sundaro reta uñerārota yave, penti temimbi uñee sundaro reta uyeyapicatu uñerāro vaerā. Êrei uñee cavi'ã yave temimbi, ndarau quía uyeyapicatu uñerāro vaerā. ⁹ Jae ramiño vi pe reta piyemingueta'ã yave ñee iñu vae reta ipuere uicuua cavi vae pe, ndarau quía uicuua mbae pere vae. Piyemingueta yuvangaiño. ¹⁰ Añete co, ime jeta ñee uyuavi vae reta cua ïví pe, jare opaete vae uicuua iñeeñeei. ¹¹ Jáeramo aicua'a yave iñu vae iñee, ayemingueta chupe yave, jae uicuuaata che co jae ambie ïví pegua, jare jae uyemingueta cheve yave, che aicuaata jae co ambie ïví pegua. ¹² Jae ramiño vi pe reta pipota ete penoi vaerā mbaepuere Espíritu Santo umee vae reta. Jáeramo pipota ete jocua mbaepuere pipe iñu upurugüirovia vae reta pepuere pemimirata vae reta.

¹³ Jáeramo ambie vae iñee pe uyemingueta vae tuyerure Tumpa pe ipuere vaerā umimbeu mbae uipota jei ambie vae iñee pe uyandu vae. ¹⁴ Echa'ã che ayerure yave Tumpa pe ambie vae iñee pe, aicua'a che jae vae. Echa'ã cheespirituño co uyerure. ¹⁵ Jáeramo ¿mbae ra ayapota? Cheespiritu uyerure reve ayerureta Tumpa pe, jare ayerureta Tumpa pe aicuaa reve vi. Jae ramiño vi cheespiritu ucanta reve acantata, jare acantata aicuaa reve vi. ¹⁶ Echa'ã nde nemee yave yasurupai Tumpa pe ndeespiritu peño, ñee ndiyemingueta pipe vae uicuua mbae vae ndarau ipuere uñemíru nde ndive, yasurupai Tumpa pe nemee yave. Echa'ã uicua'a mbae ndere vae. ¹⁷ Añete co, icavi ete nde nemee yasurupai Tumpa pe, êrei jocua iñu vae nemimirata'ã pipe. ¹⁸ Che amee yasurupai Tumpa pe quirai jeta ete ayemingueta ambiembie vae iñee reta pe opaete pe reta güi. ¹⁹ Êrei ayembati yave iñu upurugüirovia vae reta ndive, aipota ete jae pandepo ñeeño aicuaa reve amboe vaerā iñu vae reta, diez mil ñee ambie vae iñee pe jae vaeráve.

²⁰ Cherivi reta, agüiye pepia pe piyemingueta sambiai reta ipia pe uyemingueta rami. Agüiye piyapo icavi mbae vae, sambiai-rai reta uyapo'ã icavi mbae vae rami. Êrei pepia pe piyemingueta mbaembae re ucuacuua vae reta ipia pe uyemingueta rami. ²¹ Mboroyocui pe uycuatiá oí cuarai: "Ayemingueta cuia ïví pegua reta pe ambie ïví pegua reta iñee pei uyemingueta vae rupi. Êrei jeseve ndarau uyapisaca cheré" —jei yandeYa. Jucuarai uycuatiá oí. ²² Jáeramo ambiembie vae iñee reta pe yayemingueta yave, yaicuaaca Tumpa imbaepuere upurugüirovia mbae vae reta pe, upurugüirovia vae reta pe'ã. Êrei Tumpa iñee yamimbeu yave, yaicuaaca upurugüirovia vae reta pe, upurugüirovia mbae vae reta pe'ã. ²³ Jáeramo opaete pepurugüirovia vae reta piyembati yave, opaete pe reta piyemingueta yave ambiembie vae iñee reta pe, jare uique yave pepite pe cuia nunga ñee reta uicuua mbae vae reta ani upurugüirovia mbae vae reta, jae reta jeita pemibiquere co. ²⁴ Êrei opaete pe reta pemimbeu yave Tumpa iñee, jare uique yave pepite pe penti upurugüirovia mbae vae ani penti uicuua mbae vae, jae uicuuaa iyugüi quirai jae co iyoa vae jare uñearata, uyandu yave opaete pe reta pere vae. ²⁵ Jare jucuarai uycuata chupe opaete ipia pe oí vae, jare ueyatcata umbiadora reve Tumpa, jare jeita quirai añetete Tumpa ico pepite pe.

Piyapo cavi opaete mbiacatu reve

²⁶ Jáeramo, cherivi reta, ¿mbae ra yaeta? Piyembati yave, penti penti pipota pembiadura Tumpa pecanta reve, ani pipota peporomboe, ani pipota piyemingueta ambie vae iñee pe, ani pipota picuaaca iñu reta pe Tumpa uicuacuaca peve vae, ani pipota pemimbeu mbae uipota jei ambie vae iñee pe uyendu vae. Piyapo opaete piñemimirata vaerā. ²⁷ Ime yave quía reta uipota uyemingueta ambiembie vae iñee reta pe vae, tuyemingueta mocui ani mbapiño, jare tuñeraáro tuyemingueta, jare penti vae tumimbeu mbae uipota jei ambiembie vae iñee reta pe uyendu vae. ²⁸ Êrei joco pe oí'ã yave mbae uipota jei ambiembie vae iñee reta pe uyendu vae ipuere umimbeu vae, agüiye quía tuyemingueta ambie vae iñee pe uyembatia pe. Jaeño ipuere uyemingueta iyupe jare Tumpa pe ambie vae iñee pe. ²⁹ Jae ramiño vi tuyemingueta mocui ani mbapi Tumpa iñee umimbeu vae reta, jare uyapisaca jese vae reta ipia pe tuyemingueta icavi ra jocua uyandu vae. ³⁰ Êrei Tumpa uicuacuaca yave mbae iñu vae uguapi oí vae pe, uyemingueta oí vae tiqui. ³¹ Echa'ã jucuarai opaete pe reta pepuere pemimbeu Tumpa iñee penti penti rupi, opaete vae piyemboe vaerā jare piyembiacatu vaerā. ³² Jare Tumpa iñee umimbeu vae reta ime mbaepuere güinói uñeraáro vaerā. ³³ Echa'ã Tumpa uipota opaete piyapo vaerā mbiacatu reve. Uipota'ã piyapo vaerā tecorai piyembatia pe. Echa'ã jucuarai Tumpa uipota opaete uñenorono tee Tumpa peguará vae reta uyembatibatia pe.

³⁴ Piyembati yave, tiqui toí cuña reta. Echa'ã ñamaeño'ã jese reta oporomboe vaerā. Penti penti tuyapo ime jei vae. Echa'ã jucuarai jei mboroyocui. ³⁵ Jare ime yave mbae cuña uipota uicuua vae, tupírandu ime pe jenta pe. Echa'ã piyembatia pe cuña reta uyemingueta yave, penti ñemimaraca co.

³⁶ Pemandúa quirai pe reta rani'ã co pemimbeu Tumpa iñee, jare pe retaño'ã co piyandu Tumpa iñee. ³⁷ Aramoi quía ipia pe uyemingueta iyee jae co penti Tumpa iñee umimbeu vae ani mbaepuere Espíritu Santo umee vae güinói vae. Jocua nunga tuicuua quirai cua mbaembae aicuatia peve vae yandeYa iporoyocui reta co. ³⁸ Êrei uipota'ã yave uicuua, tupita uicuua mbae reve.

³⁹ Jáeramo, cherivi reta, penoi quirëi pipota vaerä pemimbeu Tumpa iñee, jare agüiye piyopia uipota uyemingueta ambiembie vae iñee reta pe vae. ⁴⁰ Ërei piyapo cavi opaete mbiacatu reve.

15

Cristo icove ye ou umanocue vae reta ipite güi

¹ Añave, cherivi reta, aipota pumimandúa ñee icavi vae amimbeu peve vae re. Echa'ã pe reta perovia cuá ñee icavi vae jare pepiräta jese. ² Jare piyembiasaca ñee icavi vae rupi pemandúa yave amimbeu peve vae re, añetete pegua pepurugüirovia yave.

³ Echa'ã cua rani amimbeu peve, quiräi Cristo umano yanembaeyoa reta re, cuaräi Tumpa iñee pe uyecuatía oí rami. Cua co uyecuaaca cheve vae. ⁴ Amimbeu vi peve quiräi Cristo uñenötí jare mbapi ara rupi icove ye ou umanocue vae reta ipite güi, cuaräi Tumpa iñee pe uyecuatía oí rami. ⁵ Jocua jaicue rupi uyecuaa Pedro pe, jare jocua rendave pe uyecuaa jocua doce vae pe. ⁶ Jocua rendave pe uyecuaa jeta upurugüirovia vae reta yati vae pe. Jocua reta quinientos uasa. Jare jeta jocua reta imeño co ñugüiñoi. ⁷ Jocua rendave pe uyecuaa Jacobo pe, jare joco güi uyecuaa opaete temimondo reta pe.

⁸ Jare taicue ete uyecuaa cheve vi. Che co jae penti sambiai ocua seri vae echa rami. ⁹ Echa'ã che co jae penti temimondo, ërei opaete íru temimondo reta uyepiuca chegüi. Jupi'ã ayembijee vaerä temimondo pe. Echa'ã che ayapose icavi mbae vae Tumpa uiparavo vae reta pe. ¹⁰ Che co jae penti temimondo Tumpa ipiacavi rupi. Jare ipiacavi umee cheve vae ucañi'ã etei. Echa'ã che aparavíqui tanta ete opaete íru reta güi. ¹¹ Jocua rendave pe uyecuaa Jacobo pe, jare joco güi uyecuaa opaete temimondo reta pe.

Umanocue vae reta icove yeta co

¹² Jáeramo ¿maera pa jei amocue pepite pe ñugüiñoi vae mbaeti quía ipuere icove ye ou umanocue vae reta ipite güi? Echa'ã ore numimbeu peve quiräi Cristo icove ye co ou umanocue vae reta ipite güi. ¹³ Ërei mbaeti yave quía ipuere icove ye ou umanocue vae reta ipite güi, Cristo vi icove yeta'ã tēi ou umanocue vae reta ipite güi. ¹⁴ Jare Cristo icove ye'ã yave ou umanocue vae reta ipite güi, cuá numimbeu peve vae mbaetita tēi co mbae, jare pepurugüirovia vi mbaetita tēi co mbae. ¹⁵ Jare jucuaräi yave, oreaputa tēi Tumpa re. Echa'ã ore numimbeu quiräi Tumpa umbijecove ye Cristo güeru umanocue vae reta ipite güi. ¹⁶ Echa'ã quía ipuere'ã yave icove ye ou umanocue vae reta ipite güi, Tumpa umbijecove yeta'ã tēi Cristo güeru umanocue vae reta ipite güi. ¹⁷ Echa'ã quía ipuere'ã yave icove ye ou umanocue vae reta ipite güi, Cristo icove yeta'ã tēi ou umanocue vae reta ipite güi. ¹⁸ Jare Cristo icove ye'ã yave ou umanocue vae reta ipite güi, pepurugüirovia mbaetita tēi co mbae, jare uyembaita'ã tēi pombaeyoa reta. ¹⁹ Jae ramíño vi, jucuaräi yave, Cristo re güirovia vae reta umano ma vae ucañiteita tēi co. ²⁰ Cua ívi pe ñai rambueve ñaáro tēi yave yayerovia reve Cristo re, yandepiatiti eteta tēi upurugüirovia mbae vae reta güi.

²⁰ Ërei yaicuaa Cristo icove ye co ou umanocue vae reta ipite güi. Jae rani icove ye ou umanocue vae reta ipite güi, uicuaaca vaerä opaete umanocue vae reta icove yeta co. ²¹ Echa'ã mano uique cua ívi pe penti cuimbae mbaeyoa uyapo vae jeco pegua. Jae ramíño vi umanocue vae reta icove yeta íru cuimbae uyapo vae jeco pegua. ²² Echa'ã Adán co jae opaete vae itenondeguia. Jáeramo opaete vae umano. Jae ramíño vi yande yaico Cristo re. Jáeramo opaete yaicove yeta co. ²³ Cristo rani icove ye. ²⁴ Echa'ã mano uique cua ívi pe penti cuimbae mbaeyoa uyapo vae reta icove yeta. ²⁵ Jare taicue ete opata co opaete, Cristo uequi ma yave imbaepuere opaete mburuvicha reta ara pegua jare ívi pegua jare ipotave mbaepuere güiñoi vae güi, jare umee ma yave iporoyocua Tumpa pe - jae co yandeRu. ²⁶ Echa'ã Cristo oyocuita co opaete ívi pegua reta, umiamiri opaete jovaicho reta regua. ²⁷ Jare taicue ete Cristo umbaita mano. ²⁸ Echa'ã Tumpa umee ma Cristo pe mbaepuere umiamiri vaerä opaete. Echa'ã jucuaräi jei Tumpa iñee pe uyecuatía oí vae. ²⁹ Echa'ã jucuaräi jei Tumpa etei. Echa'ã Tumpa umee mbaepuere Cristo pe. ³⁰ Jare Tumpa Tai umiamiri ma yave opaete, jae etei uyeyocuita Tumpa pe. Echa'ã Tumpa umee chupe mbaepuere umiamiri vaerä opaete. Jayave Tumpa oyocuita opaete.

²⁹ Jare amocue vae uyembibautizaca umanocue vae reta ipepica pe. ¿Maera ra uyapo reta jucuaräi? Echa'ã ndarau icove ye yave umanocue vae reta, ¿maera ra uyembibautizaca umanocue vae reta ipepica pe?

³⁰ Jare ¿maera ra orequirëi nduiporara nduico opa ara rupi? ³¹ Opa ara íru vae reta uipota cheyuca. Cua añete co, cherivi reta, yerovia anoi peré vae añete rami. Echa'ã ayerovia peré yandeYa Jesucristo re. ³² Yandepuere yae yamijaanga reve che añaeräro maemimba pochi vae reta ndive Efeso pe. ³³ Ërei ¿mbae pe ra icavi cheve? Umanocue vae reta ndarau icove ye yave, yandepuere yae: "Yayecou. Echa'ã piareve ñamanota co."

³³ Agüiye petavi. Pochi vae reta ndive ñañemíru yave, jae reta yanembopochi vi. ³⁴ Piyerova Tumpa coti piyapo vaerā jupi vae. Agüiye ma peyoa. Echa'ā amocue pe reta picuua'ā Tumpa. Cua jae peve pemara vaerā.

¿Quirāita ra icove ye umanocue vae reta?

³⁵ Ērei aramoi quía jeita: “¿Quirāita ra icove ye umanocue vae reta? Jare ¿mbae nunga jete ra güinoita?” ³⁶ Jucuarāi jei vae iyaracuaa'ā co. Echa'ā penti temiti jāicue ñañoti yave, umano co jeñi vaerā. ³⁷ Jare jocua ñañoti vae oyovaquel'ā co temiti ucuacuaa ma vae ndive. Ñañoti jāicueño, aramoi trigo jāicue ani íru temiti jāicue. ³⁸ Ērei Tumpa umbicuacuaa, temiti oī vaerā Tumpa jei vae rupi. Jare Tumpa umbuyuaví opaete temiti reta. ³⁹ Jae ramíño vi oyovaque'ā opaete jete. Echa'ā ime cuimbae jete, jare maemimba jete, jare jevae i rupigua jete, jare güira jete. Opaete uyuaví uyugüi. ⁴⁰ Jae ramíño vi ime mbaembae ara re ñugüinoini vae, jare ime mbaembae ívi pe ñugüinoini vae. Mbaembae ara re ñugüinoini vae ipóra. Jare mbaembae ívi pe ñugüinoini vae ipóra. ⁴¹ Ipóra co guarasi jare yasi jare yasitata reta. ⁴² Jucuarāita vi uyeyapo, umanocue vae reta icove ye yave. Echa'ā uñeñotí yave, umano vae jetecue icumegua. ⁴³ Ērei icove ye yave ndarau etei icumegua. ⁴⁴ Uñeñotí yave, mbaeti co mbae yaipiú vaerā. ⁴⁵ Ērei icove ye yave, ipóra eteta co. Uñeñotí yave, güinoini'ā etei mbaepuere. ⁴⁶ Ērei icove ye yave, ipirāta eteta co. ⁴⁷ Umano vae jetecue uñeñotí yave, ívi pegua co. ⁴⁸ Ērei icove ye yave, ara pegua co. Ime co jete ívi pegua. Jae ramíño vi ime jete ara pegua.

⁴⁵ Echa'ā Tumpa iñee pe uyecuatía oī cuarāi: “Tumpa umee tecove cuimbae tenondegua vae pe - jae co Adán. Jocua Adán taicueguia vae - jae co Cristo - tecove ara pegua umee vae co.” Cuarāi uyecuatía oī. ⁴⁶ Ērei ara pegua tenonde'ā oī. Jocua ívi pegua tenonde oī, jare taicue oī ara pegua. ⁴⁷ Cuimbae tenondegua vae ívi pegua co. Echa'ā Tumpa uyapo ívi güi. ⁴⁸ Ērei cuimbae taicueguia vae co jae yandeYa ara güi ou vae. ⁴⁹ Yanderete ívi pegua oyovaque cuimbae ívi pegua jete ndive. Jae ramíño vi yanderete ara pegua oyovaqueta cuimbae ara pegua jete ndive. ⁵⁰ Yaguacatu ma cuimbae ívi pegua. Jae ramíño vi yaguacatuta cuimbae ara pegua.

⁵⁰ Jare cua che jae peve, cheriví reta: Yanderete ívi pegua ndarau uique Tumpa iporoyocuia pe. Jae ramíño vi mbae icumegua vae ndarau uique icumegua mbae oī vae pe. ⁵¹ Mase, tamífbeu peve ndeñio uyecuua vae. Ndaraus opaete ñamano, ērei opaete ñanoita yanderete ipiau vae. ⁵² Jare cua uyeyapota imambae pegua penti jei vae pe Tumpa itrompeta uñee yave. Echa'ā Tumpa itrompeta uñeeta co, jare umanocue vae reta icove yeta güinoini vaerā jete ndarau etei icumegua vae. Jare yande imeño ñaí vae vi ñanoita yanderete ipiau vae. ⁵³ Echa'ā yanderete icumegua vae uyepepicata yanderete ndarau etei icumegua vae ndive. Jae ramíño vi yanderete ipuere umano vae uyepepicata yanderete ndarau etei ipuere umano vae ndive. ⁵⁴ Jare ñanoai yave yanderete ndarau etei icumegua vae yanderete icumegua vae ipepica pe, jare ñanoai yave yanderete ndarau etei ipuere umano vae yanderete ipuere umano vae ipepica pe, uyeyapota ma co Tumpa iñee pe uyecuatía oī vae. Echa'ā uyecuatía oī cuarāi: “Tumpa umiamiri mano jare umbai. ⁵⁵ Mano güinoini'ā etei mbaepuere yanderé. Ñanemiamiri'ā etei.” Jucuarāi uyecuatía oī. ⁵⁶ Añave mano güinoini mbaepuere yanderé mbaeyoa jeco pegua. Jare mboroyociu uicuaaca mbaeyoa. ⁵⁷ Ērei ñamee yasurupai Tumpa pe. Echa'ā jae umiamiri mano yandeve yandeYa Jesucristo rupi.

⁵⁸ Jáeramo, cheriví reta aau vae, piñemiatangātu jare piñemimirāta. Jecuaeño tanta peparavíqui yandeYa pe. Echa'ā picuua quirāi peparavíqui yave yandeYa pe, yandeYa umbijecoviata peve.

16

Corepoti umbatita oporombori vaerā

¹ Añave tamimbeu peve quirāi pembati vaerā corepoti pembori vaerā íru uñeñono tee Tumpa peguarā vae reta. Ayocui ma cua re upurugiørovia vae reta Galacia rupi uyembatimbati vae. Jae ramíño vi pe reta piyapo jucuarāi. ² Domingomingo pe penti penti piñuvatu corepoti Tumpa pembupuere rupi, agüiye vaerā pembati che aa pepi yave ramo. ³ Jare che aa avāe yave pepi, ameeta tupapire reta piparavo vae reta pe jare amondota reta Jerusalén pe güiraa vaerā corepoti pemeeta vae. ⁴ Jare icavi yave cheve che vi aa vaerā, jae reta yugüiraata cherupié.

Pablo ipia pe uyeminguela uyapo vaerā vae re

⁵ Jare che aata pepi, Macedonia rupi aasa yave. Echa'ā aasata co Macedonia rupi. ⁶ Jare aramoi apitata pe reta ndive. Aramoi apitata pepi ambiasa opaete roi ara reta, pe reta chembori vaerā aa ye yave icoti'ā perenta güi. ⁷ Aipota'ā apou pepi michi peguaño. Echa'ā aipota apita pepi ima pegua, yandeYa uipota yave. ⁸ Ērei apítata cua pe Efeso pe Pentecostés ara ou uvae regua. ⁹ Echa'ā ime cua pejeta mbaravíqui chepuere ayapo yandeYa pe vae, jare ime vijeta oyovaicho yandeYa iparavíqui ndive vae reta.

¹⁰ Êrei Timoteo oo yave pepi, piyandareco cavi jese, ipiagüive oĩ vaerã pepite pe. Echa'ã jae vi uparavíqui yandeYa pe, che ayapo rami. ¹¹ Agüiye quía tugüiríro. Êrei outa yave checoti perenta güi, pembori ou vaerã checoti ipiacatu reve. Echa'ã aipota jae ou vaerã chepi íru yanderivi reta jupié.

¹² Tarnimbeu peve yanderivi Apolos. Chequirẽi ete jae oo vaerã pepi íru yanderivi reta jupié. Êrei uiporta'ã etei oo pepi añave. Êrei oota co jae ipuere yave.

Saludo reta

¹³ Piñemoa, pepirata pepurugüirovia re, piyembucuimbae, piñemiatangätu. ¹⁴ Opaete piyapo vae piyapo pepuruau reve.

¹⁵ Añave, cheriví reta, pe reta picuua quirai Estéfanas jenta pegua reta rani güirovia Cristo re Acaya pe, jare quirai jae reta jecuaeño uparavíqui tanta uyeyocui vaerã íru uñeñono tee Tumpa peguarã vae reta pe. ¹⁶ Jáeramo aipota pe reta piyeyocui vaerã cua nunga pe, jae reta peocui yave, jare vi piyeyocui vaerã opaete orembori vae reta jare uparavíqui yandeYa pe vae reta pe, jae reta peocui yave. ¹⁷ Ayerovia Estéfanas jare Fortunato jare Acaico yuguero chepi vae re. Echa'ã jae reta uyapo cheve icavi vae pe reta pepuera'ã piyapo cheve vae. ¹⁸ Echa'ã jae reta chembiyerovia co. Jae ramíño vi jae reta pembiyerovia. Jáeramo pepuera pipiu cua nunga reta.

¹⁹ Upurugüirovia vae reta Asia rupi uyembatimbatí vae jei peve Tumpa ndiveño pei. Aquila jare Priscila jare upurugüirovia vae reta uyembatí jae reta jenta pe vae jei vi peve Tumpa ndiveño pei yandeYa re perovia ramo. ²⁰ Opaete yanderivi reta jei peve Tumpa ndiveño pei. Saludo reta piyapo piyape yave, piñecuáva piyerau reve.

²¹ Che aicuatía cua chepo pe etei. Che vi jae peve Tumpa ndiveño pei.

²² Ime yave quía uau'ã yandeYa Jesucristo vae, Tumpa uiporaracata chupe. YandeYa outa.

²³ YandeYa Jesucristo tumee peve ipiacavi. ²⁴ Chepuruau toñ opaete pe reta perovia Cristo Jesús re vae ndive. Amén.

SEGUNDA CARTA DEL APOSTOL SAN PABLO A LOS CORINTIOS

¹ Che co jae Pablo. Che co jae Jesucristo jemimondo Tumpa jei vae rupi. Yanderivi Timoteo vi ime cua pe oí che ndive. Aicuatía cua tupapire opaete pepurugiørovia vae Corinto pe piyembati vae reta pe, jare opaete iru uñéñono tee Tumpa peguarã vae opaete Acaya rupi ñugüinoi vae reta pe. ² YandeRu Tumpa jare yandeYa Jesucristo tumee peve ipiacavi jare ipiacatu.

Pablo uiporara

³ Yambiadora Tumpa. Jae co yandeYa Jesucristo Tu. Jae co yandeRu vi. Jae yandeparareco. Jae jecuaeño yanembipiácatu. ⁴ Echa'ã jae jecuaeño yanembipiácatu yaiporara yave, yandepuere vaerã yambipiácatu iru uiporara ñugüinoi vae reta. Echa'ã jucuarã vi Tumpa yanembipiácatu. ⁵ Echa'ã yaiporara ete yave Cristo re yarovia ramo, yandepiácatu ete vi Cristo rupi. ⁶ Jare ore nduiporara yave, nduiporara co pe reta penoi vaerã mbiacatu jare yembiasa. Jare Tumpa yanembipiácatu yave, jucuarã uyapo pe reta penoi vaerã mbiacatu jare yembiasa. Jare jucuarã pepuere pemiguanta pepiaguasu reve piporara yave ore nduiporara rami. ⁷ Jare jecuaeño ndugüirovia catu peré pemiguanta vaerã. Echa'ã nduicuaa quirãi pe reta vi piporara ore nduiporara rami. Jae ramíño vi nduicuaa quirãi Tumpa pembipiácatu orembipiácatu rami.

⁸ Echa'ã nduipota picuua vaerã, cherivi reta, quirãi nduiporara Asia pe nduico yave. Nduiporara ete. Orepure'ã seri numiguanta. Jáeramo orepia pe nduyeminguela t i i numanota co. ⁹ A ete co, orepia pe nduyeminguela t i i Tumpa umae ota co orer  numano vaerã.  rei jucuarã Tumpa uicuaca orev  orepure'ã co nduyeco orembaepuere rei, ja  o orepure nduyeco Tumpa re. Echa'ã Tumpa ipuere umbijecove ye umanocue vae reta. ¹⁰ Echa'ã jae orerepi numano seri yave, jare jecuae orerepi mano g  i. Jae ram  o vi ndugüirovia orerepi yeta co. ¹¹ Pe reta vi pepuere orembori. Echa'ã pepuere piyerere Tumpa pe orer . Jare jucuarã yave, jeta vae umeeta yasurupai Tumpa pe jae uyapota orev  vae re. Echa'ã Tumpa uyapota co orev , jeta vae uyerureta chupe orer  ramo.

Maera Pablo uipota oo Corinto pe

¹² Echa'ã ore nduico cavi upurugiørovia mbae vae reta ipite pe jare pepite pe vi, Tumpa orembori ramo. Ndupurumbitavi'  etei. Jare cuar  i nduico Tumpa ipiacavi rupi, nduico'  oreadracuaa rupi  o. Jare nduicuaa cua a ete co. J  eramo nduyerovia. ¹³ Echa'ã pemingueta ram  o nduicuat a peve. Jare pepuere picuua cavi nduicuat a peve vae. Jare aipota jecuae o picuua cavi vaer  . ¹⁴ A ete co, amocue pe reta orecuaa cavi ma. Echa'   pe reta piyerovia orer . Jae ram  o vi ore nduyeroviata per  yandeYa Jes  s iv  e ara pe.

¹⁵ Jare cua a  uaa cavi ramo, aipota t i i aa rani pepi, che pumbiyerovia vaer   t i i mocui vese. ¹⁶ Echa'   aipota t i i apou pepi Macedonia pe ayu yave, jare apou ye pepi Macedonia g  i aa ye yave, pe reta pepuere vaer   chembori   aa ye yave perenta g  i Judea coti. ¹⁷ Jare chepia pe ayemingueta yave jucuar   ayapo vaer  , chepia pe ayemingueta'   co jese. Echa'   chepia pe ayemingueta yave mbae ayapo vaer  , chepia pe ayemingueta'   che jae vae rupi  . Che jae yave: "Ayapota co", ndarau jae voi ye: "Ayapota'  ." ¹⁸ Tumpa vi uicuua quir   ore ndoe yave: "Nduyapota co", ndarau ndoe voi ye: "Nduyapota'  ." ¹⁹ Echa'   Tumpa Tai jae co Cristo Jes  s - che jare Silvano jare Timoteo numimb  u peve vae jei yave: "Ayapota co", ndarau jei voi ye: "Ayapota'  ." J  o jae jei: "Ayapota co." ²⁰ Echa'   opaete Tumpa jei uyapota vae Cristo uyapota co. J  eramo orepure ndoe: "Am  n", Tumpa pe Cristo rupi, jare jucuar   numbiadora Tumpa. ²¹ Jare Tumpa oremimir  ta Cristo rupi jare ore  ono tee nduyapo vaer   iparaviqu  . Jae ram  o vi Tumpa pemimir  ta. ²² Jare Tumpa umee ma yandeve Esp  ritu Santo, uicuaca vaer   yande jae imbae co, jare Esp  ritu Santo yandepia pe ico ramo, yaicuua jeta ete co Tumpa umeeta yandeve.

²³ Jare ndei   aa Corinto pe ag  i  ye vaer   a  eengata peve. Tumpa uicuua cua amimbeu peve vae a  ete co. ²⁴ Nonoi'   etei mbaepuere pepurugiørovia re. Echa'   pepir  ta ma pepurugiørovia re. J  o nduipota pombori  , pe reta piyerovia vaer  .

2

¹ J  eramo che jae chiyupe ndarau aa ye pepi che pumbipiatiti reve. ² Echa'   che pumbipiatiti yave,   quia ra co chembiyeroviata? Pe reta  o co.  rei che pumbipiatiti t i i, aa pepi yave. ³ J  eramo aicuat  a peve, ag  i  ye vaer   pe reta chembiyerovia vaer  e chembipiatiti, aa pepi yave. Echa'   che arovia che ayerovia yave, pe reta vi piyeroviata co. ⁴ Echa'   aicuat  a peve ayao reve, chepiatiti ramo. Ayandu chepia pe. Aipota'   pepiatiti vaer  .  rei aipota picuua vaer   quir   tuicha ete co chepurua pecoti  .

Pembiasa icavi mbae vae uyapo vae pe

⁵ Jocua iyoa vae cheño'ā chembipiati. Amocue pe reta vi pembipiati. ⁶ Jeta ma pe reta piporaraca chupe. Jáeramo agüiye ma piporaraca ye chupe. ⁷ Añave icavi co pembiasa vaerā chupe. Icavi co añave pembipiaticu vaerā. Agüiye ma piporaraca ye chupe. Echa'ā piporaraca ye yave chupe, aramoí uyapota mbae icavi mbae vae, ipiatiti ete ramo. ⁸ Jáeramo che pumíñera pemimbeu vaerā chupe quirāi jecuaeño co peau vae. ⁹ Echa'ā cua jeco pegua aicuatía peve, aicuua vaerā mbae ra piyapota. Aipota aicuua piyapota ra opaete che jae peve piyapo vaerā vae. ¹⁰ Pe reta pembiasa yave quía pe mbae, che vi ambiasa chupe. Echa'ā jocua ambiasa quía pe vae, ime yave mbae ambiasa vaerā quía pe vae, ambiasa co chupe peré Cristo jovai. ¹¹ Yaipota'ā Satanás ñanemiamiri vaerā. Echa'ā yaicuua cavi co mbae jae uipota uyapo vae.

Pablo uyemipia'ā Troas pe

¹² Jare che aa avāe yave Troas pe amimbeu vaerā ñee icavi vae Cristo regua, yepe tēi yandeYa umee cheve aparavíqui cavi vaerā chupe, ¹³ ērei chepiacatu'ā etei avāe'ā yanderivi Tito joco pe ramo. Jáeramo che jae Troas pegua reta pe aa yeta co, jare ayu chugüi reta Macedonia coti.

Ñapurumiámiri Cristo rupi

¹⁴ Yasurupai numee Tumpa pe. Echa'ā jae jecuaeño orembori ndupurumiámiri vaerā Cristo rupi, jare umee oreve ñee icavi vae nduicuaaca vaerā opaete que rupi, mbae ipiche cavi vae uñeetu opaete que rupi rami. ¹⁵ Numimbeu yave íru vae reta pe Cristo regua, numibyerovia Tumpa, mbae ipiche cavi vae yanembiyerovia rami. Jare numimbeu uyembiasaca vae reta pe jare ucañiteita vae reta pe, mbae ipiche cavi vae uñeetu opaete que rupi vae rami. ¹⁶ Echa'ā numimbeu yave ucañiteita vae reta pe, mbae ipiche cavi vae amijaanga oreré vae uyeyapo mbayachi quía upuruyuca pípe vae rami. Jae ramíñi vi numimbeu yave uyembiasaca vae reta pe, jae uyeyapo mbae tecove umee vae rami. Jare mbaeti quía ipuere jaeñio uyapo cua mbaravíqui. ¹⁷ Echa'ā jeta vae uiporu Tumpa iñee umingana vaerā mbaembae iyupeguarā. Ērei ore jae reta rami'ā co. Ore numimbeu cavi Tumpa iñee Tumpa oreocui numimbeu vaerā rami. Oremiari Tumpa jovaque Cristo re ndugüirovia ramo.

3

Trato ipiau vae

¹ Aramoí pe reta pepia pe piyemingueta tēi ore numbipi ye nduyembutuicha. Jucuarái'ā co. Pipota'ā ndipo ndugüeru vaerā peve tupapire reta nduicuaaca vaerā peve quía co ore. Pipota'ā ndipo pemeet oreve tupapire reta nduicuaaca vaerā íru vae reta pe quía co ore. Echa'ā íru vae reta güinoi jocua nunga tupapire. ² Nduyembutuicha'ā co. Echa'ā pe reta co jae oretupapire rami uyequatía oī oreipa pe vae rami. Opaete vae ipuere perecha uicuua vaerā quía co ore, penti tupapire ipuere umingueta rami. ³ Echa'ā opaete vae ipuere uicuua quirāi pe reta co jae penti tupapire Cristo güii ore ndugüeru vae rami. Ērei pe reta co penti tupapire Tumpa imeño mai ico vae iEspíritu pe uyequatia vae rami, mbaeti co penti tupapire tinta pe uyequatía vae rami. Tumpa uicuatiña ñee pepia re etei. Uicuatiña'ā ita reta re.

⁴ Jare cuarái orepuere ndoe peve, ndugüirovia catu Tumpa Cristo rupi ramo. ⁵ Oreiño orepuere'ā etei mbae nduyapo. Ērei Tumpa umee oreve imbaepuere. ⁶ Jae ramíñi vi Tumpa umee oreve mbaepuere, nduyeyocui cavi vaerā chupe trato ipiau vae re. Cua trato ipiau vae Espíritu pegua co, mboroyocui uyequatía oī vae pegua'ā co. Echa'ā mboroyocui uyequatía oī vae jei vae uyapo'ā vae umanota co. Ērei Espíritu Santo umee yandeve tecove opa mbae vae.

⁷ Jocua mboroyocui uyequatía oī ita reta re vae uñemee Moisés pe yave, Tumpa umiembipe Moisés iárambo. Jáeramo Israel pegua reta ipuere'ā umae ngatu Moisés jova re. Echa'ā Moisés jova jembipe ete. Ērei yepe tēi mboroyocui jei vae uyapo'ā vae umanota co, ērei uñemee Moisés jova jembipe ete reve. Ērei jocua jembipe vae ima'ā ico. ⁸ Jáeramo jocua ñee Espíritu Santo güeru yandeve vae icavi ete mboroyocui jei vae güi. ⁹ Echa'ā yepe tēi mboroyocui jei vae uyapo'ā vae umanota co, ērei icavise. Jáeramo icavi ete ma jocua güi ñee uicuuaaca yandeve Tumpa yanembujupi co vae. ¹⁰ Echa'ā tenonde yave Tumpa uiipiúca mboroyocui. Ērei ucañi ma mboroyocui imbaepuere. Echa'ā cua añave Tumpa uiipiúca ma vae icavi ete chugüi. ¹¹ Echa'ā jocua mboroyocui ita reta re uyequatía vae icavise, yepe tēi uyembai ma. Jáeramo jocua taicuegua vae icavi ete chugüi, echa'ā ndarau opa.

¹² Jare cua ndugüirovia ramo, numimbeu cavi peve opaete. ¹³ Nduyapo'ā Moisés uyapo rami. Echa'ā jae umbiyasoi jova penti tarapo pe, agüiye vaerā Israel pegua reta umae ngatu jova re. Echa'ā uipota'ā Israel pegua reta uecha vaerā quirāi ove jocua jova re jembipe vae. ¹⁴ Ērei Israel pegua reta uicuua cavi'ā. Echa'ā jecuaeño iyaracuua uyeasoí, Moisés jova tarapo pe uyeasoí rami. Jáeramo uicuua cavi'ā, trato indechi vae umingueta yave. Ērei jocua trato indechi vae Cristo umbai ma. ¹⁵ Ērei Moisés uicuatiña vae umingueta yave, jecuaeño ime oī jocua iyaracuua uyasoi vae. ¹⁶ Ērei yandeYa coti uyerova yave, uyeequita jocua iyaracuua uyasoi vae. ¹⁷ Jare yandeYa oyovaque Espíritu Santo ndive. Jare ime yave

quía güïnoi yandeYa iEspíritu vae, ipuere iyaracuaa catu. ¹⁸ Jare yande co jova uyasoi mbae vae rami co. Jáeramo yande co jae penti espejo rami. Echa'ã ūru vae reta ipuere uicuaa yandeYa regua, umae yave yanderé. Jare yande ñamae ngatu yandeYa re ramo, jecuaeño yandeYa iEspíritu uparavíqui yandepia pe, ñaí vaerä yandeYa rami.

4

¹ Jáeramo orecueri'ã. Echa'ã Tumpa oreparareco jare umee oreve nduyeyocui vaerä chupe. ² Nduyapo'ã etei ūru vae reta uyapo viari imara ramo vae. Nduyapo'ã etei mbae ndupurumbitavi vaerä. Ndrova'ã vi Tumpa iñee. Jaeño numimbeu ūru vae reta pe añete vae, jare jucuaräi opaete vae ipuere uicuaa quiräi ore nduico cavi Tumpa jovaque. ³ Amocue vae jei ipuere'ã uicuaa cavi ñee icavi vae ore numimbeu vae. Ërei jucuaräi jei, jae reta ucañiteita ramo. ⁴ Echa'ã jae reta güirovia'ã Tumpa. Jáeramo cua iví pegua reta iya umipítumimbi iyaracuaa, agüiye vaerä uicuaa cavi ñee icavi vae Crísto uyembiadora vae regua. Crísto co jae Tumpa etei cuimbaerä uyeyapo vae. Echa'ã ñee icavi vae penti tembipe yanemiembipe vae ramo co. ⁵ Ore nuñemiñee yave, numimbeu yandeYa Crísto Jesú, oremiari'ã co oriyee. Echa'ã ore co jae perembiocui retaño, Jesú ndauau ramo. ⁶ Echa'ã opaete pítumimbi yave, Tumpa jei tome toí tembipe. Jae ramíño vi Tumpa umiembipte orepia pe penti tembipe ramo, nduicuaa vaerä quiräi jae uyembiadora vae. Tumpa imbaepuere uyecuaa Jesucristo rupi.

Mburugüirovia rupi yaico

⁷ Jare cua icavi ete vae ime Tumpa güi nonoi vae ico orerete pe, yepe tẽi orerete iví pegua co, uyecuaa vaerä cua mbaepuere tuicha ete vae ime nonoi vae Tumpa imbaepuere co, orembaepuereño'ã co. ⁸ Opaete que rupi nduiporara, ërei jecuaeño orepure nduparavíqui Tumpa pe. Nduicuaa'ã mbae nduyapo vaerä, ërei jecuaeño Tumpa uicuaaca oreve. ⁹ ūru vae reta uyapo icavi mbae vae oreve, ërei jecuaeño Tumpa ime oí ore ndive. Numano seri, ërei jecuaeño Tumpa umee oreve tecove. ¹⁰ Opaete que rupi nduquíye'ã numano vaerä Jesú umano ramo, uyecuaa vaerä orerete re tecove Jesú ime güïnoi vae. ¹¹ Echa'ã yepe tẽi imeño noí, ërei jecuaeño nduquíye'ã numano vaerä Jesú ndauau ramo, uyecuaa vaerä orerete umanota vae re tecove Jesú ime güïnoi vae. ¹² Jáeramo jecuaeño nduiporara ete nduico, pe reta penoi vaerä tecove opa mbae vae.

¹³ Orepurgüirovia oyovaque co jocua mburugüirovia yamingueta jese vae ndive. Echa'ã Tumpa iñee pe uyecuatía oí cuaräi: "Che arovia. Jáeramo chemiari jese." Jucuaräi uyecuatía oí. Jae ramíño vi ore ndugüirovia. Jáeramo oremiari jese. ¹⁴ Jare nduicuaa Tumpa umbijecove ye co yandeYa Jesú güeru umanocue vae reta ipite güi. Jae ramíño vi nduicuaa Tumpa orembjecove yeta co orerera umanocue vae reta ipite güi nduico vaerä Jesú ndive, jare oreñonota pe reta ndive jae jovai. ¹⁵ Echa'ã opaete nduiporara, orepure vaerä pombori, jare Tumpa ipiacavi oí vaerä jeta vae ndive. Echa'ã jucuaräi yave, jeta vae umeeta yasurupai Tumpa pe, jare jucuaräi Tumpa uyembiadorecata.

¹⁶ Jáeramo orecueri'ã. Echa'ã yepe tẽi orerete pe jecuaeño nduiporara, ërei Tumpa jecuaeño umee oreve imbaepuere. ¹⁷ Echa'ã yaiporara vae michi ete jare michi peguaño co. Jare yaiporara yave, Tumpa umeeta yandeve yerovia tuicha ete vae ndarau etei opa vae. ¹⁸ Jáeramo yandepia pe yayemingueta'ã mbaembiae yandepuere yaecha vae re. Yandepia pe yayemingueta mbaembiae yandepuere'ã yaecha vae re. Echa'ã mbaembiae yandepuere yaecha vae opata co. Ërei mbaembiae yandepuere'ã yaecha vae ndarau etei opa.

5

¹ Echa'ã yaicuaa yanderete umanota co. Jae co penti tenta ima'ã ico vae ramo. Ërei Tumpa umeeta yandeve yanderete ipiau vae. Jae co penti tenta Tumpa uyapo vae ramo. Jare cua Tumpa umeeta yandeve vae ara pegua co, iví pegua'ã co, jare ndarau etei opa. ² Echa'ã cua yanderete pe yaico rambueve, yaiporara, jare yaipota ete ñanoj yanderete ipiau vae penti tenta Tumpa uyapo vae ramo. ³ Jare Tumpa umee yave yandeve yanderete ipiau vae, ndarau etei ñaí yanderete mbae reve. ⁴ Echa'ã cua yanderete pe yaico rambueve, yaiporara co, yavai ete yandeve ramo. Ërei yaipota'ã ñaí yanderete mbae reve. Yaipota ñanoj yanderete ipiau vae, ñanoj vaerä tecove opa mbae vae, agüiye vaerä ñamano. ⁵ Jare cuarä Tumpa uparavíqui yandepia pe, jare umeeta ma yandeve Espíritu Santo uicuaaca vaerä yandeve jocua umeeta yandeve vae.

⁶ Jáeramo jecuaeño yayerovia. Echa'ã yaicuaa cua iví pe yaico rambueve, ndei ñaí yanderete ndive. ⁷ Echa'ã yaico yandeYa re yandepurugüirovia reve. Ërei ndeñio yaecha. ⁸ Ërei jecuaeño yayerovia. Jare ñanequiréi yaeya yanderete, ñaí vaerä yanderete ndive. ⁹ Jáeramo jecuaeño yaipota yambiyerovia yandeYa cua iví pe yaico rambueve jare jae ndive ñaí ma yave. ¹⁰ Echa'ã opaete vae ñaíta Crísto jovai, jae ñaneräa vaerä. Jare Crísto umbijecoviata penti penti pe cua iví pe ico rambueve uyapo vae. Jae umbijecoviata icavi vae uyapo vae jare icavi mbae vae uyapo vae pe.

Umimbeu quirāi yayembipiācatu Tumpa ndive

¹¹ Jáeramo ore nduparavíqui ūru vae reta güirovia vaerā yandeYa re. Echa'ā nduicuuaa yandeYa orerāata co. Ërei Tumpa uicuuaa maera nduyapo opaete nduyapo vae. Jae ramiño vi aipota pe reta picuua vaerā cua. ¹² Ndoe'ā co peve cuia nduyembicate vaerā. Ërei nduipota pe reta picuua vaerā cua, pepuere vaerā pepiamaiña orecoti. Echa'ā jucuarāi yave, pepuereta pemiaru cua re ūru vae reta pe, jae reta uyembicate yave. Echa'ā jae reta uyembicate mbae uyecuuaa vae re. Uyembicateta tēi co ipia pe güinoi vae re. ¹³ Aramoi ūru vae reta jeita orembiquere co. Ërei jaeño nduipota numbiadura Tumpa. Ërei jei reta yave ore orearacuua co, icavi co peve. ¹⁴ Echa'ā Cristo orerara ramo, orequirē ete nduyeyocui chupe. Echa'ā nduicuuaa cavi Cristo umano opaete yanderé. Jáeramo opaete yande ñamano vi yaicose vae güi. ¹⁵ Jare Cristo umano opaete vae re, yande jecuaeño yayeyocui vaerā chupe yaico rambueve cuia ivi pe, agüiye vaerā yaico yandiyupe vaerānō. Echa'ā Cristo umano yanderé jare icove ye ou umanocue vae reta ipite güi. ¹⁶ Jáeramo añave güiive ndarau yandepia pe yayemingueta ūru vae re jae co ivi peguaño. Yepe tēi yaicuua quirāi Cristo ico cua ivi pe, Ërei añave güiive ndarau yandepia pe yayemingueta jese jocua re. ¹⁷ Jáeramo ime yave quía güirovia Cristo re vae, Tumpa umee chupe tecove ipiāu vae. Uipota'ā ma mbaembae tenonde yave uipota vae. Uipota ma mbaembae tecove ipiāu vae pegua.

¹⁸ Jare Tumpa uyapo opaete cua. Jare jae yanembipiācatu jae ndive Cristo rupi, jare umee yandeve yamimbeu vaerā ūru vae reta pe quirāi jae uipota umbipiācatu reta jae ndive. ¹⁹ Cua uipota jei Tumpa umbipiācatu jae ndive opaete ivi pegua reta Cristo rupi, agüiye vaerā umbijeco reta imbaeyoa reta re. Jare Tumpa umee yandeve yamimbeu vaerā ūru vae reta pe quirāi uipota umbipiācatu reta jae ndive. ²⁰ Jáeramo Cristo yanemondo jae iepicpa pe. Jare ñanemiari yave, jae co Tumpa imiari oī yande rupi. Echa'ā Tumpa uipota umbipiācatu ūru vae reta jae ndive. Jáeramo yande ñamíñera ūru vae reta Cristo jee re uyembipiācatu vaerā Tumpa ndive. ²¹ Cristo iyoa'ā etei. Ërei Tumpa uiporaraca chupe opaete yanembaeyoa re, Tumpa ipuere vaerā yanembujipi yarovia Cristo re yave.

6

¹ Ore nduparavíqui Tumpa ndive. Jáeramo ore pumíñera agüiye vaerā piyuvanga Tumpa ipiacavi re.

² Echa'ā Tumpa jei iñee yuecuatía oī vae pe cuarāi:

"Chepiacavi ramo, ayapisaca nderé.

Che nduepi jocua ara ndiyembiasaca yave."

Jucuarāi jei. Mase, añave Tumpa ipiacavi. Añave ara co yembiasa pegua.

³ Jecuaeño nduico cavi, agüiye vaerā quía numbiavai. Jucuarāi nduico, agüiye vaerā ūru vae reta jei: "Jocua Tumpa jembiocui reta uyapo icavi mbae vae." ⁴ Jecuaeño nduipota nduicuaca ūru vae reta pe quirāi nduyeyocui cavi Tumpa pe. Echa'ā orepiaguasu. Nduiporara ete. Jecuaeño uata mbaembae oreve. Yavai co nduico vaerā. ⁵ ūru vae reta orenupa jare oreñiono peresoriru pe. ūru vae reta uyapo tecorai oreré. Tanta nduparavíqui. Amo pe ndoque'ā. Amo pe mbaeti orerembürā. ⁶ Nduyapo'ā mbae pichíi vae ūru vae reta coti. Nduicuaca añete vae ūru vae reta pe. Numíanguanta ūru vae reta uyapo icavi mbae vae oreve yave. Orepíacavi ūru vae reta pe. Jecuaeño Espíritu Santo orembori. Añetete nduai ūru vae reta. ⁷ Numimbeu ūru vae reta pe ñee añete vae, jare Tumpa orembori imbaepuere pe. Jecuaeño nduyapo jupi vae, amocue vae güirovia vaerā Cristo re, jare agüiye vaerā ūru vae reta ipuere orembijeco mbae re. ⁸ Amocue vae orepiú, jare amocue vae orereríro. Amocue vae jei mbaembae icavi vae oreré, jare amocue vae jei mbaembae icavi mbae vae oreré. Yepe tēi ūru vae reta jei ore co jae upurumbitavi vae reta, jecuaeño ndoe añete vae. ⁹ ūru vae reta orecuaalā. Ërei Tumpa orecuaa cavi. Numano seri aveiño, Ërei jecuaeño noī. ūru vae reta orenupa, Ërei ndeíño oreyuca. ¹⁰ Orepíatiti, Ërei jecuaeño nduyerovia. Orepavate, Ërei jeta ūru vae reta güirovia Cristo re ore rupi. Mboví ete mbaembae ivi pegua nonoi, Ërei ime nonoi jeta ete Tumpa umee oreve vae.

¹¹ Numisimi oremiari peve, Corinto pegua reta. Picuua ma quirāi ore puau vae. ¹² Yayerau'ā yave, ore nonoi'ā teco. Pe reta co penoi teco. ¹³ Tachemiari peve penti tu imiari isambiai reta pe rami. Ore puau ramo, pe reta vi picuuaaca oreve quirāi pe reta orerau.

Agüiye piñemíru upurugüirovia mbae vae reta ndive

¹⁴ Agüiye piñemíru upurugüirovia mbae vae reta ndive. Echa'ā upurugüirovia mbae vae reta ipiyemingueta oyovaque'ā upurugüirovia vae reta ipiyemingueta ndive. Echa'ā jupi vae oyovaque'ā etei jupi mbae vae reta ndive. Jae ramiño vi tembipe jare píatumibi ipuere'ā etei yugüireco pâve. ¹⁵ Cristo uñemíru'ā etei Satanás ndive. Jae ramiño vi upurugüirovia vae ico'ā upurugüirovia mbae vae ico rami.

¹⁶ Icavi'ā etei tumpa-raanga reta ñugüinoi vaerā Tumpa ico vae pe. Jare pe reta co jae Tumpa ico pipe vae rami. Echa'ā Tumpa jei cuarāi:

"Aicota jare aguatata ipite rupi.

Aicota jae reta iTumparā,
jare jae reta yugüirecota chembærä.”
Jucuarāi jei Tumpa imeño mai ico vae.¹⁷ Jáeramo jae jei vi peve cuarāi:
“Jáeramo pesirí icavi mbae vae uyapo vae reta ipite güi.
Agiüye ye ma piñemíru jae reta ndive.
Agiüye piyapo icavi mbae vae jae reta uyapo rami.
Jare che pumbiresiveta.
¹⁸ Jare che aicota peRurā,
jare pe reta picota cherairā jare cherayirā.”
Jucuarāi jei yandeYa opaete mbaepuere güinoi vae.

7

¹ Tumpa umimbeu ma yandeve opaete cua jae uyapota vae. Jáeramo, cherivi reta, aicuatía peve cuarāi: Agüiye ma yayapo icavi mbae vae yanderete peguajare yanderecove pegua. Jecuaeño ñañeñono tee Tumpa peguarā yaquije reve Tumpa güi.

Pablo uyerovia Corinto pegua reta uyapo vae re

² Picuaaca oreve quirāi co orerau. Ore nduyapo'ā etei mbae icavi mbae vae ipotave vae pe. Jae ramiño vi nduyapoca'ā etei mbae icavi mbae vae ipotave vae pe. Ndupurumbitav'ā etei. ³ Jae'ā peve cua pumbijeco vaerā. Echa'ā che jae ma peve quirāi ore puau ete. Jáeramo ñamano yave ani jecuae yaico yave, ipuereta'ā mbae uequi cua mburuau orepiña güi. ⁴ Amisimi chemiari peve, jare íru vae reta pe chemiari yave ayerovia ete peré. Yepe tēi nduiporara ete noī, Tumpa jecuaeño chembipiñacatu jare ayerovia ete.

⁵ Macedonia pe ndoyu nuvāe güive, orepue're'ā etei nduputuu opaete nduiporara vae güi. Íru vae reta oyovaicho ore ndive oreminguíye vaerā. ⁶ Ërei Tumpa umbipiñacatu ipiatití vae reta. Jáeramo jae oremipiñacatu Tito ou yave uvāe orepi. ⁷ Jare orepiañacatu'ā Tito ou uvāe orepi vae reño. Orepiañacatu ete vi nduicuaa yave quirāi pe reta pembipiñacatu Tito. Echa'ā jae umimbeu oreve quirāi pe reta pipota ete cherecha vaerā, jare quirāi pepiatití ete jocua uyeyapo vae re, jare quirāi pipota ete chembiyerovia. Jáeramo che ayerovia ete peré.

⁸ Aicuaa yave quirāi che pumbipiñacatu aicuatía peve vae pe, che vi chepiatití, yepe tēi mboví ara rupiño pepiatití. Ërei añave chepiatití'ā, yepe tēi che pumbipiñacatu aicuatía peve vae pe. ⁹ Añave ayerovia. Ërei ayerovia'ā pepiatití ramoño. Echa'ā pepiatití ramo, peeya piyemingueta icavi mbae vae pepia pe oī vae. Jare cua jeco pegua ayerovia ma. Echa'ā mbiatití penoi vae icavi Tumpa pe. Jáeramo ore nduyapo'ā co mbae icavi mbae vae peve. ¹⁰ Echa'ā mbiatití ñanoí vae icavi yave Tumpa pe, yaeya yandiyemingueta icavi mbae vae yandepia pe oī vae, jare Tumpa yanderepi. Jare cua re ndarau yandepiatití. Ërei yandepiatití yave upurugüirovia mbae vae reta ipiatití ramo, Tumpa yanderepi'ā tēi. ¹¹ Echa'ā picuaa ma quirāi piñemiatangātu ete Tumpa cotí, mbiatití penoi vae icavi Tumpa pe ramo. Echa'ā pipota picuaaca cheve pe reta penoi'ā co tecó. Pepochi jocua mbaeyoa re, jare pequiye vi jese. Pipota ete cherecha vaerā. Pipota ete vi piyapo che amimbeu peve piyapo vaerā vae. Echa'ā pipota piporaraca icavi mbae vae uyapo vae pe. Aicuaa ma quirāi mbaeti etei tecó penoi cua uyeyapo vae re. ¹² Aicuatía peve yave, aicuatía'ā icavi mbae vae uyapo vae jeco peguaño, jare aicuatía'ā vi icavi mbae vae uyeyapo chupe vae jeco peguaño. Ërei aicuatía peve picuaa vaerā quirāi pe reta orerau ete co Tumpa joyaque. Echa'ā cuarāi Tumpa uyembiñadoracata co. ¹³ Jáeramo Tumpa oremipiñacatu ma. Jare nduyerovia ete Tito uyerovia peré vae re. Jare jucuarāi Tumpa oremipiñacatu. Echa'ā pe reta pembiyerovia Tito. ¹⁴ Echa'ā chemiari cavi Tito pe peré, jare chemara'ā jocua re. Opaete ndoe peve vae añete co. Jae ramiño vi Tito uicuaa ma añete co jocua che jae chupe peré vae. Echa'ā chemiari cavi chupe peré. ¹⁵ Jare Tito perau ete ma. Echa'ā imandúa quirāi piyapo jae jei peve piyapo vaerā vae, jare quirāi pembiresive cavi pipiu reve jare piñemimichi reve. ¹⁶ Jáeramo ayerovia peré. Echa'ā opaete pe chepuere pugüirovia catu.

8

Corepoti umbati oporombori vaerā

¹ Añave aipota aicuaaca peve quirāi upurugüirovia vae Macedonia pe uyembañimbatí vae reta uicuaaca Tumpa ipiacavi uñemee chupe reta vae. ² Echa'ā uiporara ramo, yavai ete chupe reta. Ërei uyerovia. Jare yepe tēi iparavete ete reta, ërei jeta umee, ombori vaerā íru upurugüirovia vae reta. ³ Chepuere amimbeu peve quirāi jae reta umee che chepia pe ayemingueta icavi co umee vaerā vae. Añete co, umee reta jeta ete ye chepia pe ayemingueta icavi co umee vaerā vae güi. Jare umee reta che ayocui mbae reve. ⁴ Jare uyerure oreve numbiresive vaerā jocua uipota umee vae, jucuarāi ipuere vaerā ombori íru uñeñono tee Tumpa peguarā vae reta. ⁵ Jare uyapo reta jeta ete ye ore nuáro tēi uyapota

vae güi. Echa'ã uñemee reta yandeYa pe uyeyocui vaerã. Jayave uñeñono reta oreve vi, orembori vaerã Tumpa jei vae rupi. ⁶Jáeramo numiñera Tito opa vaerã umbati pe reta pemeeta pepiacavi jeco pegua vae. Echa'ã jae etei umbipi umbati. ⁷Pepurugüirovia tuchia ete co. Icavi ete peporomboe. Jeta mbaembæe picuaa. Peratangatû jare orerau ete. Opaete cua piyapo cavi. Jáeramo picuaaca vi quirâi pepiacavi ete cua pemeeta vae re.

⁸Cua che jae peve vae penti mboroyocui'ã co. Êrei chemiari peve cuarâi ūru vae reta uipota umee ombori vaerã ūru upurugüirovia vae reta ramo, jare cuarâi piyapo yave, picuaacata pepuruau añetete co. ⁹Picuaa cavi co quirâi yandeYa Jesucristo uicuaaca ipiacavi. Echa'ã yepe têi jae icocatu ete, êrei uyembiparavete yanderau ramo, yandeYa yaicocatu vaerã Tumpa coti.

¹⁰Che pumbiaracuua cua re cuarâi: Icavi co piyapo vaerã cua. Echa'ã penti año ma pe reta pipota têi pembori vaerã, jare pembipi pembati pemee vaerã. ¹¹Jáeramo añaave jucuarâi piyapo. Echa'ã cue año pe pipota piyapo cua. Jáeramo añaave opa piyapo cue año pe pipota piyapo vae. Pemee jocua penoi vae güi, pembori vaerã ūru upurugüirovia vae reta. ¹²Echa'ã yaipota yave ñamee ñanequirëi reve, Tumpa uipota ñamee vaerã ime ñanõi vae rupi. Tumpa uipota'ã ñamee vaerã mbaeti yave ñanõi ñamee vaerã.

¹³Echa'ã aipota'ã etei piyembiparavete vaerã ūru vae reta yugüireco cavi vaerã. ¹⁴Êrei aipota opaete vae oyovaque yugüireco vaerã. Añaave pe reta pepuere pemee mbovi jeta penoi vae güi pembori vaerã mbaembæe uata chupe vae reta. Jae ramio vi jae reta jeta güinõi yave jare mbaembæe uata peve yave, jae reta ipuereta umee peve mbovi jeta güinõita vae güi. Jáeramo jucuarâi opaete vae oyovaque yugüirecota. ¹⁵Echa'ã Tumpa iñee pe uyecuatía oí cuarâi: "Jocua jeta güinõi vae uasa'ã mbae güinõi, jare jocua mboviño güinõi vae pe uata'ã mbae." Jucuarâi uyecuatía oí.

Tito jare ūru reta

¹⁶Êrei amee yasurupai Tumpa pe quirâi jae umiatangatû Tito pecoti, oremiatangatû pecoti rami. ¹⁷Echa'ã Tito uipota uyapo ore nduipota uyapo vaerã vae. Êrei jatangatû ete pecoti ramo, jaeiño iquirëi oo pepi.

¹⁸Jare nomondo jae jupié orerivi opaete upurugüirovia vae reta uyemingueta cavi jese vae. Echa'ã jae umimbeu cavi iñee icavi vae. ¹⁹Jare jocua reño'ã. Echa'ã upurugüirovia vae reta uyembatimbatí vae ui paravo, jae oo vaerã oreripiñe orembori vaerã cua mbaraviquí mbiacavi pegua re. Cua mbaraviquí nduyapo numbiadoraca vaerã yandeYa jare nduicuaca vaerã quirâi nduipota ndoporombori. ²⁰Cuarâi nduipota nduyapo, agüiye vaerã quia orembijeco cua jeta corepoti numbatí opaete que rupi numee vaerã iparavete vae reta pe vae re. ²¹Jecuaeño nduipota nduyapo jupi vae ūru vae reta jovaque, yandeYa jovaqueño'ã.

²²Jare nomondo vi jae reta jupié ūru orerivi. Jeta vese ma jae uicuaaca oreve quirâi jatangatû jeta mbaembæe re. Jare añaave jae jatangatû ete pererovia catu ramo. ²³Ime yave quia upirandu Tito re vae, pepuere pere jae co cheiru jare uparaviquí co che ndive ore pombori vaerã. Ani upirandu yave ūru orerivi reta re, pepuere pere upurugüirovia vae uyembatimbatí vae reta omondo, jare jae reta umbiadoraca co Cristo. ²⁴Jáeramo picuaaca chupe reta quirâi peau. Jucuarâi yave, ūru upurugüirovia vae uyembatimbatí vae reta vi uicuaata, jare jucuarâi uicuaata añete co mbaembæe icavi vae ndoe chupe reta peré vae.

Corepoti uyembatita vae

¹Tamimbeu ye peve corepoti pembatita vae re. Cua corepoti rupi pepuereta pembori ūru uñeñono tee Tumpa peguarã vae reta. Êrei cua picuaa ma che aicuatía mbae reve. ²Che aicuaa quirâi pipota ete piyapo cua. Echa'ã cua re chemiari cavi peré Macedonia pegua reta pe. Che jae chupe reta quirâi penti año ma pipota peporombori pe reta Acaya pe pico vae. Jare ūru vae reta uyandu yave quirâi pe reta pipota peporombori, jae reta vi uipota oporombori. ³Êrei amondo ma orerivi reta pepi, agüiye vaerã oremiariño peré cua re, jare pemicuatíro voi penoi vaerã corepoti, che jae ma rami. ⁴Aramoi amocue Macedonia pegua reta yugüiraata cherupié, che aa yave pepi. Jare pembati'ã yave corepoti, jae reta uicuaa yave, oremarata. Echa'ã ndoe chupe reta quirâi pe reta pipota peporombori. Jae ramio vi pe reta pemarata. ⁵Jáeramo chepia pe ayemingueta icavi co ayocui vaerã orerivi reta jae reta rani yugüiraata vaerã pepi. Jucuarâi jae reta ipuereta pembori opa vaerã pembati corepoti tenonde yave pere pipota pemee vae. Jare jucuarâi yave, che aa yave pepi, uyecuata quirâi pemee pepiacavi ramo, mbaeti ore moyocui ramoño. ⁶Yamijaanga umaeti vae mbaembæe pemee vae re. Pemandúa cua re: Mboviño oñoti vae mboviño uavírota. Jare jeta oñoti vae jeta uavírota. ⁷Penti penti tumee iquirëi reve uipota umee rami. Agüiye quia tumee jacatéi reve ani che ayocui ramoño. Echa'ã Tumpa uau uyerovia reve umee vae. ⁸Jare Tumpa ipuere umee peve jeta mbaembæe ipiacavi jeco pegua, agüiye vaerã mbae uata

peve, pe reta jecuaeño pepuere vaerā peporombori opaete mbaraviquí icavi vae re. ⁹ Echa'ã Tumpa ñínee pe uyecuatía oĩ cuarãi:

"Jeta umee iparavete vae reta pe.

Jupi vae uyapo vae re Tumpa jaeño mai pegua imanduata."

Jucuarãi uyecuatía oĩ. ¹⁰ Tumpa umee yandeve ñaneremitirã ñañoti vaerā, jare yanderemburã yau vaerā. Jae ramíño vi umeeta peve opaete, pepuere vaerā piyapo icavi vae, jare umivendiseta ñru vae reta jupi vae piyapo vae rupi. ¹¹ Jucuarãi pe reta penoita opaete mbaembæc icavi vae, pepuere vaerā jeta pemee. Jare ore ndugüíraa yave ñru vae reta pe pemeeta vae, jae reta umeeta yasurupai Tumpa pe. ¹² Echa'ã piyeyocui yave Tumpa pe cuarãi, pemeeta ñru uñeñono tee Tumpa peguarã vae reta pe mbaembæc uata chupe reta vae. Ërei cuáñõ'ã uyeyapota. Echa'ã cuarãi piyapo yave, jeta vae umeeta yasurupai tuicha Tumpa pe. ¹³ Jare piyeyocui yave Tumpa pe pemeeta chupe reta vae rupi, jae reta umbiadorata Tumpa peré. Echa'ã cuarãi picuacata chupe reta quirãi piyapo cua icavi vae, ñee icavi vae Cristo regua perovia ramo. Jare jae reta umbiadorata Tumpa jeta pemeeta chupe reta jare opaete vae pe vae jeco pegua. ¹⁴ Jare jae reta uyerureta Tumpa pe peré, jare perauta Tumpa ipiácací vayecuua peré vae jeco pegua. ¹⁵ Ñamee yasurupai Tumpa pe regalo jae umee yandeve vae re. Yandepuere'ã etei yaicuua cavi cua regalo Tumpa umee yandeve vae.

10

Mbaepuere Pablo güinoi vae

¹ Che etei pumiñera cua re. Cristo umee cheve añemimichi jare chepiaguasu vaerā. Jáeramo chepuere pumiñera cuarãi, yepe tẽi amocue vae jei añemimichi ete pepi aĩ rambueve, Ërei aĩ'ã yave pepi chemiari peve aquiyé mbae reve. ² Ërei che pumiñera cua re. Echa'ã aipota'ã añaengata peve aa yave pepi. Ërei chepiáa pe ayemingueta aramoi icavi co añaengata vaerā amocue pepite pe ñugüínoi vae pe. Echa'ã jae reta ipia pe uyemingueta tẽi ore nduico ore ndoe vae rupiño. ³ Ërei yepe tẽi ore nduico cua ívi pe, Ërei nduiporu'ã orembaepuereño nuñeráro vaerā aña guasu ndive. ⁴ Echa'ã ore nuñeráro'ã orembaepuere peño. Ore nuñeráro Tumpa imbaepuere tuicha vae pe, orepuere vaerā numiamiri aña guasu, yepe tẽi imbaepuere tuicha co. ⁵ Jucuarãi nduicuaaca añete'ã co upurugüírovia mbae vae reta ipiayemingueta jare opaete moromboe aña guasu uíporu agüíye vaerā ñru vae reta uicuua Tumpa vae. Jare jucuarãi nduyapo opaete vae ipia pe uyemingueta vaerā Cristo uipota ipia pe uyemingueta vaerā rami. ⁶ Jare jeta pe reta pepia pe piyemingueta yave Cristo uipota pepia pe piyemingueta vaerā rami, chepuere aiporaraca opaete jucuarãi'ã uipota ipia pe uyemingueta vae reta pe.

⁷ Pe reta pembutuicha ñru vae reta mbae uyecuua vae re. Aramoi quía uicuua cavi jae co Cristo imbae. Ërei tuicuua cavi ore vi co jae Cristo imbae, jae rami. ⁸ YandeYa umee oreve mbaepuere orepuere vaerā pombori. Umee'ã oreve pumbiavai vaerā. Jare cua mbaepuere nonoi vae jecuaeñotai co aipiu. Ndaraú chemara jese. ⁹ Jáeramo agüíye pepia pe piyemingueta che aipota puminguiye aicuatía peve vae pe. ¹⁰ Echa'ã amocue vae jei cuarãi: "Pablo uicuatía yandeve vae pe jei yandeve jeta mbaembæc yavai vae yayapo vaerā, jare uicuatía mbaepuere güinoi vae rami. Ërei jae etei oĩ yave yandepi, uyecuua quirãi jae mbaeti etei mbaepuere güinoi, jare imiari yave, ñiaríro co." Jucuarãi jei. ¹¹ Ërei jucuarãi jei vae tuicuua cua: Nduicuaaca orembaepuere nduicuatía peve vae pe, pepi noí'ã yave. Jae ramíño vi nduicuaaca orembaepuere nduicuatía peve vae pe, pepi noí'ã yave.

¹² Ime amocue vae uyembutuicha vae. Nduipota'ã etei nduyemboyovaque jae reta ndive. Nduipota'ã vi ndoe peve mbaraviquí ore nduyapo vae icavi ete co mbaraviquí jae reta uyapo vae güi. Jae reta iyaracuua'ã. Echa'ã uñeäa reta iyemingueta rupiño, jare jei reta mbaraviquí jae reta uyapo vae icavi ete mbaraviquí ñru reta uyapo vae güi. ¹³ Ërei ore ndaraú ndoe ore nduyapo penti mbaraviquí icavi vae, nduyapo'ã yave. Echa'ã ore nduyapo mbaraviquí icavi vae Tumpa umee oreve nduyapo vaerā vae. Jare Tumpa umaeño oreré nduyapo vaerā mbaraviquí icavi vae pepite pe vi. ¹⁴ Tumpa etei umee oreve mbaepuere cua mbaraviquí nduyapo vaerā. Nduyavi'ã. Añete co, nduyavita tẽi, Tumpa umee'ã yave oreve cua mbaepuere. Jáeramo ndoo ma pepi numimbeu vaerā peve ñee icavi vae Cristo regua. ¹⁵ Ndaraú etei ndoe ore nduyapo mbaraviquí icavi vae ñru vae reta uyapo vae. Ërei nduipota uyembutuicha vaerā pepurugüírovia. Jare jucuarãi yave, pepuereta orembori jeta ete mbaraviquí orepuere vaerā nduyapo, Tumpa uipota nduyapo vaerā vae rupi, ¹⁶ jare orepuere vaerā numimbeu ñee icavi vae perenta cuti rupi ñugüínoi vae reta pe. Echa'ã nduipota'ã etei ndoe ore nduyapo mbaraviquí icavi vae ñru vae uyapo Tumpa jei vae rupi vae.

¹⁷ Ërei ime yave quía uipota uyembicate vae, tuyembicate yandeYa re. ¹⁸ Echa'ã yandeYa umbutuichaca vae uyembutuichacata co, uyembutuichaca'ã co jaeiño.

11

Pablo jare temimondo aňetete mbae vae reta

¹ Aipota pepiaguasu vaerā cheve, chemiari rambueve iyaracuaa mbae vae rami. Jáeramo pepiaguasu cheve. ² Añemigüiro ete peré. Echa'ā Tumpa umee cheve jucuarāi aňemigüiro vaerā peré. Echa'ā aipota pumee Cristo pe, penti cuñatai icavi vae ndeňo cuimbæ güüreco vae penti cuimbæ ndive umenda yave uñemee ime pe rami. ³ Ërei chepia pe ayeminguela quirāi aramoi petavita, agüiye vaerā pepia pe piyemingueta cavi Cristo re. Echa'ā jucuarāi jocua mboi ipoqui upurumbitavi vaerā vae umbitavi Eva. ⁴ Echa'ā ou yave pepi quía Jesús regua umimbeu peve vae, chupe pepiaguasu ete co, yepe tēi jae umimbeu'ā Jesús regua ore numimbeu peve rami. Jae ramíño vi pepiaguasu co chupe jae umimbeu peve yave pembiresive vaerā ūru espíritu tenonde yave Espíritu pembiresive vae güi uyuavi vae. Jae ramíño vi pepiaguasu co chupe jae umimbeu peve yave ūru née icavi echa vae tenonde yave née icavi vae perovia vae güi uyuavi vae. ⁵ Ërei che arovia jocua temimondo tenondeguia vae reta pe reta pere chupe vae jeta'ā etei uyapo Tumpa pe che ayapo vae güi. ⁶ Yepe tēi chepoqu'ā chemiari vaerā, Ërei aicuua catu chemiari peve jese vae. Jare jecuaeño nduicuaaca cua peve opaete nduyapo vae rupi.

⁷ Amimbeu peve yave née icavi vae Tumpa güi or vae acovara'ā etei peve mbae re. ⁸ Ayapo echa ra mbaeyoa peve? Echa'ā che aňemimichi ayapo vaerā icavi vae peve. ⁹ Ambiresive ūru upurugüirovia vae reta uyembatimbati vae güi corepoti agüiyeta tēi ambiresive chugüi reta vae. Echa'ā jae reta umbiepi cheve, chepoure vaerā ayeyocui peve. ¹⁰ Jare aico pepi rambueve mbae uata cheve yave, mbaeti quía pepite pe amambeco chembori vaerā. Echa'ā yanderiví Macedonia güi yugüeru vae reta güeru cheve mbae uata cheve vae. Jare jucuarāi aico, agüiye vaerā pumambeco chembori vaerā. Jare jecuaeño aicota jucuarāi. ¹¹ Ayerovia ete cua re, jare jecuae chemiarita jese opaete Acaya rupi. Mbaetita quía ipuere chemiquíi. Echa'ā Cristo ico chepia pe. Jáeramo aicuua cua che jae vae aňete vae co. ¹² Cua uipota'ā jei che puau'ā co. Tumpa uicuuaa puau co.

¹² Ërei jecuaeño ayapo vae jecuaeňota co ayapo. Echa'ā jocua ūru reta uipota ete tēi uyemboyovaque ore ndive, ipuere vaerā uyembutuicha. Ërei cuarāi jecuae ayapo yave, ndarau ipuere. ¹³ Jae reta temimondo aňetete vae reta'ā co. Uparavíqui reta upurumbitavi vaerā. Jae reta uipota ūru vae reta ipia pe uyemingueta jese vaerā jae reta co Cristo jemimondo reta. ¹⁴ Jare agüiye ñanepiacañi cua re. Echa'ā Satanás etei ipuere uyembiable, uyecuua vaerā penti ángel tembipe pe ico vae rami. ¹⁵ Jáeramo penti miacañi'ā co Satanás pe uyeyocui vae reta uyembiable yave uyecuua vaerā jupi vae uyapo vae reta rami. Ërei taicue rupi Tumpa uiporaracata chupe reta uyapo vae jeco pegua.

Pablo uiporara

¹⁶ Cua che jae ye peve: Agüiye quía ipia pe tuyemingueta che co jae iyaracuaa mbae vae. Ërei jucuarāi pepia pe piyemingueta yave, pepiaguasu cheve penti iyaracuaa mbae vae pe pepiaguasu rami, che vi ayembicate vaerā michi pegua. ¹⁷ Aicuua cavi chepoure ayembicate. Ërei cuarāi chemiari yave, chemiari aí penti iyaracuaa mbae vae imiari rami. Chemiari'ā co aí yandeYa uipota chemiari vaerā rami. ¹⁸ Jeta vae uyembicate ñugüinoi jae retaiño uyapo vae re. Jáeramo che vi ayembicateta. ¹⁹ Echa'ā pe reta pepiaguasu piyerovia reve iyaracuaa mbae vae reta pe, pe reta pepia pe piyemingueta pearacuaa ramo. ²⁰ Echa'ā pepiaguasu pemimbaravíqui tanta piyeyocui vaerā chupe vae reta pe, jare pecorepoti umingasta vae reta pe, jare pembitavi vae reta pe, jare pereríro vae reta pe, jare ocua perova re vae reta pe. ²¹ Ërei pe reta pere ore orepiráta'ā co. Che jae peve aňete co jocua pere oreve vae. Ërei ime yave quía ipuere uyembicate vae, che vi chepoure ayembicate. Aňave chemiari aí iyaracuaa mbae vae imiari rami.

²² Jae reta jei: "Ore co jae hebreo reta." Che jae vi co. Jare jei reta: "Ore co jae Israel pegua reta." Che jae vi co. Jare jei reta: "Ore co jae Abraham iñemoñaa reta pegua." Che jae vi co. ²³ Jare jei reta: "Ore nduyeyocui Cristo pe." Che ayeyocui ete Cristo pe chugüi reta. Ayemingueta ye aí iyaracuaa mbae vae uyemingueta rami. Che aparavíqui tanta ete chugüi reta. Jeta vese ūru vae reta chenupa chicote pe - chepoure'ā opa aipapa. Jeta vese añeñonoca peresoriru pe. Jeta vese amano seri. ²⁴ Pandepo vese judío reta chenupa chicote pe. Chenupa ñave uiporcheré treinta y nueve vese chicote. ²⁵ Mbapi vese ūru vae reta chenupa ívira pe. Penti vese cheapi reta ita pe. Mbapi vese chalana guasu aa i guasu rupi pipe vae uyeca. Penti vese apita i guasu pe etei penti piare jare penti ara. ²⁶ Jeta ete aguata opaete que rupi. I chereraa seri. Upurupiáro vae reta cheraáro aguata vae rupi. Cherentigua reta oyovaicho che ndive. Jae ramíño vi judío mbae vae reta oyovaicho che ndive. Amano seri tenta guasu reta pe jare tape rupi jare i guasu pe. Jare upurugüirovia-raanga vae reta oyovaicho che ndive. ²⁷ Tanta aparavíqui aiporara reve. Jeta vese aque cavi'ā. Chiyembai jare cheúe. Jeta vese uata cheve tembiú, roí cheve jare uata cheve temimonde.

²⁸ Jare ūru mbaembae amimbeu'ā peve vae uyeyapo cheve chembiavai vaerā. Jare opa ara rupi jeta ete chepia pe ayemingueta opaete upurugüirovia vae uyembatimbati vae reta re. ²⁹ Ime yave quía ipiráta'ā

ipurugüirovia re vae, che vi añemíru jae ndive chepia pe. Ime yave quía íru vae umbiavai vae, che vi chepochí jese. ³⁰ Pipota yave ayembicata vaerã, ayembicateta co jocua mbaembæ chepiráta'ã co uicuaaca vae re. ³¹ Tumpa uicuaa cheapu'ã etei aí. Jae co yandeYa Jesús Tu. Opaete vae umbiadoraa jaeño mai pegua. ³² Damasco pe aico yave, Damasco pegua reta juvicha mburuvicha guasu Aretas jee vae pe uyeyocui vae uipota tẽi chepisi. Jáeramo oyocui sundaro reta uáro vaerã opaete Damasco jonque reta. ³³ Êrei cheíru reta chembigüeyi penti canasta pe penti ventana Damasco iquesemba ita pegua vae pe oí vae rupi. Jare jucuarãi asi Damasco pegua reta juvicha güi, agüiye vaerã chepisi.

12

YandeYa umee ipiacavi Pablo pe

¹ Pipota ayembutuicha vaerã, yepe tẽi icavi'ã co ayembutuicha vaerã. Êrei tamimbeu peve quirãi yandeYa uechaca jare uicuaaca cheve mbaembæ. ² Che co jae penti cuimbae Cristo re güirovia vae. Uasa ma catorce año ayereraa vae ara ivate ete oí vae pe. Aicuaa'ã oo ra cherete ani oo'ã ra. Tumpaño uicuaa. ³⁻⁴ Jare aicuaa quirãi ayereraa ara pe, jare joco pe ayandu ñee reta jupi'ã penti cuimbae iñee uaa vaerã vae. Tumpa umaeño'ã penti cuimbae re iñee omoë jocua ñee reta re. Aicuaa'ã oo ra cherete ani oo'ã ra. Tumpaño uicuaa. ⁵ Ayembicateta tẽi cua re. Êrei ndarau ayembicate. Jaeño ayembicateta jocua mbaembæ chepiráta'ã co uicuaaca vae re. ⁶ Êrei ndarau chemiari iyaracuaa mbae vae imiari rami, yepe tẽi ayembicate. Echa'ã chemiarita tẽi añete vae re. Êrei ndarau chemiari jese, agüiye vaerã quía chembutuicha jese. Echa'ã aipota íru vae reta ipia pe uyemingueta vaerã mbae ayapo vae uecha vae jare cheporomboe uyandu vae reño.

⁷ Jeta vese yandeYa uicuaaca cheve mbaembæ. Jare agüiye vaerã ayembicate ete cua re, ou cheve penti mbaerasi chemambeco vaerã. Chemambeco penti yuu yandesoo pe oí vae yanemambeco rami. Jocua mbaerasi Satanás ombou uiporaraca cheve vaerã. ⁸ Ayerure yandeYa pe mbapi vese cua mbaerasi re, upita vaerã chegii. ⁹ Êrei yandeYa jei cheve cuarãi: "Tamee ndeve chepiacavi nemíaguanta vaerã. Echa'ã nde nepiráta'ã ramo, chepuere aicuaaca quirãi tuicha ete co chembapuere." Jucuarãi jei. Jáeramo ayerovia chepiráta'ã ramo. Echa'ã chepiráta'ã ramo, Cristo umee cheve imbaepuere. ¹⁰ Añete co, chepiráta'ã. Íru vae reta chererõo. Mbaembæ uata cheve. Íru vae reta uyapo icavi mbae vae cheve. Yavai ete aico vaerã. Êrei opaete cua mbaembæ uyeyapo cheve yave Cristo pe ayeyocui ramo, ayerovia co. Echa'ã che etei chepiráta'ã yave, yandeYa chemimiráta.

¹¹ Ayeyapo ma penti iyaracuaa mbae vae rami ayembicate vaerã. Pe reta etei pipota jucuarãi ayapo vaerã. Pe reta chembicateta tẽi co. Echa'ã jocua temimondo tenondeguia vae reta pe reta pere chupe vae jeta'ã etei uyapo Tumpa pe che ayapo vae güi. Chepuere jae cua, yepe tẽi che mbae'ã etei co. ¹² Añete co, che aicuaaca peve quirãi che co jae penti temimondo añetete vae pepi aico rambueve. Echa'ã aparavíquí chepiaguasu reve. Ayapo miacaní reta picuua vaerã. ¹³ ¿Maera pa pepia pe piyemingueta che ayapo'ã pepite pe íru upurugüirovia vae uyembatimbati vae reta ipite pe ayapo rami? Añete co, pembiepi'ã cheve jae reta umbiepi cheve rami. Jocua icavi'ã echa peve yave, chembiasa.

Pablo umimbeu oo yeta co Corinto pegua reta ipi

¹⁴ Mase, mocui vese ma apou pepi. Jare añaave ayeyapicatu aí, aa ye vaerã pepi. Jare ndarau aipota pembiepi vaerã cheve. Echa'ã aipota'ã pecorepoti. Pombori vaerãño aipota. Che co jae Peru rami. Icavi co tu reta uñuvatu vaerã mbaembæ umee vaerã isambiai reta pe. Yae'ã co sambiai reta pe uñuvatu vaerã mbaembæ umee vaerã tu pe. ¹⁵ Chequiréi amingasta chembabæ jare chequiréi vi ayemingasta ayerovia reve chepuere vaerã pombori. Yepe tẽi pe reta cherau ete'ã, êrei che puau ete.

¹⁶ Êrei aramoi amocue vae jeita cuarãi: "Añete co, Pablo jei'ã yandeve yambiepi vaerã chupe. Êrei jae ipoqui upurumbitavi vaerã. Yanembitavi co." Aramoi jucuarãi jeita. ¹⁷ Che pumbitavica'ã etei jocua amondo pepi vae reta pe. ¹⁸ Amíñera Tito oo vaerã pepi, jare amondo jae jupíe íru yanderivi. Tito pembitavi'a etei co. Jae uyapo Espíritu Santo imbaepuere pe che ayapo vae rami.

¹⁹ Aramoi pepia pe piyemingueta quirãi añaave oremiari cuarãi nduyerepi vaerãño. Êrei jucuarãi'ã co. Oremiari cuarãi Tumpa jovaque Cristo re ndugüirovia ramo. Jare opaete nduyapo pe reta pepiráta vaerã pepurugüirovia re. Echa'ã ore puau ete. ²⁰ Êrei aa ye yave pepi, chepia pe ayemingueta aramoi aechata pico'ã che aipota pico vaerã rami, jare aramoi jocua jeco pegua che ayapota pe reta pipota'ã ayapo vaerã vae. Echa'ã chepia pe ayemingueta aramoi piyeaca uyupii, peacatãa piyee, pepochi piyupe, piyembiyao piyugüi, pemari ndaye re íru pe, piñera piyee, piyembicate jare piñeengueta piyupe. ²¹ Jae ramiño vi chepia pe ayemingueta aramoi Tumpa umaeñoa cheré chemara vaerã pegüi, aa ye yave pepi. Echa'ã aramoi chepiatiti eteta jeta pepite pe ñugiñinoi vae mbaeyoa uyapo vae re, uyerova'ã yave tecó pichii vae güi, jare aguasa uyapo vae güi, jare mbiquere uyapo vae güi.

13

Aracuaa reta jare saludo reta

¹ Mocui vese ma apou pepi. Añave aa yeta pepi. Ime yave quía teco uyapo vae, timiari mocui ani mbapi uicuuaa cavi jeco regua vae, yaicuuaa vaerā añete co. ² Amimbeu ma peve taicue rupi pepi aa yave, jare añave aí'ã pepi, érei amimbeu ye aí peve. Cua aicuatía opaete mbaeyoa uyapo vae reta pe jare opaete īru reta pe: Che aa ye yave pepi, aiporaracata co iyoa vae reta pe. ³ Jocua uicuaacata peve quirāi Cristo imiari peve che rupi. Echa'ã cua pipota picuua. Jare Cristo ipuere'ã vae ramil'ã co peré. Echa'ã uicuaaca peve imbaepuere. ⁴ Echa'ã yepe tēi Cristo mbaeti mbaepuere güünoi vae rami co uyecutu curusu re yave, érei icove ye Tumpa imbaepuere rupi. Jae ramíño vi ore etei mbaeti mbaepuere nonoi, érei picuuaa quirāi nonoi tecove ipiau vae Cristo güü Tumpa imbaepuere rupi. Jáeramo nonoita co mbaepuere pepite pe.

⁵ Jecuaeño pernae piyee picuua vaerā pe reta co upurugüirovia vae añetete vae reta. Picuua co quirāi Jesucristo ico pepia pe, pe reta co jae upurugüirovia vae añetete vae reta yave. ⁶ Érei aipota picuua vaerā ore co jae upurugüirovia vae añetete vae reta. ⁷ Jare nduyerure Tumpa pe agüiye vaerā piyapo mbae icavi mbae vae. Nduipota'ã cua, īru vae reta ipia pe uyemingueta vaerā ore nduyapo icavi vae. Jaeño nduipota pe reta piyapo vaerā icavi vae, yepe tēi aramoi īru vae reta ipia pe uyemingueta ore nduyapo'ã icavi vae. ⁸ Echa'ã nonoi'ã mbaepuere ndoyoyaicho vaerā añete vae ndive. Jaeño orepuere nuñemíru añete vae ndive. ⁹ Pe reta pepiráta yave pepurugüirovia re, ore nduyerovia, yepe tēi pere ore orepiráta'ã co. Jare cua re nduyerure: Tumpa tapemimiráta ete pepurugüirovia re. ¹⁰ Jáeramo aicuatía peve cuarái pepi aí'ã rambueve, agüiye vaerā aiporu mbaepuere yandeYa umee cheve vae aiporaraca vaerā peve pepi aa yave. Echa'ã yandeYa umee cheve jocua mbaepuere pombori vaerā, aiporaraca peve vaerāñio'ã.

¹¹ Jaeño ma, cherivi reta. Piyerovia. Piñemimiráta pepurugüirovia re. Piyembipiácatu. Pico cavi pepiacatu reve penti ramíño. Jare Tumpa etei oíta pe ndive. Tumpa yanderau jare yanembipiácatu. ¹² Saludo reta piyapo piyupe yave, piñecuáva piyerau reve. ¹³ Opaete uñeñono tee Tumpa peguarā vae reta jei peve Tumpa ndiveño pei.

¹⁴ YandeYa Jesucristo tumee opaete peve ipiacavi. Tumpa tumee opaete peve ipuruau. Espíritu Santo tumee opaete peve yerovia jae uñemíru pe ndive ramo. Amén.

LA CARTA DEL APOSTOL SAN PABLO A LOS GÁLATAS

¹ Che co jae Pablo. Che co jae Jesucristo jemimondo. Cuimbae reta'ā cheparavo, jare cuimbae reta'ā chemondo. YandeRu Tumpa jare Jesucristo chemondo. Tumpa umbijecove ye Jesucristo güeru umanocue vae reta ipite güi. ² Che jare opaete yanderivi che ndive ñugüinoi vae reta ndiuicuatía cua tupapire opaete pepurugüirovia vae reta Galacia rupi piyembatimbati vae pe. ³ YandeRu Tumpa jare yandeYa Jesucristo tumee peve ipiacavi jare ipiacatu. ⁴ YandeYa Jesucristo uñemee umano vaerā yanembaeyoa reta re, yanderepi vaerā teco icavi mbae vae ivi pegua güi. Echa'ā cua co jae yandeRu Tumpa jei vae. ⁵ YandeRu Tumpa tuyembiadoraca jaeño mai pegua. Amén.

Nee icavi vae pentiño co

⁶ Chepiacañi ete quirai iñambae ete piyembopiaca Tumpa güi perovia vaerā iru ñee icavi echa vae. Echa'ā Tumpa peparavo Cristo ipiacavi rupi. ⁷ Ërei mbaeti co iru ñee icavi vae. Jaeño ime amocue pembopa vae. Echa'ā jae reta uiptota perovia vaerā iru ñee icavi echa vae ñee icavi vae Cristo regua ipepica pe. ⁸ Ërei numimbeu ma peve ñee icavi vae. Jare ime yave quia iru ñee icavi echa vae umimbeu peve vae - ore yepe ani penti ángel ara güi ou vae yepe - Tumpa tuyapo mbae icavi mbae vae chupe. ⁹ Cua co tenonde yave ndoe ma peve. Ërei añave amimbeu ye peve. Perovia co ñee icavi vae. Ime yave quia iru ñee icavi echa vae umimbeu peve vae, Tumpa tuyapo mbae icavi mbae vae chupe. ¹⁰ Aipota'ā etei ivi pegua reta chembutuicha vaerā. Aipota Tumpaño chembutuicha vaerā. Aipota'ā etei vi ivi pegua reta uyemingueta cavi vaerā checoti. Echa'ā aipota yave mona ivi pegua reta uyemingueta cavi vaerā checoti, ndarau tēi ayeyoci Cristo pe.

Quirai Pablo uyeyapo Jesucristo jemimondorā

¹¹ Ërei aipota picuua vaerā, cherivi reta, cua: Cua ñee icavi vae che amimbeu vae ou'ā co cuimbae güi. ¹² Echa'ā mbaeti penti ave cuimbae umimbeu cheve. Ayemboe'ā etei jese cuimbae güi. Jaeño Jesucristo uicuaaca cheve.

¹³ Pe reta picuua ma quirai judío reta iporomboe re che aicose. Echa'ā ayapose jeta ete mbae icavi mbae vae Tumpa uiptota vae reta coti, jare aipota tēi opa amicañi. ¹⁴ Jare judío reta iporomboe re cheratangatū ete jeta cherentaigua cheaveigua reta güi. Echa'ā cheratangatū ete chetenondegua reta iporomboe re. ¹⁵ Ërei Tumpa cheñono tee iyupeguarā ndei chesi güi aa mbove, jare cheparavo ipiacavi jeco pegua. Jare jae uiptota ma yave, ¹⁶ uicuaaca Tai cheve, che amimbeu vaerā judío mbae vae reta pe. Cua uyeyapo yave, ayemingueta'ā jese quia ndive. ¹⁷ Aalā vi Jerusalén pe Tumpa jemimondo reta tenonde Tumpa omondo chegüi vae ñugüinoi vae pe. Ërei aa Arabia pe, jare joco güi ayu ye Damasco pe.

¹⁸ Cua jaicue rupi, mbapi año uasa ma yave, aa Jerusalén pe ayemingueta vaerā Pedro ndive, jare apita jae ndive quince ara. ¹⁹ Ërei aecha'ā penti ave iru temimondo. Jaeño aecha Jacobo - jae co yandeYa tivi. ²⁰ Mase, cua aicuatía peve vae añete vae co. Tumpa uicuaaca catu añete vae co.

²¹ Cua jaicue rupi aa Siria jare Cilicia pe. ²² Jare Cristo re güürovia vae Judea pe uyembatimbati vae reta checua'a, cherecha'ā ramo. ²³ Jaeño jae reta uyandu jei cuarai: "Jocua cuimbae icavi mbae vae uyapose yandeve vae añave umimbeu mburugüirovia tenonde yave uiptota tēi opa umicañi vae." Jucuarai uyandu jei. ²⁴ Jare umbiadora reta Tumpa chereco pegua.

2

¹ Cua jaicue rupi, catorce año uasa ma yave, aa ye Jerusalén pe Bernabé ndive, jare araa vi Tito. ² Jare aa, Tumpa uicuaaca cheve aa vaerā ramo, jare amimbeu cavi chupe reta jocua ñee icavi vae amimbeu judío mbae vae reta pe vae. Ërei amimbeu rani itenondegua reta peño. Echa'ā aipota ayemingueta cavi jae reta ndive, jae reta uicuaaca cavi vaerā jocua jecuaeho amimbeu vae. ³ Jare ipuere'ā quia umicircuncidaca Tito che ndive oí vae, yepe tēi jae griego co, ⁴ jare yepe tēi amocue mbaeti añetete upurugüirovia vae reta uique viari orepite pe. Echa'ā uiptota uecha viari quirai ra nduico. Echa'ā uicuaaca reta ore numimbeu co quirai Cristo Jesús oreyora ma mboroyocui güi. Echa'ā uiptota tēi nduico ye vaerā mboroyocui re. ⁵ Ërei nuñemaeño'ā etei jese reta. Echa'ā nduipota jecuaeño penoi vaerā ñee icavi vae añetete vae.

⁶ Ërei itenondegua uyembutuichaca echa vae reta ipuere'ā etei umiiru ñee amimbeu vae ndive. Yepe tēi tenonde yave uyembutuichaca reta co, ërei jocua uiptota'ā jei mbae cheve. Echa'ā Tumpa uau'ā penti vaeño iru vae güi. ⁷ Ërei jae reta uicuaaca ma Tumpa umee co cheve amimbeu vaerā ñee icavi vae judío mbae vae reta pegua, Pedro pe umimbeu vaerā ñee icavi vae judío reta pegua umee ramo. ⁸ Echa'ā Tumpa omondo Pedro ico vaerā jemimondorā judío reta pegua. Jae ramio vi jae chemondo aico vaerā

jemimondorā judío mbae vae reta pegua. ⁹ Jáeramo uicuua reta ma yave quirāi Tumpa umee cheve ipiacavi, Jacobo, Cefas jare Juan - jae reta co itenondegu echa vae reta - chepopisi jare uipopisi vi Bernabé, uicuaca vaerā penti ramí co noī, jare ore ndoo vaerā judío mbae vae reta pe, jare jae reta yugüiraa vaerā judío reta pe. ¹⁰ Jaelño jei reta oreve oremandúa vaerā iparavete vae reta re. Êrei che etei aipota ete ayapo jucuarāi.

Pablo umbijeco Pedro Antioquía pe

¹¹ Êrei Pedro ou yave Antioquía pe, chupe etei ambieta, teco güinoi ramo. ¹² Echa'ā ndei amocue judío reta Jacobo güii yugüeru mbove, Pedro ucaruñoi judío mbae vae reta ndive. Êrei yugüeru ma yave, Pedro ucaru'ā ma judío mbae vae reta ndive, jare opou'ā ma ipi. Echa'ā uquiyie judío reta güi. ¹³ Jayave íru judío reta vi uyembo Pedro jeco re, jare uyapo reta jae uyapo ramí. Jáeramo Bernabé vi uñemaeño chupe reta, uyapo vaerā jae reta uyapo ramí. ¹⁴ Êrei aecha yave uyapo'ā jupi añete vae ñee icavi vae pegua rupi, che jae Pedro pe opaete vae jovaque: "Yepetéi nde co jae penti judío, ërei ndico judío mbae vae reta yugüireco ramí, ndico'ā judío reta yugüireco ramí. Jáeramo ¿maera pa ndipota judío mbae vae reta yugüireco vaerā judío reta yugüireco ramí?" Jucuarāi jae chupe. ¹⁵ Ore mbaeti etei co judío mbae vae reta - mbaeyoa pegua ndoe chupe vae. Êrei yepe tēi ore co jae judío reta etei, ¹⁶ nduicuua ndarau quíia ipuero uyembujupica mboroyocui jei vae re uyapo vae rupi. Jaelño ipuere uyembujupica güirovia yave Jesucristo re. Jáeramo ore vi ndugüirovia ma Jesucristo re nduyembujupica vaerā mburugüirovia Cristo re nonoi vae rupi, nduyembujupica'ā mboroyocui jei vae re nduyapo vae rupi. Echa'ā ndarau quíia uyembujupica mboroyocui jei vae re uyapo vae rupi.

¹⁷ Jare nduipota yave nduyembujupica Cristo re, ore vi nduyecuua mbaeyoa pegua reta. Êrei yepe tēi nduyecuua cuarāi, ërei Cristo oreapo'ā etei co mbaeyoa pegua retarā. ¹⁸ Echa'ā aipota yave ayapo ye jocua ambai vae, añete co che ayeyapo mbaeyoa peguarrā. ¹⁹ Mboroyocui jei vae rupi amano ma co. Jáeramo añaave che co jae penti umano ma mboroyocui cotí vae ramí. Jare jáeramo añaave chepuere ayeyocui Tumpa pe. ²⁰ Cristo umano curusu re yave, che amano vi jae ndive. Jáeramo aicove'ā ma, jaelño Cristo icove chepia pe. Jare cua ívi pe aico rambueve, aico co mburugüirovia Tumpa Taí re anoi vae re. Echa'ā jae cherau, jare uñemee umano vaera cheré. ²¹ Aríro'ā Tumpa ipiacavi. Echa'ā mboroyocui jei vae re yayapo vae rupi yandepuere yayembujupi yave mona, Cristo umanoñota tēi.

3

Mboroyocui ani mburugüirovia

¹ Galacia pegua reta, pe reta co jae iyaracuaa mbae vae reta ramí. ¿Quíia pa pembitavi, agüiyie vaerā perovia añete vae? Echa'ā perovaque etei amimbeu cavi ma quirai Jesucristo uyecutu curusu re. ² Cuaño aipota pemimbeu vaerā cheve: ¿Pembiresive pa Espíritu Santo mboroyocui jei vae re piyapo vae rupi, ani ñee icavi vae piyandu yave pepurugüirovia ramo? ³ ¿Pearacua'ā etei pa co? Pe reta pembipi Espíritu Santo rupi. ¿Piñemimiratata pa pe retaiño pepuere piyapo vae rupi? ⁴ ¿Piporaraíño ma pa jeta mbaembae? Quirai mona agüiyie piporaraíño. ⁵ Tumpa umee peve Espíritu Santo, jare uyapo miacañi reta pepite pe. ¿Uyapo pa cua mbaembae mboroyocui jei vae re piyapo vae rupi, ani ñee icavi vae piyandu yave pepurugüirovia ramo?

⁶ Jucuarāi vi Abraham güirovia Tumpa, jare Tumpa umbujupi ipurugüirovia jeco pegua. ⁷ Jáeramo picuua co cua: Mburugüirovia güinoi vae reta co jae Abraham tai reta ramí. ⁸ Tumpa iñee pe uyecuatía oí ñee icavi vae Tumpa umimbeu Abraham pe vae. Tumpa umimbeu chupe ndei uyeyapo mbove. Echa'ā jei Abraham pe cuarāi: "Nde rupi opaete ívi pegua reta amivendiseta." Jucuarāi jae chupe. Echa'ā Tumpa uicuua ndei uyeyapo mbove quirai umbujupita judío mbae vae reta ipurugüirovia jeco pegua. ⁹ Jáeramo Tumpa añaave umivendise mburugüirovia güinoi vae reta, Abraham umivendise ramí. Echa'ā Abraham vi güinoi mburugüirovia.

¹⁰ Opaete uipota uyembujupi mboroyocui jei vae re uyapo vae rupi vae reta jecuaeño teco güinoi. Echa'ā Tumpa iñee pe uyecuatía oí cuarāi: "Tuyembijeco toí jocua jecuaeño uyapo'ā opaete uyecuatía oí mboroyocui itupapire pe vae." Jucuarāi uyecuatía oí. ¹¹ Echa'ā yandepuere yaicuua quirai mbaeti penti ave ipuere uyembujupi Tumpa jovaque mboroyocui jei vae re uyapo vae rupi. Echa'ā Tumpa iñee pe uyecuatía oí cuarāi: "Tumpa umbujupi vae güinoita tecove upurugüirovia ramo." Jucuarāi uyecuatía oí. ¹² Jare mboroyocui mburugüirovia pegual'ā co. Echa'ā Tumpa iñee pe uyecuatía oí mboroyocui re cuarāi: "Ime yave quíia cua nunga uyapo vae, icota uyapo ramo." Jucuarāi uyecuatía oí.

¹³ Mboroyocui yanembijecose. Êrei Cristo yanderepi ma chugüi. Echa'ā jae uyembijecoca yandepicpa pe. Echa'ā Tumpa iñee pe uyecuatía oí cuarāi: "Teco güinoi jocua uyecutu curusu re vae." Jucuarāi uyecuatía oí. ¹⁴ Jare cua uyeyapo Cristo pe, Tumpa umivendise vaerā Cristo Jesús rupi judío mbae vae reta, umivendise Abraham ramí, jare yande ñanoí vaerā Espíritu Tumpa jei umeeta vae yandepurugüirovia jeco pegua.

¹⁵ Cherivi reta, tachemiari peve cua ivi pe mbae uyeyapo vae re. Ivi pegua reta penti trato uyapo yave uyupe, yepe tēi ivi pegua retaño co, ndarau quía ipuere umbai, jare ndarau quía ipuere mbae umífru jae ndive. ¹⁶Cuarái vi Tumpa jei umeeta mbaembæ Abraham jare iñemoñaa pe. Tumpa imiari'ā iñemoñaa reta re. Echa'ā jucuarái yave mona, uiportata tēi jei jeta vae. Êrei imiari iñemoñaa re. Echa'ā cua uipota jei penti vae. Jare jocua penti vae Cristo co. ¹⁷Jáeramo che jae peve cua: Tumpa tenonde yave uyapo penti trato Abraham ndive, jare uicuaaca chupe ajetete vae co. Jayave cuatrocientos treinta año uasa ma yave ramo, Tumpa umímbeu mboroyocui. Jáeramo mboroyocui ipuere'ā umbai jocua trato. Echa'ā umbai yave mona, Tumpa ndarau tēi uyapo jei uyapota vae. ¹⁸Echa'ā mboroyocui re yave mona Abraham güünoita Tumpa jei umeeta chupe vae, ndarau tēi güünoi jei uyapota vae re. Êrei uyeyapo co Tumpa jei uyapota vae Abraham pe.

¿Maera pa uñemee mboroyocui?

¹⁹Jayave ¿maera pa uñemee mboroyocui? Uñemíru co mbaeyoa reta jeco pegua, jocua Abraham iñemoñaa Tumpa jei umeeta vae ou regua. Jare Tumpa uicuaaca mboroyocui Moisés pe ángel reta rupi, Moisés uicuaaca-yuapi ye vaerā Israel pegua reta pe. ²⁰Jare uicuaaca-yuapi ye vae oī mocui vae ipú pe, uicuaaca-yuapi ye vaerā penti vae güüíru vae pe. Êrei Tumpa co jae pentiño.

²¹Êrei mboroyocui oyovaicho'ā etei co Tumpa jei uyapota vae ndive. Echa'ā tecove uñemee yave mona mboroyocui Tumpa uicuaaca vae re, ajetete co mboroyocui upurumbujupita tēi. ²²Êrei Tumpa iñee pe ueyecatía oī vae uicuaaca opaete vae iyoa co, Tumpa jei uyapota vae uñemee vaerā mburugüürovia Jesucristo re güünoi vae reta pe. ²³Êrei indei ndugüürovia Jesucristo re mbove, mboroyocui güünoise mbaepuere oreré, penti peresoriru iyandarecoa mbaepuere güünoi pereso reta re rami. Jare mboroyocui güünoise mbaepuere oreré, Tumpa uicuaaca regua ndugüürovia vaerā Jesucristo re. ²⁴Jáeramo mboroyocui oreyandarecoa rami vi co. Jae uyandarecose oreré, Cristo ou regua orembjupica vaerā mburugüürovia rupi. ²⁵Êrei güünoi'ā ma mbaepuere oreré jocua uyandarecose oreré vae. Echa'ā ndugüürovia ma Cristo re. ²⁶Jare opaete pe reta vi Tumpa tai reta co mburugüürovia Cristo Jesús re penoi vae rupi. ²⁷Echa'ā opaete pe reta piyembibautizaca ma piyeyapo vaerā Cristo jete peguarā. Jáeramo pe reta piyeyapo ma penti ramíño Cristo ndive. ²⁸Cristo Jesús re uyuaví'ā uyupii judío jare judío mbae vae, uyeyocui vae jare uyeyocui mbae vae, cuimbae jare cuña. Echa'ā Cristo Jesús re opaete pe reta penti ramíño co. ²⁹Jare pe reta co jae Abraham iñemoñaa reta rami. Echa'ā pe reta co jae Cristo imbae. Jáeramo pembae co jocua Tumpa jei Abraham pe umeeta vae.

4

¹Êrei che jae peve cua: Penti cuimbae umano yave, tai güünoita tu imbaembæcua vae sambiai ico rambueve, oyovaque penti uyeyocui vae ndive, yepe tēi opaete mbaembæ imbae ma co. ²Echa'ā omboe vae reta jare uyandareco jese vae reta güünoi mbaepuere jese jare imbaembæ re, jae uepití regua iaño tu amiri indei umano mbove umímbeu vae. ³Jae ramíño vi tenonde yave moromboe ivi pegua mbaepuere güünoi oreré. Echa'ā jayave nduicose jocua sambiai rami. ⁴Êrei ou ma uvâe yave ara, Tumpa ombou Tai. Jae oa cuña güüí, jare mboroyocui güünoi mbaepuere jese, ⁵jae ipuere vaerā uepi mboroyocui güünoi mbaepuere jese vae reta, ore orepuere vaerā nduyeyapo Tumpa tai retarā. ⁶Jare tai reta ma pe reta pico ramo, Tumpa ombou pepia pe Tai iEspíritu. Jae jei: "CheRu, cheRu." ⁷Jáeramo pe reta uyeyocui vae reta'ā ma. Pe reta co jae Tumpa tai reta. Jare tai reta ma pico ramo, Tumpa umee vae pembae co Cristo rupi.

Pablo ipiatiti upurugüürovia vae reta re

⁸Añete co, tenonde yave picuua'ā Tumpa yave, piyeyocuise tumpa-raanga reta pe. Jae reta mbaeti etei tecove güünoi. ⁹Êrei añave picuua ma Tumpa, Tumpa pecuua ma ramo. Jáeramo ¿maera pa pipota perovia ye moromboe reta ivi pegua? Echa'ā güünoi'ā mbaepuere pembori vaerā. ¿Maera pa pipota güünoi vaerā mbaepuere peré? ¹⁰Echa'ā piyandareco peñi ara reta re, yasi reta re, fiesta reta iara reta re jare año reta re. ¹¹Chepiatiti ete peré. Echa'ā chepia pe ayemingueta aramoi aparavíquiiño ma pepite pe.

¹²Cherivi reta, pumíñera piyapo vaerā che ayapo ramí. Echa'ā che ayeyapo peñurá. Mbaeti etei mbae icavi mbae vae piyapo checoti. ¹³Echa'ā pe reta picuua co quirái chembaerasí jeco pegua tenonde yave amimbeu peve ñee icavi vae. ¹⁴Jare yepe tēi chembaerasí, êrei chereríro'ā jare chemitaréi'ā. Echa'ā pe reta chembiressive cavi. Penti ángel Tumpa güüí ou yave mona pepi, pembiresiveta tēi jucuarái. Jare Cristo Jesús ou yave mona pepi, pembiresiveta tēi jucuarái. ¹⁵¿Maera pa penoi'ā ma jocua yerovia penoise vae? Echa'ā chepuere amimbeu peregua cua: Pepuere yave mona, peequita tēi peresa piyugüii, pemee vaerā cheve. ¹⁶Che amimbeu peve añete vae. Cua uipota'ā jei ayemboyovaicho ma pe ndive.

¹⁷Jocua pembopa vae reta jatangátu ete peré, êrei icavi'ā peve peguará. Echa'ā uipota pembopia orengüi, pe reta peratangátu vaerā jese reta. ¹⁸Êrei icavi jecuaeño peratangátu vaerā icavi vae re -

mbaeti pepi aĩ yaveño. ¹⁹ Cherívi reta, penti cuña uiporara imembí oata yave vae rami che aiporara ye ma aĩ Cristo jecove uyecuaa vaerã peré. ²⁰ Aipota tẽi aĩ vaerã pe reta ndive aňave, jare aipota'ã tẽi pumingueta vaerã cuarãi. Echa'ã chepiacañi ete peré.

Umijaanga Agar jare Sara

²¹ Pe reta pipota mboroyocui güïnoi vaerã mbaepuere peré. Pemimbeu cheve, ¿picuaa'ã pa mboroyocui pe uyecuatía oĩ vae? ²² Echa'ã Tumpa iñee pe uyecuatía oĩ vae umimbeu quirãi Abraham mocui tai güïnoi. Penti tai cuña uyeyocui vae imembí co, jare ïru tai cuña uyeyocui mbae vae imembí co.

²³ Jare jocua uyeyocui vae imembí uñemoña cuimbae jei vae jeco peguaño. Ërei jocua uyeyocui mbae vae imembí uñemoña Tumpa jei ramo. ²⁴ Jare cua co penti jaanga. Echa'ã cua cuña reta uyemijaanga jocua mocui trato re. Penti trato co jae ivitu guasu Sinaí jee vae re uñemee vae. Cua trato pegua reta co jocua oa uyeyocui vaerã vae reta rami. Echa'ã jucuarãi vi co Agar imembí. ²⁵ Echa'ã cua Agar uyemijaanga ivitu guasu Sinaí Arabia pegua re, jare uyemijaanga vi tenta guasu Jerusalén cua ivi pe oĩ vae re. Echa'ã jocua tenta guasu Jerusalén jare joco pegua reta uyeyocui vae reta rami co. ²⁶ Ërei jocua Jerusalén ara pe oĩ vae uyeyocui mbae vae reta rami co. Echa'ã jae yandesi rami co. ²⁷ Echa'ã Tumpa iñee pe uyecuatía oĩ cuarãi:

“Nde nemembí'ã. Ërei iyerovia,

ypepe tẽi ndepuere'ã etei nenoi nemembirã.

Nde nemembirasi'ã etei. Ërei esapicai ndiyerovia reve.

Echa'ã cuña ime mbae vae güïnoita jeta ete imembí cuña ime reve vae güi.”

Jucuarãi uyecuatía oĩ.

²⁸ Cherívi reta, Isaac oa Tumpa jei ramo. Jae ramíño vi yande ñanõi tecove Tumpa jei vae jeco pegua.

²⁹ Ërei jocua cuimbae jei vae jeco peguaño uñemoña vae uyapo icavi mbae vae jocua Espíritu Santo imbaepuere rupi uñemoña vae pe. Jae ramíño vi aňave uyeyapo yandeve jucuarãi. ³⁰ Ërei ¿mbae pa jei Tumpa iñee pe uyecuatía oĩ vae? Jei cuarãi: “Emombo cuña uyeyocui vae jare imembí. Echa'ã cuña uyeyocui vae imembí ndarau güïnoi Abraham imbaembæ. Jaeño cuña uyeyocui mbae vae imembí güïnoita Abraham imbaembæ.” Jucuarãi jei. ³¹ Jáeramo, cherívi reta, yande mbaeti co jocua cuña uyeyocui vae imembí rami. Yande co jae jocua cuña uyeyocui mbae vae imembí rami.

5

Cristo yandeyora ma

¹ Yayeyora ma. Echa'ã Cristo yandeyora ma. Jáeramo jecueaño pipota ete pico uyeyora vae reta rami. Agüiye ye ma pipota pico uyeyora mbae vae reta rami.

² Mase, che jae peve, piñemicircuncidaca yave, pe reta co jae uyeyoraca'ã etei Cristo pe vae rami. ³ Amimbeu ye opaete piñemicircuncidaca vae pe, cua piyapo vae uipota jei piyapota co opaete mboroyocui jei vae. ⁴ Jare cua uipota jei pipota'ã ma Cristo pembujupi vaerã. Echa'ã pipota tẽi piyembujupi mboroyocui jei vae re piyapo vae rupi. Pipota'ã ma piyembujupi mbiacavi rupi. ⁵ Echa'ã yande yarovia Tumpa yanembujupi yandepurugüirovia rupi. Jare Espíritu Santo yanembori cuarãi yarovia vaerã. ⁶ Echa'ã Cristo Jesús re yarovia yave, ñañemicircuncidaca yave mbae'ã co, jare ñañemicircuncidaca'ã yave mbae'ã co. Jaeño icavi Tumpa pe ñanõi yave jocua mburugüirovia umee yandeve mburuau ïru vae reta coti vae.

⁷ Tenonde voi peguata cavi co Tumpa coti. ¿Quía pa pembiavai, agüiye vaerã perovia aňete vae?

⁸ Echa'ã Tumpa preparavo ma jare umee peve aracuaa, ërei cua ïru aracuaa ou'ã Tumpa güi. ⁹ Mboviño levadura uñemias opaete masa rupi. ¹⁰ YandeYa umee ma cheve mbiacatu peré, quirãi pe reta pepia pe piyeminguetata che chepia pe ayemingueta rami. Aicuaa'ã quía ra co jae pembiavai vae. Ërei Tumpa uiporaracata co chupe.

¹¹ Cherívi reta, che amimbeu'ã etei ïru vae reta pe uñemicircuncidaca vaerã. Echa'ã cherovaicho reta uyapo icavi mbae vae cheve amimbeu'ã ramo. Echa'ã jocua amimbeu yave, ndarau tẽi quía chereríro Cristo icurusu regua amimbeu vae jeco pegua. ¹² Quirãi mona uyembisiri reta jocua pemamboco vae reta.

¹³ Añete co, cherívi reta, Tumpa preparavo pico vaerã uyeyora vae reta rami. Ërei agüiye pere piyupe: “Tumpa yandeyora ma. Jáeramo yandepuere yayapo ipotave yaipota vaeño.” Agüiye pere jucuarãi. Ërei piyeyocui piyupe, piyerau ramo. ¹⁴ Echa'ã opaete mboroyocui oyovaque cua ndive: “Eau nderapicha nde ndiyerau rami.” ¹⁵ Ërei piñeráro yave uyuapi, aramoj piñemitarëita.

Espíritu Santo jei vae uyuavi yande yaipota vae güi

¹⁶ Jáeramo che jae peve cua: Pico Espíritu Santo jei vae re, agüiye vaerã pico pe pere vae reño.

¹⁷ Echa'ã peiño pere vae uyuavi Espíritu Santo jei vae güi, jare Espíritu Santo jei vae uyuavi peiño pere

vae güi. Mocui reve uyuavi uyugüi. Jáeramo pepuere'ã piyapo pipota piyapo vae. ¹⁸ Ërei pico yave Espíritu Santo jei vae re, mboroyocui mbaeti etei mbaepuere güinoi peré.

¹⁹ Jare jocua mbaeyoa reta yae vae reño yaico yave, yayapo vae uyepocuavi'ã co. Echa'ã yayapo cuarái: Yayuvanga menda re. Yayapo aguasa. Yayapo pichíi vae. Yanembiquere. ²⁰ Yambiadora tumparaanga reta. Yayapo paye reta. Ñanemitarëi. Yayovaicho ūru vae reta ndive. Ñanemiaríro. Yandepochi catu ūru vae reta coti. Yaipota mbaembæ yandiyupe peguarâñio. Yayembiyao ūru vae reta güi. Yarovia moromboe añete mbae vae. ²¹ Ñaneacat  a yanderapicha re. Yapuryuva. Yasavipo. Uasa ete yacar. Jare ūru cua nunga icavi mbae vae yayapo. Echa'ã amimbeu ma peve quir  i cua nunga icavi mbae vae jecuae  o uyapo vae reta ndarau yug  ireco Tumpa iporoyocuia pe. Jare añave amimbeu ye peve.

²² Ërei Espíritu Santo umee yandeve mburuau, yerovia, mbiacatu, mbiaguas, mbiacavi, mbur  irovia, ²³ jare ñemimichi. Yayapo icavi vae jare ña  emoa. Cua reta re ipuere'ã etei co mboroyocu. ²⁴ Jare Cristo imbae reta umbai ma jei vae  o. Echa'ã uipotal'   ma tenonde yave uau jare uipota vae re  o vae. ²⁵ Echa'ã Espíritu Santo umee yandeve tecove ipiau vae. J  eramo yaico Espíritu Santo jei vae re. ²⁶ Ag  iye yaipota ūru vae reta yanembicate vaer  . Ag  iye yayovaicho uyupii. Ag  iye ñaneacat  a yandiyee.

6

Piyemborimbori

¹ Cherivi reta, ime yave qu  a uyepocouca mbae icavi mbae vae uyapo yave vae, pe reta peguata cavi Tumpa coti vae piyapicatu piñemimichi reve. Piñemoa ngatu. Echa'ã aramoi a  a guasu uipotata vi uyapoca vaer   peve mbae icavi mbae vae. ² Piyemborimbori, tivita poi vae reta piyemborimbori pevoi vaer   rami. Echa'ã jucuar  i piyapo yave, piyapota co Cristo iporoyocu.

³ Ërei ime yave qu  a uyembutuicha vae, uyembitavi co. Echa'ã jae mbae'ã co. ⁴ Ërei penti penti tuyemboe quir  i ipuere uicuaa icavi ra mbaraviqui uyapo vae. Jayave mbaraviqui icavi vae uyapo yave, ipuereta uyerovia jese iyee. Ndara uipota ūru vae reta umbiyerovia vaer   jese. ⁵ Echa'ã penti penti tuyapo iparaviqui, yepe t  i yavai chupe penti tivita poi vae rami.

⁶ Tumpa i  nee re uyemboe vae tumee mbaembæ güinoi vae güi oporomboe vae pe.

⁷ Ag  iye piyembitavi. Pepuere'ã pembitavi Tumpa. Echa'ã Tumpa umeeta penti penti pe uyapo vae rupi. ⁸ Ime yave qu  a ico jei vae re  o vae, Tumpa ndarau umee chupe mbae icavi vae. Ërei ime yave qu  a ico Espíritu Santo jei vae re vae, Tumpa umeeta chupe tecove opa mbae vae Espíritu Santo rupi. ⁹ Jare ag  iye yandecueri icavi vae yayapo vae güi. Echa'ã Tumpa umbijecoviata yandeve, yandecueri'   yave. ¹⁰ J  eramo yandepuere yave, yayapo icavi vae opaete vae pe. Icavi ete co yayapo vaer   icavi vae upurug  irovia vae reta pe.

Pablo uyerovia yandeYa Jesucristo icurusu re

¹¹ Mase, tuicha co cua cuat  a reta chepo pe etei aicuat  a peve vae. ¹² Uipota uyepiuca ūru vae reta pe vae reta uipota ete piñemicircuncidaca vaer  , ag  iye vaer   ūru vae reta uyapo icavi mbae vae chupe reta Cristo icurusu jeco pegua. ¹³ Ërei jae reta etei uyapo'   mboroyocu jei vae, yepe t  i un  emicircuncidaca reta. Ërei uipota pe reta piñemicircuncidaca vaer  , jae reta uyerovia ete vaer   ūru vae reta jovaque, jucuar  i piyapo yave. ¹⁴ Ërei yandeYa Jesucristo icurusu re  o ayeroviata ūru vae reta jovai. Jesucristo re arovia ramo, opaete mbaembæ upurug  irovia mbae vae reta ueca vae mbae'   co cheve. Penti cuimbae uyecutu curusu re vae umano mbaembæ ivi pegua güi. Jae ram  io vi che aeca'   ma mbaembæ ivi pegua. ¹⁵ Echa'ã Cristo Jesús re yarovia yave, ña  emicircuncidaca yave mbae'   co, jare ña  emicircuncidaca'   yave mbae'   co. Jae  o icavi Tumpa pe ñanoi vaer   tecove ipiau vae. ¹⁶ Jare opaete cua tecove ipiau vae re yug  ireco vae pe tumee Tumpa mbiacatu jare mburuparareco. Tumee vi Israel pegua reta Tumpa imbae vae pe.

¹⁷ Añave güiye ag  iye qu  a tachemamboco. Echa'ã cherete re uycuua chepere reta. Cua anoi yandeYa Jesús pe ayeyocu ramo. ¹⁸ Cherivi reta, yandeYa Jesucristo ipiacavi to   pe ndive. Am  en

LA CARTA DEL APOSTOL SAN PABLO A LOS EFESIOS

¹ Che co jae Pablo. Che co jae Jesucristo jemimondo Tumpa jei vae rupi. Aicuatía cua tupapire Efeso pe pico vae pe. Tumpa peñono tee iyupeguarā, jare piyeyocui cavi Cristo Jesús pe. ² YandeRu Tumpa jare yandeYa Jesucristo tumee peve ipiacavi jare ipiacatū.

Tumpa yanemivendise Cristo rupi

³ Yambiadora Tumpa. Jae co yandeYa Jesucristo Tu. Tumpa umee yandeve jeta mbaembæc icavi vae ara pegua Espíritu Santo rupi, Cristo re yarovia ramo. ⁴ Echa'ā ndei ivi uyeyapo mbove, Tumpa yandeparavo, yande ñaí vaerā Cristo imbaerā. Cua uyapo, ñaneñono tee vaerā iyupeguarā, jare yanembujipi vaerā jae jovaque. ⁵ Tumpa yanderau. Jáeramo tenonde yave yandeparavo yayeyapo vaerā tai retardarā Jesucristo rupi. Echa'ā cua iquirēi ete uyapo jae jei vae rupi. ⁶ Jare cua uyapo, yambiadora vaerā ipiacavi tuicha vae jeco pegua. Tumpa ipiacavi ete yandeve Tai uau vae rupi. ⁷ Jesucristo yanderepi ma. Echa'ā umano yanderé. Jáeramo Tumpa umbiásas yandeve yanembæyoa reta. Echa'ā jae ipiacavi tuicha ete co. ⁸ Tumpa iyarcuacaa catu jare opaete uicuaa. Jáeramo ipiacavi ete yandeve. ⁹ Tenonde yave uicuaaca'ā iquirēi uyapo vae. Ërei añave uicuaaca yandeve iquirēi uyapo vae. Cua uyapo jae jei vae rupi. ¹⁰ Cua co Tumpa iquirēi uyapo vae: Umbatita opaete mbaembæc uyeyapocue vae, Cristo oī vaerā iYarā - opaete mbaembæcara pe ñugüinoi vae, jare opaete mbaembæc ivi pe ñugüinoi vae. Cua Tumpa uyapota ara iyapi yave.

¹¹ Tenonde yave Tumpa yandeparavo ñanoi vaerā jae umeeta yandeve vae. Jae yandeparavo, yande ñaí vaerā Cristo imbaerā. Jare Tumpa cua uyapo iquirēi ramo. Echa'ā jae uyapo opaete mbaembæc jae jei vae rupi. ¹² Cua Tumpa uyapo uyembædoraca vaerā íru vae reta pe ore rupi. Echa'ā ore rani ndugüirovia Cristo re. ¹³ Jare pe reta vi perovia Cristo re, piyandu yave ñee añete vae. Echa'ā jocua ñee icavi vae umimbeu peve quirái piyembiasaca vaerā. Jare perovia Cristo re yave, Tumpa umee peve Espíritu Santo, uicuaaca vaerā pe reta jae imbae co. Echa'ā Tumpa jei umee vaerā Espíritu Santo. ¹⁴ Tumpa umee yandeve Espíritu Santo, uicuaaca vaerā ñanoita opaete Tumpa umeeta yandeve vae. Cua Tumpa umeeta yandeve yanderepi ete yave. Yande co jae imbae. Jare Tumpa cua uyapo yave, uyembædoracata co cua jeco pegua.

Pablo userure Tumpa pe upurugüirovia vae reta re

¹⁵ Jáeramo che aicuua güiye quirái pe reta perovia yandereYa Jesús re, jare quirái peau opaete Tumpa oñono tee iyupeguarā vae reta, ¹⁶ jecuaeñoi amee yasurupai Tumpa pe peré, jare jecuaeñoi chemandúa peré, ayerure Tumpa pe yave. ¹⁷ Tumpa tumee peve aracuacaa Espíritu Santo rupi, jare tuicuaaca peve mbaembæc, picuacaa cavi vaerā Tumpa regua. Tumpa co jae yandeYa Jesucristo uicuaaca yandeve vae. Jae co yandeRu uyembædoraca vae. ¹⁸ Tumpa tumee peve aracuacaa, picuacaa vaerā quirái pepuere peáro piyerovia reve. Echa'ā jae preparavo cuarā. Tumpa tuicuaaca vi peve quirái uyembædoraca eteta opaete vae pe umeeta yandeve vae jeco pegua. Echa'ā jae ñaneñono tee iyupeguarā. ¹⁹ Tumpa tuicuaaca vi peve quirái tuicha ete imbaepuere yanembori vaerā. Echa'ā yande yarovia Cristo re. Tumpa uicuaaca ma tuicha ete co cua imbaepuere. ²⁰ Echa'ā cua imbaepuere rupi Tumpa umbijecove ye Cristo güeru umanocue vae reta ipite güi, jare umee chupe uguapi vaerā iyacata cotí ara pe. ²¹ Cristo imbaepuere tuicha ete opaete mburuvicha reta ara pegua jare ivi pegua jare ipotave mbaepuere güinoi vae imbaepuere güi. Cristo imbaepuere tuicha ete opaete cua ara reta pe mbaepuere güinoi vae reta jare opaete ara reta outa vae pe mbaepuere güinota vae reta imbaepuere güi. ²² Echa'ā Tumpa umee Cristo pe ico vaerā opaete vae iYarā. Umee vi chupe ico vaerā upurugüirovia vae reta iYarā. ²³ Echa'ā upurugüirovia vae reta Cristo jete co. Jáeramo upurugüirovia vae reta jare Cristo pentiño co. Jare Tumpa umee opaete mbaembæc Cristo pe.

Tumpa yanembiasa ipiacavi jeco pegua

¹ Jare Tumpa umee ma peve tecove ipiau vae. Echa'ā tenonde yave penoil'ā tecove ipiau vae pereco icavi mbae vae jare pembaeyoa reta jeco pegua. ² Jare jocua jeco pegua jecuaeñoi piyapose icavi mbae vae upurugüirovia mbae vae reta jeco rami. Echa'ā jucuarāi uiptava mbaepuere vaerā jocua mburuvicha icavi mbae vae yandepuere mbae yaecha vae - jae co jocua aña guasu upurugüirovia mbae vae reta ipia pe uparavíqui oī vae. Jucuarāi uparavíqui, agüiye vaerā jae reta uyapo Tumpa jei vae. ³ Tenonde yave opaete yande vi yaico yande yae vae reño jae reta rami. Echa'ā yaicose yanderete jare yandepiyemingueta uiptava vae re. Jáeramo Tumpa uiporaracata tēi yandeve, opaete íru vae reta pe uiporaracata rami. Echa'ā yande vi ivi pegua reta co jae reta rami. ⁴ Ërei Tumpa yandeparareco ete,

jare yanderau ete. ⁵ Jáeramo umee yandeve tecove opa mbae vae yaico vaerā Cristo ndive, yepe tēi tenonde yave fianoi'ā tecove opa mbae vae yanembayo reta jeco pegua. Tumpa yanembiasa ipiacavi jeco pegua. ⁶ Tumpa umbijecove ye Cristo Jesús güeru umanocue vae reta ipite güi. Jae ramiño vi umee yandeve tecove opa mbae vae Cristo Jesús ndive, jare yandeapo pentiño Cristo Jesús ndive. ⁷ Cua uyapo, uicuaaca vaerā ara reta outa vae pe quirāi tuicha ete co ipiacavi. Cua ipiacavi uicuaaca ma yandeve Cristo Jesús rupi. ⁸ Echa'ā Tumpa yanembiasa ipiacavi jeco pegua, yapurugüirovia ramo. Yande yamingana'ā etei yembiasa. Jae co Tumpa umeeiño yandeve vae. ⁹ Mbaeti quía ipuere umingana yembiasa ipotave mbaravíquí rupi, agüiye vaerā quía ipuere jei: "Cheparavíquí rupi co amingana yembiasa." ¹⁰ Echa'ā Tumpa yandeapo. Jare yandeapo ma penti ramiño Cristo Jesús ndive, yande yayapo vaerā icavi vae. Echa'ā tenonde yave Tumpa iquiréi jecuaeño yayapo vaerā icavi vae.

Cristo yanembipiácatu Tumpa ndive

¹¹ Jáeramo pemandúa cua re: Pe reta co jae judío mbae vae reta. Jare jocua uñemicircuncidaca jee vae reta - jae reta uñemicircuncidaca co jete pe - jae reta pembijee uñemicircuncidaca mbae vae reta. ¹² Jáeramo jocua ara reta pe Cristo mbae'ā co peve. Echa'ā pe reta Israel pegua reta'ā co, jare Tumpa jei umeeta Israel pegua reta pe vae pembaaer'ā co. Jáeramo peáro'ā mbae piyerovia reve. Echa'ā picose cua ívi pe Tumpa picuua mbae reve. ¹³ Tenonde yave pe reta mbirí pico Tumpa güi. Ërei añave piyeyapo penti ramiño Cristo Jesús ndive, jare coiño ma co pico Tumpa güii Cristo imano jeco pegua. ¹⁴ Echa'ā Cristo co jae mbiacatu umee yandeve vae. Jae uyapo penti ramiño judío reta jare judío mbae vae reta. Tenonde yave judío reta jare judío mbae vae reta oyovaicho uyupii. Uyembiyao reta uyugüi. Ërei Cristo umbai ma yembiyao. ¹⁵ Echa'ā Cristo umano yave, umbai mboroyocui. Echa'ā mboroyocui umimbeu judío reta pe mbae uyapo vaerā. Jáeramo Cristo umbai mboroyocui, uyapo vaerā mocui reve penti ramiño jae ndive. Jucuarái umee mbiacatu. ¹⁶ Jare cua uyapo, umbipiácatu vaerā Tumpa ndive mocui reve penti ramiño imano jeco pegua oyovaicho'ā ma uyupii.

¹⁷ Jayave ou umimbeu mbiacatu regua pe reta tenonde yave mbirí pico chugüi vae pe jare ore tenonde yave coiño nduico chugüi vae pe. ¹⁸ Echa'ā Cristo rupi mocui reve yandepuere yaya yandeRu re Espíritu Santo rupi. Echa'ā Espíritu Santo pentiño co. ¹⁹ Jáeramo pe reta ambie ívi pegua reta rami'ā ma co. Pe reta co jae uñeñono tee Tumpa peguarā vae reta jentaigua reta. Pe reta co jae Tumpa jentará reta. ²⁰ Yamijaanga penti tenta. Temimondo reta jare Tumpa iñee umimbeu vae reta tenta iguapicarā oñono vae reta rami co, jare pe reta co jae tenta rami. Jesucristo etei co jae ita uñeñono tenonde tentará vae rami. ²¹ Opaete tenta uyeyapocavi oí ita uñeñono tenonde tentará vae ndive, jare uyeyapo oí penti tenta uñeñono tee yandeYa peguarā vae. ²² Pe reta vi penti ramiño co yandeYa ndive. Jáeramo pe reta vi co jocua tenta rami. Echa'ā Tumpa ico jocua tenta pe Espíritu Santo rupi.

3

Tumpa uicuaaca Pablo pe tenonde yave uyecuua mbae vae

¹ Jáeramo che etei ayerure Tumpa pe peré. Che co jae penti pereso pereco pegua, Cristo Jesús pe ayeyocui ramo - pe reta co jae judío mbae vae reta. ² Picuua ma co aipo quirāi Tumpa uicuaaca cheve ñee Tumpa ipiacavi regua, che aicuaaca-yuapi ye vaerā peve. Cuarái ayeyocui aí Tumpa pe. ³ Picuua ma co aipo quirāi jae etei uicuaaca cheve jocua tenonde yave uyecuua mbae vae. Echa'ā cua regua aicuatia ma peve mbovi ñee peño. ⁴ Peminguela yave, picuua cavita co quirāi che aicuaa jocua Cristo regua tenonde yave uyecuua mbae vae. ⁵ Tenonde yave cua uyecuua'ā etei ívi pegua reta pe. Ërei añave Tumpa uicuaaca temimondo oñono tee iyupeguarā vae reta pe jare iñee umimbeu vae reta pe. Jae uicuaaca chupe reta Espíritu Santo rupi. ⁶ jae co cua: Uyandu yave ñee icavi vae, jare güirovia yave Cristo Jesús re, judío mbae vae upurugüirovia vae reta güiñoina imbaerá judío upurugüirovia vae reta ndive, jare mocui reve uyeyapota penti ramiño - penti jete rami - jare mocui reve güiñoina Tumpa jei umeeta vae. ⁷ Che ayeyocui Tumpa pe. Ipiacavi jeco pegua Tumpa umee cheve jae imbaepuere rupi che amimbeu vaerā ñee icavi vae. ⁸ Yepe tēi che co jae uñeñono tee Tumpa peguarā vae reta jaicuega ete, ërei Tumpa cua umee cheve ipiacavi jeco pegua, che amimbeu vaerā judío mbae vae reta pe quirāi yaicocatu ete co Tumpa coti, Cristo re yarovia yave. Echa'ā mbaeti quía ipuere uicuaa cua regua ipiayemingueta rupiño. ⁹ Jare Tumpa umee cheve aicuaaca vaerā opaete vae pe quirāi Tumpa umee cheve ayeyocui vaerā chupe cua tenonde yave uyecuua mbae vae re. Echa'ā tenonde yave Tumpa uicuaaca'ā etei quía pe cua. Tumpa co jae opaete mbaembiae iyapoa. ¹⁰ Cua Tumpa umee cheve, mburuvicha reta jare mbaepuere güiñoina vae ara pe ñugüinoina vae reta uicuaa vaerā quirāi Tumpa iyaracuasa catu co. Cua uicuaata reta upurugüirovia vae reta rupi. ¹¹ Echa'ā cuarái Tumpa jecuaeño iquiréi uyapo yandeYa Jesucristo rupi. ¹² Yandepuere yaya Tumpa re Cristo rupi. Echa'ā yarovia ma Cristo re ramo, yandepuere yaya yaquiyé mbae reve. ¹³ Jáeramo agüiye pepiatiti aiporara pereco pegua vae re. Pepuere pembiadora Tumpa cua re.

Cristo ipuruan

¹⁴ Jáeramo cheayeatica yandeYa Jesucristo Tu jovai. ¹⁵ Opaete jentará ara pe ñugüinoi vae reta jare jentará iví pe ñugüinoi vae reta güínoi jee chugüi. ¹⁶ Ayerure Tumpa pe umee vaerá peve mbaepuere. Echa'á jae imbaepuere jeco pegua uyembiadoraca ete. Jare cua mbaepuere rupi Tumpa iEspíritu tapemimiráta pepia pe. ¹⁷ Tuyecuaa cavi quirái Cristo ico pepia pe pepurugüirovia jeco pegua. Tumpa tapemimiráta jare tapemiatangátu ipuruau pe, ¹⁸ pepuere vaerá picuuaa cavi opaete uñéñono tee Tumpa peguará vae reta ndive quirái tuicha ete co Cristo ipuruau, ¹⁹ jare picuuaa vaerá Cristo ipuruau, yepe tēi ipuere'á quía uicuuaa cavi ete opaete jocua mburuau. Pepia titinee Tumpa pe.

²⁰ Jare añave yambiadora Tumpa. Echa'á jae ipuere ete opaete yande yayerure chupe jese vae güi, jare opaete yandepia pe yayeminguela jese vae güi. Jeta ete uyapota yandeve imbaepuere yandepia pe uparavíqui vae rupi. ²¹ Tumpa tuyembiadoraca opaete vae pe upurugüirovia vae reta rupi jare Cristo Jesús rupi jaeño mai pegua. Amén.

4

Penti ramíño Espíritu Santo rupi

¹ Che co jae penti pereso, yandeYa pe ayeyocui ramo. Che pumiñera jecuaéño pico cavi vaerá, íru vae reta uicuuaa vaerá Tumpa preparavo co. ² Piñemimichi uycotí. Agüiye pepochí piyupe. Pepiaguasu piyupe. Piyerau ramo, agüiye piñeengata piyupe. ³ Piñemiatangátu pico vaerá penti ramíño pepiacatu reve Espíritu Santo rupi. ⁴ Cristo jete pegua reta pentiño co, jare Espíritu Santo pentiño co. Jae ramíño vi Tumpa preparavo, peáro vaerá piyerovia reve penti ramíño. ⁵ Ime vi pentiño yandeYa, jare opaete yarovia yandeYa re, jare opaete yayembibautizaca Espíritu Santo pe. ⁶ Tumpa vi pentiño co. Jae co yandeRu. Jae co yandeYa. Jae uparavíqui opaete yande rupi. Jae ico yandepia pe.

⁷ Êrei Cristo umee yandeve penti pe ipiacavi, yandepuere vaerá yayapo mbaravíqui Cristo uiporta yayapo vaerá vae. ⁸ Echa'á Tumpa iñee pe uyecuatía oí cuarái:

"Uyupí oo ara pe yave, güírraa pereso reta,
jare umee mbaepuere iví pegua reta pe Tumpa iparavíqui uyapo vaerá."
Jucuarái uyecuatía oí.

⁹ Tapirandu peve, mbæ pa uipota jei cua uyupí oo ara pe jei vae? Uipota jei ugüeyi rani vi co iví igüí pe etei. ¹⁰ Jocua ugüeyi vae co jae uyupí oo ívate ete opaete ara reta güi vae etei. Jucuarái uyupí, uyeyapo vaerá opaete mbaembæ iYará. ¹¹ Jare Cristo etei umee amocue vae pe temimondo retará yugüireco vaerá. Jare umee amocue vae pe Tumpa iñee umimbeu vaerá. Umee vi amocue vae pe umimbeu vaerá ñee icavi vae. Umee vi íru vae reta pe uyandareco vaerá upurugüirovia vae reta re, jare íru vae reta pe omboe vaerá upurugüirovia vae reta. ¹² Cua Cristo uyapo, uñéñono tee Tumpa peguará vae reta ipiráta vaerá ipurugüirovia re, jae reta ipuere vaerá uparavíqui Tumpa pe, Cristo jeterá uyeyapo vaerá. ¹³ Cristo uipota yayeyapo vaerá penti ramíño yandepurugüirovia rupi, yaicuuaa cavi vaerá jae co Tumpa Tai. Uipota yayeyapo vaerá penti cuimbae ipiráta vae rami. Jare jucuarái yayeyapota co, yandepia tínee oí Cristo pe yave. ¹⁴ Cristo uipota'á yaico vaerá sambiai reta rami. Echa'á sambiai reta uicuua'á mbæ ra güírovia vaerá. Echa'á penti ara ipuere güírovia penti moromboe, jare íru ara ipuere güírovia íru moromboe. Echa'á moromboe añete mbæ vae re oporomboe vae reta ipoqui ete co upurumbitaví vaerá. ¹⁵ Êrei yande jecuaéño yae añete vae yayerau reve. Jucuarái yave, yaicota ucuacuuaa vae reta rami, Cristo uiporta rami. Echa'á jae co upurugüirovia vae reta iñáca. ¹⁶ Cristo jare upurugüirovia vae reta penti cuimbae rami co. Echa'á opaete cuimbae jete jare opaete iyuapiapía uparavíqui penti ramíño, icavi oí vaerá cuimbae. Jae ramíño vi opaete upurugüirovia vae reta uparavíqui penti ramíño uyerau reve, Cristo jeterá uyeyapocavi vaerá.

Tecove ipíau vae

¹⁷ Jáeramo che amímbeu peve yandeYa jee re cua: Agüiye ma pico upurugüirovia mbae vae reta yugüireco rami. Echa'á jae reta yugüireco ipiayemingueta cavi mbae reve. ¹⁸ Echa'á ipiayemingueta uñemípítumimbi ma. Güínoi'á tecove Tumpa umee vae. Echa'á uicuua'á Tumpa regua, ipiatanta ramo.

¹⁹ Jecuaéño imbiquere, jare imara'á etei. Echa'á uipota ete reta uyapo vaerá opañó mbae pichíí vae.

²⁰ Êrei jucuarái'á co Cristo pemboe. ²¹ Piyandu ma co aipo chupe, jare piyemboe ma co aipo añete vae re. Echa'á añete vae co jae Jesús. ²² Jáeramo agüiye ma pico picose rami. Peeya piyugüi pereco mai indechicue pichíí vae. Echa'á picose pe pere vae reño, jare jucuarái piyembitavi. ²³ Tuyembipiau pepiayemingueta. ²⁴ Pipisi teco mai ipíau vae. Echa'á teco mai ipíau vae jupi co, jare uyapoca'á etei mbaeyoa peve. Cua teco mai ipíau vae icavi co Tumpa pe.

²⁵ Jáeramo agüiye ma peapu piyupe. Opaete pere añete vae perapicha pe. Echa'á opaete yande penti ramíño co.

²⁶ Pepochí yave, agüiye peyoa. Agüiye pepítu pearasi reve.

²⁷ Agüiye pemaeño aña guasu re mbaepuere güínoi vaerá peré.

²⁸ Imondase vae agüiye ye ma timonda. Ërei tuyapo ipo pe mbaraviquí icavi vae, ime vaerä güïnoi mbae umee vaerä iparavete vae pe.

²⁹ Agüiye pemoë ñee pichñi vae. Ërei pemoë ñee icavi vae, pemberi vaerä íru vae reta. Echa'ä jucuaräi Tumpa ipuere ombori uyapisaca peré vae reta. ³⁰ Jare agüiye pembípiatiti Tumpa iEspíritu Santo. Echa'ä Tumpa umee ma peve Espíritu Santo, uicuaaca vaerä pe reta jae imbae co. Jare Espíritu Santo icota pe reta ndive, Tumpa perepi ete regua.

³¹ Agüiye pembasi pico piyupe. Agüiye pepochi piyupe. Agüiye pearasi piyupe. Agüiye piñeengata piyupe. Agüiye pere icavi mbae vae piyupe. Agüiye piyapo icavi mbae vae piyupe. ³² Ërei pepiacavi piyupe. Piyerau. Piyembiasa uyupii. Echa'ä Tumpa pembiasa ma Cristo rupi.

5

Yaico Tumpa jei vae re

¹ Jecuaeño pico Tumpa jei vae re. Echa'ä Tumpa co jae yanderu jare jae yanderau. ² Jáeramo pico piyerau reve, Cristo yanderau rami. Echa'ä Cristo uñemee umano vaerä, penti maemimba uyeyucacue Tumpa pe uñemee vae rami. Jare cua uyapo umbai vaerä yanembaeyoa reta. Cua umbiyerovia Tumpa, mbae ipiche cavi vae upurumbiyerovia rami.

³ Ërei agüiye etei piyapo aguasa jare opaete mbae pichñi vae, jare agüiye pipota íru vae reta imbaembæ. Echa'ä Tumpa peñono tee ma iyupeguarä. ⁴ Jare agüiye vi piyeminguela imbiquere vae reta uyeminguela rami. Agüiye piyeminguela iyaracuua mbae vae reta uyeminguela rami. Agüiye peyurupichñi ñee icavi mbae vae pe. Echa'ä icavi'ä piyeminguela vaerä jucuaräi. Ërei cua mbaembæ icavi mbae vae pere vaeräve pemee yasurupai Tumpa pe. ⁵ Echa'ä pe reta picuua cua: Aguasa uyapo vae reta, jare opaete mbae pichñi vae uyapo vae reta, jare íru vae reta imbaembæ uipota vae reta - echa'ä uipota ete íru vae reta imbaembæ Tumpa güi - ndarau yugüüreco Cristo jare Tumpa iporoyocuia pe. ⁶ Agüiye pemaeño quía re pembítavi vaerä cua re. Echa'ä cua icavi mbae vae jeco pegua Tumpa uiporaracata co Tumpa jei vae uyapo'ä vae reta pe. ⁷ Jáeramo agüiye pico jae reta yugüüreco rami.

⁸ Echa'ä tenonde yave pe reta picose yugüüreco pítumimbi pe vae reta rami. Ërei añave pico tembipe yanderu umee peve vae pe. Jecuaeño pico yugüüreco tembipe pe vae reta rami. ⁹ Echa'ä tembipe pe yugüüreco vae reta ipiacavi, jare jupi vae uyapo, jare jei añete vae. ¹⁰ Jecuaeño pipota picuua yanderu uipota piyapo vaerä vae. ¹¹ Agüiye etei piñemíru pítumimbi pe yugüüreco vae reta ndive. Echa'ä jocua uyapo reta vae icavi'ä Tumpa pe. ¹² Ërei picuuaaca icavi mbae vae co jocua uyapo reta vae. ¹³ Echa'ä penti ñemimaraca co yayeminguela vaerä jocua uyapo viari reta vae re. ¹⁴ Tembipe oí yave, opaete uycuua cavi, jare yandepuere yaicuaaca icavi mbae vae co opaete jocua mbaembæ. Echa'ä jocua uyapo opaete uycuua cavi vaerä vae tembipe co. ¹⁵ Jáeramo Tumpa jei oque vae pe cuaräi: "Esarecoño ma.

Icove ye penti ou umanocue vae reta ipite güi vae rami.

Cristo tumee ndeve tembipe."

Jucuaräi jei.

¹⁵ Jáeramo piñemiatangätu pico cavi vaerä. Agüiye pico iyaracuua mbae vae reta yugüüreco rami. Pico iyaracuua catu vae reta yugüüreco rami. ¹⁶ Jecuaeño piyapo icavi vae. Echa'ä jeta vae uyapo icavi mbae vae. ¹⁷ Jáeramo agüiye pearacuua mbae vae echa. Ërei picuua cavi yanderu jei vae. ¹⁸ Jare agüiye pesavípo. Echa'ä usavípo vae reta uyapo jeta mbae icavi mbae vae. Ërei pemaeño Espíritu Santo re umítinee vaerä pepia. ¹⁹ Picuuaaca quiräi piyerovia ete canta reta yambiadora Tumpa pipe vae pe. Pecanta jare pembiadora yanderu pepia pe. ²⁰ Jecuaeño pemee yasurupai opaete mbae re yanderu Tumpa pe yanderu Jesucristo jee re.

Yayeyocui yandiyupe

²¹ Piyeocui piyupe, pipiu Cristo ramo.

²² Cuña reta tuyeyocui ime pe, uyeyocui yanderu pe ramo. ²³ Echa'ä cuimbae oyocui jembireco, ñaneäca oyocui yanderete rami. Jae ramíño vi Cristo co jae upurugüürovia vae reta iñäca. Jare upurugüürovia vae reta co jae Cristo jete, jare Cristo co jae upurugüürovia vae reta umbiasa vae. ²⁴ Jare upurugüürovia vae reta uyeyocui Cristo pe. Jáeramo jae ramíño vi cuña reta tuyeyocui ime pe opaete mbae re.

²⁵ Cuimbae reta tuau jembireco, Cristo uau upurugüürovia vae reta rami. Echa'ä jae uñemee umano vaerä jese reta, ²⁶ oñono tee vaerä iyupeguarä, jare oyoe vaerä. Echa'ä iñee yandeyoe, mbae yayoe i pe ramo. ²⁷ Jucuaräi Cristo uyapo, upurugüürovia vae reta uyembutuichaca vaerä jae jovai ñugüünoi yave. Ndarau güïnoi mbae iquia vae jare mbae pichñi vae. Ndarau etei güïnoi cua nunga mbaembæ. Echa'ä Cristo uñemee umano vaerä, upurugüürovia vae reta uñenono tee vaerä chupeguarä, jare icavi ete ñugüünoi vaerä. ²⁸ Cuimbae reta tuau jembireco, jete uau ramo. Cuimbae jare jembireco pentiño

co. Jáeramo jocua uau jembireco vae jae co uyerau. ²⁹ Echa'ã mbaeti etei quía umitarëi jete. Opaete vae umingaru jete, jare uyandareco jese. Jae ramiño vi Cristo uyandareco upurugüirovia vae reta re. ³⁰ Echa'ã yande co jae Cristo jete pegua reta. Yande co jae Cristo isoo jare icágüe pegua reta. ³¹ Cua jeco pegua penti cuimbae tusirí tu jare ichi güi, jare tuñemiru jembireco ndive, mocui reve uyeyapo vaerä penti ramiño. ³² Yandepuere'ã etei yaicuua cavi cua regua. Ërei chemiari aï peve Cristo jare upurugüirovia vae reta re. ³³ Ërei penti penti tuau jembireco, jae uyerau rami. Jare cuña tuipiú ime.

6

¹ Cunumi reta jare cuñatai reta tuyapo tu jare ichi jei vae, yandeYa re güirovia ramo. Echa'ã cua jupi co. ² Tumpa umimbeu Moisés rupi mboroyocui reta. Jare mboroyocui itenondegua vae co cua: "Ipíu nederu jare ndesi, ³ ndico cavi vaerä, jare ndicopucu vaerä ívi pe." Jucuaräi Tumpa jei umeeta vae.

⁴ Jare tu reta agüiye tumbiarasiño isambiai reta. Ërei tumbicuacuua cavi. Tomboe jupi vae re, jare tumbiaracuua, yandeYa uipota rami.

⁵ Uyeyocui vae reta tuyapo ipatrón jei vae uiipiù reve jare umbutuicha reve. Ipiaquiréi reve tuyeyocui ipatrón pe. Tuyeyocui chupe, Cristo pe uyeyocui rami. ⁶ Agüiye tuyeyocui cavi ipatrón pe jae umae oí jese yaveño, umbiyerovia vaeräño. Tuyeyocui chupe, Cristo pe uyeyocui ramo, jare Tumpa jei vae ipiaquiréi reve uyapo ramo. ⁷ Tuyeyocui chupe, iquiréi ete ramo. Tuyeyocui chupe, Cristo pe uyeyocui rami. Echa'ã cuimbae peño'ã uyeyocui. ⁸ Tuicuua cua: Ipotave vae - penti uyeyocui vae ani penti uyeyocui mbae vae - mbae icavi vae uyapo yave, yandeYa uyapota vi chupe mbae icavi vae.

⁹ Jare patrón reta tuyapo icavi vae jembiocui reta coti. Agüiye jecuaeño tuyuvanga catu. Echa'ã tuicuua jae reta vi güinoi co iYa ara pe. Jare yandeYa ara pe oí vae uau'ã penti vaeño íru vae güi.

Mbaepuere yandeYa ipuere umee yandeve vae

¹⁰ Taicue rupi ete tae peve, cherivi reta, cua: Piñemiatangåtu jocua mbaepuere yandeYa ipuere umee yandeve vae re. ¹¹ Piporu opaete Tumpa ipuere umee yandeve vae, pepuere vaerä piyerepi opaete mbae icavi mbae vae aña guasu uipota uyapo peve vae güi. ¹² Echa'ã ñañeräro'ã ñañ ívi pegua reta ndive. Ñañeräro ñañ espíritu icavi mbae vae ara pe ñugüinoi vae reta ndive. Jae reta co ívi pegua pítumimbi pe yugüireco vae reta iya reta, jare mbaepuere güinoi reta oporoyocui vaerä. ¹³ Jáeramo piporu opaete Tumpa ipuere umee yandeve vae, agüiye vaerä permaeño piyee icavi mbae vae uñeräro pe ndive vae reta pe, jare piñeräro yave, jecuaeño pepiräta vaerä. ¹⁴ Jáeramo piñemimiräta. Yamijaanga sundaro. Sundaro güinoi mbaembae ipuere vaerä uñeräro cavi. Jae ramiño vi Tumpa umee yandeve vae yanembupuere, yandepuere vaerä ñañeräro cavi. Echa'ã pere yave añete vae, icavita peve sundaro jumbicuua icavi sundaro pe rami. Jare piyapo yave jupi vae, icavita peve sundaro icamisa fierro pegua icavi sundaro pe rami. ¹⁵ Jare pipota yave pemimbeu íru vae reta pe ñee icavi vae mbiacatu regua, icavita peve sundaro ipipasa icavi sundaro pe rami. ¹⁶ Jare mburugüirovia jecuaeño penoi yave, icavita peve penti yeypiacica icavi sundaro pe rami. Echa'ã sundaro ipuere oyopia yeypiacica pe opaete ui jovaicho reta uyapi pipe vae. Jae ramiño vi mburugüirovia jecuaeño penoi yave, ndarau piyapo icavi mbae vae, yepe téi aña guasu uipota ete piyapo vaerä. ¹⁷ Jare jecuaeño pemandúa yave quirái Tumpa pembiasa ma co, icavita peve áca regua fierro pegua icavi sundaro pe rami. Jare piporu yave Tumpa ñíee Espíritu Santo imbaepuere rupi, icavita peve penti quisepuci icavi sundaro pe rami. ¹⁸ Jecuaeño piyerure Tumpa pe mbaembae re. Jecuaeño piyerure Espíritu Santo rupi. Jecuaeño piñemiatangåtu, agüiye vaerä pecueri. Jecuaeño piyerure Tumpa pe opaete uñeñono tee Tumpa peguarä vae reta re. ¹⁹ Piyerure ete cheré, Tumpa umee vaerä cheve chemiari vaerä aquíye mbae reve, aicuaaca vaerä ñee icavi vae tenonde yave uyecuua mbae vae. ²⁰ Echa'ã Tumpa chembou amimbeu vaerä cua ñee, jare cua ñee jeco pegua pereso aí. Piyerure cheré, amimbeu vaerä aquíye mbae reve. Echa'ã jucuaräi icavi co amimbeu vaerä.

²¹ Tíquico umimbeuta peve opaete mbaembae, picuua vaerä cheregua jare ayapo aí vae regua. Tíquico co jae yanderivi. Aau co. Jae uyeyocui cavi yandeYa pe. ²² Jáeramo amondo pepi, picuua vaerä oreregua, jare jae pembipiácatu vaerä.

²³ Cherivi reta, yandeRu Tumpa jare yandeYa Jesucristo tumee peve mbiacatu jare mburuau jare mburugüirovia. ²⁴ Tumpa tumee ipiácatu opaete mburuau opa mbae vae yandeYa Jesucristo coti güinoi vae reta pe. Amén.

LA CARTA DEL APOSTOL SAN PABLO A LOS FILIPENSES

¹ Che co jae Pablo, jare Timoteo ime cua pe oī che ndive. Ore nduyeyocui Cristo Jesús pe. Aicuatía cua tupapire Filipos pe pico vae pe - pe reta co jae tenondeguia reta, jare īru upurugüirovia vae reta omborí vae reta, jare opaete īru uñeniono tee Tumpa peguarā vae reta. Pe reta perovia Cristo Jesús re.

² YandeRu Tumpa jare yandeYa Jesucristo tumee peve ipiacavi jare ipiacatu.

Pablo yerure Tumpa pe upurugüirovia vae reta re

³ Amee yasurupai Tumpa pe chemandúa peré ñave ñave. ⁴ Ayerure Tumpa pe opaete peré yave, jecuaeño ayerure ayerovia reve. ⁵ Echa'ā pe reta jecuaeño chembori amimbeu vaerā ñee icavi vae pe reta piyandu güive. ⁶ Tumpa umbipi ma uyapo penti mbaravíquí icavi vae pepia pe, jare aicuua catu jae etei co jecuaeño uyapota jocua mbaravíquí Jesucristo ou ye regua. ⁷ Icavi co chepiá pe ayeminguela vaerā cuarāi peré. Echa'ā puau ete. Peresoriru pe aī rambueve, jare aicuua yave īru vae reta pe ñee icavi vae Tumpa pegua co jare añete vae co, Tumpa jecuaeño umee cheve ipiacavi. Jare mbiacavi umee cheve vae umee peve vi. ⁸ Echa'ā Tumpa uicuua quirāi che puau ete co, Jesucristo etei perau ramí. ⁹ Jare ayerure Tumpa pe jecuaeño tucuacua pepurua picuua catu reve jare pearacuaa catu reve, ¹⁰ pipota vaerā piyapo icavi vae, pico cavi vaerā, agüiye vaerā quía ipuere pembijeco mbae re Cristo ou ye regua. ¹¹ Ayerure jecuaeño piyapo vaerā mbaembae icavi vae jupi vae pegua Jesucristo rupi. Echa'ā cuarāi Tumpa uyembíadoracata.

Pablo jecuaeño uipota uyeyocui Cristo pe

¹² Cheriví reta, aipota picuua vaerā quirāi uyeyapo cheve vae omborí ma uñemai vaerā ñee icavi vae. Umbiavai'ā etei. ¹³ Echa'ā opaete sundaro mburuvicha guasu jenta pe ñugüinói vae reta jare opaete īru vae reta uicuua quirāi che cua peresoriru pe aī Cristo pe ayeyocui ramo. ¹⁴ Jare jeta yanderiví reta uñemiatangātu ma yandeYa cotí, uicuua reta peresoriru pe uyeyapo cheve vae ramo. Jare jae reta umimbeu Tumpa iñee uquye mbae reve.

¹⁵ Añete co, amocue vae umimbeu Cristo regua ñacatāa cheré ramo, jare jovaichopota che ndive ramo. ¹⁶ Ërei īru vae reta umimbeu iquirēi ramo. ¹⁷ Jocua jovaichopota che ndive vae reta umimbeu Cristo regua uipota tēi cheacatāa vaerā jese reta ramo. Jucuarāi uipota tēi aiporara vaerā, peresoriru pe aī rambueve. ¹⁸ Ërei īru vae reta umimbeu Cristo regua, cherau ramo. Echa'ā uicuua reta quirāi Tumpa cheñono cua pe, aicuaca vaerā īru vae reta pe ñee icavi vae Tumpa pegua co. ¹⁹ Ërei icavíño co. Echa'ā opaete quirāi rupi jaeñoi umimbeu reta Cristo regua - amocue vae uipota tēi uyapo icavi mbae vae cheve, jare īru vae reta uipota uyapo icavi vae cheve. Cua jeco pegua ayerovia aī. Jare jecuaeño co ayeroviata. ²⁰ Echa'ā aicuua opaete cua icavita co cheve, pe reta piyerure cheré ramo, jare Jesucristo iEspíritu chembori ramo. ²¹ Cuarāi uyeyapota che aipota ete vae. Echa'ā jecuaeño aipota aico, agüiye vaerā chemara mbae re. Aipota aico aquiyé mbae reve, jecuaeño Cristo uyembíadoraca vaerā cherete rupi, amano yave ani jecuaeño aico yave. ²² Echa'ā jecuaeño aico yave, ayeyocuñotai co Cristo pe. Jare amano yave, icavi eteta co cheve. ²³ Jare jecuaeño aico yave, aparavíquita Tumpa pe, icavi vae ayapo vaerā. Aicual'ā icavi ra amano vaerā, ani icavi ra aicoño vaerā. ²⁴ Mocui reve aipota tēi. Echa'ā aipota amano, Cristo ndive aī vaerā. Cua icavi eteta co cheve. ²⁵ Ërei icavi ndipo jecuaeño aico vaerā, chepuere vaerā pombori. ²⁶ Aicuua catu cua. Jáeramo aicuua jecuaeño aicota, apita vaerā opaete pe reta ndive, jare pombori vaerā, piñemimirāta vaerā pepurugüirovia re piyerovia reve, ²⁷ jare pe reta pembiadora ete vaerā Cristo Jesús cherecho pegua, che aī ye yave pepi.

²⁸ ²⁷ Jaeño pico cavi. Echa'ā perovia ma ñee icavi vae Cristo regua. Jáeramo icavi co pico cavi vaerā. Aramo aata apou pepi. ²⁹ Ërei aīl'ā yave, aipota pererácuia cavi vaerā cheve, quirāi piñemimirāta penti ramíño, jare quirāi piñemiatangātu penti ramíño mburugüirovia ñee icavi vae regua penoi vae re, ³⁰ jare quirāi pequiyé aī etei oyovaicho pe ndive vae reta güi. Echa'ā cua uicuaca jae reta yugüiraata co cañitei pe. ³¹ Ërei cua uicuaca vi Tumpa pembiasa ma co. ³² Echa'ā Tumpa umee peve perovia vaerā Cristo re. Jae ramíño vi umee peve piporara vaerā Cristo jeco pegua. ³³ Jáeramo pe reta piporara péi, tenonde yave cherecha aiporara rami, jare añave picuua aiporara co.

Cristo uñemimichi, jare Tumpa umbíadoraca

¹ Jáeramo Cristo ipuere pemiatangātu ramo, jare Cristo ipuruau ipuere pembipiácatu ramo, jare Espíritu Santo ipuere imiari peve ramo, jare pepuere piyerau ramo, jare pepuere piyeparareco ramo, ² pico cavi uyupii, jare piyerau, jare penti ramíño pico pepia pe piyeminguela vae oyovaque reve. Cuarāi piyapo yave, ayerovia eteta co. ³ Agüiye mbae piyapo piyovaicho reve uyupii. Agüiye mbae piyapo

piyembicate reve. Êrei opaete mbaembae piyapo piñemimichi reve. Penti penti tumae cavi íru vae re. Agüiye tuyembicate. ⁴ Penti penti tuyandareco íru vae reta re. Agüiye tuyandareco iyeeiño.

⁵ Pepia pe piyeminguela uyucoti, Cristo Jesús ipia pe uyeminguela rami. ⁶ Echa'á jae etei co Tumpa. Êrei yepe tēi jae oyovaque Tumpa ndive, uyembutuicha'á cua re. ⁷ Êrei jae uñemimichi, jare uyeyapo cuimbaerá uyeyocui vaerá ivi pegua reta pe. ⁸ Jare cuimbaerá uyeyapo ma yave, uñemimichi ye, jare umano Tumpa jae vae uyapo vaerá. Jare umano penti curusu re cuimbae jeco vae umano vae rami. ⁹ Jáeramo Tumpa umbutuichaca ete ma, jare umee chupe mbaepuere opaete íru mbaepuere güi tuicha ete vae, ¹⁰ opaete ara pe ñugüinói vae reta, jare opaete ivi pe ñugüinói vae reta, jare opaete cañitei pe ñugüinói vae reta uyeatica vaerá Jesús jovai, ¹¹ jare opaete vae jae vaerá Jesucristo co jae opaete vae iYa. Jare cua uyeyapo yave, yandeRu Tumpa uyembiadoracata opaete vae pe.

Upurugüirovia vae reta tembipe rami co

¹² Che puau co. Pe ndive aico rambueve, jecuaeño piyapo che jae peve piyapo vaerá vae. Jare yepe tēi añaive ai'á ma pe ndive, êrei jecuaeño piñemiatangátu ete yembiasa penoi vae rupi pipiu reve Tumpa güi jare pembiadora reve. ¹³ Echa'á Tumpa etei umee peve quiréi piyapo vaerá jae jei vae. Echa'á Tumpa jae vae icavi co.

¹⁴ Opaete piyapo vae piyapo piñeenguru mbae reve jare piyeaca mbae reve. ¹⁵ Jucuarái yave, ndarau quía pembijeco mbae re, jare ndarau mbae icavi mbae vae piyapo íru vae coti, jare picota upurugüirovia mbae vae reta ipite pe pereco mbae reve. Pe reta co jae Tumpa tai reta. Jáeramo piyecuua upurugüirovia mbae vae reta ipite rupi, guarasi umiembipe ivi pe vae rami. Echa'á upurugüirovia mbae vae reta jupi'á jare jecopochi co. ¹⁶ Jecuaeño pemimbeu íru vae reta pe ñee tecove opa mbae vae ipuere umee chupe reta vae, chepuere vaerá ayerovia Cristo ou ye yave. Echa'á aicuaata añemiatangátuíño'á jare aparaviquiñío'á. ¹⁷ Ayeyocui ma Tumpa pe pepite pe, pe reta pepurugüirovia vaerá. Jare jocua mburugüirovia penoi vae amee Tumpa pe, sacerdote maemimba uyeyucacue umee rami. Aramoi cherugüi uyepiyereta vi, vino uyepiyere maemimba uyeyucacue iárambo rami. Êrei cua uyeyapo yave, jeseve ayerovia co opaete pe reta ndive. ¹⁸ Cua jeco pegua pe reta vi piyerovia che ndive.

Timoteo jare Epafroditó

¹⁹ Êrei yandeYa Jesús uipota yave, amondota Timoteo pepi curi, che vi chepiacatu vaerá, aicuaa yave peregua. ²⁰ Echa'á mbaeti co quía ye ipia pe uyeminguela peré che chepiá pe ayeminguela peré rami vae. Mbaeti co quía ye añetete iquiréi uyandareco peré vae. ²¹ Echa'á opaete íru vae reta iquiréi uyandareco iyeeiño. Iquiréi'á uyandareco Cristo Jesús iparavíqui re. ²² Êrei picuua co quirái Timoteo jecocavi, jare quirái jae uyeyocui Tumpa pe che ndive, ñee icavi vae numimbeu vaerá. Jae uparavíqui Tumpa pe che ndive, penti tai uparavíqui tu ndive vae rami. ²³ Jáeramo aipota amondo curi, aicuaa yave mbae ra uyeyapota cheve. ²⁴ Êrei yandeYa uipota yave, che vi aata pepi curi.

²⁵ Êrei amondo ma pecoti Epafroditó. Echa'á icavi echo cheve amondo vaerá. Jae co yanderivi yandeYa re. Jae vi uparavíqui Tumpa pe che ndive, jare jecuaeño uñemiatangátu yandeYa re. Pe reta pembou chepi uyandareco vaerá cheré. ²⁶ Jae uipota ete perecha, jare ipiatiti ete. Echa'á jerácuca peve quirái jae imbaerasi. ²⁷ Añete co, imbaerasi ete. Umano seri. Êrei Tumpa uiparareco. Jare jucuarái Tumpa uicuaaca vi cheve ipuruparareco - mbaeti Epafroditó peño. Echa'á chepiatiti íru mbaembae re. Êrei jae umano yave mona, chepiatiti eteta tēi. ²⁸ Jáeramo amondo pecoti chequiréi ete reve, piyerovia vaerá, pheeche ye yave, jare agüiye vaerá che chepiatiti ete. ²⁹ Pempiresive cavi yandeYa re piyerovia reve. Jare jecuaeño pemae cavi jae rami vae reta re. ³⁰ Echa'á Cristo iparavíqui jeco pegua umano seri. Upiu'á umano vaerá, ipuere vaerá uyandareco cheré pepepica pe. Echa'á pe reta pepuere'á piyandareco cheré.

3

Añemiatangátu, aipisi vaerá Tumpa umeeta cheve vae

¹ Cuaño ma tamimbeu peve, cheriví reta: Piyerovia yandeYa re. Checueri'á etei aicuatía cua peve. Echa'á icavi peve jecuaeño cua aicuatía vaerá, agüiye vaerá petavi. ² Piñemoa ñee icavi vae re oyovaicho vae reta güi. Echa'á jae reta oporomboe moromboe añete mbae vae re. Jae reta uñemicircuncidaca jete peño. ³ Echa'á yande co jae uñemicircuncidaca ipia pe vae reta. Echa'á yande yambiadora Tumpa iEspíritu rupi. Yayerovia catu Cristo Jesús re. Yayeco'á etei yandiyye. ⁴ Êrei che vi ime tēi anoi ayeco vaerá chiyee. Ime yave quía ye ipia pe uyeminguela ime güinói uyeco vaerá iyee vae, che vi ime tēi anoi jeta ete chugüi. ⁵ Echa'á añemicircuncidaca ocho ara ma anoi yave aa güive. Che co jae penti Israel pegua. Che co jae Benjamín iñemoña pegua. Che co jae penti hebreo añetete vae. Che co jae penti fariseo. Echa'á jecuaeño aicose mboroyocui jae vae re. ⁶ Añemiatangátu se ayeyocui vaerá Tumpa pe. Jáeramo ayapose icavi mbae vae Cristo re güirovia vae reta pe. Mbaeti quía ipuere chembijeco mbae re. Echa'á cherecove jecuaeño jupi mboroyocui rupi. ⁷ Tenonde yave ayembicate cua mbaembae

re. Êrei añave ayembicate'ã etei jese Cristo re arovia güive. ⁸ Jae ramiño vi ayembicate'ã etei ipotave mbae re, aicuaa vaerã cheYa Cristo Jesús. Echa'ã cua icavi ete cheve opaete güii. Cristo Jesús re arovia güive ayembicate'ã etei ma mbae re. Echa'ã opaete jocua mbaembae iti rami co cheve, Cristo anoi vaerã, ⁹ jare uyecuaa vaerã quirãi che co jae Cristo imbae. Aipota'ã ma ayembujupi mboroyocui jei vae re ayapo vae rupi. Ayembujupi ma mburugüirovia Cristo re anoi vae rupi. Echa'ã Tumpa chembujupi ma, Cristo re arovia ramo. ¹⁰ Aipota co aicuaa cavi Cristo. Aipota anoi jocua mbaepuere Cristo icove ye yave ou umanocue vae reta ipite güii uyeporu vae. Aiporara yave, aipota aicuaa aiporara co Cristo jeco pegua, chequirãi vaerã amano Cristo umano vae rami. ¹¹ Jucuarãi yave, aãrota aicove ye vaerã ayu umanocue vae reta ipite güii.

¹² Ndeïño aicuaa cavi Cristo. Ndeïño co che jupi. Êrei jecuaeño añemiatangãtu, aipisi vaerã Tumpa umeeta cheve vae. Echa'ã cua jeco pegua Cristo Jesús cherepi. ¹³ Cherivi reta, chepia pe ayemingueta'ã chiyee aepiti ma co. Êrei cuao ayapo - cheacañi uasacue güii, aepiti vaerã chequirãi reve uyemiaanga oí cheve vae. ¹⁴ Jáeramo añemiatangãtu, aepiti vaerã Tumpa umeeta cheve vae. Umeeta cheve Cristo Jesús uyapo yandeve vae jeco pegua, ara pe chereraa yave.

¹⁵ Jáeramo opaete ñañemimirãta Tumpa coti vae cuarãi yandepia pe yayemingueta. Jare pepia pe piyemingueta'ã yave cuarãi, Tumpa uicuaacata peve. ¹⁶ Êrei jecuaeño yaico yaicuaa ma vae re. Yandepia pe yayemingueta penti ramiño.

¹⁷ Cherivi reta, piyapo che ayapo rami. Jare jecuaeño pemaet jocua yugüireco cavi vae reta re. Echa'ã jucuarãi picuua ore nduico. ¹⁸ Echa'ã íme jeta yugüireco oyovaicho reve Cristo icurusu regua ndive vae. Jeta vese ma amimbeu peve cua reta regua, jare añave amimbeu ye peve ayao reve. ¹⁹ Cua reta yugüiraata cañitei pe. Mbaembae cua ívi pegua reño ipia pe uyemingueta reta. Icavi chupe reta jocua imarata tẽi jese vae. Mbaembae cua ívi pegua reño ipia pe uyemingueta reta. ²⁰ Êrei yandeivirã ara pe co oí. Echa'ã ñaño ñaño joco güii ou vaerã yanembiasa vae - jae co yandeya Jesucristo. ²¹ Jae umbiambieta yanderete cua ívi pe ñanoi vae yanderete ipiau vae ndive. Echa'ã yanderete ipiau vae icavi eteta co jae jete rami. Cuarãi yandeYa uyapota imbaepuere rupi. Echa'ã jocua imbaepuere rupi ipuere opaete mbaembae re.

4

Jecuaeño piyervia catu yandeYa re

¹ Jáeramo, cherivi reta, jecuaeño piñemimirãta yandeYa imbaepuere rupi. Che puau, jare aipota puecha. Ayeroviaño mai peré. Chemiari cavi peré íru vae reta pe.

² Amiñera Evodia jare Síntique yugüireco cavi vaerã uyupii. Echa'ã mocui reve güirovia yandeYa re. ³ Jare che numiñera vi - echal'ã nde co jae cheparavíqui íru ete - nembori vaerã cua cuña reta. Echa'ã jae reta uparavíqui tanta che ndive, numimbeu vaerã ñee icavi vae. Uparavíqui reta Clemente ndive jare íru che ndive uparavíqui vae reta ndive vi. Cua reta jee Tumpa uicuatía ma ilibro pe. Echa'ã Tumpa umee ma tecove opa mbae vae chupe reta.

⁴ Jecuaeño piyervia catu yandeYa re. Tae ye cua: Piyervia catu. ⁵ Opaete vae tuicuaa quirãi pe reta pepiacavi co. YandeYa ou ye seri ma co.

⁶ Aguiye etei piyemipa'ã mbae re. Êrei jecuaeño piyerure Tumpa pe opaete mbaembae re yasurupai Tumpa pe pemee reve, jare cuarãi pemimbeu Tumpa pe mbae pipota vae. ⁷ Jare Tumpa umeeta peve ipiacatu. Yandepia pe yayemingueta rupiño yandepuere'ã etei yaicuaa Tumpa ipiacatu. Cua mbiacatu uyandarecota pepia re jare pepiyemingueta re. Echa'ã ou Cristo Jesús güii.

Pepia pe piyemingueta cua re

⁸ Cuao ma tamimbeu peve, cherivi reta: Pepia pe piyemingueta opaete mbae añete vae re, opaete mbae icavi vae re, opaete mbae jupi vae re, opaete mbae iyoa mbae vae re, opaete mbae ipõra vae re, jare opaete mbae yandepuere ñanemiari cavi jese vae re. Yandepuere yae yave: "Cua icavi co", jare yandepuere yaipiú icavi vae ramo, yandepia pe yayemingueta jese.

⁹ Piyemboe ma che amimbeu peve piyapo vaerã vae re. Piyandu co che jae peve vae, jare pEEcha co che ayapo vae. Jáeramo cuarãi piyapo, jare Tumpa pemborita. Echa'ã jae umee yandeve ipiacatu.

Filipos pegua reta ofrenda ombou Pablo pe vae

¹⁰ Êrei ayerovia ete, jare amee yasurupai yandeYa pe peré. Echa'ã ima ma pembou'ã mbae chembori vaerã. Êrei añave pemandúa ye ma cheré. Añete co, jecuaeño pemandúa cheré, ërei pepuere'ã pembou mbae chembori vaerã. ¹¹ Jae'ã cuarãi, mbae uata cheve ramo. Echa'ã aicuaa ma quirãi aico vaerã chepiacatu reve chepuere rupiño. ¹² Aicuaa quirãi aico vaerã, mboviño mbaembae anoi yave. Aicuaa vi quirãi aico vaerã, jeta mbaembae anoi yave. Opaete pegua aicuaa ma quirãi aico vaerã cheangapií reve jare chiyembai reve. Aicuaa ma quirãi aico vaerã, jeta mbaembae anoi yave, jare jeta mbaembae uata cheve yave. ¹³ Opaete chepuere ayapo Cristo rupi. Echa'ã jae umee cheve imbaepuere.

¹⁴ Êrei piyapo ma icavi vae cheve. Echa'ã chembori ma, aiporara aĩ yave. ¹⁵ Jare pe reta Filipos pegua picuua vi quiräi ñee icavi vae ambipi amimbeu yave, aa Macedonia güi yave, mbaeti ye ūru uyembatimbati vae reta ombou cheve ofrenda chembori vaerä, jaeño pe reta pembou cheve. ¹⁶ Echa'ã Tesalónica pe aico yave, pembou cheve ofrenda chembori vaerä. Jayave taicue rupi pembou ye ofrenda cheve. ¹⁷ Ayerovia pembou cheve vae re. Êrei ayerovia'ã jese chembori ramoño. Ayerovia ete jese mbae icavi vae piyapo ramo. Jare aipota jecuiaeño mbae icavi vae piyapo vaerä, Tumpa umbijecovia vaerä peve. ¹⁸ Êrei che opaete mbaembae anoi. Jeta ete anoi. Mbaeti mbae uata cheve. Echa'ã Epafroditu umee ma cheve pembou cheve vae. Jocua pembou vae penti ofrenda icavi vae uñemee Tumpa pe vae rami co. Jocua nunga umbiyerovia Tumpa. Jae co mbae ipiche cavi vae rami. ¹⁹ Jare cheRu Tumpa umeeta peve opaete mbaembae icavi peve vae jeta ete güüinoi vae güi. Echa'ã Cristo Jesús uyapo vae jeco pegua jeta ete güüinoi yandeve peguarä. ²⁰ YandeRu Tumpa tuyembiadoraca jaeño mai pegua. Amén.

²¹ Tumpa ndiveño toï opaete uñeñono tee Tumpa peguarä vae reta. Echa'ã güürovia Cristo Jesús re. Yanderivi reta che ndive ñugüüinoi vae vi jei peve Tumpa ndiveño pei. ²² Jae ramiño vi opaete uñeñono tee Tumpa peguarä vae reta cua pe ñugüüinoi vae jei peve Tumpa ndiveño pei. Cua reta ipite pe ime amocue César pe uyeyocui vae.

²³ YandeYa Jesucristo tumee opaete peve ipiacavi. Amén.

LA CARTA DEL APOSTOL SAN PABLO A LOS COLOSENSES

¹ Che co jae Pablo. Che co jae Jesucristo jemimondo Tumpa jei vae rupi. Yanderiví Timoteo ime vi cua pe oī che ndive. ² Aicuatía cua tupapire Colosas pe pico vae pe. Pe reta vi co jae cheriví reta. Tumpa peñono tee iyupeguarā, jare piyeyocui cavi Cristo pe. YandeRu Tumpa jare yandeYa Jesucristo tumee peve ipiacavi jare ipiacatu.

Pablo uyerure Tumpa pe upurugüirovia vae reta re

³ Numee yasurupai Tumpa pe peré. Jae co yandeYa Jesucristo Tu. Jare jecuaeño nduyerure peré. ⁴ Cuarái nduyapo, nduicuua güive quirái perovia Cristo Jesús re, jare quirái peau opaete uñeñono tee Tumpa peguarā vae reta. ⁵ Pe reta penoi cua mburuau, peáro peí piyerovia reve Tumpa umeeta peve vae ramo. Echa'á Tumpa uñuvatu ma peve ara pe. Pe reta picuua cua regua, ñee icavi vae piyandu yave. Echa'á ñee icavi vae añete vae co. ⁶ Cua ñee jerácua peve vae jerácua vi opaete íví rupi. Jare opaete que rupi quía quía güirovia, jare uyeyocui Tumpa pe pe reta rami. Echa'á pe reta perovia, jare piyeyocui Tumpa pe, jocua ara Tumpa ipiacavi regua piyandu güive. Echa'á picuua añete co cua ñee. ⁷ Cua re piyemboe Epafras güi. Epafras uyeyocui Cristo pe ore ndive, jare nduau ete. Jae co penti Cristo jembiocui pepuere perovia catu vae. ⁸ Jare jae uicuaaca oreve mburuau Espíritu Santo umee peve vae.

⁹ Jáeramo ore vi cua nduyando güive, jecuaeño nduyerure peré. Nduyerure Tumpa pe, jae uicuaaca cavi vaerá peve jei vae. Tumpa tumeet peve opaete aracuua Espíritu pegua, picuua cavi vaerá jae jei vae. ¹⁰ Tumpa tapembori, pico cavi vaerá. Echa'á pe reta co jae yandeYa imbae. Jare cuarái pico yave, pembiyeroviata co yandeYa. Jecuaeño piyeyocui yandeYa pe icavi vae piyapo vae rupi. Jare jecuaeño piyemboe Tumpa re, picuua cavi ete vaerá. ¹¹ Tumpa tapemimiráta imbaepuere tuicha ete vae pe, pepiaguasu vaerá piyerovia reve. ¹² Pemee yasurupai yandeRu pe. Echa'á jae umee ma peve penoi vaerá pembaaerá opaete irú uñeñono tee Tumpa peguarā vae reta pe uñeemeeta vae. Echa'á cua reta yugüireco tembipe pe. ¹³ YandeRu yanderepi ma mbaepuere pítumimbi re güinoi vae güii, jare yandererova ma Tai iporoyocuia pe. Jae uau Tai. ¹⁴ YandeRu yanderepi Tai imano rupi, jare yanembiasa yanembaeoya reta güi.

Cristo yanembipiácatu ma Tumpa ndive imano rupi

¹⁵ Mbaeti etei quía uecha Tumpa. Êrei Tai uicuaaca yandeve quirái co jae. Tai co jae opaete mbaembiae uyeyapo vae iYa. ¹⁶ Echa'á jae uyapo opaete. Jae uyapo opaete ara pe oī vae jare opaete íví pe oī vae. Jae uyapo opaete yandepuere yaecha vae jare opaete yandepuere mbae yaecha vae. Jae uyapo opaete mburuvicha reta ara pegua jare íví pegua, jare opaete mbaepuere güinoi vae. Jae etei uyapo opaete iyupeguarā. ¹⁷ Jare jae icoño mai ndei mbae uyeyapo mbove, jare mbaetita tēi mbae ipuere ico jae uyandareco'á yave jese. ¹⁸ Jare upurugüirovia vae reta co jae Cristo jete rami, jare Cristo co jae upurugüirovia vae reta iñáca rami. Jae co tenondegue vae. Echa'á jae tenonde voi icove ye ou umanocue vae reta ipite güi, jae ico vaerá opaete vae iYarā. ¹⁹ Echa'á Tumpa uipota vae co jae etei ico vaerá Cristo jete pe. ²⁰ Tumpa uipota vae vi co umbipiácatu vaerá jae ndive Cristo rupi opaete íví pe ñugüinoi vae reta jare opaete ara pe ñugüinoi vae reta. Echa'á umee ma yandeve ipiacatu Cristo imano rupi curusu re.

²¹ Jare tenonde yave pe reta mbiri ete pico Tumpa güii. Echa'á piyovaichose pepia pe Tumpa ndive, jare piyapose icavi mbae vae. Êrei añave Cristo pembipiácatu ma Tumpa ndive. ²² Jucuarái jae uyapo imano rupi cuimbaerá uyeyapo yave. Jare jucuarái uyapo, peñono tee vaerá iyupeguarā, jare agüiye vaerá penoi mbaeyoa, jare agüiye vaerá quía ipuere pembijeco mbae re, jae jovai peí yave, ²³ jecuaeño piñemimiráta yave jare piñemiatangátu yave pepurugüirovia re, jare jecuaeño peáro yave piyerovia reve ñee icavi vae rupi uñemee peve vae. Echa'á pe reta picuua ñee icavi vae opaete íví pegua reta pe jerácua vae. Jare che vi amimbeu ñee icavi vae, jare cuarái ayeyocui Tumpa pe.

Pablo uyeyocui upurugüirovia vae reta pe

²⁴ Añave ayerovia aiporara aí peré vae re. Echa'á aiporara aí cherete pe jocua uataño co Cristo jete uiporara vaerá vae. Echa'á jae jete co jae upurugüirovia vae reta. ²⁵ Echa'á uñemee cheve ayeyocui vaerá upurugüirovia vae reta pe. Tumpa etei cheapo jae jembiocuirá, che ayeyocui vaerá peve, jare amimbeu vaerá peve opaete Tumpa iñee. ²⁶ Cua co jocua tenonde yave uyecuaa mbae vae. Echa'á Tumpa uicuaaca'á etei tenonde yave. Êrei añave Tumpa uicuaaca co oñono tee iyupeguarā vae reta pe. ²⁷ Echa'á Tumpa iquiréi uicuaaca chupe reta quirái cua tenonde yave uyecuaa mbae vae mbaeyecou tuicha vae güinoi judío mbae vae reta cotí. Jae co Cristo ico pepia pe vae. Jáeramo pepuere peáro piyerovia reve Tumpa pembiyeroviata vae re.

²⁸ Ore vi numimbeu Cristo regua. Numbiaracuaa opaete vae, jare nomboe opaete vae orearacuaa catu reve, opaete vae ipirāta vaerā Cristo imbaepuere rupi. ²⁹ Cua jeco pegua che vi aparavíqui aī Tumpa pe. Tanta aparavíqui aī aiporara reve Cristo imbaepuere rupi. Echa'ā jae tanta uparavíqui oī chepia pe.

2

¹ Ërei aipota picuua vaerā quirāi tanta aparavíqui aiporara reve peré, jare Laodicea pegua reta re, jare opaete cherecha mbae vae reta re. ² Aipota ete pepiacatu vaerā, jare piyerau vaerā, penti ramíño pico vaerā. Aipota piñemimirāta vaerā opaete picuua vae rupi, jare picuua vaerā jocua tenonde yave uyecuua mbae vae Cristo regua yandeRu Tumpa uicuaaca yandeve vae. ³ Pipota yave pearacuaa catu, Cristo re uñevāe opaete aracuaa. Jare pipota yave picuua cavi mbae regua, Cristo uicuaaca cavi opaete mbae regua. ⁴ Jare cua che jae peve, agüiye vaerā quía pembítavi ñee icavi echa vae pe. ⁵ Echa'ā yepe tēi che aī'ā pepi, Ërei jecuaeño chepia pe ayemingueta peré. Aicuua quirāi pico cavi co uyupii, jare quirāi piñemimirāta pepurugüirovia Cristo regua re. Jare cua re ayerovia.

⁶ Pembiresive ma yandeYa Jesucristo mburugüirovia rupi. Jae ramíño vi jecuaeño pico perovia reve jese. ⁷ Piñemimirāta Cristo imbaepuere rupi, pecuacuaa cavi vaerā jese. Piñemiatangātu pepurugüirovia re. Echa'ā jucuarāi co piyemboe. Jecuaeño pemee yasurupai Tumpa pe pepurugüirovia re.

Cristo umee ma yandeve tecove ipiau vae

⁸ Piñemoa, agüiye vaerā quía pembítavi aracuaa tavi pegua pe. Echa'ā cua nunga aracuaa moromboe ivi pegua retaño co. Oporomboe'ā Cristo re, jaeño mbaembæe ivi pegua re.

⁹ Echa'ā Cristo co jae Tumpa etei cuimbaerā uyeyapo vae. ¹⁰ Jáeramo opaete mbaembæe penoi, Cristo penoi ramo. Echa'ā jae co opaete mburuvicha reta ara pegua jare ivi pegua iYa. ¹¹ Jare piñemicircuncidaca ma vi pepia pe, Cristo re perovia ramo. Echa'ā Cristo uyapo peve pepia pe vae penti cuimbae uñemicircuncidaca vae jete pe uyeyapo vae rami co. Echa'ā Cristo perepi opaete mbaeyoa imbaepuere güi. ¹² Piyembibautizaca yave, piñeñoti co Cristo ndive, jare Tumpa umee peve tecove opa mbae vae Cristo ndive. Cua uyeyapo Tumpa imbaepuere rupi, pepurugüirovia ramo. Echa'ā Tumpa umbijecove ye Cristo güeru umanocue vae reta ipite güi. ¹³ Tenonde yave pe reta penoi'ā tecove opa mbae vae pumbaeyoa reta jeco pegua, jare piñemicircuncidaca'ā pumbaeyoa reta güi ramo. Ërei Tumpa umee ma peve tecove opa mbae vae Cristo ndive jare pembiásma ma opaete pumbaeyoa reta güi. ¹⁴ Tumpa umbai ma mboroyocui uyecuatía oī vae. Echa'ā jocua uyecuatía oī vae oyovaichose ore ndive, jare jecuaeño orembijecose. Ërei Tumpa güüraa co oregüi, Cristo uyecutuca curusu re yave. ¹⁵ Jáeramo Tumpa yanderepi ma opaete mbaepuere yanderé güüinoise vae reta güi, jare umímaraca reta opaete vae jovaque. Echa'ā Tumpa umamíri reta, Cristo umano yave curusu re.

¹⁶ Jáeramo agüiye quía tapembijeco mbae peu vae re, jare fiesta reta iara reta re, jare yasipiau re, jare mbutuu ara reta re. ¹⁷ Echa'ā opaete cua reta jaanga retaño co. Tenonde yave Tumpa umijaanga reta uyeyapota vae re. Echa'ā cua reta uyemijaangaño Cristo re. ¹⁸ Agüiye quía tapeopia Tumpa umeeta peve vae güi. Echa'ā amocue vae uñemimichi-raanga, jare umbiadora ángel reta. Cua nunga ipia pe uyemingueta tēi uicuaa co uecha mbae vae regua, jare uyembicate ipiayemingueta rupiño uicuaa vae re, yepe tēi mbae uicuaa cavi'ā. ¹⁹ Cua nunga uyecol'ā Cristo re. Echa'ā Cristo co jae upurugüirovia vae reta iñäca. Echa'ā opaete yandeyuapiapia jare yanderayi uyapo yanderete penti ramíño. Ërei yanderete uyeco ñaneäca re, ucuacuaa cavi vaerā. Jucuarāiño vi Cristo jete ucuacuaa Tumpa jei vae re.

²⁰ Pe reta pemano co Cristo ndive moromboe ivi pegua reta güi. Jáeramo ¿maera pa jecuaeño pico ivi pegua reta yugüireco ramí? jare ¿maera pa piyapo iporoyocui reta? ²¹ Echa'ā jae reta peocui cuarāi: "Agüiye pipisi. Agüiye peu. Agüiye piyavíqui." Jucuarāi jei reta. ²² Ërei opaete jocua mbaembæe uyembaita co, uyeporu yave. Jare opaete cua mboroyocui reta moromboe ivi pegua retaño co. ²³ Añete co, cua nunga mboroyocui aracuaa pegua echa co. Echa'ā cua nunga mboroyocui iyapoa reta umbiadora-raanga Tumpa pe ipia pe uyemingueta vae reño, jare uñemimichi-raanga, jare uiporaraca jete pe. Ërei cua mbaembæe rupi ipuere'ā etei oyopia jete uipota vae reta.

3

¹ Tumpa umee ma peve tecove opa mbae vae Cristo ndive. Jáeramo jecuaeño pepia pe piyemingueta mbaembæe ara pe ñugüinoi vae re. Echa'ā joco pe Cristo uguapi oī Tumpa iyipi pe iyacata cotí.

² Jecuaeño pepia pe piyemingueta mbaembæe ara pe ñugüinoi vae reño. Agüiye jecuaeño pepia pe piyemingueta mbaembæe ivi pe ñugüinoi vae reño. ³ Echa'ā pemano ma ivi pegua güi, jare perecove añetete vae ime ma oī Cristo ndive Tumpa oī vae pe. Mbaeti quía ipuere uecha. ⁴ Cristo co jae perecove añetete vae. Cristo uyecuaa ye yave, pe reta vi piyecuata jare piyeroviata jae ndive.

Teco mai indechi vae jare teco mai ipiau vae

⁵ Jáeramo agüiye pemaeno icove vaerā jocua teco mai ivi pegua icavi mbae vae perete pe oī vae. Agüiye piyapo aguasa. Agüiye pepia pe piyemingueta icavi mbae vae re. Agüiye peporopotaño. Agüiye pipota icavi mbae vae. Agüiye pipota ūru vae reta imbaembae - echa'ā pipota yave, pipota ete ūru vae reta imbaembae Tumpa güi. ⁶Cua icavi mbae vae jeco pegua Tumpa uiporaracata co jae jei vae uyapo'ā vae reta pe. ⁷Tenonde yave pe reta vi piyapose cua icavi mbae vae reta. Echa'ā picose jucuarāi piyapo vaerā. ⁸Ērei añave pemombo piyugüi opaete cua ūru icavi mbae vae reta. Agüiye pepochi. Agüiye pearasi. Agüiye piyapo icavi mbae vae piyupe. Agüiye pere icavi mbae vae piyupe. Agüiye pemoē ñee pichii vae. ⁹Agüiye peapu piyupe. Echa'ā pemombo ma piyugüi pereco mai indechicue pichii vae jare icavi mbae vae reta piyapose vae. ¹⁰Jare pipisi ma teco mai ipiau vae. Echa'ā cua teco mai ipiau vae umbipiñauta pepia pe piyemingueta vae, picuua cavi vaerā Tumpa regua, jare pico vaerā jae jei vae re. Echa'ā Tumpa umee peve cua teco mai ipiau vae. ¹¹Jare cua teco mai ipiau vae güinoi vae reta ipite pe mbaeti ma uyuavi uyugüi judío mbae vae jare judío, uñemicircuncidaca vae jare uñemicircuncidaca mbae vae, ñanaigua reta, uyeyocui vae jare uyeyocui mbae vae. Echa'ā jaeño Cristo ico opaete vae ipia pe.

¹² Tumpa perau, jare preparavo peñono tee vaerā iyupegarā. Jáeramo pico cavi. Piyeparareco. Pepiacavi piyupe. Piñemimichi piyupe. Pepiaguas piyupe. ¹³Pemiaguanta piyupe, jare piyembiasa, ime yave quíá ūru vae mbae re umbijeco vae. Echa'ā yandeYa pembiasa ma. Jae ramíño vi pe reta piyembiasa. ¹⁴Jare piyerau. Echa'ā mburuau icavi ete opaete ūru güi. Echa'ā piyerau yave, pico cavi eteta uyupii penti ramíño. ¹⁵Jare Tumpa ipiacatu pepia pe oī vae tuicuaaca peve mbae icavi piyapo vaerā vae. Echa'ā cuarā Tumpa preparavo, pico vaerā penti ramíño. Jare jecuaeño pemee yasurupai Tumpa pe.

¹⁶ Nee Cristo regua jecuaeño tuico pepia pe. Piyemboe jare piyembiaracuaa pearacuaa catu reve. Pierovia reve pecanta yandeYa pe canta reta yambiadora pipe vae. ¹⁷Jare mbae re piyemingueta yave jare mbae piyapo yave, piyemingueta jese jare piyapo opaete yandeYa Jesús jee re. Jare jecuaeño pemee yasurupai yandeRu Tumpa pe yandeYa Jesús rupi.

Yayeyocui yandiyupe

¹⁸Cuña reta tuyeyocui ime pe. Echa'ā icavi co jucuarāi uyapo vaerā. Echa'ā güirovia ma yandeYa re. ¹⁹Cuimbae reta tuau jembireco, jare agüiye tipochiiño chupe.

²⁰Cunumi reta jare cuñatai reta tuyapo opaete tu jare ichi jei vae. Echa'ā cua icavi co yandeYa pe.

²¹Tu reta agüiye tumbiarasiño isambiae reta, agüiye vaerā isambiae reta umbiaqui.

²²Uyeyocui vae reta tuyapo opaete ipatrón jei vae. Agüiye tuyeyocui cavi ipatrón pe jae umae oī jese yaveño, umbiyerovia vaerāño. Ipiáquiréi reve tuyeyocui chupe uiipiú reve yandeYa güi. ²³Jare opaete uyapo vae, tuyapo ipiáquiréi reve. Tuyeyocui ipatrón pe, yandeYa pe uyeyocui rami. Echa'ā cuimbae peño'ā uyeyocui oī. ²⁴Jare tuicuaa yandeYa umbijecoviata co chupe jocua umeeta chupe vae pe. Echa'ā uyeyocui co oī yandeYa Cristo pe. ²⁵Ērei icavi mbae vae uyapo vae pe Tumpa umbijecoviata vi icavi mbae vae uyapo vae re. Echa'ā Tumpa uau'ā penti vaeño ūru vae güi.

4

¹Patrón reta tuyapo jupi vae jembiocui reta pe, jare agüiye tumbitavi. Echa'ā tuicuaa jae reta vi güinoi co iYa ara pe.

²Jecuaeño piyerure Tumpa pe. Piñemiatangātu, jecuaeño piyerure vaerā pemee reve yasurupai Tumpa pe. ³Jae ramíño vi piyerure oreré, Tumpa uicuaaca vaerā oreve quirāi numimbeu vaerā ñiñe. Echa'ā chequiréi chemiari tenonde yave Cristo regua uyecuaa mbae vae re. Echa'ā jáeramo che aī cua peresoriru pe. ⁴Piyerure cheré, aicuaaca cavi vaerā ūru vae reta pe. Echa'ā icavi co cuarāi ayapo vaerā.

⁵Pico pearacuaa catu reve upurugiørovia mbae vae reta ndive. Jecuaeño piyapo icavi vae. ⁶Jecuaeño piyemingueta ñee icavi vae pe mbae icavi vae re. Jare piyemboe quirāi piyemingueta vaerā ipotave vae pe.

Saludo reta

⁷Tíquico co jae cheriví aau vae. Jae co penti yandeYa jembiocui che ndive uyeyocui cavi yandeYa pe vae. Jae umimbeuta peve opaete cheregua. ⁸Echa'ā cuarā amondo pepi, jae uicuaaca vaerā peregua, jare jae pembipiacatu vaerā. ⁹Amondo vi jae ndive Onésimo. Jae vi co cheriví aau vae yandeYa pe uyeyocui cavi vae. Jae co penti perentaigua. Jae umimbeuta peve opaete mbae cua pe uyeyapo vae. ¹⁰Aristarco jae peve Tumpa ndiveño pe. Jae ime che ndive oī peresoriru pe. Marcos vi jae peve Tumpa ndiveño pe. Jae co Bernabé jii. Echa'ā che moyocui ma pembiresive cavi vaerā, jae oo pepi yave. ¹¹Jesús vi jae peve Tumpa ndiveño pe. Jae co Justo pe uyembijee vae. Echa'ā opaete judío reta upurugiørovia vae güi cua retaño chembori amimbeu vaerā Tumpa iporoyocuia regua. Jae reta chembipiacatu ete. ¹²Epafras vi jae peve Tumpa ndiveño pe. Jae vi uyeyocui Cristo pe. Jare jae vi co penti perentaigua. Jae jecuaeño yuerure ete Tumpa pe peré, piñemimirata vaerā, jare picuua cavi vaerā opaete Tumpa jae vae. ¹³Echa'ā

che etei chepuere amimbeu peve quirāi Epafras uparavíqui tanta peré, jare Laodicea jare Hierápolis pe ñugüínoi vae reta re.¹⁴ Lucas jare Demas vi jei peve Tumpa ndiveño peñ. Lucas co jae upurupiáno vae aau vae.

¹⁵ Tumpa ndiveño toñ upurugüírovia vae reta Laodicea pegua, jare Ninfas jare opaete upurugüírovia vae reta Ninfas jenta pe uyembati vae.¹⁶ Pe reta pemingueta ma yave cua tupapire, pemondo Laodicea pe upurugüírovia vae reta joco pe uyembati vae vi umingueta vaerã. Jare jocua tupapire Laodicea pe amondo vae pe reta pemingueta vi.¹⁷ Pere Arquipo pe tuñemiatangátu, uyapo vaerã mbaravíqui yandeYa umee chupe vae, uyeyocui vaerã yandeYa pe.

¹⁸ Che etei jae peve Tumpa ndiveño peñ. Cua aicuatía chepo pe etei. Pemandúa peresoriru pe aí vae re. Tumpa tumee peve ipiacavi. Amén.

PRIMERA CARTA DEL APOSTOL SAN PABLO A LOS TESALONICENSES

¹ Che co jae Pablo. Che ndive ime ñugüiñoi Silvano jare Timoteo. Aicuatía cua tupapire opaete pepurugiürovia vae reta Tesalónica pe piyembati vae pe. Pe reta co jae yandeRu Tumpa jare yandeYa Jesucristo imbae. YandeRu Tumpa jare yandeYa Jesucristo tumee peve ipiacavi jare ipiacatu.

Jeta vae uicuaa Tesalónica pegua reta ipurugiürovia regua

² Jecuaeño numee yasurupai Tumpa pe peré, jare oreacañi'ã pegüi. Jecuaeño nduyerure Tumpa pe peré. ³ Jare nduyerure yandeRu Tumpa pe yave, jecuaeño oremandúa quiräi pico Tumpa coti vae re. Echa'ã peparavíqui Tumpa pe, perovia Jesucristo re jare peau ramo, jare jecuaeño pepiaguasu, peáro piyerovia reve yandeYa Jesucristo ou ye vaerä ramo. ⁴ Pe reta co jae oreriví reta. Tumpa perau jare peparavo. Cua nduicuaa cavi co. ⁵ Echa'ã numimbeu yave peve ñee icavi vae, Espíritu Santo umee oreve mbaepuere numimbeu cavi vaerä peve. Neeiñó'ã co. Echa'ã nduicuaa cavi añetete co ñee icavi vae. Jare pe reta picuaa cavi co quiräi ore nduico cavi pepite pe, puau ramo.

⁶ Jare pe reta pembipi pico, ore nduico ramí, jare yandeYa ico ramí. Perovia co numimbeu peve vae. Jáeramo piporara ete. Ërei Espíritu Santo pembiyerovia. ⁷ Cua jeco pegua opaete upurugiürovia vae reta Macedonia pegua jare Acaya pegua uicuaa quiräi icavi co yugüifreco vaerä. ⁸ Echa'ã pe reta pemimbeu ñee icavi vae yandeYa regua íru vae reta pe. Macedonia jare Acaya pegua reta uicuaa perovia co Tumpa re. Jare opaete que rupi rupi uicuaa vi. Jáeramo uata'ã ma mbae ore numimbeu vaerä chupe reta. ⁹ Echa'ã jae reta etei umimbeu íru vae reta pe quiräi ore ndoo perenta pe, jare mbae uyeyapo joco pe. Umimbeu reta vi quiräi pembiadora'ã ma tumpa-raanga reta - echa'ã piyerova ma jocua reta güi Tumpa coti - jare quiräi piyeyocui ma Tumpa añetete vae pe - jae co jecuaeño ico vae. ¹⁰ Umimbeu reta vi quiräi peáro peñ Tumpa Tai ou ye vaerä ara güi - jae co Jesús. Echa'ã Tumpa umbijecove ye güieru umanocue vae reta ipite güi. Tumpa uiporaracata co upurugiürovia mbae vae reta pe, ërei Jesús yanderepi ma íru vae reta uiporarata vae güi.

2

Quiräi Pablo uyeyocui Tumpa pe Tesalónica pe

¹ Ndoo yave perenta pe, ndooño'ã co. Cua picuaa pe reta etei, cheriví reta. ² Yepe tẽi nduiporara Filipos pe, íru vae reta uyapo icavi mbae vae oreve yave - cua vi picuaa - ërei numimbeu peve ñee icavi vae Tumpa ombou vae. Nduquiyé'ã, yepe tẽi yavai ete oreve. Echa'ã Tumpa orembori. ³ Jocua numimbeu peve vae añete co. Ndueca'ã co pembiepi vaerä oreve cua numimbeu peve vae. Nduipota'ã etei vi pumbitaví. ⁴ Tumpa etei uicuaa quiräi nduyeyocui chupe, jare uicuaaca ma icavi numimbeu vaerä ñee icavi vae. Jáeramo numimbeu íru vae reta pe, Tumpa numbiyerovia vaerä. Numimbeu'ã, ivi pegua retaño numbiyerovia vaerä. Echa'ã Tumpa uicuaa cavi orepiá pe oí vae. ⁵ Ndoe'ã etei mbae peve, piyembutuicha vaerä. Cua picuaa co pe reta. Nduipota viari'ã mbae péguí oreyupeguára. Cua uicuaa vi co Tumpa. ⁶ Ndueca'ã vi pe reta jare íru vae reta orembutuicha vaerä. Ërei icavita tẽi ndueca pe reta orembutuicha vaerä. Echa'ã ore co jae Cristo jemimondo reta. ⁷ Ërei ore nduyandareco peré puau reve, penti ichi imembí umicambu vae uyandareco uau reve vae ramí. ⁸ Ore puau. Jáeramo numimbeu ma peve ñee icavi vae Tumpa ombou vae. Ore puau ete co. Jáeramo orerecove yepe numeeta tẽi peré. ⁹ Pemandúa quiräi tanta nduparavíqui orecandi reve, cheriví reta. Nduparavíqui ara rupi jare pítu rupi, agüiye vaerä pumambeco mbae pemee vaerä oreve vae re. Jucuarái nduyapo, jare numimbeu vi peve ñee icavi vae Tumpa ombou vae.

¹⁰ Pe reta co jae upurugiürovia vae reta. Pe reta picuaa, jare Tumpa vi uicuaa quiräi nduico pepite pe. Jecuaeño nduyapo icavi vae. Mbaeti quíá ipuere orembijeco mbae re. Jecuaeño nduyapo jupi vae. ¹¹ Oremiari peve - penti penti pe - penti tu imiari tai reta pe ramí. Ore pumbiaracuaa, jare pumbipiacatu. Opatecuaa cua picuaa cavi. ¹² Ore moyocui piyapo vaerä icavi vae. Echa'ã pe reta co jae Tumpa imbae. Jare Tumpa peparavo ma, pe reta vi pico vaerä iporoyocua pe.

¹³ Jáeramo jecuaeño numee yasurupai Tumpa pe. Echa'ã numimbeu peve yave Tumpa iñee, perovia jae co Tumpa iñee añetete vae - ore numimbeu peve vaeño'ã co. Jare cua Tumpa iñee jecuaeño uparavíqui pepiá pe, pe reta pepurugiürovia ramo. ¹⁴ Jare uyeyapo ma peve, Judea pe uyebatimbati vae reta pe uyeyapo vae ramí, cheriví reta. Jae reta vi co Tumpa imbae. Echa'ã güürovia Cristo Jesús re. Echa'ã perentaigua reta uyapo icavi mbae vae peve, judío reta uyapo icavi mbae vae jocua upurugiürovia vae reta pe ramí. ¹⁵ Echa'ã judío reta uyucaca Tumpa iñee aracae umimbeu vae reta jare yandeYa Jesús vi, jare oreve vi uyapo icavi mbae vae. Uipota'ã uyapo Tumpa jei vae, jare oyovaicho opatecuaa vae ndive. ¹⁶ Echa'ã jecuaeño orembiavai, agüiye vaerä oremiari judío mbae vae reta pe,

uyembiasaca vaerā. Jucuarāi jecuaeño judío reta uyapo jeta ete icavi mbae vae. Êrei Tumpa uiporaraca eteta co chupe reta.

Pablo uipota oo opou ye Tesalónica pegua reta pe

¹⁷ Michi peguaño co mbiri noī pegüi, cherivi reta. Êrei yepe tēi puecha'ā ma, ërei jecuaeño oremandúa peré. Nduipota ete tēi puecha ye. ¹⁸ Jáeramo nduipota tēi ndoo Tesalónica pe. Jecuaeño che etei aipota tēi aa pepi. Êrei Satanás jecuaeño orembiavai. ¹⁹ YandeYa Jesús ou yeta co ara güi. Jare ore nuāro noī nduyerovia reve. Echa'ā jae ndive ñaī yave, ore nduyeroviata, jare yandeYa jeita icavi co nduyapo, pe reta vi joco pe peñta ramo. ²⁰ Añete co, nduyeroviata pereco pegua, yandeYa jei yave icavi co nduyapo.

3

¹ Jare orequirēi ete tēi ndoo pepi ramo, nduyeminguela ndupita vaerā oreño Atenas pe, ² jare nomondo vaerā pepi Timoteo. Jae co yanderivi. Jae uyeyocui Tumpa pe. Umimbeu ore ndive ñee icavi vae Cristo regua. Jáeramo nomondo Timoteo, jae pemiatangātu vaerā, jare pembipiácatu vaerā pepurugüirovia re. ³ Agüiye pepiatití ete, piporara ramo. Echa'ā pe reta etei picuaajucuarāi yaiporarata co. ⁴ Ore nduico yave pe ndive, numimbeu peve yaiporarata vae. Jare jucuarāi uyeyapo ma. Cua picuaa co. ⁵ Jáeramo chequirēi ete tēi aa pepi ramo, amondo Timoteo, aicuua vaerā pepurugüirovia regua. Echa'ā chepia pe ayemingueta aramoi jocua uipota ívi pegua reta icavi mbae vae uyapo vaerā vae uparavíqui ma pepia pe, uyapoca vaerā peve icavi mbae vae. Echa'ā jucuarāi yave mona, nduparavíquiñota tēi co.

Êrei Timoteo ou uvae yave cua pe Tesalónica güi, umimbeu oreve quirāi pepurugüirovia cavi pei, jare quirāi peau yandeYa. Jei vi oreve quirāi jecuaeño pemandúa oreré orerau reve, jare quirāi pipota orerecha, ore nduipota puecha rami. ⁷ Jáeramo, cherivi reta, yepe tēi ñru vae reta uyapo icavi mbae vae oreve jare nduiporara noī, ërei orepiacatu pepurugüirovia jeco pegua. ⁸ Orepíacatu noī, pe reta jecuaeño piyeyocui yandeYa pe ramo. ⁹ Jáeramo numee yasurupai tuicha Tumpa pe peré. Echa'ā nduyerovia ete pereco pegua yandeRu Tumpa jovolta. ¹⁰ Jare tanta nduyerure Tumpa pe ara rupi jare pítu rupi, ndoo vaerā puecha. Nduipota numimbeu peve mbaembae ndeiño picuaa cavi vae, pepirāta vaerā pepurugüirovia re.

¹¹ YandeRu Tumpa etei jare yandeYa Jesús taoremondo pepi. ¹² Jare yandeYa tuparavíqui pepia pe, piyerau ete vaerā, jare peau vaerā opaete vae. Pepuruau, ore puau rami. ¹³ Jare yandeYa tapemimirāta, piyapo vaerā jupi vae, jare agüiye vaerā yandeRu Tumpa pembijeco mbae re, yandeYa Jesús ou ye yave. Jae ou yeta co opaete uñeñono tee chupegarā vae reta ndive.

4

Quirāi yandepuere yambiyerovia Tumpa

¹ Pe reta picuaa ma quirāi pico vaerā, jare quirāi pembiyerovia vaerā Tumpa. Cua numimbeu ma peve. Jáeramo añave pumbiaracuaa yandeYa Jesús jee re, cherivi reta, jecuaeño pico cuarāi, pembiyerovia ete vaerā Tumpa.

² Echa'ā pe reta picuaa mboroyocui reta numimbeu peve vae. YandeYa Jesús umimbeu oreve numimbeu peve vaerā. ³ Echa'ā Tumpa uipota piñeñono tee vaerā chupegarā. Uipota'ā piyapo vaerā aguasa. ⁴ Jáeramo penti penti penoi pembireco. Piyapo jupi vae pembireco cotí, jare pemae cavi jese piipi reve. ⁵ Agüiye peporopotaiño. Echa'ā jucuarāi uyapo ívi pegua güirovia'ā Tumpa re vae reta. ⁶ Agüiye piyapo cua nunga icavi mbae vae. Echa'ā cua nunga icavi mbae vae piyapo yave, piyapo co icavi mbae vae perívi reta pe. Jare jucuarāi piyapo yave, yandeYa uiporaracata co peve jocua jeco pegua. Cua numimbeu ma peve, agüiye vaerā piyapo. ⁷ Echa'ā Tumpa yandeparavo, ñiañeñono tee vaerā chupegarā - yandeparavo'ā yaporopota vaerā. ⁸ Jáeramo períro yave ore poyocui piyapo vaerā vae, períro co Tumpa iporoyocui - oreporoyocuiño'ā co. Echa'ā Tumpa umee ma yandeve Espíritu Santo, jae ico vaerā yandepia pe.

⁹ Aicuatiatí peve mburuau penoi vaerā ñru upurugüirovia vae reta cotí vae re. Echa'ā picuaa ma co. Tumpa pemboe ma piyerau vaerā. ¹⁰ Añete co, peau opaete upurugüirovia vae Macedonia pegua reta. Êrei pumiñera jecuaeño piyerau ete vaerā, cherivi reta. ¹¹ Cua poyocui: Pico pepiacatu reve. Jare piyapo peparavíqui. Pemimbaravíqui pepo. Jucuarāi ore poyocui ma. ¹² Jucuarāi pico yave, piyepiucata co upurugüirovia mbae vae reta pe, jare ndarau mbae uata peve.

YandeYa ou yeta

¹³ ¿Picuaa'ā pa umanocue vae reta regua, cherivi reta? Nduipota picuaa vaerā, agüiye vaerā pepiatiti, ñru vae reta ipiatití rami. Echa'ā jae reta mbaeti mbae uâro vaerā uyerovia reve. ¹⁴ Yande yarovia Jesús

umano co jare icove ye co ou umanocue vae reta ipite güi. Jae ramiño vi Tumpa ombouta Jesús ndive upurugiürovia vae umanocue vae reta.

¹⁵ Jáeramo numimbeu peve yandeYa umimbeu oreve vae. Jae co cua: YandeYa ou ye yave, yande imeño ñai vae ndarau yaa umanocue vae reta jenonde. ¹⁶ Echa'ã yandeYa etei ugüeyita ara güi ñee mbaepuere pegua reve. Uyenduta vi penti ángel tenondegua vae iñee jare Tumpa itrompeta. Jare Cristo re güiürovia vae umanocue vae reta icove yeta rani yugüieru íru umanocue vae reta ipite güi. ¹⁷ Cua jaicue rupi yande cua ívi pe imeño ñai vae ndeíno ñamano vae yaa pàveta jae reta ndive. YandeYa yandereupita, ñañeoväiti vaerä jae ndive amapitu re. Jare jaeño mai pegua yaicota yandeYa ndive. ¹⁸ Jáeramo piyembiplacatu cuá ñee reta pe.

5

¹ Èrei jocua ara reta re mbaeti ma mbae uata amimbeu vaerä peve, cherivi reta. ² Penti imonda vae ou aramoño pítu yave. Jae ramiño vi yandeYa outa aramoño. Cua picuua cavi ma co. ³ Ivi pegua reta jeita ñugüinói: "Tecorai'ã ma. Mbaeti ma mbae yaquije chugüi vae." Jucuaräi jeita. Jayave outa aramoño chupe reta mbaesusere, cuña imembirasi aramoño ou chupe ramí. Jare ndarau oyepe reta jocua mbaesusere güi. ⁴ Penti imonda vae uique aramoño penti tenta pe pítumimbi yave, tenta iya uicuua mbae reve. Èrei pe reta jocua tenta iya ramí'ã co, cherivi reta. Pico'ã pítumimbi pe. ⁵ Echa'ã opaete pe reta pico guarasi jembipe yave yugüireco vae ramí. Echa'ã guarasi umeet tembipe. Yaico'ã co pítu yave yugüireco vae ramí. Echa'ã pítu yave, pítumimbi co. ⁶ Jáeramo agüiyе pico oque vae reta ramí. Echa'ã íru vae reta yugüireco jucuaräi. Èrei ñañemiatangatú, jare ñañemoa ngatu ñai. ⁷ Echa'ã oque vae reta oque pítu yave, jare usavipo vae reta usavipo pítu yave. ⁸ Èrei yande yaico guarasi jembipe yave yugüireco vae ramí. Jáeramo ñañemoa ñai. Yarovia jare yaau Tumpa. Echa'ã cuaräi yave, jae co penti camisa fierro pegua uñeraro vae omonde vae ramí. Ñaaro vi yayerovia reve yayembiasaca ete vaerä. Echa'ã cuaräi yave, jae co penti áca regua fierro pegua uñeraro vae oñono vae ramí. ⁹ Echa'ã Tumpa yandeparavo'ã uiporaraca vaerä yandeve. Jae yandeparavo co, yayembiasaca vaerä yandeYa Jesucristo uyapo yandeve vae jeco pegua. ¹⁰ Echa'ã yandeYa Jesucristo umano yanderé, yande yaico vaerä jae ndive. Ñamano yave ani ndeí ñamano yave, yaicota jae ndive. ¹¹ Jáeramo piyembiplacatu jare piñemimiräta, jucuaräi piyapo peí ramí.

Pablo umbiaracuaa upurugiürovia vae reta

¹² Cherivi reta, pumiñera pipiú vaerä yandeYa pe uyeyocui vae pepite pe ñugüinói vae reta. Echa'ã jae reta co petenondegua reta yandeYa iparavíquí re. Jae reta pembiaracuaa. ¹³ Pipiú jare peau iparavíquí jeco pegua. Jare pico cavi uyupii pepiácatu reve.

¹⁴ Cherivi reta, pumiñera vi pembiaracuaa vaerä iyaqui vae reta, jare pembipiácatu vaerä ipatiiti vae reta, jare pembori vaerä ipiräta mbae vae reta, jare pepiáguasu vaerä opaete vae pe.

¹⁵ Piñemoa ngatu. Íru vae uyapo yave icavi mbae vae pecoti, agüiyе piyepi icavi mbae vae pe. Jecuaeño pico cavi uyupii, jare pico cavi vi opaete vae ndive.

¹⁶ Jecuaeño piyerovia catu. ¹⁷ Jecuaeño piyerure Tumpa pe. ¹⁸ Jecuaeño pemee yasurupai Tumpa pe ipotave mbae re. Echa'ã cua co jae Tumpa uipota vae. Echa'ã perovia ma Cristo Jesús re.

¹⁹ Agüiyе piyopia Espíritu Santo iparavíquí. Echa'ã jae uparavíquí oí pepia pe. ²⁰ Agüiyе períro Tumpa iñee umimbeu vae reta iñee. ²¹ Pepia pe piyemingueta cavi opaete mbae re. Piñuvatu piyupe icavi vaseño. ²² Agüiyе piyapo ipotave icavi mbae vae.

²³ Tumpa umee ma yandeve ipiácatu. Tumpa etei tapeñono tee iyupegaräño. Tuyandareco cavi peespíritu re, jare perecove re, jare perete re, agüiyе vaerä quípa ipuere pembijeco mbae re yandeYa Jesucristo ou ye yave. ²⁴ Tumpa uyapota co cua. Echa'ã jae preparavo ma, jare jecuaeño uyapo jei uyapota vae.

²⁵ Cherivi reta, piyerure Tumpa pe oreré.

²⁶ Saludo reta piyapo piyupe yave, piñecuáva piyerau reve.

²⁷ Che pumiñera pemingueta vaerä cua tupapire opaete yanderiví reta pe. Jae co yandeYa jei vae. Jae oñono tee reta iyupegarä.

²⁸ YandeYa Jesucristo tumeet peve ipiácatu. Amén.

SEGUNDA CARTA DEL APOSTOL SAN PABLO A LOS TESALONICENSES

¹ Che co jae Pablo. Che ndive ime ñugüinoi Silvano jare Timoteo. Aicuatía cua tupapire opaete pepurugiürovia vae reta Tesalónica pe piyembati vae pe. Pe reta co jae yandeRu Tumpa jare yandeYa Jesucristo imbae. ² YandeRu Tumpa jare yandeYa Jesucristo tumee peve ipiacavi jare ipiacatu.

Tumpa upuruáda jipi vae rupi

³ Jecuaeño numee yasurupai Tumpa pe peré, cherivi reta. Jare icavi co cuarái nduyapo vaerä. Echa'á jecuaeño ucuacuaa pepurugiürovia, jare mburuau penoi uyucotí vae jecuaeño ucuacuaa vi. ⁴ Jáeramo ore nduyemingueta cavi peré íru upurugiürovia vae uyebatimbati vae reta pe oremiari peré yave. Numimbeu chupe reta quirái pepiaguasu jare tanta pepurugiürovia, yepé tēi íru vae reta jecuaeño uyapo icavi mbae vae peve jare uiporaraca peve. ⁵ Cua uicuaaca quirái Tumpa jecuaeño upuruáa jipi vae rupi, jare jucuarái Tumpa jeita jipi co pe reta pico vaerä jae ndive iporoyocua pe. Echa'á jocua jeco pegua añave piporara pico.

⁶ Echa'á jipi co Tumpa uiporaraca vaerä uiporaraca peve vae reta pe. ⁷ Jare pe reta piporara vae peputuuta ore ndive. Echa'á jipi co Tumpa yanembuputuu vaerä, yandeYa Jesús uyecuaa ye yave, ara güii ou yave ángel mbaepuere güinoi vae reta ndive. ⁸ Yugüeruta tata jendi vae ramí. Jayave yandeYa uiporaracata uicuaa'á Tumpa vae reta pe. Echa'á jae reta uipota'á güirovia ñee icavi vae yandeYa Jesucristo regua. ⁹ Jáeramo uiporarata co. Echa'á yandeYa umbisirita reta yugüireco vaerä jaeño mai pegua mbirt chugüi. Ndarau etei uecha reta yandeYa imbaepuere tuicha ete vae rupi uyapota vae. ¹⁰ Echa'á jucuarái uyeyapota, yandeYa ou ye yave. Jare jocua ara reta pe opaete uñenono tee yandeYa peguarä vae reta umbiadorata yandeYa. Opaete güirovia jese vae reta ipiacañita yandeYa re. Jare pe reta vi perovia numimbeu peve vae.

¹¹ Jáeramo jecuaeño nduyerure Tumpa pe peré. Echa'á ore nduyeyocui Tumpa pe jare jae preparavo vi. Nduipota Tumpa jei vaerä jipi co preparavo vaerä. Tumpa tapembori imbaepuere rupi, piyapo vaerä opaete mbae icavi vae pipota piyapo vae, jare preparavíquí vaerä pepurugiürovia reve. ¹² Jucuarái yave, íru vae reta umbiadorata yandeYa Jesucristo jee icavi vae piyapo vae regua. Jare pe reta vi piyepiucata perovia jese ramo. Jare cua uyeyapota yandeRu Tumpa jare yandeYa Jesucristo ipiacavi jeco pegua.

2

Cuimbae mbaeyoaño iparavíquí vae uyecuaata

¹ YandeYa Jesucristo ou yeta co jare jae yanembatita ñañeováiti vaerä jae ndive. Jáeramo ore pumínera cua, cherivi reta: ² Agüiye piyembopa jare agüiye piyemipia'á. Aramoí íru vae reta jei ma peve uyaro ma oí yandeYa iväe ara. Aramoí jei peve Espíritu Santo umimbeu chupe reta, ani jei jerácau chupe reta, ani jei ore nduicuatía jucuarái penti tupapire pe. ³ Ërei agüiye pemaeño quía re pembitavi vaerä. Echa'á jocua ara ndarau ou rai. Echa'á ndei ou mbove, upurugiürovia mbae vae reta oyovaicho eteta Tumpa ndive, jare uyecuaata jocua cuimbae mbaeyoaño iparavíquí vae. Jae co ucañiteita vae. ⁴ Jae uyembutuichata jare oyovaichota opaete moromboe Tumpa regua ndive jare ndarau umaeño iví pegua reta re umbiadora vaerä Tumpa. Jae uguapita Tumpa jo pe jare jeita: "Che Tumpa co."

⁵ ¿Pemandua'á pa quirái che aí pepi rambuve amimbeu peve cua mbaembae re? ⁶ Jare picuua vi quirái añave ime quía oyopia vae. Echa'á jae oyopia oí jocua mbaeyoaño iparavíquí vae, agüiye vaerä uyecuaa ndei iväe ara ou mbove. ⁷ Echa'á jocua icavi mbae ndeíño uyecuaa vae uparavíquí ma oí. Ërei añave oyopia oí vae oyopiata co, Tumpa güírraa cua iví güi regua. ⁸ Jayave uyecuaata jocua icavi mbae vae. Ërei yandeYa uyucata ipítué pe. Umbaita co, ou yave jembipe asi reve. ⁹ Jocua icavi mbae vae outa uyapo vaerä Satanás iparavíquí. Güinoita mbaepuere tuicha vae jare uyapota miacañí reta upurumbítavi vaerä. ¹⁰ Uyapota opaete mbae jipi mbae vae umbítavi vaerä ucañiteita vae reta. Echa'á jae reta uipota'á güirovia añete vae. Echa'á güirovia yave, uyembiasacata tēi co. ¹¹ Jáeramo Tumpa umaeñota jese reta uyembitavi vaerä añete mbae vae rupi, güirovia reta vaerä jocua apu. ¹² Jáeramo ucañiteita reta. Echa'á güirovia'á añete vae. Jaeño uyerovia jipi mbae vae re.

Tumpa yandeparavo yanembiasa vaerä

¹³ Ërei icavi co jecuaeño numee vaerä yasurupai Tumpa pe peré, cherivi reta. Echa'á yandeYa perau jare Tumpa preparavo iyipí güiwe pembiasa vaerä, Espíritu Santo peñono tee Tumpa peguarä ramo jare añete vae perovia ramo. ¹⁴ Cuará Tumpa preparavo ñee icavi vae numimbeu peve vae rupi, pe reta vi piyembutuichaca vaerä yandeYa Jesucristo ndive.

¹⁵ Jáeramo, cherivi reta, pepiráta pepurugiürovia re. Agüiye peacañí ore pomboe jese vae güii. Echa'á ore pomboe oriñee pe jare tupapire nduicuatía peve vae pe. ¹⁶ YandeRu Tumpa yanderau jare umee

yandeve mbiacatu ndarau etei opa vae. Jáeramo yandepuere ñaäro yayerovia reve ipiacavi jeco pegua. YandeYa Jesucristo etei jare yandeRu Tumpa¹⁷ tumee peve ipiacatu jare tapemimiräta ñee icavi vae pere vaerä, jare icavi vae piyapo vaerä.

3

Tumpa iñee tuyepiuca

¹ Cuaño aipota, cherivi reta - piyerure oreré, yandeYa iñee jecuaeño uñemíai vaerä, opaete vae güürovia vaerä pe reta perovia rami. Jucuaräi yave, yandeYa iñee ueyepiucata co.² Piyerure vi yandeYa orerepi vaerä cuimbae icavi mbae vae oyovaicho ore ndive vae reta güi. Echa'ä opaete vae'ä güürovia yandeYa re.³ Ërei jecuaeño yandepuere yarovia catu yandeYa re. Jae pemimiräta pepurugüirovia re, jare umeeta peve mbaepuere agüiye vaerä piñemiamirica icavi mbae vae pe.⁴ Jare ore pugüirovia catu yandeYa re perovia ramo, quiräi piyapo pei jare piyapota ore ndoe peve piyapo vaerä vae.⁵ YandeYa tapembori picuua cavi vaerä quiräi Tumpa perau, jare penoi vaerä mbiaguasu Cristo uipota umee peve vae.

Icavi co uparavíqui vaerä

⁶ Añave ore poyocui, cherivi reta, yandeYa Jesucristo jee re, piyembiyao vaerä ipotave upurugüirovia vae iyaquí vae güi. Echa'ä jocua nunga uipota'ä ico moromboe nduicuaaca peve vae re.⁷ Pe reta etei picuua quiräi icavi co pico vaerä ore nduico rami. Echa'ä ore nduico pepite pe yave, nduico'ä co nduparavíqui mbae reve.⁸ Nducaruiño'ä vi numbiepi mbae reve. Ërei tanta nduparavíqui ara rupi jare pítu rupi, agüiye vaerä quía pepite pe oí vae uyemamboco oreré.⁹ Cuaräi nduyapo yepe tēi mbaepuere nonoi nduyerure vaerä peve mbaembae re. Ërei nduipota nduicuaaca peve quiräi ore nduico, pe reta vi pico vaerä ore nduico rami.¹⁰ Echa'ä nduico pepi yave, poyocui cuaräi: Ime yave quía ñatëi uparavíqui vae, agüiye quía tumingaru.¹¹ Echa'ä jeräcua oreve quiräi ime pepite pe amocue iyaqui vae. Yugüiraiño ūru vae reta iparavíqui re umae uicuua vaerä.¹² Ërei iquï'ä-raanga iyupe uparavíqui vaerä. Ërei uyapo'ä mbae ave.¹³ Ërei ndoyocui jare numbiaracuua jocua nunga yandeYa Jesucristo jee re uparavíqui reta vaerä mbiacatu reve, ime vaerä güinoi mbae jou vaerä.

Saludo reta

¹⁶ Jare yandeYa etei mbiacatu umee vae jecuaeño tumee peve ipiacatu opaete rupi. YandeYa toí opaete pe ndive.

¹⁷ Che etei jae peve Tumpa ndiveño pei. Aicuatía cua chepo pe etei. Jucuaräi ayapo opaete aicuatia vae pe, aechaca vaerä añetete co. Cuaräi aicuatía.¹⁸ YandeYa Jesucristo tumee opaete peve ipiacavi. Amén.

PRIMERA CARTA DEL APOSTOL SAN PABLO A TIMOTEO

¹ Che co jae Pablo. Che co jae Jesucristo jemimondo. Tumpa jare yandeYa Jesucristo iporoyocui rupi che ayeyapo temimondorā. Tumpa yanembiasa ma jare ñaáro yandeYa Jesucristo yayerovia reve.

² Aicuáta cuá tupapire ndeve, Timoteo. Nde co jae cherai añetete vae yandepurugüirovia re. YandeRu Tumpa jare yandeYa Jesucristo tumee ndeve ipiacavi jare ipuruparareco jare ipiacatu.

Umimbeu moromboe añete mbae vae reta regua

³ Epita Efeso pe, Macedonia cotí aa yave che jae ndeve rami, ndiyocui vaerā amocue vae agüiye vaerā oporomboe ambie moromboe re. ⁴ Íru vae reta umimbeu aracae ndaye retaño jare jecuáeñu umierácuá mbae itenondegua reta pe uyeyapo vae reguaño. Che jae ndeve ndiyocui vaerā vi agüiye vaerā uyapisaca jocua nunga re. Echa'á uyapisaca jese yave, umbípita uyeaca jocua mbaembae re, jare jucuarái yave, ndarau uyeyocui cavi Tumpa pe. Echa'á yayeyocui Tumpa pe mburugüirovia re.

⁵ Jare jucuarái iyocui, jae reta güinoi vaerā mburuau. Yandepia uyeyoe yave mbaeyoa güi, jare yaicuáa yave yayapo'á co icavi mbae vae, jare fiaroi yave mburugüirovia añetete vae Tumpa cotí, ñanoita mburuau. ⁶ Èrei amocue vae uyaví cuá mbaembae. Jáeramo uyembopa jare añave uyeacaiño. ⁷ Jae reta uipota tēi oporomboe mboroyocui re. Èrei uicuáa cavi'á mbae jei vae jare mbae imiari jese vae, yepe tēi imiari jese uicuáa cavi vae imiari rami.

⁸ Yaicuáa mboroyocui icavi co, uyeporu yave Tumpa uipota uyeporu vaerā rami. ⁹ Echa'á yaicuáa mboroyocui uyeyapo'á co mbaepuere güinoi vaerā jipi vae reta re. Jaeño uyeyapo mbaepuere güinoi vaerā mboroyocui jei vae uipota'á uyapo vae reta re, jare Tumpa jei vae uipota'á uyapo vae reta re, jare iyoa vae reta re, jare icavi mbae vae uyapo vae reta re, jare icavi mbae vae Tumpa cotí jei vae reta re, jare tu uyuca vae reta re, jare ichi uyuca vae reta re, jare opaete upuruyuca vae reta re, ¹⁰ jare aguasa uyapo vae reta re, jare cuimbæ reta uyupii uyerereco vae re, jare oñomi japicha umee vaerā corepoti re vae reta re, jare iyapu vae reta re, jare íru vae re uñeapo iyapu reve vae reta re, jare ipotave moromboe añete vae ndive oyovaicho vae reta re. ¹¹ Cua moromboe añete vae ñee icavi vae pegua co. Tumpa jecuáeñu uyerovia catu jare uyembiadoraca ñee icavi vae rupi. Jae umimbeu cheve ñee icavi vae, che amimbeu-yuapi ye vaerā.

Quirái Pablo uyeyocui yandeYa pe

¹² Jare amee yasurupai yandeYa Cristo Jesús pe imbaepuere umee cheve vae re. Jae uicuáaca quirái chererovia catu. Echa'á umee cheve ayeyocui vaerā chupe. ¹³ Jucuarái uyapo, yepe tēi tenonde yave che jae icavi mbae vae yandeYa cotí, jare ayapo icavi mbae vae yandeYa re güirovia vae reta pe, jare cherecopochi icoti. Èrei yandeYa cheparareco. Echa'á apurugüirovia'á ramo, opaete cuá ayapo aicuáa'á icavi mbae vae ayapo ramo. ¹⁴ Jare yandeYa umee cheve jeta ete ipiacavi. Jae ramíño vi umee cheve mburugüirovia jare mburuau. Echa'á cua reta yanembae co Cristo Jesús re yarovia yave.

¹⁵ Cua co jae ñee yandepuere yarovia catu vae, jare icavi co opaete vae güirovia vaerā: Cristo Jesús ou cua ívi pe umbiásia vaerā iyoa vae reta, jare che co jae iyoa vae reta güi iyoa ete ye vae. ¹⁶ Èrei cuarái yandeYa cheparareco. Echa'á che co jae iyoa ete vae ramo, Jesucristo cheparareco yave, jae uicuáaca quirái jae ipaguasu tuicha ete co. Jare che co jae penti jaanga rami, íru vae reta vi uicuáa vaerā ipuere güirovia jese, jae reta vi güinoi vaerā tecove opa mbae vae. ¹⁷ Yambiadora jaeño mai pegua yanderuvicha guasu opa mbae vae. Jae ndarau etei umano jare mbaeti quía ipuere uecha. Jaeño co Tumpa. Amén.

¹⁸ Cua mbaravíqui re ndoyocui, cherai Timoteo. Echa'á jucuarái tenonde yave nemimbeu Tumpa ñee umimbeu vae reta. Nemandúa jocua re, ndepuere vaerā niñeráro cavi icavi mbae vae ndive.

¹⁹ Iñemimiráta ndepurugüirovia re, jare agüiye iyapo mbae ndicuáa agüiyeta tēi ndiyapo vae. Echa'á amocue vae uyapo agüiyeta tēi uyapo vae. Jáeramo, uyembopa ipurugüirovia re. ²⁰ Cuarái uasa Himeneo jare Alejandro. Jáeramo amaeño'á jese reta uñemíru vaerā íru upurugüirovia vae reta ndive. Cua jeco pegua ndarau ndipo jei reta icavi mbae vae Tumpa cotí.

Umimbeu quirái uyerure vaerā Tumpa pe

¹ Cua rani jae peve: Upurugüirovia vae reta tuyerure Tumpa pe opaete vae re, jare tumee yasurupai Tumpa pe jese reta. ² Jucuarái tuyerure mburuvinha guasu reta re, jare opaete mbaepuere güinoi vae reta re, yaico cavi vaerā yandepiacatu reve, yandepuere vaerā yayeyocui Tumpa pe yambiadora reve.

³ Echa'á icavi co yayapo vaerā jucuarái, yambiyerovia vaerā Tumpa - jae co yanembiasa vae. ⁴ Jae uipota opaete vae uyembiasaca vaerā jare uicuáa cavi vaerā añete vae. ⁵ Echa'á ime pentiño Tumpa. Jae ramíño

vi ime pentiño ipuere umbipiácatu íví pegua reta Tumpa ndive vae. Jae co penti cuimbae Cristo Jesús jee vae. ⁶ Jae uñemee umano vaerā, ipuere vaerā uepi opaete vae. Jare Tumpa uicuaaca cua, ara ou ma uvāe yave uicuaaca vaerā. ⁷ Jare yandeYa cheparavo amimbeu vaerā cua regua. Jae cheapo jemimondorā, amboe vaerā judío mbae vae reta mburugüirovia añete vae re. Cua che jae peve vae añete vae co. Cheapu'ā etei co.

⁸ Jáeramo aipota cuimbae reta uyerure vaerā Tumpa pe opaete que rupi rupi. Agüiye tuyerure mbochí reve jare mbae umbasí reve. Tuyerure ipia icavi reve. ⁹ Jae ramíño vi cuña reta agüiye tomonde temimonde ipóra ete vae íru vae reta pe uechaca vaerāno. Agüiye tiyemipia'ā ete temimonde re, ani ía re, ani mbaembae oro pegua vae re jare mbaembae ipóra ete vae re. ¹⁰ Êrei tuyapo icavi vae. Echa'ā amocue cuña reta jei uyapo co Tumpa uipota uyapo vaerā vae. Jáeramo icavi co jocua nunga uyapo vaerā icavi vae. ¹¹ Cuña reta tiquíi yemboe pe uñemimichi reve. ¹² Jare ayocui'ā cuña reta oporomboe vaerā jare güinoi vaerā mbaepuere cuimbae reta re. Tiquíiño. ¹³ Echa'ā Tumpa uyapo Adán rani jare jaicue rupi uyapo Eva. ¹⁴ Jare Adán itaví'a. Cuña itaví. Jare itaví ramo, cuña iyoa. ¹⁵ Cuña reta jecuaeño imembita uiporara reve, êrei Tumpa uepita. Êrei jecuaeño tupurugüirovia jare tupuruau. Tuñeñono tee Tumpa peguarā. Jecuaeño tuico cavi.

3

Quirái icavi ico vaerā upurugüirovia vae reta itenondegua

¹ Añete co cua yae vae: Ime yave quía uipota uyeyapo upurugüirovia vae reta itenondegua vae, uiporta uyapo mbaravíquí icavi vae. ² Jáeramo upurugüirovia vae reta itenondegua tuico cavi, agüiye vaerā quía umbijeco mbae re. Tugüireco pentiño cuña. Tuñemoa ngatu. Jecuaeño tuyapo icavi vae, uyepiuca vaerā íru vae reta pe. Tiquírēi umbiresive vaerā mboupa reta jenta pe. Ticatu toporomboe. ³ Agüiye ticause. Agüiye tiñerärōse. Tipiacavi. Agüiye tijovaichopota. Agüiye tuipota ete corepoti iyupeguarā. ⁴ Toyocui cavi opaete jenta pegua reta. Toyocui cavi isambiai reta, jae reta uyapo vaerā tu jei vae jare uipiu vaerā. ⁵ Echa'ā cuimbae icatú'ā yave oyocui cavi vaerā jenta pegua reta, ndarau etei ipuere uyandareco Tumpa uiparavo vae reta re. ⁶ Jare agüiye tuyeyapo upurugüirovia vae reta itenondegua rā penti cuimbae güirovia ramo yandeYa re vae. Echa'ā jucuarāi uyeyapo vaye, aramoi uyembicata, jare íru vae reta umbijecota icate re, Tumpa umbijeco aña guasu jae uyembicate yave ramí. ⁷ Jae ramíño vi upurugüirovia vae reta itenondegua tierácuia cavi, upurugüirovia mbae vae reta imiari cavi vaerā jese. Echa'ā jucuarāi'ā yave, aramoi jae reta umbijecota, jare jucuarāi upurugüirovia vae reta itenondegua aramoi uñemiamíricata aña guasu pe.

Quirái icavi ico vaerā íru upurugüirovia vae reta ombori vae

⁸ Jae ramíño vi íru upurugüirovia vae reta ombori vae reta tuyepiuca íru vae reta pe. Agüiye tipurumbítavise. Agüiye ticause. Agüiye tuipota ete corepoti iyupeguarā. ⁹ Tuicuaa cavi jocua opaete vae pe'ā uyecuaa vae yandepurugüirovia regua, jare agüiye tuyapo mbae uicuaa agüiyeta tēi uyapo vae. ¹⁰ Epirandu rani jese jecocavi ra, jare íru vae reta uicuaa cavi yave ico cavi co, ipuere uyeyocui Tumpa pe jucuarāi. ¹¹ Cua reta Jembireco vi tuyepiuca íru vae reta pe. Agüiye tiyapu íru vae re. Tuñemoa ngatu jare tuico cavi, íru vae reta ipuere vaerā güirovia catu opaete pe. ¹² Íru upurugüirovia vae reta ombori vae reta tugüireco pentiño cuña, jare toyocui cavi isambiai reta jare opaete jenta pegua reta. ¹³ Echa'ā cu reta uyeyocui cavi yave Tumpa pe, uyepiuca íru vae reta pe, jare ipuere imiari uquiyé mbae reve mburugüirovia güinoi Cristo Jesús re vae re.

Uyecuaa yandeve vae

¹⁴ Chepia pe ayeminguela imambaeño aa vaerā ndepi. Êrei cua mbaembae re aicuatía ndeve, ¹⁵ ndicuaa vaerā quiráita ndico Tumpa jentará reta ndive - jae reta co Tumpa imeño mai ico vae uiparavo vae reta - jae reta uñemimiráta añete vae re jare uicuaaca íru vae reta pe añete vae. Echa'ā aramoi apítata ima cua pe. ¹⁶ Añete co, ñanemipíacañi ete cua yandeveño uyecuaa vae. Echa'ā yande yayeyocui Tumpa pe.

Tumpa uyeyapo cuimbaerā.

Espíritu Santo uicuaaca jae co jupi vae.

Ángel reta uecha.

Jerácuia opaete íví pegua reta pe.

Íví pegua reta güirovia jese.

Jare Tu umbiresive ye ara pe.

4

Umimbeu yarovia vae güi uyerovata vae reta

¹ Jare Espíritu Santo umimbeu yandeve quirāi ara reta taicuegua vae pe amocue vae uyerovata yarovia vae güi. Jae reta güüroviata aña upurumbitavi vae reta jare moromboe reta aña reta uipota güürovia vaerā vae. ² Oporomboe reta yave, iyaputa upurumbitavi vaerā. Jare ndarao ipiatiti jese, ipiatanta ramo. ³ Oyopiata īru vae reta agüiye vaerā umenda, jare oyopiata īru vae reta agüiye vaerā jou mbae nunga tembfú, yepe tēi Tumpa uyapo yandeve tembfú yau vaerā yasurupai ñamee reve chupe. Echa'ā yande yarovia Tumpa jare yaicuaa ma añete vae. ⁴ Echa'ā opaete mbaembæ Tumpa uyapo vae icavi co. Agüiye ñaríro mbae nunga tembfú. Icavi co yau vaerā yasurupai ñamee reve Tumpa pe. ⁵ Echa'ā uñeñono tee co yau vaerā Tumpa iñee jare yerure rupi.

Jesucristo pe uyeyocui cavi vae

⁶ Nemimandúa yave yanderivi reta cua mbaembæ re, ndiyeyocui cavi co Jesucristo pe. Jecuae iñemimirātña yarovia vae reta re jare moromboe añete vae regua re. Echa'ā cua reta re jecuaeño ndico. ⁷ Ërei agüiye erovia aracae ndaye vae reta. Ërei iñemiatangatū ndiyapo vaerā Tumpa uipota yayapo vaerā vae. ⁸ Echa'ā yanderete yamungúe yave, michi peguaño icavi yandeve. Ërei ñañemiatangatū yave yayapo vaerā Tumpa uipota yayapo vaerā vae, jecuaeue icavi ete yandeve. Echa'ā icavi yandeve cua ivi pe yaico rambueve, jare icavita vi yandeve Tumpa ndive ma yaico yave. ⁹ Cua co fiée yandepuere yarovia catu vae, jare icavi co opaete vae güürovia vaerā. ¹⁰ Echa'ā cuarā yaparavíqu ñaí yaiporara reve, Tumpa imeño mai ico vae re yarovia ramo. Jae co opaete vae umbiásia vae. Jae umbiásia güürovia jese vae reta.

¹¹ Cua mbaembæ re eporoyocui jare eporomboe. ¹² Agüiye quía tanereríro ndetairusu ramo. Ërei jecuaeño nde rani ico cavi, īru upurugüürovia vae reta uicuua vaerā quirāi icavi co jae reta vi yugüireco vaerā. Jáeramo jecuaeño nemiarí icavi vae re. Jecuaeño iyapo icavi vae. Jecuaeño epuruau. Jecuaeño erovia Tumpa. Agüiye iyapo mbae pichii vae. ¹³ Che aa aváe ndeve regua, jecuaeño iñemiatangatū nemingueta vaerā Tumpa iñee īru vae reta pe, jare ndepurumbiaracuua vaerā, jare ndeporomboe vaerā. ¹⁴ Jecuaeño iñemiatangatū ndiporu vaerā mbaepuere Tumpa umee ndeve vae. Echa'ā uñemee ndeve Tumpa iñee umimbeu vae reta jei ramí, upurugüürovia vae reta itenondegua reta oñono yave ipo nderé.

¹⁵ Jecuaeño iyandareco cavi cua mbaembæ re opaete ndepia reve, uyecuua vaerā opaete vae pe quirāi icavi ete co ndiyemboe neí. ¹⁶ Íñemoa ngatu ndico cavi vaerā jare ndeporomboe cavi vaerā. Jecuaeño iñemiatangatū jese reta. Echa'ā jucuarāi ndiyapo yave, ndiyerepicata jare indeepicata vi uyapisaca nderé vae reta.

5

Quirāi umbiaracuua vaerā īru upurugüürovia vae reta

¹ Agüiye iñeengata cuimbae indechi vae reta pe. Ërei embiaracuua, penti cuimbae umbiaracuua tu ramí. Jare embiaracuua cuimbae taírusu vae reta, penti cuimbae umbiaracuua tiví ramí. ² Embiaracuua cuña ucuacuua vae reta, penti cuimbae umbiaracuua ichí ramí, jare embiaracuua cuñatai reta, penti cuimbae umbiaracuua jindí ramí. Agüiye ndepia pe iyemingueta icavi mbae vae jese reta.

³ Embori ime umano vae reta mbaeti etei güinoi yave quía ombori vaerā. ⁴ Ërei ime umano vae ime yave güinoi imembí reta ani jamariro reta, jae reta rani tombori, uicuacaa vaerā uyeyocui co Tumpa pe. Echa'ā ime umano vae jae reta jentará co. Jucuarāi tuyapo reta ombori vaerā ichí jare iyari. Echa'ā jucuarāi uyapo yave, umbiyerovia Tumpa. ⁵ Ërei penti ime umano vae mbaeti etei güinoi quía ombori vaerā vae co jae penti añetete ime umano vae. Jae güürovia Tumpa, jare jecuaeño uyerure chupe pítu rupi jare ara rupi. ⁶ Ërei ime umano vae ueca yave jete umbiyerovia vaeráno, uyeyocui'ā etei Tumpa pe, penti umanocue vae ipuere'ā etei uyeyocui īru vae pe ramí. ⁷ Jáeramo cua mbaembæ re iyocui upurugüürovia vae reta, agüiye vaerā quía umbijeco reta mbae re. ⁸ Ërei ime yave penti upurugüürovia vae uyandareco'ā jenta pegua reta re jare īru jentará reta re vae, upurugüürovia mbae vae echa. Jeta upurugüürovia mbae vae reta uyapo cavi ete chugüi. Echa'ā jae reta uyandareco jenta pegua reta re jare īru jentará reta re.

⁹ Agüiye emíru ime umano vae īru ime umano vae reta ndive ndei sesenta aña güinoi mbove. Sesenta aña güinoi yave ramo emíru jae reta ndive mbaeti yave imegua, ¹⁰ jare īru vae reta umierácuia yave icavi vae uyapo vae, jare uyandareco cavi yave sambiaí reta re, jare umingaru yave jenta pe opou vae reta, jare uyeyocui yave uñemimichi reve īru uñeñono tee Tumpa peguarā vae reta pe, jare ombori yave uiporara vae reta, jare uñemiatangatū yave uyapo vaerā icavi vae.

¹¹ Ërei agüiye emíru tairusu ime umano vae reta īru ime umano vae reta ndive. Echa'ā cua nunga uipota ye yave cuimbae, uipota'ā ma uyeyocui Cristo pe īru ime umano vae reta uyeyocui chupe ramí. Uipotaño umenda. ¹² Jáeramo güinoi teco. Echa'ā uyapo'ā ma tenonde yave jei uyapo vaerā upurugüürovia vae reta pe vae. ¹³ Jae ramíño vi iyaqui uyeyapo jare opou reño. Jae ramíño vi uyemingueta japicha re jare īru vae iparavíqu re iyurungueta. Imiari mbaembæ agüiyeta tēi imiari

jeso vae re. ¹⁴ Jáeramo aipota tairusu ime umano vae reta umenda ye vaerā. Icavi co imembí vaerā jare uyandareco cavi vaerā jenta pegua reta re. Agüiye tuyapo mbae icavi mbae vae, agüiye vaerā oyovaicho Cristo ndive vae ipuere umbijeco mbae re. ¹⁵ Echa'ā amocue vae uyerova ma uyapo vaerā Satanás uipota uyapo vaerā vae.

¹⁶ Penti cuña upurugüirovia vae jentará ime umano yave, upurugüirovia vae tombori ime umano vae, agüiye vaerā ime umano vae uyeco íru upurugüirovia vae reta re jae reta omborí vaerā, jae reta ipuere vaerā omborí íru ime umano vae reta mbaeti etei jentará güinoi omborí vaerā vae.

¹⁷ Jupi co upurugüirovia vae reta itenondegua Tumpa iparavíqui uyapo cavi vae reta uyepiuca vaerā jare íru reta umbiepi vaerā chupe reta. Jae ramíño vi jupi co upurugüirovia vae reta itenondegua Tumpa iñee umimbeu jare oporomboe vae reta uyepiuca ete vaerā jare íru reta umbiepi vaerā chupe reta. ¹⁸ Echa'ā Tumpa iñee pe uyecuatía oí cuarái: "Güeye trigo umbípiriri oí yave, agüiye iyuruyocua." Jare: "Jupi co umimbaravíqui vae umbiepi vaerā uparavíqui vae pe mbaravíqui uyapo vae." Cuarái uyecuatía oí.

¹⁹ Ime yave quía penti upurugüirovia vae reta itenondegua mbae re umbijeco vae, agüiye iyapisaca jese ipuere'ā yave imiari mocui ani mbapí uicuua cavi jeco regua vae. ²⁰ Iyoa vae reta pe ere iyoa co opaete vae jovaque, íru vae reta uquiyé vaerā mbaeyoa uyapo. ²¹ Che ndoyocui Tumpa jare yandeYa Jesucristo jare ángel reta Tumpa uiparavo vae jovaque: Cua mbaembae jecuaeño iyapo, jare agüiye eau penti vaeño íru vae güi. Oyovaque reve iyapo opaete vae pe. ²² Agüiye ndeapura iyapo vaerā upurugüirovia vae reta itenondeguarā, agüiye vaerā niñemííru íru cuimbæ reta ndive imbaeyoa reta re. Agüiye iyapo mbae pichíi vae.

²³ Iñeñi niderie pe neimbaerasi. Cua jeco pegua vino jeu michi michi nepoarā. Agüiye iñó jeu.

²⁴ Amocue vae imbaeyoa reta tenonde voi uyecuaa cavi jare uicuaaca quirái uñéacata co. Íru vae reta imbaeyoa reta uyecuaata taicue rupi. ²⁵ Jae ramíño vi icavi vae amocue vae uyapo vae tenonde voi uyecuaa cavi, jare icavi vae añave uyecuaa mbae vae vi uyecuaata co.

6

¹ Opaete uyeyocui patrón pe vae reta tuipiú ipatrón, agüiye vaerā íru vae reta jei icavi mbae vae Tumpa cotí jare yandeporomboe cotí. ² Jare ipatrón upurugüirovia yave, chupe uyeyocui vae reta agüiye tugüiríro. Echa'ā aramoi ipia pe uyeminguetata güiríro vaerā, ipatrón vi upurugüirovia ramo. Êrei uyeyocui vae reta tuyeyocui cavi ipatrón pe. Echa'ā ipatrón vi güirírovia yandeYa re, jare yandeYa uau. Jare icavi eteta co ipatrón pe, jembiocui reta uparavíqui cavi yave chupe. Cua mbaembae re eporomboe jare epurumbiaracuaa.

Yayeyocui Tumpa pe yandepiacatu reve

³ Aramoi íru vae oporomboeta ambié moromboe re, jare ndarau güirírovia moromboe añete vae, yepe tēi moromboe añete vae co jae yandeYa Jesucristo regua. Echa'ā jocua moromboe añete vae yanemboe quirái yayeyocui vaerā Tumpa pe. ⁴ Êrei jocua nunga oporomboe vae uyembícate co, jare uicuaa'ā mbae ave. Echa'ā jecuaeño uyeaca. Jare cua icavi'ā co. Jáeramo ñacatää, jare jovaichopota, jare jei icavi mbae vae, jare jei quirái íru vae reta uyapo icavi mbae vae. ⁵ Jocua nunga uyeacaiño mbae icavi mbae vae re. Ipiyeminguela jupi'ā co. Jae reta uicuaa'ā etei añete vae. Ipia pe uyeminguela tēi ipuere uyeyocui Tumpa pe icocatu vaerā. Agüiye iñemííru jocua nunga ndive. ⁶ Êrei yayeyocui yave Tumpa pe, icavi ete co yandeve, yaico yave yandepiacatu reve. ⁷ Echa'ā yaa yandesí güi yave, mbaeti etei mbae yaru. Jae ramíño vi ñamano yave, ndarau etei mbae yaraa. ⁸ Jáeramo ñanoj yave añave yanderemburá jare yanderemimonderá, yaico yandepiacatu reve. ⁹ Êrei yavai'ā uipota icocatu vae reta iyoa vaerā. Yavai'ā aña guasu uyavica chupe reta vaerā. Jáeramo jae reta ipia pe uyeminguela cavi mbae reve uipota etejeta mbaembae icavita'ā etei chupe reta vae. Echa'ā jocua nunga mbaembae pe uñemicañitei reta. ¹⁰ Echa'ā corepoti uipota ete vae uyapo opaete mbaembae icavi mbae vae. Jare amocue vae uipota ete icocatu ramo, uyembopia mburugüirovia yandeYa regua güi, jare umbieta tēi jucuarái uyapo ramo.

Tanta eparavíqui Tumpa pe

¹¹ Êrei nde co jae cuimbæ Tumpa pe uyeyocui vae. Jáeramo agüiye etei iyapo jucuarái. Êrei ipota ete ndiyapo vaerā jupi vae jare ndiyeyocui vaerā Tumpa pe. Jae ramíño vi ipota ete mburugüirovia, jare mburuau, jare mbiaguasu, jare niñemímichi. ¹² Jecuaeño eparavíqui tanta ndiporara reve yarivia vae re. Ico cavi yandeYa ndive, echá'ā jae umee yandeve tecove opa mbae vae. Echa'ā cuarái Tumpa ndeparavo. Jare nemimbeu cavi ma ndepurugüirovia jeta uyapisaca nideré vae reta pe. ¹³ Cua re co che ndoyocui Tumpa jee re. Echa'ā jae umee tecove opaete pe. Ndoyocui vi jese Cristo Jesús jee re. Echa'ā jae umimbeu cavi añete vae regua Poncio Pilato jovaque. ¹⁴ Jecuaeño iyapo cua che ndoyocui jese vae. Jucuarái ndiyapo yave, ndarau mbae icavi mbae vae ndiyapo, jare ndarau quía ipuere nembijeco mbae re, yandeYa Jesucristo ou ye regua. ¹⁵ Echa'ā ara ou uvae yave, Tumpa uechacata co yandeYa Jesucristo.

Tumpa jecuaeño uyerovia catu. Jaeño co opaete vae iYa. Jae co mburuvicha guasu mbaepuere tuicha ete vae güinoi vae. Jae imbaepuere tuicha ete co opaete íru mburuvicha guasu reta imbaepuere güi. Jae co opaete iví pegua reta iya reta iYa.¹⁶ Jaeño co umano mbae vae. Jae ico tembipe oí vae pe. Mbaeti quía ipuere oya jocua tembipe re. Mbaeti etei quía uecha Tumpa, jare mbaeti etei quía ipuere uecha. Tuyembíadoraca Tumpa jaeño mai pegua. Imbaepuere tuicha ete co. Amén.

¹⁷ Iyocui cuá iví pegua mbaembæ re icocatu vae reta agüiye vaerã ticate iyee iparavete vae reta güi, jare agüiye vaerã uyeco icorepoti re. Echa'á aramoi imambæ opata. Êrei tuyeco Tumpa imeño mai ico vae re. Echa'á jae umee yandeve opaete mbaembæ yayerovia vaerã.¹⁸ Jare iyocui vi tuyapo icavi vae. Echa'á jucuarãi yave, icocatuta co Tumpa cotí icavi vae uyapo vae re. Jecuaeño tiquirëi umee vaerã güinoi vae güi íru vae reta pe, ombori reta vaerã.¹⁹ Echa'á jucuarãi uyapo yave, güinoita mbae icavi vae opa mbae vae ara outa vae reta peguarã, jare güinoita tecove opa mbae vae.

Pablo jaeño ma oyocui Timoteo vae

²⁰ Timoteo, jecuaeño iyandareco cavi jocua uñemee ndeve ndiyandareco vaerã jese vae re. Agüiye iyapisaca ndaye reta re. Echa'á jei vae mbae'á co. Agüiye erovia Tumpa ndive oyovaicho vae reta jei tẽi uicuua cavi vae. Echa'á uicuua'á co mbae.²¹ Echa'á amocue jei tẽi uicuua cavi vae uyembopia yarovia vae güi.

Tumpa tumee ndeve ipiacavi. Amén.

SEGUNDA CARTA DEL APOSTOL SAN PABLO A TIMOTEO

¹ Che co jae Pablo. Che co jae Jesucristo jemimondo Tumpa jei vae rupi. Echa'ã cheparavíqu jae co amimbeu vaerã quirãi Tumpa jei umee vaerã tecove opa mbae vae opaete Cristo Jesús re güirovia vae reta pe. ² Aicuatía cua tupapire ndeve, Timoteo. Echa'ã nde co jae cherai aau ete vae. YandeYa Tumpa jare yandeYa Cristo Jesús tumee ndeve ipiacavi jare ipuruparareco jare ipiacatu.

Cristo regua umimbeu íru vae reta pe

³ Jecuaeño chemandúa nderé pítu rupi jare ara rupi ayerure Tumpa pe yave. Jáeramo amee yasurupai Tumpa pe. Ambiadora Tumpa, chetenondegua reta umbiadora rami. Jare jucuarai ayapo yave, ayapo'ã mbae aicuaa agüiyeta tẽi ayapo vae. ⁴ Aipota ete nduecha, ayerovia ete vaerã. Echa'ã chemandúa quirãi oremondo pei yave nderesai nemombo vae re. ⁵ Chemandúa vi ndepurugüirovia aňetete vae re. Ndiyari Loida jare ndesi Eunice rani güinoi jocua mburugüirovia, jare aicuaa cavi nde vi co nenoi.

⁶ Jáeramo turumimandúa cua re. ñiemiatangatú jocua mbaepuere Tumpa umee ndeve vae re ndiyapo vaerã iparavíqu. Echa'ã uñemee co ndeve chépo aňono nderé yave. ⁷ Tumpa umee yandeve Espíritu Santo ñanói vaerã mbaepuere, jare yapuruau vaerã, jare ñañemoa vaerã, agüiyete vaerã yaquiye mbaembæe güi. ⁸ Jáeramo agüiyete nemara nemimbeu vaerã yandeYa regua. Agüiyete vi nemara chereco pegua. Echa'ã che aico cua peresoriru pe yandeYa pe ayeyocui ramo. Ërei iporaraño che aiporara rami ñee icavi vae jeco pegua. Echa'ã Tumpa umee yandeve mbaepuere, yaiporara yave. ⁹ Tumpa yanembiasa jare yandeparavo ñaneñono tee vaerã iyupegarã. Yandeparavo'ã co mbae icavi vae yandeve yayapo vae jeco pegua. Yandeparavo co jae vae rupi jare ipiacavi rupi. Echa'ã ipiacavi yandeve Cristo Jesús rupi ndei ivi uyeyapo mbove. ¹⁰ Cristo Jesús ou cua ivi pe yanembiasa vaerã. Jocua rupi Tumpa aňave uicuaaca yandeve ipiacavi. Echa'ã Cristo Jesús umbai mano imbaepuere, jare uicuaaca quirãi yandepuere ñanói tecove opa mbae vae. Jare cua yamimbeu ñee icavi vae rupi.

¹¹ Tumpa cheparavo amimbeu vaerã ñee icavi vae. Jae umee cheve aico vaerã Jesucristo jemimondorã, jare aporomboe vaerã jese. ¹² Jáeramo aiporara aí. Ërei chemara'ã. Echa'ã aicuaa arovía co Cristo re, jare aicuaa vi jae ipuere uñuvatu cheve che amee chupe uñuvatu vaerã vae jocua ara ou uvãe regua.

¹³ Jecuaeño eporomboe moromboe aňete vae re. Echa'ã jocua re che nomboe. Jare jecuaeño enoi mburugüirovia jare mburuau Cristo Jesús umee yandeve vae. ¹⁴ Tumpa umee ndeve mbaepuere. Jecuaeño iporu jocua mbaepuere ndiyeyocui cavi vaerã chupe Espíritu Santo rupi. Echa'ã Espíritu Santo ico yandepia pe.

¹⁵ Ndicuaa ma co quirãi opaete Asia pegua reta usiri chegüi. Cua reta ipite pegua co jae Figelo jare Hermógenes. ¹⁶ YandeYa tuiparareco Onésiforo jenta pegua reta. Echa'ã Onésiforo jeta vese chembiyerovia, jare imara'ã opou vaerã chepi, yepe tẽi aico peresoriru pe. ¹⁷ Aňete co, Roma pe ou uvãe rupive, chereco opaete que rupi chevãe regua. ¹⁸ YandeYa tumaeño tugüinoi ipuruparareco jocua ara ou uvãe yave. Echa'ã nde etei ndicuaa catu quirãi jeta ete uyeyocui cheve Efeso pe.

2

Jesucristo pegua sundaro icavi vae

¹ Jáeramo, cherai, iñemimiräta mbiacavi Cristo Jesús umee yandeve vae rupi. ² Jeta mbaembæe re aporomboe jeta vae jovaque. Jocua mbaembæe ndiyandu vae re emboe cuimbae nderovia catu vae reta, jae reta vi ipuere vaerã omboe-yuapi ye jese íru vae reta.

³ Iporara che aiporara rami. Echa'ã uiporara co Cristo Jesús isundaro reta. ⁴ Jare penti sundaro oo uñerãrø vaerã vae mbaeti uyemipiã etei mbaembæe cua ivi pegua re, umbiyerovia vaerã uiparavo sundarorã vae. ⁵ Jae ramíño vi uñenocuñocu vae, osi'ã yave oporombosi vae reta jei vae rupi, ipuere'ã etei güinoi upurumbisipe vae pe uñemee vae. ⁶ Jae ramíño vi co pe uparavíqu vae rani uipisita uyeaviro vae. ⁷ Jecuaeño ndepia pe iyemingueta che jae ndeve vae re. Jare yandeYa tumee ndeve aracuaa ndicuaa cavi vaerã opaete.

⁸ Jesucristo co jae David iñemoña pegua. Imandúa quirãi jae etei icove ye ou umanocue vae reta ipite güi. Jae umee cheve cua ñee icavi vae amimbeu vaerã. ⁹ Jare ñee icavi vae amimbeu ramo aiporara aí. Echa'ã cheñono peresoriru pe icavi mbae vae uyapo vae rami. Ërei mbaeti quía ipuere oñono Tumpa iñee peresoriru pe. ¹⁰ Jáeramo opaete aiporara chepiaguasu reve Tumpa uiparavo vae reta jeco pegua, jae reta vi güinoi vaerã yembiasa Cristo Jesús rupi, jare güinoi vaerã vi yembutuicha opa mbae vae.

¹¹ Cua co jae ñee yandepuere yarovía catu vae:

"Jae ndive ñamano yave,
jae ndive yaicove yeta vi.

¹² Yandepiaguasu reve yaiporara yave, jae ndive yaporoyocuita vi.
Yaicuacu yave, jae vi yandecuacuta.

¹³ Yepe tēi yarovia'ā, ērei jae jecuaeño uyapo jei vae.
Echa'ā jae jei yave mbae uyapota, uyapota co."

Uparavíqui cavi Tumpa pe vae

¹⁴ Emimandúa reta cua mbaembae re, jare iyocui reta yandeYa jee re agüiye vaerā uyeaca reta ñee reta re. Echa'ā jucuarā uyaeca yave, ndarau etei icavi chupe reta, jaeño ombopata uyapisaca jese vae reta. ¹⁵ Iñemiatangatū ndeporomboe cavi vaerā ñee añete vae umimbeu yandeve vae, Tumpa uicuua vaerā icavi co ndeparavíqui. Jucuarā uyaeca yave, ndarau nemara ndeparavíqui jeco pegua. ¹⁶ Ērei agüiye iyapisaca ndaye reta re. Echa'ā jei vae mbae'ā co. Jare ndaye reta re imari vae reta uyapota jeta mbaeyoa reta. ¹⁷ Jare jae reta iporomboe uñemaita mbaerasi yanderete pe uñemaita vae rami. Cua reta ipite pegua co jae Himeneo jare Fileto. ¹⁸ Jae reta uyaví añete vae. Echa'ā jei tēi uasa ma co ara upurugüirovia vae reta icove ye vaerā ou manocue vae reta ipite güii. Jare jucuarā jae ramo, amocue vae uicuua'ā mbae güürovia vaerā. ¹⁹ Ērei Tumpa jae vae añete co uyepepica'ā etei. Yaicuua cua Tumpa iñee pe uyequatía oī vae rupi. Echa'ā uyequatía oī cuarā: "YandeYa uicuua imbae reta." Jare: "Penti penti che co jae Cristo imbae jae vae agüiye tuyapo jipi mbae vae." Jucuarā uyequatía oī.

²⁰ Ērei penti tenta tuicha vae pe ime plato reta oro pegua jare corepoti pegua. Jae ramíño vi ime plato reta ivira pegua jare fiaeu pegua. Jare iya uiporu amocue, plato ipóra vae reta uipota yave, jare uiporu íru reta, plato ipóra mbae vae uipota yave. ²¹ Jae ramíño vi yaeya yave icavi mbae vae, yandeYa ñaneñono teeta iyupeguarā, ipuere vaerā yandeporu, tenta tuicha vae iya plato ipóra vae reta uiporu rami. Jare jucuarā uyaeca yipotave mbae icavi vae yayapo vaerā.

²² Agüiye etei iyapo mbaembae icavi mbae vae taírusu vae reta uipota uyapo vae. Ērei ipota ete ndiyapo vaerā jipi vae. Jae ramíño vi ipota ete mburugüirovia, jare mburuau, jare mbiacatu. Jare iñemíri uyerure yandeYa pe ipia iquia mbae reve vae reta ndive. ²³ Ērei agüiye iyeaca iyaracuua mbae vae reta ndive. Echa'ā jae reta uicuua'ā etei uyeaca jese vae. Jare nde ndicuua quirāi uyeaca yave uyupii, umbipi uñeráro uyupii. ²⁴ Jare icavi'ā co yandeYa pe uyeyocui vae uñeráro vaerā. Tipiacavi opaete vae pe. Ticatu oporomboe vaerā. Tipiaguasu. ²⁵ Tomboe uñemimichi reve oyovaicho jae ndive vae reta. Echa'ā aramoi Tumpa umaenota jese reta ueya vaerā ipiayemingueta icavi mbae vae jare uicuua vaerā añete vae, ²⁶ jare uñemoa vaerā, oyope vaerā aña guasu güii. Echa'ā maemimba yaipisi ñuai pe rami, aña guasu uipisi reta, jae reta uyapo vaerā aña guasu jei vae.

3

Ara taicueguia reta pe uyeyapota vae

¹ Icuua catu cua vi: Ara taicueguia reta pe yavai eteta co yaico cavi vaerā. ² Upurugüirovia mbae vae reta jaeño uyerauta. Uipota eteta reta corepoti. Uyembicateta jae reta uyapo vae re. Uyembicateñoita. Jeita icavi mbae vae Tumpa coti. Ndaraus uyapo tu jare ichi jei vae. Ndaraus umee yasurupai mbae re. Ndaraus uyeyocui Tumpa pe. ³ Ndaraus upuruparareco. Ndaraus umbiásia japicha reta. Iyaputa japicha re. Ndaraus uñemoa. Jovaichopotata. Umitaréita icavi vae uyapo vae reta. ⁴ Umbitavíta japicha reta. Uyapota mbaembae ipia pe uyemingueta mbae reve. Uyererovia catu eteta. Tumpa uau vaeráve, uipota eteta uyembyerovia. ⁵ Uyapota mbaembae íru vae reta ipia pe uyemingueta vaerā tēi jese jae reta uyeyocui co Tumpa pe. Ērei ndaraus güünoi Tumpa imbaepuere. Agüiye iñemíri jocua nunga ndive.

⁶ Jocua nunga cuimbae reta oo íru vae jenta pe, jare umbitaví cuña reta iyaracuua mbae vae. Jocua nunga cuña reta iyoa ete, jare jeta mbae icavi mbae vae uipota uyapo ramo, uyembopa. ⁷ Jecuaeño uipota uyemboe mbaembae re, ērei ndaraus etei ipuere uicuua añete vae. ⁸ Jare ipaye vae reta Janes jare Jambres jee vae oyovaicho Moisés ndive rami, jocua nunga cuimbae reta vi oyovaicho añete vae ndive. Pichñi vae reño ipia pe uyemingueta. Jae reta'ā co upurugüirovia vae añetete vae reta. ⁹ Ērei ndaraus ipuere jecuaeño upurumbitaví. Echa'ā uyequaata opaete vae pe quirāi jae reta iyaracuua mbae vae co, jucuarā Janes jare Jambres uyequaata rami.

Pablo oyocui Timoteo

¹⁰ Ērei nde ndicuua catu co cheporomboe, jare quirāi che aico, jare aipota ayapo Tumpa pe vae, jare chepurugüirovia, jare quirāi chepiaguasu aiporara reve, jare chepuruau, ¹¹ jare quirāi aiporara íru vae reta uyapo icavi mbae vae cheve yave Antioquía pe jare Iconio pe jare Listra pe. Ērei yandeYa cherepi opaete aiporara vae güii. ¹² Añete co, opaete Cristo Jesúz re güürovia vae reta uipota uyeyocui Tumpa pe vae pe uyapota icavi mbae vae íru vae reta. ¹³ Jare icavi mbae vae uyapo vae reta jare upurumbitaví vae reta jeta ete icavi mbae vae uyapota. Jae reta umbitavíta íru vae reta jare uyembitavíta vi.

¹⁴ Ērei nde jecuaeño eporomboe ndiyemboe jese vae re. Echa'ā ndicuua catu jocua moromboe añete co. Jare ndicuua catu vi quía co nemboe jese, ¹⁵ jare quirāi nemichi güive ndicuua Tumpa re uyequatía

oī vae. Echa'ā jocua ipuere nembiaracuua, ndiyembiasaca vaerā mburugüirovia Cristo Jesús regua rupi. ¹⁶ Opaete Tumpa iñee pe uyecuatía oī vae Tumpa co umimbeu, jare icavi co yandeve. Echa'ā uyecuatía oī vae rupi yaicuua mbae nunga moromboe añete vae jare mbae nunga moromboe añete mbae vae. Umimbeu yandeve yayaví yave, jare yandepuere yayemboe jipi vae re. ¹⁷ Jucuarāi yande yayeyocui Tumpa pe vae yandepuere yaicuua opaete Tumpa uipota yaicuua vaerā vae, jare yandepuere yayapo opaete mbae icavi vae.

4

Emimbeu ñee icavi vae

¹Jáeramo che ndoyocui cua re, Tumpa jare yandeYa Jesucristo jee re. Echa'ā yandeYa Jesucristo uāata ime ñugüinoi vae reta jare umanocue vae reta jae ou ye yave oporoyocui vaerā. ² Emimbeu Tumpa iñee. Jecuaeño iñemiatangātu opa ara rupi. Icuuaca iyoa vae pe imbaeyoa, jare embieta chupe jese. Epurumbiaracuua jare eporomboe ndepiaguasu reve. ³Echa'ā outa ara reta uvāe agüiye vaerā ivi pegua reta uipota uyapisaca moromboe añete vae re. Ërei jei vae reñio uezata reta jeta oporomboe vae reta, uyemboe vaerā chugüi reta mbae uipota uyapisaca jese vae reñio. ⁴Jare ndarau uipota uyapisaca añete vae re. Ërei uipotata uyapisaca aracae vae ndaye reta re. ⁵Ërei jecuaeño iñemoa ngatu. Agüiye neatēi ndiporara vaerā. Íñeñono nemimbeu vaerā ñee icavi vae. Iyapo opaete ndiyeyocui vaerā Tumpa pe.

⁶Jecuaeño ayeyocui Tumpa pe, jare añave aicavi ma aī amano vaerā. Echa'ā coïño ma ou amano vaerā. ⁷Che aparavíqui tanta aiporara reve. Opa ma ayapo Tumpa umee cheve ayapo vaerā vae. Jecuaeño añemimirāta yarovia vae re. ⁸Jaeño ma. Uñeñuvatu ma oī cheve penti corona jipi vae pegua. Jare yandeYa umeeta cheve penti corona jocua ara. YandeYa co jae upuruāa jipi vae rupi vae. Jare umeeta vi jocua nunga corona opaete uāro ñugüinoi ivāe ara re vae reta pe - cheveño'lā co.

Pablo oyocui Timoteo

⁹Iñemiatangātu imambae ndeyu vaerā chepi. ¹⁰Demas oo ma chegüi Tesalónica coti, jae uau ete mbaembae cua ivi pegua ramo. Crescente vi oo Galacia coti, jare Tito oo Dalmacia coti. ¹¹Jaeño Lucas upita che ndive. Eeca Marcos nderu vaerā nderupié. Echa'ā jae ipuereta chembori Tumpa iparavíqui pe. ¹²Amondo ma Tíquico Efeso pe. ¹³Aeya chesaco Troas pe Carpo jenta pe. Ndeyu yave chepi, eru cheve. Eru libro reta vi jare tupapire reta. Agüiye neacañi tupapire reta güi.

¹⁴Alejandro mbaembae fierro pegua uyapo vae uyapo jeta icavi mbae vae cheve. YandeYa tumbiepi chupe uyapo vae re. ¹⁵Nde vi iñemoa chugüi. Echa'ā jae oyovaicho ete yande ndive, ñaniñee güirovia'lā ramo.

¹⁶Tenonde uñeapo reta cheré yave, chembori'ā quía. Quiave upita'ā che ndive. Ayerure Tumpa pe agüiye vaerā jae umbijeco reta jese. ¹⁷Ërei yandeYa chembori jare chemimirāta, amimbeu cavi vaerā ñee icavi vae opaete vae pe, jare opaete judío mbae vae reta uyandu vaerā. Jucuarāi yandeYa cherepi, penti cuimbae uyerepi yaguapíta iyuru güi rami. ¹⁸Jare yandeYa cherepi opaete icavi mbae vae güi, jare chereraata ara pe iporoyocua pe. YandeYa tuyembíadoraca jaeño mai pegua. Amén.

Saludo reta

¹⁹Tumpa ndiveño toī Priscila jare Aquila, jare Onesíforo jenta pegua reta. ²⁰Erasto upita Corinto pe. Ërei aeya Trófimo Miletó pe. Jae imbaerasi oī ayu joco güi yave. ²¹Iñemiatangātu ndeyu vaerā chepi ndei roi iara ou uvāe mbove. Eubulo, jare Pudente, jare Lino, jare Claudia, jare opaete íru upurugüirovia vae reta jei peve Tumpa ndiveño peí.

²²YandeYa Jesucristo toī nde ndive. Tumee ipiacavi peve. Amén.

LA CARTA DEL APOSTOL SAN PABLO A TITO

¹ Che co jae Pablo. Ayeyocui Tumpa pe. Echa'ā che co jae Jesucristo jemimondo. Jae chemondo Tumpa uiparavo vae reta pe güirovia vaerā jese, jare uicuaa vaerā añete vae, uyeyocui vaerā Tumpa pe, ² jare uāro vaerā uyerovia reve tecove opa mbae vae. Echa'ā Tumpa ipuere'ā etei iyapu, jare jae jei ndei ivi uyeyapo mbove umee vaerā yandeve tecove opa mbae vae. ³ Ěrei uicuaaca iñee jae uipota ma yave che amimbeu vae rupi. Echa'ā Tumpa co jae yanembiasa vae, jare umee cheve iñee amimbeu vaerā iporoyocui rupi. ⁴ Aciuatía cua tupapire ndeve, Tito. Nde co jae cherai añetete vae yandepurugüirovia re. YandeRu Tumpa jare yandeYa Cristo Jesús yanembiasa vae tumee ndeve ipiacavi, ipuruparareco jare ipicatu.

Tito iparavíqui Creta pe

⁵ Che ndueuya Creta pe nde ndiyapicatu vaerā opaete uata uyeyapicatu vaerā vae, jare niñono vaerā upurugüirovia vae reta itenondegua retarā tenta guasus-rai-rai rupi che ndoyocui rami. ⁶ Upurugüirovia vae reta itenondegua tuico cavi, agüiye vaerā quía umbijeco mbae re. Tugüireco pentiño cuña. Isambia reta tupurugüirovia, jare agüiye tuyapo icavi mbae vae, jare jecuaeño tuyapo tu jare ichi jei vae. Echa'ā jucuarāi yave, ndarau quía umbijeco reta. ⁷ Upurugüirovia vae reta itenondegua uyeyocui Tumpa pe. Jáeramo tuico cavi, agüiye vaerā quía umbijeco mbae re. Agüiye tuyembicate. Agüiye tipiarai. Agüiye ticause. Agüiye tijovaichopota. Agüiye tuijopota ete corepoti iyupegarā. ⁸ Ěrei tiquirēi tumingaru opou ipi vae reta. Icavi vaeño tuyapo. Tuñemoa. Tuyapo jupi vae. Tuyeyocui cavi Tumpa pe. ⁹ Tuñemiatangatū ñee yandepuere yarovia catu vae re. Echa'ā jese uyemboe. Jucuarāi yave, ipuereta upurumbiaracuua moromboe añete vae rupi, jare ipuereta vi uicuaaca oyovaicho jae ndive vae reta pe uyavi vae.

¹⁰ Ime jeta íru vae ipurumbiaracuua re uipota'ā uyapisaca vae reta. Jeta ete judío reta jocua nunga. Jae reta imariño jare upurumbitavi. ¹¹ Icavi co ñamiquíi vaerā jocua nunga. Echa'ā jae reta oporomboe agüiyyeta tēi oporomboe jese vae re umingana vaerā corepoti iyupegarā. Jare iporomboe rupi omropa jeta tenta pegua reta.

¹² Penti oporomboe vae Creta pegua jei jentaigua reta re cuarāi: "Creta pegua reta jecuaeño iyapu, jovaichopota, iyaquí jare icaru ete." Jucuarāi jei. ¹³ Cua jei jese reta vae añete co. Jáeramo tanta rupi embieta chupe reta, uñemimirāta reta vaerā ipurugüirovia re. ¹⁴ Agüiye tuyapisaca judío reta aracae vae indaye reta re. Agüiye vi tuyapisaca uyerova ma añete vae güi vae reta iporoyocui reta re.

¹⁵ Ipiayeminguela iquia mbae vae pe opaete mbaembae iquia mbae co. Ěrei upurugüirovia mbae vae ipiayeminguela iquia vae pe opaete mbaembae iquia co. Echa'ā ipiayeminguela iquia co, jare ipiatití'ā etei mbae icavi mbae vae uyapo yave. ¹⁶ Jae reta jei tēi uicuaa Tumpa. Ěrei mbae uyapo vae uicuaaca íru vae reta pe uicuaa'ā co Tumpa. Echa'ā jae reta uyapo mbaembae pichíi ete vae. Uyapo'ā reta Tumpa jei vae. Uyapo'ā etei mbae icavi vae.

2

Pablo jei Tito pe umimbeu vaerā moromboe añete vae

¹ Ěrei nde emimbeu íru vae reta pe mbaembae moromboe añete vae pegua. ² Ndechi reta tuñemoa jare tuyepiuca íru vae reta pe. Tipiráta ipurugüirovia re. Tupuruau. Tipiaguasu. ³ Jae ramíño vi cuña uicuaaa vae reta tuyugüireco cavi uyeyocui vaerā Tumpa pe. Agüiye tiyapu íru vae re. Agüiye ticause. Toporomboe icavi vae re. ⁴ Tomboe cuña tairusu vae reta uau vaerā ime jare imembí reta, ⁵ jare uñemaoa vaerā, jare agüiye vaerā uyapo mbae pichíi vae, jare uparavíqui cavi vaerā jenta pe, jare uyapo vaerā icavi vae, jare uyapo vaerā ime jei vae. Echa'ā jucuarāi uyapo reta yave, íru vae reta ndarau jei icavi mbae vae Tumpa iñee coti.

⁶ Jae ramíño vi iyocui cuimbae tairusu vae reta uñemaoa vaerā. ⁷ Jecuaeño nde rani iyapo icavi vae, íru vae reta uicuaa vaerā quirái icavi co jae reta vi yugüireco vaerā. Eporamboe añete vae re Tumpa ndipiú reve. ⁸ Iporu ñee reta icavi vae, agüiye vaerā quía nembijeco nde ndere vae re, jare oyovaicho nde ndive vae imara vaerā, ipuere'ā etei jei mbae icavi mbae vae ndecotí ramo.

⁹ Iyocui uyeyocui vae reta uyapo vaerā ipatrón jei vae jare umbiyerovia vaerā ipatrón opaete mbae re. Agüiye iñee tomoë güirave. ¹⁰ Agüiye timonda. Tuechaca ipatrón pe ipuere vaerā güirovia catu. Echa'ā jucuarāi yave, ipatrón uicuaata icavi ete co moromboe Tumpa regua jembiocui uyemboe jese vae. Tumpa co jae yanembiasa vae.

¹¹ Echa'ā Tumpa ipiacavi rupi yayembiasaca co, jare Tumpa uicuaaca opaete vae pe jae ipiacavi vae co. ¹² Tumpa ipiacavi rupi yayemboe ma quirái icavi co yaeya vaerā mbaeyoa reta jare mbaembae

upurugüirovia mbae reta uipota ete vae, jare ñañemoa vaerā, jare yayapo vaerā jupi vae, jare yayeyocui vaerā Tumpa pe. Jucuarāi yaico cua ivi pe ñaí rambueve.¹³ Jare jecuaeño ñaáro yayerovia reve Cristo Jesús ou ye uyecuua vaerā jembipe reve. Jae co Tumpa etei uyembiadoreca vae. Jae co yanembiasa vae.¹⁴ Echa'á jae uñemee umano vaerā yanderé, jae yanderepi vaerā opaete icavi mbae vae güi, jare oyoe vaerā yandepia yanembaeyoa reta güi, yande yayeyapo vaerā imbae retarā, yande yaipota ete vaerā yayapo icavi vae.

¹⁵ Cua mbaembiae re eporomboe. Epurumbiaracuaa jare embieta icavi mbae vae uyapo vae pe. Jecuaeño iporu mbaepuere Tumpa umee ndeve vae. Agüiye quía tanereríro.

3

Tumpa yanembujupi ipiacavi rupi

¹ Emimandúa uyapísaca nderé vae reta uyapo vaerā mburuvicha reta jare mbaepuere güínoi vae reta jei vae, jare uyapo vaerā ipotave mbae icavi vae.² Agüiye tei icavi mbae vae ipotave vae coti. Agüiye tijovaichopota. Tipiaguasu. Tuñemimichi opaete vae ndive.

³ Tenonde yave yande vi yandearacuaa'á. Yayapo'áse Tumpa jei vae. Yayembitavise. Yaicose yaipota vae reño yayembiyerovia vaerā. Jecuaeño yayapose icavi mbae vae jare yaipotase íru vae reta imbaembiae. Íru vae reta ñanemitaréise jare ñañemitaréise.⁴ Êrei Tumpa uicuaaca yandeve quirái jae ipiacavi yandeve jare yanderau co. Jae co yanembiasa vae.⁵ Tumpa yanembiasa yandeparareco ramo, jupi vae yayapo ramo'á. Jae yandeyoe yanembaeyoa güi, ñanoi vaerā tecove ipíau vae. Espíritu Santo rupi ñanoi ma tecove ipíau vae.⁶ Echa'á Tumpa umee yandeve Espíritu Santo opaete imbaepuere reve Jesucristo rupi. Jesucristo co jae yanembiasa vae.⁷ Jucuarāi Tumpa uyapo ñanoi vaerā tecove opa mbae vae, jare jocua ñaáro ñaí yayerovia reve. Echa'á Tumpa yanembujupi ipiacavi rupi.

⁸ Cua co ñiee yandepuere yarovia catu vae. Jare aipota jecuaeño tanta ndeporoyocui vaerā cua mbaembiae re, Tumpa re güirovia vae reta uñemiatangátu uyapo vaerā icavi vae. Echa'á jucuarāi uyapo reta yave, icavita co opaete vae pe.⁹ Êrei agüiye iyeaca iyaracuaa mbae vae reta rami. Agüiye vi iyapísaca mbae itenondegua reta pe uyeyapo vae reguaño umierácuva vae reta re. Agüiye iyeaca mbaembiae mboroyocui regua re. Echa'á jucuarāi uyapo vae reta uyapo'á co mbae icavi vae. Mbae'á co uipota jei jae reta imiari jese vae.

¹⁰ Ime yave quía uipota umbiyao amocue upurugüirovia vae reta íru upurugüirovia vae reta güi vae, ere chupe penti ani mocui vese agüiye vaerā uyapo jucuarāi. Êrei uipota'á yave ueya jeco, agüiye iñemíiru jae ndive. ¹¹ Echa'á ndicuua jocua nunga ipuere'á co ipía pe uyeminguela cavi. Jae iyoa, jare jae etei uicuaa iyoa co.

Mboroyocui reta

¹² Amondo yave ndepi Artemas ani Tíquico, iñemiatangátu ndeyu vaerā chepi Nicópolis pe. Echa'á chequiréi apita joco pe roi iara uasa regua.¹³ Embori opaete ndepuere rupi Zenas mboroyocui uicuaa catu vae jare Apolos, yugüíraa cavi vaerā, agüiye vaerā mbae uata chupe reta.¹⁴ Jare upurugüirovia vae reta tuyemboe jecuaeño uyapo vaerā icavi vae, ipuere vaerā omborí mbae uata chupe vae reta. Echa'á jucuarāi uyapo reta yave, uyeyocui co Tumpa pe.

Saludo reta

¹⁵ Opaete che ndive ñugüínoi vae jei peve Tumpa ndiveño pe. Tumpa ndiveño toí opaete upurugüirovia vae reta. Echa'á jae reta orerou ete. Tumpa tumee opaete peve ipiacavi. Amén.

LA CARTA DEL APOSTOL SAN PABLO A FILEMÓN

¹ Che co jae Pablo. Che co jae penti pereso Cristo Jesús pe ayeyocui ramo. Yanderiví Timoteo ime vi cua pe oĩ che ndive. Aicuatía cua tupapire ndeve, Filemón. Ore ndaua co. Nde ndeparavíqu ore ndive. ² Aicuatía ndeve vi, Apia. Nde co jae oreríndi yandeYa re. Jae ramíño vi aicuatía ndeve, Arquipo. Nde ndeparavíqu tanta ore ndive. Aicuatía vi opaete upurugüirovia vae reta nerenta pe uyembati vae pe, Filemón. ³ YandeRu Tumpa jare yandeYa Jesucristo tumee peve ipiacavi jare ipiacatu.

Filemón ipuruau jare ipurugüirovia

⁴ Jecuaeño ayerure Tumpa pe nderé, Filemón, jare amee yasurupai Tumpa pe nderé. ⁵ Echa'ã jerácu cheve mburuau jare mburugüirovia nde nenoi yandeYa Jesús cotí jare opaete uñeñono tee yandeYa peguarã vae reta cotí vae. ⁶ Ime amocue ndepurugüirovia rupi yandeYa re güirovia vae. Ayerure Tumpa pe jocua reta uicuua cavi vaerã opaete mbae icavi vae Cristo rupi ñanoi vae. ⁷ Ayerovia ete jare chepiacatu ndepuruau re, cherivi. Echa'ã nde nembipliácatu uñeñono tee yandeYa peguarã vae reta.

Pablo umiñera Onésimo re

⁸ Che ndoyocuita tẽi ndiyapo vaerã jipi ndiyapo vaerã vae. Echa'ã Cristo umee cheve mbaepuere cuarãi ndoyocui vaerã. ⁹ Ërei mburuau checoti nenoi ramo, cheiño numiñera. Chendechi ma co, jare che co jae penti pereso Cristo Jesús pe ayeyocui ramo. ¹⁰ Che numiñera Onésimo re. Echa'ã jae uyeyapo ma cherairã yandeYa re peresoriru pe aĩ rambueve.

¹¹ Tenonde yave Onésimo uyeyocui cavi'ã ndeve. Ërei añave uyeyocui cavita co ndeve uyeyocui cavi cheve rami. ¹² Jare amondo ye ndepi, yepo tẽi aau ete. Embiresive nde chembiresive rami. ¹³ Echa'ã amimbitata tẽi che ndive, jae uyeyocui vaerã cheve ndepepica pe, peresoriru pe aĩ rambueve. Cua peresoriru pe aĩ ñee icavi vae amimbeu ramo. ¹⁴ Ërei aipota'ã ayapo jucuarãi, aicuaa'ã icavita ra ndeve ramo. Aipota ndiyapo vaerã icavi vae cheve, nde etei nequiréi ndiyapo yave. Aipota'ã ndoyocui jese. ¹⁵ Aramoi Onésimo osi ndegüi ndereya michi pegua, nde nenoi ye vaerã jaeno mai pegua. ¹⁶ Ërei jae penti uyeyocui vaeñio'ã ma co. Echa'ã añave jae co yanderiví yaau vae. Jare penti nderiví icavi ete ndeve penti uyeyocui ndeve vae güi. Che aau co. Jae ramíño vi nde ndea eteta co. Echa'ã jae co penti cuimbae nde rami, jare mocui reve perovia yandeYa re.

¹⁷ Jáeramo embiresive cavi nde chembiresive rami. Echa'ã nde cheapo penti neirurã. ¹⁸ Jae uyapo yave icavi mbae vae ndeve ani ipia yave ndeve mbae re, cheve ecovara. ¹⁹ Chepo pe etei aicuatía ndeve cua. Che tambiepi ndeve. Ërei chepuere numimandúa quirãi nde ndepia vi cheve nderecove re. ²⁰ Añete co, cherivi, iyapo cua icavi vae cheve yandeYa re yarovia ramo. Chembipiácatu. Echa'ã mocui reve yarovia yandeYa re.

²¹ Aicuatía cuarãi ndeve, aicuaa catu nde ndiyapota co che jae ndeve vae ramo. Aicuaa catu vi ndiyapota co jeta ete che jae ndeve vae güi. ²² Jare numiñera vi cua: Iyapicatu cheve aĩ pepi vaerã. Echa'ã chepia pe ayemingueta aĩ aramoi Tumpa chemondota pepi. Echa'ã pe reta piyerure Tumpa pe cheré chemondo vaerã pepi.

Saludo reta

²³ Epafras jei ndeve Tumpa ndiveño eĩ. Jae ime peresoriru pe oĩ che ndive Cristo Jesús pe uyeyocui ramo. ²⁴ Jare Marcos, Aristarco, Demas jare Lucas jei vi ndeve Tumpa ndiveño eĩ. Jae reta chembori yandeYa iparavíqu re.

²⁵ YandeYa Jesucristo tumee peve ipiacavi. Amén.

LA CARTA A LOS HEBREOS

Tumpa uyemingueta ma Tai rupi

¹ Aracae yave Tumpa uyemingueta aveiño yandetenondegua reta pe iñee umimbeu vae reta rupi. Jeta quirairai rupi uyemingueta chupe reta. ² Ërei añave cua ara reta pe Tumpa uyemingueta ma yandeve Tai rupi. Tumpa uyapo opaete uyeyapo vae Tai rupi, jare Tai rupi vi jei mbae uasata opaete uyeyapo vae pe vae. Tumpa jei vae co Tai güinoi vaerä opaete uyeyapo vae. ³ Tumpa Tai oyovaque Tumpa ndive, jare cua ivi pe ico rambueve uicuaaca quirairai Tumpa imbaepuere tuicha ete co. Echa'ã jae uiporu Tumpa imbaepuere etei. Opaete uyeyapo vae jecuaeño ico Tumpa Tai jei vae rupi jare imbaepuere rupi. Jae etei uñemee umano vaerä, ipuere vaerä umbai yanembayo reta, jare cua jaicue rupi uguapi Tumpa iyipi pe iyacata coti ara pe.

Tumpa Tai jare ángel reta

⁴ Jucuarai Tumpa Tai uicuaaca quirairai jae imbaepuere tuicha ete ángel reta imbaepuere güi. Jae ramíño vi tee uñemee chupe vae uyembutuichaca ete ángel reta jee güi. ⁵ Echa'ã Tumpa jei Tai pe cuarai:

“Nde co jae cheRai.

Cua ara aicuaaca nde co jae cheRai.”

Jucuarai jei. Jucuarai'ã jei Tumpa ángel pe. Jare Tumpa jei Tai re cuarai:

“Che co jae Tu,

jare jae co cheRai.”

Jucuarai jei. Jucuarai'ã jei Tumpa ángel regua. ⁶ Tumpa Tai co jae opaete mbaembae uyeyapo vae iYa. Jare Tumpa ombou ye yave Tai cua ivi pe Tumpa jeita cuarai:

“Jare opaete ángel reta tumbiadora.

Echa'ã jae reta uyeyocui cheve.”

Jucuarai jeita. ⁷ Ángel reta re imiari yave, Tumpa jei cuarai:

“Ayocui ángel reta uyapo vaerä che jae vae.

Jatangätu ete uyeyocui vaerä cheve.”

Jucuarai jei. ⁸ Ërei Tumpa jei Tai pe cuarai:

“Nde co jae Tumpa etei.

Ndeporoyocuita jaeño mai pegua.

Nde ndeporoyocuita jupi vae rupi.

⁹ Nde jecuaeño ndiyapo jupi vae.

Ndiyapota'ã etei mbaeyoa.

Jáeramo che noñono opaete iru vae reta itenondeguarä, ndiyerovia ete vaerä.

Che co jae neTumpa.”

Jucuarai jei. ¹⁰ Jare Tumpa jei vi Tai pe cuarai:

“Nde co jae opaete mbae iYa.

Aracae ete nde ndiyapo ivi.

Jae ramíño vi ndiyapo opaete ara re oí vae.

¹¹ Jae reta opata, ërei nde jaeño mai ndicota.

Jae reta opaete indechita penti temimonde indechi vae rami.

¹² Echa'ã indechi ete ma yave, uyemombo, jare uyeporu iru temimonde jocua indechi vae ipepica pe.

Ërei nde jaeño mai ndicota.

Nde ndarau etei nendechi.”

Jucuarai jei. ¹³ Jare Tumpa jei vi Tai pe cuarai:

“Eguapi cheyipi pe cheacata coti, nderovaicho reta opa amiamiri regua.”

Jucuarai jei. Jucuarai'ã jei Tumpa ángel pe.

¹⁴ Echa'ã ángel reta uyeyocui Tumpa pe, jare Tumpa ombou ángel reta ombori vaerä uyembiasacata vae reta.

Yembiasa icavi ete vae

¹⁵ Jáeramo icavi co ñaneratangätu ete vaerä yayapisaca jese vae re, agüiye vaerä yapia chugüi. ² Echa'ã aracae yave Tumpa uyemingueta Israel pegua reta pe ángel reta rupi. Ërei Israel pegua reta uyapo'ã Tumpa jei vae. Jáeramo Tumpa uiporaraca chupe reta iyoa reta ramo. Echa'ã Tumpa co jae jupi

vae.³ Jae ramiño vi Tumpa uyemingueta ma yandeve yembiasa icavi ete yandeve vae re. Jáeramo uiporaracata yandeve vi, yayapisaca⁴ a yave jese. Echa'ã yandeYa rani imiari cua yembiasa re, jare yaicuua añete co uyapisaca jese vae reta umimbeu yandeve vae rupi.⁴ Tumpa etei vi uicuaaca añete co jae reta umimbeu yandeve vae. Echa'ã umaño jese reta uyapo vaerã miacañi reta uecha vae reta uicuaaa vaerã, jare Tumpa umee chupe reta mbaepuere reta Espíritu Santo rupi jae etei uipota vae rupi.

Jesucristo uyeyapo cuimbaerã

⁵ Ángel reta ndarau yugüüreco mburuvicha retardã ívi icota vae yayemingueta jese vae pe. ⁶ Êrei Tumpa iñee pe yamingueta quirãi penti vae jei Tumpa pe cuarãi:

"Yepe tẽi ívi pegua reta mbaeti co mbae,
êrei nde ndiyandareco jese reta jare jecuaeño nembori reta.

⁷ Añave jae reta imbaepuere michi ete ángel reta imbaepuere güi.
Cuarãi oñ ndipota ramo.

Êrei michi peguaño cuarãita oñ.

Echa'ã tenonde yave nemee Adán pe mbaepuere tuicha vae jare nembutuichaca.

Nde nemee chupe güiñoi vaerã mbaepuere opaete nde ndiyapo vae re.

⁸ Nde nemaeño jese ico vaerã opaete mbaembae juvicharã."

Jucuarãi jei. Cua uipota jei mbaeti co mbae Adán jei vae ñatẽi uyapo vae. Êrei yaicuua quirãi añave ívi pegua reta ndei yugüüreco opaete mbaembae juvicha retardã.⁹ Êrei yaicuua Tumpa umee ma co Jesús pe mbaepuere tuicha vae jare umbiadoraca. Echa'ã Jesús imbaepuere vi uyeyapo michi ete ángel reta imbaepuere güi, êrei michi peguaño. Echa'ã jucuarãi uyeyapo, Jesús umano vaerã opaete ívi pegua reta re, Tumpa uicuaaca vaerã ipiacavi co yandeve.¹⁰ Tumpa uyapo opaete, jare jae uyembutuichaca opaete uyapo vae pe. Jae uipota jeta ívi pegua reta uyeyapo vaerã tai retardã jare uyembutuichaca vaerã. Jáeramo icavi chupe Jesús uiporara vaerã. Echa'ã uiporara vae rupi Jesús uepiti upurumbiasa vaerã.

¹¹ Jesús ñaneñono tee Tumpa peguarã, jare yande co jae pentiño Jesús ndive. Jáeramo jae ñanereni tivi reta. Imara'ã jucuarãi ñanereni vaerã.¹² Echa'ã yamingueta Tumpa iñee pe quirãi Jesús jei Tumpa pe cuarãi:

"Che numimbeuta cheriví reta pe.

Yati yave, numbiadadora canta pipe ipite pe."

Jucuarãi jei.¹³ Jare jei vi cuarãi:

"Aroviata Tumpa."

Jare jei vi cuarãi:

"Mase, co aí jare ime vi cua pe ñugüüñoi Tumpa tai reta jae umiíru che ndive vae."

Jucuarãi jei.

¹⁴ Opaete tai reta ívi pegua reta co. Jáeramo Jesús etei vi uyeyapo ívi peguarã, imano rupi umiamiri vaerã aña guasu. Echa'ã aña guasu güinoise mbaepuere mano regua.¹⁵ Cua jeco pegua Jesús ipuere yanderepi. Echa'ã ñanemichi güive yaquiyé mano güi. Êrei Jesús yandeyora ma cua quiye güi.¹⁶ Añete co, Jesús ou'ã ombori vaerã ángel reta. Ou co ombrori vaerã Abraham iñemoña reta.¹⁷ Jocua uyeyapota Jesús tivi retardã vae ívi pegua reta co. Jáeramo icavi co Jesús vi uyeyapo vaerã ívi peguarã, ipuere vaerã umbai ívi pegua reta imbaeyoa reta. Jae co sacerdote tenondegua Israel pegua ramí. Echa'ã sacerdote tenondegua uique Tumpa oñ vae pe Israel pegua reta imbaeyoa reta re. Jae ramiño vi Jesús uique Tumpa oñ vae pe yanderé. Yandepuere yarovia catu. Jae yandeparareco.¹⁸ Echa'ã aña guasu umingueta uyavica vaerã tẽi chupe. Jáeramo aña guasu yanemingueta yave uyavica vaerã yandeve, Jesús ipuere yanembori.

Jesús jare Moisés

¹ Cheriví reta, Tumpa peñono tee iyupeguarã. Tumpa etei ara pe ico vae peparavo. Jáeramo pepia pe piyemingueta cavi Jesús re. Tumpa ombou Jesús umimbeu vaerã yandeve Tumpa regua, yande yarovia vaerã jese, jare añaave Jesús ico Tumpa oñ vae pe yanembori vaerã yandepurugüirovia re, sacerdote tenondegua ombrori Israel pegua reta ramí.² Moisés uyapo cavi mbaravíqui Tumpa umee chupe uyapo vaerã vae. Jae ramiño vi Jesús uyapo cavi mbaravíqui Tumpa umee chupe uyapo vaerã vae.³ Jare Jesús uyembutuichaca ete Moisés güi. Yamijaanga penti tenta. Moisés uyemijaanga tenta re. Êrei Jesús uyemijaanga tenta iyapoa re. Jecuaeño yambutuichaca ete co tenta iyapoa tenta güi.⁴ Jare penti penti tenta uyeyapoca tenta iyapoa pe. Êrei Tumpa uyapo opaete.⁵ Moisés uyapo cavi mbaravíqui Tumpa umee chupe uyapo vaerã vae. Jucuarãi uyeyocui cavi Tumpa pe, jare Tumpa uicuaaca cua yandeve yaicuua vaerã quirãi opaete Moisés imiari Tumpa re vae añete co.⁶ Êrei Cristo co jae Tumpa Tai jare jae co opaete Tumpa re güirovia vae reta iYa. Echa'ã yande vi co jae imbae, jecuaeño yave ñaneratangãtu jare yayerovia yave ñaáro ñaí vae re.

Tumpa imbae reta iputuu

⁷ Jáeramo pemandúa Espíritu Santo jei vae re. Echa'ā Tumpa iñee pe yamingueta quirāi Espíritu Santo jei yandetenondegua reta pe cuarāi:

“Cua ara piyapisaca chiñee re.

⁸⁻⁹ Jáeramo agüiye piyemipiatanta.

Echa'ā petenondegua reta uyemipiatanta ñana pe ñugüinoi yave.

Jae reta chembíavai jare chembíarasí.

Jare cuarenta año uecha reta opaete ayapo vae.

¹⁰ Jáeramo chearasí petenondegua reta pe, jare che jae cuarāi:

‘Jecuaeño opia reta chegüi ipia pe.

Uipota'ā etei reta uyapo che aipota tēi uyapo vaerā vae.’

Jucuarāi che jae.

¹¹ Jáeramo chearasí chupe reta ramo, che jae cuarāi:

‘Añete co, jae reta ndarau uique Canaán pe.

Echa'ā joco pe uputuuta tēi co.’

Jucuarāi che jae.”

Jucuarāi jei Espíritu Santo.

¹² Jáeramo, cheriví reta, piñemoa, agüiye vaerā pepia uñemitanta perovia'ā Tumpa ramo. Echa'ā pepia uñemitanta yave, peopita Tumpa imeño mai ico vae güi. ¹³ Ërei pepuere rambuve, piñemiatangatungátu opa ara rupi, agüiye vaerā penti pepite pe oī vae yepé uyemipiatanta mbaeyoa rupi. Echa'ā mbaeyoa ipuere yanembitaví yayemipiatanta vaerā. ¹⁴ Echa'ā yande yayeyapo ma Cristo ñiru retardarā jecuaeño yave ñaneratangátu tenonde voi mburugiørovia ñanoi vae re. ¹⁵ Pemandúa cua Tumpa iñee pe uyecuatía oī vae re:

“Cua ara piyapisaca chiñee re” —jei Espíritu Santo—.

“Jáeramo agüiye piyemipiatanta.

Echa'ā petenondegua reta uyemipiatanta ramo, chearasí chupe reta.”

Jucuarāi uyecuatía oī.

¹⁶ Yope tēi uyandu reta Tumpa iñee, Ërei amocue yandetenondegua reta umbiarasí Tumpa. Añete co, opaete Moisés güeru Egipto güi vae reta umbiarasí Tumpa. ¹⁷ Jáeramo Tumpa iarasi cuarenta año jocua yandetenondegua reta pe, iyoa reta ramo. Jare jae reta umano ñana pe. ¹⁸ Echa'ā Tumpa jei cuarāi: “Añete co, jae reta ndarau uique Canaán pe.

Echa'ā joco pe uputuuta tēi co.”

Jucuarāi jei Tumpa. Jare jucuarāi uyeyapo chupe reta, güirovia'ā Tumpa ramo. ¹⁹ Jáeramo yaicuaa jae reta ipuere'ā co uique Canaán pe, güirovia'ā Tumpa ramo.

4

¹ Jáeramo pequiyé. Echa'ā aramoi amocue pe reta ndarau peepiti penoi vaerā jocua mbutuu Cristo ipuere umee peve vae. Tumpa etei jei umee vaerā yandeve cua mbutuu. ² Tumpa umimbeu yandetenondegua reta pe ñee icavi vae, Ërei jocua ñee icavi vae uyapo'ā mbae chupe reta. Echa'ā güirovia'ā reta jocua uyandu vae. Jae ramíño vi Tumpa umimbeu yandeve penti ñee icavi vae. ³⁻⁵ Jare yande yarovia Tumpa vae yaepiti jocua mbutuu Cristo umee yandeve vae. Echa'ā Tumpa jei cuarāi: “Chearasí ete chupe reta.

Añete co, jae reta ndarau uique Canaán pe.

Echa'ā joco pe uputuuta tēi co.”

Jucuarāi jei Tumpa. Echa'ā Tumpa iñee pe uyecuatía oī cuarāi:

“Tumpa opa iparavíqui uyapo seis ara pe.

Jayave jocua jaicue rupi uputuuta penti ara.”

Jucuarāi uyecuatía oī. Ërei yope tēi opa iparavíqui uyapo cua ívi uyeyapo ma yave, Ërei uyecuatía oī Tumpa iñee pe quirāi Tumpa jei cuarāi:

“Jae reta ndarau uique Canaán pe.

Echa'ā joco pe uputuuta tēi co.”

Jucuarāi jei Tumpa.

⁶ Jáeramo yaicuaa cua: Tenonde voi Tumpa umimbeu jocua ñee icavi vae yandetenondegua reta pe. Ërei jae reta mbaeti güinoi jocua mbutuu Tumpa umeeta tēi chupe reta vae, güirovia'ā Tumpa ramo. Jáeramo imeño jocua mbutuu amocue vae güinoita vae. ⁷ Jare Tumpa umimbeu yandeve ara. Echa'ā ima ma jae jei yave David rupi cuarāi: “Cua ara.” Echa'ā uyecuatía oī cuarāi:

“Cua ara piyapisaca chiñee re” —jei Espíritu Santo—.

“Jáeramo agüiye piyemipiatanta.”

Jucuarāi uyecuatía oī.

⁸ Josué umee'ā jocua mbutuu yandetenondegua reta pe. Echa'ā umee chupe reta yave mona, mbaetita tēi Tumpa uyemingueta taicue rupi īru ara re. ⁹ Jáeramo imeñio mbutuu Tumpa umeeta imbae reta pe vae. ¹⁰ Tumpa uputuu opa iparavíquí uyapo yave. Jae ramíño vi yande ñanoí yave jocua mbutuu Tumpa umee yandeve vae, yaparavíquí'ā ma yembiasa ñanoí vaerā. ¹¹ Jáeramo ñaneratangātu ñanoí vaerā jocua mbutuu. Jocua yandetenondegua güirovia'ā Tumpa vae reta opa umano. Jae ramíño vi pe reta perovia'ā yave Tumpa, pecañíteita co.

¹² Echa'ā Tumpa iñee güinoi mbaepuere umee vaerā yandeve tecove opa mbae vae. Penti quisepuci jaimbeyovai vae ipuere yanembipere ete. Ipuere uaysia yandesoo jare ñanecägiie yepe. Ërei Tumpa iñee imbaepuere tuicha ete quisepuci imbaepuere güi. Echa'ā Tumpa iñee uique yandepia pe etei jare uicuaaca yandeve mbae yaipota vae regua jare mbae Espíritu Santo regua. Tumpa iñee ipuere uicuaaca yandeve yandepiyamingueta etei, icavi ra ani icavi'ā ra. ¹³ Mbaeti mbae Tumpa uyapo vae ipuere uñemi Tumpa güi. Echa'ā jae uecha jare uicuaa opaete regua. Jare jae ñanerāata opaete yayapo vae re.

Jesús co jae sacerdote tenondegua rami

¹⁴ Jesús co jae Tumpa Tai. Jae uyupi oo ara pe, jare joco pe uyerure Tumpa pe yanderé, sacerdote tenondegua uyerurese yandetenondegua reta re rami. Ërei Jesús imbaepuere tuicha ete sacerdote tenondegua imbaepuere güi. Jare cua yaicuaa ramo, jecuae ñaneratangātu ñanoí vaerā mburugüirovia. ¹⁵ Jesús mbaeti co sacerdote tenondegua ipuere'ā ipiatiti yaiporara yave vae rami. Echa'ā aña guasu umingueta uyavica vaerā tēi chupe, aña guasu yanemingueta rami. Ërei jae iyoa'ā etei. ¹⁶ Jáeramo yaya yaquije mbae reve Tumpa re, Tumpa yandeparareco vaerā jare ñanoí vaerā ipiacavi. Echa'ā Tumpa ipiacavi jeco pegua yanemborita yaiporara yave.

5

¹ Tumpa uiparavo penti cuimbae uyeyapo vaerā sacerdote tenondeguarā, jare umee chupe uyerure vaerā Tumpa pe īru vae reta re, jare ipuere vaerā umee Tumpa pe ofrenda reta jare maemimba uyeyucacue reta. Maemimba uyeyucacue reta mbaeyoa reta regua co. ² Amocue iyoa vae reta uicuaa cavi'ā imbaeyoa reta regua, ërei īru iyoa vae reta uicuaa uyapo'ā co Tumpa jei vae. Ërei sacerdote tenondegua ipuere uiparareco opaete vae, yavai'ā co jae etei iyoa vaerā ramo. ³ Jare cua jeco pegua icavi co sacerdote tenondegua umee vaerā Tumpa pe maemimba uyeyucacue imbaeyoa reta re, jucuarāi umee īru vae reta imbaeyoa reta re rami. ⁴ Jare mbaeti quía ipuere uyeparavo jaeiño, ico vaerā sacerdote tenondeguarā. Jaeño Tumpa uiparavo vae ipuere ico sacerdote tenondeguarā. Echa'ā jucuarāi Tumpa uiparavo Aarón.

⁵ Jae ramíño vi Cristo uyembutuicha'ā jaeiño. Echa'ā uyeparavo'ā jaeiño, ico vaerā sacerdote tenondeguarā. Tumpa uiparavo Cristo ico vaerā sacerdote tenondeguarā. Echa'ā uycuatiá oī Tumpa iñee pe quirāi Tumpa jei Cristo pe cuarāi:

“Nde co jae cheRai.

Cua ara aicuaaca nde co jae cheRai.”

Jucuarāi jei. ⁶ Jare Tumpa iñee pe uycuatiá ye oī cuarāi:

“Nde ndicota penti sacerdoterā jaeño mai pegua” —jei Tumpa—, “Melquisedec rami.”

Jucuarāi uycuatiá oī.

⁷ Cristo cua ivi pe ico rambueve, uyao reve uyerure Tumpa pe ombori vaerā. Echa'ā Tumpa ipuere tēi umbiásia mano güi. Jare Tumpa uyapisaca iyerure re, Cristo jecuaeño uipota uyapo Tumpa jei vae ramo. ⁸ Ërei yepe tēi jae co Tumpa Tai, ërei uyemboe uyapo vaerā Tumpa jei vae uiporara vae rupi. ⁹ Jare opaete Tumpa jei vae uyapo ma yave, ipuere umee yembiasa opa mbae vae opaete uyapo jae jei uyapo vaerā vae reta pe. ¹⁰ Tumpa iñee pe uycuatiá oī cuarāi:

“Nde co jae penti sacerdote tenondegua” —jei Tumpa—, “Melquisedec rami.”

Jucuarāi uycuatiá oī.

Agüiye pepia Tumpa güi

¹¹ Aipota tēi amimbeu peve jeta cua regua, ërei yavai co oī amimbeu peve vaerā. Echa'ā picuaata'ā, yepe tēi piyapisaca jese. ¹² Añave pe reta pemboeta tēi īru vae reta mbaembae re, piyemboe yave jese. Ërei piyemboe'ā jese. Jáeramo icavi co che pomboe ye vaerā jocua Tumpa umimbeu yandeve vae yavai'ā etei co yaicuaa vaerā vae. Tamijaanga tembíu re. Sambiai-rai reta ipuere'ā jou tembíu, jaeño neche. Pe reta sambiai-rai reta rami co. Echa'ā piyemboe cavi'ā Tumpa umimbeu yandeve vae re. ¹³ Sambiai-rai necheño ipuere jou vae uicuaa'ā mbae ave. Jae ramíño vi pe reta piyemboe'ā ñee Tumpa umimbeu yandeve vae re. Echa'ā piyemboe jese yave, picuaata tēi mbae jupi vae. ¹⁴ Ërei ucuacuaa vae reta jou tembíu. Jae ramíño vi Tumpa umimbeu yandeve vae re uyemboe cavi vae reta uicuaa cavi mbae icavi vae jare mbae icavi mbae vae.

6

¹Jáeramo agüiye yayemboe ye moromboe tenondegua Cristo regua re. Aipota pomboe íru moromboe pepiráta vaerá pepurugüirovia re. Tenonde yave piyemboe quirái pepuere peeya piyemingueta icavi mbae vae pepia pe oí vae - echa'á piyapose vae rupi pepuere'á penoi tecove opa mbae vae. Piyemboe vi mburugüirovia Tumpa cotí vae re, ²jare quirái piyembibautizaca piyeyoe vaerá Tumpa cotí. Piyemboe vi quirái temimondo reta oñono ipo íru vae reta iñáca re. Piyemboe vi umanocue vae reta icove yae vae re jare quirái Tumpa uáata ívi pegua reta jare jae reta uiporarata jaeño mai pegua. ³Cua aipota ayapo, Tumpa umaeño yave cheré. ⁴⁻⁶Penti vae uicuua yave Tumpa, Tumpa uicuuaaca chupe vae rupi, jae uicuua vi quirái icavi ete mbaepuere Tumpa umee vae, jare uñemííru Espíritu Santo ndive. Jae uicuua vi Tumpa iñee icavi ete vae jare mbaepuere reta ara ndeiño ou uvae vae reta pe Tumpa uicuuaacata vae. Êrei cua nunga opia yave Tumpa güi, ndarau etei ipuere ye ueya iyemingueta icavi mbae vae ipia pe oí vae. Jae co uyuca ye Tumpa Tai rami, jare jucuarái güüriroca íru vae reta pe.

⁷Echa'á oquíñoi yave, ama umáqui ívi. Jayave ívi iya oñoti temiti, jare temiti yagüiye cavi yave, oñoti vae uyerovia ete. Jayave ívi iya jeita icavi ete jocua ívi. Echa'á ívi uiporu cavi ama Tumpa ombou vae. ⁸Êrei jocua ívi pe uñemoña yave yuráti catuui, ívi iya jeita icavi'á etei jocua ívi. Aramoi Tumpa uyepipeyuta jese. Jocua ívi opata ocaí.

⁹Êrei, cherívi reta, yepe tēi chemiari ma peve cuarái, êrei aicuua pe reta pepia'á co Tumpa güi. Piyapo co icavi vae piyembiasaca ramo. ¹⁰Uyecuaa quirái peau Tumpa. Picuaaca pepuruau co piyapo vae rupi. Echa'á jecuaeño piyeyociu íru uñeñiono tee Tumpa peguará vae reta pe. Tumpa ndarau ñacañi piyapo vae güi. Echa'á ñacañi chugüi yave, mbaetita tēi jupi. ¹¹Jare aipota pe reta penti penti jecuae picuaaca piñemiatangátu co cua re, jecuae piyervia catu vaerá peáro peí vae re. ¹²Agüiye peaqui. Pico íru güürirovia Tumpa vae reta yugüireco rami. Echa'á jae reta ipurugüirovia jeco pegua ipiaguasu, güünoi vaerá Tumpa jei umeeta chupe reta vae.

Tumpajei umeeta chupe Abraham pe vae

¹³Tumpa jei umeeta Abraham pe vae re, Tumpa jei jee re uyapota co. Echa'á mbaeti co mbaepuere tuicha ete Tumpa imbaepuere güi vae. ¹⁴Jare Tumpa jei Abraham pe cuarái:
“Añete co, che numivendiseta co.

Ameeta ndeve jeta ete niñemoñaa retardar.”

Jucuarái jei. ¹⁵Jare Abraham, íma ma uáro yave ipiaguasu reve, güünoi Tumpa jei umeeta chupe vae. ¹⁶Penti vae jei yave íru vae pe mbae uyapota chupe, jei mbaepuere tuicha vae güünoi vae jee re uyapota co. Jare cua jei vae uicuuaaca íru vae pe uyapota co, agüiye vaerá íru vae ipia pe uyemingueta ndarau ndipo uyapo. ¹⁷Jae ramiño vi Tumpa uipota ete uicuuaaca jei güünoita vae reta pe quirái jae jei vae uyepepica'á etei. Jáeramo jei jee re uyapota co jei vae. ¹⁸Mocui reve - Tumpa jei vae jare jei jee re vae - uyepepica'á etei, jare yaicuua cua mocui reve añete co, Tumpa iyapu'á etei ramo. Jáeramo cua ñanemímírata yandepurugüirovia re. Echa'á yande yayerova yandereco mai indechi vae güi jare yayerure Tumpa pe yanderepi vaerá. Jare ñaáro ñaí yayerovia reve ñanoi vaerá Tumpa jei umeeta yandeve vae. ¹⁹Jare cua ñaáro ñaí yayerovia reve vae yanembori agüiye vaerá yapia Tumpa güi, jare yanemboya Tumpa ara pe oí vae re. ²⁰Echa'á Jesús rani oo ma uique ara pe yanderenonde, jare Tumpa uyapo ma sacerdote tenondegua jaeño mai pegua Melquisedec rami.

7

Jesús co jae sacerdote Melquisedec rami

¹Cua Melquisedec co jae Salem pegua reta juvicha guasu. Tumpa ara pe ico vae uyapo cua Melquisedec sacerdoterá. Abraham ou ye yave Salem pe uyucaca yave jocua mburuvicha guasu reta, uñeñováiti Melquisedec ndive, jare Melquisedec jei Abraham pe cuarái: “Tumpa tanemivendise.” ²Jayave Abraham umee Melquisedec pe diezmo opaete güünoi vae güi. Tee Melquisedec uipota jei “mburuvicha guasu jupi vae”. Cua Melquisedec co jae Salem pegua reta juvicha guasu, jare cua uipota jei “mburuvicha guasu mbiacatu pegua”. ³Yaicuua'á quía reta ra jae tu jare jae ichi. Yaicuua'á vi quía reta ra jae itenondegua reta. Yaicuua'á vi quirái yave ra ichi güi oa, jare quirái yave ra umano. Jáeramo yandepuere yamijaanga Melquisedec Tumpa Tai re. Echa'á jae co penti sacerdote imeño mai ico vae rami.

⁴Mase, Tumpa uipiúca ete co cua cuimbae. Echa'á yandetenondegua Abraham etei umee chupe diezmo opaete mbaembae upíro jovalcho reta güi vae güi. ⁵Jare Israel pegua reta umee diezmo Leví iñemoñaa sacerdote retardar uyeyapo vae reta pe, yepe tēi jentará reta co. Echa'á opareve Abraham iñemoñaa reta co. Tumpa oyocui jucuarái Moisés iporoyocui pe. ⁶Êrei Melquisedec Leví iñemoñaa pegua'á co. Êrei Abraham umee diezmo chupe, jare Melquisedec jei Abraham pe cuarái: “Tumpa tanemivendise.” Jare pemandúa cua re: Abraham co jae uipisi Tumpa güi jei umeeta chupe vae. ⁷Jare penti vae jei yave: “Tumpa tanemivendise”, íru vae pe, añetete jocua cuarái jei vae uyembutuichaca ete

íru vae güi. ⁸Jare cua ívi pe Israel pegua reta umee diezmo sacerdote reta pe, yepe tēi jocua sacerdote reta umano vae co. Ërei Abraham umee diezmo Melquisedec pe. Jare Tumpa iñee pe uyeucuatía oí jese vae rupi jae co imeño ico vae ramí. ⁹Jare yandepuere yae cua: Leví co jae Abraham iñemoñaa pegua ramo, jae etei umee diezmo Melquisedec pe, yepe tēi Israel pegua reta umee diezmo Leví iñemoñaa reta pe. ¹⁰Echa'ã Leví Abraham iñemoñaa pegua co, Ërei ndeiño oa Abraham tai Isaac jee vae Melquisedec uñenováiti Abraham ndive yave. Jare Leví Isaac iñemoñaa pegua co.

¹¹Tumpa uicuaaca Moisés iporoyocui Israel pegua reta pe yave, umee amocue Leví iñemoñaa reta pe sacerdote retarā yugüireco vaerā. Ërei jocua nunga sacerdote reta ipuere'ã opa umbai mbaeyoa reta. Jáeramo icavi co ico vaerā íru sacerdote uyuaví jocua reta güi vae. Cua íru sacerdote Melquisedec rami co, Aarón iñemoñaa pegua'ã co. ¹²Jocua reta uyeyapo sacerdote retarā, jae reta co Leví iñemoñaa pegua reta ramo. Ërei cua íru sacerdote uyuaví jocua reta güi vae Leví iñemoñaa pegua'ã co. ¹³⁻¹⁴Echa'ã uyecuuaa cavi quirāi cua íru sacerdote Tumpa iñee jucuarāi imiari jese vae - jae co yandeYa - Judá iñemoñaa pegua co, Leví iñemoñaa pegual'ã co. Judá iñemoñaa ave uparavíqui'ã sacerdoterā maemimba uyeyucacue uñemeearendā pe. Echa'ã Moisés umimbeu'ã etei Judá iñemoñaa reta ipuere uyeyapo sacerdote retarā.

¹⁵Ërei uyecuuaa cavi ete quirāi icavi co uyeyapo vaerā íru sacerdoterā Melquisedec rami vae. ¹⁶Jocua reta uyeparavoca yugüireco vaerā sacerdote retarā mboroyocui rupi, jae reta co Leví iñemoñaa pegua reta ramo. Ërei cua íru vae uyeparavoca ico vaerā sacerdoterā, imbaepuere tuicha ete ramo. Echa'ã jae güinoi tecove ndarau etei opa vae. ¹⁷Echa'ã Tumpa iñee pe uyeucuatía oí jese cuarāi:

"Nde ndicota penti sacerdoterā jaeño mai pegua" –jei Tumpa–, "Melquisedec rami."

Jucuarāi uyeucuatía oí. ¹⁸⁻¹⁹Tenonde yave Tumpa oyocui amocue Leví iñemoñaa reta yugüireco vaerā sacerdote retarā. Ërei jae reta ipuere'ã opa umbai mbaeyoa reta. Jáeramo Tumpa oyocui'ã ma yugüireco vaerā sacerdote retarā. Umee yandeve icavi ete jocua reta güi vae. Echa'ã añave ñanoi ñaáro ñaí yayerovia reve vae, jare cua jeco pegua yandepuere yaya Tumpa re. ²⁰⁻²¹Jare jocua reta sacerdote retarā uyeyapo yave, Tumpa jei'ã etei mbae jee re. Ërei Tumpa umee yave cua íru vae pe ico vaerā sacerdoterā, jei co mbae jee re. Echa'ã yandeYa Tumpa jei chupe cuarāi:

"Che jae ma cheree re, jare ndarau aipepica cua jae vae:

"Nde ndicota penti sacerdoterā jaeño mai pegua, Melquisedec rami.' "

Jucuarāi jei. ²²Trato ipiáu vae icavi ete trato tenondegua vae güi. Jare Jesús co jae penti sacerdote imeño mai ico vae ramo, yaicuua añetete Tumpa uyapota cua taicue rupi jei vae. ²³Jare jeta ete co jocua sacerdote reta. Echa'ã penti penti umano. Jare sacerdote umano yave, íru vae uyeyapo sacerdoterā uyapo vaerā mbaravíqui. ²⁴Ërei cua cuimbae imeño mai ico. Jáeramo ipuere uyapo sacerdote iparavíqui jaeño mai pegua. Ndarauiipota íru vae uyapo vaerā iparavíqui. ²⁵Jáeramo Jesús ipuere umbbiasa ete opaete oya Tumpa re jae uyapocue vae rupi vae reta. Echa'ã jae imeño mai ico uyerure vaerā Tumpa pe jese reta.

²⁶Icavi ete co uyerure vaerā yanderé cua nunga sacerdote tenondegua. Echa'ã jae co jupi vae. Mbaeti etei jeco. Jae co iyoa mbae vae. Ipuere'ã etei iyoa. Jae ico ara pe. ²⁷Jocua íru sacerdote tenondegua reta opa ara rupi umee Tumpa pe maemimba uyeyucacue reta imbaeyoa reta re rani jare íru Israel pegua reta imbaeyoa reta re. Ërei Jesús uyapo'ã jucuarāi. Echa'ã penti veseño Jesús umee Tumpa pe uyeyucacue vae. Jare jocua uyeyucacue vae jae etei co. ²⁸Echa'ã cuimbae reta mboroyocui rupi uyeparavoca yugüireco vaerā sacerdote tenondegua retarā vae iyoa mbae vae reta'ã co. Ërei añave mboroyocui uasa ma, jare Tumpa uiaparavo Tai ico vaerā sacerdote tenondeguarā jocua jei jee re vae rupi. Jare Tumpa Tai iyoa mbae vae co jaeño mai pegua.

8

Jesús jare trato ipiáu vae

¹Opaete che jae ma peve vae uipota jei cua: Ime ñanoi cua nunga sacerdote tenondegua. Jae uguapi ma oí Tumpa iyipi pe iyacata cotí ara pe. ²Tumpa jo ñana pe Israel pegua reta uyapo vae uyemijaanga ara re. Echa'ã jocua o japipe pe Tumpa oí vae pe sacerdote tenondegua uyapose iparavíqui. Jae ramíno vi Jesús añave uyapo iparavíqui ara pe Tumpa oí vae pe. Israel pegua reta uyapo jocua o. Ërei yandeYa Tumpa uyapo ara.

³Jare sacerdote tenondegua penti penti uyeparavoca umee vaerā Tumpa pe ofrenda reta jare maemimba uyeyucacue reta. Jáeramo icavi co cua sacerdote tenondegua vi güinoi vaerā mbae umee vaerā chupe. ⁴Ívi peño ico yave mona, mbaetita tēi ico sacerdoterā. Echa'ã jocua íru sacerdote reta umee Tumpa pe ofrenda reta mboroyocui rupi. ⁵Ërei mbaravíqui jae reta uyapo vae uyemijaangaño mbaravíqui ara pegua re. Echa'ã ndei Moisés uyapoca Tumpa jo mbove, Tumpa umimbeu chupe quirāi uyapoca vaerā. Jei chupe cuarāi: "Mase, iyapoca opaete o cua amijaanga ndeve cua ívitú guasus re vae

rami." Jucaruái jei chupe. ⁶Jare mbaraviquí Tumpa umee Jesús pe vae icavi ete mbaraviquí jocua íru sacerdote reta uyapo vae güi. Jae ramíño vi trato Jesús rupí yande ñanoi vae icavi ete trato tenondegua vae güi. Echa'á jocua Tumpa jei umeeta yandeve vae icavi ete jocua Tumpa jei umeeta trato tenondegua vae rupí vae güi.

⁷Jocua trato tenondegua vae rupí ipuere'á opa uyembai mbaeyoa reta. Jáeramo icavi co Tumpa uyapo vaerá íru trato. ⁸Echa'á Tumpa uicuua Israel pegua reta iyoa vae reta co. Jáeramo Tumpa iñee pe uyecuatía oí quirái yandeYa Tumpa jei cuarái:

"Mase, outa ara reta amee vaerá trato ipiau vae Israel pegua reta jare Judá pegua reta pe.

⁹Jocua trato tenondegua vae amee itenondegua reta pe, aru yave Egipto güi.

Êrei trato ipiau vae uyuavi trato tenondegua vae güi.

Echa'á jae reta uyapo'á che jae chupe reta uyapo vaerá vae, trato tenondegua vae amee chupe reta yave. Jáeramo ayandareco cavi'á jese reta.

¹⁰Echa'á jocua ara reta rendave pe ameeta trato ipiau vae Israel pegua reta pe.

Jae co cu: Ipiá pe ambiyeminguetata reta cheporoyocui reta re,
jare ayapocata chupe reta cheporoyocui reta.

Jae reta chembiadorata.

Echa'á uicuata che co jae Tumpa.

Jare che amborita reta.

Echa'á yugüirecota chembae retarã.

¹¹Ndarau etei quía omboe jentaigua cheré.

Ndarau etei quía omboe jentará cheré.

Ndarau etei quía jei íru vae pe: 'Iyemboe yandeYa re'.

Echa'á opaete vae - sambiaí reta jare ucuacua vae reta - checuaata co.

¹²Aipararecota reta. Echa'á ambiasata chupe reta imbaeyoa reta.

Ndarau ye chemandúa imbaeyoa reta re."

Jucuarái jei Tumpa. ¹³Tumpa jei umeeta co chupe reta trato ipiau vae. Cua uipota jei jocua trato tenondegua vae indechi ma co. Jare mbae indechi vae opa seri ma co oí.

9

¹Tumpa umee yave Israel pegua reta pe trato tenondegua vae, oyocui quirái umbiadora reta vaerá jocua o ñana pe uyapo reta vae pe. ²Jocua o güinoi mocui o-rai. Tenondegua vae pe ñugüinoi lámpara reta, jare mesa, jare mbiyape uñeñono tee vae reta Tumpa peguarã. Cua o-rai jee Lugar Santo. ³Jare jocua Tumpa jo umbiyao vae cuti oí íru o-rai Lugar Santísimo jee vae. ⁴Joco pe ñugüinoi mesa oro pegua mbae ipiche cavi vae sacerdote reta uapi íárambo vae, jare ita reta Tumpa uicuatía mboroyocui reta jese vae jiru. Jocua jiru ívira pegua vae co, êrei opaete icupe rupí oro catuui. Jare jocua jiru japipe pe ñugüinoi yapepo oro pegua maná oí pipe vae, jare Aarón ipopoca joquí vae, jare ita reta Tumpa uicuatía mboroyocui reta jese vae. ⁵Jare jocua jiru iarambogua jocua oro catuui Tumpa uicuaca Israel pegua reta pe ipuruparareco pipe vae co, jare jocua íárambo ñugüinoi jocua mocui ángel-raanga oro pegua ipóra ete vae. Jocua nunga ángel jee co querubine. Aipota téis amimbeu cavi peve jocua jiru iarambogua regua, êrei chepuere'á añave.

⁶Opaete cua mbaembae uyeyapocavi ma yave, sacerdote reta jecuaeño uique o-rai tenondegua vae pe, joco pe uyapo vaerá iparavíqui. ⁷Êrei sacerdote tenondeguaño uique íru o-rai pe penti veseño año pe, jare jecuaeño uruique tugüi. Jae jare íru Israel pegua reta iyoa uicuua cavi'á reve ramo, sacerdote tenondegua umee tugüi Tumpa pe opaete jocua mbaeyoa reta re. ⁸Jucuarái Espíritu Santo uicuaca ipuere'áño uique opaete vae Tumpa oí vae pe, jocua o-rai tenondegua vae oí rambueve. ⁹Echa'á jocua o-rai tenondegua vae penti jaangáño co. Joco pe sacerdote reta umee Tumpa pe ofrenda reta jare maemimba uyeyucacie reta. Êrei jocua ipuere'á opa umbai jucuarái umbiadora Tumpa vae imbaeyoa reta. Jare sacerdote reta etei uicuua uyembai'á co imbaeyoa reta. ¹⁰Jaeño güinói mboroyocui tembiú regua reta jare quirái jae reta uyeyoe vaerá Tumpa cotí. Opaete jocua mboroyocui reta íví peguaño co. Tumpa umimbeu chupe reta jocua mboroyocui reta jae reta uyapo vaerá, Tumpa opaete uyapicatu regua.

¹¹Êrei Cristo uyeyapo ma sacerdote tenondeguará uyapo vaerá icavi vae yandeve. Jare jae uyapo iparavíqui ara pe. Ara icavi ete jocua Tumpa jo Israel pegua reta ñana pe uyapo vae güi. Echa'á jocua Tumpa jo íví peguaño co. ¹²Jare sacerdote tenondegua íví pegua uique yave Lugar Santísimo pe, uruique capura jugüi jare vaca tairusu vae jugüi. Êrei Cristo uique yave ara pe, uruique jae jugüi etei. Penti veseño uique jare cuarái umbiépi yanembaya reta re. Jáeramo ñanoi ma yembiasa opa mbae vae. ¹³Penti Israel pegua uyapo yave mbae Tumpa cotí uyeminguia vae, sacerdote ipuere ui pi toro jugüi pe ani capura jugüi pe ani i vaca ocaicue ndive uyea vae pe oyoe vaerá jete Tumpa cotí.

Jucuarāi uñeñono tee Tumpa peguarā. ¹⁴ Êrei Cristo jugüi ipuere ete jocua reta güi. Echa'ã Cristo iyoa mbae vae co. Êrei jae umano uñemee vaerā Tumpa pe Espíritu Santo imeño mai ico vae rupi. Jáeramo jae jugüi ipuere umbai mbaembæ mano pegua piyapo vae. Jare picuaata uyembai ma co, pepuere vaerā piyeyoci Tumpa imeño mai ico vae pe.

¹⁵ Jare cua jeco pegua Tumpa uicuaaca ma trato ipiāu vae Cristo rupi. Echa'ã Cristo umano umbiepi vaerā trato tenondegua vae güinoi vae reta imbaeyoa reta re. Jáeramo jocua Tumpa uiparavo vae reta güinoita imbaerā opa mbae vae Tumpa jei umeeta chupe reta vae.

¹⁶ Cuimbae jei yave umee vaerā mbaembæ iru vae reta pe jae umano yave, jae reta ndarau ipuere güinoi jocua mbaembæ imbaerā ndei iya umano mbove. ¹⁷ Echa'ã cuimbae umano yave ramo jae reta ipuere güinoi imbaerā jocua mbaembæ. Ndarau ipuere güinoi mbaembæ jei umeeta vae imeño ico rambueve. ¹⁸ Jáeramo Moisés uiporu tugüi trato tenondegua vae uyeyapo vaerā. ¹⁹ Echa'ã Moisés opa rani umimbeu Israel pegua reta pe opaete mboroyocui reta. Jayave jocua jaicue rupi uiporu vaca tairusu vae reta jugüi jare capura reta jugüi jare i jare ovecha-raagüe uñemipíta vae jare ñana hisopo jee vae uiipi vaerā tupapire jare opaete Israel pegua reta. ²⁰ Jare Moisés jei chupe reta cuarāi: “Cua tugüi uicuaaca peve trato Tumpa umee ma peve vae.

Echa'ã cua trato rupi Tumpa peocui mbae piyapo vaerā.”

Jucuarāi jei. ²¹ Jae ramíño vi Moisés uiipi tugüi pe Tumpa jo jare opaete sacerdote reta jembiporu reta.

²² Jare mboroyocui rupi opaete seri uyeyoe Tumpa coti tugüi pe. Jare maemimba reta uyeyuca'ã yave, Tumpa umbiasata'ã tēi Israel pegua reta pe imbaeyoa reta.

Jesús umano güiraa vaerā imbaeyoa reta

²³ Jare opaete cua reta mbaembæ ara pegua jaanga retaño co. Jáeramo icavi co uyeyoe vaerā Tumpa coti jucuarāi. Êrei icavi co mbaembæ ara pegua etei uyeyoe vaerā Tumpa coti Cristo jugüi pe. Echa'ã Cristo jugüi icavi ete maemimba reta jugüi güi. ²⁴ Cristo uique ma ara pe, uique'ã penti o uñeñono tee Tumpa peguarā vae Israel pegua reta uyapo vae pe. Echa'ã jocua o penti jaangaño co. Jocua o uyemijaanga Tumpa jo añetete vae re. Cristo ico ma Tumpa oĩ vae pe yanembori vaerā. ²⁵ Jare sacerdote tenondegua ívi pegua uruique Lugar Santísimo pe maemimba reta jugüi. Ipuere'ã co uruique jae jugüi. Jare jucuarāi jecuaeño uyapo opa año rupi. Êrei Cristo uñemee'ã ma jecuaeño umano vaerā. ²⁶ Echa'ã jecuaeño jucuarāi uñemee yave mona, umanota tēi uiporara reve jeta vese ívi uyeyapo güive. Êrei añave penti veseño ara taicuegua reta pe ou ma Cristo cua ívi pe umbai vaerā mbaeyoa reta imano rupi. ²⁷ Ívi pegua reta umano, ou uvae yave ara umano vaerā. Jare umano yave Tumpa uāata co. ²⁸ Jae ramíño vi Cristo penti veseño uñemee umano vaerā, ipuere vaerā güiraa chugüi reta jeta vae imbaeyoa reta. Jare uyecuaa yeta opaete uyerovia reve uáro ñugüinoi vae reta pe. Êrei uyecuaa ye yave, outa umbiásate ete reta vaerā, outa'ã umbiepi ye vaerā mbaeyoa re.

10

¹ Mboroyocui michiño uicuaaca icavi vae Tumpa uyapotá vae. Uicuaaca cavi'ã. Echa'ã maemimba uyeyucacue reta uñemee Tumpa pe opa año. Êrei jocua nunga ipuere'ã etei opa umbai jucuarāi oya Tumpa re vae reta imbaeyoa reta. ² Echa'ã ipuere yave mona opa umbai, uñemee yetá'ã tēi co maemimba uyeyucacue reta. Echa'ã jucuarāi umbiadora Tumpa vae reta ipia pe uyeminguela yetá'ã tēi co jecuaeño mbaeyoa reta güinoi vae re. ³ Êrei jocua maemimba uyeyucacue reta Tumpa pe uñemee vae umimandúa opa año Israel pegua reta imbaeyoa reta re. ⁴ Echa'ã toro jugüi jare capura jugüi ipuere'ã etei umicañi ete mbaeyoa reta.

⁵ Jáeramo Cristo ou yave cua ívi pe, jei Tumpa pe cuarāi:

“Ndipota'ã jocua maemimba uyeyucacue uñemee ndeve vae reta.

Jáeramo nde nemee cheve cherete uñemee vaerā.

⁶ Maemimba uyeyucacue reta ocai uñemee vaerā ndeve.

Êrei jocua reta nembiyerovia'ã.

Jae ramíño vi maemimba uyeyucacue reta mbaeyoa reta re uñemee vae nembiyerovia'ã.

⁷ Jayave che jae ndeve:

‘Mase, che ayu ayapo vaerā nde ndere vae.

Nde co jae Tumpa.

Echa'ã jucuarāi uyecuatía oĩ cheré niñee pe.’ ”

Jucuarāi jei Cristo Tumpa pe. ⁸ Cristo jei tenonde voi cuarāi:

“Ndipota'ã jocua maemimba uyeyucacue uñemee ndeve vae reta.

Maemimba uyeyucacue reta ocai uñemee vaerā ndeve.

Êrei jocua reta nembiyerovia'ã.

Jae ramíño vi maemimba uyeyucacue reta mbaeyoa reta re uñemee vae nembiyerovia'ã.”

Jucuarāi jei, yepe tēi jocua nunga uñemee Tumpa pe mboroyocui rupi.⁹ Jayave jocua jaicue rupi jei ye cuarāi:

“Mase, che ayu ayapo vaerā nde ndere vae.
Nde co jae Tumpa.”

Jucuarāi jei. Cua uipota jei jocua maemimba uyeyucacue uñemee vae reta mbaeti ma co mbaerā icavi, jare jocua ipepica pe Cristo jete uñemee Tumpa pe.¹⁰ Echa'ā Jesucristo umee jete Tumpa pe penti veseño jaeño mai pegua. Jare cua jeco pegua Tumpa ñaneñono tee iyupeguarā jei vae rupi.

¹¹ Jocua ivi pegua sacerdote reta uyemboi Tumpa jo pe opa ara rupi uyeyocui vaerā Tumpa pe. Jeta vese jae reta umee Tumpa pe maemimba uyeyucacue reta. Opa ara jocua jocuaño uyapo reta. Ërei jocua nunga ipuere'ā etei umbai mbaeyoa reta.¹² Ërei cua cuimbae Cristo jee vae umano umee vaerā jete Tumpa pe. Penti veseño jucuarāi uyapo, ipuere vaerā umbai mbaeyoa reta jaeño mai pegua. Jare jocua jaicue rupi uguapi Tumpa iyipi pe iyacata coti.¹³ Jare uguapi joco pe güive, jecuaeño uáro oí Tumpa opa umiamiri vaerā jovaicho reta regua.¹⁴ Echa'ā penti veseño umee jete Tumpa pe, jare jucuarāi umbiasa ete jaeño mai pegua Tumpa oñono tee iyupeguarā vae reta.

¹⁵ Jare Espíritu Santo vi umimbeu cua yandeve. Echa'ā uyecuatía oí Tumpa iñee pe quirāi yande Ya tenonde voi jei cuarāi:

¹⁶ “Jocua ara reta rendave pe ameeta cua trato ipiau vae chupe reta.

Ipiá pe ambiyeminguetata reta cheporoyocui reta re,
jare ayapocata chupe reta cheporoyocui reta.”

Jucuarāi jei.¹⁷ Jayave taicue rupi jei cuarāi:

“Jare ndarau ye chemandúa imbaeyoa reta re.”

Jucuarāi jei.¹⁸ Jare Tumpa umbiasa yandeve yanembaeyoa reta ramo, mbaeti ma mbae ñamee vaerā yanembaeyoa reta re.

Yaique Tumpa oí vae pe

¹⁹ Jáeramo, cherivi reta, yandepuere yaique yaquiye mbae reve Tumpa oí vae pe Jesús jugüi jeco pegua.²⁰ Echa'ā Jesús umano yanderé yandepuere vaerā yaique Tumpa oí vae pe, maemimba uyeyuca yave sacerdote tenondegua uique Lugar Santísimo pe rami. Jucuarāi Jesús uyapo yandeve penti tape ipiau vae Tumpa oí vae pe, ñanoi vaerā tecove opa mbae vae.²¹ Yande co jae Tumpa imbae reta, jare Jesús co jae sacerdote tenondegua uyerure Tumpa pe yanderé vae.²² Jáeramo yaya Tumpa re ñanequiréi ngatu reve. Yarovia Tumpa uipota co yaya vaerā jese. Sacerdote ivi pegua oyase Tumpa re yave, uyeipi tugüi pe jare oyoe jete i icavi vae pe. Jae ramíño vi yande yaya Tumpa re yave, tuyeyoe Tumpa cotí mbaeyoa güi yandepia jare yanderete.²³ Jecuaeño ñaneratangátu yamimbeu vaerā íru vae reta pe ñaáro ñaá yayerovia reve vae. Echa'ā yandepuere yarovia catu Tumpa jei umeeta yandeve vae.²⁴ Jare yayandareco yandiye. Ñañemiatangátu yayerau vaerā jare icavi vae yayapo vaerā.²⁵ Amocue vae uyembati'ā ma íru upurugüirovia vae reta ndive. Agüiye yayapo jae reta rami. Yayembati jare ñañemiatangátu ete, yaicuaa jocua ara outa ma oí ramo.

²⁶ Ërei yandeyoa yave ñanequiréi ngatu reve añete vae yaicuaa yave, mbaeti ye ma quía uñemee vaerā mbaeyoa reta re.²⁷ Jaeño ñaárota yaquiye reve Tumpa ñaneráa vaerā. Echa'ā Tumpa pochí ete jovaicho reta pe. Jae co penti tata mbaembae opa uapi vae rami.²⁸ Penti Israel pegua Moisés iporoyocui uyapo'ā vae umano, íru mocui ani mbapí Israel pegua reta umimbeu yave imbaeyoa re. Íru vae reta uiparareco'ā etei.²⁹ Ërei Tumpa upuruáa yave, güiríro Tumpa Tai vae uiporara eteta Israel pegua reta güi. Echa'ā güiríro Tumpa Tai vae ipia pe uyemingueta Tumpa Tai jugüi mbae'ā co, yepe tēi jocua jugüi uicuaaca chupe trato Tumpa umee chupe vae, jare jocua jugüi rupi Tumpa oñono teeta tēi iyupeguarā. Jucuarāi güiríro Tumpa Tai vae güiríro vi Espíritu Santo ipiacavi.³⁰ Yaicuaa co Tumpa jare quirāi jae jei Israel pegua reta pe cuarāi:

“Che co jae pe Ya.

Che puáata co.

Che aiporaracata co peve.”

Jucuarāi jei. Jare yaicuaa quirāi jei vi chupe reta cuarāi:

“Che co jae pe Ya.

Pe reta co jae chembae reta.

Che puáata co.”

Jucuarāi jei vi.³¹ Penti quiye tuicha vae co Tumpa imeño mai ico vae uiporaraca yave quía nunga vae pe.

³² Ërei pemandúa ara reta uasa vae re. Jocua ara reta pe, Cristo re piyemboe yave, íru vae reta uiporaraca ete peve, ërei jecuaeño pepiráta pepurugüirovia re.³³ Íru vae reta pereríro. Echa'ā jei reta icavi mbae vae peve jare uyapo reta icavi mbae vae peve. Jae ramíño vi piñemíru ma jucuarāi uiporara vae reta ndive.³⁴ Echa'ā piparareco peresoriú pe ñugüinoi vae reta. Jare íru vae reta pembaembae

upíro pegüi yave, piyerovia catu. Echa'ã picuaa penoi co ara pe mbaembae icavi ete jocua güi vae. Echa'ã mbaembae ara pegua jaeño mai pegua co. Êrei mbaembae ívi pegua jaeño mai pegua'ã co.
³⁵ Jáeramo jecueaño perovia catu Tumpa pequiye mbae reve, Tumpa umee vaerä peve icavi ete vae.
³⁶ Echa'ã Tumpa uipota pepiaguasu vaerä. Jucuaräi yave, Tumpa umeeta peve jei umeeta vae, opa ma piyapo yave Tumpa jei vae. ³⁷ Tumpa iñee pe uyecuatía oï cuaräi:

"Imambae jae outa vae outa co.

Ou seri ma co oï.

³⁸ Tumpa umbujupi vae güinoita tecove opa mbae vae, upurugüirovia ramo.

Êrei ime yave quía opia Tumpa güi vae, ndarau ayerovia jese."

Jucuaräi uyecuatía oï. ³⁹ Êrei yande jae'ã co Tumpa güi opia vae reta. Echa'ã jae reta yugüiraata cañitei pe. Yande yapurugüirovia yanderecove uyembiasaca vaerä.

11

Mburugüirovia regua

¹ Mburugüirovia ñanoi yave, yaicuaa ñanoita co ñaäro ñaï yayerovia reve vae, yepe tëi mbaetiño yaecha. ² Yandetenondegua reta umbiyerovia Tumpa ipurugüirovia re.

³ Yapurugüirovia yave, yaicuaa ívi jare opaete ara re ñugüinoi vae uyeyapo co Tumpa jei vae rupi, jare opaete cua reta yandepuere yaecha vae uyeyapo'ã mbae güi. Echa'ã ndei Tumpa uyapo mbove, mbaetí co mbae ave.

⁴ Abel güirovia Tumpa. Jáeramo umee Tumpa pe maemimba uyeyucacue. Cua icavi ete Tumpa pe jocua Caín umee Tumpa pe vae güi. Jare Tumpa uicuaaca umbujupi co Abel jocua umee Tumpa pe vae rupi. Jare yepe tëi Abel umano, êrei jocua uyapo vae mbae uicuaaca yandeve.

⁵ Enoc güirovia Tumpa. Jáeramo Tumpa güiraa ívi güi jecove reve. Mbaetí quía ipuere uväe chupe. Echa'ã Tumpa güiraa ívi güi. Echa'ã ndei Tumpa güiraa mbove, Tumpa uicuaaca quiräi Enoc umbiyerovia. ⁶ Êrei yarovia'ã yave Tumpa, yandepuere'ã yambiyerovia. Echa'ã yarovia'ã yave ime co penti Tumpa, yandepuere'ã yaya jese. Jae ramíño vi yarovia'ã yave Tumpa uyecuata co yandeve jecueaño yaeca yave, yandepuere'ã yaya jese.

⁷ Noé güirovia Tumpa. Jáeramo uyapo chalana guasujentará reta oyepe vaerä iporu guasu güi. Echa'ã ndei iporu guasu uyeyapo mbove, Tumpa uicuaaca Noé pe uyeyapota co. Jáeramo Noé uyapo chalana guasu umbiadura Tumpa ramo. Jare jocua uyapo vae rupi Noé uicuaaca ívi pegua reta icavi mbae vae uyapo vae reta co, jare Tumpa umbujupi ipurugüirovia jeco pegua.

⁸ Abraham güirovia Tumpa. Jáeramo uyapo Tumpa umimbeu chupe uyapo vaerä vae. Echa'ã Tumpa umimbeu chupe oo vaerä ambie ívi Tumpa umeeta imbaerä vae pe. Jayave Abraham oë oo jenta güi, yepe tëi uicuaa'ã queti oo vae. ⁹ Abraham güirovia Tumpa ramo, icoño ívi Tumpa jei umeeta chupe vae pe jo carpa guacapi pegua pe. Jucuaräi uyecuaa jocua ívi jae imbae'ã co. Jae ramíño vi Isaac jare Jacob yugüireco joco pe jo guacapi pegua pe, yepe tëi Tumpa jei chupe reta vi umeeta co jocua ívi imbaerä.

¹⁰ Echa'ã Abraham uäro oï uique vaerä tenta guasu Tumpa uyapo vae. Jocua tenta guasu ndarau opa.

¹¹ Sara güirovia Tumpa. Jáeramo Tumpa umee chupe imembí vaerä. Jare Sara imembí, yepe tëi ucuacuaa ete. Echa'ã güirovia Tumpa uyapota co jei uyapota vae. ¹² Jáeramo jeta ete co Abraham iñemoñaa reta, yepe tëi Abraham indechi ete ma. Jeta ete co yasítata ara re ñugüinoi vae reta jare jeta ete co iñicuítí i guasu jembeí pe oï vae. Jae ramíño vi jeta ete co Abraham iñemoñaa reta.

¹³ Cua reta umano güirovia reve Tumpa, yepe tëi Tumpa ndeñio umee chupe reta jei umeeta chupe reta vae. Jae reta jei iyupe imbae'ã co cua ívi. Êrei uicuaa íma yave Tumpa uyapota co jei uyapota vae.

¹⁴ Jare jei reta yave iyupe cua ívi imbae'ã vae co, uipota jei uäro ñugüinoi íru ívi yugüireco pipe vaerä.

¹⁵ Añete co ipia pe uyeminguela yave jocua ívi Abraham oë oo chugüi vae re yugüiraa ye vaerä joco pe, aramoi ipuereta tëi yugüiraa ye joco pe. ¹⁶ Êrei uipota reta ívi icavi ete jocua güi vae. Uipota penti ívi ara pegua. Jáeramo Tumpa imara'ã jee re. Echa'ã jee co Abraham jare Isaac jare Jacob iTumpa. Jare jae uyapo ma chupe reta tenta guasu jentará.

¹⁷ Tumpa uipota uicuaa uyapota ra Abraham Tumpa jei chupe uyapo vaerä vae. Jáeramo Abraham uyucata tëi Isaac umee vaerä Tumpa pe. Jucuaräi uyapo güirovia Tumpa ramo. Yepe tëi Tumpa umee ma chupe reta vae reta, êrei uyucata tëi tai jae vaeño umee vaerä Tumpa pe.

¹⁸ Echa'ã Tumpa jei ma Abraham pe Isaac re cuaräi: "Nenoita niñemoñaa reta Isaac rupi." Jucuaräi jei. ¹⁹ Abraham uicuaa jae uyuca yave tai, Tumpa ipuere umbijecove ye. Jare yandepuere yamijaanga cua uyeyapo vae, yae yave Abraham umbiresive Isaac mano güi.

²⁰ Isaac güirovia Tumpa. Jáeramo uyerure Tumpa pe umivendise vaerä Jacob jare Esaú uyeyapota chupe reta vae re.

²¹ Jacob güirovia Tumpa. Jáeramo umanota ma yave, uyerure Tumpa pe umivendise vaerä José tai reta mocui reve, jare umbiadura Tumpa uyeco oï rambueve ipopoca re.

²² José güirovia Tumpa. Jáeramo umanota ma yave, jei Israel pegua reta pe oëta co yugüüraa Egípto güüi, jare oyocui reta jetece re.

²³ Moisés tu jare ichi güirovia Tumpa. Jáeramo Moisés ichi güüi oa ma yave, tu jare ichi oñomi jo pe mbapi yasi. Echa'ä uecha Moisés ipôra ete co, jare uquiyé'ä mburuvicha guasu Egípto pegua iporoyocui güüi.

²⁴ Moisés güirovia Tumpa. Jáeramo ucuacuua ma yave, uipota'ä ico vaerä Faraón tayi imembirä. ²⁵ Ipuere tēi uyapo mbaeyoa uyembiyerovia vaerä michi pegua. Ërei uipota ete jocua güüi uiporara Tumpa imbae reta ndive. ²⁶ Echa'ä Moisés güirovia icavi ete chupe uñereríroca vaerä Cristo jeco pegua opaete corepoti Egípto pe oï vae güinoi vaerä vae güüi. Echa'ä uicuua icavi ete co Tumpa umeeta chupe vae opaete corepoti Egípto pe oï vae güüi.

²⁷ Moisés güirovia Tumpa ramo, oë oo Egípto güüi. Uquiyé'ä mburuvicha guasu güüi, yepe tēi mburuvicha guasu pochi ete chupe. Jare Moisés urupia ima ñana pe. Echa'ä yepe tēi mbaeti quía ipuere uecha Tumpa, érei jae ico quía uecha Tumpa vae ico rami. ²⁸ Moisés güirovia Tumpa ramo, omboe Israel pegua reta pascua re. Jocua ara pe jae reta uipi jonque penti penti tugiüi pe, agüiye vaerä ángel uyuca tai tenondegua reta. Echa'ä jocua ángel uyuca Egípto pegua reta tai tenondegua vae reta.

²⁹ Israel pegua reta güirovia Tumpa. Jáeramo † Guasu Píta jee vae uasa ivi utini vae rupi uasa rami. Ërei Egípto pegua reta uasa rambueve, i ou ye chupe reta jare opa umbipítupa.

³⁰ Israel pegua reta güirovia Tumpa ramo, Jericó iquësea ita pegua vae uyapara Israel pegua reta siete ara ma uyere jese yave.

³¹ Cuña aguasa rupi ico vae Rahab jee vae güirovia Tumpa. Jáeramo opaete Jericó pegua güirovia'ä Tumpa vae reta umano yave, Rahab umano'ä. Echa'ä jae umbiresive cavi Israel pegua reta uipiáro yave Jericó.

³² Jeta ete ma che jae güirovia Tumpa vae reta re. Chepuere'ä ma amimbeu vaerä peve Gedeón, Barac, Sansón, Jefté, David, Samuel jare Tumpa iñee umimbeu vae reta regua. ³³ Jae reta vi güirovia Tumpa. Jáeramo umiamiri mburuvicha guasu reta, uyapo jupi vae, Tumpa umee chupe reta jei umeeta chupe reta vae, jare Tumpa uyandareco jese reta agüiye vaerä yaguapíta reta uyuca. ³⁴ Jae reta ombove tata tuicha vae reta. Amocue vae jovaicho reta uipota tēi uyuca quisepucu pe, érei ipuere'ä. Ipitu reta yave, Tumpa umee chupe reta mbaepuere. Jatangätu ete reta uñeráro vaerä jare ombosi sundaro reta ambie ivi reta güüi yugüieru uñeráro vaerä jae reta ndive vae. ³⁵ Amocue cuña reta icuimbae uyeyucaca, jare Tumpa umbijecove ye güieru umanocue vae reta ipite güüi, jae reta ipuere ye vaerä uyandareco cuña reta re. Íru vae reta uyeyucaca ivira pe. Uiporaraca chupe reta vae reta jei ipuere jecuae yugüireco cua ivi pe, uyapo yave jae reta jei chupe reta uyapo vaerä vae, érei uipota'ä reta. Echa'ä uicuua Tumpa umbijecove yeta güeru umanocue vae reta ipite güüi jare jayave icavi eteta chupe reta cua ivi pe jecuae yugüireco vae güüi. ³⁶ Íru vae reta uiporara ete uñereríroca jare uñenupaca chicote pe yave. Jare íru vae reta uñeñonoca peresoríru pe jare uyepocuaca joco pe. ³⁷ Amocue vae jovaicho reta uyapi ita pe uyuca. Íru vae reta jovaicho reta uyasia icúa rupi sierra pe uyuca. Íru vae reta uiporara jovaicho reta jei yave ipuere jecuae yugüireco cua ivi pe, uyapo yave jae reta jei chupe reta uyapo vaerä vae. Íru vae reta uyeyucaca quisepucu pe. Amocue vae uguata opaete que rupi jare jemimonde co jae ovecha ipirecue ani capura ipirecue. Mbaeti etei mbae güinoi reta. Uiporara ete reta. Jovaicho reta uyapo icavi mbae vae chupe reta. ³⁸ Jocua güirovia Tumpa vae reta uguataguata ñana reta rupi jare ivitu guasu reta rupi, jare yugüireco ivicua tuicha vae reta pe. Iví pegua reta iyoa ete. Jáeramo ipuere'ä uicuua icavi ete co jocua güirovia Tumpa vae reta.

³⁹ Opaete jocua reta umbiyerovia Tumpa ipurugüirovia re. Ërei Tumpa umee'ä chupe reta jei umeeta chupe reta vae. ⁴⁰ Echa'ä Tumpa uicuua yande ñanoita co mbae icavi ete umeeta chupe reta vae güüi vae, agüiye vaerä jae reta uyembiasaca ete ndei yande yayembiasaca ete mbove.

12

Yarovia catu Jesús yanembori vaerä

¹ Jeta ete co güirovia Tumpa vae amimbeu peve vae reta. Jocua reta rupi yandepuere yaicuua icavi co yandeve yarovia vaerä Tumpa. Jáeramo yamombo yandeyugüi opaete yanembeyoa. Echa'ä mbaeyoa yanembiai ete. Yamijaanga penti ñeñocui. Ñañeñocuiñocui yave, icavi co yamombo vaerä yandeyugüi opaete poi vae, jare yasi vaerä ñamiaguanta reve. Jae ramíño vi yaico yandepiaguasu reve cua ivi pe. Echa'ä Tumpa umee yandeve yaico vaerä cua pe. ² Jare yarovia catu Jesús yanembori vaerä. Echa'ä Jesús ipurugüirovia tuicha ete opaete íru vae reta ipurugüirovia güüi. Jae tuicha urupia umano vaerä curusu re. Joco pe oï rambueve, íru vae reta güiríro, érei jae jei'ä mbae ave jocua re. Echa'ä uicuua taicue rupi uyerovia catuta co. Añave uguapi oï Tumpa iyípi pe iyacata cotí.

³ Pepia pe piyemingueta Jesú re, quirāi iyoa vae reta icavi mbae vae jei yave icoti, jae umiaguanta. Echa'ā pepia pe piyemingueta yave jese, ndarau pecueri jare ndarau pepitu pepia pe. ⁴ Yeve tēi piñerāro mbaeyoa ndive, ērei ndeiño piñerāro pemano vaerā. ⁵⁻⁶ Tumpa imiari peve penti tu imiari tai pe rami. Echa'ā Tumpa iñee pe uyeucuatá oī cuarāi:

"Cheraí, agüiye ndepochi yandeYa uiporaraca ndeve yave agüiye vaerā ndeyo, jare agüiye ndecueri yandeYa umimbeu ndeve nembaeyoa yave.

Echa'ā yandeYa uiporaraca uau vae pe, agüiye vaerā iyoa.

Jucuarāi uiporaraca chupe, taírā uyapo yave."

Jucuarāi uyeucuatá oī. Aramoi pe reta peacañi jocua güi. ⁷ Pemiaguanta Tumpa jucuarāi uiporaraca peve yave. Echa'ā Tumpa jucuarāi uyapo, pe reta co jae tai reta ramo. Echa'ā tu reta uiporaraca tai pe jucuarāi. ⁸ Yaicuaa opaete tai reta uiporara jucuarāi. Jáeramo piporara'ā yave jucuarāi, pe reta jae'ā co tai ete reta. ⁹ Añete co, yanderu iñi pegua uiporaraca yandeve, agüiye vaerā yandeyoa, jare yaicuaa icavi co uyapo. Jáeramo agüiye etei yandepochi yandeRu ara pegua uiporaraca yandeve yave yaico vaerā icavi vae yayapo reve. ¹⁰ Echa'ā yanderu iñi pegua uiporaraca yandeve michi pegua jei vae rupiño. ērei yandeRu ara pegua uiporaraca yandeve, agüiye vaerā yandeyoa. Cua icavi co yandeve. Echa'ā jae iyoa mbae vae co. ¹¹ Añete co, yaiporara ñai yave, yandepiatiti. Yayerovia'ā co. ērei taicue rupi jocua yaiporara vae yanembori yayapo vaerā jipi vae yandepiacatu reve, ñamaeñio yave Tumpa re yanemboe jese yaiporara vae rupi.

Piyapisaca Tumpa jei vae re

¹² Jáeramo agüiye ma pecueri. Agüiye ma pepitu. ¹³ Piyapo jipi vae, agüiye vaerā ipitu vae opia Tumpa güi. Jucuarāi piyapo yave, pepuereta pembori ipitu vae ipirāta vaerā.

¹⁴ Piñemiatangātu pepiacatu vaerā opaete vae ndive, jare piñeñono tee vaerā Tumpa peguara. Echa'ā uñeniono tee Tumpa peguara vaeñio ipuere uecha yandeYa Tumpa. ¹⁵ Jare piñemoa, agüiye vaerā quía uyerova Tumpa ipiacavi güi, jare agüiye vaerā pembipi piñemitaréi. Echa'ā piñemitaréi yave, piyembiavaita co jare jeta vae iyoata. ¹⁶ Jare piñemoa, agüiye vaerā oī pepite pe aguasa uyapo vae, jare agüiye vaerā oī quía güiñiro uñeniono tee Tumpa peguara vae. Esaú jucuarāi uyapo. Echa'ā Esaú umeetí vi pe tembiú re Tumpa umeeta tēi Esaú pe vae. Echa'ā Tumpa umeeta tēi co chupe, Esaú co jae Isaac tai tenondegu ramo. ¹⁷ Jare picuua quirāi taicue rupi Esaú uipota tēi güiñoi Tumpa umeeta tēi chupe vae. ērei Isaac jei chupe ipuere'ā co güiñoi. Yepe tēi uyerure jese uyao reve, ērei ipuere'ā etei mbae uyapo. Tu jecuaeñio jei chupe ipuere'ā co güiñoi.

¹⁸ ērei pe reta mbaeti co Israel pegua ivitu guasu Sinaí iyipi pe ñugüiñoi vae reta rami. Echa'ā jocua ivitu guasu iñi pegua co. Israel pegua reta ipuere oya jocua ivitu guasu re. Jocua ivitu guasu re tata jendi oī. Pítumimbi oī jare ivitu ete joco pe. ¹⁹ Jare jae reta uyandu trompeta iñee jare Tumpa iñee. Jare Tumpa iñee uyandu ma yave, uyerure Moisés pe agüiye vaerā Tumpa uyemingueta ye chupe reta. ²⁰ Echa'ā Tumpa oyocui reta cuarāi. "Penti maemimba upiño yave cua ivitu guasu re, piyapita co ita pe piyuca." Cua mboroyocui yavai ete Israel pegua reta pe. ²¹ Opaete vae uquiyé ete uecha vae jeco pegua. Jare Moisés etei jei cuarāi: "Aquiye ete. Ariri ete aquiye ramo." Jucuarāi jei.

²² ērei pe reta peya ma ivitu guasu Sión re. Joco pe oī Tumpa imeño mai ico vae jenta guasu. Jae co Jerusalén ara pegua. Joco pe ñugüiñoi vi jeta ete ángel reta. ²³ Joco pe ñugüiñoi vi opaete Tumpa uiparavo tecove ipiāu vae güiñoi vaerā vae reta. Echa'ā Tumpa uicuatá jae reta jee ara pe. Opaete vae uyembati joco pe. Jare joco pe oī vi Tumpa - jae uāata opaete vae. Jare joco pe ñugüiñoi vi jipi vae reta iespíritu. Jae reta uyembiasaca ete ma. ²⁴ Jare joco pe oī vi Jesú. Echa'ā Jesú rupi ñanoj trato ipiāu vae. Jare joco pe oī vi Jesú jugiū jae yanderipi pipe vae. Jocua tugiū icavi ete tugiū Abel mbae uiipi pipe vae güi.

²⁵ Tumpa pemingueta oī. Piñemoa piyapo vaerā jae jei peve piyapo vaerā vae. Israel pegua reta uiporara uyapo'ā Tumpa iñi pe jei chupe reta uyapo vaerā vae ramo. Jae ramíño vi yande yaiporara eteta, yayapo'ā yave Tumpa jei yandeve yayapo vaerā vae. Echa'ā añañave Tumpa umingueta oī ara güi. ²⁶ Tumpa iñi pe umingueta yave, iñee umicáta iñi. ērei añañave jei cuarāi: "Tamicáta penti vese ye ivi jare ara." Jucuarāi jei. ²⁷ Jare cua penti vese ye jei vae uipota jei Tumpa umbaita co umicáta vae reta. Echa'ā Tumpa etei uyapo jocua reta. Jucuarāi uyapota Tumpa jecuaeñio ñugüiñoi vaerā ipuere'ā uñemicáta vae reta.

²⁸ Jare Tumpa umee yandeve yaico vaerā iporoyocua pe, jare iporoyocua ipuere'ā uñemicáta. Jáeramo ñamee yasurupai Tumpa pe ipiacavi re. Echa'ā Tumpa ipiacavi rupi yandepuere yayeyocui chupe, jare jucuarāi yambiyerovia. Jecuaeñio yayeyocui chupe yambiadora jare yaipi reve. ²⁹ Echa'ā Tumpa co jae penti tata opaete mbaembae uapi vae rami.

13

Quirāi pembiyerovia Tumpa

¹ Cherīvi reta, jecuaeño piyerau.

² Jecuaeño pequirēi pemingaru vaerā mboupa reta. Echa'ā jucuarāi amocue vae umingaru ángel reta uicuua mbae reve. ³ Jecuaeño pemandúa peresoríru pe ñugüinói vae reta re, pemanduata tēi co jese reta jae reta ndive peñ yave rami. Amocue vae uiporara ñugüinói íru vae reta uyapo icavi mbae vae chupe reta ramo. Pemandúa vi jese reta. Echa'ā pe reta vi pico cua ívi pe, jare aramoi íru vae reta uiporaracata peve vi jucuarāi.

⁴ Umenda vae reta jecuaeño tuyapo jupi vae güireco vae cotí. Agüiye quía tuyuvanga menda re. Echa'ā Tumpa uáata aguasa uyapo vae reta jare menda re uyuvanga vae reta.

⁵ Agüiye pico jecuaeño jeta corepoti pipota ete reve. Pemee yasurupai Tumpa pe mbaembæe penoi vae re. Agüiye piñemiro íru vae pe jeta'ā mbaembæe penoi ramo. Echa'ā Tumpa etei jei cuarāi: "Jecuaeño aicota nde ndive nombori vaerā." Jucuarāi jei. ⁶ Jáeramo yandepuere yae yaquiye mbae reve cuarāi:

"YandeYa chembori.

Ndarau aquiyé mbae güi.

Íru vae reta ndarau ipuere mbae uyapo cheve cheminguíye vaerā."

Jucuarāi yandepuere yae.

⁷ Piyapisaca cavi petenondegua reta iñee re. Echa'ā jae reta umimbeu peve Tumpa iñee. Pepurugüirovia jae reta upurugüirovia rami. Echa'ā picuua quirāi jae reta yugüireco umbiadoraca vaerā Tumpa. ⁸ Jesucristo uyepepica'ā etei. Iyipi güüre jare jaeñio mai pegua uyepepica'ā. ⁹ Ime amocue moromboe uyuaví vae ore ndoporombo'ā jese vae. Agüiye perovia jocua nunga moromboe. Echa'ā perovia yave, pepiata Tumpa güi. Icavi co ñañemimirāta vaerā yandepurugüirovia re Tumpa ipiacavi rupi. Ndarau yandepuere ñañemimirāta yandepurugüirovia re mboroyocui reta tembiú regua rupi. Echa'ā íru vae reta uipota tēi uñemimirāta ipurugüirovia re jocua rupi, ērei ipuere'ā.

¹⁰ Israel pegua reta jou maemimba uyeyucacue isoo Tumpa jo ívi pegua pe uñemeearenda pe. Yande vi ñanoj jocua maemimba uyeyucacue uñemeearenda rami vae, jare jae reta ipuere'ā uñemiríru yande ndive joco pe. ¹¹ Echa'ā sacerdote tenondegua güiraa maemimba uyeyucacue reta jugüü Lugar Santísimo japipe pe Israel pegua reta imbaeyoa reta re. Jayave íru vae reta güiraa maemimba uyeyucacue reta isoo tenta reta güi ñana pe uapi. ¹² Jáeramo Jesús vi umano uiporara reve tenta guasu güi ñana pe, ñaneñono tee vaerā Tumpa peguarā jae jugüü rupi. ¹³ Jáeramo yaeya yandeyugüi yandereco mai indechicue vae jare yaya Jesucristo re, yepe tēi íru vae reta ñanereríro güiríro Jesús rami. ¹⁴ Echa'ā mbaeti ñanoj penti tenta guasu jaeñio mai pegua oñ vae cua ívi pe. Ērei ñaáro ñaí jocua tenta guasu oñta vae. ¹⁵ Jáeramo jecuaeño yambiadora Tumpa Jesús rupi, yambiyerovia vaerā Tumpa. Cua uipota jei ñanemiri yave íru vae reta pe, yamimbeu chupe reta Tumpa regua. ¹⁶ Ērei agüiye ñaneatéi yayapo vaerā icavi vae jare ñamee vaerā mbaembæe iparavete vae reta pe. Echa'ā cua yayapo yave, yambiyerovia Tumpa.

¹⁷ Piyapisaca cavi petenondegua reta iñee re jare piyapo jae reta jei peve piyapo vaerā vae. Echa'ā jae reta uyandareco oñ perecove re, jare uicuua Tumpa uáata co iparavíqui re. Jucuarāi piyapo yave, jae reta uparavíquita Tumpa pe uyerovia reve, ipiatití mbae reve. Echa'ā ipiatití reve uparavíqui yave Tumpa pe, ndarau icavi peve.

¹⁸ Piyerure Tumpa pe oreré. Echa'ā nduicuua jecuaeño nduyapo icavi vae pecoti. Jecuaeño nduipota nduyapo jupi vae. ¹⁹ Jare che pumiñera ete piyerure vaerā Tumpa pe, jae chemondo ye vaerā imambæe pepi.

Tumpa ndiveño toñ

²⁰ Añiave ayerure Tumpa mbiacatu umee yandeve vae pe peré. YandeYa Jesús imbaepuere tuicha ete co, jare jae uyandareco yanderé penti ovecha reta iyandarecoa iovecha reta re uyandareco rami. YandeYa Jesús umano, Tumpa ipuere vaerā umee yandeve itrato opa mbae vae. Jáeramo Tumpa umbijecove ye güeru umanocue vae reta ipite güi. ²¹ Tumpa tuparavíqui pepia pe, piyapo vaerā icavi vae, jare jucuarāi piyapo vaerā jei vae. Tumpa tuparavíqui pepia pe Jesucristo rupi, pe reta piyapo vaerā jocua umbiyerovia Tumpa vae. Jesucristo tuyembidoraca jaeñio mai pegua. Amén.

²² Cherīvi reta, che pumiñera pepiaguas vaerā cua che jae peve piyapo vaerā vae re. Echa'ā mboviño aiciatía peve cua tupapire pe. ²³ Tamimbeu peve cua: Yanderiví Timoteo oñ ma peresoríru güi. Aramoi jae oota imambæe pepi. Jare che aata jae jupié.

²⁴ Tumpa ndiveño toñ opaete petenondegua reta jare opaete íru Tumpa oñono tee iyupeguarā vae reta. Italia pegua reta vi jei peve Tumpa ndiveño peí.

²⁵ Tumpa tumee opaete peve ipiacavi. Amén.

LA CARTA DE SANTIAGO

¹ Che co jae Santiago. Che co jae Tumpa jare yandeYa Jesucristo jembiocui. Aicuatía aí cua tupapire doce ati Israel pegua uñemíai ñugüínoi vae reta pe. Tumpa ndiveño peí.

Aracuaa Tumpa umee vae

² Cherivi reta, amo pe yavai ete peve pico cavi vaerã Tumpa coti. Ërei jucuarãi yave, piyerovia eteño. ³ Echa'ã picuua co quirãi mbaembæ pembiavai vae uicuaaca peve ipirãta co pepurugüïrovia. Jare cua picuua yave, pepiaguasu ucuaucuaa. ⁴ Ërei pemaeño pepiaguasu re ucuaucuaa cavi vaerã, pepiaguasu ete vaerã. Jucuarãi yave, ndarau mbae uata peve. Piyeyocui cavita Tumpa pe. ⁵ Ime yave quía aracuaa uata chupe vae, tuyerure Tumpa pe jese. Echa'ã Tumpa uipota ete umee aracuaa penti penti pe. Ndarau uñeengata quía pe mbaeti aracuaa güïnoi ramo. Umeeta co aracuaa chupe. ⁶ Ërei tuyerure Tumpa pe jese mburugüïrovia reve. Agüiye tuyerure chupe jese mburugüïrovia mbae reve. Echa'ã uyerure chupe jese mburugüïrovia mbae reve vae iaparao i guasu pe oí vae rami co. Echa'ã ivitu ueyepuy yave, coti coti güïraa. ⁷ Jocua uyerure yandeYa Tumpa pe aracuaa re mburugüïrovia mbae reve vae agüiye ipia pe tuyeminguela Tumpa umeeta co mbae chupe. ⁸ Echa'ã yepe têi uyerure Tumpa pe mbae re, ërei güïrovia'ã Tumpa umeeta co chupe. Jocua nunga uicuaa'ã etei mbae uyapo vaerã.

⁹ Penti upurugüïrovia vae iparavete vae tuyerovia jeta Tumpa umee chupe vae re. ¹⁰ Ërei upurugüïrovia vae icocatu vae tuyerovia Tumpa umimichi ramo. Echa'ã yepe têi icocatu, ërei umanota co penti mbaepotí umano rami. ¹¹ Guarasi jasi yave jare ivitu jacu ou yave, ñana ipiru jare mbaepotí reta umano. Ipõra'ã ma. Jae ramíño vi icocatu vae aramoíño umanota.

Ipiaguasu vae uicuaata ipurugüïrovia ipirãta co

¹² Tuyerovia ipiaguasu vae jocua mbaembæ umbiavai vae ou chupe yave. Echa'ã uicuaata ipurugüïrovia ipirãta co jare uñemeeta chuve tecove opa mbae vae. Echa'ã yandeYa jei umee vaerã tecove opa mbae vae opaete uau vae reta pe. ¹³ Ime yave quía yavai ete chupe ico cavi vaerã Tumpa coti vae, jare jocua jeco pegua uipota yave uyapo mbaeyoa, agüiye tei: "Tumpa uipota uyapo vaerã mbaeyoa." Echa'ã Tumpa uipota'ã etei uyapo mbaeyoa. Jae ramíño vi uipota'ã etei quía uyapo vaerã mbaeyoa. ¹⁴ Ërei penti penti ipiyemingueta icavi mbae vae rupi uipota uyapo mbaeyoa. Echa'ã jocua mbaeyoa icavi etcha chupe uyapo vaerã. ¹⁵ Ipiyemingueta icavi mbae vae reta uyapoca mbaeyoa reta. Jare taicue rupi mbaeyoa upuruyuca.

¹⁶ Agüiye petaví, cherivi reta aau vae. ¹⁷ Tumpa umee mbaembæ yandeve ipiacavi ramo, jare opaete umee yandeve vae icavi ete co. Jae uyapo tembipe jare ueyepicá'ã etei. Jecuaeño ipiacavi yandeve. ¹⁸ Tumpa uipota ramo, yandeano tâi retardã ñee añete vae rupi, ñaneñono tee vaerã iyupeguarã, mbae yagüiye vae reta tenondeguia vae Tumpa pe uñenono tee rami.

Piyapo ñee piyapisaca jese vae

¹⁹ Jáeramo, cherivi reta aau vae, penti penti tuipota ete tuyapisaca, agüiye tiñee rai, agüiye tipochi rai. ²⁰ Echa'ã pochi vae ndarau uyapo jupi vae Tumpa uipota têi uyapo vaerã vae. ²¹ Jáeramo peeya opaete pichii vae jare opaete icavi mbae vae. Jare perovia piñemimichi reve ñee pepia pe uñenono vae. Echa'ã jucuarãi yave, piyembiasacata co.

²² Ërei piyapo ñee piyapisaca jese vae. Agüiye piyapisacaiño jese. Echa'ã piyapisacaiño yave ñee re, piyembitavíño co peí. ²³ Ime yave quía ñee uyapisaca jese vae uyapo'ã vae - uyapisacaiño jese - jae co espejo pe umae iyee vae rami. ²⁴ Yepe têi umae ma iyee, ërei joco güi oo rupive ñacañi uyeecha vae güi. ²⁵ Ërei ime yave quía jecuaeño mboroyocui icavi ete vae oporoyora vae re uyapisaca cavi vae, ñacañi'ã yave uyapo vaerã mboroyocui jei vae uyapisaca jese yave, Tumpa umivendiseta uyapo ramo.

²⁶ Ime yave quía mbaembæ uyapo vae rupi Tumpa pe uyeyocui etcha vae, tuñemoa cavi mbae jei vae re. Echa'ã uñemoa cavi'ã yave mbae jei vae re, uyembitaví co oí, jare mbaembæ uyapo vae umbiyerovia'ã etei Tumpa. ²⁷ Añetete yaipota yave yayapo mbaembæ yayeyocui vaerã yandeRu Tumpa pe, yaa yapou tirëi reta jare cuña ime umano vae reta uiporara ñugüínoi vae ipi, jare agüiye yayapo icavi mbae vae upurugüïrovia mbae vae reta uyapo vae.

güünoi ipoācaregua oro pegua vae. Êrei cuimbae iparavete vae jemimonde indechi ete. ³ Pemae cavi yave jemimonde ipōra ete vae re jare pere yave chupe: "Eguapí cua pe. Cua tenda icavi co"; jare pere yave iparavete vae pe: "Iyemboi joco pe"; ani: "Eguapí iví pe", ⁴ pipiú co peñ jocua icocatu vae jare períro co peñ iparavete vae. Icavi'á jucuarái pepuruyapo vaerä. Icavi mbae co pepia pe piyemingueta.

⁵ Piyapisaca cheré, cherívi reta aau vae. Tumpa uiparavo iparavete vae reta icocatu vaerä ipurugüirovia re jare güünoi vaerä imbaerä iporoyocua pe. Echa'á jocua Tumpa jei umeeta opaete uau vae reta pe. ⁶ Êrei pe reta períro iparavete vae reta. Picuua co quirräi icocatu vae reta uyembiiya pembaembae re jare uñeapo peré. ⁷ Tumpa peparavo Jesucristo jee re. Êrei picuua co quirräi icocatu vae reta jei icavi mbae vae jocua tee icavi vae cotí.

⁸ Tumpa iñee pe uyecuatía oí cuarái: "Eau nderapicha nde ndiyerau rami." Cua co jae mboroyocui Tumpa iporoyocua pegua. Piyapo yave cua mboroyocui, piyapo co icavi vae. ⁹ Êrei piparavo yave pipiú vaerä icocatu vae reta jare períro vaerä iparavete vae reta, piyapo mbaeyoa. Echa'á mboroyocui uicuaaca peve piyavi co mboroyocui. ¹⁰ Ime yave quía opaete mboroyocui jei vae uyapo cavi vae, penti uyavi yave, uyaví ma opaete mboroyocui. ¹¹ Mboroyocui pe uyecuatía oí cuarái: "Agüiye iyuvanga menda re." Êrei jae ramíño vi uyecuatía oí cuarái: "Agüiye epuruyuca." Aramoi nde ndiyuvanga'á menda re. Êrei indepuruyuca yave, ndiyavi ma mboroyocui. ¹² Tumpa peráata mboroyocui oporoyora vae rupi. Jáeramo piyemingueta cavi jare piyapo icavi vae. ¹³ Echa'á ime yave quía uiparareco'ájapicha vae, Tumpa uáata uiparareco mbae reve, yepe téis Tumpa upuruparareco uyerovia reve upuruáa yave.

Mburugüirovia jare mboroyocui jei vae

¹⁴ Cherívi reta, aramoi quía jei güünoi co mburugüirovia, êrei uyapo'á mboroyocui jei vae. Jucuarái yave, ipurugüirovia mbae'á co. Ndaraa uyembiasaca ipurugüirovia rupi. ¹⁵ Aramoi penti periví ani penti perindi mbaeti güünoi jemimonderä jare jemburä. ¹⁶ Pere yave chupe: "Tumpa reño ecua", êrei pemee'á yave chupe mbaembae uata chupe vae, jocua pere vae mbae'á co. ¹⁷ Jae ramíño vi piyapo'á yave mboroyocui jei vae, jaéñi mburugüirovia penoi, jare jocua mbae'á co.

¹⁸ Aramoi quía jeita: "Nde ndere neno co mburugüirovia jare che jae ayapo mboroyocui jei vae." Nde ndepuere'á ndicuaaca cheve ndepurugüirovia. Echa'á ndiyapo'á mboroyocui jei vae. Êrei che aicuaacata ndeve chepurugüirovia mboroyocui jei vae ayapo vae rupi. ¹⁹ Nde nderovia ime co pentiño Tumpa. Icavi co jocua nderovia vaerä. Êrei aria reta vi güürovia jocua. Êrei jae reta uriri uquiyre ramo. ²⁰ Nde co jae iyaracuua mbae vae. ¿Ndipota pa aicuaaca vaerä ndeve quirräi ndepurugüirovia mbae'á co, ndiyapo'á yave mboroyocui jei vae? ²¹ Nemandúa yandetenondegua Abraham re. Jae uyembujupica uyapo vae re, umee tai Isaac Tumpa pe uñemearenda pe yave. ²² Ndepuere ndicuaa quirräi Abraham ipurugüirovia uyapoca chupe Tumpa jei chupe uyapo vaerä vae. Abraham uyapo vae uicuaaca icavi ete co ipurugüirovia. ²³ Jare uyeyapo Tumpa iñee pe uyecuatía oí vae. Echa'á uyecuatía oí cuarái: "Abraham güürovia Tumpa, jare Tumpa umbujupi ipurugüirovia jeco pegua. Jare Abraham uyembijee Tumpa iamigo pe." Jucuarái uyecuatía oí. ²⁴ Jáeramo pepuere picuua quirräi Tumpa umbujupi mboroyocui jei vae uyapo vae. Umbujupi'á mburugüiroviaño güünoi vae.

²⁵ Jae ramíño Rahab aguasa rupi ico vae uyembujupica uyapo vae re, Israel pegua reta Josué omondo vae re umaeño upita vaerä jenta pe yave jare omundo ye ambié tape rupi yave.

²⁶ Pentí jete tecove mbaeti güünoi vae umano ma co. Jae ramíño vi ndepurugüirovia mbae'á co, ndiyapo'á yave mboroyocui jei vae.

3

Ñanecü

¹ Cherívi reta, agüiye pipota opaete piyeyapo vaerä oporomboe vae retarä. Echa'á picuua quirräi oporomboe vae reta uyaví yave, uyembijeco ete íru vae reta güü. ² Echa'á yande opaete yayaví. Ime yave quía uyaví'á jei vae re vae, jae icavi ete co. Jocua nunga güünoi mbaepuere opaete jete re. ³ Mase, ñañono cavayu reta iyuru pegua iyuru pe, jae reta yugüüraa vaerä yaipota vae cotí. Jucuarái yandepuere yaravarova cavayu reta. ⁴ Jae ramíño vi yepe téis chalana guasu reta tuicha ete jare yepe téis amo pe ivitú tanta vae güüraa i guasu rupi, yepe téis chalana guasu itimón michi ete, êrei pipe chalana guasu uruguata vae ipuere güürovarova chalana guasu jae uipota vae cotí. ⁵ Jae ramíño vi ñanecü michi co, êrei pipe yandepuere yayembicate ete.

Penti tata michi ete jendí vae ipuere uapi ñuu guasu. ⁶ Jare ñanecü penti tata ramí co. Uyapoca jeta ete icavi mbae vae. Yepe téis yanderete pegua co, êrei uyapo icavi mbae vae opaete yanderete pegua pe. Echa'á tata mbaembae uapi ramí, ñanecü uyapoca yandevi icavi mbae vae. Jare cua icavi mbae vae ou cañitei güü etei. ⁷ Iví pegua reta umimaso ma ipotave maemimba reta, jare güüra reta, jare mboi reta, jare jevae i ruguia reta. Güünoi reta mbaepuere umimaso vaerä. ⁸ Êrei yandepuere'á etei ñamimaso

ñanecū. Yandepuere'ā jese. Jecuaeño uyapoca yandeve jeta ete icavi mbae vae. Imbayachi ete vae ramí co. ⁹ Ñanecū pe yambiadora yandeRu Tumpa. Jae ramíño vi ñanecū pe yayepipeyu ūru vae reta re, yepe tēi Tumpa uyapo reta jae etei ramí. ¹⁰ Ñanecū pe yambiadora Tumpa jare yayepipeyu ūru vae reta re. Cheriví reta, icavi'ā yayapo vaerā cuarāi. ¹¹ Icavi vae jare i iro vae ipuere'ā etei oē penti icua i oē vae güiño. ¹² Iva ipuere'ā etei umee saini reta. Jae ramíño vi uva ipuere'ā etei umee iva reta. Jae ramíño vi penti icua i oē vae ipuere'ā etei umee i icavi vae jare i iro vae.

Piyerure Tumpa pe aracuaa re

¹³ Ime yave quía pepite pe iyaracuaa vae, tuico cavi. Jucuarāi yave, icavi vae uyapo vae uicuaacata quirāi iyaracuaa co uñemimichi reve. ¹⁴ Èrei peacatāa yave ūru vae reta re jare pepochi yave chupe reta, agüiye piyembicate. Echa'ā piyembicate yave, peapu co. Piyapo'ā pei añete vae rupi. ¹⁵ Jucuarāi piyapo yave, piyerure'ā pei Tumpa pe umee vaerā peve aracuaa. Pico upurugüirovia mbae vae reta yugüireco ramí. Pico pere vae reño. Pico aña reta yugüireco ramí. ¹⁶ Echa'ā peacatāa yave ūru vae reta re jare pepochi yave chupe reta, piñerārota uyupii jare piyapota opaete mbae icavi mbae vae. ¹⁷ Èrei piyerure yave Tumpa pe umee vaerā peve aracuaa, ndaraú piyapo pichīi vae. Pepiacatua co. Pepiaguasuta co. Piypota co Tumpa uipota piyapo vaerā vae. Pipararecota co opaete vae. Pepiacavita co. Pepirāta co pepurugüirovia re. Ndaraú pepurumbitavi. ¹⁸ Pe reta penoi yave mbiacatu, pico pepiacatu reve. Jucuarāi yave, piyapota jupi vae.

4

Cua ivi pegua iamigo oyovaicho Tumpa ndive

¹ ¿Maera pa piñerāro uyupii? Tamimbeu peve. Piñerāro uyupii, ime ñugüinoi icavi mbae vae pepia pe ramo. ² Pipota tēi mbaembae, èrei penoi'ā. Pepuruyuca jare jecuae pipota tēi mbaembae, èrei pepuere'ā penoi. Piñerāro uyupii. Èrei penoi'ā, piyerure'ā Tumpa pe jese ramo. ³ Piyerure tēi mbaembae re Tumpa pe, èrei jae umee'ā peve. Piyerure cavi'ā. Echa'ā piyerure mbaembae re piporu vaerā pepia jei vae reño. ⁴ Pe reta menda re uyuvanga vae reta ramí co. ¿Picuaa'ā pa quirāi cua ivi pegua iamigo oyovaicho Tumpa ndive? Jáeramo pipota yave piyeyapo ivi pegua iamigorā, piyeyapota co Tumpa jovaichorā. ⁵ Añete vae co cua Tumpa iñee pe uyequatía oī vae: "Espíritu Santo yandepia pe ico vae yanderau ete." Jucuarāi uyequatía oī. ⁶ Èrei Espíritu Santo umee yandeve jeta ete ipiacavi. Echa'ā Tumpa iñee pe uyequatía oī cuarāi: "Tumpa oyovaicho uyembicate vae reta ndive. Èrei umee ipiacavi uñemimichi vae reta pe." Jucuarāi uyequatía oī.

⁷ Jáeramo piyapo Tumpa uipota piyapo vaerā vae. Piñerāro aña guasu ndive, jare jae osita pegüi. ⁸ Peya Tumpa re jare Tumpa oyata peré. Pe reta co jae iyoa vae reta. Agüiye ma piyapo pichīi vae. Piyoce pepia agüiye vaerā penoi pepiayeminguela icavi mbae vae. ⁹ Pepiatiti jare piyao. Pepiatiti pepuca vaerāve. Pepiatiti piyerovia vaerāve. ¹⁰ Piñemimichi yandeYa jovai, jare jae pembutuichacata.

Agüiye pere icavi mbae vae uyucoti

¹¹ Cheriví reta, agüiye pere icavi mbae vae uyucoti. Ime yave quía jei icavi mbae vae tivi coti vae, uāa co oī tivi. Jocua nunga jei oī icavi mbae vae mboroyocui coti jare uāa co oī mboroyocui. Èrei neāa yave mboroyocui, ndiyapo'ā mboroyocui jei vae. Jaeño neāa mboroyocui. ¹² Jaeño Tumpa umee mboroyocui jare ipuere upuruāa. Jae ipuere upurumbiasa jare ipuere upurumbai. Nde ndepuere'ā etei ndepuruāa.

Picuaa'ā mbae ra uyeyapota piareve pe

¹³ Piyapisaca michi pegua cua re. Echa'ā pe reta pere cuarāi: "Añave ani curiye yaata jocua tenta guasu pe, jare yaicotá joco pe penti año pegua. Yaguata mbaembae jare ñameeta mbaembae ñamingana vaerā corepoti." Jucuarāi pere. ¹⁴ Èrei pe reta picuaa'ā mbae ra uyeyapota piareve pe. Picuaa'ā imenota ra pei piareve pe. Echa'ā perecove ivi tivi ramí co. Uyecuaa michi peguaño. Jayave ìmambae mbaeti ma oī. ¹⁵ Jáeramo pereta tēi cuarāi: "YandeYa uipota yave, yaicotá joco pe jare yayapota jocua jocua." Jucuarāi pereta tēi. ¹⁶ Pere'ā yave jucuarāi, piyembicate co pei pe reta etei piyapota vae re. Jare jucuarāi piyembicate yave, piyapo icavi mbae vae.

¹⁷ Jáeramo picuaa yave mbae icavi piyapo vaerā vae, piyapo'ā yave, peyao co.

5

Icocatu vae icavi mbae vae uyapo vae reta

¹ Piyapisaca michi pegua, picocatu vae reta. Piporara eteta co. Jáeramo piyao pesapicai reve. ² Jeta ete penoi vae jepita'ā mbae ave, jare cupii reta urucumeguata peremimonde ipōra ete vae reta. ³ Oro jare corepoti penoi vae opata iyuquiri. Jare jocua uicuaacata pe reta piyapo co icavi mbae vae. Jáeramo piporarata co, tata yanderapi yave yaiporara ramí. Picocatu co. Èrei ndaraú penoi ara reta piyerovia vaerā jeta ete penoi vae re. ⁴ Mase, uparavíqu peve vae reta umbaeviro peco reta pe, èrei pembiepi'ā

chupe reta. Jae reta iñeenguenta peve. Jare yandeYa uyandu ma quirāi iñeenguenta peve jocua umbaeviro vae reta.⁵ Cua ivi pe pico rambueve, piyecou tembiú icavi vae pe jare piporu pecorepoti piyapo vaerā jeta icavi mbae vae. Piyeminguira ma co. Ërei imambae pemanota.⁶ Pe reta pembijeco jocua jupi vae jare piyuca vi. Jare jae ipuere'á uyerepi pegüi.

Pepiaguasu jare piyerure Tumpa pe

⁷ Jáeramo, cheriví reta, pepiaguasu yandeYa ou ye regua. Tamijaanga umaeti vae. Umaeti yave, uáro íma güiñoi vaerā mbaeviro. Ipiaguasu ete. Echa'á oquíñoi yave, temiti ucuacuaa jare yagüiye.⁸ Jae ramíño vi pe reta pepiaguasu. Jecuaeño piñemiatangátu. Echa'á uyaro ma yandeYa ou ye vaerā.

⁹ Agüiye piñeenguru piyupe, cheriví reta. Echa'á piñeenguru yave piyupe, piyembijecota. Echa'á upuruáa vae imambae outa uváe.¹⁰ Cheriví reta, pemandúa Tumpa iñee aracaé umimbeu vae reta re. Jae reta imari íru vae reta pe yandeYa jee re. Jae reta uicuaaca yandeve quirái yaiporara yave, icavi co ñamiaguanta vaerā yandepiaguasu reve.¹¹ Añete co, yande yae uyerovia ma co jucuarái umiaguanta vae reta. Picuua co quirái Job ipiaguasu ete, jare quirái yandeYa umivendise ete taicue rupi. Echa'á yandeYa yanderau jare yandeparareco ete.

¹² Ërei, cherivi reta, agüiye mbae pere ara jee re ani ivi jee re ani mbae jee re ave. Pere "añete co" ani "añete'á co." Uasa pere yave, peyoata co jare Tumpa peráata co.

¹³ Ime yave quía pepite pe uyemipiá oí vae, tuyerure Tumpa pe. Ime yave quía pepite pe uyerovia vae, tumbiadura Tumpa canta pe.¹⁴ Ime yave quía pepite pe imbaerasi vae, tueni upurugüirovia vae reta itenondeguia reta. Jayave jae reta toñono aceite imbaerasi vae re yandeYa jee re, jare tuyerure Tumpa pe jese.¹⁵ Jare mburugüirovia reve uyerure reta yave, imbaerasi vae ucuerata. Echa'á yandeYa umbigüerata. Jare imbaerasi vae uyapo yave mbaeyoa reta, Tumpa umbiásata chupe.¹⁶ Peyoa yave uyucoti, pemimbeu piyupe. Jayave piyerure piyee Tumpa pe, Tumpa pembigüera vaerā. Penti jupi vae uyerure yave ipia reve, Tumpa uyapota jeta ete chupe.¹⁷ Elías co jae penti ivi pegua yande ramí. Ërei jae uyerure ipia reve Tumpa pe agüiye vaerā oqui. Jare oqui'á etei mbapi año jare seis yasi.¹⁸ Jayave Elías uyerure ye Tumpa pe jare uyemipi oqui jare temiti ucuacuaa ye.

¹⁹ Cheriví reta, ime yave quía pepite pe añete vae güi opia vae, jare íru vae ombori yave umiñatima ye vaerā añete vae pe,²⁰ picuua cua: Jocua oporombori vae uepi opia vae jecove mano güi, jare jucuarái ombori ramo, Tumpa umbiásata opia vae pe opaete imbaeyoa.

PRIMERA CARTA DEL APOSTOL SAN PEDRO

¹ Che co jae Pedro. Che co jae Jesucristo jemimondo. Aicuatía aí cua tupapire opaete Israel pegua Ponto jare Galacia jare Capadocia jare Asia jare Bitinia rupi uñemai vae reta pe. ² YandeRu Tumpa preparavo jare ndei ívi uyeyapo mbove uicuua pe reta piyeyapota co tai retardā. Jare Espíritu Santo peñono tee Tumpa peguarā. Oyoe ma pepia Jesucristo jugüi pe. Jáeramo añave piyapo Tumpa uipota piyapo vaerā vae. Tumpa tumee peve jeta ete ipiacavi jare ipiacatu.

Ñaáro ñaí yayerovia reve

³ Tuyembidoraca Tumpa. Jae co yandeYa Jesucristo Tu. Jae yandeparareco ete. Jáeramo yandeyapo tai retardā. Jare Jesucristo ico ye ou umanocue vae reta ipite güi ramo, añave ñaáro ñaí yayerovia reve.

⁴ Tumpa uñuvatu ma peve ara pe pembaarä. Jocua icavi ete co. Ipuere'ä etei ueyepepica jare ndarau etei ope. ⁵ Jare imbaepuere pe Tumpa uyandareco oí peré perovia jese ramo. Jáeramo piyembiasacata. Cua uycuacata ara taicuegua reta pe.

⁶ Jáeramo piyervia ete cua re, yepe tēi aramoi añave michi pegua pepiatiti mbaembae yavai peve vae jeco pegua. ⁷ Echa'ä cua mbaembae yavai peve vae uicuacata peve ipiräta ra pepurugüirovia. Oro yambichirirata pe, yandepuere vaerā yamombo chugüi iquiacue, ipöra ete oí vaerā oro, yepe tēi oro opata. Jae ramiño vi Tumpa uipota ipiräta ete vaerā pepurugüirovia. Echa'ä pepurugüirovia icavi ete Tumpa pe oro güi. Jare pepurugüirovia ipiräta yave, piyembutuichaca eteta co Jesucristo uycuua ye yave. ⁸ Yepe tēi peeche'ä Jesucristo, ērei peau. Yepe tēi añave peeche'ä, ērei perovia jese. Jáeramo piyervia ete. Tumpa etei umee peve cua yerovia, jare yavai pemimbeu cavi vaerā ūru vae reta pe cua yerovia regua. ⁹ Jare perovia Jesucristo re ramo, Tumpa umeeta peve piyembiasaca vaerā.

¹⁰ Tumpa iñee aracae umimbeu vae reta uicuatiá mbiacavi Tumpa umeeta peve vae re. Jae reta uipota ete uicuua yembiasa uñemeeta peve vae regua, jare upirandu ete uyupe jese. ¹¹ Cristo iEspíritu ico jae reta ipia pe jare umimbeu ndei uyeyapo mbove quiräi Cristo uiporarata jare quiräi taicue rupi uyembidoracata. Jare jae reta upirandu tēi uyupe mbae ra uipota jei Espíritu Santo jare quiräi yave ra uyeyapota. ¹² Tumpa uicuacaca chupe reta jocua uicuatiá vae yandeve peguarā co - iyupeguarā'ä co. Jare Jesucristo ombou Espíritu Santo ara güi jemimondo reta pe, jae reta umimbeu vaerā peve ñee icavi vae. Jare ángel reta uipota ete uicuua cua mbaembae regua.

Pico peyoa mbae reve

¹³ Jáeramo pepia pe piyeminguela cavi cua re. Piñemoa. Jecuaeñoi peáro piyervia reve mbiacavi Jesucristo uycuua ye yave uñemeeta peve vae. ¹⁴ Pe reta co jae Tumpa tai reta. Jáeramo piyapo jae uipota piyapo vaerā vae. Tenonde yave pico pe pere vae reño, picuual'ä Tumpa ramo. Agüiye ma pico jucuaräi. ¹⁵ Tumpa preparavo, jare Tumpa iyoa mbae vae co. Jáeramo opaete mbae piyapo vae pe pico peyoa mbae reve. ¹⁶ Echa'ä Tumpa iñee pe uycuatiá oí cuaräi: "Pico peyoa mbae reve" —jei Tumpa—. "Echa'ä che co jae iyoa mbae vae." Jucuaräi uycuatiá oí.

¹⁷ Jare pemandúa quiräi piyerure yandeRu pe yave, piyerure peñau'ä penti vaeño ūru vae güi vae pe. Jae upuruáata opaete vae uyapo vae rupi. Jáeramo cua ívi pe pico rambueve, pequiye chugüi.

¹⁸ Tenonde yave pe reta pico petenondegua reta iyemboe rupi. ērei mbaerä'ä co pico. Añave Tumpa perepi jocua güi. ērei piyerepi'ä corepoti jare oro pe. Echa'ä corepoti jare oro opata co. ¹⁹ Tumpa perepi Cristo jugüi pe. Jocua jugüi icavi ete Tumpa pe. Echa'ä Cristo uñemee umano vaerä, Israel pegua reta penti ovecha-rai icavi ete vae umee Tumpa pe rami. ²⁰ Tumpa uiparavo Cristo umano vaerä ndei ívi uyeyapo mbove. ērei cua ara taicuegua reta pe ramo Cristo ou ívi pe umano vaerä peré. ²¹ Jare pe reta perovia Tumpa re Cristo jeco pegua. Echa'ä Tumpa umbijecove ye Cristo güeru umanocue vae reta ipite güi jare umbidoraca ma. Añave perovia ma Tumpa re, jare pepuere peáro piyervia reve jae perepi ete vaerä.

²² Espíritu Santo pemberi perovia vaerä añete vae. Jáeramo añave pepia uyeyoe jare cua jeco pegua añetete piyerau. Jáeramo jecuaeñoi piyerau opaete pepia reve. ²³ Penoi ma tecove ipiau vae. Cua nunga tecove ou'ä Peru jare pesi güi. Echa'ä tecove jae reta umee peve vae opata. ērei tecove ipiau vae ndarau etei ope. Penoi tecove ipiau vae Tumpa iñee rupi. Tumpa iñee jecuaeñoi umee tecove jare ndarau etei ope. ²⁴ Tumpa iñee pe uycuatiá oí cuaräi:

"Ívi pegua reta temiti reta rami co.

Echa'ä temiti ipotí yave, ipöra co.

Ērei temiti umano yave, umano vi ipotí.

Jae ramiño vi yepe tēi ívi pegua reta uyembutuicha, ērei opata co ipiräta.

²⁵ ērei yandeYa iñee ndarau etei ope."

Jucuarāi uyecuatía oī. Jare cua co jae ñee icavi vae īru vae reta umimbeu peve vae.

2

¹ Jáeramo agüiye piyapo icavi mbae vae. Agüiye piyembitavi. Agüiye piñeacatāa. Agüiye pendayepota. ² Sambiai oa ramo vae reta jou neche jare jucuarāi ipirāta. Jae ramiño vi pequirēi reve piyemboe Tumpa iñee re pepirāta vaerā pepurugüirovia re. ³ Echa'ā picuua ma yandeYa ipiacavi co peve.

Ita icove vae

⁴ Jecuaeño peya yandeYa re. Jae co jocua ita icove vae. Ivi pegua reta omombo jocua ita. Ërei Tumpa uiparavo. Echa'ā uau ete. ⁵ Jae ramiño vi pe reta co jae ita icove vae reta rami. Piyeyapo ma penti tenta Espíritu Santo uyapo oī vae rami. Tumpa peñono tee iyupeguarā. Piyeyapo ma sacerdote retarā. Echa'ā sacerdote reta Israel pegua urnee Tumpa pe maemimba uyeyucacue reta. Jae ramiño vi pe reta piyapo Espíritu Santo uipota piyapo vaerā vae. Jucuarāi yave, pembiyeroviata Tumpa Jesucristo rupi. ⁶ Echa'ā Tumpa iñee pe uyecuatía oī cuarāi:

“Mase” —jei Tumpa—, “añono Jerusalén pe ita tenondegua vae.

Che aiparavo jare aau.

Güirovia jese vae ndarau etei jei: ‘Agüiyeta tēi arovia jese.’ ”

Jucuarāi uyecuatía oī. ⁷ Pe reta peau, perovia jese ramo. Ërei güirovia'ā jese vae reta pe tae cua Tumpa iñee pe uyecuatía oī vae:

“Ita tenta iyapoa reta omombo vae uyeyapo ma ita tenondegua vae.

⁸ Jae co penti ita ivi pegua reta ipisapaa jese vae rami.

Uyepiaca reta jocua ita re.”

Jucuarāi uyecuatía oī. Echa'ā jae reta uicuua cavi'ā Tumpa iñee, güirovia'ā Jesucristo re ramo. Tumpa uipota jucuarāi uyeyapo vaerā.

Pe reta co jae Tumpa uiparavo vae reta

⁹ Ërei pe reta co jae Tumpa uiparavo vae reta. Pe reta piyeyocui Tumpa pe iporoyocuia pe. Tumpa peñono tee iyupeguarā pico vaerā jae imbaerā. Jucuarāi Tumpa uyapo pe reta pemimbeu vaerā īru vae reta pe quirāi Tumpa ipiacavi co jare quirāi jae preparavo pico vaerā jae jembipe icavi ete vae pe, agüiye vaerā pico pñumimbi pe. ¹⁰ Tenonde yave pe reta Tumpa jentará reta'ā co. Ërei piyeyapo ma Tumpa jentará retarā. Tenonde yave Tumpa preparareco'ā. Ërei añave preparareco.

Piyeyocui cavi Tumpa pe

¹¹ Cherivi reta, pe reta pico'ā upurugüirovia mbae vae reta yugüireco rami, jare michi peguaño picota cua ivi pe. Jáeramo agüiye pico pe pere vae reño. Echa'ā perete perecove jovaicho co. ¹² Piyapo icavi vae upurugüirovia mbae vae reta ipite pe. Echa'ā jucuarāi piyapo yave, yepe tēi jae reta jei icavi mbae vae pecoti, ërei uechata icavi vae piyapo vae, jare jocua jeco pegua umbiadorata reta Tumpa, ou uvāe yave ara Tumpa uāa reta vaerā.

¹³ Piyapo opaete ivi pegua mboroyocui reta. Echa'ā cua yandeYa jei vae co. Jáeramo piyapo peruvicha guasu jei peve piyapo vaerā vae. Echa'ā jae co opaete perentaigua reta juvicha guasu. ¹⁴ Piyapo vi peruvicha reta jei peve piyapo vaerā vae. Echa'ā peruvicha guasu ombou reta peve uiporaraca vaerā icavi mbae vae uyapo vae reta pe jare umbutuichaca vaerā icavi vae uyapo vae reta. ¹⁵ Iyaracuua mbae vae reta jei icavi mbae vae pecoti, pecuaalā ramo. Jáeramo piyapo icavi vae agüiye vaerā ipuere reta jei jucuarāi. Echa'ā cua co jae Tumpa jei vae. ¹⁶ Tumpa perepi ma mbaeyoa güi. Ërei agüiye piyapo icavi mbae vae Tumpa perepi ma mbaeyoa güi ramo. Echa'ā Tumpa perepi mbaeyoa güi, piyeyocui vaerā chupe. ¹⁷ Pipiu opaete vae. Peau opaete upurugüirovia vae reta. Pequije Tumpa güi. Pipiu peruvicha guasu.

¹⁸ Che tae uyeyocui vae reta pe cua: Piyapo pepatrón jei peve piyapo vaerā vae pipiu reve. Amocue pepatrón reta ipiacavi jare ipiaguasu peve. Ërei yepe tēi amocue pepatrón reta uyapo icavi mbae vae peve, ërei jeseve piyapo jei peve piyapo vaerā vae. ¹⁹ Piyapo yave picuua Tumpa uipota piyapo vaerā vae, jare piporara yave jocua jeco pegua, pembiyeroviata Tumpa. ²⁰ Ërei piyapo yave icavi mbae vae, pepatrón uiporaracata peve. Jare yepe tēi piporara pepiaguasu reve, ërei ndarau piyembutuichaca. Ërei pepatrón uiporaraca yave peve, yepe tēi piyapo icavi vae, piporara yave pepiaguasu reve, pembiyeroviata Tumpa. ²¹ Echa'ā cuarā Tumpa preparavo. Echa'ā Cristo uiporara peré, pe reta piyapo vaerā jae uyapo rami. ²² Echa'ā Cristo iyoa'ā. Upurumbitav'iā etei. ²³ Yepe tēi īru vae reta jei icavi mbae vae icoti, ërei Cristo jei'ā icavi mbae vae icoti reta. Uiporara oī yave, jei'ā uiporaracata co uiporaraca chupe vae reta pe. Jaeño oñono Tumpa ipo pe. Echa'ā uicuua Tumpa upuruāa jupi vae rupi. ²⁴ Cristo etei güirra yanembaeyoa reta jete re jocua curus re, yande ñamano vaerā mbaeyoa reta güi jare yaico vaerā jupi vae re. Jae umano ramo, yande ñanoi tecove opa mbae vae. ²⁵ Echa'ā tenonde yave pe reta

pepia Tumpa güi, ovecha reta tape güi opia rami. Ërei añave peyu ye ma uyandareco perecove re vae pe, ovecha reta yugüeru ye iyandarecoa pe rami.

3

Umenda vae reta tuyugüireco cavi uyupii

¹ Jae ramíño vi cuña reta tuyeyocui ime pe. Echa'ã jucuarãi yave, yepe tẽi ime güirovia'ã Tumpa iñee, Ërei aramoi jembireco ipuere güiroviaca ime pe Tumpa iñee umimbeu'ã chupe reve. Echa'ã ime uechata quirãi icavi ico jembireco. ² Uechata quirãi jembireco ico cavi uipiu reve, jare quirãi uyapo'ã mbae pichii vae. ³ Cuña reta agüiye tuipota tuñemopõra ete mbaembae jete re uyecuaa vae peño. Echa'ã amocue cuña reta uyapicatu cavi ía jare oñono iyee mbaembae oro pegua vae jare omonde temimonde jepi ete vae uñemopõra vaerã. ⁴ Ërei cuña reta tuipota tuñemopõra icavi vae ipia pe oĩ vae pe. Echa'ã jocua mbaembae jete re oĩ vae opata co. Ërei icavi vae ipia pe oĩ vae ndarau opa. Jáeramo tuñemimichi jare agüiye tuñeengata ime pe. Echa'ã cua icavi ete Tumpa pe. ⁵ Aracae yave cuña güirovia Tumpa re vae reta uñenono tee Tumpa peguarã, jare jae reta vi uñemopõra icavi vae ipia pe oĩ vae pe. Echa'ã jae reta vi uyeyocui ime pe. ⁶ Sara uyeyocui Abraham pe jare jei chupe: "Cheya." Jáeramo cuña añave güirovia Tumpa re vae reta Sara rami co, icavi vae uyapo reta yave. Jare jucuarãi uyapo yave, ndarau uquie mbaembae güi.

⁷ Jae ramíño vi cuimbæ reta tuyugüireco cavi jembireco ndive. Tuyandareco cavi jese jare tumbutuicha. Timandúa quirãi cuimbæ ipirãta ete cuña güi. Echa'ã Tumpa uyapo cuimbæ jare jembireco penti ramíño jare umee mocui reve pe yugüireco vaerã ipiacavi rupi. Cuimbæ reta jucuarãi yugüireco yave, Tumpa uyapisacata iyerure reta re.

Pico cavi uyupii

⁸ Cuaño ma tamimbeu ye peve. Pico cavi penti ramíño. Pepiacavi piyupe. Piyerau. Piyeparareco. Piñemimichi. ⁹ Íru vae uyapo yave icavi mbae vae peve, agüiye piyapo icavi mbae vae chupe. Jae ramíño vi íru vae uñeengata yave peve, agüiye piñeengata chupe. Piñeengata vaerãvye piyerure Tumpa pe jese, Tumpa uyapo vaerã icavi vae chupe. Echa'ã cuarã Tumpa peparavo, ipuere vaerã uyapo icavi vae peve vi. ¹⁰ Tumpa iñee pe uyecuatía oĩ cuarãi:

"Pipota yave pico cavi pepiacatu reve,
agüiye pere icavi mbae vae quía pe,
jare agüiye peapu quía re.

¹¹ Agüiye piyapo icavi mbae vae.

Jaeño piyapo icavi vae.

Jecuaeño pipota pico cavi pepiacatu reve.

¹² Echa'ã yandeYa jecuaeño umae jupi vae reta re, jare uyapisacata iyerure reta re.

Ërei umae'ã icavi mbae vae uyapo vae reta re."

Jucuarãi uyecuatía oĩ.

¹³ Ndarau ndipo quía uiporta uyapo icavi mbae vae peve, pe reta icavi vae jecuaeño piyapo yave. ¹⁴ Ërei piporara yave jupi vae piyapo ramo, piyerovia. Aramoi íru vae reta uiportata peminguysi. Ërei agüiye pequie chugüi reta. Agüiye piyemambeco jese. ¹⁵ Pembiadora Cristo pepia pe. Echa'ã jae co yandeYa. Jare ime yave quía upirandu peve maera ra peáro peñ piyerovia reve vae, jecuaeño piñemiciatíro pemimbeu vaerã chupe piñemimichi jare pipiu reve. ¹⁶ Agüiye piyapo mbae picuua agüiyyeta tẽi piyapo vae. Jucuarãi yave, íru vae reta jei yave icavi mbae vae pecoti, imarata co iyapu peré vae re. Echa'ã uicuata quirãi piyapo icavi vae Cristo re perovia ramo. ¹⁷ Tumpa uiporta yave, aramoi piporarata icavi vae piyapo vae jeco pegua. Ërei cua icavi co. Icavi'ã co piyapo yave icavi mbae vae jare piporara yave jocua jeco pegua. ¹⁸ Cristo vi penti veseno uiportara yanembayo reta re. Jae co jupi vae, Ërei uiportara jupi mbae vae reta imbayo reta re. Jare jucuarãi uiportara yanembipiñacatu vaerã Tumpa ndive. Ërei yepe tẽi íru vae reta uyuca, Ërei Espíritu Santo umbijecove ye güeru umanocue vae reta ipite güi. ¹⁹ Jayave Cristo oo espíritu rupi uñemimhee umanocue vae reta ipereso ñugüinoi vae pe. ²⁰ Echa'ã jocua umanocue vae reta yugüireco Noé ico yave. Jae reta güirovia'ã Tumpa jei vae, yepe tẽi Tumpa ipiaguasu chupe reta jare uáro Noé jocua chalana guasu uyapo oĩ rambueve. Ërei mboviño oyepi i güi jocua chalana guasu pe. Ochoño uyembiasaca. ²¹ Jare jocua penti jaanga co. Jae ramíño vi añave pe reta piyembiasaca piyembibautizaca yave Jesucristo icove ye ou umanocue vae reta ipite güi ramo. Pepuere'ã piyembiasaca piyoe perete vae rupi. Jaeño pepuere piyembiasaca pipota yave piyapo Tumpa jei piyapo vaerã vae. ²² Jesucristo oo ma ara pe jare ico ma Tumpa iyipi pe iyacata coti. Ángel reta jare opaete mbaepuere güinoi vae reta uyeyocui chupe.

4

Piyeyocui piyupe mbaepuere reta penoi vae pe

¹ Cristo uiporara cuá iví pe ico rambueve. Jáeramo piñemicuatíro piporara vaerá jae uiporara rami. Echa'á yaiporara yave, mbaeyoa ipuere'á ma yanderé. ² Jucuarái yave, ndarau yaico yae vae reño cuá iví pe yaico rambueve. Yaipotata yayapo Tumpa jei vae. ³ Echa'á ara uasa vae reta pe yaico yae vae reño upurugüirovia mbae vae reta yugüireco rami. Jocua ara reta pe yayapose pichii vae, yacause, yayapose parea reta yasavipo vaerá, jare yambiadorase tumpa-raanga reta, yepe tēi mboroyocui jei agüiye vaerá yambiadora. ⁴ Jare upurugüirovia mbae vae reta pe yavai ma uicuua vaerá maera ra pe reta piyapo'á ma opaete mbae icavi mbae vae jae reta ndive. Jáeramo jei reta icavi mbae vae pecoti. ⁵ Ërei Tumpa uáa yave icove vae reta jare umanocue vae reta, jae reta vi uyemboita Tumpa jovai. ⁶ Jare cuá jeco pegua Tumpa jembiocui reta umimbeu née icavi vae umanota vae reta pe, iespíritu reta yugüireco vaerá Tumpa ico rami, yepe tēi cuá iví pe yugüireco rambueve iví pegua reta uiporaraca chupe reta.

⁷ Ërei uyaro ma opaete mbae opa vaerá. Jáeramo piñemoa jare jecuaeño piyerure Tumpa pe. ⁸ Tamimbeu peve cuá icavi ete vae: Piyerau. Echa'á piyerau yave, ndarau piyembijeco jeta pembayeoa reta re. ⁹ Piyemingu piñeenguru mbae reve. ¹⁰ Tumpa umee penti penti pe mbaepuere reta piyeyocui vaerá chupe. Jáeramo piyeyocui piyupe mbaepuere reta penoi vae pe. Jucuarái piyeyocui cavita co Tumpa pe Tumpa ipiacavi tuicha vae rupi. ¹¹ Uñemiñee vae tuñemiñee Tumpa umimbeu chupe mbae jei vaerá vae rami. Uyeyocui iru vae reta pe vae, tuyeyocui chupe reta mbaepuere Tumpa umee chupe vae pe. Jucuarái yave, iru vae reta umbiadorata Tumpa Jesucristo rupi opaete piyapo vae re. YandeYa Jesucristo tuyembidoraca jare tugüinoi opaete mbaepuere jaeño mai pegua. Amén.

Cristo re güirovia ramo uiporara vae

¹² Cheriví reta, piporara eteta co. Ërei piporara peí yave, agüiye pepiacañi jese. Echa'á uyeyapo vi jucuarái iru vae reta pe. ¹³ Ërei piporara peí yave, piyerovia. Echa'á picuua piporara peí Cristo uiporara rami. Jare cuá jeco pegua, opaete vae uicuua yave quirái Cristo uyembidoraca co, pe reta piyerovia eteta. ¹⁴ Iru vae reta jei yave icavi mbae vae pecoti Cristo re perovia ramo, piyerovia. Echa'á Tumpa iEspíritu ico pepia pe. Jae reta jei icavi mbae vae Cristo cotí. Ërei pe reta pembidoraca Cristo. ¹⁵ Ërei agüiye quía tupuruyuca ani toñomi mbaembae ani tuyapo icavi mbae vae ani tumae iru vae iparavíqu re. Echa'á jucuarái uyapo yave, uiporarata co icavi mbae vae uyapo ramo. ¹⁶ Ërei penti Cristo imbae vae uiporara yave Cristo re güirovia ramo, agüiye timara. Tumbiadora Tumpa jese.

¹⁷ Tumpa uáata co opaete iví pegua reta, jare tenonde uáata rani jae imbae reta. Yepe tēi yande co jae imbae reta, Ërei ñaneráata co. Jáeramo uiporara eteta co jocua Tumpa iñee icavi vae güirovia mbae vae reta. Echa'á Tumpa jei chupe reta güirovia vaerá. ¹⁸ Tumpa iñee pe uyecuatí oí cuarái:

“Tumpa umbujupi ma vae reta yavai rupi uyembiasacata.

Jáeramo ndarau etei uyembiasaca Tumpa jei vae güirovia'á vae reta.

Echa'á uyembai'á imbaeyoa reta.”

Jucuarái uyecuatí oí. ¹⁹ Jáeramo Tumpa jei vae rupi uiporara vae reta jecuaeño tuyapo icavi vae jare tumaeño Tumpa re uyandareco vaerá jese reta. Echa'á Tumpa yandeapo jare jecuaeño uyandareco vae yanderé.

5

Pemiatangátu Tumpa imbae reta

¹ Tambiaracuaa ma tenondegua pepite pe ñugüinoi vae reta. Echa'á che co jae penti tenondegua, jare ndimebui iru vae reta pe quirái Cristo uiporara yanderé. Jare Cristo uyecuua yave, che vi ayeroviata jae ndive. Tupumbiaracuaa cuarái: ² Pemiatangátu Tumpa imbae pepite pe ñugüinoi vae reta. Piyandareco jese reta pequiréi reve. Agüiye piyapo peparavíqui peatéi reve. Piyapo peparavíqui pipota ete piyeyocui Tumpa pe ramo. Agüiye piyapo pemingana corepoti vaeráño. ³ Jare pe reta pico cavi, iru upurugüirovia vae reta uicuua vaerá quirái icavi co jae reta vi yugüireco vaerá. Agüiye piyocuño pembae vae echa rami. Echa'á jae reta Tumpa imbae reta co. ⁴ Jare Cristo ou ye yave - jae co opaete yanderé uyandareco vae - umeeta peve corona ndarau etei opa vae. Echa'á pe reta piyeroviata jae ndive.

⁵ Tambiaracuaa ma cuimbae tairusu vae reta cuarái: Piyapo petenondegua reta jei vae. Jare opaete vae piyeyocui piyupe piñemimichi reve. Echa'á Tumpa umee ipiacavi uñemimichi vae reta pe. Ërei oyovaicho uyembicate vae reta ndive. ⁶ Jáeramo piñemimichi Tumpa jovaque. Echa'á jae imbaepuere tuicha ete co. Jare jae pembutuichacata ara ou uváe yave piyembutuichaca vaerá. ⁷ Pemimbeu Tumpa pe opaete pepiatíti jare piyemipia'á jese vae. Echa'á jae uyandareco oí peré.

⁸ Jecuaeño piñemoa. Echa'á aña guasu perovaicho co, jare uipota uyapo icavi mbae vae peve, penti yaguapíta uguata ueca mbae uyuca jou vaerá vae rami. ⁹ Ërei piñemimiráta pepurugüirovia re agüiye vaerá aña guasu pemiamiri. Picuua co quirái opaete iru upurugüirovia vae iví pe yugüireco vae reta

uiporara ñugüïnoin pe reta piporara rami.¹⁰ Ërei Tumpa ipiacavi tuicha ete co. Jae yandeparavo umee vaerã yandeve yerovia opa mbae vae Cristo Jesús rupi. Piporarata co michi pegua. Ërei Tumpa etei pembiaracuaata, jare pemimirâtata, jare pemiatangâtata.¹¹ Tumpa tuyembíadoraca jare tugüïnoin opaete mbaepuere jaenõ mai pegua. Amén.

Saludo reta

¹² Cua mboviño ma aicuatía peve pumbiaracuaa vaerã, jare araacata Silvano ndive peve. Aicuua Silvano co jae yanderiví uyeyocui cavi peve vae. Amimbéu ma peve Tumpa ipiacavi añetete vae. Piñemimirâta peñjocua mbiacavi re.

¹³ Opaete upurugüïrovia vae Babilonia pe ñugüïnoin vae reta jei peve Tumpa ndiveño peñ. Tumpa uiparavo reta jae peparavo rami. Jae ramiño vi cheriví Marcos jei peve Tumpa ndiveño peñ.¹⁴ Piñecuáva piyerau reve. Tipiacatu opaete Cristo Jesús re güïrovia vae reta. Amén.

SEGUNDA CARTA DEL APOSTOL SAN PEDRO

¹ Che co jae Simón Pedro. Che co jae Jesucristo jemimondo jare ayeyocui chupe. Jesucristo co jae yanembiasa vae. Tumpa jare Jesucristo jipi co. Jáeramo umee peve pepurugüirovia vaerā ore ndupurugüirovia rami. Yayerovia ete cua mburugüirovia re. Aicuatía aí cua tupapire peve.

² Aipota picuaa cavi vaerā Tumpa jare yandeYa Jesús, penoi vaerā jeta ete Tumpa ipiacavi jare ipiacatu.

Pico penti ramíño Tumpa ndive

³ Tumpa umee ma yandeve imbaepuere rupi yaico cavi vaerā jare yayapo vaerā jae uipota yayapo vaerā vae. Jare opaete cua ñanoy yaicuaa Tumpa ramo. Echa'á Tumpa yandeparavo yayapo vaerā icavi vae jare yayembutuichaca vaerā. ⁴ Jare imbaepuere rupi Tumpa umee ma yandeve jei uyapota vae icavi ete vae reta. Yayerovia ete cua re. Jare cua jei uyapota vae reta rupi Tumpa umee ma peve pico vaerā penti ramíño jae ndive. Echa'á jae perepi opaete icavi mbae vae ívi pegua güi, agüiye vaerā pico pe pere vae reñio. ⁵ Jáeramo piñemiatangátu. Perovia co Tumpa re. Jecuaeño pipota piyapo icavi vae. Jae ramíño vi jecuaeño pipota picuaa cavi Tumpa regua. ⁶ Jae ramíño vi jecuaeño piñemoa. Jae ramíño vi jecuaeño pepiaguas. Jae ramíño vi jecuaeño piyapo Tumpa uipota piyapo vaerā vae. ⁷ Jae ramíño vi jecuaeño pepiácav. Jae ramíño vi jecuaeño pepuruau. ⁸ Echa'á opaete cua piyapo yave, piñemimiráttata co pepurugüirovia re jare picuaa cavita co yandeYa Jesucristo. Jáeramo pepuereta piyeyocui cavi yandeYa pe. ⁹ Êrei opaete cua uata chupe vae uicuaa cavi'á mbaembae regua. Iyaracuaa'á co. Nacañi ma co aipo quirái Tumpa umbiásas chupe imbaeyoa uyapocue vae reta.

¹⁰ Jáeramo, cherivi reta, piñemiatangátu picuaaca vaerá íru vae reta pe quirái pe reta co jae añetete Tumpa uiparavo vae reta. Echa'á jucuarái piyapo yave, ndarau etei pepia Tumpa güii. ¹¹ Jare jucuarái piyapo yave, pique cavita co piyerovia ete reve yandeYa Jesucristo iporoyocuia opa mbae vae pe. Jae co yanembiasa vae.

¹² Jáeramo che jecuaeño pumimanduata cua re, yepe tēi picuaa ma co jare pepiráta ma co añete vae piyemboe jese vae re. ¹³ Icavi echa cheve pumimandúa vaerá jese cua ívi pe aico rambueve, pumiatangátu vaerá. ¹⁴ Echa'á aicuaa imambae amanota co yandeYa Jesucristo uicuaaca cheve rami. ¹⁵ Jecuaeño pumimanduata cua re, jecuaeño pemandúa vaerá jese che amano ma yave.

Ore nduecha co yandeYa Jesucristo imbaepuere

¹⁶ Nduicuaaca peve yandeYa Jesucristo imbaepuere jare quirái jae ou yeta co. Jocua nduicuaaca peve vae aracae ndaye reta'á co. Jocua ndugüirovia vae añete co. Echa'á ore nduecha co yandeYa Jesucristo imbaepuere. ¹⁷⁻¹⁸ Echa'á ore noí jae ndive jocua ívitu guasau jae uiparavo vae re, yandeRu Tumpa umbiadoraca yave jare uechaca oreve imbaepuere. Jare ore nduyandu jocua ñee ara güi ou chupe vae. Echa'á Tumpa etei uyembiadoraca vae jei cuarái: "Cua co jae cheRai aau ete vae. Chembiyerovia ete." Jucuarái jei.

¹⁹ Êrei pepuere perovia catu Tumpa iñee aracae umimbeu vae reta uicuatía vae ore nduecha vae güi. Jáeramo icavi co pepia pe piyeminguela cavi vaerā jae reta uicuatía vae re. Echa'á jae reta uicuatía vae yanembori yaicuaa cavi vaerā yavai yaicuaa vaerā vae, penti tembipe yanembori yaecha cavi vaerā pítumimbi pe rami. Pepia pe piyeminguela cavi yave jese, picuaa cavita co, penti yasitata jembipe tuicha ete vae pepia pe umiembipe rami. ²⁰ Taicuaaca peve cua: Jocua Tumpa iñee aracae umimbeu vae reta uicuatía vae jae reta iyeminguetaño'á co. ²¹ Echa'á Tumpa iñee aracae umimbeu vae reta imiari'á jae reta etei uipota imiari ramo. Espíritu Santo etei umimbeu chupe reta mbae jei vaerā. Jáeramo jae reta jei vae Tumpa iñee etei co.

2

Upurumbítavi vae reta

(Jds 4-13)

¹ Êrei Israel pegua reta ipite pe Yugüireco aracae amocue upurumbítavi vae reta. Jae reta jei iyapu reve: "Che co jae penti Tumpa iñee umimbeu vae." Jae ramíño vi Yugüirecota pepite pe amocue upurumbítavi vae reta. Jae reta jeita iyapu reve: "Che co jae penti Tumpa iñee re oporomboe vae." Jae reta ipoqui eteta umimbeu vaerā moromboe añete mbae vae. Uipotata reta urucumegua Tumpa iparavíqu. Jare uicuacuta reta yandeYa umbiépi imbaeyoa reta re vae. Êrei imambae yandeYa urucumeguata reta. ² Jare jeta vae uyapota pichií vae upurumbítavi vae reta umimbeuta chupe reta uyapo vaerā vae. Jare cua jeco pegua íru vae reta jeita icavi mbae vae moromboe añete vae coti. ³ Jare

upurumbitavi vae reta uipotata pembaembae jare pembitavita upíro vaerā pegüi pembaembae. Êrei îma ma Tumpa uâa reta. Jáeramo urucumeguata reta imambae.

⁴ Echa'â Tumpa umbiasa'â ángel iyoa vae reta. Jae omombo ara güi cañitei pe. Joco pe uñeapíti ñugüinoi pítumimbi pe jare uâo ñugüinoi Tumpa uâa reta vaerâ. ⁵ Jae ramiño vi aracae Tumpa umbiasa'â upurugüirovia mbae vae reta. Jaeñi uepi iporu guasu güi Noé jocua íru siete vae ndive. Echa'â Noé umimbeu têi íru vae reta pe uyapo vaerâ jupi vae. Êrei jae reta uipota'â güirovia Tumpa jei chupe reta uyapo vaerâ vae. Jáeramo Tumpa ombou iporu guasu opa vaerâ umbai reta. ⁶ Jae ramiño vi Tumpa ombou tata tenta guasu reta Sodoma jare Gomorra pe opa umbai vaerâ. Jaeñi upita joco pe tanimbu reta. Jare jocua tenta guasu reta pe uyeyapo vae rupi Tumpa jei vae uyapo'â vae reta ipuere uicuua Tumpa uiporaracata co chupe reta. ⁷ Êrei Tumpa uepi Lot. Echa'â jae jupi jare uyemipia'â mbaembae pichîi vae jocua jecopochi vae reta uyapo vae re. ⁸ (Echa'â jocua jupi vae ico jae reta ipite pe, jare uecha jare uyandu icavi mbae vae uyapo reta vae. Jáeramo uyemipia'â opa ara rupi.) ⁹ Jae ramiño vi yandeYa uicuua quirâi uepi vaerâ jei vae uyapo vae reta mbaesusere reta güi jare quirâi uiporaraca vaerâ jupi mbae vae uyapo vae reta pe ara jae uâa reta vaerâ vae ou uvâe regua. ¹⁰ Amocue vae uyapo pichîi vae jae jei vae rupiño jare güiríro mbaepuere güinoi vae reta. Tumpa uiporaraca eteta co jocua reta pe. Echa'â jae reta uyembicate jare ñatêi uyapo mburuvicha reta jei uyapo vaerâ vae. Uquîye'â reta jei vaerâ icavi mbae vae mbaepuere güinoi vae reta coti. ¹¹ Ángel reta imbaepuere tuicha ete jocua jupi mbae vae uyapo vae reta imbaepuere güi. Êrei yepe têi imbaepuere tuicha co, êrei ángel reta ipuere'â umbijeco yandeYa jovaque jocua mbaepuere güinoi vae reta. ¹² Êrei jocua jupi mbae vae uyapo vae reta jei icavi mbae vae uicuua mbae vae coti. Jae reta maemimba reta rami co. Yaipisi jare yayuca maemimba reta. Jae ramiño vi jocua jupi mbae vae uyapo vae reta umanota icavi mbae vae uyapo vae jeco pegua. ¹³ Jare cua uyeyapota chupe reta jupi mbae vae uyapo ramo. Echa'â ara rupi yepe icavi echu chupe reta uyapo vaerâ icavi mbae vae. Jae reta uñemíru pe reta ndive. Ucaru reta yepe pe reta ndive. Êrei uyerovia upurumbitavi vaerâ. Icavi'â co ucaru reta vaerâ pe reta ndive. Echa'â peíru añetete vae reta'â co. ¹⁴ Jae reta jecuaeño uipota uyuvanga menda re. Jecuaeño uipota uyapo ipotave mbaeyoa, jare uyapoca mbaeyoa ipurugüirovia re ipirâta'â vae reta pe. Jae reta jecuaeño uyemboe uipota vaerâ íru vae reta imbaembae. Tumpa uiporaracata chupe reta. ¹⁵ Echa'â yugüireco'â Tumpa jei yugüireco vaerâ rami. Opia reta Tumpa güi. Uyapo reta Beor tai Balaam jee vae uyapo rami. Echa'â Balaam uau ete corepoti jupi mbae vae uyapo vae rupi umingana vae. ¹⁶ Êrei Tumpa uicuaca Balaam pe agüiye vaerâ têi uyapo jocua jupi mbae vae. Echa'â yepe têi penti mburica ipuere'â uyemingueta, êrei Tumpa umee Balaam imburica pe uyemingueta vaerâ penti cuimbae uyemingueta rami, jare jucuarâi uicuaca Balaam pe - jae co penti Tumpa iñee aracae umimbeu vae - agüiye vaerâ têi uyapo jocua uipota uyapo vae.

¹⁷ Jocua jupi mbae vae uyapo vae reta ícua tipa ma vae reta rami co. Jae ramiño vi amapíti ivitu ete yave tanta osi vae reta rami co. Echa'â yugüiraa voita pítumimbi oî vae pe. ¹⁸ Imiari reta uyembicate reve. Jáeramo jei vae reñi yugüireco vae reta güirovia reta, jare uyapo ye pichîi vae, yepe têi tenonde yave oyepo uyapo'â Tumpa jei vae reta güi. ¹⁹ Jocua jupi mbae vae uyapo vae reta jei têi chupe reta uyeyorata co. Êrei jae reta etei icavi mbae vae jembiocui reta co. Echa'â ime yave quía mbae güinoi mbaepuere jese vae, jae ico jocua mbae jembiocuñi. ²⁰ Echa'â oyepo yave pichîi vae ivi pegua güi yandeYa Jesucristo regua uicuua vae rupi - jae co yanembiasa vae - êrei taicue rupi umbipi yave uyapo ye pichîi vae jare pichîi vae güinoi mbaepuere jese, icavi mbae ete co tenonde ico vae güi. ²¹ Echa'â uicuua ma quirâi uyembujupica vaerâ. Êrei uyapo'â mboroyocui Tumpa umimbeu chupe reta vae. Icavi ete têi co agüiye vaerâ uicuua quirâi uyembujupica vaerâ. ²² Êrei uyeyapo chupe reta jocua yae chupe vae rami. Echa'â yae cuarâi: "Yimba oo ye jou igüeëcues. Jae ramiño vi cuchi uyeyoe vae oo ye uñemutuñuu." Jucuarâi yae. Jare cua añete co.

YandeYa ivâe ara uvâeta co

¹ Cheriví reta, cua tupapire aicuatía peve vae mocui ma co. Mocui reve pe pumimandúa picuua ma vae re, añetete pepia pe piyemingueta vaerâ jese. ² Aipota pepia pe piyemingueta vaerâ Tumpa iñee aracae umimbeu vae reta jei vae re. Jae reta uñeniono tee Tumpa peguarâ. Jae ramiño vi aipota pepia pe piyemingueta vaerâ mboroyocui ore numimbeu peve vae re. Ore co jae yandeYa jemimondo reta. Jae co yanembiasa vae. ³ Aipota picuua vaerâ cua rani: Ara taicuega reta pe amocue vae oyoyaita Tumpa iñee umimbeu vae reta. Yugüireco jae jei vae reñi. ⁴ Jare jeita cuarâi: "Pe reta pere têi Jesucristo ou yetâ co. Êrei ndarau etei ou. Echa'â yandetenondegua reta umano güive opaete mbaembae oyovaqueño co oî. Tumpa opaete uyapo güive opaete mbaembae oyovaqueño co oî." Jucuarâi jeita. ⁵ Êrei jae reta uipota'â imandúa quirâi aracae ete Tumpa uyapo opaete ara re ñugüinoi vae iñee imbaepuere pe jare

quirāi uyapo ivi jare i guasu reta,⁶ jare quirāi opa umbai opaete ivi pe oī vae iporu guasu ombou yave.⁷ Êrei Tumpa umimbeu yandeve quirāi mbaembæ ara re añave ñugüinoi vae jare ivi vi oyovaqueñota oī umbai regua tata pe. Echa'ã jucuarâita Tumpa uyapo, uâa uyapo'ã jei vae reta yave. Jayave jae onmondota reta tata guasu pe.

⁸ Cherivi reta, icavi co picuua vaerâ cua: YandeYa pe penti ara mil año ramiño co jare mil año penti ara ramiño co. ⁹ Amocue vae ipia pe uyemingueta têi yandeYa ndarau ou ye. Echa'ã jei reta ima ete ma co jei uyapota vae. Êrei jucuarâi'ã. Echa'ã yandeYa ipiaguasu yandeve. Uipota'ã penti ave oo vaerâ tata guasu pe. Uipota opaete vae ueya vaerâ iyemingueta icavi mbae vae ipia pe oí vae.

¹⁰ Êrei yandeYa ivâe ara outa co penti imonda vae pîtu yave ou mbaembæ oñomi vaerâ rami. Jare yandeYa ivâe ara pe opaete mbaembæ ara re añave yaecha vae uyembaita tanta jiapu reve. Jacu eteta co jare opaete mbaembæ opata ocai. Ivî vi jare opaete mbaembæ ivi pe ñugüinoi vae ocaita co. ¹¹ Jáeramo pico cavi peyoa mbae reve jare jecuaeñyo piyapo Tumpa jei vae. Echa'ã picuua opaete mbaembæ añave yaecha vae opata ocai. ¹² Peáro pequirêi reve Tumpa ivâe ara ou uvâe vaerâ. Echa'ã Tumpa ivâe ara pe Tumpa uapita opaete mbaembæ ara re ñugüinoi vae jare opata umbai. Jacu eteta co jare opaete mbaembæ opata ocai. ¹³ Êrei Tumpa uyapota ara re mbaembæ ipiau vae. Jae ramiño vi uyapota ivi ipiau vae. Jare joco pe imeta jaeñyo mbae jupi vae. Echa'ã Tumpa cua jei uyapota co.

¹⁴ Jáeramo, cherivi reta, cua mbaembæ ipiau vae peáro ramo, piñemiatangâtu agüiye vaerâ piyapo mbaeyoa. Jucuarâi yave, pepiacatuta jare ndarau quía pembijeco mbae re yandeYa ou ye yave. ¹⁵ Picuua quirâi yandeYa ipiaguasu co yandeve yayembiasaca vaerâ. Jare cua re yanderivi Pablo yaau vae uicuatâma peve. Tumpa umee Pablo pe aracuaa umimbeu cavi vaerâ peve. ¹⁶ Jare opaete tupapiere uicuatâma vae pe Pablo umimbeu yembiasa regua. Amo pe yavai yaicuua vaerâ mbae ra uipota jei Pablo uicuatâma vae. Jare amocue vae güirova Pablo uicuatâma vae. Jae ramiño vi jae reta güirova íru Tumpa iñee uyecuatâma oí vae. Jae reta uyemboe cavi'ã Tumpa iñee re jare ipirâta'ã ipurugüirovia re. Jare jucuarâi güirova ramo, jae reta etei yuerova Tumpa güi.

¹⁷ Picuua ma co cua mbaembæ regua, cherivi reta. Jáeramo pe reta vi piñemoa, agüiye vaerâ piyavi jocua icavi mbae vae uyapo vae reta uyavi rami. Echa'ã jucuarâi piyavi yave, ndarau pepirâta pepurugüirovia re. ¹⁸ Êrei piñemimirâta pepurugüirovia re Tumpa ipiacavi rupi. Jare jecuaeñyo pipota picuua cavi yandeYa Jesucristo regua. Jae co yanembiasa vae. YandeYa tuyembiadoraca añave jare jaeñyo mai pegua. Amén.

PRIMERA CARTA DEL APOSTOL SAN JUAN

Nee tecove opa mbae vae umee vae

¹ Nduicuatía noī peve jocua Nee tecove opa mbae vae umee vae regua. Jae jecuaeño ico ndei iví uyeyapo mbove. Jare ore nduyandu jocua Nee. Nduuecha cavi. Numae jese. Nduyavíquí vi orepo pe etei. ² Jocua Nee tecove opa mbae vae etei co. Numimbeu peve quirái ore etei nduecha. Nduicuaaca peve jae co tecove opa mbae vae. Jae imeño mai ico yandeRu Tumpa ndive ndei iví uyeyapo mbove, érei ou uyecuua oreve. ³ Numimbeu peve nduecha jare nduyandu vae, pe reta vi piñemíru vaerá ore ndive. Añetete ñañemíru ma yandeRu Tumpa jare Tai Jesucristo ndive. ⁴ Jare cua mbaembæ regua nduicuatía peve piyerovia ete vaerá.

Tumpa ico tembipe oī vae pe

⁵ Numimbeu peve ñee Jesucristo umimbeu oreve vae. Jae co cua: Tumpa ico tembipe oī vae pe. Ico'ā etei pítumimbi oī vae pe. ⁶ Aramoí yae ñañemíru ma co jae ndive. Érei yaico yave pítumimbi oī vae pe yugüüreco vae rami, yandeapu co. Yaico'ā co añete vae rupi. ⁷ Érei yaico yave tembipe oī vae pe yugüüreco vae rami - echá'a Tumpa vi ico tembipe oī vae pe - ñañemíru uyupi, jare Jesucristo jugüü yandeyoe opaete yanembæyoa reta güi. Jesucristo co jae Tumpa Tai.

⁸ Yae yave yandeyoa'ā co, yayembitaví co. Yae'ā etei co añete vae. ⁹ Yamimbeu yave Tumpa pe yanembæyoa reta, yandepuere yarovia catu Tumpa umbiasa vaerá yandeve yanembæyoa reta, jae jupi ramo. Jae yandeyota co opaete jupi mbae vae yayapo vae güi. ¹⁰ Yae yave yayapo'ā co mbaeyoa, Tumpa iñee ico'ā yandepia pe. Echa'ā Tumpa jei yayapo co mbaeyoa. Jáeramo yayapo'ā yave mbaeyoa, Tumpa iyaputa tēi co.

2

Cristo uyerure Tumpa pe yanderé

¹ Cheraí reta, aicuatía cua mbaembæ regua peve agüiye vaerá peyoa. Érei yandeyoa yave, ime co quía uyerure yandeRu Tumpa pe yanderé vae. Jae co Jesucristo. Jae co jupi vae. ² Tumpa uiporaracata tēi yandeve yanembæyoa reta jeco pegua. Érei Jesucristo uiporara yandepepica pe, agüiye vaerá Tumpa uiporaraca yandeve. Jare Jesucristo umano opaete iví pegua reta imbaeyoa reta re, yanembæyoa reta reño'ā co.

³ Jesucristo iporoyocui reta yayapo yave, cua uicuaaca yandeve yaicua co. ⁴ Ime yave quía, "Aicuua co Jesucristo", jei vae, iyapu co uyapo'ā yave Jesucristo iporoyocui reta. Jocua nunga jei'ā añete vae.

⁵ Érei Jesucristo jei vae uyapo vae añetete uau ete Tumpa. Jare yaau yave Tumpa, yaicuaa yande co jae Jesucristo imbae reta. ⁶ Ime yave quía, "Che co jae Cristo imbae", jei vae, tuico cavi Jesucristo ico ramí.

Mboroyocui ipiau vae

⁷ Cherivi reta, cua aicuatía aī peve vae mboroyocui ipiau vae'ā co. Jaeño penti mboroyocui indechi vae iyipi güive picuua vae. Cua mboroyocui indechi vae co jae ñee piyandu iyipi güive vae. ⁸ Érei cua mboroyocui mburuau regua jecuaeño ipiau. Jesucristo yanderau jare pe reta piyerau vi. Echa'ā pítumimbi uasa ma jare tembipe añetete vae jembipe oī.

⁹ Ime yave quía, "Che aico tembipe oī vae pe", jei vae, érei umitaréi yave íru upurugüirovia vae, jecuaeño ico pítumimbi oī vae pe. ¹⁰ Ime yave quía íru upurugüirovia vae uau vae, jae jecuaeño ico tembipe oī vae pe. Jáeramo ipuere uecha cavi uguita cavi vaerá uyepiaca mbae reve. ¹¹ Érei ime yave quía íru upurugüirovia vae umitaréi vae, jae jecuaeño ico pítumimbi oī vae pe. Jáeramo jae co uguita oo pítumimbi pe vae rami. Uicuaa'ā queti ra oo oī vae. Echa'ā ipuere'ā etei uecha pítumimbi pe.

¹² Aicuatía cuarái peve, cherai reta, Tumpa umbiasa peve pembaeyoa reta ramo. Umbiasa ma peve Jesucristo jee re. ¹³ Tae ucuacuua vae reta pe cua: Aicuatía cuarái peve picuua Jesucristo ramo. Jae imeño mai ico ndei iví uyeyapo mbove. Tae taírusu vae reta pe cua: Aicuatía cuarái peve pepiráta pepurugüirovia re ramo, jare Tumpa iñee ico pepia pe ramo, jare pemiamiri aña guasu ramo. Aicuatía cuarái peve, cherai reta, picuua yandeRu Tumpa ramo.

¹⁴ Tae ye ucuacuua vae reta pe cua: Aicuatía cuarái peve picuua Jesucristo ramo. Jae imeño mai ico ndei iví uyeyapo mbove. Tae taírusu vae reta pe cua: Aicuatía cuarái peve pepiráta pepurugüirovia re ramo, jare Tumpa iñee ico pepia pe ramo, jare pemiamiri aña guasu ramo.

¹⁵ Agüiye peau cua iví pegua. Agüiye peau mbaembæ iví pe ñugüünoi vae. Ime yave quía cua iví pegua uau vae, uau'ā co Tumpa. ¹⁶ Cua iví pegua uau vae reta jecuaeño uipota iporopota jare uipota opaete mbaembæ ipóra vae uecha vae jare uyembicate imbaembæ re. Érei opaete cua iví pegua co.

YandeRu Tumpa pegua'ā co. ¹⁷Jare cua ivi pegua opata co. Jare opa ma yave, ndarau quía uipota ye. Êrei Tumpa jei vae uyapo vae icota jaeño mai pegua.

Cristo ndive oyovaicho vae

¹⁸Cheraí reta, ou ma uvae ara taicuega reta. Piyandu quirái Cristo ndive oyovaicho vae outa co. Êrei añaive ime ñugüinoi jeta Cristo ndive oyovaicho vae reta. Jáeramo yaicuaa ou ma co uvae ara taicuega reta. ¹⁹Jae reta uyembiyao yandegüi, añetete'ā uñemiiru yande ndive ramo. Echa'ā añetete uñemiiru yave yande ndive, jecuae uyembatita tēi yande ndive. Êrei uyembiyao reta yandegüi, uyecuua vaerā añetete'ā co uñemiiru yande ndive.

²⁰Êrei Espíritu Santo ou ma pepia pe. Jáeramo pe reta picuaa opaete. ²¹Pe reta jae'ā co añete vae picuaa'ā vae. Picuaa co añete vae. Jáeramo aicuatía peve. Jare picuaa quirái penti apu añete vae pegua'ā co.

²²Ime yave quía, "Jesús jae'ā co Cristo", jei vae, jae co penti iyapu vae. Ime yave quía güirovia'ā yandeRu Tumpa jare Taí re vae, jae co Cristo ndive oyovaicho vae. ²³Ime yave quía güirovia'ā Tumpa Taí re vae, jae uicuaa'ā etei yandeRu Tumpa. Êrei güirovia Tumpa Taí re vae uicuaa co yandeRu Tumpa.

²⁴Jáeramo jecuaeño perovia iyipi güive piyemboe jese vae. Echa'ā jucuarái yave, jecuaeño piñemiiru cavita Tumpa Taí ndive jare yandeRu Tumpa ndive vi. ²⁵Jare Tumpa jei ma umeeta co yandeve tecove opa mbae vae.

²⁶Cuarái aicuatía ma peve, amimbeu vaerā peve jocua uipota pembobia vaerā Tumpa güii vae reta.

²⁷Êrei Tumpa umee ma peve Espíritu Santo, jare jae ico pepia pe. Jáeramo picuaa ma cua regua ūru vae umimbeu peve mbae reve. Echa'ā Espíritu Santo pemboe opaete mbaembae re, jare Espíritu Santo jecuaeño jei añete vae. Ipuere'ā etei iyapu. Jáeramo jecuaeño piñemiiru Jesucristo ndive Espíritu Santo pemboe rami.

²⁸Añave, cheraí reta, piñemiatangatu piñemiiru vaerā Jesucristo ndive. Jucuarái yave, jae ou ye yave, ñaïta jae jovai yayerovia reve. Ndarañanemara jae ndive ñañeoväiti yave. ²⁹Picuaa quirái Tumpa co jae jupi vae. Jáeramo picuaa vi quirái Tumpa umee ma tecove opa mbae vae opaete jupi vae uyapo vae reta pe.

3

Tumpa taí reta

¹Mase, yandeRu Tumpa ñanereni jae taí retarā. Cua uicuaaca yandeve quirái yandeRu Tumpa yanderau ete. Jáeramo upurugüirovia mbae vae reta yandecuua cavi'ā, uicuaa'ā Tumpa ramo. ²Cherivi reta, añaive yande co jae Tumpa taí reta. Jare Tumpa ndeñio uicuaaca yandeve quiráita ra ñaí. Êrei yaicuaa ñaïta co Cristo rami jae ou ye yave. Echa'ā yaecha cavita. Jae etei oïta yanderovai. ³Jare ime yave quía uáro oï uyerovia reve uecha vaerā vae, jae uipota ete ico iyoa mbae reve. Echa'ā Cristo iyoa mbae vae co.

⁴Ime yave quía mbaeyoa uyapo vae, jae uyaví Tumpa iporoyocui. Echa'ā iyoa vae uyaví Tumpa iporoyocui. ⁵Jare picuaa quirái Jesucristo uyeyapo cuimbaerá umbai vaerā yanembaeyoa reta. Jare jae iyoa'ā etei. ⁶Ime yave quía uñemiiru Jesucristo ndive vae, jae uipota'ā jecuaeño iyoa. Jecuaeño uipota iyoa vae Jesucristo imbae'ā co. Uicuaa'ā etei Jesucristo.

⁷Cheraí reta, agüiye quía tapembitavi. Jesucristo jupi co. Jae ramíño vi jupi vae uyapo vae jupi co.

⁸Jecuaeño mbaeyoa uyapo vae aña guasu imbae co. Echa'ā aña guasu jecuaeño iyoa iyipi güive. Jare Tumpa Taí uyeyapo cuimbaerá umbai vaerā aña guasu iparavíquí.

⁹Tumpa güii tecove opa mbae vae güinoi vae jecuaeño uyapo'ā mbaeyoa. Echa'ā güinoi ma tecove Tumpa güii. Jáeramo ipuere'ā jecuaeño uyapo mbaeyoa. Echa'ā ime ma güinoi tecove opa mbae vae Tumpa güii. ¹⁰Jare yandepuere yaicuaa quía ra co jae Tumpa taí reta jare quía ra co jae aña guasu taí reta. Ime yave quía jupi vae uyapo mbae vae, jae Tumpa imbae'ā co. Jae ramíño vi ime yave quía ūru upurugüirovia vae uau'ā vae, jae Tumpa imbae'ā co.

¹¹Echa'ā iyipi güive piyandu cua ñee: Yayerau. ¹²Agüiye yayapo Caín uyapo rami. Echa'ā Caín aña guasu imbae co jare uyuca tivi. Jare picuaa co maera uyuca. Caín uyapo icavi mbae vae, jare tivi uyapo jupi vae. Jáeramo Caín uyuca tivi.

¹³Agüiye pepiacañi, cherivi reta, upurugüirovia mbae vae reta pemitaréi yave. ¹⁴Yande yaicuaa yaasa ma co mano güii tecove opa mbae vae pe, ūru upurugüirovia vae reta yaau ramo. ūru upurugüirovia vae uau'ā vae güinoi'ā tecove opa mbae vae. ¹⁵Ime yave quía ūru upurugüirovia vae umitaréi vae, jae penti upuruyuca vae rami co. Jare picuaa quirái penti upuruyuca vae güinoi'ā etei tecove opa mbae vae. ¹⁶Jesucristo etei uicuaaca yandeve Tumpa ipuruau. Echa'ā umano yanderé. Jae ramíño vi icavi co yande ñamano vaerā ūru upurugüirovia vae reta re. ¹⁷Êrei ime yave quía mbaembae ivi pegua re icocatu vae, jare ime yave upurugüirovia vae mbaembae uata chupe vae, jocua icocatu vae ñatéi yave

ombori mbaembae uata chupe vae, jae güinoi'ā Tumpa ipuruau ipia pe.¹⁸ Cherai reta, añetete yaau yave ūru vae, yayapota mbae yambori vaerā. Ndaraū ñanemiariiño yandepurugüirovia re.¹⁹⁻²⁰ Cuarāi yaicuaata yaico co añete vae re, jare yepe tēi yayembijeco mbae re yandepia pe, ērei yandepiacatuta Tumpa jovaque. Echa'ā Tumpa uicuaa jeta ete opaete yande yaicuaa vae güi. Tumpa uicuaa opaete.²¹ Cherivi reta, yayembijeco'ā yave yandepia pe, jecuaeñyo yandepuere yaya Tumpa re yaquíye mbae reve.²² Jare yayerure yave Tumpa pe mbae re, jae umeeta yandeve, yayapo iporoyocui reta ramo. Echa'ā jocua yayapo vae umbiyerovia Tumpa.²³ Jare Tumpa jei yandeve yarovia vaerā Tai Jesucristo jee re jare yayerua vaerā. Jae co mboroyocui Tumpa umimbeu yandeve vae.²⁴ Jare Tumpa iporoyocui reta uyapo vae uñemíru Tumpa ndive, jare Tumpa uñemíru jae ndive. Jare yaicuaa Tumpa uñemíru co yande ndive. Echa'ā Tumpa umee yandeve Espíritu Santo ico vaerā yandepia pe.

4

Nee uyuaví vae reta

¹ Cherivi reta, ime cuá ivi pe jeta upurumbitavi vae reta. Jae reta jei iyapu reve: "Che co jae penti Tumpa iñee umimbeu vae." Jáeramo pepia pe piyeminguela cavi piyandu vae re, agüiye vaerā perovia ñee ou'ā Tumpa güi vae.² Yandepuere yaicuaa ou ra ñee Tumpa iEspíritu güi. Echa'ā ñee umimbeu peve vae jei yave Jesús co jae Cristo cuimbaerā uyeyapo vae, jocua ñee ou Tumpa güi.³ Ērei ñee umimbeu peve vae yave jei'ā Jesús co jae Cristo, jocua ñee ou'ā Tumpa güi. Jocua upurumbitavi vae oyovaicho Cristo ndive. Echa'ā piyandu quirái Cristo ndive oyovaicho vae reta yugueruta co. Jare ime ma ñugüinoi ivi pe.

⁴ Cherai reta, pe reta co jae Tumpa imbae reta, jare pemiamiri ma Cristo ndive oyovaicho vae reta. Echa'ā Espíritu Santo ico pepia pe jare jae imbaepuere tuicha ete ivi pegua reta iya imbaepuere güi.⁵ Echa'ā jae reta ivi pegua co. Jáeramo uyeminguela mbaembae ivi pegua reño, jare upurugüirovia mbae vae reta uyapisaca cavi jese reta.⁶ Ērei yande co jae Tumpa imbae reta. Ime yave quía uicuaa Tumpa vae, jae uyapisaca yanderé. Ērei ime yave quía Tumpa imbae'ā vae, jae uyapisaca'ā yanderé. Jare cuarāi yaicuaa añete vae pegua ra penti ñee, ani tavi pegua ra.

Tumpa mburuau etei co

⁷ Cherivi reta, yayerau. Echa'ā Tumpa umee yandeve mburuau. Jare upuruau vae güinoi tecove opa mbae vae Tumpa güi, jare uicuaa Tumpa.⁸ Upuruau mbae vae uicuaa'ā Tumpa. Echa'ā Tumpa mburuau etei co.⁹ Tumpa ombou Tai jae vaeño ivi pe yande ñanoi vaerā tecove opa mbae vae Tai uyapo yandeve vae jeco pegua. Jare jucuarái Tumpa uicuaaca yandeve yanderau co.¹⁰ Jáeramo yaicuaa ma mburuau añetete vae. Echa'ā tenonde yave yande yaau'ā Tumpa. Ērei Tumpa yanderau jare ombou Tai ivi pe, jae uiporara vaerā yanembaeoya reta re, agüiye vaerā Tumpa uiporaraca yandeve.

¹¹ Cherivi reta, Tumpa yanderau ete. Jáeramo jae uipota yayerau vaerā.¹² Mbaeti etei quía uecha Tumpa. Ērei yayerau yave, Tumpa ico yandepia pe, jare mburuau Tumpa cotí ñanoi vae jecuaeñyo ucuacuua.

¹³ Jare Tumpa umee ma yandeve iEspíritu. Jáeramo yaicuaa yande ñañemíru co Tumpa ndive, jare Tumpa ico yandepia pe.¹⁴ Ore nduecha Tumpa Tai, jare numimbeu ūru vae reta pe quirái yanderu Tumpa ombou Tai ivi pe umbiasa vaerā ivi pegua reta.¹⁵ Ime yave quía, "Jesús co jae Tumpa Tai", jei vae, jae uñemíru Tumpa ndive, jare Tumpa ico ipia pe.¹⁶ Yaicuaa Tumpa yanderau co jare yarovia jecuaeñyo yanderauta co. Tumpa mburuau etei co. Jare upuruau reve ico vae uñemíru Tumpa ndive, jare Tumpa ico ipia pe.

¹⁷ Jare ñañemíru Tumpa ndive ramo, mburuau Tumpa cotí ñanoi vae ucuacuua, yandepuere vaerā ñaí Tumpa jovai yaquiye mbae reve jocua ara ñanerāa yave. Echa'ā cua ivi pe yaico rambueve, Tumpa ico yandepia pe.¹⁸ Ndaraū yaquiye Tumpa güi, jae yanderau ramo. Tumpa ipuruau tuicha ete. Jáeramo ndaraū yaquiye chugüi. Echa'ā íme yave quía Tumpa güi uquiye vae, jae ipia pe uyeminguela Tumpa uiporaracata co chupe. Tumpa güi uquiye vae uicuaa'ā Tumpa uau ete co.

¹⁹ Yande yaau Tumpa jae rani yanderau ramo.²⁰ Ime yave quía, "Che aau Tumpa", jei vae, umitaréi yave ūru upurugüirovia vae, iyapu co. Echa'ā uau'ā ūru upurugüirovia vae, yepe tēi ipuere uecha. Jáeramo ipuere'ā uau Tumpa. Echa'ā uecha'ā etei Tumpa.²¹ Jare Tumpa umimbeu ma yandeve cuá mboroyocui: "Uau Tumpa vae tuau vi ūru upurugüirovia vae."

5

Quirái yaicuaa Tumpa tai reta

¹ Opaete güirovia Jesús co jae Cristo vae reta güinoi tecove opa mbae vae Tumpa güi. Jare uau yandepuere Tumpa vae uau vi Tumpa tai reta.² Yaau yave Tumpa jare yayapo yave Tumpa iporoyocui reta, yaicuaa yaau co Tumpa tai reta.³ Echa'ā yaau yave Tumpa, yayapo iporoyocui reta, jare yavaí'ā

co yayapo vaerā iporoyocui reta. ⁴ Tecove opa mbae vae Tumpa güi güinoi vae umiamiri ivi pegua oyovaicho jae ndive vae. Añete co, yandepuere ñiamamiri ivi pegua oyovaicho yande ndive vae yandepurugüirovia rupi. ⁵ Güirovia Jesús co jae Tumpa Tai vae ipuere umiamiri ivi pegua oyovaicho jae ndive vae.

Espíritu Santo umimbeu vae

⁶ Jesucristo umbipi iparavíqui uyembibautizaca ma i pe yave, jare opa uyapo iparavíqui umano curusu re yave. Jaeño'ã umbipi iparavíqui. Opa uyapo umano curusu re yave. Jare Espíritu Santo umimbeu cua regua. Echa'ã Espíritu Santo jecuaeño umimbeu añete vae. ⁷ Jare ime ara pe mbapi cua regua umimbeu vae. Echa'ã yandeRu Tumpa jare Nee jare Espíritu Santo umimbeu pâve. Jare cua mbapi pentiño co. ⁸ Jae ramíño vi ime ivi pe mbapi cua regua umimbeu vae. Echa'ã Espíritu Santo jare i jare Jesús jugüi umimbeu pâve penti ramíño. ⁹ Yarovia ivi pegua reta umimbeu yandeve vae, yepe têi amo pe umimbeu yandeve vae añete vae'ã co. Èrei Tumpa umimbeu yandeve vae jecuaeño añete vae. Jáeramo jecuaeño yandepuere yarovia Tumpa umimbeu yandeve vae. Jae jae umimbeu yandeve Jesús regua cuarai: "Cua co jae cheRai." ¹⁰ Tumpa Tai re güirovia vae uicuua ipia pe Jesús co jae Tumpa Tai. Jare Tumpa etei umimbeu yandeve cua. Jáeramo cua güirovia'ã vae güirovia'ã Tumpa. Èrei cua añete'ã yave, Tumpa iyaputa têi co yandeve. ¹¹ Jare Tumpa umimbeu yandeve cua: Jae umee yandeve tecove opa mbae vae. Ime ñanoí cua tecove opa mbae vae Tumpa Tai re yarovia ramo. ¹² Tumpa Tai güinoi ipia pe vae ime güinoi tecove opa mbae vae. Tumpa Tai güinoi mbae ipia pe vae güinoi'ã tecove opa mbae vae.

Picuaa penoi co tecove opa mbae vae

¹³ Pe reta perovia Tumpa Tai jee re. Jáeramo aicuatáia cua peve picuaa vaerā penoi co tecove opa mbae vae. ¹⁴ Jare yandepuere yarovia catu Tumpa. Echa'ã yaicuua Tumpa uyandu co yandeve yayerure yave chupe mbae jae uiptota yayerure vaerā chupe jese vae re. ¹⁵ Jare cuarai yayerure chupe mbae re yave, yaicuua jae uyapota co yandiyerure. Echa'ã yaicuua jae uyandu co yandeve.

¹⁶ Penti upurugüirovia vae uyapo yave mbaeyoa, íru upurugüirovia vae ipuere uyerure Tumpa pe jese, jocua mbaeyoa mano pegua'ã yave. Jucuarai yave, Tumpa umaeñota mbaeyoa uyapo vae re icoño vaerā. Ime co penti mbaeyoa mano pegua. Penti upurugüirovia vae uyapo yave jocua nunga mbaeyoa, íru upurugüirovia vae agüiye tuyerure Tumpa pe jese. ¹⁷ Opaete mbae jupi mbae vae mbaeyoa co. Èrei imé mbaeyoa mano pegua'ã vae.

¹⁸ Yaicuua tecove opa mbae vae Tumpa güi güinoi vae jecuaeño uyapo'ã mbaeyoa. Echa'ã Tumpa Tai etei uyandareco jese agüiye vaerā aña guasu uipisi.

¹⁹ Yaicuua yande co jae Tumpa tai reta jare quirai aña guasu güinoi mbaepuere opaete upurugüirovia mbae vae reta re.

²⁰ Jae ramíño vi yaicuua Tumpa Tai ou ma co cua ivi pe jare umee yandeve yaicuua vaerā Tumpa añetete vae. Ñañemíru ma Tumpa ndive. Echa'ã ñañemíru ma Tumpa Tai Jesucristo ndive. Jae co Tumpa añetete vae. Jae umee yandeve tecove opa mbae vae.

²¹ Cheraí reta, agüiye pembiadura tumpa-raanga reta. Amén.

SEGUNDA CARTA DEL APOSTOL SAN JUAN

¹Che co jae Juan. Jecuaeño aico upurugüirovia vae reta itenondeguarã. Nde co jae penti cuña Tumpa uparavo vae. Aicuatía aĩ cua tupapire ndeve jare nemembí reta pe. Che puau añete vae perovia ramo. Jae ramiño vi opaete añete vae uicuua vae reta perau che puau rami. ²Echa'ã jocua jecuaeño añete vae ico yandepia pe, jare icota yande ndive jaéño mai pegua.

³YandeRu Tumpa jare yandeYa Jesucristo - jae co yandeRu Tai - tumee peve ipiacavi jare ipuruparareco jare ipiacatu, añetete co peau ramo.

Moromboe añete vae Cristo regua güirovia vae

⁴Aicuua yave nemembí reta yugüireco añete vae rupi, ayerovia ete. Echa'ã yandeRu yandeocui jucuarãi yaico vaerã. ⁵Jare añave che numiñera, cherindi, nemandúa vaerã iyípi güive yaicuua vae re. Echa'ã iyípi güive Tumpa yandeocui yayerau vaerã. Cua aicuatía ndeve vae mboroyocui ipiau vae'ã co. ⁶Añetete yaau yave Tumpa, yayapota Tumpa iporoyocui reta. Jare iyípi güive piyandu cua mboroyocui. Jáeramo icavi co jecuaeño piyapo vaerã.

⁷Echa'ã ime ma ívi pe ñugüinoijeta upurumbitavi vae reta. Jae reta jei'ã Jesús co jae Cristo cuimbaerã uyeyapo vae. Jocua upurumbitavi vae reta oyovaicho Cristo ndive. ⁸Yaparavíqu ma tanta ñanoí vaerã Tumpa umeeta yandeve vae. Jáeramo piñemoa, agüiye vaerã pemicañi. Aipota penoi vaerã opaete Tumpa uipota penoi vaerã vae.

⁹Amocue vae ipia pe uyeminguela tẽi jae reta uicuua cavi ete mbaembæ regua íru vae reta güi. Èrei güirovia'ã yave moromboe añete vae Cristo regua, uicuua'ã Tumpa. Moromboe añete vae Cristo regua güirovia vae uicuua yandeRu Tumpa. Jae ramiño vi uicuua Tumpa Tai. ¹⁰Ou yave pepi penti oporomboe vae, umimbeu'ã yave peve cua moromboe añete vae, agüiye pemaeño jese upita vaerã perenta pe, jare agüiye pere chupe: "Tumpa ndiveño." ¹¹Echa'ã pere yave chupe: "Tumpa ndiveño", piñemíru ma jae ndive icavi mbae vae uyapo vae re.

Aipota aa pepi

¹²Aipota jeta jae peve, èrei jaeño ma jaeta peve cua tupapire pe. Echa'ã aipota aa pepi ñanemiari yandiyupe vaerã, yayerovia ete vaerã.

¹³Ndepiquii Tumpa uiitaravo vae imembí reta jei ndeve: "Tumpa ndiveño eí." Amén.

TERCERA CARTA DEL APOSTOL SAN JUAN

¹ Che co jae Juan. Jecuaeño aico upurugüirovia vae reta itenondeguarā. Che ndauau, cherivi Gayo, añete vae nderovia ramo.

² Cherivi, aicuua quirāi nde ndico cavi Tumpa coti. Jare jecuaeño ayerure Tumpa pe nderé, jecuaeño ndico cavi vaerā opaete mbaembae re jare agüiye vaerā nembbaerasi. ³ Echa'ā amocue yanderivi reta yugüero cua pe umimbeu cheve quirāi añete vae ico ndepia pe jare quirāi nde jecuaeño ndico añete vae rupi. Jáeramo ayerovia ete nderé. ⁴ Añete co, ayerovia ete ayandu yave quirāi cherai reta jecuaeño yugüiroco anete vae rupi.

Gayo ombori īru upurugüirovia vae reta

⁵ Cherivi, īru upurugüirovia vae reta nembori yave, yepe tēi ndicua'a reta, ndiyeyocui cavi neī Tumpa pe. ⁶ Jae reta etei umimbeu ndepuruau upurugüirovia vae cua pe uyembati vae reta pe. Icavi ete co nembori reta vaerā yugüero yave nerenta güi. Ndiyapota Tumpa uipota ndiyapo vaerā vae. ⁷ Echa'ā jae reta vi uyeyocui ñugüinōi Tumpa pe. Jare uguata reta opaete que rupi rambuevē, jei'ā upurugüirovia mbae vae reta pe ombori vaerā. ⁸ Jáeramo icavi co yande yambori reta vaerā. Echa'ā cuarāi yandepuere ñañemíru jae reta ndive umimbeu vaerā īru vae reta pe añete vae regua.

Icavi mbae vae Diótrefes uyapo vae

⁹ Aicuatía ma cua re upurugüirovia vae uyembati vae reta pe. Êrei Diótrefes uipota'a uyapo che jae chupe uyapo vaerā vae. Echa'ā icavi ete echo chupe uyemitenonde vaerā īru upurugüirovia vae reta ipite pe. ¹⁰ Jáeramo che aa yave pepi chemanduwa co Diótrefes uyapo vae re. Jae uyemingueta icavi mbae vae orecoeti. Omboiri'a etei upurugüirovia vae ambie coti güii pepi yugüiraa vae reta. Jae ramíño vi jei īru upurugüirovia vae reta pe agüiye vaerā omboiri reta. Jare ime yave upurugüirovia vae reta iquirēi omboiri reta vae, Diótrefes umaeno'a jese reta uyembati vaerā īru upurugüirovia vae reta ndive.

Opaete vae uyemingueta cavi Demetrio re

¹¹ Cherivi, jecuaeño iyapo icavi vae. Agüiye iyapo icavi mbae vae. Icavi vae uyapo vae Tumpa tai co. Êrei icavi mbae vae uyapo vae uicua'a Tumpa.

¹² Opaete vae uyemingueta cavi Demetrio re. Echa'ā jae jecuaeño ico añete vae rupi. Ore vi numimbeu peve jae jecuaeño uyapo icavi vae. Jare picuua ore numimbeu peve vae añete co.

Saludo reta

¹³ Aipota tēi jeta jae ndeve, êrei jaefio ma jaeta ndeve cua tupapire pe. ¹⁴ Êrei aipota aa apou ndepi imambaeño ñanemiari yandiyupe vaerā.

¹⁵ Tumpa tumee ndeve ipiacatu. Neamigo reta jei ndeve Tumpa ndiveño eī. Tumpa ndiveño toī cheamigo joco pe ñugüinōi vae reta.

LA CARTA DEL APOSTOL SAN JUDAS

¹ Che co jae Judas. Che co jae Jacobo tivi. Che ayeyocui Jesucristo pe. Aicuatía aí cua tupapire yandeRu Tumpa uiparavo vae reta pe. Tumpa perau jare peñono tee Jesucristo peguarã. Jesucristo jecuaeño uyandareco peré.

² Tumpa tumee peve jeta ete ipuruparareco jare ipiacatu jare ipuruau.

*Moromboe añete mbae vae reta
(2 P 2.1-7)*

³ Cherivi reta, aipota ete aicuatía peve yandiyembiasa regua. Êrei icavi echo cheve aicuatía vaerã peve íru mbaembae regua. Jáeramo cuá tupapire pe aipota pumbiaracuáa pepuere vaerã piñemiatangatú yandepurugüirovia re. Echa'á Tumpa uicuaaca cuá mburugüirovia oñono tee iyupeguarã vae reta pe. Agüiye etei perovia moromboe añete mbae vae. ⁴ Echa'á amocue cuimbae Tumpa jei vae uyapo mbae vae uñemííru viari pe reta ndive. Jae reta jei Tumpa ipiacavi chupe reta ramo, ipuere uyapo pichii vae. Êrei jae reta oyovaicho yandeYa Jesucristo ndive. Íma ma Tumpa uicuaaca yandeve quirái jae reta uiporarata co.

⁵ Jáeramo yepe tēi picuua ma, ërei aipota pumimandúa ye cua re: YandeYa uepi Israel pegua reta güeru Egipto güi. Ërei taicue rupi opa uyuca jei vae güürovia'á vae reta. ⁶ Jae ramiño vi Tumpa uiporaraca amocue ángel pe. Echa'á tenonde voi Tumpa umee chupe reta mbaepuere. Ërei jae reta uipota'á uyeyocui Tumpa pe ramo, ueya yugüürecoarenda. Jáeramo Tumpa uñapiti oñono reta pítumimbi pe. Joco pe jaeño mai pegua uáro ñugüüinoi Tumpa uña reta vaerã jocua ara pe. ⁷ Jae ramiño vi Tumpa uiporaraca Sodoma jare Gomorra jare tenta guasu iyipi rupi ñugüüinoi vae reta pegua reta pe. Echa'á jocua tenta guasu reta pegua reta jecuaeño uyapo aguasa jare cuimbae joco pe yugüüreco vae reta jecuaeño uyerereco uyupii. Jáeramo Tumpa uiporaraca ete chupe reta uicuaaca vaerã íru vae reta pe agüiye vaerã uyapo jae reta uyapo rami. Jáeramo Tumpa opa uyuca reta tata pe. Jare jocua tata uyemijaanga tata opa mbae vae re.

⁸ Jae ramiño vi moromboe añete mbae vae re oporomboe vae reta ipia pe uyemingueta cavi'á. Jae reta uyapo pichii vae jete pe, jare güüro mburuvicha reta, jare jei icavi mbae vae mbaepuere güüinoi vae reta coti. ⁹ Ërei Miguel etei - jae co ángel reta itenondegua - uipiu umbijeco vaerã aña guasu. Echa'á jae uyeaca yave aña guasu ndive Moisés jetecue re, jei chupe: "YandeYa tuñeengata ndeve." ¹⁰ Ërei moromboe añete mbae vae re oporomboe vae reta jei icavi mbae vae uicuaa mbae vae coti. Jae reta maemimba reta rami co. Echa'á yugüüreco jei vae reño. Jáeramo uiporaracata. ¹¹ Tumpa uiporaracata chupe reta. Uyapo reta Caín uyapo rami. Jae ramiño vi corepoti uipota ete ramo, uyapo reta icavi mbae vae Balaam uyapo rami. Jae ramiño vi uyapo reta Tumpa jei chupe reta agüiye vaerã uyapo vae, Coré uyapo rami. ¹² Pe reta piyembati yave pecaru vaerã piyerau reve, jae reta vi ucaru pe reta ndive imara mbae reve. Ërei icavi'á co ucaru reta vaerã pe reta ndive. Echa'á añetete'á co peíru reta. Jae reta amapitú ama mbaeti güüinoi vae reta rami co. Echa'á jocua nunga amapitú tanta osi ívitu ete yave, ërei ama oquí'á etei. Jae ramiño vi temiti reta ía ipiru ndei ipuere yagüiye mbove vae rami co. Echa'á taicue rupi temiti reta etei ipiru, iya opa omombo japo reta reve ramo. ¹³ Ou ívitu tanta uyepeyu í guasu íárambo yave, uyeyapo iaparoa tuicha vae, ërei í íárambo jaeño uyecuua tiriyai. Jocua oporomboe vae reta jocua iaparoa rami co. Echa'á jae reta uyapo uñemimaraca vaeráno. Jae ramiño vi jae reta yasitata uguata vae reta rami co. Echa'á yugüüraata pítumimbi oí vae pe yugüüreco vaerã joco pe jaeño mai pegua.

¹⁴ Jare Enoc - jae co siete ñemoñaas pegua Adán güi vae - jae co penti Tumpa iñee aracae umímbeu vae - jei cua reta re cuarái: "Mase, yandeYa outa jeta ete oñono tee iyupeguarã vae reta ndive. ¹⁵ Jare ou yave, uáata opaete vae. Uicuaacata quirái Tumpa jei vae uyapo'á vae reta jecuaeño uyapo icavi mbae vae uipota'á uyapo Tumpa jei vae ramo. Jae ramiño vi uicuaacata quirái jocua iyoa vae reta jei icavi mbae vae icoti." Jucuarái jei.

¹⁶ Jae reta iñeenguru íru vae reta re jare iñera íru vae reta re. Jecuaeño yugüüreco jei vae reño. Umbiyerovia-raangaiño íru vae reta. Echa'á uipotañoi íru vae reta umee vaerã mbaembae chupe reta.

Piñemimiráta pepurugüirovia re

¹⁷ Ërei, cherivi reta, pemandúa yandeYa Jesucristo jemimondo reta umímbeu peve vae re. ¹⁸ Echa'á jae reta umímbeu peve quirái ara taicuega reta pe amocue vae oyoyaita Tumpa iñee umímbeu vae reta jare quirái jecuaeño yugüürecota jei vae reño Tumpa jei vae uyapo'á ramo. ¹⁹ Jocua reta iporomboe güürovia vae reta uyembiyao moromboe añete vae güürovia vae reta güi. Echa'á jocua reta uicuaa'á etei

Tumpa jare mbaetí güinoi Espíritu Santo ipia pe.²⁰ Êrei piñemimirâta pepurugüirovia re, cheriví reta. Echa'ã pepurugüirovia Tumpa pegua co. Jare piyerure Espíritu Santo imbaepuere rupi.²¹ Jecuaeño pico cavi, Tumpa ipuere vaerâ uicuaaca peve ipuruau. Jare jecuaeño peäro piyerovia reve penoi vaerâ tecove opa mbae vae yandeYa Jesucristo ipuruparareco rupi.

²² Piparareco amocue ipurugüirovia re ipirâta'ã vae. ²³ Pemborî ūru vae reta uyembiasaca vaerâ mbaembæ tata güi peepi rami. Piparareco reta, êrei piñemoa vi imbaeyoa reta güi. Echa'ã icavi co piñamitâa vaerâ chugüi imbaeyoa reta.

Yambiadora Tumpa

²⁴⁻²⁵ Añave yambiadora Tumpa. Echa'ã jae yanembâasa yandeYa Jesucristo uyapo vae rupi. Jaeño co Tumpa. Jae uyembidoraca ete co jare güinoi mbaepuere tuicha ete vae añave jare jaeño mai pegua. Jáeramo ipuere umee peve mbaepuere agüiye vaerâ pepia chugüi jare piyemboi vaerâ teco mbae reve jae jovai. Joco pe peechata Tumpa jare piyerovia eteta. Amén.

APOCALIPSIS

O REVELACIÓN A SAN JUAN

¹Che co jae Juan. Che co jae Jesucristo jembiocui. Tumpa uicuaaca Jesucristo pe imambae uyeyapota vae. Jare Jesucristo ombou ángel uyeyocui chupe vae umimbeu vaerā cheve, che amimbeu-yuapi ye vaerā Jesucristo jembiocui reta pe. ²Cua aicuatía vae Tumpa iñee co. Jesucristo etei umimbeu cheve cua. Che aecha cua opaete.

³Cua amimbeu peve ndei uyeyapo mbove. Cua umingueta vae reta jare cua uyandu vae reta uyeroviata co, uyapo reta yave Tumpa jei vae cua pe aicuatía vae. Echa'á uyaro ma ara reta cua amimbeu peve vae uyeyapo vaerā.

Siete tenta guasu Asia pegua pe uyembatimbati vae reta pe

⁴⁻⁵Che aicuatía aí cua tupapire pepurugüirovia vae siete tenta guasu Asia pegua pe piyembatimbati vae reta pe. Tumpa jare Espíritu Santo siete jembiapo güínoi vae - jae Tumpa iguapia jovai oí - jare Jesucristo tumee peve ipiacavi jare ipiacatu. Tumpa iyípi güive jare añave jecuaeño ico. Jare jae jecuae oíta. Jesucristo co jae jecuaeño umimbeu cavi Tumpa regua vae. Jae tenonde voi icove ye ou umanocue vae reta ipite güí. Jae co opaete iví pegua reta juvicha guasu reta Juvicha. Jae yanderau jare umbai opaete yanembaeyoa reta jugüí pe. ⁶Jare yandeapo mburuvicha guasu retarā jare sacerdote retarā yayeyocui vaerā Tumpa pe - jae co Jesucristo Tu. Jesucristo tuyembiadoraca jare tugüínoi opaete mbaepuere jaeño mai pegua. Amén.

⁷Mase, jae outa amapítu reve, jare opaete vae uechata. Israel pegua reta vi uechata. Echa'á Israel pegua reta uicutuca. Jare opaete jocua iví pegua reta ipiatiti eteta jese. Cuaráí tuyeyapo. Amén.

⁸-Che co jae Alfa jare Omega jee vae —jei yandeYa Tumpa—. Che co jae tenondegua vae jare taicuega vae. Che co jae añave jare iyípi güive ico vae. Che co jae jecuae oíta vae. Che co jae opaete mbaepuere güínoi vae —jei.

Juan uecha cuimbaerā uyeyapo vae

⁹Che co jae periqueí Juan, Jesús re yarovia ramo. Che vi aiporara aí pe reta rami Tumpa iporoyocuia jeco pegua, jare chepiaguasu pe reta pepiaguasu ramo.

Che aí iví i mbite pe oí vae Patmos jee vae pe penti peresorá Tumpa iñee amimbeu jare Jesús regua chemíri ramo. ¹⁰Espíritu Santo imbaepuere rupi añevae domingo ara pe, jare ayandu cheraicue cotí ñee jiapu ete vae. Jiapu penti trompeta rami. ¹¹Jare fíee jee:

—Che co jae Alfa jare Omega jee vae. Che co jae tenondegua vae jare taicuega vae.

Jayave jei:

—Icuatía penti tupapire pe ndeechata vae. Jayave emondo tupapire upurugüirovia vae siete tenta guasu Asia pegua pe uyembatimbati vae reta pe. Emundo Efeso pe, jare Esmirna pe, jare Pérgamo pe, jare Tiatira pe, jare Sardis pe, jare Filadelfia pe, jare Laodicea pe —jei cheve.

¹²Jayave ayerova aecha vaerā chemingueta vae. Jare ayerova amae yave, aecha siete vela iguapica oro pegua reta. ¹³Jare aecha jocua siete vela iguapica reta ipite pe penti cuimbae. Cuimbaerá uyeyapo vae echa cheve. Güínoi temimonde pucu ipi rupi uväe vae. Jare ipítia rupi aecha güínoi penti cuacuua oro pegua. ¹⁴Ía tí ovecha-raagüe tí vae rami echa cheve. Ti así co roí tí así vae rami. Jare jesa tata jendí oí vae rami co. ¹⁵Ipi bronce uyembacu yave tata pe uyepiro ete vae rami echa cheve. Jare uyeminguela yave, iñee jiapu ete i guasu jiapu rami. ¹⁶Jae güínoi siete yasitata reta ipo iyacata pe, jare iyuru güí oé penti quisepecu jaimbeyovai vae. Jova jembipe ete guarasi ara mbite yave jembipe rami.

¹⁷Jare aecha yave, aa jae jovai cuimbae umano vae rami. Jayave jae oñono ipo iyacata cheré jare jei cheve:

—Agüíye equiye. Che co jae tenondegua vae jare taicuega vae —jei—. ¹⁸Che co jae jecuaeño ico vae. Amano, érei, mase, añave aico jaeño mai pegua. Jare che anoi mbaepuere mano jare cañitei re —jei—. ¹⁹Icuatía opaete mbaembae ndeecha vae regua jare emimbeu mbae re uyemijaanga jocua mbaembae. Jucuaráí nemimbeuta mbae taicue rupi uyeyapota vae —jei cheve—. ²⁰Taicuaaca ndeve mbae re uyemijaanga siete yasitata reta chepo cheacata pe ndeecha vae jare mbae re uyemijaanga siete vela iguapica oro pegua reta. Siete yasitata reta uyemijaanga siete ángel reta re. Jocua siete ángel reta uyeyocui upurugüirovia vae jocua siete tenta guasu reta pe uyembatimbati vae reta pe. Jare siete vela iguapica reta uyemijaanga upurugüirovia vae jocua siete tenta guasu reta pe uyembatimbati vae reta re —jei—.

¹ Icuatía ángel upurugiürovia vae Efeso pe uyembati vae reta pe uyeyocui vae pe cuarái: ‘Cua jei siete yasitata reta ipo iyacata pe uipisi vae - jae siete vela iguapica oro pegua reta ipite pe uguata vae co:

² Che aicuua peparavíqui. Tanta peparavíqui jare pepiaguasu vi. Piñemifiru'ã icavi mbae vae uyapo vae reta ndive. Ime pepite pe ñugüinoi jocua “Che co jae Jesús jemimondo” jei vae reta. Ërei jae reta Jesús jemimondo reta'ã co. Jare pe reta peeca picuua vaerä añetete ra co Jesús jemimondo reta. Jare añaave picuua iyapu reta co. ³ Jare pe reta cherau ramo, pepiaguasu jare pemiguanta pecueri mbae reve.

⁴ Ërei chepuere pumbijeco mbae re. Jae co cua: Cherau'ã ma tenonde yave cherause vae rami.

⁵ Jáeramo pemandúa quirái tenonde yave cherau ete. Peeya piyeminguela icavi mbae vae pepia pe oï vae, jare piyapo ye mbaravíqui reta tenonde yave piyapose vae rami. Echa'ã peeya'ã yave piyeminguela icavi mbae vae pepia pe oï vae, aata imambae pepi jare ambisirita pevela iguapica jenda güi.

⁶ Ërei ayerovia cua re: Nicoláita reta uyapo vae icavi'ã peve. Echa'ã jocua icavi'ã ete vi cheve.

⁷ Uipota uyandu vae tuyapisaca Espíritu Santo upurugiürovia vae uyembatimbati vae reta pe jei vae re. Upurumiamiri vae pe ameeta jou vaerä jocua ívira tecove umee vae güi. Jocua ívira ime paraíso mbite pe oï. Joco pe ico Tumpa.’

Jucuarái icuatía —jei—.

Ñee Esmirna peguarā

⁸ Jare icuatía ángel upurugiürovia vae Esmirna pe uyembati vae reta pe uyeyocui vae pe cuarái: ‘Cua jei jocua tenondegua vae jare taicuegua vae - jae umano, Ërei icove ye: ⁹ Che aicuua peparavíqui jare quirái piporara jare peparavete (ërei picocatu co Tumpa coti). Aicuua vi quirái jocua judío-raanga reta jei icavi mbae vae pecoti. Yepe tẽi jei reta: Ore co jae judío reta, Ërei jae'ã co. Echa'ã jae reta uyapo Satanás jembiapo. ¹⁰ Agüiye pequije piporarata vae güi. Mase, aña guasu peñonocata amocue pe reta peresoríru pe, uyecuua vaerä pepurugiürovia añetete ra. Jare piporarata diez ara pegua. Jecuaeño perovia cheré, yepe tẽi aramoi pemanota pepurugiürovia jeco pegua. Jucuarái yave, ameeta peve tecope opa mbae vae.

¹¹ Uipota uyandu vae tuyapisaca Espíritu Santo upurugiürovia vae uyembatimbati vae reta pe jei vae re. Upurumiamiri vae re ndarau etei mbaepuere güinoi mano mociua.’

Jucuarái icuatía —jei—.

Ñee Pérgamo peguarā

¹² Jare icuatía ángel upurugiürovia vae Pérgamo pe uyembati vae reta pe uyeyocui vae pe cuarái: ‘Cua jei quiseputu jaimbeyovai vae güinoi vae:

¹³ Aicuua peparavíqui jare quiape pico. Echa'ã perenta guasu pejeta vae uyapo Satanás jembiapo. Ërei pe reta jecuaeño picuacac quirái perovia cheré. Peeya'ã etei pepurugiürovia, yepe tẽi yavai ete peve jocua ara reta pe Antipas uyeyucaca pepite pe yave. Antipas uyeyucaca, chemimbeu cavi ramo. Echa'ã Satanás etei ico perenta guasu pe.

¹⁴ Ërei chepuere pumbijeco mbovi mbaembae re. Echa'ã ime pepite pe ñugüinoi Balaam iporomboe güirovia vae reta. Balaam omboe Balac quirái ipuere umbiavai Israel pegua reta. Echa'ã jae reta umbipi jout tembíu tumpa-raanga reta pe uñemee vae jare uyapo aguasa. ¹⁵ Jae ramíño vi ime pepite pe ñugüinoi nicolaíta reta iporomboe güirovia vae reta, jare jocua moromboe icavi'ã ete cheve.

¹⁶ Jáeramo peeya piyeminguela icavi mbae vae pepia pe oï vae. Peeya'ã yave, aata pepi imambae jare añaerárota jae reta ndive. Aiporuta jese reta quiseputu cheyuru güi oë vae.

¹⁷ Uipota uyandu vae tuyapisaca Espíritu Santo upurugiürovia vae uyembatimbati vae reta pe jei vae re. Upurumiamiri vae pe ameeta jocua maná uyecuua mbae vae. Ameeta vi chupe penti ita tí vae. Jocua ita re ime penti tee ipiáu vae uyecuatía oï. Jaeño ameeta ita chupe vae uicuaata jocua tee.’

Jucuarái icuatía —jei—.

Ñee Tiatira peguarā

¹⁸ Jare icuatía ángel upurugiürovia vae Tiatira pe uyembati vae reta pe uyeyocui vae pe cuarái: ‘Cua jei Tumpa Tai. Jae jesa tata jendí oï vae ramí co, jare ipi bronce uyembacu yave tata pe uyepiro ete vae ramí:

¹⁹ Che aicuua peparavíqui jare pepuruau jare pepurugiürovia jare quirái piyeyocui cheve jare pepiaguasu. Jare jecuaeño peparavíqui tanta. Añete co, tenonde yave peparavíqui tanta, Ërei taicue rupi peparavíqui tanta ete.

²⁰ Ërei chepuere pumbijeco cua re: Pemaño jocua cuña Jezabel jee vae re oporomboe vaerä pepite pe. Jae jei jae co penti cuña Tumpa iñee umimbeu vae. Ërei jae umbitavi cherembiocui reta. Echa'ã jae umimbeu chupe reta uyapo vaerä aguasa jare jou vaerä tembíu tumpa-raanga reta pe uñemee vae. ²¹ Jare ameet ma ara reta jocua cuña pe ueya vaerä iyeminguela icavi mbae vae ipia pe oï vae, agüiye vaerä uyapo aguasa. Ërei jecuaeño uyapo jocua icavi mbae vae. ²² Mase, amimbaerasita jocua

cuña, jare aiporaraca eteta jae ndive menda re uyuvanga vae reta pe, ueya'ã reta yave icavi mbae vae jae ndive uyapo vae.²³ Jare ayucata jocua cuña imembí reta, jare opaete upurugüirovia vae uyembatimbatí vae reta uicuata quirái che aicuua opaete vae iyemingueta ipia pe oĩ vae. Jare ameeta peve penti penti mbae piyapo vae rupi.²⁴⁻²⁵ Êrei tae peve cua: Cua reño pumbijeco. Êrei piñemimiráta mburugüirovia penoi vae re che ayu ye regua. (Cuarái chemiari aĩ upurugüirovia vae Tiatira pegua jocua cuña iporomboe güüirovia mbae vae reta pe. Echa'ã jae reta uicuua'ã Satanás iporomboe uycuua mbae vae jei chupe vae.)

²⁶ Upurumíamiri vae pe ameeta mbaepuere ipuere vaerã oyocui ivi pegua reta, jecuacéno yave uyapo cheparavíqu. ²⁷ Jare oyocuita penti popoca fierro pegua pe. Güinoita mbaepuere jese reta mbaepuere penoi pembiperasoraso vaerã penti iru ñaeu pegua vae rami. Echa'ã cheRu umee cheve etei cua nunga mbaepuere. ²⁸ Jare ameeta chupe yasitata neimbove asi uycuua vae.

²⁹ Uipota uyandu vae tuyapisaca Espíritu Santo upurugüirovia vae uyembatimbatí vae reta pe jei vae re.'

Jucuarái icuatía —jei—.

3

Ñee Sardis peguarã

¹ Jare icuatía ángel upurugüirovia vae Sardis pe uyembati vae reta pe uyeyocui vae pe cuarái: 'Cua jei jocua siete yasitata reta güünoi vae - jae co Espíritu Santo siete jembiapo güünoi vae uyeyocui chupe vae:

Che aicuua peparavíqui. Íru vae reta jei tẽi picove catu co, êrei picove catu'ã co Tumpa coti.² Piñemoo ngatu jare piñemimiráta jocua imeño penoi vae re. Echa'ã pepiráta'ã etei jese. Piyapo'ã mbaravíqui Tumpa uipota piyapo vaerã vae.³ Jáeramo pemandúa Tumpa umee peve vae re jare quirái piyapisaca jese. Piñemimiráta jocua re, jare peeya piyemingueta icavi mbae vae pepia pe oĩ vae. Echa'ã piñemoo ngatu'ã yave, aata pepi ímambae penti imonda vae uique o pe rami, jare ndarau picuua quirái yave ra aata pepi.

⁴ Ime mboví Sardis pegua uyapo'ã icavi mbae vae reta. Jae reta uguatata che ndive jemimonde tĩ vae reve icavi vae uyapo vae ramo.

⁵ Upurumíamiri vae pe ameeta temimonde tĩ vae omonde vaerã, jare ndarau ambai jee libro tecove opa mbae vae pegua güi. Aicuaacata cheRu jare ángel cheRu pe uyeyocui vae reta jovaque jae co chembae.

⁶ Uipota uyandu vae tuyapisaca Espíritu Santo upurugüirovia vae uyembatimbatí vae reta pe jei vae re.'

Jucuarái icuatía —jei—.

Ñee Filadelfia peguarã

⁷ Jare icuatía ángel upurugüirovia vae Filadelfia pe uyembati vae reta pe uyeyocui vae pe cuarái: 'Cua jei iyoa mbae vae. Jae co añete vae jei vae. Jae güünoi mbaepuere Tumpa umee David pe vae. Jocua mbaepuere penti onque illave rami co. Echa'ã jae uipea yave penti onque, mbaeti quía ipuere uyuquenda ye. Jae ramíño vi jae uyuquenda yave penti onque, mbaeti quía ipuere uipea ye:

⁸ Che aicuua peparavíqui. Mase, aechaca ma peve penti onque uyepea oĩ vae. Mbaeti quía ipuere uyuquenda jocua onque. Pembaepuere michi co, êrei piyapo che jae peve piyapo vaerã vae jare checuaucu'ã.

⁹ Ime pepite pe ñugüünoi jocua uyapo Satanás jembiapo vae reta. Yepe tẽi jei reta: Ore co jae judío reta, êrei jae'ã co. Iyapu reta. Mase, ayapota chupe reta yugüiraa vaerã uyeatica perovai, jare aicuaacata chupe reta che puau co.

¹⁰ Piyapo che jae peve piyapo vaerã vae pepiaguasu reve ramo, che puepita opaete ivi pe yugüireco vae reta uiporarata vae güi.¹¹ Mase, aa yeta ímambae. Piñemimiráta mburugüirovia penoi vae re, agüüye vaerã iru vae pe uñemee ndecorona ndegüi.

¹² Upurumíamiri vae pe ameeta ico vaerã cheTumpa jo pe, jare ndarau etei oẽ chugüi. Güinoita mbaepuere tuicha vae penti oquita ipiráta ete vae rami. Jare aicuatiata jese cheTumpa jee jare cheTumpa jenta guasu jee - jae co Jerusalén ipiau vae cheTumpa ombouta ara güi vae. Jae ramíño vi aicuatiata jese cheree ipiau vae.

¹³ Uipota uyandu vae tuyapisaca Espíritu Santo upurugüirovia vae uyembatimbatí vae reta pe jei vae re.'

Jucuarái icuatía —jei—.

Ñee Laodicea peguarã

¹⁴ Jare icuatía ángel upurugüirovia vae Laodicea pe uyembati vae reta pe uyeyocui vae pe cuarái: 'Cua jecua Amén jee vae. Jae jecuaeño umímbue cavi añete vae Tumpa regua. Jae co opaete Tumpa uyapo vae iYa:

¹⁵ Che aicuas peparavíqu, jare quirái chemitaréi'á jare cherau'á. Icavita tēi co cheve chemitaréi yave ani cherau yave. ¹⁶ Chemitaréi'á jare cherau'á. Jáeramo pomombota, penti cuimbae tembíu uyúe mbae vae iyuru güi omombo rami.

¹⁷ Echa'á pe reta pere cuarái: Yaicocatu co. Jeta mbaembae ñanoi. Mbaeti etei mbae uata yandeve. Jucuarái pere. Ërei picuas'á quirái pepiatití ete, jare peparavete, jare peresa mbae, jare penani.

¹⁸ Che pumbiaracuas pegua vaerá chegüi oro tata pe uyembichiriri iquiacie oé vaerá chugüi vae, picocatu vaerá, jare temimonde tī vae peremimonderá, agüiye vaerá penani yave pemara. Jae ramíño vi che pumbiaracuas piñono vaerá moa peresa pe pepuere vaerá pemae. ¹⁹ Che aiporaraca aau vae pe, amboe vaerá. Jáeramo piñemiatangátu jare peeya piyeminguela icavi mbae vae pepia pe oí vae.

²⁰ Mase, che ayemboi aí onque pe jare ambopu aí onque. Ime yave quía chiñee uyandu vae, uipea yave onque, aiqueta acaru vaerá jae ndive, jare jae ucaruta che ndive.

²¹ Upurumiamíri vae pe ameeta uguapi vaerá che ndive cheguapía pe. Echa'á che vi apurumiamíri jare aguapi cheRu ndive iguapía pe.

²² Uipota uyandu vae tuyapisaca Espíritu Santo upurugüirovia vae uyembatimbati vae reta pe jei vae re.'

Jucuarái icuatía –jei.

4

Ara pe ñugüinói vae reta umbiadora yandeYa

¹ Cua jaicue rupi amae jare aecha penti onque uyepea oí ara pe. Jare ñee tenonde yave ayandu vae jie cheve. Penti trompeta rami iñeeáta reve jei cheve:

—Iyupi cua pe jare aechacata ndeve mbaembae uyeyapota vae.

² Jare jupivoiño Espíritu Santo imbaepuere rupi aecha penti guapia ara pe jare quía uguapi oí guapia pe. ³ Jare joco pe uguapi oí vae ita ipóra ete vae reta jaspe jare cornalina jee vae echá cheve. Jare aecha penti yií jocua guapia iyípi rupi. Jare yií ita ipóra ete vae esmeralda jee vae echá cheve. ⁴ Jare aecha jocua guapia iyípi rupi íru veinticuatro guapia reta. Jare aecha jocua guapia reta pe uguapi ñugüinói veinticuatro tenondegua reta. Omonde reta temimonde tī vae jare iñáca re güinói reta corona oro pegua. ⁵ Jare jocua guapia güi ou ama uvera rami vae. Jare ayandu jiapu vae reta. Jare aecha jocua guapia jovai siete lámpara jendi ñugüinói vae reta. Jae co Espíritu Santo siete jembiapo güinói vae. ⁶ Jare jocua guapia jovai aecha vi i guasu rami vae, Ërei vidrio pegua echá cheve. Jare jocua guapia iyípi pe etei aecha irundi mbaembae icove vae reta. Jae reta güinói jeta jesa ipuere vaerá umae jenonde jare jaicue uyerova mbae reve. ⁷ Jare penti jocua icove vae penti yaguapítá echá. Jare íru icove vae penti toro echá. Jare íru icove vae jova cuimbae jova echá. Jare íru icove vae penti güíraquee tuicha vae uveve oí vae echá. ⁸ Jare penti penti jocua irundi mbaembae icove vae reta güinói seis ipepo reta, jare jete rupi güinói jeta jesa. Jare jecuaeño jei reta:

—YandeYa Tumpa opaete mbaepuere güinói vae iyoa mbae etei co. Jae iyípi güive jare añave jecuaeño ico. Jare jae jecuaeño.

Jucuarái jei reta ara rupi jare pítu rupi. Uputuu'á etei reta.

⁹ Jare jocua mbaembae icove vae reta umbiadora jocua guapia pe uguapi vae jecuaeño ico vae, jare umee yasurupai chupe. ¹⁰ Jare jocua veinticuatro tenondegua reta uyeatíca jocua guapia pe uguapi vae jecuaeño ico vae jovai umbiadora vaerá, jare oñono reta icorona jocua guapia jovai, jare jei reta:

¹¹ —Jupi co nde nenoi vaerá opaete yembiadora jare mbaepuere, oreYa Tumpa. Echa'á nde ndiyapo opaete mbaembae. Opaete mbaembae uyeyapo nde ndere vae rupi —jei reta.

5

Tupapire jare Ovecha-rai

¹ Jare aecha penti libro guapia pe uguapi vae ipo iyacata pe. Jocua libro güinói uyequatiacue japipe rupi jare icupe rupi, jare uyeyuquenda oí. Güinói siete yemboyaa, agüiye vaerá quía uipea umingueta.

² Jare aecha penti ángel ipiráta vae, jare ángel iñeeáta reve jei:

—¿Ime pa quía jupi co cua libro uipea vaerá vae? ¿Ime pa quía jupi co cua libro iyemboyaa uequi vaerá vae? —jei.

³ Jare mbaeti co jocua libro ipuere uipea vae ara pe jare ivígüi pe. Mbaeti co quía ipuere umae jese.

⁴ Jare ayao ete. Echa'á mbaeti quía uñeväe jupi libro uipea umingueta vaerá vae. Mbaeti quía uñeväe jupi libro re umae vaerá vae.

⁵Jayave penti tenondegua vae jei cheve:

—Agiüye iyao. Mase, Judá iñemoñaa reta pegua Yaguapíta jee vae - jae co David Iyipi jee vae - upurumiamiri ma uequi vaerā jocua siete libro iyemboyaa jare uipea vaerā tupapire —jei.

⁶Jare aecha penti Ovecha-raí. Uyeyucaca echa cheve. Uyemboi oí jocua guapia jare jocua irundi mbaembæ icove vae reta ipâu pe, jocua tenondegua reta ipite pe. Jae güïnoi siete jåti jare siete jesa - jae co Espíritu Santo siete jembiapo güïnoi vae opaete ivi rupi uyemondoca vae. ⁷Jare jocua Ovecha-raí oo uequi libro guapia pe uguapi vae ipo iyacata güi. ⁸Jare libro güïnoi ma yave, jocua irundi mbaembæ icove vae reta jare jocua veinticuatro tenondegua reta uyeatíca Ovecha-raí jovai. Penti penti güïnoi arpa jare mbae ipiche cavi vae tîneé oí copa oro pegua pe. Jocua mbae ipiche cavi vae uñenono tee Tumpa peguarâ vae reta iyerure reta co.

⁹Jare jae reta ucanta penti canta ipiau vae. Ucanta cuarâi:

—Jupi co nde nenoí vaerâ jocua libro. Jupi co nde ndeequi vaerâ jocua libro iyemboyaa reta. Echa'â nde ndiyeyucaca jare ndeepi Tumpa imbae retardâ nderugüi rupi opaete ivi ambiembie pegua reta ipite güi. ¹⁰Jare ndiyapo reta mburuvicha guasu retardâ jare sacerdote retardâ ipuere vaerâ uyeyocui ñaneTumpa pe. Jare oporoyocuita reta ivi pe.

Jucuarâi ucanta reta.

¹¹Jayave amae ye, jare ayandu jeta ángel reta iñee. Jocua ángel reta uyemboi ñugüïnoi jocua guapia jare jocua mbaembæ icove vae reta jare jocua tenondegua reta iyipi rupi. Jare uyepapa jeta ye ye.

¹²Jare ángel reta iñeeâta reve jei:

—Jupi co Ovecha-raí uyeyucaca vae güïnoi vaerâ mbaepuere, jare icocatu vaerâ, jare iyaracuaa vaerâ, jare uyembadoraca vaerâ. Jupi co yasurupai tuicha ñamee vaerâ chupe —jei reta.

¹³Jayave opaete ara pe jare ivi pe jare ivigüi pe jare i guasu pe ñugüïnoi vae reta ayandu jei:

—Tuyembadoraca guapia pe uguapi vae jare Ovecha-raí jaeño mai pegua. Ñamee yasurupai tuicha chupe reta. Tugüïnoi reta opaete mbaepuere.

¹⁴Jayave jocua irundi mbaembæ icove vae reta jei:

—Amén.

Jare jocua veinticuatro tenondegua reta uyeatíca jare umbiadora imeño mai ico vae.

6

Libro iyemboyaa reta

¹Jare aecha Ovecha-raí uipea penti jocua libro iyemboyaa. Jayave ayandu penti mbaembæ icove vae jei:

—Eyu.

Ara jiapu vae echa uyemingueta yave.

²Jare aecha penti cavayu tî vae, jare opo cavayu re vae güïnoi güïrapa. Jare uñemee chupe corona. Jare jecuaeño upurumiamiri.

³Jare Ovecha-raí uipea íru libro iyemboyaa. Uyepea ma mocui. Jayave ayandu íru mbaembæ icove vae jei:

—Eyu.

⁴Jare aecha oo íru cavayu. Êrei cua cavayu pîta vae. Jare opo cavayu re vae pe uñemee mbaepuere umiñerâo vaerâ ivi pegua reta uyeyuca vaerâ. Jare uñemee vi chupe penti quisepucu tuicha ete vae.

⁵Jare Ovecha-raí uipea íru libro iyemboyaa. Uyepea ma mbapi. Jayave ayandu íru mbaembæ icove vae jei:

—Eyu.

Jare aecha íru cavayu. Êrei cua cavayu jû vae. Jare opo cavayu re vae güïnoi ipo pe umipesa pipe vae.

⁶Jare ayandu ñee jocua irundi mbaembæ icove vae reta ipite pe jei:

—Mocui libra trigo jepi penti ara mbaravíqui jepi pegua, jare seis libra cebada jepi penti ara mbaravíqui jepi pegua. Jare agüye erucumegua aceite jare vino.

⁷Jare Ovecha-raí uipea íru libro iyemboyaa. Uyepea ma irundi. Jayave ayandu íru mbaembæ icove vae jei:

—Eyu.

⁸Jare aecha íru cavayu. Êrei cua cavayu iyu vae. Jare opo cavayu re vae jee co Mano. Jare Cañitei jee vae oo Mano jee vae jaicue. Jare uñemee chupe reta mbaepuere jeta ye ye ivi pegua reta re, ipuere vaerâ uyucaca reta quisepucu pe jare caruai pe jare mbaerasi pe jare maemimba pochi vae reta pe.

⁹Jare Ovecha-raí uipea íru libro iyemboyaa. Uyepea ma pandepo. Jayave aecha uñemeearendâ igüi pe Tumpa iñee jeco pegua uyeyucaca vae reta. Echa'â jae reta uyeyucaca, umimbeu Tumpa iñee íru vae reta pe ramo. ¹⁰Jare jae reta iñeeâta reve jei:

—Nde co jae iyoa mbae vae, oreYa. Nde co jae añete vae jei vae. ¿Maera pa ndeiño neña ivi pegua oreyuca vae reta? ¿Quirâi yave pa ndiporaracata chupe reta? —jei reta.

¹¹ Jare temimonde tī vae uñemee penti penti pe, jare penti vae jei chupe reta:

—Peputuuño joco pe michi pegua. Echa'ā uyeyucacata vi rani perivi Tumpa pe uyeyocui vae reta, pe reta piyeyucaca rami —jei.

¹² Jare aecha Ovecha-rai uipea ūru libro iyemboyaa. Uyepea ma seis. Jayave ivi tanta ucāta. Jare guarasi uyeyapo jū penti tarapo jū vae rami, jare yasi uyeyapo pīta tugüi rami. ¹³ Jare yasitata ara re ñugüinoi vae reta oa ivi pe, penti iva ía yagüiye mbae vae reta oa jáca güi ivitu tanta umicāta yave vae rami. ¹⁴ Jare ara etei uyembiyao mbite rupi jare uñenoma penti tupapire uñenoma rami. Jare opaete ivitu reta jare ivi i mbite pe ñugüinoi vae reta usiri jenda güii. ¹⁵ Jare ivi pegua reta juvicha guasu reta jare mburuvicha reta jare icocatu vae reta jare sundaro reta juvicha reta jare mbaepuere güinoi vae reta jare opaete uyeyocui vae reta jare opaete uyeyocui mbae vae reta uñemi ivicua reta pe jare ita ivitu reta re ñugüinoi vae reta ipite rupi. ¹⁶ Jare jei ivitu guasu reta jare ita reta pe:

—Pea oreré. Oreñomi guapia pe uguapi vae jova güi. Oreñomi, agüiye vaerā nduecha Ovecha-rai. Echa'ā jae pochi ete oreve —jei reta—. ¹⁷ Ou ma uvae ara Ovecha-rai pochi vaerā oreve, jare mbaeti etei quía ipuere umiaguanta —jei reta.

7

Ciento cuarenta y cuatro mil vae reta

¹ Jare cua jaicue rupi aecha irundi ángel reta uyemboi ñugüinoi ivi pe. Penti uyemboi guarasi oē vae coti, jare ūru uyemboi guarasi uique vae coti. ūru uyemboi norte coti, jare ūru uyemboi sur coti. Jare jae reta oyopia irundi ivitu ivi iyipi rupi uyepeyu vae, agüiye vaerā uyepeyu ivi reta iárambo jare i guasu reta iárambo, jare agüiye vaerā uipeyu ivira reta. ²⁻³ Jare aecha ūru ángel ou guarasi oē vae coti güii, jare jocua ángel güeru Tumpa imeño mai ico vae imarca. Jayave ángel iñeeáta reve jei jocua irundi ángel reta pe:

—Agüiye perucumegua ivi reta jare i guasu reta jare ivira reta, ndei ñaneTumpa jembiocui reta isiva numimarpa mbove.

Echa'ā jocua irundi ángel pe uñemee ma mbaepuere urucumegua vaerā ivi reta jare i guasu reta.

⁴ Jare ayandu mbovi Tumpa jembiocui reta ángel reta umímarca vae. Umímarca reta ciento cuarenta y cuatro mil Israel pegua reta opaete ati reta güii. ⁵ Umímarca reta doce mil Judá iñemoñaa reta güii. Umímarca reta doce mil Rubén iñemoñaa reta güii. Umímarca reta doce mil Gad iñemoñaa reta güii. ⁶ Umímarca reta doce mil Aser iñemoñaa reta güii. Umímarca reta doce mil Neftalí iñemoñaa reta güii. Umímarca reta doce mil Manasés iñemoñaa reta güii. ⁷ Umímarca reta doce mil Simeón iñemoñaa reta güii. Umímarca reta doce mil Leví iñemoñaa reta güii. Umímarca reta doce mil Isacar iñemoñaa reta güii. ⁸ Umímarca reta doce mil Zabulón iñemoñaa reta güii. Umímarca reta doce mil José iñemoñaa reta güii. Umímarca reta doce mil Benjamín iñemoñaa reta güii.

Jeta ete vae jemimonde tī vae reta

⁹ Cua jaicue rupi aecha jeta ete vae opaete ivi ambiembie ipite güii yugüeru vae reta. Mbaeti quía ipuere uipapa. Jae reta uyemboi ñugüinoi jocua guapia jare Ovecha-rai jovai. Jae reta jemimonde tī jare ipo pe güiñoi carandai joqui. ¹⁰ Jare iñeeáta reve jei reta:

—ÑaneTumpa guapia pe uguapi vae upurumbiasa vae co. Ovecha-rai vi upurumbiasa vae co —jei reta.

¹¹ Jare opaete ángel reta uyemboi ñugüinoi jocua guapia jare jocua tenondegua reta jare jocua irundi mbaembae icove vae reta iyipi rupi. Jayave jae reta uyeatica guapia jovai jare umbiadora Tumpa. ¹² Jae reta jei:

—Amén. Ñamee yasurupai tuicha ñaneTumpa pe. Jae co iyaracuua catu vae. Jae co opaete mbaepuere güinoi vae. Tuyembiadoreca jaeño mai pegua. Amén —jei reta.

¹³ Jayave penti jocua tenondegua vae upirandu cheve:

—¿Quía reta pa co cua jemimonde tī vae reta? ¿Queti güii pa yugüeru? —jei.

¹⁴ —Cheya, nde co ndicuua —jae chupe.

Jayave jei cheve:

—Cua reta yugüeru cua pe uiporara ete rendave pe. Uputuca jemimonde jare umití Ovecha-rai jugüi pe —jei—. ¹⁵ Jáeramo yugüireco ma Tumpa iguapia jovai, jare uyeyocui reta Tumpa pe ara rupi jare pītu rupi Tumpa jo pe. Jare guapia pe uguapi vae uyandarecota jese reta —jei—. ¹⁶ Ndaraus ye iyembai reta. Ndaraus ye iúe reta. Ndaraus ye jasi chupe reta guarasi. ¹⁷ Echa'ā Ovecha-rai jocua guapia mbite pe oī vae uyandarecota jese reta jare güiñraata reta icua i oē vae tecove umee vae reta pe. Jare Tumpa oyoeta jesai chugüi reta —jei.

8

¹ Jare Ovecha-rai uipea ūru libro iyemboyaa. Uyepea ma siete. Jayave mbaeti mbae uyendu ara pe media ora rupi. ² Jare aecha jocua siete ángel Tumpa jovai uyemboi ñugüïnoi vae reta. Jare uñemee chupe reta siete trompeta.

³ Jare ou ūru ángel uyemboi mbae ipiche cavi vae imesa iyipí pe, jare güïnoi mbae ipiche cavi vae jiru oro pegua. Jare uñemee ángel pejeta mbae ipiche cavi vae, ángel umee vaerâ Tumpa pe opaete uñehono tee Tumpa peguarâ vae reta iyerure reta reve jocua mbae ipiche cavi vae imesa oro pegua pe. Echa'á jocua mesa oí Tumpa iguapía jovai. ⁴ Jare mbae ipiche cavi vae jatáti jare uñehono tee Tumpa peguarâ vae reta iyerure reta uyupi pâve ángel ipo güi Tumpa jovai.

⁵ Jayave ángel uipisi jocua mbae ipiche cavi vae jiru jare umitínee tatâpi jendi vae mesa pe oí vae pe. Jayave omombo ivi pe. Jare jiapu ara, jare uyeccuaa ama uvera vae reta, jare ivi ucâta.

Trompeta reta

⁶ Jare jocua siete ángel siete trompeta güïnoi vae reta uñemicuatíro umiñee vaerâ.

⁷ Jayave penti ángel umiñee trompeta, jare oa ivi pe amandau jare tata tugüi reve. Jare mbite seri ivira reta jare opaete ñana ocai.

⁸ Jayave ūru ángel umiñee trompeta. Mocui ma umiñee. Jare penti ivitu guasu echavae oa i guasu pe. Ocai echavae ivitu guasu. Jare mbite seri i guasu uyeyapo tugürâ. ⁹ Jare mbite seri jevae i rupigua i guasu pe yugüireco vae reta umano. Jare mbite seri chalana guasu reta icumegua.

¹⁰ Jayave ūru ángel umiñee trompeta. Mbapi ma umiñee. Jare oa ara güi penti yasitata tuicha vae. Jendi oí penti lámpara rami, jare oa mbite seri i usirí vae reta pe jare ícua ícua i oë vae pe. ¹¹ Jare jocua yasitata co jee Ajeno. Jare jocua mbite seri i usirí vae reta iro ma. Jare jeta ete vae umano iro vae jouramo.

¹² Jayave ūru ángel umiñee trompeta. Irundi ma umiñee. Jare mbae uyeyapo guarasi pe agüiye vaerâ jembipe irundi ora rupi opa ara. Jae ramiño vi mbae uyeyapo yasi jare yasitata reta pe agüiye vaerâ jembipe irundi ora rupi opa pitu. ¹³ Jayave aecha penti güïraquee uveve ara mbite rupi, jare ayandu iñeeata reve jei:

—ivi pegua reta uiporara eteta co ūru mbapi ángel reta trompeta umiñee yave. Echa'á jae reta ndeiño umiñee —jei.

9

¹ Jayave ūru ángel umiñee trompeta. Pandepo ma umiñee. Jare aecha penti yasitata oa ara güi ivi pe. Jare uñemee chupe ivicua quipe ete vae illave. ² Jayave uipea ivicua quipe ete vae, jare jocua ivicua güi oë tatâti. Tatâti tata tuicha ete vae güi oë vae joca. Jare guarasi uyeccua'a tatâti ivicua güi oë vae jeco pegua. Jáeramo pítumimbi ma oí.

³ Jare oë jocua tatâti güi tucu reta, jare uguata ivi rupi. Jare uñemee chupe reta mbaepuere oñöpi vaerâ ivi pegua reta, chumicarape reta ñaneöpi rami. ⁴ Jare Tumpa oyocui tucu reta agüiye vaerâ urucumegua ñana jare ivira reta jare opaete temiti reta. Ërei ipuere oñöpi mbaeti güïnoi Tumpa imarca isiva re vae reta. ⁵ Jare uñemee tucu reta pe uiporaraca vaerâ ivi pegua reta pe pandepo yasi pegua. Tucu reta ndarau upuruyuca. Jaeño jasi eteta ivi pegua reta pe, penti chumicarape ñaneöpi yave jasi ete yandeve vae rami. ⁶ Jare jocua ara reta pe ivi pegua reta uipota têita umano. Ërei ndarau ipuere. Iquiréi ete têita umano. Ërei ndarau etei ipuere.

⁷ Jare jocua tucu reta cavayu uñemicuatíro ma uñeráro vaerâ vae reta joca. Jare iñáca re güïnoi vae corona oro pegua joca. Jare jova cuimbae jova joca. ⁸ Jare ía cuña ía joca. Jare jai reta yaguapítâ jai reta joca. ⁹ Jare ipítâ re güïnoi vae camisa fierro pegua joca. Jare uveve reta yave, ipopo tanta jiapu, jeta ete cavayu reta uruguata icarretón ñeráro pe jiapu rami. ¹⁰ Jare tucu reta juguai chumicarape juguai joca. Jare juguai pe güïnoi ipópia. Jare güïnoi mbaepuere uiporaraca vaerâ ivi pegua reta pe pandepo yasi pegua. ¹¹ Jare jocua tucu reta juvicha guasu penti ángel jocua ivicua quipe ete vae pe ico vae co. Jare hebreo iñee pe jae jee co Abadón. Jare griego iñee pe jee co Apolión.

¹² Uasa ma penti susere. Ërei mocui mbaesusere ye uyeypota curi.

¹³ Jayave ūru ángel umiñee trompeta. Seis ma umiñee. Jare ayandu ñee jocua mbae ipiche cavi vae imesa oro pegua jati reta ipite güi ou vae. Jocua mesa oí Tumpa jovai jare güïnoi irundi jati. ¹⁴ Jare jocua ñee joi jocua ángel trompeta umiñee ramo vae pe:

—Iyora jocua irundi ángel i usirí vae Eufrates pe uñearpítâ vae reta.

¹⁵ Jayave oyora jocua irundi ángel reta. Jae reta uñemicuatíro ma uyuca vaerâ mbite seri ivi pegua reta. Uicuua reta año jare yasi jare ara ora uyuca reta vaerâ. ¹⁶ Jare uyeppapa sundaro cavayu re opo vae reta. Ayandu doscientos millones co ñugüïnoi.

¹⁷ Jare aecha jocua cavayu uyeccuaa cheve vae reta. Aecha vi opo jese vae reta ipítâ rupi güïnoi icamisa fierro pegua pítâ vae jare jovi vae jare jiyu vae. Jare cavayu reta iñáca yaguapítâ iñáca joca.

Jare cavayu reta iyuru güi oẽ tata jare tatāti jare azufre.¹⁸ Jare tata jare tatāti jare azufre cavayu reta iyuru güi oẽ vae uyuca mbite seri ivi pegua reta.¹⁹ Echa'ã jocua cavayu reta güinoi mbaepuere uyuca vaerã ivi pegua reta iyuru pe jare juguai pe. Echa'ã juguai mboi rami co. Güinoi iñaca ipuere vaerã uichuu ivi pegua reta.

²⁰ Jare opaete ivi pegua reta uyeyucaca mbae vae cu a mbaepuruyuca reta pe vae ueya'ã etei icavi mbae vae jecuaeño uyapo vae. Jecuae umbiadora reta aña reta jare tumpa-raanga oro pegua jare corepoti pegua jare bronce pegua jare ita pegua jare ivira pegua, yepe teli tumpa-raanga reta ipuere'ã uecha jare uyandu jare uguata.²¹ Jae reta jecuae upuruyuca jare uyapo paye reta jare uyapo aguasa jare imonda.

10

Ángel jare libro michi vae

¹ Jare aecha iru ángel ipirata ete vae ugüeyi ou ara güi. Jemimonde co jae penti amapita jare iñaca re oĩ penti yi. Jova guarasi echa jare ipi mocui tata jendi vae echa.² Jare güinoi ipo pe penti libro michi vae uyepea oĩ vae. Jare ou uyemboi i guasu re jare ivi re. Ipi iyacata oĩ i guasu re jare ipi iyaso oĩ ivi re.³ Jayave tanta usapicai penti yaguapita uñee rami. Jare ángel usapicai ma yave, jiapu ara siete vese.

⁴ Jare siete vese ma jiapu ara yave, añemicuatiro mbae aicuatia vaerã. Êrei ayandu ñee ara güi jei cheve:

—Agüiye emimbeu quia pe mbae siete ara jiapu reta jei vae. Agüiye icuatia mbae jei vae —jei.

⁵ Jare jocua ángel aecha uyemboi i guasu re jare ivi re vae uupi ipo ara coti.⁶ Jare jei Tumpa jee re opata uyeyapo imambae. Tumpa co jae imeño mai ico vae. Jae uyapo ara jare opaete ara re oĩ vae, jare ivi jare opaete ivi pe oĩ vae, jare i guasu jare opaete i guasu pe oĩ vae.⁷ Êrei iru ángel umiñeta trompeta. Siete ma co cua re. Jare jocua ara reta pe jocua ángel umbipi umiñee yave, Tumpa opata uyapo jocua tenonde yave uyecuaua'ã vae. Echa'ã Tumpa uicuaaca cua iñee aracae umimbeu vae reta pe. Echa'ã jae reta uyeyocui Tumpa pe.

⁸ Jare ayandu ye ñee ara güi jei cheve:

—Ecua ángel i guasu re jare ivi re uyemboi oĩ vae pe ipisi jocua libro michi vae uyepea oĩ vae ángel ipo pe oĩ vae.

⁹ Jayave aa ángel coti jare jae chupe:

—Emee cheve jocua libro michi vae.

Jayave ángel jei cheve:

—Ipisi opa jeu. Ndeu ma yave, nderie jasita ndeve, êrei ndeyuru pe jëeta co ei rami —jei.

¹⁰ Jayave aequi jocua libro michi vae ángel ipo güi jare opa jau. Jare cheyuru pe jëe ete co ei rami. Êrei jau ma yave, cherie jasi cheve.

¹¹ Jayave ángel jei cheve:

—Nemimbeu yeta co Tumpa iñee jeta ete vae ivi ambiembie pegua pe jare mburuvicha guasu reta pe.

11

Mocui cuimbae umimbeu Tumpa vae reta

¹ Jare uñemee cheve penti ivira mbaembae amiaanga pipe vaerã. Jare ayandu ñee jei cheve:

—Epua ecua emiaanga Tumpa jo jare uñemeearenda, jare ipapa Tumpa jo pe umbiadora Tumpa vae reta.² Êrei agüiye emiaanga Tumpa jo joca. Echa'ã jocua oca uñemee judio mbae vae reta pe. Jare jae reta güinoita mbaepuere tenta guasu uñeñono tee Tumpa peguarã vae re cuarenta y dos yasi pegua —jei—.³ Jare ameeta mbaepuere jocua mocui cuimbae chemimbeuta vae reta pe, jare jae reta umimbeuta chiñee mil doscientos sesenta ara pegua. Jare mocui reve uyemondeti temimonde jü vae pe —jei.

⁴ Jocua mocui ivira oliva jee vae uyemijaanga jocua mocui cuimbae reta re. Jae ramíño vi jocua mocui vela iguapica Tumpa ivi uyapo vae jovai uyemboi vae uyemijaanga jocua mocui cuimbae reta re.⁵ Jare ime yave quia iquiréi teli uyapo icavi mbae vae jocua mocui cuimbae reta pe vae, oëta tata jocua mocui cuimbae reta iyuru güi jare opata uapi jovaicho reta. Jucuaráita umano iquiréi téita uyapo icavi mbae vae jocua mocui cuimbae reta pe vae.⁶ Cua mocui reve güinoita mbaepuere ara re agüiye vaerã oquí opaete ara reta Tumpa iñee umimbeu reta rambueve. Jae ramíño vi güinoita mbaepuere i re uyapo vaerã tugüirã. Jae ramíño vi güinoita mbaepuere uiporaraca vaerã ivi pegua reta pe ipotave mbaerasi jae reta uipota rupiño.

⁷ Jare opa ma Tumpa regua umimbeu yave, jocua maemimba ivicua quipe ete vae güi oëta vae unerärota jae reta ndive jare umiamirita jare uycata.⁸ Jare jocua mocui cuimbae jetecue upitata calle pe jocua tenta guasu yandeYa curusu re uyecutu vae pe. Yandepuere yambijee jocua tenta guasu

Sodoma jare Egipto. Echa'ā jocua tenta guasu pegua reta oyovaicho Tumpa ndive. ⁹ Jare opaete ivi ambiembie pegua reta umaeta jocua mocui cuimbae jetecue re mbapi ara y medio pegua. Ndaraumaeño reta quia re oñoti vaerā. ¹⁰ Jare ivi pegua reta uyeroviata jocua mocui cuimbae jetecue re. Uyapota reta fiesta jare omondota uyupe regalo reta. Echa'ā ndei umano mbove, jocua mocui Tumpa iñee umimbeu vae reta uioporaraca ete ivi pegua reta pe.

¹¹ Jare mbapi ara y medio uasa ma yave, Espíritu Santo Tumpa güi ou vae umee tecove jocua mocui jetecue pe, jare mocui reve upua uyemboi. Jare cua uecha vae reta uquiyé ete co. ¹² Jare uyendu ñee ara güi. Iñeeáta reve jei:

—Piyupi cua pe.

Jayave jocua mocui reve uyupi ara pe amapitu reve. Jare jovaicho reta uecha yugüiraa.

¹³ Jare jocua ora pe etei ivi tanta ucata jare jeta catu tenta reta usururu jocua tenta guasu pe. Jare jocua ivicata pe umano siete mil cuimbae reta. Jare tenta guasu pegua umano mbae vae reta uquiyé ete jare umbiadora Tumpa ara pe ico vae.

¹⁴ Uasa ma mocui susere. Êrei iru mbaesusere imambae uyeyapota.

Trompeta taicueguia vae

¹⁵ Jare iru ángel umiñee trompeta. Siete ma umiñee. Jare uyendu ñee reta ara pe. Iñeeáta reve jei reta:

—Ivi pegua iporoyocuia reta uyeyapo ma yandeYa iporoyocuia. Uyeyapo ma Cristo iporoyocuia. Jare jae oporoyocuita jaeño mai pegua —jei reta.

¹⁶ Jare jocua veinticuatro tenondegua reta Tumpa jovai iguapia reta pe uguapi ñugüinoi vae uyeatica Tumpa jovai umbiadora vaerā. ¹⁷ Jare jei reta:

—OreYa Tumpa. Nde co jae opaete mbaepuere güinoi vae. Nde co jae iyipi güive jare añave jecuaeño ico vae. Nde co jae jecuae oíta vae. Numea yasurupai ndeve. Echa'ā ndicuaaca ma quirai nembaepuere tuicha ete co, jare añave ndeporoyocui neí —jei reta—. ¹⁸ Jare ivi pegua reta pochí ndeve. Êrei nde vi ndepochí chupe reta. Jare ou ma uvae ara umanocue vae reta uñeaaca vaerā, jare nde nemee vaerā imbaerá niñee umimbeu vae reta pe - echa'ā jae reta uyeyocui ndeve - jare uñefiono tee ndeve peguará vae reta pe. Jae reta co sambiai reta jare ucuacuua vae reta uiipi reve nembiadora vae. Ou ma uvae ara nde nembai vaerá ivi urucumegua vae reta —jei reta.

¹⁹ Jare Tumpa jo uyepea oí ara pe jare uyeccua Tumpa jo pe ita reta Tumpa uicuatía mboroyocui reta jese vae jiru. Jare uvera jare jiapu ara. Jare ivi ucata. Jare oa jeta amandau.

12

Cuña jare maemimba guasu píta vae

¹ Jare uyeccua ara re chepiacañi ete jese vae. Jae co penti cuña. Jemimonde guarasi co, jare uyemboi oí yasi iárambo, jare icorona doce yasitata reta co. ² Ipurúa jare imembí oata ma oí. Jäse imembirasi ramo.

³ Jare uyeccua ye ara re iru chepiacañi ete jese vae. Jae co penti maemimba guasu píta vae. Siete co iñaca reta jare diez jati reta. Jare penti penti iñaca re güinoi corona. ⁴ Jare juguai uipisi mbite seri yasitata reta omombo ivi coti. Jare jocua maemimba guasu uyemboi cuña imembita vae jovai, opa vaerá teli jou imembí, oa ma yave. ⁵ Jare cuña imembí cuimbae co. Jocua imembí cuimbae oyocuita opaete ivi pegua reta ipopoca fierro pegua pe. Jare cuña imembí uyereraaca Tumpa pe Tumpa iguapia oí vae pe. ⁶ Jare jocua cuña osi ñana coti. Echa'ā joco pe Tumpa umicuatiro chupe jendará. Jare amocue vae umingaru jocua cuña mil doscientos sesenta ara.

⁷ Jare uyeyapo penti ñerára ara pe. Miguel jare ángel chupe uyeyocui vae reta uñerára jocua maemimba guasu ndive. Jare maemimba guasu jare ángel chupe uyeyocui vae reta uñerára jae reta ndive. ⁸⁻⁹ Êrei jae reta ipuere'a umiamiri Miguel jare ángel chupe uyeyocui vae reta. Jare maemimba guasu uyemomboca ara güi. Mbaeti ye ma jendará ara pe. Jocua maemimba guasu jocua mboi aracae Eva umingueta vae co. Jae co aña guasu. Jae co Satanás. Jae umbitaví opaete ivi pegua reta. Êrei jae uyemomboca ma ara güi ivi pe, jare ángel chupe uyeyocui vae reta vi uyemomboca ara güi jae ndive.

¹⁰ Jare ayandu ñee ara pe. Iñeeáta reve jei:

—Ou ma uvae Tumpa upurumbiasa vaerā. Echa'ā jae güinoi opaete mbaepuere. Ou ma uvae Tumpa oporoyoci vaerā Cristo imbaepuere rupi. Echa'ā Satanás umbijecose yanderivi reta Tumpa jovai ara rupi jare pítu rupi. Êrei añave uyemomboca ara güi —jei—. ¹¹ Jare yanderivi reta umiamiri Satanás Ovecha-rai jugüi rupi jare Tumpa iñee iru vae reta pe umimbeu vae rupi. Uicuua reta umanota co, ërei uquiyé'a umano vaerá —jei—. ¹² Jáeramo piyerovia pe reta ara pe pico vae. Êrei ivi pe pico vae reta jare i guasu pe pico vae reta piporara eteta co. Echa'ā aña guasu ugüeyí ma pepite pe. Jare jae pochi ete. Echa'ā jae uicuua michi peguaño ma ipuere uparavíqui —jei.

¹³ Jare jocua maemimba guasu uicuua yave uyemomboca ma co ivi pe, uaicuemoenja jocua cuña imembí cuimbæ vae. ¹⁴ Ërei uñemee cuña pe mocui güiraquee tuicha vae ipepo, ipuere vaerä uveve nana pe uñemi vaerä jocua mboi güi. Jare joco pe amocue vae umingaru mbapi año y medio.

¹⁵ Jare jocua mboi omombo jeta i iyuru güi. Uipota tēi jocua iporu uepití vaerä cuña jare güiraa vaerä uyuca. ¹⁶ Ërei ivi etei ombori cuña. Echa'á ivi uyepea, yande yaipea yandeyuru vae rami, jare iporu jocua maemimba guasu iyuru güi oë vae opa ucañi ivi uyepea vae pe. ¹⁷⁻¹⁸ Jayave maemimba guasu pochi cuña pe, jare oo uñeraro cuña imembí ndeino umano vae reta ndive. Echa'á jae reta uyapo Tumpa iporoyocui reta jare umimbeu Jesús regua.

13

Mocui maemimba guasu reta

¹ Jare jocua maemimba guasu uyemboi oï i guasu jembei pe. Jare aecha iru maemimba guasu oë i guasu güi. Siete co iñaca reta jare diez jati reta. Jare güinnoi corona penti penti jati re. Jare iñaca reta re güinnoi tee reta. Jare jocua tee reta uicuaca quirai jocua maemimba guasu jecuaeño jei icavi mbae vae Tumpa coti. ² Jare maemimba guasu joco pe aecha vae penti yagua echá. Jare ipi oso ipi echá, jare iyuru yaguapita iyuru echá. Jare maemimba guasu tenonde aecha vae umeet cua iru maemimba guasu pe imbaepuere. Jare umaeño jese uguapi vaerä iguapia pe jare güinnoi vaerä mbaepuere tuicha vae.

³ Jare aecha penti jocua maemimba guasu i guasu güi oë vae iñaca ipere umano vaerä tēi. Ërei ucuera ma jocua ipere mano pegua güi. Jare opaete ivi pegua reta ipiacanii jocua maemimba guasu re. ⁴ Jare opaete ivi pegua reta umbiadora maemimba guasu tenonde aecha vae. Echa'á jae umeet mbaepuere tuicha vae iru maemimba guasu pe. Jae ramio vi opaete ivi pegua reta umbiadora jocua iru maemimba guasu. Jae reta jei:

—Mbaeti co quia ye cua maemimba guasu rami. Mbaeti etei quia ipuere uñeraro jae ndive.

⁵ Jare Tumpa umaño jocua iru maemimba guasu re uyembutuicha vaerä jare jei vaerä icavi mbae vae Tumpa coti. Jare uñemee chupe mbaepuere jucuarai uyapo vaerä cuarenta y dos yasi. ⁶ Jare jecuaeño jei jeta icavi mbae vae Tumpa coti jare Tumpa jee coti jare Tumpa jenta coti jare ara pe yugüireco vae reta coti. ⁷ Jare Tumpa umaño jese uñeraro vaerä uñeñono tee Tumpa peguarä vae reta ndive jare umiamiri vaerä. Jare uñemee chupe mbaepuere opaete ivi ambiembie pegua reta vae re. ⁸ Jare umbiadora opaete ivi pegua reta jee uyecuatia'á oï Ovecha-rai libro tecove opa mbae vae pegua pe vae. Ovecha-rai uyeyucaca co ndei ivi uyeyapo mbove.

⁹ Uipota uyandu vae tuyapisaca cua re. ¹⁰ Upurumiamiri vae reta uyucata amocue vae quisepuci pe, jae reta etei quisepuci pe upuruyuca ramo. Jare upurumiamiri vae reta güirata iru vae reta ivi güi jembiocui retarä. Jáeramo icavi co uñeñono tee Tumpa peguarä vae reta ipiaguasu vaerä jare jecuaeño mburugüirovia güinnoi vaerä.

¹¹ Jare aecha iru maemimba guasu oë ivigüi güi. Jare mocui co jati penti ovecha rami. Ërei uyemingueta jocua maemimba guasu tenonde aecha vae rami. ¹² Jare imbaepuere oyovaque jocua iru maemimba guasu i guasu güi oë vae imbaepuere ndive, jare oyocui opaete ivi pegua reta umbiadora vaerä jocua iru maemimba guasu ipere mano pegua güi ucuera vae. ¹³ Jare maemimba guasu taicue aecha vae uyapo jeta miacañi reta. Echa'á jae mbae uyapo tata ou vaerä ara güi ivi pegua reta jovaque. ¹⁴ Jare imbaepuere pe uyapo miacañi reta jocua iru maemimba guasu jovaque. Jare jucuarai umbitavi ivi pegua reta. Jare jei ivi pegua reta pe uyapo vaerä jocua iru maemimba guasu jaanga. Echa'á umimandua reta quirai ipere ete penti quisepuci pe, ërei icove ye. ¹⁵ Jare jocua maemimba guasu taicue aecha vae güinnoi mbaepuere umeet vaerä tecove jocua iru maemimba guasu jaanga pe, jocua jaanga uyemingueta vaerä. Jare uyucaca opaete ñatëi umbiadora maemimba guasu jaanga vae reta.

¹⁶ Jare oyocui opaete vae - sambiai reta jare ucuacua vae reta, icocatu vae reta jare iparavete vae reta, uyeyocui mbae vae reta jare uyeyocui vae reta - güinnoi vaerä penti marca ipo iyacata re ani isiva re. ¹⁷ Jare ime yave quia jocua iru maemimba guasu imarca ani jee ani jee inúmero mbaeti güinnoi vae, ipuere'a mbae ogua jare ipuere'a mbae umeet. ¹⁸ Icavi co penoi vaerä aracuua. Uicuua cavi vae tuipapa maemimba guasu inúmero. Echa'á penti cuimbae inúmero. Inúmero co seiscientos sesenta y seis.

14

Ciento cuarenta y cuatro mil vae reta icanta

¹ Jare aecha jocua Ovecha-rai uyemboi oï ivitu guasu Sión re, jare joco pe ñugüinnoi jae ndive jocua ciento cuarenta y cuatro mil vae reta. Jae reta isiva re uyecuatia oï Ovecha-rai jee jare Ovecha-rai Tu jee. ² Jare ayandu ñee ara güi. Tanta jiapu i guasu jiapu rami jare ara jiapu rami. Jare ayandu vi arpa ombopu vae reta iarpa ombopu ñugüinnoi.

³ Jare ucanta reta penti canta ipiau vae Tumpa iguapia jare jocua irundi mbaembae icove vae reta jare tenondegua reta jovai. Jare mbaeti quía ipuere uicuaa jocua canta, jaéño jocua ciento cuarenta y cuatro mil vae reta. Echa'á Cristo uepi jocua reta iví pegua reta ipite güi. ⁴ Jae reta uyeminguia'á cuña reta re. Echa'á güireco'á etei cuña. Jae reta yugüiraa Ovecha-rai jaicue jae que rupi oo vae rupi. Jae reta uyepicá co iví pegua reta ipite güi. Jae reta rani uyeyucaca, Tumpa jare Ovecha-rai pe uyeyocui ramo. ⁵ Jare jae reta upurumbitavi'á etei. Mbaeti quía ipuere umbijeco reta mbae re.

Ángel reta iñee reta

⁶ Jare aecha íru ángel uveve ara mbíte rupi. Tumpa umee ángel pe umimbeu vaerá ñee icavi vae opa mbae vae iví pegua reta pe. Umimbeu opaete iví ambiemie pegua reta pe. ⁷ Iñeeáta reve jei chupe reta:

—Pequiey Tumpa güi jare pembiadora. Echa'á ora ou ma uvae upuruáa vaerá. Pembiadora. Echa'á jae uyapo ara jare iví jare i guasu jare icua i oë vae reta —jei.

⁸ Jare jocua ángel jaicue uveve íru ángel jare jei:

—Jocua tenta guasu Babilonia jee vae opa ma uyembai. Jocua Babilonia pegua reta umbiadora tumpa-raanga reta, jare uicuaaca opaete íru iví pegua reta pe jucuarái uyapo vaerá. Jáeramo Tumpa pochi chupe reta —jei.

⁹ Jare íru ángel uveve jaicue, jare iñeeáta reve jei:

—Ime yave quía jocua maemimba guasu i guasu güi oë vae jare jaanga umbiadora jare imarca isiva re ani ipo re güinoi vae, ¹⁰ jae uiporara eteta. Echa'á Tumpa pochi eteta chupe jare uiporaraca eteta chupe. Jocua nunga uiporarata tata jare azufre ángel uñeñono tee Tumpa peguará vae reta jare Ovecha-rai jovai —jei—. ¹¹ Jare tatáti uyupita jaéño mai pegua jocua reta uiporarata ñugüinoi vae güi. Jare jae reta ndarau ipuere uputuu ara rupi jare pítu rupi. Echa'á umbiadora reta jocua maemimba guasu jare jaanga jare güinoi maemimba guasu jee imarca —jei.

¹² Icavi co ipiaguas vae ñeeñoño tee Tumpa peguará vae reta. Jae reta uyapo Tumpa iporoyocui reta jare güirovia Jesús re.

¹³ Jare ayandu penti ñee ara güi jei cheve: —Icuatía cuarái: Uyeroviata co cua güive yandeYa re güirovia reve umanota vae reta.

—Uyeroviata co —jei Espíritu Santo—. Echa'á uputuuta reta iparavíquí güi. Jare Tumpa uicuaacata jae reta uyapocue vae —jei.

Ou ma uvae nembaeviro vaerá

¹⁴ Jare aecha amapítu tí vae jare jocua amapítu re uguapi oí cuimbaerá uyeyapo vae echa vae. Jare iñáca re güinoi corona oro pegua, jare uipisi penti hoz jaimbe vae. ¹⁵ Jare penti ángel oë Tumpa jo güi jare iñeeáta reve jei amapítu re uguapi oí vae pe:

—Iporu jocua hoz nenoí vae nembaeviro vaerá. Echa'á ou ma uvae nembaeviro vaerá. Echa'á yagüiye ma iví pe oí vae. Icavi co nembaeviro vaerá —jei.

¹⁶ Jare amapítu re uguapi oí vae uiporu hoz güinoi vae iví re jare uavíro iví pe oí vae. ¹⁷ Jare íru ángel oë Tumpa jo ará pe oí vae güi. Jae vi güinoi hoz jaimbe vae. ¹⁸ Jare íru ángel oë uñemeearenda güi. Jae güinoi mbaepuere tata re. Jare iñeeáta reve jei ángel hoz jaimbe vae güinoi vae pe:

—Iporu hoz jaimbe vae nenoí vae jare eavíro iví pegua uva reta. Echa'á yagüiye ma uva reta —jei.

¹⁹ Jayave jocua íru ángel uiporu iví re hoz güinoi vae jare uavíro iví pegua uva reta. Jayave omombo reta uva uñetami pipe vae pe. Jocua uyemijaanga Tumpa iarasi re. ²⁰ Jare jocua uva uñetami pipe vae oí tenta guasu güi ñana cotí. Joco pe uitami uva. Jare tugüi oë jocua uva uñetami pipe vae güi, jare uvae cavaya reta iyayu rupi jare usiri sesenta legua rupi.

15

Ángel reta jare siete mbaesusere taicuegue vae reta

¹ Jare uyecuaa ye ara re chepiacañi ete jese vae. Aecha joco pe siete ángel siete mbaesusere taicuegue vae güinoi vae reta. Echa'á jocua reta re opata co Tumpa iarasi.

² Jare aecha i guasu vidrio pegua vae tata ndive uyea vae echa vae. Jare jocua maemimba guasu i guasu güi oë vae jare jaanga jare imarca jare jee inúmero umiamiri vae reta uyemboi ñugüinoi jocua i guasu vidrio pegua vae re, jare güinoi arpa reta Tumpa umee chupe reta vae. ³ Jare ucanta reta Moisés Tumpa pe uyeyocui vae icanta jare Ovecha-rai icanta. Jei reta:

—Nde ndiyapo vae oremipiacañi ete, oreYa Tumpa. Nde nenoí opaete mbaepuere. Nde ndiyapo vae jupi co jare añete vae pegua co. Nde co jae opaete iví pegua reta Juvicha Guasu —jei reta—. ⁴ Opaete vae uquiyeta ndegüi, oreYa. Opaete vae umbiadora nderee. Echa'á ndeño co jae iyoa mbae vae. Opaete iví pegua reta yugüeruta nembiadora vaerá. Echa'á uyecuaa ma quirái nde nepuruáa jupi vae rupi —jei reta.

⁵ Cua jaicue rupi aecha uyepea oí ara pe ita Tumpa uicuatía mboroyocui reta jese vae reta jíru oí vae. ⁶ Jare jocua siete ángel reta oé Tumpa jo güi. Güinoi reta jocua siete mbaesusere. Jemimonde nieso tí vae iquiu mbae vae co, jare ipitía rupi güinoi icuacuaa oro pegua. ⁷ Jare jocua irundi mbaembae icove vae reta güi penti umee jocua siete ángel reta pe siete copa oro pegua. Jocua copa reta tinee ñugüinoi Tumpa iarasi pe. Tumpa co jae imeño mai ico vae. ⁸ Jare Tumpa iyaruandaa jare imbaepuere jeco pegua Tumpa jo tinee tatáti pe. Jare mbaeti quía ipuere uique Tumpa jo pe ndei jocua siete mbaesusere jocua siete ángel reta güinoi vae uyeyapo mbove.

16

Siete copa Tumpa iarasi güinoi vae reta

¹ Jare ayandu penti ñee Tumpa jo güi. Iñeeáta reve jei jocua siete ángel reta pe:
—Pecua pepiyere ivi re jocua siete copa Tumpa iarasi güinoi vae reta.

² Jayave penti ángel oo upiyere copa güinoi vae ivi re. Jare opa ituyutuyu ivi pegua reta jocua maemimba guasu imarca güinoi vae. Echa'á jae reta umbiadadora jocua maemimba guasu jaanga.

³ Jare íru ángel upiyere copa güinoi vae i guasu re. Mocui ma upiyere. Jare i guasu uyeyapo umanocue vae jugüi rami. Jare opaete mbaembae i guasu pe yugüireco vae reta umano.

⁴ Jare íru ángel upiyere copa güinoi vae i usiri vae reta jare icua i oé vae reta re. Mbapi ma upiyere. Jare i usiri vae reta jare icua i oé vae reta uyeyapo tugüirá. ⁵ Jare ayandu ángel i re mbaepuere güinoi vae jei:

—Jecuaeño iyipi güive jare añave nde co jae jupi vae, oreYa. Nde co jae iyoa mbae vae. Jáeramo ndiporaraca chupe reta —jei—. ⁶ Echa'á jae reta uyuca uñéñono tee ndeve peguará vae reta jare niñee umimbeu vae reta. Jáeramo nemee ma chupe reta tugüi i ipepica pe. Icavi co ndiyapo vaerá jucuarái —jei.

⁷ Jare ayandu íru ñee uñemeearenda güi jei:

—Icavi co, oreYa Tumpa. Nde nenoi opaete mbaepuere. Jecuaeño nepuruáa añete vae jare jupi vae rupi —jei.

⁸ Jare íru ángel upiyere copa güinoi vae guarasi re. Irundi ma upiyere. Jare uñemee mbaepuere guarasi pe ipuere vaerá uapi ivi pegua reta tata pe. ⁹ Jayave guarasi jasi ete jare uapi ivi pegua reta. Jáeramo ivi pegua reta jei icavi mbae vae Tumpa jee coti. Echa'á jae güinoi mbaepuere opaete cua susere reta re. Ërei ivi pegua reta ueya'á iyeminguela icavi mbae vae ipia pe oí vae. Umbiadadora'á etei Tumpa.

¹⁰ Jare íru ángel upiyere copa güinoi vae jocua maemimba guasu iguapia re. Pandepo ma upiyere. Jayave pítumimbi ou opaete maemimba guasu iporoyocua rupi. Jare opaete maemimba guasu pe uyeyocui vae reta uiporara ete. Uñecusu reta uiporara ete ramo. ¹¹ Jare jei reta icavi mbae vae Tumpa ara pe ico vae coti, uiporara ete jasi jare opa ituyutuyu ramo. Ërei jeseve ueya'á reta icavi mbae vae uyapo vae.

¹² Jare íru ángel upiyere copa güinoi vae i usiri vae Eufrates jee vae re. Tuicha co jocua Eufrates. Seis ma upiyere. Jare tipa voi Eufrates. Jucuarái Tumpa umicuatíro mburuvicha guasu reta guarasi oé vae coti güi yugüeruta vae japerá. ¹³ Jare aecha jocua maemimba guasu tenonde aecha vae, jare jocua íru maemimba guasu i guasu güi oé vae, jare jocua íru maemimba guasu ivigüi güi oé vae - jae jei umimbeu co Tumpa inée, Ërei upurumbitavi. Jare aecha penti aña iquía ete vae oé iyuruyuru güi. Mbapi píte echo jocua aña reta. ¹⁴ Jae reta co aña miacañi ipuere uyapo vae reta. Jae reta yugüiraa opaete ivi rupi mburuvicha guasu reta jenta jenta rupi. Jae reta umbati opaete mburuvicha guasu reta uñeráro vaerá Tumpa opaete mbaepuere güinoi vae ndive. Uñerárota reta co Tumpa ndive jocua ara pe.

¹⁵ —Mase —jei yandeYa—, che aya etea imambae, penti imonda vae ou mbaembae oñomi rami. Pieroviata co jecuaeño piñemicuatíro yave. Jecuaeño piyapicatu peremimonde, agüiye vaerá pemara íru vae reta perecha penani pei yave —jei.

¹⁶ Jare Tumpa umbatica reta hebreo inée pe Armagedón jee vae pe.

¹⁷ Jare íru ángel upiyere copa güinoi vae ivitu re. Siete ma upiyere. Jare uyendu penti ñee Tumpa jo ará pe oí vae güi Tumpa iguapia güi. Iñeeáta reve jei:

—Opa ma uyeyapo.

¹⁸ Jare tanta jiapu ara. Jare uvera. Jare ivi tanta ucáta. Iví pegua reta yugüireco güive jucuarái'á ucáta ivi. Echa'á jocua ivicáta tanta ete co. ¹⁹ Jare jocua tenta guasu uyembiyao mbapi pe jare opaete ivi rupi jeta tenta guasu uyembai. Jare Tumpa imandúa jocua tenta guasu Babilonia jee vae re uiporaraca ete vaerá chupe. Echa'á Tumpa pochí ete chupe. ²⁰ Jare opaete ivi i mbite pe ñugüinoi vae reta opa osi, jare mbaeti ma uñevae ivitu guasu reta. ²¹ Jare oa ara güi amandau tuicha tuicha vae ivi pegua reta re. Jare amandau penti penti poi irundi arroba rupi. Jare ivi pegua reta jei icavi mbae vae Tumpa coti amandau jeco pegua. Echa'á amandau uiporaraca ete ivi pegua reta pe.

Cuña iaguasa vae

¹Jare jocua siete ángel jocua siete copa güinoi vae reta güi penti ou jei cheve:

—Eyu cuá pe. Taicuaaca ndeve quirái uñeaacata co jocua cuña iaguasa vae i guasu reta re uguapi vae —jei—. ²Iví pegua mburuvicha guasu reta uyapo aguasa jocua cuña ndive. Iví pegua reta uipota ete uyapo aguasa jae ndive, usavipo vae uyúe ete vino rami —jei.

³Jayave ángel chereraa Espíritu Santo imbaepuere pe ñana coti. Jare joco pe aecha penti cuña opo oí penti maemimba guasu píta vae re. Jare jocua maemimba guasu re uyeucuatía oíjeta jee jare jocua cuatía reta rupi jei icavi mbae vae Tumpa coti. Jare siete co jocua maemimba guasu iñáca jare diez játi. ⁴Jare cuña jemimonde píta, jare güinoi oro jare ita ipóra ete vae reta jete re. Uipisi penti copa oro pegua. Èrei jocua copa tineo oí mbaembæ pichíi vae pe. Echa'á jocua cuña iaguasa vae co. ⁵Jare isiva re uyeucuatía oíjee cuarai: “Babilonia mbaepuere tuicha vae güinoi vae. Jae co iaguasa vae reta ichi. Jae co iví pegua pichíi vae uyapo vae reta ichi.” Jucuarai uyeucuatía oí. Jaeramo uyeucuaa jocua cuña jee.

⁶Jare cuña usavipo echo cheve. Echa'á jou ma uñeniono tee Tumpa peguará vae reta jugüi. Jae reta uyeyucada umímbeu Jesús re ramo. Jare aecha yave jocua cuña, chepiacañi ete jese.

⁷Jare ángel jei cheve:

—¿Maera pa nepiacañi? Tamimbue ndeve ndeiño uyeucuaa vae cuña regua. Jae ramíño vi tamimbue ndeve ndeiño uyeucuaa vae jocua maemimba guasu cuña opo jese vae regua. Siete co jocua maemimba guasu iñáca jare diez játi —jei—. ⁸Maemimba guasu ndeecha vae icose, èrei ico'á ma. Èrei oëta ivicua quipe ete vae güi. Èrei oo yeta cañitei pe. Jare iví pe yugüireco vae reta uecha yave jocua maemimba guasu icose vae, ipiacañita reta. Echa'á jae reta jee uyeucuatia' oí libro tecove opa mbae vae pegua pe iví uyeyapo güive. Jocua maemimba guasu mbaeti ma ico. Èrei ico yeta co —jei—.

⁹Jare iyaracuaa vae uicuaata cua: Jocua siete iñáca uyemijaanga siete ivitú guasu cuña uguapi jese vae re —jei cheve—. ¹⁰Jae ramíño vi uyemijaanga siete mburuvicha guasu reta re. Pandepo mburuvicha guasu reta uasa ma. Penti imeño ico, jare penti ndeiño ico. Jare jae ou yave, michi peguaño güinoita mbaepuere —jei—. ¹¹Jare jocua maemimba guasu icose èrei mbaeti ma ico vae icota íru mburuvicha guasurá. Ocho co jocua re. Èrei jae oyovaque jocua siete vae güi penti ndive. Jare jae vi oota cañitei pe —jei—. ¹²Jare jocua diez játi ndeecha vae uyemijaanga diez mburuvicha guasu reta re. Cua diez reve ndeiño güinoita reta mbaepuere yugüireco vaerá mburuvicha guasu retará penti ora pegua jocua maemimba guasu i guasu güi oé vae mbaepuere güinoi yave —jei cheve—. ¹³Opaete cua diez mburuvicha guasu reta penti ramíño co, jare omborita reta jocua maemimba guasu opaete imbaepuere pe. ¹⁴Cua reta uñerárota Ovecha-raí ndive, jare Ovecha-raí umiamirita. Echa'á Ovecha-raí co jae opaete vae iya reta iYa. Jae co opaete mburuvicha guasu reta Juvicha Guasu. Jare Ovecha-raí ndive ñugüinoi vae reta Tumpa uiparavo vae reta co. Echa'á Tumpa uiparavo jocua reta uyeyocui cavi vaerá Ovecha-raí pe —jei cheve ángel.

¹⁵Jayave jei cheve:

—Ndeecha ma jocua cuña iaguasa vae uguapi oí i guasu reta re. Jocua i guasu reta uyemijaanga opaete iví ambiembie pegua reta re. ¹⁶Ndeecha ma vi jocua maemimba guasu játi diez co. Jocua diez játi reta uyemijaanga diez mburuvicha guasu reta re. Jae reta umitaréita jocua cuña iaguasa vae. Ueyata reta jaeño upita vaerá. Jae nanita co. Jayave jocua diez mburuvicha guasu reta jouta cuña isoo jare opata uapi tata pe —jei—. ¹⁷Echa'á Tumpa umiquiréi jocua diez mburuvicha guasu reta umee vaerá iporoyocuia penti ramíño jocua maemimba guasu pe. Jare maemimba guasu güinoita iporoyocuia reta Tumpa iñee reta uyeyapo regua. ¹⁸Jare jocua cuña ndeecha vae uyemijaanga jocua tenta guasu opaete iví pegua mburuvicha guasu reta re mbaepuere güinoi vae re —jei.

Babilonia uyembai ma

¹Jare cua jaicue rupi aecha íru ángel ugüeyi ou ara güi. Ángel imbaepuere tuicha ete co. Tembipe oí iví rupi ángel umiembipe ramo. ²Jare ángel iñeeáta reve jei:

—Tenta guasu Babilonia jee vae uyembai ma. Añave yugüireco joco pe aña reta. Penti peresoriru ramí co. Echa'á opaete aña mbaembæ pichíi vae uyapo vae reta jare opaete güüra mbaembæ pichíi vae uyapo vae reta yugüireco joco pe, pereso reta peresoriru pe yugüireco ramí —jei—. ³Opaete iví pegua reta uipota ete uyapo aguasa Babilonia pegua reta ndive, usavipo vae uyúe ete vino rami. Jáeramo Tumpa pochi chupe reta. Jare iví pegua mburuvicha guasu reta uyapo aguasa Babilonia pegua reta ndive. Jare opaete iví rupi umaemee vae reta icocat ma Babilonia pegua reta jeta mbaembæ jepi ete vae ogua ramo —jei.

⁴Jare ayandu íru ñee ara güi jei:

—Peē joco güi, chembae reta, agüiye vaerā piyapo mbaeyoa reta jae reta uyapo rami, jare agüiye vaerā piporara mbaesusere reta chupe reta uyeyapota vae —jei—.⁵ Jae reta uyapo jeta ete mbaeyoa reta. Tumpa uiporaracata chupe reta imbaeyoa reta jeco pegua —jei—.⁶ Tuiporara reta, jae reta uiporaraca peve rami. Tuiporara ete reta opaete icavi mbae vae uyapo vae jeco pegua. Jeta ete icavi mbae vae uyapo reta iru vae reta pe. Jáeramo tuiporara ete reta.⁷ Jae reta uyembicate ete jare ogua jeta mbaembae jepi ete vae. Jáeramo tuiporara ete reta jare tipiatití ete reta. Echa'ā jae reta jei iyupe ipia pe: 'Yaico mburuvicha guasu reta yugüireco rami. Yaico'ā co cuña ime umano vae reta yugüireco rami. Ndaraū etei yandepiatiti' —jei reta, jei—.⁸ Jáeramo penti ara peño uyeyapota chupe reta jeta mbaesusere. Outa chupe reta caruai. Jae reta ipiatitita jare umanota. Jare jenta guasu opata ocai. Echa'ā yandeYa Tumpa uāata reta jare opaete mbaepuere güinoi —jei—.

⁹ Jare ivi pegua mburuvicha guasu reta ipiatitita jese jare uyaota, jatāti uecha yave. Echa'ā jae reta uyapo aguasa joco pe, jare joco pe yugüireco yave, uyerovia ete opaete mbaembae jepi ete vae re.¹⁰ Ërei jae reta uyemboita mbiri tenta guasu güi, agüiye vaerā uiporara jocua guasu tenta pegua reta uiporarata rami. Jare jeita reta: 'Paravete. Babilonia penti tenta guasu tuicha ete vae co tēi. Penti ora peño Tumpa uiporaraca chupe' —jeita reta, jei—.¹¹ Jare opaete ivi rupi umaemee vae reta ipiatitita jese jare uyaota. Echa'ā ndaraū ma quía ogua imbaembae —jei—.¹² Ndaraū ma quía ogua mbaembae oro pegua jare corepoti pegua jare ita ipōra ete vae reta pegua, jare temimonde reta nieso ipōra ete vae jare seda, jare temimonde pīta vae reta, jare mbaembae ivira icavi ete vae pegua. Ndaraū ma quía ogua mbaembae maemimba tuicha vae elefante jee vae jāi pucu pegua jare ivira jepi ete vae pegua jare cobre pegua jare fierro pegua jare ita tanta ete vae pegua —jei—.¹³ Ndaraū ma quía ogua mbaembae ipiche cavi vae reta, jare vino, jare aceite, jare harina ipu ete vae, jare trigo. Ndaraū ma quía ogua mburica reta, jare ovecha reta, jare cavayu reta, jare carro reta, jare cuimbæ reta, jare cuña reta —jei—.

¹⁴ Babilonia pegua reta jecuiaeño uipota mbaembae jepi ete vae jare ipōra ete vae. Ndaraū etei ma güinoi jocua mbaembae icavi vae —jei—.¹⁵ Ogua reta jeta ete jocua mbaembae icavi vae. Jáeramo jocua mbaembae umee vae reta icocatu. Ërei umaemee vae reta uyemboita mbiri Babilonia güi agüiye vaerā uiporara jocua tenta guasu pegua reta uiporarata rami. Ipiatitita jese jare uyaota —jei—.¹⁶ Jare jeita: 'Paravete. Penti tenta guasu tuicha ete vae co tēi. Jare tenta guasu pegua reta jemimonde reta nieso ipōra vae co. Omonde reta temimonde pīta vae reta jare oñono reta iyee mbaembae oro pegua jare ita ipōra vae reta pegua' —jeita reta, jei—.¹⁷ 'Icocatu ete reta. Ërei penti ora peño umicāni reta opaete imbaembae icavi vae' —jeita reta, jei—. Jare opaete chalana guasu iya reta jare chalana guasu pe uparavíqui vae reta - opaete i guasu rupi uguata umaemee vaerā vae reta - uyemboita mbiri Babilonia güi —jei—.¹⁸ Jare usapicaita reta tenta guasu jatāti uecha yave. Jare jeita reta: 'Jocua tenta guasu tuicha ete co tēi opaete iru tenta guasu reta güi' —jeita reta, jei—.¹⁹ Jare oñonota reta ivicui iñāca re usapicai reve. Jae reta ipiatitita uyao reve jare jeita: 'Paravete. Penti tenta guasu tuicha ete vae co tēi. Jocua tenta guasu pegua reta ogua jeta mbaembae jepi ete vae. Jáeramo opaete chalana guasu iya reta umaemee vae icocatu ma. Ërei penti ora peño opa ma imbaembae' —jeita reta, jei—.

²⁰ Piyerovia jese, ara pe pico vae. Pe reta co jae temimondo reta jare Tumpa iñee umimbeu vae reta jare iru uñeñono tee Tumpa peguarā vae reta. Echa'ā Tumpa uiporaraca chupe reta, jae reta uiporaraca peve ramo —jei.

²¹ Jare penti ángel ipirāta ete vae uipisi penti ita. Tuicha co jocua ita umbaeso pipe vae rami co. Jayave ángel omombo ita i guasu pe jare jei:

—Jucuaráita uyembai imambae ete jocua tenta guasu Babilonia jee vae. Ndaraū ye ma quía uecha —jei—.²² Jare uyemimbí vae reta ndaraū ye ma uyemimbí joco pe. Jae ramiño vi uparavíqui vae reta ndaraū ye ma uparavíqui joco pe. Jae ramiño vi umbaeso vae reta ndaraū ye ma umbaeso joco pe.²³ Jae ramiño vi ndaraū ye ma jendi joco pe mechero. Jae ramiño vi ndaraū ye ma quía umenda joco pe. Echa'ā umaemee vae joco pe yugüireco vae reta uyembutuichacase iru vae reta pe. Ërei Babilonia pegua reta umbitaví opaete ivi pegua reta paye reta uyapo vae pe —jei.

²⁴ Jare Babilonia pe uñevāe Tumpa iñee umimbeu vae reta jugüi jare iru uñeñono tee Tumpa peguarā vae reta jugüi. Opaete ivi pe uyeyucaca vae reta jugüi uñevāe joco pe.

opaete ivi pegua reta pe aguasa uyapo vae rupi. Êrei Tumpa uiporaraca ma jocua cuña pe, jae uyuaca Tumpa jembiocui reta ramo —jei reta.

³Jare jae reta jei ye:

—YandeYa tuyembadoraca. Tatāti uyupita jaeño mai pegua.

⁴Jare jocua veinticuatro tenondegua reta jare jocua irundi mbaembae icove vae reta uyeatica jare umbiadora Tumpa iguapía pe uguapí oí vae. Jae reta jei:

—Amén. YandeYa tuyembadoraca.

⁵Jare ou penti ñee Tumpa iguapía güi jei:

—Pembiadora yandeYa Tumpa. Pe reta co jae Tumpa jembiocui reta. Pe reta co jae sambiai reta jare ucuacuaa vae reta uipiu reve umbiadora Tumpa vae —jei.

⁶Jayave ayandu mbae ye. Jeta ete vae uyeminguela ñugüínoi echa cheve. Tanta jiapu i guasu jiapu rami jare ara jiapu rami. Jare ayandu jei:

—YandeYa tuyembadoraca. YandeYa Tumpa opaete mbaepuere güínoi vae oporoyocui ma —jei—.

⁷Yayerovia ete jese jare yambiadora. Echa'ã ou ma uvâe Ovecha-rai umenda vaerã jare jembirecorã vae uyeyapicatu cavi ma —jei—. ⁸Jare uñemee jembirecorã vae pe omonde vaerã penti temimonde nieso ipôra vae. Jocua jemimonde iquia mbae jare tî asi. Echa'ã jocua nieso ipôra vae uyemijaanga jupi vae uñehóno tee Tumpa peguarã vae reta uyapo vae re —jei.

Ovecha-rai umendata

⁹Jare penti ángel jei cheve:

—Icuatá cuarâi: Ovecha-rai umenda yave, Tumpa uiparavota amocue vae ucaru vaerã jae ndive. Uyerovia eteta jocua reta —jei—. Cua ñee Tumpa iñee etei co —jei.

¹⁰Jayave che ayeatíca ángel jovai ambiadora vaerã. Êrei jae jei cheve:

—Agiüye chembiadura. Che vi ayeyocui Tumpa pe, nde ndiyeyocui chupe rami. Che vi amimbeu Jesús regua, yanderiví umimbeu jesegua rami. Tumpaño embiadora. Echa'ã Jesú regua umimbeu vae reta umimbeu co Tumpa iñee, Tumpa iñee aracae umimbeu vae reta umimbeu rami —jei.

Cavayu tî vae re opo vae

¹¹Jare aecha ara uyepea oí. Jare aecha vi joco pe penti cavayu tî vae. Jare opo cavayu re yandeYa. Jae co jecuaeño jei vae uyapo vae. Jae co jecuaeño umimbeu cavi Tumpa regua vae. Jae upuruâa jupi vae rupi jare uñerâo jupi mbae vae uyapo vae reta ndive. ¹²YandeYa jesa tata jendi oí vae rami co, jare iñâca re güínoi jeta corona reta. Jare uyecuatâa oí jese penti tee. Jaeño uicuuaa jocua tee. Mbaeti quía ye uicuuaa. ¹³Jare jemimonde tugüí pe uñemipíta vae co. Jare jae jee co Tumpa Iñee. ¹⁴Jare jeta ete vae yugüero ara güi yandeYa jaicue jeta ete sundaro reta rami. Opo reta cavayu tî vae reta re. Penti penti jemimonde nieso ipôra vae co. Tî jare iquia mbae jocua jemimonde.

¹⁵Jare yandeYa iyuru güi oë penti quisepucu jaimbe vae. Pipe uyuacata jeta ivi pegua reta. Jare oporoyocuita ipopoca fierro pegua pe. Uiporaraca eteta opaete jovaicho reta pe. Echa'ã Tumpa opaete mbaepuere güínoi vae pochi ete chupe reta. ¹⁶Jare yandeYa jemimonde re jare iu re uyecuatâa oí penti tee. Jae co cua: “Mburuvicha guasu reta Juvicha Guasu jare opaete vae iya reta iYa.”

¹⁷Jare aecha penti ángel uyemboi oí guarasi re. Jare jae iñeeáta reve jei opaete güíra uveve ñugüínoi vae reta pe:

—Peyu piyembati. Tumpa opaete mbaepuere güínoi vae pemingaruta. ¹⁸Peyu peu mburuvicha guasu reta jetecue, jare sundaro reta juvicha reta jetecue, jare cuimbæ ipirâta ete vae reta jetecue. Peyu peu cavayu reta jetecue, jare opo jese vae reta jetecue. Peyu peu jeta ete cuimbæ reta jetecue - uyeyocui mbae vae reta jetecue jare uyeyocui vae reta jetecue, sambiai reta jetecue jare ucuacuaa vae reta jetecue —jei.

¹⁹Jare aecha jocua maemimba guasu jare ivi pegua mburuvicha guasu reta jare opaete isundaro reta uyembati ma ñugüínoi uñerâo vaerã cavayu re opo vae jare isundaro reta ndive. ²⁰Jare uyejisica jocua maemimba guasu jocua íru maemimba guasu jei umimbeu co Tumpa iñee upurumbitavi vaerã vae ndive. Echa'ã jocua upurumbitavi vae tenonde yave uyapo miacañi reta jocua maemimba guasu jovai, umbitavi vaerã maemimba guasu imarca güínoi vae reta. Echa'ã jae reta umbiadora jocua maemimba guasu jaanga. Jayave cua mocui reve uyemomboca jecove reve tata guasu pe. Joco pe jendi oí azufre. ²¹Jare opaete maemimba guasu isundaro reta uyeyucaca cavayu re opo vae iquisepecu pe. Echa'ã jocua quisepucu oë iyuru güi. Jare opaete güíra reta uyemíngapiita jetecue reta re.

YandeYa oporoyocuita mil año pegua

¹Jare aecha penti ángel ugüeyí ou ara güi. Jae güínoi ivicua quipe ete vae illave, jare ipo pe aecha penti cadena tuicha vae. ²Jare ángel uipisi jocua maemimba guasu tenonde aecha vae. Jae co jocua

mboi aracae Eva umingueta vae. Jae co aña guasu. Jee co Satanás. Jare ángel uipocua Satanás mil año pegua.³ Jayave omombo ivicua quipe ete vae pe. Jayave uyuquenda ivicua jonque jare oñono jese mbae agüiye vaerā quía ipuere uipea ye. Jucuarai uyapo agüiye vaerā Satanás umbitavi ivi pegua reta mil año pegua. Ërei mil año opa ma yave, Satanás uyeyoraca yeta michi pegua.⁴ Jare aecha guapia reta jare amocue vae joco pe uguapi vae reta. Jare uñemee chupe reta upuruávaerā. Jare aecha Jesúis regua umimbeu ramo uñeácasíaca vae reta. Echa'á jae reta umimbeu Tumpa iñee. Jare reta umbiadora'á jocua maemimba guasu i guasu güi oë vae, jare umbiadora'á jaanga, jare mbaeti etei vi güinoi imarca isiva re jare ipo re. Jare jae reta icove ye yugüeru umanocue vae reta ipite güi jare oporoyoci Cristo ndive mil año.⁵ Jocua reta tenonde icove ye yugüeru umanocue vae reta ipite güi. Ërei iñu umanocue vae reta icove yevi'á jae reta ndive. Mil año uasa yave ramo icove ye iñu umanocue vae reta. Echa'á uñeñono tee Tumpa peguarā vae reta co. Jocua mano mocuia ndarau ipuere jese reta. Jare reta yugüirecota sacerdote retarā, uyeyocui vaerā Tumpa jare Cristo pe. Jare oporoyocuita reta Cristo ndive mil año pegua.

⁷ Jare mil año opa ma yave, Satanás uyeyoraca yeta jare oëta jocua peresoriru rami vae güi.⁸ Jayave oota opaete ivi rupi umbitavi vaerā jeta ivi ambiemie pegua reta. Oota Gog pe jare Magog pe. Jare umbatita jeta ete vae uñeráro vaerā Cristo ndive. Jare reta jeta eteta co, ivicuñti i guasu jembei pe oí rami.⁹ Jare aecha quirái jae reta yugüeru opaete Israel pegua reta iñi rupi jare uyere ñugüinoi jocua tenta guasu Tumpa uau vae re. Echa'á joco pe yugüireco uñeñono tee Tumpa peguarā vae reta. Ërei Tumpa ombou tata ara güi, jare tata opa uapi reta.

¹⁰ Jare aña guasu umbitavi reta vae uyemomboca tata guasu azufre jendí oí pipe vae pe maemimba guasu jare jocua iñu maemimba guasu jei umimbeu co Tumpa iñee upurumbitavi vaerā vae ñugüinoi vae pe. Jare joco pe mbapí reve uiporarata ara rupi jare pítu rupi jaeño mai pegua.

Guapia tñi vae

¹¹ Jare aecha penti guapia tñi vae. Tuicha co. Jare aecha vi guapia pe uguapi oí vae. Iví jare ara opa osi jae jovai güi. Jare mbaeti ma ivi jare ara jendará.¹² Jare aecha umanocue vae reta uyemboi ñugüinoi Tumpa jovai. Sambiai reta jare ucuacuaa vae reta uyemboi ñugüinoi joco pe. Jare ueyepa oí libro reta. Jae ramíño vi ueyepa oí iñu libro. Jocua libro uicuaaca quía tecove opa mbae vae güinoi vae. Jare umanocue vae reta uñeáaca penti penti uyapocue vae rupi. Echa'á penti penti uyapocue vae uyecuatía oí libro reta pe.¹³ Jare i guasu umaeño opaete umanocue vae pipe ñugüinoi vae reta re oë vaerā chugüi. Jare mano jare cañitei umaeño opaete umanocue vae pipe ñugüinoi vae reta re oë vaerā chugüi. Jare penti penti uñeáaca uyapocue vae rupi.¹⁴ Jare mano jare cañitei uyemomboca tata guasu pe. Cua co jae mano mocuia.¹⁵ Jare jee uyecuatía'á jocua libro tecove opa mbae vae pegua pe vae penti penti uyemomboca tata guasu pe.

21

Ara ipiau vae jare ivi ipiau vae

¹ Jare aecha ara ipiau vae jare ivi ipiau vae. Echa'á ara tenonde ico vae jare ivi tenonde ico vae mbaeti ma. Jae ramíño vi mbaeti ma i guasu.² Jare che etei aecha jocua tenta guasu uñeñono tee Tumpa peguarā vae - jae co Jerusalén ipiau vae - ugüeyi ou Tumpa oí vae güi. Uyeyapicatu oí penti cuñatai umodata vae ramí.

³ Jare ayandu penti nñeeara güi. Iñeeäta reve jei:

—Mase, Tumpa ime ma ico ivi pegua reta ndive. Jae icota jae reta ndive. Iví pegua reta yugüirecota Tumpa imbaerá, jare Tumpa icota jae reta ndive. Tumpa eteiño icota jae reta iTumpará —jei.—⁴ Jare Tumpa oyoeta opaete jesai reta. Ndaraus ye quía umano. Ndaraus ye quía ipiatiti. Ndaraus ye quía uyao. Ndaraus ye mbae jasi quía pe. Echa'á mbaembae tenonde ico vae reta mbaeti ma —jei.

⁵ Jare Tumpa uguapí oí iguapia pe jare jei:

—Ayapopíauta opaete mbaembae.

Jayave jae jei cheve:

—Cua ícuatía. Echa'á chiñee añete co. Opaete vae ipuere güirovia catu —jei.

⁶ Jare jei vi cheve:

—Uyeyapo ma. Che co jae Alfa jare Omega jee vae. Che co jae tenondegua vae jare taicuegua vae. Ime yave quía uipota i tecove opa mbae vae pegua jou vae, tamee tou jepí mbae reve —jei.—

⁷ Upurumiamiri vae reta pe ameeta imbaerá opaete mbaembae. Che etei aicota jae reta iTumpará jare jae reta yugüirecota cherai retarā —jei.—⁸ Ërei uquiyé vae reta, jare güirovia mbae Tumpa vae reta, jare pichii vae uyapo vae reta, jare upuruyuca vae reta, jare iaguasa vae reta, jare ipaye vae reta, jare umbiadora tumpa-raanga vae reta, jare opaete iyapu vae reta yugüiraata tata guasu azufre jendí oí pipe vae pe iñu vae reta ndive. Cua co jae mano mocuia —jei.

Jerusalén ipiau vae

⁹ Jare jocua siete ángel siete copa tinee siete mbaesusere taicueguia vae pe vae güinoi vae reta güi penti ou che aí vae pe jare jei cheve:

—Eyu cua pe. Taechaca ndeve Ovecha-rai jembirecorá vae.

¹⁰ Jayave ángel chereraa Espíritu Santo imbaepuere pe penti ívitu guasu re. Ívate ete jocua ívitu. Jayave uechaca cheve jocua tenta guasu Jerusalén jee vae ugüeyi ou ara güi Tumpa oí vae güi. Jocua tenta guasu uñeñono tee Tumpa peguará. ¹¹ Tumpa umbiyaruanda ma. Jare uvera penti ita ipóra ete vae uvera rami. Ita ipóra ete vae jaspe jee vae echo. Jocua jaspe jee vae jesáca vidrio rami. ¹² Jare tenta guasu uñequése vae tuicha jare ívate, jare güinoi doce jonque. Jare jonque reta pe ñugüinoi doce ángel reta. Jare jonque reta re uyecuatía ñugüinoi Israel pegua reta jee. Echa'á doce atí co jocua Israel pegua reta. ¹³ Guarasi oé vae cotí tenta guasu jonque reta mbapí co. Norte cotí tenta guasu jonque reta mbapí vi. Sur cotí tenta guasu jonque reta mbapí vi. Guarasi uique vae cotí tenta guasu jonque reta mbapí vi. ¹⁴ Jare tenta guasu uñequése vae iguapica reta doce co. Jare iguapica reta re uyecuatía ñugüinoi Ovecha-rai jemimondo reta jee. Echa'á doce co jocua Ovecha-rai jemimondo reta.

¹⁵ Jare imiari cheve vae güinoi penti ívira oro pegua umiaanga vaerá tenta guasu jare jonque reta jare uñequése vae. ¹⁶ Jare guarasi oé vae cotí jare norte cotí jare sur cotí jare guarasi uique vae cotí tenta guasu uñequése vae oyovaque. Jare ángel umiaanga tenta guasu ívira pe. Jare ipucucue jare ipiguasue jare ívatecue oyovaque. Penti penti cuatrocientos sesenta legua rupi. ¹⁷ Jare ángel umiaanga tenta guasu uñequése vae. Ívatecue ciento cuarenta y cuatro codo. Penti cuimbæ jendivanga uyemiaanga yave, jae co penti codo. Echa'á jucuarái umiaanga ángel.

¹⁸ Jare tenta guasu uñequése vae ita ipóra ete vae jaspe jee vae pegua co. Jare tenta guasu etei oro catuui. Jesáca vidrio rami. ¹⁹ Jare tenta guasu uñequése vae iguapica reta ita ipóra ete vae pegua co. Uyuaví reta uyugüi. Penti jaspe jee vae. Íru zafiro jee vae. Íru ágata jee vae. Íru esmeralda jee vae. ²⁰ Íru ónica jee vae. Íru cornalina jee vae. Íru crisólito jee vae. Íru berilo jee vae. Íru topacio jee vae. Íru crisopraso jee vae. Íru jacinto jee vae. Íru amatista jee vae. ²¹ Jare jocua doce tenta guasu jonque reta doce ita ipóra ete vae perla pegua co. Penti penti onque uyeyapo penti perla güi. Jare tenta guasu icalle reta oro catuui. Jesáca vidrio rami.

²² Jare mbaeti etei Tumpa jo joco pe. Echa'á yandeYa Tumpa opaete mbaepuere güinoi vae jare Ovecha-rai yugüreco joco pe penti Tumpa jo iepipica pe. ²³ Jare tenta guasu pegua reta ueca'á guarasi jare yasi umiembipe vaerá. Echa'á Tumpa jare Ovecha-rai jocua tenta guasu pegua reta jembipe co. ²⁴ Opaete ívi pegua reta uguata cavita joco pe, tembipe oíta ramo, jare ívi pegua reta juvicha guasu reta yugüeruta joco pe umbiadora vaerá Tumpa. ²⁵ Jare ndarau etei uyeyuquenda tenta guasu jonque reta ara rupi. Jare ndarau vi pítu joco pe. ²⁶ Jare opaete ívi pegua reta yugüeruta joco pe umbiadora vaerá Tumpa. ²⁷ Èrei ndarau etei uique jocua tenta guasu pe ipotave iquia vae jare ipotave pichíi vae uyapo vae jare ipotave iyapu vae. Jaeño Ovecha-rai ilíbro tecove opa mbae vae pegua pe jee uyecuatía oí vae reta uiqueta joco pe.

22

¹ Jayave ángel uechaca cheve i usiri vae iquia mbae vae. Jesáca ete. Vidrio echa cheve. Tecove opa mbae vae pegua co jocua i. Oé usiri Tumpa jare Ovecha-rai iguapia güi. ² Jare tenta guasu icalle mbite rupi jare i usiri vae jembei reta rupi ñugüinoi ívira tecove opa mbae vae pegua reta. Jocua ívira ía doce uyuaví vae reta co jare yagüiye opa yasi rupi. Jare ívi pegua reta ipuere uiporu ívira joqui reta moará agüiye vaerá imbaerasi.

³ Jare ndarau ma oí yepipeyu ívi re. Echa'á Tumpa jare Ovecha-rai iguapia oíta joco pe. Jare Tumpa jembiocui reta uyeyocuita chupe. ⁴ Jare jae reta uechata Tumpa. Jare güinoita reta isiva re Tumpa jee. ⁵ Jare ndarau pítu joco pe. Ndarau uiporu mechero jare guarasi jembipe. Echa'á yandeYa Tumpa umeeta chupe reta tembipe. Jare jae reta oporoyocuita jaeño mai pegua.

Cristo ou yeta imambae

⁶ Jare ángel jei cheve:

—Cua ñee reta añete co. Yandepuere yarovia catu. Aracae yandeYa Tumpa uicuaaca mbaembae ñíee umimbeu vae reta pe. Echa'á jae oñono tee reta iyupegará ñíee umimbeu vaerá. Jae ramíño vi yandeYa Tumpa chembou aicuaaca vaerá jembiocui reta pe imambae uyeyapota vae. Che co jae penti ángel Tumpa pe uyeyoci vae —jei—. ⁷ ‘Mase, aa yeta imambae’ —jei yandeYa, jei—. ‘Piyapo yave ñee cua tupapire pe ñugüinoi vae reta, piyeroziata co. Echa'á cua ñee reta umimbeu peve uyeyapota vae’ —jei, jei.

⁸ Che etei aecha cua mbaembae jare ayandu vi. Jare aecha jare ayandu yave, ayeatica ángel cua mbaembae uicuaaca cheve vae jovai ambiadora vaerá. ⁹ Èrei jae jei cheve:

—Agüiye chembiadora. Che vi ayeyocui Tumpa pe, nde ndiyeyocui chupe rami. Che vi amimbeu Tumpa iñee, yanderivi umimbeu rami. Echa'ā jae reta vi uyapo ñee cua libro pe uyecuatía oī vae reta. Tumpaño embiadora —jei.

¹⁰ Jare jei vi cheve:

—Emimbeu íru vae reta pe ñee cua libro pe ñugüïnoi vae reta. Echa'ā cua ñee reta umimbeu uyeyapota vae jare coiño ma ou uyeyapo vaerā —jei—. ¹¹ Jupi mbae vae uyapo vae jecuaeño tuyapo jupi mbae vae. Jae ramíño vi pichii vae uyapo vae jecuaeño tuyapo pichii vae. Jae ramíño vi jupi vae uyapo vae jecuaeño tuyapo jupi vae. Jae ramíño vi uñeñono tee Tumpa peguarā vae jecuaeño tuñeñono tee Tumpa peguarā —jei—.

¹² Mase, aa yeta imambae —jei yandeYa, jei—. Jare ameeta opaete vae pe imbaerā penti penti uyapocue vae rupi —jei, jei—. ¹³ Che co jae Alfa jare Omega jee vae. Che co jae tenondegua vae jare taicueguia vae —jei, jei—. ¹⁴ Piyapo yave yandeYa iporoyocui reta, piyeroziata co. Echa'ā piyapo yave, pepuereta peu ivira tecove opa mbae vae pegua ía, jare pepuereta pique jocua tenta guasu pe jonque reta rupi —jei—.

¹⁵ Echa'ā tenta guasu pe ndarau uique Tumpa iñee ndive oyovaicho vae reta, jare ipaye vae reta, jare iaguasa vae reta, jare upuruyuca vae reta, jare tumpa-raanga reta umbiadora vae reta, jare opaete iquiréi reve iyapu vae reta —jei.

¹⁶ Jare yandeYa Jesús jei cheve:

—Che etei amondo penti ángel cheve uyeyocui vae umimbeu vaerā peve cua mbaembae uprugüirovia vae uyembatimbati vae reta rupi. Che co jae David lyipi jee vae. Che co jae David iñemoñaa reta pegua. Che co jae yasitata guasu jembipe vae neimbove asi uyecuua vae —jei.

¹⁷ Jare Espíritu Santo jare Ovecha-raí ndive umodata vae jei:

—Eyu.

Jare uyandu vae tei:

—Eyu.

Iúe vae ipuere ou cua pe. Ipotave vae ipuere jou i tecove opa mbae vae pegua jepi mbae reve. ¹⁸ Ñee cua tupapire pe ñugüïnoi vae reta uicuaaca uyeyapota vae. Che amimbeu opaete cua ñee reta uyandu vae reta pe cua: Ime yave quía cua ñee reta ndive íru ñee reta umiruta vae, Tumpa umeeta chupe uioporara vaerā susere cua tupapire pe uyecuatía ñugüïnoi vae reta. ¹⁹ Jare ime yave quía ñee cua tupapire pe ñugüïnoi vae reta uipotata umbai vae, Tumpa ndarau umaeño jese jou vaerā jocua ivira tecove opa mbae vae pegua ía. Ndaraú vi umaeño jese uique vaerā tenta guasu uñeñono tee Tumpa peguarā vae pe. Ndaraú vi umaeño jese güïnoi vaerā imbaerā mbaembae icavi vae cua libro pe uyecuatía oī vae.

²⁰ YandeYa umimbeu cheve opaete cua. Jae etei jei:

—Añete co, aa yeta imambae.

Yande yae:

—Amén. Eyu, yandeYa Jesús.

²¹ YandeYa Jesús tumee ipiacavi opaete imbae reta pe. Amén.